

清代七百名人物傳



蔡冠洛 编著

清代七百名人傳

下册

北京市中国书店

第二編實業 水利

于成龍

于成龍字振甲。漢軍鑲黃旗人。康熙七年。由廕生授直隸樂亭知縣。八年。署灤州知州。以罪囚脫逃。降調樂亭。民列其善政。叩閣籲留。部議保留。疊經飭禁械爲首者繫獄。九年二月。縣民再叩閣。下巡撫金世德察奏。所列善政皆實。復縣任。十三年六月。以緝盜逾限未全獲。應降調。金世德奏言。樂亭舊號疲邑。成龍撫綏調劑。與民相宜。可否留任。部議不准。得旨于成龍撫綏疲邑。與民相宜。其留任。十八年。擢通州知州。二十一年。直隸巡撫于成龍遷兩江總督。疏薦其可大用。尋又請救廷臣。推清操久著與相類者。爲江寧知府。上即擢成龍任之。二十二年三月。擢直隸巡撫。頒行賜銀千兩。表裏二十端。諭詢畿輔重地。利弊應興革者宜何先。成龍奏弭盜爲先。奸盜之徒。倚仗旗下名色。窩藏匪類。有司明知而莫敢深究。嗣後有如此者。臣當執法治之。既抵任。疏言。弭惡之方。在力行保甲。今民間已申飭遵行。惟旗下莊屯。向不屬州縣管轄。本旗統領官。遠在京城。僅有撥什庫在屯。未能約束。今應令旗人與民戶同編保甲。以撥什庫與鄉長互相稽察。無論盜所劫之家。是旗是民。俱協力救護。能擒獲者賞給。如窩盜縱盜。許州縣官詰訊申報。又疏言。燕山六衛。所轄遼闊。與州縣不相統屬。遇有賊盜。止責汛弁緝拿。而衛員漠不關心。此賊盜所以充斥也。請嗣後以衛地近州者歸州。近縣者歸縣。則保甲易編。匪類易察。京東之通州。西之盧溝橋。南之黃村。北之沙河。宜設捕盜同知四員。分駐其地。自守備以下。分汛各官。徵巡墩臺諸務。及旗下莊屯。悉歸稽察。則武弁有所顧忌。旗人亦受約束矣。疏並下部議行。先後察究武清易州等處。怙惡不悛之旗人。請旨寘諸法。又疏言。順德廣平大名等府。額解狐皮花絨芝蔴。運送費多。恐借端苛派。請改解折色。又言。河工歲修派夫。應令旗地與民地一體計畝均役。下部議。格於例。並得旨如所請行。二十六年四月。上以于成龍廉能稱

職。誠心愛民。特旨嘉獎。加太子少保。十月。巡行畿甸。賜鞍馬並銀千兩。十二月。詔同山西巡撫馬齊往鞠湖廣。巡撫張汧貪款得實。論罪如律。初。成龍任安徽按察使。靳輔爲河道總督。大治淮黃隄壩。上以其未能兼顧下河。敕成龍督理之。遇事得自陳奏。成龍請濬海口故道。靳輔請於下河築長隄。東水注海。上詔詢籍隸淮揚諸臣。奏宜從成龍請。工部尙書薩穆哈奉命往問居民。還奏百姓貪謂濬海口無益。大學士九卿議未決。成龍遷巡撫。以待郎孫在豐督理下河。靳輔奏開中河以便漕運。又請於高家堰外增築重隄。東水北出清口。則下河不濬自治。上以疏示成龍。成龍奏下河宜濬。重隄不宜築。開中河無益。反爲民累。上允靳輔開中河。遣尙部佛倫侍郎熊一瀟同總督董訥總漕慕天顏會勘增築重隄事。佛倫等還奏。宜從靳輔請。慕天顏孫在豐御史郭琇相繼劾靳輔。與屯累民。靳輔亦劾募天顏孫在豐附和成龍。朋謀阻撓。至是成龍自湖廣還。詔同靳輔入對。靳輔言開濬海口。有海水倒灌之患。成龍奏若築高家堰重隄。縱上流之水不來。而秋霖暴漲。天長六合等處之水。洩歸何處。故海口仍應開濬。上罷靳輔任。以福建總督王新命代之。別遣部臣代孫在豐。五月。學士開音布侍衛馬武闕中河。還奏商賈舟行不絕。漕運可通。又劾募天顏前此禁止堵塞支河。勒令已進中河漕運退回。有意阻撓。命逮募天顏鞫問。得成龍寄書。令勿順從靳輔狀。議削成龍太子少保。降二級調用。得旨留巡撫任。二十九年。內陞左都御史。兼鑲紅旗漢軍都統。三十一年二月。王新命爲山東巡撫。佛倫劾罷。靳輔仍復任。十二月。靳輔卒。成龍任河道總督。三十三年正月。奉詔至京。疏言。運河自通州天津至山東嶧縣。卑薄各隄。宜加築高厚。武清八百戶等處。宜增建月隄。黃河自樂澤縣至江南礪山縣。卑薄各隄。均宜加築。高堰六壩。周橋大壩。永安西隄。均宜改建石工。其毛城鋪等處。舊有引河。宜疏濬深通。檀度寺東隄及茆家園等處。挑挖引河。即以所挖之上。築增兩岸。東水子隄。徐州城石岸。急應大修。清江浦迤下至黃浦。東西兩隄。揚州屬江都東隄。高郵西隄。俱帶加築。並修葺開壩涵洞。又疏言。河防各設專員。並無顧此失彼之虞。天津道有地方職掌。應增設兩道。一駐河西務。一駐倉州。分營北自通州。南至德州河務。江南河工錢糧。向分廳庫收支。不屬淮徐淮揚兩道職掌。應增設河庫道。桃源同知現駐南岸。應

增北岸同知一。邵睢同知宿虹同知現皆駐北岸。應增南岸通判各一。山陽清河舊設同知一。應增一員。分管兩縣。毛城鋪開壩緊要。徐屬同知。難以兼顧。應增通判一。駐碭山縣。七月。疏言。洪澤一湖。密近淮城。爲淮睢二水所匯。歸伏秋水發。波濤澎湃。僅恃高堰土隄。雖加築堅固。仍須歲修搶修。急宜改建石工。所有六壩及自小黃莊起至古溝東涵洞止。共估工料銀五十萬兩有奇。疏下部議。從之。上親征噶爾丹。成龍以左都御史銜同侍郎李綱左通政喀拜督運軍糧。三十六年。以功加四級。復予騎都尉世職。三十七年二月。命以總督銜管直隸巡撫事。三月。興修永清固安至張協七十里舊隄。挑濬潭河淤沙。十旬竣工。詔錫名永定河。建廟以祀。奏設南北岸兩分司一。以重責成。視黃運兩河之例。敕部擇諳練河務之候補候選人員赴工效用。董安國以不諳河務罷任。仍授成龍河道總督。三十八年三月。上巡閱高家堰歸仁隄等處。以增築疏濬事宜。諭令籌辦。五月。疏言。黃運兩河。舊派徐州屬邑民夫六千九百餘名助河兵供役。率以老弱充數。且多逃曠。請按派夫舊額。改令每名徵銀五兩。爲添設河兵月糧。又疏言。皇上親視河工。指授方略。大爲修治。臣以需帑浩繁。請許急公人員捐修。蒙諭如果修築堅固。疏濬深通。告成之日。自有議敘。仰見聖心寸功必酬。現在應修之處不一。若不酌定成例。恐効力人員。觀望不前。謹條列計丈議敘各款。疏並下九卿議行。九月。以疾乞假。命在任調理。三十九年三月卒。諡曰襄勤。子永世襲騎都尉。雍正八年。以成龍入祀賢良祠。

張玉書

張玉書。字素存。江南丹徒人。父九徵。順治九年進士。官至河南提學僉事。玉書以順治十八年進士。改庶吉士。康熙三年。授翰林院編修。十五年。擢國子監司業。旋轉侍講。歷左右庶子。充日講起居注官。十九年五月。以進講稱旨。敕部議敘。加詹事府詹事銜。加一級。六月。陞侍講學士。二十年。擢內閣學士。充經筵講官。二十一年十月。教習庶吉士。二十二年十二月。遷禮部侍郎。兼翰林院掌院學士。二十三年。丁父憂。二十六年。服闋。特陞刑部尙書。二

十七年五月。開音布監督高郵州石工。奏請閉塞支河口。爲中河蓄水。聖祖命玉書偕圖納前往勘視。並遍閱毛城鋪高家堰以及海口諸處情形。詳加審度。具奏。頒行。上謂玉書曰。此行是非可否。當秉公陳奏。不可效熊一瀾託故推諉也。玉書叩頭領訓。先是開音布奏參高郵州河員擅開減水三壩。請議處。比玉書至。即馳奏河員開壩。乃循舊例。應開無罪。開音布不加詳核。遽行瀆奏。請議處。八月。遷京。疏言。奉命勘閱河形。黃河西岸出水頗高。年來大水未曾溢岸。則河身淤塞之說非也。海口岸寬二三里。河流飛迅入海。絕無阻滯。諸減水壩。應如舊閉塞。其現在挑濬各工。勞而無益。應請停止。惟是中河一道。利濟舟楫。得此免涉黃河百八十里之險。殊關緊要。但形勢逼近黃河。既不可挑寬。而太狹又不能容納運河及駱馬湖之水。臣勘蕭家渡楊家莊新莊口。有衝決舊河之處。請飭河臣增建減水壩。相時宣洩。則中河舟楫。可以長通。惟於中河淺窄之處。酌量挑濬。支河口應如開音布所奏。永行閉塞。奏入。上均如所議。是年十二月。特旨差玉書往浙江按理事件。是月。調禮部尙書。二十八年二月。上南巡。駐蹕蘇州府。玉書自浙江還。復命杭州將軍郭丕奏。民人杜光遇控於撫臣金鉉。陳兵丁擾民十款。有百姓生則倒懸。死無安土之語。金鉉行藩司李之粹查訊之。粹據實陳奏。玉書奉敕確查。至是復奏云。遍查並無杜光遇其人。實由撫臣金鉉捏造虛款。暨藩司李之粹迎合附會。情罪非輕。應按律問罪。二十九年。授文華殿大學士兼戶部尙書。三十年冬。命闢河工。與圖納偕行。三十一年正月。還。繪圖以進。時河臣靳輔請於高家堰增築小隄。上問玉書高家堰水勢如何。另築小隄。果有益否。玉書奏云。曩者黃漲時。淮流被逼。故洪澤湖水。視昔爲高。今擬築小隄之處。去高家堰不遠。河湖水漲。即高家堰之大隄且不可保。豈小隄之可衛。築之無益。不如其已。上問宿遷一帶民生若何。玉書奏。小民沐聖主憂勤。甚爲得所。上欣悅。玉書又疏高家堰一帶河工。惟史家刮至周橋最爲衝要。不急於此處重設。隄防雖多。築隄數重無益也。臣度史家刮至周橋約一萬四百餘丈。宜煩聖慮。飭河臣迅速加築。至三官廟諸口。俟其簾籠垂朽。改用石以期永久。即現在石工。亦須加土擁護。此今日河工急務也。自今高家堰擬築小隄之處。惟令河臣每屆歲修。親勘情形題報可耳。上深以爲然。二十五

年。聖祖親征厄魯特噶爾丹。駕臨克魯倫河。噶爾丹聞風奔竄。敕大將軍伯賽揚古扼要路邀戰。斬殺幾盡。噶爾丹僅以身免。時玉書從征沙漠。預參謀議。至時奉王公以下文武百僚賀表以進。行慶賀禮。三十六年六月。充平定朔漢方略正總裁官。三十九年。丁母憂。服未闋。奉詔來京。入閣辦事。時河臣張鵬翮奏河工事宜。上問玉書。奏對甚悉。乃降旨諭張鵬翮。昨問大學士張玉書。據稱河水尙大。高家堰俱爲湖水所侵。如是。則泗州盱眙安得不被水災。河身之淺深。以洪澤湖水之高下爲驗。今聞洪澤湖之水。比甲子年尙高數尺。可見河身未曾刷深。恐高家堰之隄。過此以往。未可知也。四十年三月。從上南巡。四月。駐蹕蘇州府。命偕學士揆敘考試諸郡舉貢生員。閱卷呈覽。得汪泰來等五十三人。尋駐蹕江寧府。又偕揆敘等閱卷呈覽。得錢榮世等五人。及御舟次高資港。玉書奏曰。前去京江不遠。臣之敝廬在焉。苦城中無駐蹕華之地。輿情雖切。未敢恭迎御輦入城。懇請行幸江天寺。多留數日。與親臨鐵甕城無異也。上乃再留一日。四十六年。河臣張鵬翮請開溜淮套河。迎上親臨相度。二月。自京起蹕。及泊清河口。往武家墩周視良久。見所樹竿之處。多屬民冢。非掘冢不能開濬。意惻然。乃召見河臣張鵬翮。斥其請開溜淮套之非。鵬翮叩頭請罪。玉書奏曰。向者老人白英。曾有引汶水分南北流之議。策之善也。不若別作壩引汶水通漕。其下流專以淮水敵黃。黃水趨海。此萬世之利也。上善其言。諭鵬翮曰。明代黃水強而淮水弱。今則淮強而黃弱矣。與其開溜淮套無益之河。曷若將洪澤湖出水之處。力行挑濬。令其寬深。使清水愈加暢流。至蔣家壩天然壩一帶。舊有河形。宜更加挑濬使通。小河不難運料。商民可以通行。漕船載運。利亦不淺也。四十九年。玉書以疾乞休。有旨慰留。五十年五月。從上幸熱河。甫至疾作。數遣御醫調治。不能起。未及繕遺本而卒。年七十。玉書賦性仁厚。歷官五十年。爲太平宰相二十年。風度凝然。得大臣體。所作古文辭春容典雅。稱一代大手筆。嘗進講乾清宮。帝問理學之名。始於宋否。玉書奏。道理自在人心。宋儒講辨加詳耳。帝曰。日用常行無此非理。自有理學名目彼此辨論。而言行不符者甚多。若不居講學名而行事允合。此卽真理學也。及卒。帝命大學士溫達會同翰林部院官員內務府總館往弔。賜帑金千兩。經紀喪事。又遣內務府監製棺槨帳幔。沿途撥夫役護送。

至京。上親書輓章。加贈太子太保。諡文貞。五十二年二月。以子張逸少陞翰林院侍讀學士。以示眷篤舊臣之意。

靳輔

靳輔。漢軍鑲黃旗人。父應選。官通政使司參議。輔由官學生於順治九年。考授國史院編修。十五年。改內閣中書。尋遷兵部員外郎。聖祖康熙元年。遷郎中。七年。遷通政使司右通政。明年。擢國史院學士。充纂修世祖實錄副總裁官。九年十月。改內閣學士。十年六月。授安徽巡撫。十一年四月。奏臨淮靈璧二縣虛報開墾田四千六百餘頃。應請旨豁免田糧。從之。十三年。有吳三桂。耿精忠。分寇江西。煽誘饒州弁兵從逆。上詔輔增兵接壤防守。輔尋遣兵會剿。擒斬歙縣賊宋鑣等。十五年二月。疏言。戶兵二部。因軍需浩繁。令裁驛站經費。臣以爲欲省經費。宜先除糜費。在外諸臣。非要務勿專差齎奏。則火牌糜費節省十之八。京差官員。酌量併減。卽解餉解礮。沿途自有官兵護送。亦止需部差一員。則勘合糜費節省十之三。嚴禁各員役橫索騷擾。則節省無名之費更多。安徽所屬站額銀二十六萬兩有奇。以十分之四科之。歲省十萬餘兩。通天下計之。每歲所節。當不下百餘萬。可以裕軍餉。甦驛困。得旨驛遞繁苦。皆由差員橫索騷擾。著嚴行飭禁。下部詳議。如所奏。定爲例。是年。疏報存留各屬橫刷等項。銀十一萬七千餘兩。節省驛站銀十二萬九千餘兩。得旨靳輔節省存留驛站各項錢糧。爲數甚多。具見實心任事。下部議敘。加兵部尚書銜。十六年八月。授河道總督。七月。疏言。黃河之水。裹沙而行。水合則流急。而沙隨水去。水分則流緩。沙停河底日高。故全賴各處清水。並力助刷。始能奔趨歸海而無滯。歸仁一隄。原以障淮水及水涸。邱家白鹿諸湖水。不使侵淮。且令小河口白洋河入黃刷沙。自順治十六年。歸仁隄潰。淮湖諸水侵淮。不復入黃刷沙。黃水從小河口白洋河二處。逆灌積沙。漸成陸地。康熙六七年間。王家營邢家口潰。而黃水不由雲梯關入海。古溝翟家壩潰。而淮水不赴清口會黃。十五年。高家堰清水潭爛泥淺皆潰。而運道益淤。徐州以下。黃流緩弱。散漫。而河底益高矣。謹以大修事宜分列八疏。一曰。取土築隄。使河寬深。清江浦歷雲梯關至海口。河身泥淤。須於

兩旁離水三丈。各挑引河一道。面闊八丈。底闊二丈。深一丈二尺。即以掘取之土。高築隄岸。堤底七丈。面闊三丈。高一丈二尺。則黃淮下注。中央既有舊存一二十丈。河身左右。又各有八丈。新鑿之河。所存舊隄。薄僅三丈。一經三面夾攻。自可盡行刷去。新舊之河合而爲一。河身寬至四十丈。深至二丈。可以漸復舊觀。其夫役請並令山東河南協募。二曰。開清口及爛泥淺引河。使得引淮刷黃。三曰。加築高家堰隄岸。蓋欲堵決口。不先修築殘隄。恐水將尋隙奔潰。而石工費甚浩繁。板工不能耐久。伏思水性至柔。乘風則剛。其板石諸工。率皆陡峻。故怒濤撞擊。潰即隨之。惟遇坦坡及平漫而上。順縮而下。隄制水而不抗水。雖經大水。乘風高低。不虞激潰。今於隄外近湖之處。挑土幫築坦坡。每隄高一丈。築坦坡五丈。卽有舊存樁木。亦聽其埋於土內。以爲隄骨。夯杵堅實。密布草根草子於其上。俟其茂長。則土益堅。隄益固。四曰。周橋關至翟家壩共三十二里。原衝支河九道及決口三十四處。須次第堵塞。臣驗各處掃工。率用柳枝蘆草。費大而不能經久。伏思剋水者土也。當求東土禦水之法。改埽工爲瀟包裹土。麻繩細紮而填之。則費省而工亦堅固。五曰。深挑清口至清水潭二百三十里。運道所挑之土。俱傾於東西兩隄外。卽以幫築西隄坦坡。增培東隄堅厚。六曰。合淮陽田。按上中下三則。每畝納修河銀三錢至二錢。有差。南船來往淮陽兩關。納剝淺銀一年。以米石每豆二分。貨物每斤四分爲率。七曰。截南河中河北河通惠四分司。就近歸道員管理。截管河同知山清安海宿桃三缺。改併山盱歸仁邳宿三員。以重責成。八曰。按里設兵。畫隄分守。暇則栽柳蓄草。添土幫隄。每月乘桴船下鐵掃帚刷河底淤沙。督率員弁嚴立課程。用期久遠。疏下王大臣議。以軍務未竣。大修募夫甚多。宜暫停。上命輔熱。輔復申前奏。唯遲土用夫。請改爲車運。遂皆如所請。詔發帑興工。輔乃開通清口。爛泥淺引河四道。濬清江浦至雲梯關外河身。創築東水隄一萬八千餘丈。塞王家岡武家墩高家堰諸決口。河隄外加築縷隄及格隄。徐州宿遷築淺水壩十三座。其壩東西寬十二丈。南北長十八丈六尺。中立磯心六座。兩旁俱用石牆。土內密釘排椿。灌以漿灰。上鋪石板。聯以鐵錠。每壩一座。共成七洞。每洞各寬一丈八尺。計其洩水之地。共十二丈六尺。清水潭舊堤衝潰。輔爲築深就淺。計築西隄九百二十餘丈。東隄六百餘丈。

更挑新河長八百四十丈。奏改名永安河。又以甘羅城西運口黃流內壘。易致停淤。自新莊開西南挑濬至太平壩。又至文華寺挑濬至七里關。復轉而西南。亦接至太平壩。因遠爛泥淺。去淮黃交會之地約十里。計閱兩月工竣。先是。漕船由駱馬湖行八十餘里始抵濠灣。夏秋則漲漲。各春則水涸。重運多阻。輔於湖旁疏濬。卓河故道。上接伽河通運。二十年三月。以大修已越三年。黃河未盡歸故道。自請議處。部議革職。得旨留任督修。二十一年五月。上遣尙書伊桑阿侍郎宋文運等閱工。並以候補布政使崔維雅隨往。因具奏上河防芻議兩河治略二書。及條列二十四事。欲更改輔所行減水壩諸法也。十月。伊桑阿等還奏。斬輔建議大修。已用帑銀二百五十餘萬兩。今蕭家渡決口未堵。宿遷沈陽等處。田地淹沒。黃河不歸故道。其言固難盡信。崔維雅改議修築。亦未必成功。輔疏言。河工次第告竣。海口大關。下流疏通。腹心之患已除。蕭家渡決口。堵塞亦易。不宜有所更張。因詳辨維雅陳二十四事不可行。乃召輔來京。十一月。輔至。奏蕭家渡決口。明年正月可塞。崔維雅所議挑河。每日用夫四十萬。築堤以十二丈爲準。斷不可行。上是之。二十二年四月。疏報蕭家渡工成。河歸故道。請修七里溝險汛。天妃壩王公堤等鬧座。又請增開封歸德隄工。以防上流壅滯。十二月。詔復原職。二十三年十月。上南巡閱河。御書閱河隄詩賜之。二十四年正月。疏請添建黃河南岸毛城鋪減水閘一。王家山十八里屯減水閘三。北岸大谷山減水閘二。以保徐州上流隄工。並於歸仁隄添建石壩二。攔馬河及清河運口各添建石閘一。九月。疏言。勘閱河南隄岸。考城儀封陽武三縣。應幫築隄工七千八百七十九丈。封邱縣荆隆口。應築大月隄三百三十丈。滎澤縣應修築埽工二百一十丈。以防上流異漲。並請增設蘭陽儀封滎澤河員。免開封歸德二府居民採辦青柳事。下部議俱從之。是時。上念高郵寶應諸州縣湖水泛溢。民田被淹。命安徽按察使于成龍經理海口及下河事宜。仍聽輔節制。輔疏言。下河卑於海潮五尺。疏海口則引潮內侵。大不便。請自高郵城東車邏鎮築長隄二。歷輿化白駒場至海口。東所洩之水入海。隄內涸出田畝。丈量遷民。其餘田。招民屯墾。以抵經費。廷議如所奏。召輔及于成龍進京。成龍力主開濬海口故道。輔仍議築長隄。高一丈五尺。東水敵海潮。大學士九卿俱從輔議。通政使參議成其範。

給事中王又旦。御史錢鈺從成龍議。時寶應人侍讀喬棻。奏輔議非是。乃命尙書薩穆哈等往勘視。尋以開海口無益回奏。會江寧巡撫湯斌入爲尙書。奏下河宜疏濬。上命侍郎孫在豐往董其事。二十六年七月。詔詢下河田疇。何策可紓水患。輔疏言。宋元以前。高郵寶應諸湖。原皆田疇。臣前堵築清水潭。深挑兩隄。中間河底。有宋元舊錢及甌井石街。其爲民居可證。蓋黃河在宋元時。雖南侵而尙未全徙。至明代始絕北流。南奪淮梁以入海。致淮水壅不得下。清河縣之洪澤村。漫淹而爲洪澤湖。又從高家堰壘家壩旁流。東注爲高郵寶應諸湖。自此永不復田疇之舊。且爲患於下河矣。臣屢經剿驗。運河隄頂。卑於高家堰隄頂一丈有奇。故減水壩之建。在堰隄。可洩水一千方。在運隄。則便可洩水一千二百方。所以歷七年之久。三遭大漲而運隄安然無恙。運隄所洩之水。以下河爲壑。下河之東卽大海。濬海口似可紓水患。然自清江浦南行三百餘里。至江都縣之茱萸灣。折而東。百餘里至泰州。又百餘里至海安鎮。折而北。卽范公隄。沿隄而行。歷安豐東臺河梁丁溪白駒劉莊等場。計二百餘里。而抵鹽城縣。北行百餘里而至廟灣場。折而西。百餘里爲蘇家嘴。又百餘里仍回清江浦。計程千里有奇。惟廟灣天妃石磯三口。向係洩水入海之處。必登舟過渡。餘皆可以馳馬之路。其卑處於周圍馬路中者。南北三百餘里。東西二百餘里。形如釜底。止就釜底挑挖。徒增釜底之深。當淮流盛漲高堰。洩水洶湧而來。仍不能救民田之淹沒。臣與幕友陳潢。反復曲籌。杜患於流。不若杜患於源。高家堰之隄外直東爲下河。東北爲清口。當自翟家壩起。歷唐埂古溝周橋欄高良潤高家堰築重隄一道。約高一丈七八尺至二丈不等。長一萬六千丈。需費七十五萬五千兩。此工一成。東堰隄減下之水。使北出清口。則洪澤湖之水。不復東洩下河。其下河十餘萬頃之地。可變成沃產。而高寶諸湖。俱可涸出田畝數千頃。招人屯墾。可以裕河庫。且高堰原爲最險之工。增此隄則長年保護。洪澤湖廣闊非常。一遇風起。多覆舟沈溺。行此隄內之河。則避湖險。而就安流。有便於商民者甚大。至臣幕友陳潢。前逢聖駕闕工。臣以姓名上達宸聰。其間興工之委曲及將來竣工。非陳潢協力區畫不可。念臣垂老多病。萬一卽填溝壑。或病臥不能馳驅。則繼臣司河者。仍必得陳潢在幕佐之。庶不歧誤。此臣十年以來之血誠。欲吐而未敢者。

今據實陳明。非僅居功蔽賢之念。不忍萌。卽引嫌避忌之私。亦不敢計。疏下廷議。如所請。並賜陳潢僉事道銜。時于成龍任直隸巡撫。詔以輔疏示詢。成龍言。下河宜開。重隄不宜築。上遣尙書佛倫。侍郎熊一瀟。給事中達奇納趙吉士。與總督董誥。總漕慕天顏會勘。天顏在豐議。與輔相左。佛倫等以應從輔。輾還奏。仍下九卿會議。二十七年正月。御史郭秀疏言。海宇昇平。萬邦底定。宵旰殷憂。時切如傷之念者。止一綫黃河。與惟揚等州縣昏墊之黎民耳。皇上委任河臣靳輔。靳輔則聽命於慕容陳潢。如果洪水歸洋。狂瀾永息。猶得有辭。乃今日讎築隄。明日讎挑濬。糜費帑金數百萬。終無底止之期。今日題河道。明日題河廳。以朝廷爵位爲私恩。從未聞有得人之效。又復攬奪民田。妄稱屯墾。取米麥越境貨賣。皇上以下河爲必不可開。而靳輔百計阻撓。欲令功垂成而終止。且屯田一事。皇上洞知其累民。會勘諸臣。亦知其累民。則靳輔陳潢之罪。瞭如指掌矣。陳潢爲靳輔營一家之謀。於國計民生。全無裨益。忌功之念重。圖利之心堅。真國之蠹而民之讐也。監司僉事。何等尊貴。豈容一介小人。冒濫名器。以快靳輔酬報私情。宜卽斥革。敕部嚴加處分。另簡大臣之清廉敏練者。整理河務。庶成功可奏。生靈永利矣。疏下九卿查議。二月。給事中劉楷疏言。河工道廳至雜職。百十餘員。題補之權。總歸河臣。使其虛己求才。果能奏安瀾之效。猶且不可久擅。用人大權。乃在於保舉。及至任事。漫無寸功。惟見每歲報衝決而已。嗣後大小河官。應仍由吏部選補。御史陸祖修疏言。皇上每遇緊要政事。令九卿會議。期於衆論僉同。至當不易。無奈河臣靳輔。身雖在外。而呼吸甚靈。九卿中贊決異同者。不過三四人。皆左袒河臣。不顧公議。如屯田一事。悉依戶部尙書佛倫等所奏具稿。箝衆人之口。伏思民間地畝。各處例有准則。起科。並無額外多餘之理。直隸巡撫于成龍。審事湖廣。將遷。倘蒙親詢。其間利病。根由情弊。始末。可救東南七州縣昏墊之民命。省內府幾百萬糜費之金錢。河臣積惡已盈。中外人心。總望睿斷。罷斥。萬勿讓勞使過。以重邊回。昔帝舜殛鯀。以其逆水之性也。今兼有屯田害民之事。去一靳輔。天下萬世。仰賴聖明。無踰此矣。時慕天顏孫在豐亦疏論屯田累民。及輔阻撓下河開濬事。詔俟于成龍至會議。一併嚴察。輔尋得請入覲。先疏論于成龍。慕天顏孫在豐朋謀陷害。又自辯受命治河之日。正當兩河

壤極之時。自礪山以抵海口南北兩岸。決口七八十處。高家堰決口三十四處。翟家壩成河九道。清水潭久潰。下河七州縣一望汪洋。清口運河變爲陸地。臣晝夜奔馳。先堵高家堰。淮水方出清口。旋堵清水潭。挑挖運河。政移運口。迄今永遠深通。其向來行運之路馬湖。淤淺不能行舟。臣創開阜河。漕艘無阻。久蒙聖鑒。至濬築經費。方臣未任之初。曾特遣部臣勘估計六百萬兩。臣任事後。苦心節省。自徐州起直抵海口兩岸隄工。並高家堰清水潭及前所未估之新開阜河。堵塞楊家莊。修築歸仁隄。政移運口。止用帑二百五十一萬兩。又蕭家渡衝決時。蒙賜帑一百二十萬兩。今一概加修竣工。統計所用僅及前此部臣估計之半。而臺臣郭琇。則曰糜費帑金數百萬。營一家之計。不知何所見而誣臣至此極也。其曰題道廳未聞得人。則河員原因慎重河務。必由河臣保題。定例已久。非自臣始。其曰奪田屯墾。則臣絕不以納糧之民田分釐入屯。其曰越境賣麥。則臣原以變價還部題明。其曰陳潢小人。冒濫名器。則陳潢之蒙恩。實出鼓勵人才之特典。以言冒濫。臣不知何所指。且詆之爲小人。則因于成龍久與結拜弟兄。慕天顏頻與宴好殷勤。孫在豐亦與親密異常者也。自康熙二十二年。兩河歸故運道通行。而郭琇必以供水狂瀾罪臣。科臣劉楷曰。惟見每歲報衝決。臺臣陸祖修曰。逆水之性。又謂清丈隱占。非額外多餘地畝。蓋郭琇與孫在豐爲庚戌科同年。陸祖修爲諸生時拜慕天顏爲師。又係孫在豐教習門生。劉楷陸祖修已未科同年。並江南人與隱占田畝者。無非桑梓親戚年誼之契。故彼呼此應。協力陷臣。慕天顏與孫在豐結婚。姻因于成龍倡開海口之議。故必欲附成龍以攻臣而助在豐。兼奪臣任。夫河臣之職。與督撫不同。督撫統攝地方諸務。稍一興利除弊。易以見德。河臣頻年奔走河濱。以挑築爲務。上費帑金。下費民力。最易招尤致謗。而臣之負謗。更因屯田之清丈隱占。隱占田畝。唯山陽最多。有京田時田之分。時田一畝納一畝之糧。係小民之業。京田四畝納一畝之糧。皆勢豪之業。臣清丈沈陽海州宿遷桃源清河五屬。得三百萬畝。至山陽則終不能丈。以山陽鄉紳多也。臣不顧衆怒。致讎謗沸騰。使中傷臣者。更得以借口。然臣任事十餘年。凡雇夫挑築買辦物料皆給發現銀。雖淮陽各屬。隱占田畝諸人怨臣至深者。亦不能指摘也。伏念河工一事。成之甚難。壞之甚易。自康熙六年兩

河潰決。歷經數河臣治之。十餘年終無一效。臣受任之初。羣議蜂起。百計阻撓。賴皇上不惜帑金。兼授方略。兩河得以復故。正須綢繆善後。而諸臣合計交攻。必欲陷臣殺臣而後已。全不顧運道民生大計。當此衆口鑠金之際。卽皇上欲終始保全。無如諸臣朋謀陷網之密布。倘蒙聖駕再巡親閱隄工。更命重臣清丈隱占地畝。則臣與諸臣之是非功罪立分。臣身負重劾萬死一生。幸得入覲。恐天威咫尺。不得盡吐所欲陳。謹繕疏密奏。疏入。上諭閣臣曰。近因靳輔被劾。讞論其過者甚多。靳輔若不陳辯。朕前後復何所控告耶。此疏並下九卿察議。三月。上御乾清門。命輔與于成龍郭琇各陳所見。于成龍言海口必應開濬。郭琇言屯田奪民產業。上曰。屯田之事。因取民餘田。小民實皆嗟怨。靳輔當亦無可置辯。輔奏。向者河旁田畝。盡被水淹。臣任事後。將決口堵閉。兩岸築隄。河流故道。無有衝決之患。數年水淹之田。盡皆涸出。臣以民間原納租稅之額田。給與本主。其餘丈出之田。作為屯田。抵補河工所用錢糧。因屬吏奉行不善。民怨是實。臣無可辯。唯候處分。上曰。各省民田。未有不濫於納糧之類者。若以餘田作屯。豈不大擾民乎。屯田不行。無可復讞。至下河作何開濬。重隄應否停築。九卿等公同詳酌確讞。尋允九卿議。停築重隄。革輔職。以福建總督王新命代之。陳潢革僉事道銜。初漕船出清口入黃河。行二百里始抵張莊運口。輔奏於清河縣西仲家莊建閘。上自宿遷桃源清河三縣黃河北岸遙接。二隄內加挑中河一道。俾漕船既出清口。截流徑渡北岸。避黃河一百八十里之險溜。由仲家莊閘內進中河。歷卓河伽河北上。及工竣。率士開音布待衛馬武往勘還奏。中河商賈舟行不絕。漕運可通。上諭廷臣曰。前于成龍奏云。靳輔開中河無益。反爲民累。河道已大壞。今開音布等往勘。則云數年以來。河道未嘗衝決。漕艘亦未有誤。謂靳輔治河全無裨益。微獨靳輔不服。朕亦不愜於心矣。若王新命順從于成龍之說。將原修工程盡行更改。是各懷私忿。必致貽誤河工。乃命尙書張玉書圖納等往勘。確讞還奏。河身漸次刷深。黃水迅溜入海。其已建閘壩隄埝及已濬引河。並應如輔所定章程。無庸更改。十一月。輔奉命同工部尙書蘇赫等。往闕通州運河。請於沙河建閘蓄水。通州下流築隄束水。以利漕運。從之。二十八年正月。上南巡闕河。輔從行。諭詢中傳逼近黃河。水漲隄潰可虞。輔奏前曾奉諭。籌攔馬河

減水壩所出之水。每致淹沒民田。臣開中河以東水。兼令漕船避黃河險隘。今若加築遙隄。會不至有患。三月。官復原品。二十九年三月。漕運總督董訥。以北運河水淺。請盡洩南旺湖之水。北流倉場。侍郎開音布以挑濬北運河。奏請上召閣輔。輔奏曰。旺湖水若使偏入北河。必致南河水淺。唯從北河兩旁下埽東水。則水深自可濟運。詔即以輔同開音布經理之。三十年九月。奉命與侍郎博譽。李光地等開黃河險工。三十一年正月。還奏黃河南岸。自徐州以上毛城鋪起。至海口北岸。自大谷山起。至雲梯關以下六套。所有減水壩開。現無衝損。中河亦甚便漕船往來。唯黃河南岸之橫莊煙墩馬灘。北岸之朱家莊安東縣便益門南東門六處險工。有未數月隄。及下埽單薄處。應增築加培。並繪圖呈覽。下九卿議。令河臣如所奏行。二月。王新命以勒取庫銀爲運河同知陳良謨。許龍上諭大學士曰。朕聽政以來。以三藩及河務漕運爲三大事。夙夜廬念。會書而懸之宮中柱上。至今尙存。倘河務不得其人。一時漕運有誤。關係非輕。靳輔熟練河務。及其未甚老而用之。亦得紓數年之慮。令其仍爲河道總督。輔以衰病辭。命順天府丞徐廷璽同往協理。六月。疏言。前所奉詔。截留江北漕糧二十萬石。由黃河運至山西蒲州。接陝西賑濟。臣因開封以西黃河。淺深無定。與漕臣董訥定議。漕船三百八十四。每船預支下運行月銀六十兩。爲增雇刺船夫役之用。共銀二萬三千四十兩。二月初至淮安開行。臣於五月初赴開封。督飭催僱。添雇民船。隨淺隨刺。撫臣閻興邦牒稱水路止可運至孟津。由孟津陸運至蒲州六百三十里。業經山陝兩省議明分運。臣今赴孟津料理。十月。疏言。黃河自河南鞏澤縣至江南清河縣兩岸。各一千餘里。其險工不可疏虞。如南岸之在開封。或疏虞。則黃水入淮。歸德至宿遷。或疏虞。則黃水入睢。桃源清河間。或疏虞。則黃水入洪澤湖。以侵高堰。倘高堰不固。竇應高郵運道。必致淤墊。故尙須籌畫萬全。欲加築前此停築之重隄。爲費甚大。惟就運料小河之隄。加築高二丈廣三丈。乃可無患。北岸之在榮澤。或疏虞。則黃河水上溢張秋。下溢濟寧魚臺豐沛。民田受淹。宿遷清河。或疏虞。則一百八十里之運道亦淤墊。故中河遙隄。必須加築。於西寧橋添建石閘二。仲家莊陶家莊兩閘左右。各添一閘。以備宣洩。其張莊舊運口。臣輔前挑中河時。曾議設閘。因解任未舉行。恐將來山東之水微弱。致

中河淺澀。今宜竟行堵塞。就駱馬湖之東。中河之南建閘。值東水大漲。開以洩之。東水消落。閉以蓄之。庶無他慮。又疏言。黃河隄工。莫重於既成之後。隨時修補。隄根積水。易致汕刷。惟於上流量挖一溝。引沙直注使停。再於下流量挖一溝。引水分洩漸去。其低窪處自然淤平。臣輔前任時。相度董家堂龍窩二處險工。曾設涵洞。引黃灌注於月隄裏。使清水流在月隄外。窪地遂成平陸。徐州長樊大壩險工。亦引黃內灌。淤高窪地二三尺。今邳州舊城迤西。窪地周圍約有百里。水無去路。宜仿已驗之法行之。或慮掘隄。難以修防。則建小閘以酌量引灌。更爲萬全。疏下。九卿議以黃河水勢湍迅。引灌邳州窪地。已屬危險。令再審籌。餘如所請。又疏言。臣前任安徽巡撫。當軍興之際。陳廣助理協宜。及任總河。值高家堰決口甚多。翟家壩未堵二十餘里。成河九道。因盡行築隄。塞河以敵清口之黃。創設減水壩以保高堰之隄。改清水潭隄工於湖內。永保安瀾。濬甘羅城運口至太平壩。以避黃水內灌。挑阜河二十餘里。支河三十里。使駱馬湖不復淤墊。又挑中河。使漕船免黃河逆流之險。凡臣所經營。皆潢之計。議仰荷聖主。如天之福。次第成功。恩賜滿倉事道銜。不意驟遭詆毀。革去職銜。旋即物故。又奉命勘河之尙書熊一瀟。給事中達奇納趙吉士。同時被指摘而去。已蒙恩起復。則無辜受累者。當一體均邀慈鑒。疏下吏部。陳潢已故。屢議。熊一瀟達奇納趙吉士並請旨錄用。時輔再疏。自陳疾劇。乞解任。命內大臣明珠往視。傳諭留准調理。十一月卒於官。年六十。賜祭葬如例。諡曰文襄。三十五年。河道總督董安國以江南士民。籲請捐資建祠。河千入奏。下部議行。四十六年。加贈太子太保。予騎都尉世職。尋令其子治豫襲職。准再襲二次。世宗雍正三年。以治豫向隨父任。明晰河務。由副參領加工部侍郎銜。協理江南河工事務。五年。復追贈工部尙書。予祭一次。七年。命江蘇巡撫尹繼善。擇地建祠祀輔。春秋致祭。八年。詔建賢良祠於京師。以輔入祀。

陳鵬年

陳鵬年。字北溟。別字滄洲。濠廣湘潭人。康熙三十年。進士。初任浙江西安知縣。四十年。河道總督張鵬翮薦其才。

歐敏練。堪理河務。調赴江南河工。四十一年。授山陽縣知縣。遷海州知州。四十二年。聖祖南巡。過沂州。詔截漕四萬石。令張鵬翮選賢員運兗州分賑。以鵬年董其事。四十三年。擢江寧知府。四十四年六月。兩江總督阿山疏劾鵬年收鹽店當舖年規。侵欺龍江關稅銀。無故捉拿關役。重責枷號各款。又以甫經驅逐窩娼之南市樓基址。改造鄉約講堂。寫列聖諭十六條。中懸天語丁寧四字扁額。不敬莫大。事下總督桑額。總河張鵬翮會同阿山定讞。論斬。得旨革職。從寬免死來京。在修書處效力。四十七年九月。特授蘇州知府。四十八年十一月。江蘇布政使宜思恭爲總督噶禮劾罷。詔以鵬年署布政使。四十九年。噶禮續劾宜思恭虧帑。又劾糧道賈樸侵蝕建關開河銀項。並坐鵬年覈報不實。部議革任。發往黑龍江。仍得旨來京修書。五十一年十月。吏部議噶禮與巡撫張伯行互訐事。擬革伯行職。上以張伯行居官清廉。下九卿改議。並諭曰。陳鵬年稍有聲譽。學問亦優。張伯行聽信其言。是以噶禮欲害之。曾奏其虎邱詩中有悖謬語。朕閱其詩。並無干礙。朕纂輯羣書甚多。詩中所用典故。朕皆知之。即未句鷗盟二字。不過託意漁樵。陳鵬年詩見在。今與爾等公看。五十六年。出署霸昌道。既受代。仍回京修書。六十年四月。命隨尚書張鵬翮勘閩山東河南運河。九月。河道總督趙世顯奏令往視河南武陟縣釘船幫決口。十月。鵬年疏言。黃河老隄衝開八九里。見今大溜直趨決口。應於對岸上流廣武山淤灘。另開引河。使溜南趨。再於決口稍東。逢灣取直。亦開一引河。引溜東行。仍歸正河。方可漸次堵築。得旨朕每留心河務。黃河衝決之處。一經奏聞。即詳晰指示。今覽陳鵬年所奏。皆與朕前頒諭旨相合。十一月。趙世顯薦屬員許罷。詔鵬年署河道總督。十二月。奏言。近年淮安樵關。以河工同知管理捐納銀項。令淮徐道貯庫應用。並歸總河稽覈。臣思河工同知職在修防。道臣總理工程。皆難兼顧。臣則馳驅河干之日多。既不暇清理。恐付託非人。請另遣部員管淮安關。而以捐納事例歸江蘇巡撫稽覈貯銀庫。俾臣得董率屬員。專力河務。疏下部議。如所請行。六十一年二月。奏言。河南滎澤縣黃河兩岸隄工。止出水面三四尺五六寸不等。一遇水漲。即漫隄而過。上流水既漫散。則下流河身日漸淤高。隄岸卑矮。且有殘缺。難資捍禦。宜於挑濬以前。增高培厚。疏下部議。令河南巡撫楊宗義速行修築。

是月。武陟縣馬營隄爲冰凌水衝漫。鵬年自清江浦往視。疏言。馬營地勢低窪。從釘船幫南壩尾衝開。至此二十餘里。已成大溜。撫臣楊宗義堵築上口。止險六丈餘。下口止險四丈餘。無如水深溜急。難施人力。今惟有分其上流。借於水偏黃。就廣武山下淤灘之上。王家溝開引河。使水由東南會入榮澤舊縣前正河。用杏葉鐵鈹鑿深。釘船幫下首。新生淤灘。建挑水壩於新河口。東偏於水。會淮南趨。不使東下。則大溜往南。馬營決口。庶可堵築完固。疏下部議行。會奉使閱河之副都御史牛鈕祭酒齊蘇勒等。奏築於河隄頭。至詹家店十八里遙隄。楊宗義以武陟百姓食言。此十八里若築隄。則田畝易淹。且致衝決鄰邑。奏寢其役。詔鵬年確勘。鵬年奏黃河南北兩岸。從榮澤縣始築隄。其上十八里。並無隄。蓋以南岸有廣武山爲屏蔽。而北岸則於水從此出口。當於黃交漲時。聽其流入水寨。及原武縣之黑羊山沙地。水勢寬平。不致衝溢。前人實非無見。若一併築隄。則暴漲必衝射隄根。工險難以防護。歲修亦糜費不貲。宜仍留此無隄之十八里。以備宣洩。從之。又疏言。臣與撫臣楊宗義商議。暫停馬營決口堵築。以三月朔興工。開王家溝引河。並建挑水壩於於河口。謹繪圖呈覽。尋奉詔回辦南河事務。八月。疏言。蕭縣黃河南岸田家樓險工。須建月隄。以資保障。邳州運河徐塘口迤下。河道淺滯。應於徐塘口迤上。挑挖月河。接入彭家河。而彭家河亦應挑深。其山陽縣運河文華寺下引河淤墊。應加挑挖。又高家堰山肝二汛一帶河隄。風浪衝激。應加倍築土一萬四千餘丈。山肝汛天然南北兩壩。原防湖水暴漲。相時開放。今南壩與東水南隄偏近。應築實爲隄。改北壩爲南壩。另於迤北百丈之外建壩。則東水南隄。地寬流緩。可免激射之患。疏下部即行。是月。鵬年復至武陟閱工。先是。馬營決口因挑汛流急。水深停工。牛鈕奏於上流。秦家廠堵築甫竣。旋決。鵬年至。同楊宗義疏言。秦家廠南壩尾刷開一百二十餘丈。入馬營東下。應於南壩臺轉東建扇面壩。挑溜西行。用長椿大掃。建攔河大壩於秦家廠上流。又疏言。前因河勢北趨。宜分洩上流。先開王家溝二十餘里引河。嗣因於黃並漲。河流遷徙。引河口門沙淤移上。接開至劉家溝。水已暢流。衝刷寬深。復因上流於河積灘二十餘里。隔河溜爲南北兩道。南入引河。北仍趨決口。今宜從劉家溝上流無灘隔之官莊峪。開接引河一千四百餘丈。庶全河之水俱洩。

而秦家廠及馬營決口。易以堵築矣。疏下九卿等同牛鈕齊蘇勒議。官莊峪在廣武山腳下。淤灘窄而且長。上流無進水之勢。開引河不若堅修挑水壩。令鵬年同楊宗義酌行。十月。疏言。秦家廠之北壩尾隄。向係漫灘。根腳虛鬆。自霜降後。連日西北風。鼓浪衝刷。漫開百餘丈。大溜歸入馬營。前此南壩尾水。深至三丈有餘。自北壩尾衝開後。漸次平緩。十月三日。堵築合龍訖。其北壩尾及馬營決口。可以次剋期堵築。十一月。疏言。前經定議。自詹家店起至榮澤縣老隄止。包築大月隄。誠爲重門保障。若俟決口堵塞後興工。恐土凍不堅。乘其天氣尚在融和。卽行鳩築。惟中間約有百丈。因兩年汕刷寬深。應俟春融積水漸消。另取乾土。碾夯堅實。乃可竣事。是月。世宗御極。實授鵬年河道總督。尋疏言。前經定議。自於河隄頭至詹家店無隄之十八里。留備宣洩。今河勢北趨。較前迥異。若留此空隙。亦屬可虞。應如牛鈕齊蘇勒原奏。自於河隄頭至詹家店。連築大隄。直接榮澤縣老隄。通計三千四百四十丈。俟春融併築竣工。下所司知之。又疏言。秦家廠北壩尾。十二月初八日合龍。旋復爲冰凌水衝漫。二十餘丈。至二十一日堵閉完竣。其馬營隄埽八九丈。亦可剋期堵塞。奉諭曰。秦家廠北壩尾漫溢之處。雖經堵閉。但係冬日所築。明春冰融之時。務期預爲加謹。保固。鵬年日夜立風雪中。得疾。雍正元年正月卒。年六十有一。喪歸。繞棺哭者數萬人。初任江寧知府。廉幹得民心。人稱之曰陳青天。旋爲總督阿山誣劾下獄。江寧人痛哭罷市。學使者按試。句容。八邑生童。皆火其卷去。居官常以澤不被民爲恥。遺疏入。予謚恪勤。著有道榮堂文集。噶月詞。歷仕政略。河工條約等書。十年。詔各省建賢良祠。河南巡撫孫國璽疏請以鵬年入河南賢良祠。後江寧建賢良祠。鵬年亦入祀。

張鵬翮

張鵬翮。字運清。四川遂寧人。康熙九年。進士。選庶吉士。改刑部主事。遷員外郎。尋遷禮部郎中。十四年八月。充順天鄉試同考官。十五年二月。充會試同考官。十九年。授蘇州府知府。旋丁母憂。二十二年。服闋。補兗州府知府。二

十四年。授河東鹽運司。二十五年十月。內遷通政司右參議。十一月。轉兵部督捕右理事官。二十七年。俄羅斯察罕擄邊。我兵困之於雅克薩城。悔罪乞恩。鵬翮奉使同內大臣索額圖都統佟國綱給事中陳世安等。往定界。事竣還。擢大理寺少卿。二十八年二月。擢浙江巡撫。二十九年。疏言。定海自建縣設官。民人漸集。捍衛必賴城垣。教化必資學校。倉儲監獄。亦須建立。庶足壯觀瞻而副規制。詔允所請。三十二年。疏言。浙省夏杪始雨。田雖補種。穫米未能堅實。難供漕糧。請將明年輪蠲之糧。於今歲免征。又言。紹興府屬之餘姚。上虞。嵊縣。台州府屬之臨海。太平。早後復遇颶風。霖雨。漂沒田廬。並請賑濟。從之。三十三年。疏言。出洋貿易船。必需地方官印烙給票。方准攜帶軍器。恐日久弊生。內地商民。在外國造船。攜帶軍器。難以稽察。請嚴禁。部議從之。初。鵬翮奏。浙省紳民。願每故捐穀四合。力不能者聽之。至是。又奏。杭嘉等府。上年秋收歉薄。請勸輸之穀。暫免一年。上諭。昨歲浙省被災。州縣。方照例蠲豁。並移免漕糧。豈有仍強令捐輸之理。張鵬翮於原題力不能輸。聽從其便之語。自相矛盾。下部嚴加議處。尋。部議革職。特旨寬免。降五級留任。尋。擢兵部右侍郎。命提督江南學政。三十六年五月。遷右都御史。三十七年七月。遷刑部尙書。十一月。授江西南江總督。三十八年春。上南巡。閱視河工。命鵬翮扈從入京。三十九年正月。回京。上謂大學士等曰。張鵬翮前往陝西。朕留心察訪。果一介不取。天下廉吏。無出其右者。三月。調河道總督。諭曰。清黃相會之處。所關最要。黃水高。故清水不得通洩。以致泛溢。今使清水何以得出。河身何以得深。爾宜努力。鵬翮疏陳。一撤協理河務徐廷璽以專總河之任。一撤河工隨帶人員。以免糜帑。一工部與河臣事關一體。請敕部臣毋以不應查駁事。從中阻撓。下部議行。四月。疏言。臣過雲梯關。閱攔黃壩。巍然如山。中間一練之細。如注下流不暢。無怪上流之潰決也。於攔黃壩上流。計黃河水面寬八十三丈餘。則攔黃壩亦應照丈尺拆挑。一律寬深。方足宣洩。亟堵馬家港。使水勢不至旁洩。俟黃水大漲。開新挑之河。資其暢流。衝刷淤墊。則黃水入海。自能暢達。又言。清口爲淮黃交匯處。目今糧艘北上。河身淤墊。竟成平陸。獨有黃河入運河。臣相度形勢。黃河北裴家場引河身高。爛泥淺。引河地多活沙。卽開濬深運。黃水大長。清水不能相敵。應於張福口開引河一千五十丈。深丈

餘寬十丈。引清水於黃河口相近處入運。使之暢達。庶可敵黃。並建閘以時啓閉。又言。人字河自金灣閘至孔家渡。爲河之腰絡。至芒稻山分爲二派。又名芒稻河。兩岸既狹。又有土嶺二處。今湖水方盛。應多集夫。掘使暢流。水口下有芒稻閘。年久塌壞。磯心頗高。宜另建以防江潮。又鳳皇橋引河從橋口至胡家樓。河水絕流。宜加濬引。水從王家樓入運鹽河。匯入芒稻河。又雙橋灣頭二河。現今同入芒稻河。底亦淺。應於冬月濬使深通。其灣河閘雁翅塌卸。宜及時修砌。此三處之水。俱相繼入芒稻河。流十八里入江。現在委員分修。剋期竣工。諸疏俱下部議行。五月。疏言。臣遵旨看視海口。將攔黃壩拆去。河身開濬深通。四月二十一日起至五月初九日工竣。水勢暢流入海。且自動工來。潮恬風靜。得以施工。工甫畢。卽長水二尺。以資開放。此皆我皇上軫念民生至誠。上孚海神效靈所致。請將攔黃壩之稱賜名大通口。並建海神廟以答神庥。得旨俞允。尋上諭大學士曰。前張鵬翮赴任時。朕卽指示以爲必毀攔黃壩挑濬芒稻河人字河。今毀去攔黃壩。而清水遂出。濬通海口。而河勢亦稍減觀。此則河工大可望也。觀張鵬翮奏章。詞簡而意明。其辦事精詳可知矣。朕昔與彼閒論時。彼曾云在浙八年。每歲錢糧並無缺欠。今蒙朝廷擢用之恩。無可仰報。惟勉令江南錢糧。每歲必期完結。朕尙止之云。爾勿輕出此言。迄今思之。彼固有成見也。是月上命員外郎拖抗拖和中書張古禮馳驛往令鵬翮將河工修理情形入奏。鵬翮疏陳十九款。一修工葦柴多產海濱。舊有運料河。自清江浦起至海口止。年久淤塞。應加濬深。便轉運。一清水會黃入海。關鍵全在大壩。而六壩最要者。尤在夏家橋一壩。以全湖水勢趨此故也。今夏水方盛。若急於堵塞。則高家堰危險可虞。且湖水洶湧。恐旋塞旋衝。虛費帑金。應俟水落堵塞。庶爲萬全。一高家堰容納七十二處山河之水。古人設壩。原以洩異漲之水。非以洩平槽之水也。今冬六壩閉後。來年挑濬。黃淮並漲。宣洩湖水。非壩不可。前河臣于成龍改六壩爲四滾水壩。臣相度地勢。相去不遠。宜併爲三。就原有之草字河塘槽河爲引河。並築順水隄。則田廬無淹沒之虞。一武家墩至小黃莊一帶。臨河舊有石隄。僅出水面二三尺。必須加高。一古溝至六壩以下。俱係土隄。宜改石以省歲修。一清河縣運口至高郵州界首裏河。頻年黃水入運。以致河身日高。水漲往往潰決。宜加濬。一

高郵寶應江都西岸。土石隄工多爲湖水齧侵。俟冬時興工。一高郵城南石壩五改爲四滾水壩。下開引河。使水有去路。一歸仁隄臨河石工罅漏。現飭補砌。一運口至濱海兩岸。隄工必須加倍高寬。以資捍禦。一王家營引河。飭革職道馮佑作速挑濬深通。准其贖罪。一新改中河隄岸單薄。水漲可虞。應勒限修築完固。一王家營減水大壩。應酌開十丈餘。洩黃河漫水。由鹽河出。一桃源縣黃河南岸隄工近長湖一帶。土隄四千二百餘丈。應加培高厚。一駱馬湖口正對有竹絡壩。節宜黃湖大漲。今黃河身高。去歲漫缺二次。黃河灌駱馬湖口。匯入中河。亟宜堵築。以禦黃水。一王家營缺口月隄單薄。應培修高厚。以作正隄。一徐城對岸沙嘴。插入河心二里。應挑掘以殺大溜之勢。郭家嘴舊有石工至北門迤西。臣率河員相度。自北至段家莊。加砌石工。可保城池。且免歲修費。蘇家山石嘴。挺出河心。致韓家山潰逼徐城。應自楊家樓至段家莊築月隄。以作重門之障。一黃運隄岸有領帑興修者。有捐工興修者。勒限完築。一徐邳睢寧宿遷桃源清河山陽安東等州縣。黃河險工。應支歲修錢糧。進掃防護。飭河官當伏秋二汛。晝夜防守。疏入。詔下部速議行。六月。又條奏河工九款。一隄工宜堅築加幫之隄。應將原隄夯杵。再加新工創築之隄。先將平地夯深。移期堅固。一運河中河。因頂衝處湍急。恐傷土隄。是以排椿鑲壓。用整木柴。今用整料截開。粉飾外觀。嗣後務與原估尺寸相符。一湖河隄岸有馬牙梅花等椿。面裏釘頭等石鐵釘鐵局米汁柴灰等料。必依法修砌。方能永久。一歲搶各工。不無虛冒牽混之弊。嗣後呈報險工。估計申詳。如係假捏。即以誑報題參。一挑河工程。務將挑出之土堆於原估隄工。夯作成隄。以資捍禦。不許將散土堆集。滋假冒之弊。一平常工料。俱用龍尾掃。遇風浪立見塌卸。虛糜帑金。應行停止。一河水頂衝處。對岸必有沙嘴挺出。此由河曲之故。從曲處挑引河以殺水勢。誠有如聖訓指示者。而河員不即遵行。則以挑引河後。必引大溜始能成河。若水緩沙淤。例應賠修。因之人心畏縮。臣思河工不如式者。理應賠修。若實心任事。偶致淤墊者。應請聖恩豁免。一實心任事之員。工成日優敘卹用。否則嚴加治罪。一挑河築隄。用夫動至數千。寒暑風雨。極其勞苦。工成日應給印票。免其雜徭。以上各條。仰請天語申飭。勒石河干。永遠遵行。得旨覽奏。河工弊端。詳悉切要。極其周備。下九卿議。尋

議如所奏。上曰：張鵬翮遇事精勤，從此久任河務，必能有益。九月，疏言：前任河臣于成龍於四堡挑濬引河，由胡家溝出黃河。臣勘閱胡家溝迤東地勢頗高，若在涵洞口至老隄頭迤東出黃河，地勢低窪，自涵洞口至九龍廟，現有舊河至黃河邊止。可挑引河於黃河隄出水之地，建造石閘，臨河處修築草壩，以防黃水倒灌。再於歸仁隄五堡建磯心石閘於引河兩岸，築東水隄，洩歸仁隄之水出黃河，可以衝刷河身，保護田廬。得旨：張鵬翮所奏歸仁隄修築事宜，甚爲合理，應及今年黃河水小興工。十月，疏言：武家墩至小黃莊加砌工，舊椿多壞，必須拆修堅固。今於舊殘石工上，疊柴壓土，以爲越壩，費省而工速。此工除撥銀四十萬兩外，尙有不足銀十八萬六千二百四十八兩有奇，請敕部撥給，得旨：著照該督所請。張鵬翮每事實能宣力，朕不之信，將誰信耶？又疏言：新中河必全身挑濬，兩岸子隄必全行培築，需費頗多，而河頭灣曲，糧艘經行不順。舊中河自三義壩下至仲莊閘十五里，河身甚深，南岸河身散漫，難築子隄，且距黃河最近，今議於三義壩將舊中河築隄一道，改入新中河，則舊中河之上段，與新中河之下段，合爲一河，糧艘通行無滯，得旨：張鵬翮所議中河事宜甚當，著照所奏行。十二月，疏言：臣遵聖授方略，次第舉行，先疏海口，水有歸路，黃水不出岸矣。既挑芒稻河引湖水入江，高郵寶應等處，水由地中行矣。再開清口，開張福口，裴家場引河，淮水有出路矣。加修高家堰堵塞六壩，逼清水復歸故道。今清水大半入黃，少半入運，一水兩分，若有神助，請加河神封號。下所司知之。又疏言：黃水下流最溢處，無如安東便益門及韓家莊兩岸，僅距六十餘丈，兼以時家馬頭至伊家莊河身過曲，沙洲逼溜，南北互有衝激，應於兩處沙洲中開引河二，使黃流直下，以固城池。又言：下河水勢漸消，惟興化積水，一時不能全退，臣相度形勢，高郵寶應山陽鹽城之水，宜疏蝦鬚二溝，引入膠臈河，以達於海。鮑家莊至白駒口地高水壅，宜挑濬深通，引河由白駒場入海。再挑撈魚港引河入海，挑老河口引水入湖，挑稻子河引水由苦水洋入海。如此，則有去路，積水可消矣。並從之。是年，遵旨詳議給事中幕琛條奏科場事宜，鵬翮奏江浙等省，既編南卷，山陝等省，既編北卷，又將雲南貴州四川廣西四省，各編字號，卷數甚少，分晰太明，不肖者易通關節，應將四省編入南卷，至監生回籍鄉試一段，臣思

監生作弊。自有防之之法。平時責令祭酒。力行考課。考課不缺者。准其入場。臨時入監者不准。則弊無從出矣。四十年正月。疏言。臣按河南志。清口至淮安。建有五閘。遞相啓閉。以防河淤。又慮水發湍急。難於啓閉。則築壩以遏之。每歲糧艘過盡。即於閘外築壩。以遏橫流。則是伏秋黃水倒灌。自古已然。今運河初濬。海水出黃。轉盼伏秋。二汛繼至。即宜洩之道。不可不急籌也。今於張福口裴家場中間。開大引河一道。并力敵黃。若黃水大發。則閉裴家場口門。使清水由文華寺入運河。倘運河水大。山陽一帶。由涇欄二河洩水。寶應一帶。由子嬰溝洩水。俱歸射陽湖入海。高郵一帶。仍由城南柏家墩二大壩洩水。江都一帶。由人字河鳳凰橋等河洩水入江。若遇黃淮並漲。清水由翟家壩天然壩洩水。黃水由王家營減水壩入鹽河。至平旺河入海。若糧船過完。黃水大發。則閉攔黃壩。使不得倒灌。黃水不漲。則堵塞運河頭壩。今清水全入黃河。官民船照例盤壩。即古人設天妃閘之意也。疏入。上嘉其得治河秘要。時江西巡撫馬如龍。以年老乞休。諭大學士曰。馬如龍雖年老。居官尙好。督撫之任。如張鵬翮李光地。居官更有何議。張鵬翮自到河工。在署之日甚少。每日乘馬巡視隄岸。不憚勞苦。朕深知之。三月。鵬翮以河工情形。遣郎中王進楫入奏。上諭進楫曰。爾往諭張鵬翮。高家堰須加意防守。必歷夏秋至冬。清水照常流通。斯爲有濟於事。鵬翮增築高堰月隄。及時家馬頭童家營陳家莊龍潭口歪枝套辛家蕩邢家河馬家港等處隄壩。尋洪澤湖溢。泗州盱眙被災。上以修治善策詢之。鵬翮並飭會同江南江西總督阿山詳勘。尋鵬翮奏泗州盱眙水災。自古已然。即大壩全開。亦不能免。且自閉六壩。高郵寶應興化泰州山陽鹽城等處。田地涸出。民得耕種。昔河伯效靈所致。上曰。堵塞大壩。乃前河臣于成龍題請。不是張鵬翮始。頃因泗州盱眙被水。令同阿山設法修治。作何賑濟蠲租。並非欲開六壩救泗州盱眙之民。而令淮揚百姓罹於水患也。張鵬翮奏。章昏曠已甚。可將朕諭旨。並張鵬翮奏。章刻示於淮安揚州泗州盱眙等處。令衆人觀看。四十一年正月。奏清河縣陶莊閘南岸。有挑水壩溜入引河。直走北岸。逼近黃河縷隄。請築劄隄。並將臨河縷隄及護城隄皆加高厚。又於黃河南岸挑水壩西。添築劄隄。並改建運口爲石閘。以省煩費。又因天妃閘塘基低窪。改築運口草壩。北建大石閘。東西各築縷隄。於

舊隄衝破處。建草壩以固隄東水。清河縣黃河南岸卞家莊之險工。當黃淮二水交衝之處。內臨積水深潭。中僅一線土隄。請改建石工。下部議行。六月。桃源城西煙墩黃水大漲。積水未退。隄根甚危。鵬翻加築近城越隄。捍衛城垣。八月。疏言。煙墩對岸沙灘挺出。河心逼溜南行。恐被衝刷。請於邵家莊開引河。建草壩分水勢。又顏家莊水勢逼射北岸。亦請開引河一道。則水順流。而險工不受衝矣。上諭。大學士等曰。此本若飭部議。必致遷延。著即照所題行。尋鵬翻題秋水情形。上曰。覽奏挑水壩築成。逼黃河大溜。直趣陶莊。引河循北岸而行。黃水從大通口暢出。海口極其深通。淮水從清口暢流敵黃。絕無黃流倒灌之患。高家堰隄工完固。加謹防守。經伏秋大汛。俱獲無虞。運河之水。由涇瀾芒稻河人字河分洩。各處工程。亦皆保固。觀此則河工大有望矣。四十二年春。上南巡。周視河工。賜河臣箴。准黃告成詩。二月。上以山東泰安沂州等州。新泰蒙陰郟城等縣民飢。命漕運總督桑額。以漕米二萬石交鵬翻變賣能官。運至濟寧州兗州府等處。減價平糶。有應賑處。即行賑濟。鵬翻委河臣程兆麟等。動用倉穀二十八萬餘石散賑。疏稱將山東各官俸工補還。上命鵬翻與河員及山東巡撫以下各官分派。於四十四年內賠完。嗣上復面責之曰。爾常以經義奏對。經義以本心爲要。爾河工人員。動用常平倉穀賑濟。數取名譽。及令抵償。則委之山東官員。於心忍乎。鵬翻叩首謝罪。十月。諭吏工二部曰。張鵬翻在河數載。殫心宣力。不辭艱瘁。又清潔自持。朕心深爲嘉悅。爾部議敘具奏。尋加太子太保。四十四年二月。疏請修理徐州城外石隄。及山安黃河北岸三套隄工。建築越隄。並從之。先是。康熙三十六年六月。時家馬頭河決。至三十九年五月。堵築未就。鵬翻疏參山安同知佟世祿冒督誤工。應革職追賠。詔鵬翻嚴訊。嗣世祿叩聞。訴鵬翻枉縱。交江南江西總督阿山河南巡撫徐潮會審。阿山等以時家馬頭承修銀兩。應於佟世祿追賠。馬家港東壩被衝。張鵬翻雖經題報。未將承修官賠補處聲明。應令鵬翻與疏防等官均賠。未幾。世祿復叩闕控訴。上遣戶部尙書徐潮等覆審。係誣參。世祿復職。鵬翻巧飾供詞。失人臣禮。應革職。淮安道王謙附會山安同知裘陳佩欺隱。應罰賠。各擬杖徒。又工部侍郎趙世芳議。鵬翻奏銷錢糧。浮冒十三萬餘兩。應交刑部治罪。九卿等以如所議奏。上曰。此案依前議。張

鵬翮量甚窄。斷不認錯。河工錢糧。原不限數。一年水大。則所需者多。水小則所需者少。謂張鵬翮小有所取。亦未可知。謂以十三萬兩入己。必無之事也。河工恃乎用人。張鵬翮所用之人。皆不勝事。故至如此耳。趙世芳奏事不公。本發還。三月。上南巡。諭鵬翮曰。朕至清口。見黃水倒灌。因以問爾。爾赧然不能答。反稱不會倒灌。此卽爾毫不認錯也。爾居官固好。卻爲王謙張弼所欺。頃令河工應追錢糧。著佟世祿王謙張弼均賠。部議甚明。爾又奏請欲免其追賠。開捐納以補原項。此特因王謙亦在數中。希圖爲之脫免耳。鵬翮不能對。閏四月。御舟渡黃河。閱九里崗。嘉鵬翮修理得法。七月。淮黃並漲。古溝塘埂清水溝韓家莊四溢。鵬翮疏入。得諭。今春朕諭張鵬翮大水時發。難以逆料。須晝夜防護。今古溝等處隄岸衝決。河工將有復壞之勢。此事著九卿科道速議具奏。尋議鵬翮不預籌開壩之期。力盡防險之法。應革職帶罪督修。諭令革職留任。於是鵬翮督率河員。盡力堵塞。於九月次第竣工。四十五年十一月。疏言。黃河萬里來源。匯聚百川。至清口與淮交會。總因衆水歸併一河。來源多而去路少。一時宣洩不及。所以兩年水漲。隄工危險。臣率河員往來勘議。僉云去路一暢。則來可容受。惟有遵旨預開鮑家營引河。俾黃河異漲。藉此減洩。黃河一帶工程。可以保固。洪澤湖異漲。藉此暢流。高家堰工程得平穩矣。再於中河橫堤建草壩二。於鮑家營開引河處。建草壩一。相機啓閉。中河亦不虞淤塞矣。下部議從之。初鵬翮同江南江西總督阿山漕運總督桑額奏開溜淮套河。屢請上親臨指示。四十六年二月。上閱視溜淮套。問鵬翮曰。爾何所見。奏開溜淮套。鵬翮奏曰。先因降通判徐光啓呈開溜淮套圖樣。臣與阿山桑額會同具奏。恭請聖駕躬閱定奪。上曰。今日沿途閱視。見所列標竿錯雜。問爾全然不知。河工係爾專責。不留心可乎。鵬翮不能對。免冠叩首。上因顧諸臣曰。阿山等奏稱於溜淮套另開一河出張福口。分淮水。免洪澤湖之異漲。保高家堰之危險。繪圖進呈。今朕從清口至曹家廟。見地勢甚高。不能直達清口。與圖樣迥別。且所立標竿。多在人墳墓之上。依此開河。不惟壞民田廬。甚至毀民墳塚。張鵬翮以讀書人而爲此殘忍之事。讀誓何爲。又諭鵬翮曰。奏溜淮套開河。非地方官希圖射利。卽河工官員妄冀陞遷。至河工效力人員。無一方正者。何故置留河工。鵬翮奏曰。臣誤聽小人罪實難辭。逾數

日上又嚴飭之。尋阿山革任。張鵬翻去所加宮保。桑額降五級。劉光美于準各降三級。俱從寬留任。四十七年九月。疏奏黃運湖河修防平穩。得旨開復。應追銀兩。俱著豁免。十月。內遷刑部尚書。四十八年二月。調戶部尚書。五十二年二月。充順天鄉試正考官。十月。調吏部尚書。五十四年十一月。丁父憂。時尚書富寧安劉策安阿喇布坦諭鵬翻暫留辦部務。俟富寧安回京。再回籍守制。五十七年。充會試正考官。六十年。復充會試正考官。會汶水旱涸。運道梗塞。奉旨往勘。疏言。臣會同河道總督趙世顯巡撫李樹德查勘戴村壩。遏汶水出南旺。南北分流濟運。舊設玲瓏亂石滾水三壩。年久汕刷。應補葺以資捍禦。再山東運道全賴汶泗二水。上流泉源接濟。今天旱泉微。蜀山馬躍南旺諸水無多。臣等遵旨將坎河雞爪等泉疏濬。并嚴禁民間偷截灌田。補築諸湖子隄。禁侵種蓄湖水。毋致乾涸。至南旺分水口。係南北分流水。爲濟運道要區。臣等遵旨妥辦。淺於南則閉北關。使分北之水歸於南。淺於北則閉南關。使分南之水歸於北。留主事富明德御史梅琮駐分水龍王廟。以時啓閉。再於彭水南岸建挑水壩一。北岸截去沙嘴。挑盡淤沙。使水挾沙暢流。直入微山湖。則蓄淺有資。運道自無阻滯。再查邳州邱家樓一帶低窪之水。並無積滯。太行隄縣延數百里。其曹單豐沛等縣坍塌處。交河道總督及直隸河南巡撫修築。下部知之。九月。直隸總督趙宏燮奏。河南武陟縣黃沁衝決隄岸。水溢至長垣等處。山東巡撫李樹德奏。河水泛溢。自直隸開州流入山東張秋等處。由鹽河入海。致運河隄決。漕船阻滯。命鵬翻同總漕施世綸查勘。十二月。鵬翻等疏言。臣等由山東張秋循流而上。查黃河決口在武陟縣之釘船幫支河口。衝入詹家店之魏家莊及馬營口。今副都御史牛鈕河南巡撫楊宗義於支河口築攔水壩。魏家莊已經堵塞。馬營口水已消落。指日成功。其引沁入運之處。臣相度地勢。西北高而東南下。若引水直下。恐牽動全沁。灌入隄內。而黃河直躡其後。反覺無益。山東運道在張秋則有沙河等水。分水龍王廟則有南旺等湖。濟寧則有馬場等湖。又有諸山泉。本可濟運。祇因湖隄殘缺。民間竊種。湖旁之地。未得儲水。而諸泉壅塞。又未疏通。以致漕船時患淺澀。臣等已交李樹德築壅蓄水。疏濬泉流。運道自可通利。得旨回奏。甚屬明晰。卽令照依所奏。不得稍有更改。六十一年十二月。加太子太傅。雍正

元年二月。授武英殿大學士。六月。河南黃沁漫溢。決馬營口。奉命查築。三年二月。進明臣鄧鍾所著籌海重編。未幾卒。追加少保。諡文端。八年。詔祀賢良祠。有忠武誌。敦行錄。信陽子卓錄。

齊蘇勒

齊蘇勒。滿洲正白旗人。姓納喇氏。初由官學選天文生。爲欽天監博士。遷靈臺郎。尋以內務府主事。出任永定河分司。康熙四十二年。帶南巡關河。齊蘇勒隨至淮安。奉諭曰。朕觀黃河險要地方。應下挑水壩壩。現今永定河經朕親臨指示。挑水壩壩俱有裨益。爾遵照朕指示式樣前往。烟墩九里岡龍窩三處。築挑水壩數座。於朕回鑾前完工。齊蘇勒遵旨如期竣事。乃回任。梓選翰林院侍講。國子監祭酒。仍管永定河分司事務。會奉命同副都御史牛鈕監修河南武陟等縣決口隄工。奏自於河隄頭至滎澤縣大隄十八里平衍處。接築遙隄。使全河之水。盡歸一道。專力刷深。不致旁溢。六十一年十二月。授爲山東按察使兼理運河事。命先往河南。籌辦黃河隄工。時河南巡撫楊宗義奏請於馬營口南。舊有河形處。修挑引河。齊蘇勒同河道總督陳鵬年疏言。河不兩行。此洩則彼淤。有必然之勢。馬營口甫經築隄。若開引河。有旁洩漫隄之慮。寢其事。雍正元年正月。命齊蘇勒署理河道總督。尋實授。四月。疏言。陽武祥符商邱界。黃河北岸有支流三。逼隄繞行五十餘里。南岸青佛寺邊有支流一。逼隄繞行四十餘里。不急爲截斷。恐利損大隄。已築壩堵絕。並接築子隄九千二百八十八丈。隔隄七百八十丈。會奉詔豫籌山東諸湖蓄洩事宜。以利漕運。疏言。汶上縣之南旺馬踏蜀山等湖。東平州之安山湖。濟寧州之馬場湖。魚臺縣之昭陽獨山等湖。滕嶧二縣之微山稀山等湖。皆運道所資以蓄洩。昔人名曰水櫃。因土人乘涸占種。漸致狹小。宜乘湖水稍落時。除壅熟田畝外。丈量立界。嚴禁侵占。設法蓄水。如遇運河水漲。引注湖中相平。卽築堰截堵。遇運河水淺。則引之從高下注。其諸湖或應築隄栽樹。或應建閘起閉。令各州縣循例辦理。則湖水深廣。運道流通。漕艘無阻滯之虞矣。八月。奏言。洪澤湖水微涸。黃水有倒灌之勢。臣率道廳督築埭口兩岸大壩。各寬八丈。東

長二十六丈七尺。西長二十四丈。中留水門五十丈。東高清水以抵黃河。現在淮水暢流。惟此壩在洪濤大溜中。兩面受敵。必須加意修防。因派工員協同汛弁。率領河兵一百。長夫三百。常川住宿。工所多備埽料。椿繩等項。如遇湖漲。壩工稍有警陷。即用料加鑊。下埽搶護。遇黃漲即用混江龍鐵籠。諸器。駕小舟往來疏濬。不令少停。九月。奏報。秋汛已過。河工平穩。二年四月。廣西巡撫李紱將之任。上諭及淮揚運河淤墊年久。水高於城。危險可虞。李紱奏言。若於運河之西另挑新河一道。以所挑之土。另築西隄。而以舊河之身。作爲東隄。則東面永無潰決之患。上即命紱往會齊蘇勒商酌。齊蘇勒奏言。淮揚運河綿長三百餘里。上接洪澤。下通江口。河之西岸。逼臨白馬。寶應界首諸湖。水勢汪洋。一望無際。今若改挑新河。築西隄於湖水之中。舂錘難施。東岸之閘壩涵洞。皆須另行創建。不惟糜費千百萬帑金。而且大工終難告就。上是其言。特予騎都尉世職。是時上知臣下有與尙書隆科多。總督年羹堯。夤緣結交者。諭齊蘇勒曰。爾之勤勞。固不待言。而一塵不染。獨立不倚。從未聞夤緣結交。更屬可嘉。又諭曰。近日隆科多年羹堯。大露作威。福攬權勢。光景。朕若不防微杜漸。此二臣將來必至不能保全。爾等皆當疏遠之。隆科多止論爾操守平常。而年羹堯前歲數奏爾不學無術。必不能料理河務。朕以此知爾之獨立也。三年二月。副總河嵇曾筠奏請挑挖祥符縣回寨引河。詔與齊蘇勒商酌。嵇曾筠復奏言。亟宜乘汛水未發興工。不及待會勘。既而齊蘇勒至武陟。奉詔回總督田文鏡察視引河。有無裨益。齊蘇勒奏言。挑挖引河。必須上口正對頂衝。而下口有建瓴之勢。方可吸引大溜。歸入新河。借其水力。滌刷寬深。嵇曾筠所挖引河。已將竣。臣往看上口之地勢。與現在水向不甚相對。改挖上首三十餘丈。以對頂衝。以迎大溜。又往對岸指示建築挑水壩。挑溜順行。以對引河之口。俟水漲時。相機開放。庶河勢得以直暢東注。而南岸隄根。可保無虞矣。七月。命內閣學士何國宗。偕測算官員。攜儀器。閱河。遇齊蘇勒所駐近地。會同勘視。齊蘇勒尋奏言。皇上頒發儀器。測度地勢。於河工高下之宜。甚有準則。今洪濤湖滾水石壩。舊立門檻太高。不能隨勢洩水。請敕閱河諸臣。於明春視海口。後繞至湖口。用儀器測度地勢。改落石壩門檻。庶全湖宣防有賴。又奏言。治河物料。葦柳爲先。每年捲埽之葦。輒千百萬

東。俱動帑贖買。仍須以柳枝爲骨。在官園伐以濟用。柳多則工堅而帑省。柳少則用蓋多而工不固。臣於去冬勸令道廳等官及標下營弁。各於空閒之地。栽種柳秧。陸續據報一百二十三萬二千餘株。今通行察閱。除枯損之外。成活八十九萬二千餘株。又臣往來看工。見山東江南蓄水沮柳之地。皆可種葦。今春令廳員買葦根試種。近據報微山湖。選種葦八頃餘畝。蔓延青蔥。此皆各官自願試種。非邀議敘者。今行之已有成效。應請敕部酌定。嗣後議敘之例。以種柳八千。種葦二頃。各紀錄一次爲率。並責成專汛守備。及千總把總培養柳枝。遇枯損卽爲補栽。違者分別議處。如此三五年。柳株處處成林。湖葦叢生。不費購買。而工料充裕矣。並得旨允行。四年四月。奏陞寧縣朱家口。黃水驟長。東岸壩臺大埽壩陷。現在防守修築。上謂大學士曰。齊蘇勒在工年久。歷練老成。清慎勤三字。均屬無愧。今年已望七。見壩埽壩陷。必晝夜焦急。朕甚憐之。齊蘇勒尋奏。水復大漲。壩埽倏陷水底。窺邊聖諭。俟過伏秋二汛。並力繕修。十二月。奏報。朱家口決口堵閉合龍。黃河自豫省至海口。西岸壩隄完整。諭獎其悉心任事。經理有方。加太子太傅。五年。以衰病奏遣太醫賈灃診視。尋入覲。諭嗣後歲支養廉銀萬兩。六年。兩江總督范時繹。江蘇巡撫陳時夏。奉詔開濬吳淞江。因於陳家渡築壩。松江知府周中鉉。率千總陸章。乘船督工。下埽。值潮迴溜激。壩陷船傾。周中鉉。陸章俱歿於水。事聞。予卹贈。齊蘇勒知濬工未竟。卽前往經理其事。尋奏言。吳淞江陳家渡。舊有土埂三道。未曾挑清。致有停沙淤塞之患。今築壩開濬。適逢江水海潮並長。刷淨土埂。檻根毫無阻滯。工程可期速竣。七年二月卒。諡勤恪。

方觀承

方觀承。字遐穀。號問亭。安徽桐城人。雍正十一年。由監生加中書銜。隨定邊大將軍平郡王福彭。赴北路軍營。爲書記。十三年。回京。補內閣中書。乾隆二年。軍機處行走。三年。遷兵部主事。累遷吏部郎中。七年七月。授直隸清河道。八年。遷按察使。九年二月。命隨大學士訥親。履勘河道。並海塘工。十月。遷布政使。十一年。署山東巡撫。奏稽察

漕弊嚴緝盜匪二事。十二年正月。疏言。安山湖地撥民認墾陞科一案。臣竊屬確勘湖中。尙有積水。但二麥布種於水已涸之後。收穫於水未發之先。且湖田多沃壤。而麥收足抵秋禾。故雖有水患。民願認墾陞科。但陞科之後。官徵民納。例重秋收。秋禾被水。請蠲請賑請豁。徒致紛煩。卽如南旺湖。前經臺臣條奏。給民認墾。其時臣隨訥親履勘。雖最窪之處。亦俱乾涸。貧民於中取土熬鹼。高處則如屋如巖。意以爲水必不能及。上年臣抵東。詢知夏秋運河汶水暴漲。賴有南旺及獨山湖。同時分減運道。得保無虞。而兩湖之水。則一望瀰漫。無分高下。以此觀之。凡大川經由及衆水所注。其宜洩儲蓄之區。嘗閱數年數十年。有若閒置。而一旦用之。乃知其見功爲不小。未可以目前之形。而忘久遠之慮也。安山南旺二湖。同爲運河洩水之地。南旺現准報墾徵租。安山請一例辦理。並照直隸淀泊河灘地畝。分季徵收之法。其專種夏麥者。於麥後徵收。兼種秋禾者。分麥禾兩季徵收。則租額毫無減於陞科。而除去陞科名色。官地民種。應徵應免。可以隨宜辦理。上是其言。又言。委積相調。義倉稱便。與社會髣髴。但社會例惟借種。義倉則借與賑兼行。而取重尤在猝然之賑。大要設倉宜在鄉。不宜在城。積穀宜在民。不宜在官。秋穫告豐。勸導輸納。年底將捐過數。數奏明。不必開具管收除在。則其數仍不在官。法可行久。捐輸及典守年久者。照社會例議敘。報闈。二月。回直隸布政使任。十三年三月。擢浙江巡撫。九月。疏言。海塘引河。現由中小壘安流弭節其北。大壘北抵石塘根。沙漲如平地。臣沿塘查勘。自仁和縣之觀音堂起。至海寧縣東之淡水嶺止。丈出地三十五萬四千八百餘畝。民竈五千七百五十戶。臣爲認墾者核編字號。以十號爲一甲。每十甲選老農一人。司勸課按其土宜。分年陞科。仁和海寧二縣。歲徵雜糧十萬石。小民咸資生業。諭曰。墾田乃務民之本圖。所宜留心勸相者也。又言中小壘貧民應撥補地畝。俾安耕作。查附近中壘之許村西倉獨山柳河莊山北各地。共二萬七千餘畝。堪以撥補。現除將萬八千餘畝撥給四百七十三戶。餘八千餘畝留爲續至各戶之用。再所撥地必俟鹹氣盡除。始可種植。貧民豈能懸末以待。查有乾隆十一年。各竈戶報墾陞科之地。附近西倉竈戶。不能全種。今卽令各戶佃種交租。竈戶得租。貧民得地。兩受其益。又各戶前於被水時。有就竈戶課地內。造屋而居者。不便屢移。

令即撥出二百畝。劃界安居。應納錢糧。改歸各戶名下完納。得旨嘉允。十四年三月。請纂輯兩浙海塘通志。以備參稽。許之。五月。疏言。臣於上年奏請將豆麥雜糧。私運出洋者。照私運米穀例治罪。經部議准。嗣閩浙總督喀爾吉善奉天將軍阿蘭泰等。奏請酌籌。彼此流通。救部議定。豆麥雜糧出口。俱給印照驗放。臣查沿海情形。各省不一。浙省如寧波屬之定海象山二縣。定海屬之岱秀二山。溫台屬之玉環山。向許流通。至嘉興屬之乍浦。杭屬仁和縣之通口一帶海道。又溫台連界之蒲岐所海港。向俱不通商販。即本處米穀亦禁出入。以杜影射。偶遇歉歲。暫一弛禁。舊例或經奏明辦理。或臨時僅據屬員詳請。遽准通融。易滋流弊。請嗣後辦理時。必將確實情形。奏明請旨。則就流通之中。仍嚴維制之道。下部議行。七月。疏言。浙省徵收錢糧。原有頒發官殿。聽糧戶稱較完納。以杜捏補短封之弊。而所製官殿。當花戶業集時。勢不能逐一稱較。官吏藉詞。捏補弊竇實多。現照部頒樣式。多為製造。發各州縣令鄉保當堂具領。使一里甲之內。足供輪用。花戶投糧時。齎殿赴糧。交納糧書。查給印串如短少。即係糧書剪邊換錠。不得於給串後。向花戶捉補。違者以重耗嚴參。報聞。尋擢直隸總督兼理河道。十一月。疏言。永定河身自六工以下。舊有高仰之形。乾隆二年。大學士鄂爾泰會同督臣李衛。河臣顧琮。議於半截河隄北。改挑新河。移北隄為南隄。另築北大隄。乾隆五年。顧琮續請接築北埝。與北大隄相連而下。然祇係下口入河之保障。非為改河之用。近年來大工淤墊日甚。水流不下。情形又異。今就舊有之北大隄。於大工改移下口。庶水由地中暢下無阻。惟北大隄內。田廬墳墓。多請俟來年汛後。將改移事宜。籌酌辦理。至臣現議應修隄壩。俱在六工以上。量加培補。以防漫溢。將來下口改移。上游亦得刷深。尚非專恃加高。致復淤墊為害。論曰。改移下口之處。不可輕言。即鄂爾泰之原勘。亦未可即信為盡善不易之策。使改移而數年後。復致淤塞。又將何所改移乎。十五年二月。上閱永定河隄。諭觀承以下口宜暢。使易趨下。御製詩示之曰。水由地中行。行其所無事。要以禹為師。禹貢無隄字。後世乃反饋。祇惟隄是貴。無隄免衝決。有隄勞防備。若禹豈不易。今古實異勢。上古田廬稀。不與水爭利。今則尺寸爭。安得如許地。為隄已未策。中又有等次。上者禦其漲。歸漕則不治。下者卑加高。隄高河亦至。譬之築寬牆。

於上置溝渠。行險以徵倖。幾何其不潰。胡不籌疏濬。功半費不貲。因之日遷延。愈久愈難試。兩日閣未定。大率病在是。無已相咨詢。爲補偏救弊。下口略更移。取其趨下易。培厚或可爲。加高汝切忌。多爲鹹水壩。亦可殺穰異。取土於河心。卽寓疏淤義。河中有居民。究非長久計。相安姑弗論。宜禁新添寄。條理爾其盡。大端吾略示。桑乾豈巨流。束手煩計議。隱隱聞河南。與此無二致。未臨先懷憂。永言讖吾意。三月。加太子少保。六月。永定河南岸三工淤溝奪溜。命將江南總河高斌。豆辦集漫口。圖鈔鈔酌辦。觀承疏言。豆辦集漫口。係中河餘水泛溢。故可擇便於水緩處施工。其漲溜全歸正河。照舊下注。不虞堵截。今永定三工。南爲月隄缺口。北爲大隄漫口。南北相對里許。若將月隄堵築。其已過漫口之全溜。並無去路。實與南湖情形不同。現在新開引河附近漫口。仍請堵築。逼溜歸入引河。以復故道。上是其言。十六年正月。疏言。喀喇沁土默特等處。種地民人漸多。率旨查禁。廷議照督陳大受所請。將有力者按三年五年之限。交地回籍。若原係民墾。不能卽回者。按畝交租。俟一二年後。再行給還本人。上年六月。理藩院咨稱。土默特貝子。欲不問年限。概行驅逐。臣思此等貧民。無家可歸。卽使甘受驅逐。而數萬男女。概入內地。亦覺安置爲難。今旣蒙恩從寬查辦。自應行之以漸。請簡公正大臣前往查辦。俾蒙古民人。俱各安輯。命侍郎劉綸侍讀學士麒麟保會同貝勒羅卜藏往勘。尋議仍照三年五年限撤還。嗣後不得私典。至領地開荒。民與價典不同。俟年滿先將原主需種地退還。餘地仍許租種。從之。三月。疏言。上年增建冰窖減水草壩。貼近從前永定河下口。近因水大。全河於此掣溜。冰窖以上。河身自四工至七工。吸刷深通。比冰窖以下河身。驟低至五六尺。其水仍由金門。而壩臺並無衝刷。至三十里外。卽已澄清。竟由坦坡埝汪爾淀一帶出水。可無淤墊之虞。但坦坡埝之設。原爲格淀起見。如遇淀水內漲。不免阻遏河流。應培築高厚。以別清渾。卽請於坦坡埝尾東北斜穿三角淀。開引河歸入葉淀。由鳳河轉輸入大清河。疏下廷臣議。以此時甫過凌汛。與伏秋情形迥異。一經盛漲。挾沙直注。恐致汙淀。未可因一時水由壩出。遽議更張。令詳查再議。觀承復疏言。冰窖壩口掣溜。在上七工尾當舊下口旁。地面低於正河丈二三尺。南岸距南坦坡埝。較北岸距北大隄寬又加倍。有漫衍而無衝溢。此地勢之順。

也。水由壩出，非衝決亦非開放。民情不怨，此人事之順也。凌汎改移，經理有暇，此天時之順也。臣今日敢以必應改移爲請，不復稍存歧見。查河身北高南下，水勢偏側，竟成通河之病。自七工出水後，去路甚暢，上游吸刷，倍益寬深，自數尺至丈餘不等。今即倍用人力，將七工八工舊河挑與相等，而出口不順，已刷深之上游，轉眼停淤如故。是水歸故道，雖屬守經之論，然不乘此就下，偏南之勢，仍強使北，不但機會可惜，竊恐伏秋盛漲，南岸經理非易。至原議內有一經盛漲，挾沙直注，恐致汙淀之語。臣以渾水至三十里外，即已澄清，雖盛漲多挾泥沙，而水渙沙停，必無直注汙淀之虞。臣因慮及渾水或致入淀，故不使東循龍尾，直入鳳河，議於王慶坨之南，開引河二十里，東北入葉淀，迂其途而廣其地，更可經久無患。命尙書舒赫德、河東總河顧琮會勘，如觀承議。五月，疏言：理藩院尙書納延泰條奏，以多倫諾爾鋪司占蒙古游牧，請毀屋，另用蒙古人遞送文移。查自設鋪司以來，文移資其郵送，解餉藉以棲止，即行旅商賈亦堪投宿，並無礙游牧。近因民人於鋪司之外，增建坊店，該處總管達錫等，恐增建漸多，侵占游牧，是以呈明理藩院具奏。但數百里荒濶，公務往來，棲託無所，商賈等野宿堪虞。而蒙古人不諳內地文移，難免舛錯。今查明南茶棚等六處，每處上有屋一二所，無庸拆毀。上渡酌留屋一所，轉山子水泉子兩處各留屋三所。如有多建，容留奸匪者，責成地方官究治。軍機大臣議行。十一月，上以豫省黃河兩岸大隄外舊有古隄，多殘缺，黃水近自陽武灌入直隸之長垣東垌，衝開月隄三口，命觀承往勘。十七年二月，疏言：長垣東明二縣，太行古隄在防隄外，其地南高北下，豫省陽武等縣，灑水北注長垣，全賴此隄捍衛。康熙六十年後，屢被衝擊，口門刷深，難於施工。惟王家隄以東，舊有引河入運，故近東隄工可無恙。而隄西灑水匯至，屢被衝隄，今宜爲灑水籌其去路，請於隄西開引河，導入舊引河，使容納東注。即將所起土，自隄西村起，另築新隄，則隄外有河，以疏灑水。河內有隄，以防漫溢，事半功倍。且隄西八村，皆得新隄爲外障，民情更爲欣躍。詔如所議。七月，諭曰：直省錢價昂貴，由於富戶囤積。山東布政使李渭請定以五十串之限，但驟行之，不無滋擾。應先行明切曉諭，各富戶出易，勿令壅滯。九月，觀承疏言：富戶積錢，類皆深藏固閉，勢難逐戶稽查，與其定以所積之限，紛擾而難行，不

若稽其所入之數。顯明而有據。應令交易買賣。價在三十兩以下。許其用錢。如逾三十兩。即令用銀。違者照官價易之。舊積錢文。遵旨曉諭早爲出易。加以獎賞。如仍敢多積。以十之二入官。至尋常出入之錢。拘以官收。不免滋弊。似應各從民便。奏至上。以所辦過遲。詢問成效若何。有無平減。觀承覆奏。富戶自諭後。不敢多積錢文。價俱以平減。報聞。十月。廷議各省採買糧石。委員賣銀赴米船停泊處所收買。而牙行轉運。藉名昂價。嗣後沿河聽商販自行轉運。停隔省採買。令各督撫動項。交本地方官採辦。委員運送。則操縱隨時牙儉。不得抗本地方官教令。校隔省委員坐待。羣得把持者。難易迥別。是需米雖在隣省。仍如本省自爲採買。無礙商販流通。其弊除而其利自見。下部議行。十一月。疏言。滿城縣之奇村河。發源一畝泉。匯距泉以入保定。春夏之交。每虞微弱。臣委員於滿城東孫家堂。勘得申泉。又東得連室泉。夏家莊南得五花泉。龍泉寺西得紅花泉。俱爲葦草湮閉。而渠形可尋。一經濬治。合流併注。可增治稻田多頃。商販亦得通行。奉旨嘉獎。十八年二月。奉設義倉告成。凡千餘倉。貯穀二十八萬五千三百餘石。酌籌條規。繪圖以進。十二月。疏言。永定渾流。善於移徙。而下口形勢。尤變遷靡常。年來下口漸淤。請於北岸六工尾開隄放水。作爲下口。至五道口東南。導歸沙家淀。仍由鳳河入大清河。廷議以甫自南岸冰窖改移下口。何以又請於北岸六工開隄放水。令據實覆奏。觀承言。自冰窖改移之後。水勢暢順。上年汛水盈丈。挾沙直注下口。十里以內。舊積新淤。阻塞去路。至南埝中下地面。尙可以資蓄。今請於北岸六工。放水循南埝導歸河淀。照舊以鳳河爲尾閘。雖有向南向北之分。其實水道本屬相通。北埝至南埝三十餘里。瀾漫一片。或分或合。原足任其蕩漾。臣逐細查勘。向北改移水道。仍以南埝下汛爲歸宿。實於現在情形爲便。十九年。疏言。鳳河隄工。分隸永定天津兩道。責成不專。請將東隄並韓家北埝。改隸永定道。增弁兵畫一查辦。均得旨允行。三十年四月。加太子太保。九月。命署陝甘總督。由肅州至哈密抵巴里坤。籌辦軍營糧馬諸務。十月。疏言。軍營所需馬。臣現解送萬三千餘匹。合之軍營原存五千四百餘匹。已敷一兵三馬之數。但恐軍營積用。復寬爲挑備。撥往安西候調。如不用。即以補實安西營缺。又言。准軍營咨約需馬三萬。臣查索倫察哈爾厄魯特兵。跟役無多。官員分例

等馬。尙有可減。又哈密回兵三百。祇派一半。亦有可減之馬。計實需用二萬七八十匹。臣陸續督飭。解送至軍。駝共需四千四百餘。現已解送足數。餘供哈密運糧之用。十一月。又言。哈密貯茶三萬封。駝到即運往軍營。仍撥五萬封補貯哈密。舊存糧十萬餘石。就近撥運。嗣後所貯。以此數爲率。隨時動撥。庶緩急有備。至餉銀先後已撥三十萬兩。請再由藩庫撥四十萬兩。貯哈密及西安甘肅兩道庫備用。諭以妥速爲要。二十一年正月。回直隸任。三月。疏言。臣前奏准於永定河北岸。挑引河改作下口。今行水之北埝。卽向之遙埝。請於北埝外。更作遙埝。預行展拓。以爲勻沙散水之圖。鳳河東隄。亦接築至遙埝之尾。以資穩固。從之。二十三年九月。因漳滏河以東鹿政流南徙。由寧晉縣入滄陽河。地方官詳請導由舊路。觀承勘奏言。政流之晉州張盆山口新河。係漳滏舊道。非平地另有衝齧。且原近東鹿城南。頗費捍禦。今改道晉州寧晉。皆距城三十餘里。近河邨莊。多在高阜。可築隄防護。不須復濬。十二月。又言。漳河向由豫省臨漳東北。流入山東館陶。與衛河合。本年秋季盛漲。政流東南。直趨大名府城。水退後。分爲二支。一經府城之北。一趨河南。府城適當其衝。請於政流淤塞處。濬河身六百八十丈。接入舊河。其新衝河口。堅築欄河大壩一百十丈。以斷南流。壩外加築土隄。作爲重障。使水無旁洩。仍歸故道。大名積水自消。均如所議行。十一月。上以河南巡撫胡寶瑤。現辦豫省民田道路溝洫甚善。令觀承仿而行之。尋疏言。正定順德廣平大興等處。民力易集。上下游並皆協取。略與豫省相仿。近年漳滏溢涖。在在疏通。是其明驗。河間府屬河渠洩水。較前爲速。保定四境。開溝種樹。已定章程。其餘各處。俱先後開工。至田間溝洫與道溝。或分或合。要使瀝水有歸。農田杜患。以期事不勞而民不擾。報聞。先是。易州城北白楊嶺。有安國河。觀承奏准開渠導之。灌田。渠成。賜名安河。二十八年三月。上以天津等屬積水未涸。觀承不能設法疏洩。模稜玩誤。交部嚴議。尋議革職。命從寬留任。是月。觀承疏言。安河現鑿子渠。建大小閘以時啓閉。並分上下游。按日輪啓。如上游單日用水。卽閉閘導入上游子渠。下游雙日用水。卽閉閘導入下游子渠。設渠長二專司其事。兩旁隙地。量予種藝。從之。四月。御史吉夢熊疏劾觀承。玩視民瘼。徇縱天津道那親阿啓閘遲延。不早籌宣洩。六月。御史朱續經復劾直隸督役派車船勒索

賄放。觀承不能督屬鋤奸。諭曰。方觀承在直年久。每存息事寧人之見。前此辦理疏消積水事宜。不能及時整頓。經朕特派大臣履勘。業將該督嚴加譴處。以示懲儆。而言者動以爲歸過之地。直隸通省事務殷煩。又值災歉之後。措置自不無竭蹶。持論者置身局外。坐言易而起行難。使易地以處。恐其施展。或未必能如該督之勉力支持也。方觀承如自愧悔。滿襟前非。正宜稍假時日。以觀後效。倘其因循玩愒。復蹈前轍。斷不能逃朕洞鑒。又何能屢邀寬典乎。三十三年卒。諡曰恪敏。著有述本堂詩。薇香集。燕香集。問亭集。觀承老成歷練。任直隸總督兼理河務二十年。奉職恪勤。利在生民。四十二年。直隸總督周元禮題准入祀直隸名宦祠。五十一年。入賢良祠。

胡寶瑔

胡寶瑔。字泰舒。江蘇青浦人。原籍歙縣。乾隆二年。由舉人授內閣中書。軍機處行走。八年四月。遷侍讀。六月。遷福建道御史。七月。疏言。直隸自被旱以來。遷移覓食者甚衆。見蒙恩旨。先後運米五十萬石備賑。請救督臣徧行曉諭。俾土著之民。靜以待賑。其各處流民。願歸耕而無力還鄉者。酌量咨送回籍。使趕種春麥。不致田畝久荒。於來歲民食有益。下直隸總督議行。九年二月。疏言。近蒙皇上特命大臣。查閱河南等省營伍。所以覈訓練而杜廢弛。見在器械之堅脆。技勇之生熟。人數之虛實。糧馬之盈虧。自難掩飾。惟是積玩之處。此時聞風修整。買補。勢所不免。而不肖營員。或乘機借端苛派。或此後坐扣月糧。俱未可定。請令各督撫提鎮等。嚴飭查參。徇隱一併嚴議。詔如所請行。十年十二月。疏言。山東兗沂曹等處。及江南鳳潁淮徐海一帶被水之區。見經消涸。應乘時設法疏導。並勸諭農民。引流赴壑。俾田不久浸。以便春耕。來歲蠲子。尤宜加意預防。下兩江總督議行。十一年。轉戶科給事中。十三年。遷順天府府丞。尋遷府尹。十五年四月。遷宗人府府丞。九月。遷副都御史。命往河南會辦傅毓俊控告。張天重謀逆一案。審明毓俊誣陷。論罪如例。十七年三月。擢兵部侍郎。兼順天府府尹。十月。命署山西巡撫。十八年九月。實授。十月。調湖南巡撫。十九年。奏言。郴州二州銅鉛各廠。因距州治遠。不能兼顧。委員董理。一年更替。查

廠中弊竇多端。一切鉛錫銅斤。沙渣淨色。抽課收煎支解。款目繁多。接手之員。必數月方講求明白。此數月內。已受欺蒙侵漏之弊。請做臺灣瓊州例。令新員與舊員。先期協辦數月。以收駕輕就熟之益。得旨允行。二十年二月。調江西巡撫。七月。奏請嚴查鄧陽湖船隻。以靖積匪。上嘉之。二十一年三月。奏勘明廣信府所屬銅塘山。無可墾之地。無可用之材。無可煎之礦。應請永行封禁。二十二年六月。疏言。豐城隄工最要。除石隄官修外。其民修土隄。向俱按照圖甲。額設里夫。行之既久。黠者避役。貧者誤工。乾隆十四年。改爲折徵。法雖稍變。役仍未均。今請略爲更定。按田均提。俾貧民得免派累。業戶共樂輸將。至各鄉距隄遠近不同。一遇衝漲。勢難迅集。而折銀統歸官辦。則工有緩急。費有盈絀。俱可通局籌度。惟向年折徵。別增圩長經收。弊端百出。今擬附漕糧徵收。有田始有糧。有糧始有夫。毫無加累。圩長無從侵冒。工程乃可永固。均如所請行。是月。調河南巡撫。八月。疏言。河北濟沁等水。俱歸黃河之北。衛河最大。受淇泉湯沚諸水。下合漳河。匯入直境。容納有餘。治之法。惟慎隄防而已。河之南西。則伊洛瀾灤。俱入於河。南則汝光等屬之水。會汝入淮。並陳汝開歸所屬惠濟渦河等水。亦歸江南之潁亳入淮。惟夏邑永城商邱虞城之水。獨注宿州。由睢河入洪澤湖。四縣並無山谷。泉源氾濫。於平地則見多而歸。於睢河僅屬一綫。且藉以刷淤。睢河壅阻。則宿靈以北。實被其患。四縣之水。亦致倒灌。其入睢河之界。因爲沙壘灘所遏。水大則衝激。小則停淤。前此屢議開鑿。應聽江南興工。其在豫省境內者。連年河底停淤。應開濬慢深。以廣容受。至地畝一片相連。並無溝塘。是以兩集則田皆積水。兩過則田皆寬水。地多旱種。久浸輒傷。若棄積窪。以爲儲蓄之所。更廣疏橫直小渠。節節引支入幹。則宣洩易而水患可除。於農田有益。諭曰。覽奏頗中肯綮。詳妥爲之。九月。疏言。臣與欽差侍郎裘曰修等。會勘豫省水道。計惟有先開幹河。繼開支河。再開溝洫。分別要工。次工。緩工。次第興修。十月。復偕曰修等疏言。豫省大幹河有四。一賈魯。一惠濟。一渦河。一巴溝。巴溝袤百八十餘里。在商邱則名豐樂。在夏邑則爲響河。在永城則爲巴河。今擬豐樂以口寬八丈爲率。響河十丈爲率。其餘十二丈爲率。至巴溝下口。本寬十五丈。無庸加寬。底皆半丈。其深處高下參差。取最窪者爲水平挑深。以平爲度。計上游寬倍舊河。下游

加舊河之半。河底一律平坦。不至倒灌。此辦理巴溝之情形也。惠濟表三百九十餘里。議挑之始。原以分賈魯之勢。既開之後。坡水匯注。愈下則匯入之水愈多。必需遞加。方可注受河身。上游在開封之中祥陳杞四縣。下游在歸陳之睢淮柘鹿四州縣。今加寬自九丈至十五丈不等。底均三丈。柘城應鑿沙礮九百餘丈。鹿邑之底。以六七丈爲率。此辦理惠濟之情形也。賈魯舟楫往來。運糧糴食。連年淤墊。漸至淺狹。彼河頂衝。此岸淤成。河嘴更多阻塞。中牟以下。有惠濟以分其流。無庸加寬。由朱仙鎮以下。應截去河嘴。並砌築決口。修理舊隄。面寬十二丈。底寬四丈。此辦理賈魯之情形也。渦河發源通許之青岡。至太康爲蕪城河。鹿邑以下。河勢深闊。但應增建月隄。鹿邑岳家莊以下。則益加收束。應加面寬十六丈。底寬八丈。並鑿沙礮五百餘丈。深如其舊。蕪城上截。乃三邑南境之水。藉以宣洩。舊河僅寬二丈。今加寬至六丈。底二丈。蕪城下截。雖寬而淺。亦一律挑深。俾可貫注。此辦理渦河之情形也。其支河之應濬者。商邱之北沙河。發源儀封。從考城至商邱。直達亳州之渦河。又洪溝河發源虞城之惠民溝。從夏邑之巴清河老黃河。永城之滅水溝。下入睢河。此二河爲支中之幹河。其餘應濬大小支河。共三十四道。至支幹各河。所挑之土。卽築隄酌加碾夯。多設涵洞。再開工之始。均於河心安釘誌椿。並立標記。於收工時。覈丈尺以除諸弊。得旨覽奏俱悉。二十三年正月。諭曰。豫省災區。積困已久。朕特用胡寶瑛爲巡撫。伊不辭勞瘁。實能仰體朕痼瘼。在抱之意。而又能盡力調劑。以蘇窮黎。甚可嘉也。著交部議敘。部議加一級。七月。加太子少傅。上獎寶璽及裘曰修。遵旨治河。不惜工。不愛帑。不勞民。水用洩。土計方。上源下游。以次就治。見御製中州治河碑文。二十四年九月。疏言。衛輝府通判缺。經臣奏准改歸河工。查該通判尙有兼管鹽務一項。長蘆河東鹽包行運。汲縣則係河北地方扼要之區。延津則係河南各州縣門戶之地。應分歸二縣稽查驗放。以專責成。從之。二十五年八月。疏言。衛河自雍正四年。經前任河臣嵇曾筠會同撫臣田文鏡奏准於汲縣之高廟下馬營。淇縣之宋村等三處。濬縣之雙鵝頭等七處。湯陰之王家寨等四處。內黃之章家村等十二處。增建草壩共二十六。並奏明因水勢大小。分別停辦減辦工料。於鹽規項內支銷。乾隆七年以後。未經修治。淤墊實甚。臣悉心相度。務俾一律深通。

請自今年疏築後。定爲三年一小修。五年一大修。如當小修大修之年。運河水足。仍停止。俟下次相機辦理。上可其奏。十二月。調江西巡撫。二十六年八月。諭曰。河南見有堵築楊橋隄工。經理賑卹之事。胡寶瑋撫豫日久。情形熟諳。著仍補河南巡撫。十二月。疏言。賈魯惠濟二河。在中牟境內者。均逼近楊橋。黃水直下。合龍後。淤沙甚多。查賈魯舊河已淤。復修不易。黃水初灌時。將河身偏而南徙。自鄭州界至祥符之時。家岡。仍入賈魯故道。業已抽刷成河通舟。祇須將分者截之使合。淺者疏之使深。再就兩岸見有衝刷支溝。多挑築港。俾民田積潦有歸。並寬留河身。以資容納。增築隄堰。以杜旁趨。無須大工。自成天然河道。至惠濟河自兩閘至岡頭橋。已淤斷。且距賈魯新河頗遠。不便強之使通。而岡頭橋距十里坡。賈魯河不過四五里。又有新衝河形。可因勢利導。由岡頭橋入惠濟舊河。挑濬新淤。修補舊堰。並於十里鋪建滾水壩一。則節宣有度。可以分賈魯之勢。而惠濟亦歸故道。得旨事半功倍。爲之甚妥。二十七年正月。上南巡。寶瑋迎駕於德州。御製詩賜之。八月。奏患疲疾。尋請解任。上慰諭之。十一月。疏言。豫省地勢平衍。恃以宜洩者。溝渠寶與河道表裏。臣於二十三年河工告竣。敬籌經久事宜。即將民田溝洫宜開。並每年加挑路溝及小港廢渠宜復。臚列奏蒙聖鑒。是年每一州縣中。所開溝自十數道至一百數十道不等。長自里許至數十里不等。寬深自數尺至丈不等。皆以足資蓄洩爲度。路溝除驛路加挑外。凡商旅通衢。亦一律開溝種樹。雖綿互而分戶承挑。民易爲力。自是每歲或於春融。或於農隙。隨時勘辦。是以逐處寬深。鮮有水患。且各就地頭出夫。貧富自均。就役亦便。皆令渠長地保管理。不經胥吏之手。一無擾累。其民力難以全收之處。自應欽遵聖訓。酌借口食。工多而地畝亦多。仍屬衆擎易舉。惟工多地少。則須酌借。但歲修非比特興大工。各州縣額設公費。動給已足。敷用。總期爲之以實。俾小民蒙利。而不致少累。諭曰。胡寶瑋奏見辦豫省民田道路溝渠一摺。經理甚爲妥善。國家雖久停力役之征。而開挑溝洫。實爲農田之利。通力合作。亦小民之所宜自爲謀者也。今豫省每一州縣。開溝十數道。至一百數十道不等。田溝固有業戶。路溝亦傍民田。民間業佃。就地施工。用力甚便。而其事易集。行之已有成效。直隸河南地屬接壤。著方觀承董率所屬。做而行之。實因利利民之道也。二十八

年卒。加贈太子太保。兵部尙書。謚恪靖。

高斌

高斌。滿州鑲黃旗人。初隸內務府。雍正元年正月。由內務府主事遷員外郎。兼佐領。四月。遷郎中。四年。管理蘇州織造。六年。授廣東布政使。尋調浙江。七年。調江蘇。九年二月。調河南。九月。遷河東副總河。十年。調兩淮鹽政。兼署江寧織造。十一年二月。諭令就近學習河工。十二月。署江南河道總督。十二年四月。疏言。范公隄逼臨江海。爲鹽場藩籬。年久多殘缺。計六萬四千一百三十八丈。請按相距里程。設堡夫三百五十六。及時培修。汛官稽其勤惰。又宿桃中河安清中河宿虹外河山安揚河海防江防等廳。前經河臣嵇曾筠等題准分畫所轄界址。更正銜名關防。其各河管守備。與廳員同汛協防。請一體更正。部議如所請。八月。回鹽政任。十二月。仍署河道總督。十三年四月。回鹽政任。十二月。授江南河道總督。乾隆元年六月。疏言。河工搶修工段。需用土方。請照兵四夫六之例。責令河兵挑運十分之四。准用民工十分之六。約計需費銀兩。與酌給之數相符。將此項據實報銷。又葦蕩左右二營。額採蕩柴。分爲厥運自運二項。共需運腳萬餘兩。請將蕩柴分內。給各廳領運若干。照漕規繳價若干。其所應給運腳。卽於應繳價銀內扣除。除充兵餉。至自運易滋弊竇。應歸厥運。十二月。又言。江南河工。向因未設河庫道。凡各省州縣外解書夫等項。河銀並關稅。計十八萬五千餘兩。係各廳自行收支。多弊混。請將此項河銀。自乾隆二年爲始。悉歸道庫。一切收支。解放兵餉修船之費。俱由河庫道經管。隨時報明查覈。均下部議行。先是。高斌等南永城江南蕭縣等處。黃河爲患。命高斌會同兩江總督趙宏恩。河南巡撫富德等籌辦疏通之策。至是高斌等奏言。黃河南岸。徐州府碭山縣之毛城鋪。向有減水石壩一。蕭縣之王家山。有天然減水石閘一。邳州睢寧縣之峯山。有減水閘四。俱建自康熙年間。誠分黃導淮以水治水之善策。因年久淤淺。苦水發爲患。查毛城鋪原有洪濤巴河二河。爲減洩黃水故道。因閘下地勢東北高於西南。是以水向南行。漫入祝家口。請自今水涸後。將二河

鑿令深通。並挑寬河頭百餘丈。再於二河上首。逼近毛城鋪口門之處。將舊有之蔣溝河疏通。祝家口潘家口等處。築夾土大壩。攔截南流。務使減下之水。盡入蔣溝洪溝巴河。分流下注。則永城碭山一帶。均可無淹漫之虞。至王家山天然閘減下之水。亦會入徐濠口。閘下舊有引河。中自齊村橋至壩集。閒被淤墊。宿州境內。灰谷堆燕子口等處。亦有淤淺。應一律疏濬。又峯山減水四閘。歷年既久。自閘塘以至孟山湖六十餘里。引河多淤。應一并估挑。又奏准陽運河自清口至瓜州三百餘里。其上源係分濬口洪澤湖之水。入天妃廟。建甬而下。經淮安寶應高郵揚州。以達於江。惟借東西兩岸一線漕隄。以爲防固。請於天妃正越兩閘之下。相距百餘丈。各建草壩三。草壩之下。酌建正石閘二。越河石閘二。又於所建二閘尾。各建草壩三。重重關鎖。層層收蓄。則水平溜緩。洪湖之異漲可禦。運河之水勢可減。再查湖水三分入運。七分會黃。其山盱尾閘之天然南北二壩。原以宣洩洪湖異漲。令運道無虞。高堰大隄堅固。將來非有異漲。二壩俱不可輕開。使清水全力禦黃河高寶諸湖之水。循軌入口。不至泛溢。下河則高寶興鹽等州縣民田。可免洪湖洩水之患。疏下均議行。會御史夏之芳主事孫漢孫先後條奏。奏河工事宜。命高斌會同大學士嵇曾筠副總河劉永澄等。詳度妥議。時安徽布政使晏斯盛廣東學政王安國等。復請疏濬海口。命高斌同趙宏恩及江蘇巡撫邵基會勘。二年三月。高斌以准運湖河各事宜。有面奏請訓之處。疏請來京。得旨俞允。四月。至京。適趙宏恩亦以戶部尙書內擢。命王大臣會同高斌趙宏恩。將諸臣所奏海口清口運河運口各事宜。逐條詳議。御史甄之璜鍾衡等。復奏毛城鋪工程。有礙運道民生。請停止。上以鍾衡甄之璜所議非是。著革職。交部嚴審。定議具奏。三年正月。准揚運河工竣。得旨嘉獎。下部議敘。四年三月。諭曰。從前河道總督高斌。因議疏濬毛城鋪水道之時。並請另開新運口。堵塞舊運口。以避黃河倒灌。近據外間傳說。及南來之人。多言黃河淤墊之虞。究未刷洗淨盡。所政新口。雖離黃稍遠。而上流水勢旁洩。其力已弱。不能直注黃河。將來倒灌阻塞之患。終不能免。人言如此。是否確情。朕實難以遙定。惟有命大學士鄂爾泰乘驛前往。庶與朕親臨視相。同。四月。鄂爾泰勘奏新運口宜開。如高斌議。下大學士九卿議行。七月。疏言。准揚所屬黃運湖口隄工。額設堡夫。

千。令河臣明白奏報。以便驗度水勢之大小。至各處開壩開閉。則應以就近石工。不定不易水長之尺寸爲度。如黃河則有徐州城外石隄可驗。河水則有洪湖山盱南壩可驗。於此立定準則。驗度開啓。在工人員。皆得遵循無誤。如黃河南岸洩水門戶。則有碭山縣之毛城鋪壩。王家山之天然閘。睢寧縣之峯山四閘。毛城鋪壩。應以徐城石隄連底水。長至七八尺爲度。卽行開放。秋汛過後。至九月初一日。卽行堵閉。再壩外引水支河。見有四道。而蔣家營一河。河頭直順迎溜。水洩尤多。今應止留三道。其上流之汪家莊引河。應行堵閉。蔣家營河頭。因改爲倒句。從前大順之口門。堅築草壩。堵塞以防引溜過多之患。天然開應以徐城石隄連底水。長至八尺爲度。卽行開放。水落壩閉。不必拘定日期。峯山四閘。在徐城之下。非遇異漲。勿許輕開。至黃河北岸洩水門戶。則有宿遷縣之竹絡壩。清河縣之王家營城壩。安東縣之馬家港竹絡壩。口門應收窄二丈。止留四丈。其內外之臨黃東黃二壩。亦應一例收小。酌定每年於十月內。東省煞壩後。始行開放。以濟來歲重運過完。卽行堵閉。王家營城壩。應照乾隆八年原議。必俟非常之漲。始行開放。馬家港與此一例。毋庸常時開放。於清水則以洪澤一湖爲灌輸蓄納之地。水弱則不足禦黃濟運。水大則高堰一帶。工程受險。其積水之處。山盱三滾壩外。則有盱眙之蔣家閘。南北天然壩二。蔣家閘應酌定。以洪湖水長與山盱南壩相平。始令開放。南壩一不過水。卽行堵閉。天然南北二壩。應酌量於南滾壩過水三尺之時。始將土壩開放。俟南滾壩一平。卽行堵閉。又運口分淮入運。惟揚運河三百里。進水之源。不過借以通舟。濟運水勢。原不宜過大。其草門壩口。應酌定以四尺爲度。二壩三壩。亦須照式收小。至南壩壩墩。應照北壩墩作磨盤式。以便重運執行出口。疏入。議行。七月。運河水漲。海州一帶被淹。命高斌往勘。八月。會奏河工見行事宜。得旨俞允。十一月。充玉牒館副總裁。十二年三月。授文淵閣大學士。四月。諭往江南同新任河道總督周學健辦理防汛事宜。其直隸河道總督印務。交直隸總督那蘇圖暫管。五月。直隸水利工程告竣。上獎高斌及劉於義勤勞。下部議敘。十三年三月。命同左都御史劉統勳赴山東查辦災賑。先是。浙閩總督喀爾吉善劾浙江巡撫常安婪贓各款。命高斌偕總河顧琮往訊。嗣又命大學士訥親往會審。論罪如律。至是高斌與顧琮

會奏。不能按款窮究。請交部嚴加議處。部議革職。詔從寬。留任。閏七月。兼管江南河道總督事務。十二月。以查辦周學健家產。徇私瞻顧。命革去大學士。仍留河道總督任。十五年三月。以前所築十字河竹絡壩之臨黃臨運二壩。辦理未協。部議革任。特予寬免。十六年三月。上南巡。命仍以大學士銜。管河道總督事。閏五月。暫管兩江總督印務。八月。盱南陽武漫工未合龍。詔往相度堵築。命未下。高斌奏請赴豫協辦。諭獎其急公任事。得大臣體。十一月。工竣。交部議敘。尋命同侍郎汪由敦往勘天津一帶河工。十七年三月。高斌年七十。上賜以詩。十八年七月。奏洪澤湖水漲泛。高郵車邏壩決。邵伯迤北運河二閘下河高郵寶興一帶被淹。下部嚴議。是月。學習河務布政使富勒赫劾奏河南虧帑事。命署尚書策楞尚書劉統勳往查屬實。革職留工效力贖罪。九月。黃河復決銅山縣張家路。南注靈虹諸邑。歸洪澤湖。奪淮而下。諭令高斌赴銅山勒限堵塞。如不能剋期告竣。即嚴參治罪。策楞尋奏李燉及革職守備張賓侵帑誤工狀。諭曰。李燉張賓。著即於該工正法。使在工人員。知所懲戒。此皆由高斌張師載負恩徇縱。實無可貸。念高斌尙係舊人。不忍即寘重典。張師載因並寬宥。然國有常刑。雖於法外矜全。亦不可不使知儆惕。著將高斌等縛赴行刑處所。令其目覩行刑。再行釋放。二十年三月。高斌卒於工次。命賞給內大臣銜。二十二年。上南巡。諭與靳輔齊蘇勒。高斌會築一同祠祀。二十三年。賜諡文定。五十一年。命入祀賢良祠。

嵇璜

嵇璜。字尚佐。一字黼庭。晚號拙修。江蘇無錫人。大學士會筠之子。雍正七年。欽賜舉人。八年。中式進士。改庶吉士。散館授編修。十二年。擢右中允。十三年。轉左諭德。充山西鄉試正考官。乾隆元年。充陝西鄉試正考官。命南書房行走。三年。丁父憂。六年服闋。七年。擢左庶子。充日講起居注官。尋遷翰林院侍讀學士。八年三月。轉通政司副使。七月。遷都察院左僉都御史。九年正月。奏督撫簡閱標兵。祇就趨走。應對定將弁能否。且有倚爲耳目。授以採訪之權者。願縱愆忽。廢職之由。請欽派大臣前往近省簡閱邊省。或於駐防將軍副都統內選派。再苗疆屯兵。防範

稽查。是其專責。乃漫無覺察。於有名案犯。既不能躡緝。又食用諸費。皆取諸苗。且虐使之。伏祈救諭苗疆督撫。飭屬整頓。得旨直隸山東武備尚屬整飭。著先派大臣。由河南一路稽查上下一帶。餘著候旨。又奏河工疏築事宜。應峻毛城鋪壩分洩漲水。於順河集等處開河引溜。至黃河岸因積水漫淹。山岡老土。衝刷頗多。宜修築。留新黃河韓家堂各處舊有口岸。以洩盛漲。議行。七月。奏直隸州縣工役。每爲奸蠹包攬扣剋。致工程不能堅實。目下以工代賑。若吏胥恣意中飽。於民艱尤無裨益。請嚴禁。夫頭包攬。務取無業貧民。給散工價。得旨允行。十二年。遷大理寺卿。十三年四月。授都察院左副都御史。六月。擢工部右侍郎。十四年十二月。調戶部右侍郎。尋轉左。充經筵講官。十八年十月。江南黃淮並漲。上宣防八事。一銅山下清口上河身。宜挑浚也。查決口奪溜。河身必淤。應將銅山下及早挑挖。一高堰等處。石工宜修也。黃河入湖石工多罅漏。應趁冬春逐一修補。並加築垣坡土戲。一歸仁隄岸。隔斷睢湖諸水。舊設三閘。相機啓閉。應及時修補。以資障禦。一河流自山東入江南。由廣而狹。閘壩減水。卽古人疏分遺意。日久頹廢。宜酌其可復者復之。一明臣劉天和製平底方船。設二百斤重五齒鐵耙於船杪。沿流拖罾。使沙不停積。河底日深。今清口上河身本淺。宜做其法以濬之。一下河向屬淮揚道。事繁實難兼顧。應設分巡道。以專責成。一江南黃河險要。在上游五廳。大溜至非埽無以禦之。應於冬間辦運分貯。隨時接濟。一河工向設堡夫。應令廳汛官督率於遠處取土。不得近挖隄根。致多積水。又南河關鍵。尤在五壩。治水之道。宜洩與隄防相表裏。欲固隄防。宜講宣洩之法。疏入下廷臣議行。適合欽差尙書舒赫德等。奏請派熟諳工程之大員修理隄防。上命嵇璜偕工部侍郎德爾敏前往督修。十一月。奏高堰工程有甄石之殊。年分有新舊之異。當因地制宜。修砌石工隄。外築攔水壩。水深者一二丈。於隄身開槽修砌。俟新工過半。再拆舊石。至舊有甄石。見盡改砌石工。較甄倍重。應將椿木加添。再舊修石隄。止用石二進。石後用甄二進。甄與土不能固結。一經風波。搜空易坍。見於甄石後加築灰土三尺。以禦衝刷。報聞。十二月。奏串場河爲諸水總匯。以閘門之深。較壩面之廣。尙虞來水多而出水少。請自石磯閘南六十里內建閘二。並將查丈之古河間長七千三百丈。闊八丈。俾直達海口。其山竇境內徑

澗等河。亦分洩運河道。並應挑濬順利。得旨覽奏俱悉。俟繪圖貼說奏來。益詳明也。十九年正月。偕大學士劉統勳等。奏高堰高澗龍門古溝四處。深塘兜灣。實爲頂衝。從前石工外。俱有草壩。應修復以資保固。報聞。三月。偕德爾敏等奏。堰貯所需石料。輒運維艱。今將埧卸舊石搭用。並有根底堅固。祇須砌上截者。視原估可減四萬餘丈。上嘉之。閏四月。奏報陘工竣。諭曰。高堰爲全淮保障。所關甚鉅。上年異漲衝刷。間段殘缺。朕心深爲焦勞。念係石工場役。庀材辦理。匪易。今自興修以來。未逾半載。刻期告竣。俾運道民生。均資利益。諸臣各能體朕宵旰憂勤之意。協力同心。克副委任。宜加優敘。以獎勤勞。侍郎嵇璜等。俱著交部議敘。九月。充武會試正考官。十月。轉吏部右侍郎。二十年二月。諭曰。昨因諭臣工終養一事。降旨宣諭。今日嵇璜彭啓豐各具摺陳請終養。此奏若在降旨之前。出自伊等至情迫切。固當曲體允從。茲特以面聆朕訓。感發天良。則所請乃導之自朕。而伊等正未有迫不及待之情。此亦如禮部鄉賢。在可准可不准之間。其去留朕得而權衡之。又嘗各視其人矣。彭啟豐才本中平。辦理部務。亦屬竭蹶。且伊係內廷翰林。以文學爲職。而上年扈蹕和詩。視前遠遜。所學日漸荒落。著照所請。准其回籍終養。嵇璜在諸侍郎中。才具尙可辦事。且一時出兩缺。亦未得其人。仍著照舊供職。伊面奏以去歲奉差南河。曾告假歸省。見伊自差竣回京。已及半載。何前此默無一言。而今日於訓諭之後。遂若是亟亟焉。適合昨所降旨。所謂情見乎辭。無可置辯矣。朕辦理諸務。一秉大公。毫無成見。而確有定衡。恐不知者以同請而去留各異。妄生疑義。將此宣諭中外知之。十二月。以母病請假歸。得旨俞允。二十二年。江北淮徐揚等處被水。璜在籍奏請探買小麥。運江平糶。上從之。二十三年正月。諭曰。吏部侍郎嵇璜。前以伊母老病。懇請回籍。今詢其母病已見全愈。著前往南河爲副總河。協同白鍾山料理河務。伊父大學士嵇曾筠。久任河工。見聞所及。請練非難。伊母雖年近八旬。而常准帶水。儘可輕舟迎養。固無異在家侍奉也。四月。諭曰。河工爲運道民生所繫。朕宵旰憂勤。時深廬念。茲者翠華南幸。於高堰清口及徐州等處工程。親臨閱視。並與司河務諸臣。詳加籌酌。見今伏汛將至。且近河皆積淤之區。貧民甚多。以工代賑。於窮黎有益。而於工程亦易集事。白鍾山身任總河。工務是其專責。但以目今時勢。所

有應疏應築事宜。同時並舉。朕意分任大臣。以專其事。當可速收實效。嵇璜前奏請於昭關添設滾壩一座。滾壩之下。復開支河。南關舊壩。改建滾水石壩。此項工程。並一應支河。即著嵇璜率同何燾董其事。六月。奏准揚運河東隄。減入下河之水。自邵伯以北者。歸海之路。如草堰劉莊伍祐新興等場。皆得地勢之宜。分注關龍港新洋港歸海。但劉莊之大團閘。至新興之石碓閘。相距五十五里。應於伍祐場之沿窪口蔡家港地方。添建石閘二。挑上下之支河。引歸新洋港入海。至沿海港口。則射陽湖勢太灣曲。洩水不暢。應挑通使徑入海。又串場河以西。水道多淤塞。如泰州之孔家溝。鹽城之岡溝。河皮家河三處。須疏濬深通。高寶運河之東隄。原設十餘閘。年久傾圮。應拆修以利啓閉。此皆下河歸海之路也。惟下河州縣。本係水鄉。形如釜底。若高郵諸壩之水太多。盈科漸進。已不免於泛溢。查湖河之水。歸海紆迴。而歸江徑直。多一分入江。即少一分入海。瓜儀一帶。地勢兜灣。洩水不暢。且山旣五壩寬三百三十丈。蓋以蔣家壩八十丈。而歸江。閘壩只八十餘丈。來水五倍於去水。惟藉芒稻河爲尾閘。須挑河築壩。使湖河水勢相平。然後將各壩開放。則湖水既減。可爲容納來水。地遇伏秋。五壩過水漸多。宣洩不及。方將高郵湖諸港放入運河。由車邏南關二壩減洩。則歸海之水自少。下河田畝可無虞。諭曰。嵇璜奏湖河宜導機宜。并應疏應修各工一摺。頗中窾要。運河減洩之水。歸海路遠。歸江路近。然亦有不能歸江之處。此皆南巡得之目擊者。今分別緩急。因水利導。俾田畝資其灌溉。水漲不受淹浸。所言頗合朕意。但向來地方官各州縣局守一隅。不能通盤籌畫。而大吏又因循草率。憚於動帑興工。每致臨時竭蹶。節節補苴。迄無成效。今會全局而熟籌之。網繆於先事。其中改紆爲直。移遠爲近。濬淺爲深。所奏應疏應修各工。具有條理。不必更行交部。著照所請。交與尹繼善白鍾山普福等。會同嵇璜於應動工時次第興舉。所需帑項。照例分別動支。該督等當督率屬員妥協辦理。俾下河民生永有裨益。八月。秋汛安瀾。議敘加一級。十一月。奏高郵運河東隄。添建石壩工成。諭曰。據嵇璜奏高郵運河東隄。添建石壩。已經完竣。并請酌定水則。如上游五壩過水漸多。車邏南關二壩過水至三尺五寸。開放五里中閘。若車邏南關二壩過水至五尺。再開放新建石壩。視水勢之大小以爲啓閉。自無壅潰之虞等語。

所見深得蓄洩機宜。蓋湖河水勢以五壩爲來源。以江海爲去路。而歸江之路近於歸海。況下河一帶。地本卑窪。必視歸江諸壩。實有宣洩不及之勢。始可以次啓放。今春南巡時。親臨指示。令將軍遷南關二壩。常行開放。俾河水得以隨時減洩。而又早關歸江之路。以達其流。下河田畝。遂獲豐收。此已試之明效。自當酌定水則。以時啓閉。著照嵇璜所奏過水尺寸。立誌壩旁。以垂久遠。尋奏高郵官河北澄子南澄子均有淺阻。應挑浚。又壩下引河內灘嘴。應砌高實。諸湖之支河宜加疏挑。騰空湖面。多留山盱五壩過水地。殊批甚好。具見留心。應妥速爲之。十二月。因徐城增築石工。迅速完竣。議敘加一級。又奏車遷南關壩。脊高於高郵湖面二尺七寸。應將芒稻壩常年啓放。則江湖脈絡貫通。下河無虞淹漫。上嘉其奏。諭曰。據嵇璜奏稱芒稻一壩。爲諸湖入江之路。宜洩通暢。下河州縣。自可永免水患等語。此實經理下河之要鑰。朕去春南巡時。所諄切指示。令早關歸江之路者。正謂此也。芒稻一壩。乃歸江第一尾閘。向因淮南鹽艘皆由灣頭河轉運。必須芒稻關門下版。方可蓄水過行。以致不能啓放。合宜。前據該督等奏。關東有舊越河一道。應令鹽艘從越河直走金灣。北關是洩水。與運鹽已自分爲兩途。芒稻關自可常年啓放矣。但終恐狃於蓄水運鹽之習。仍不免因循觀望。夫蓄水運鹽。不過可省緹挽之勞。所費在富厚商人。而下河數州縣之民生攸繫。此其輕重。豈不較然耶。嗣後芒稻關應永遠不許再下關版。俾得暢洩歸江。則諸湖自可減退。遇伏秋大汛。亦足以資容納。而下河一帶。永蒙樂利之休矣。該督等將此旨勒石關畔。俾後來司事者。知所遵守焉。五月。偕督臣尹繼善奏報。上下江水利工程全完。議敘加一級。九月。調禮部尙書。二十四年四月。請假歸省。旋請在籍終養。二十五年八月。來京。恭祝萬壽。十月。歸至清江浦。奏臣見河臣保護下河事宜。竊惟歸江之路。尙有應行籌辦者。查運河東隄之金灣滾壩口。門寬四十丈。而尾閘仍歸入六關。河勢易於淤阻。應請於金灣壩下。開挑引河。並將董家溝淤淺。疏挑以注江。則尾閘更暢。又查膠家溝石羊溝董家溝三壩。應改低三尺。以芒稻西關爲準。庶就下之勢益順。諭曰。此係腳在京會奏之事。原以待明年南巡舉行。今既改期。且督河諸臣已有挑濬之舉。則及時陳奏。實爲允當。有旨交尹繼善等勘議。二十六年。來京。恭祝皇太后萬壽。二十九年。

十二月丁母憂。三十二年服闋。署禮部尚書。五月實授。七月授河東河道總督。八月奏楊橋大壩。為豫省第一要工。稽料堵閉。時虞滲漏。北岸河灘順直。既不能挑引河以分溜。大壩迤東。又徧地飛沙。不能建越隄。惟有將壩身裏戩培厚。以當重門保障。又從前堵築楊橋漫口。係就鄭中越隄頭盤築壩臺進埽合龍。遂改越隄為臨河大隄。該處土性純沙。實難恃以無恐。應選擇淤土。幫築裏戩。輸日自應如是矣。但期帑歸實用。久資鞏固可也。尋奏回空糧船。已過濟寧南下。月內可全出東省境。其濟寧以上之蜀山南旺馬躡馬場等湖水櫃。應及時收蓄。見將出水斗門開座。概行堵閉儲水。以備灌輸。至濟寧上下運河東岸。獨山湖十八水口。亦次第堵築。不使涓滴外洩。再微山湖見深一丈二尺一寸。較奏定水誌多尺許。來春濟運甚為寬裕。得旨覽奏俱悉。三十三年五月。諭曰。前因彰寶摺奏。有運河水勢較小之語。而嵇璜亦曾奏及。當即傳諭該總河。令其查明覆奏。隨據奏。到四月初旬。得兩五寸。各幫已銜尾遊行。乃今日倉場侍郎等具奏。又稱濟寧等處糧艘過津。前後脫幫自一二日至四五日不等。情形迥不相符。此實近年希有之事。運河糧艘。全賴諸湖水櫃啓閉應時。以利浮送。而先期酌量調濟。尤係河臣專責。前此李清時經營有年。辦理妥協。從未聞以湖水淺澀。致轉漕或有滯滯。至春末夏初。雨水較少。亦北方常事。況今春已得雨數次。而糧艘脫幫。轉致多稽時日。若此。豈藉口雨澤稀少。遂可以為卸責之計。況嵇璜到任以來。於儲蓄宣洩事宜。既已辦理不善於前。及降旨詢問。又復自行掩覆於後。是何意見。著嵇璜明白回奏。尋奏糧艘脫幫。因員弁催償不力。得旨交部察議。九月。授工部尚書。十一月。諭嵇璜見在來京。著專辦工部事務。不必在南書房行走。三十四年正月。因河東總督任內。未甄別佐雜。諭曰。河東佐雜額缺。多至八十九員。嵇璜在任已及年餘。理應悉心澄汰。何至甄別無一人。明係膜視察吏。姑容瞻徇。嵇璜著交部嚴加議處。部議降三級調用。補都察院左副都御史。五月。以會獻時刑部錯擬罪名。隨同畫諾。降一級留任。三十六年。遷工部右侍郎。三十八年五月。擢工部尚書。八月。調兵部尚書。十二月。充經筵講官。三十九年。充四庫全書館正總裁。四十年三月。充會試正考官。四月。出闈。未赴香山行宮候召見。部議降三級調用。得旨從寬留任。十一月。賜紫禁城騎馬。十二月。調工部

尚書。四十二年。京察議敘加一級。四十四年十二月。兼翰林院掌院學士。尋調吏部尚書。協辦大學士。四十五年。京察議敘加一級。六月。教習庶吉士。九月。授文淵閣領閣事。兼國史館正總裁。四十六年二月。充三通館正總裁。十二月。命管理稽察。欽奉上諭事件處。尋諭曰。本日據阿桂李奉翰韓鏜覆奏。嵇璜前奏令黃河北流。仍歸山東故道。其事必不可行。各摺已批交該部知道矣。此事前據嵇璜在熱河面奏。朕揣度形勢。以爲其事勢難行。是以遲回久之。更翻治河諸書。以博訪衆論。皆稱黃河南徙。自北宋以來。至今已闕數百年。未可輕議更張。即以見在青龍岡漫口情形而論。其泛溢之水。由趙王河歸大清河入海者。止有二分。其南由南陽昭陽等湖匯流南下。歸入正河。仍有八分。豈能力挽全河之水。使之北注。此事勢之顯而易見者。從前孫嘉淦亦曾有此議。究以形勢隔礙難行。其說遂寢。今因漫口復決。是以降旨詢問阿桂等。令各就所見。據實覆奏。俱稱揣時度勢。斷不能行。其詞若合一轍。且稱始而南流八分者。今則全歸。江南地形。北高南低。水性就下。惟應補偏救弊。以復其安流順軌之常。山東地高於江南。若導河北注。揆之地勢之高下。水性之順逆。斷無是理等語。或阿桂等揣合朕意。故爲此奏。而嵇璜尙爲素悉河務之人。其前奏使河流仍歸山東故道之語。亦必中有所見。即使其事難行。而其言爲要工起見。究屬因公。且治河之策。本應集思廣益。正不妨博採周諮。以期詢謀僉同。折衷至當。著大學士九卿科道等。再行悉心妥協會議具奏。尋議上。覆其事。四十七年八月。加太子太保。十月。命在上書房總師傅上行。四十八年。京察議敘加一級。四十九年。璜子承豫。官雲南劍川州知州。以承辦軍米遲誤革職。奉旨交部帶領引見。尋諭曰。該員係大學士嵇璜之子。念嵇璜年老。嵇承豫著加恩以主事用。令其就近待養。毋庸再行引見。九月。諭令每冬日出後進朝。十一月。賜黑狐端罩。尋因河源紀略成。議敘加二級。五十年正月。入千叟宴。三月。四庫全書成。議敘加二級。五十一年。京察議敘加一級。時璜以精力衰乞休。五十四年。京察議敘加一級。三月。以上書房行走。諸臣曠班。諭曰。書房設有總師傅。並不專司訓課。其實專在稽察。與總諸達之於衆。諸達無異。師傅內有怠惰不到者。總師傅自應隨時糾劾。方爲無忝厥職。今該師傅等。竟相率不到至七日之久。無一人入書房。其過甚大。而總

師傅復置若罔聞。又安用伊等爲耶。此而不嚴加懲創。又復何以示儆。嵇璜年老衰邁。王杰兼軍機處行走。情尚可原。著從寬交部議處。劉墉等俱著交部嚴加議處。部議降二級調用。命改爲降三級從寬留任。五十五年四月。諭曰。大學士嵇璜。係雍正庚戌科進士。服官有年。精神豐鍊。茲當庚戌會試。已屆周甲之期。與新進士先後同年。實係人文盛事。著照從前史貽直之例。重預恩榮筵宴。以爲藝林佳話。五十六年十二月。賜肩輿入直。五十七年京察議敘加一級。十月。諭曰。嵇璜年逾八旬。精力不能兼顧。翰林院掌院學士事務。著彭元瑞管理。五十九年七月卒。贈太子太師。派皇八子溥儀侍衛十員。前往奠醊。並賞給銀一千兩辦理喪事。其從前降革處分。悉予開復。所有應得卹典。該部察例具奏。賜祭葬如例。諡文恭。子承謙。官翰林院侍讀。先卒。承豫見任兵部郎中。承閑見任廣東廣州府同知。承羣前任山東武定府同知。丁憂起復。仍赴山東。今借補泰安府通判。

裘曰修

裘曰修。字叔度。一字曼士。江西新建人。乾隆四年。進士。庶吉士散館。授編修。八年。擢侍讀學士。充日講起居注官。九年。遷少詹事。十二月。充湖北鄉試正考官。十三年。遷詹事。十四年四月。命祭告南鎮會稽山。十一月。命南書房行走。十五年六月。充浙江鄉試正考官。十月。遷內閣學士。十六年八月。遷兵部右侍郎。十二月。充江南鄉試正考官。十七年。署吏部侍郎。十八年六月。充浙江鄉試正考官。九月。調吏部右侍郎。十月。署戶部侍郎。十一月。充經筵講官。尋充會典館副總裁。十九年三月。以察議侍郎張泰開保舉瞻徇事不實。部議革職。奉旨從寬留任。十月。調戶部右侍郎。先是。胡中藻逆詩案發。供天津道張紹梁之弟紹衡曾述曰修言。堅磨生集已有人進呈。上面詢曰修。並無此語。命提鞫張紹衡實訊。嗣紹衡供此語得自裘曰修屬實。曰修執奏如前。二十年五月。諭曰。此事面質對。其言出自裘曰修。已無疑義。若謂裘曰修有意通信。何難密札胡中藻。令其并行銷燬滅跡。而乃假諸張紹衡之口。此固不然。但從前查辦胡中藻詩集。朕原特交蔣傳密辦。事閱數年。裘曰修同事內廷。偶爾聞說。亦情理

所有而張紹衡向胡中藻說及原在未經發覺之前俱出無心於胡中藻本案初無關涉自可無庸辦理乃裘曰修面承詢問堅執以爲並無此言是以將張紹衡提挈質對俾此事水落石出而裘曰修以業經諱飾於前因即遂非於後今既供證確鑿則裘曰修面欺之罪實無可道著交部嚴察議奏六月議革職尋命授右中允十一月遷侍講十二月授吏部右侍郎二十一年二月充經筵講官四月軍機處行走九月恩賞分戶部飯銀每年五百兩命赴巴里坤辦理軍務十二月奏言肅州備用之馬多多益善此次解送五千匹若不敷用西安滿洲營可得千餘綠營可得三千臣已屬巡撫盧焯預備俟臣抵肅商之督臣黃廷柱如有撥調即行文令續解可應時無說又西安現運米送巴里坤若令晉省解肅之駝帶運亦可稍減腳費得旨允行二十二年正月奏言西陲地廣回民不下數十部落而厄魯特人介處其中當策妄阿喇布坦時恣殺掠回民切齒已久是以從前我師所至輒爭先效順此次進剿厄魯特必竄逸或闌入回地臣聞伯克額敏和卓爲回部知名之人受恩最重請頒赦令彼宜諭諸回部以我兵所誅惟厄魯特且爲回部除害若有竄入境者能擒而殺之一體賞賚勿被煽生疑懼五月裘曰修還京命往山東河南上江會勘水道疏濬事宜六月由山東查勘至河南七月由河南至上江八月偕安徽巡撫高晉奏籌宿州靈璧虹縣疏濬事言宿州靈璧虹等處每年所以被水之由緣豫省虞夏商永四邑之水畢匯宿州所恃以宣洩者惟睢河之一道上游毛城鋪等處減洩之黃水累年浸灌水過沙停積漸成淤至上年天然閘峯山四圍陸續開放而毛城鋪至本年四月底始行堵閉黃河直流已經一載是以徐溪口一帶竟成平陸睢河上段之在宿州者現已全行淤墊睢河既淤豫省諸水及宿州四境山水散流漫衍達於徐靈璧則有斗溝拖尾河沱河虹縣則有荀家溝岳家河須一律疏濬虹縣又有撞河受水極大向由林子河經歸仁關以東之涵洞入安河今林子河淤已久亦宜舍舊圖新從潘家山南之徐家衝開通以達董家溝歸安河入洪澤湖較爲便捷凡此皆宿靈璧虹三州縣積水情形就臣等所見酌擬之辦法也至烏雀嶺董家溝安河係虹縣泗州宿遷桃源四州縣錯壤須會同辦理董家溝在宿遷境內已全淤安河則界桃源宿遷泗州三州縣亦間淺阻金鎖鎮劉

李埂田家集陡門等處。上下八十里。爲入洪澤之咽喉。尤爲緊要。皆須逐段開濬。必此處較上游深通。而後睢河一帶之水。順流直下於洪澤。施工次第。當由此起。現行文下江督撫諸臣。確勘詳估。及時辦理。惟是下游之下。復有下游。洪澤一湖。以清口爲出路。前蒙皇上指示河臣。將草壩拆卸。以暢其流。江南官民。皆仰頌聖明。照燭於數千里之外。但每歲係應期開放。俾上游之水。隨來隨去。則來者雖多。而去者能速。不致壅闕於一時。其言水勢來源去路。頗爲明晰。上諭勉勵。九月。日修由潁亳一路。復至河南。偕巡撫胡寶瑤奏籌豫省疏濬事。言黃河以南之水。鞏縣以上。俱入於黃。至滎澤以下。北阻大隄。南則連山橫互。諸水所經。惟以正東及東南兩面爲去路。正東則上江宿州之沮睢河也。向因沙灘徐溪口等處梗塞。致省城之巴河。鞏河。豐樂河皆無出路。下阻則上遊。並此諸河。在在淤墊。幹河既淤。一切溝渠。又無出路。此商虞夏永四邑頻年水患之由也。東南一面。則以江南潁州府之阜陽太和亳州等州縣爲出路。淮水之大。本能宣洩。而兩省犬牙相錯之處。淺阻亦多。豫省之水。濡滯而不下。則豫省先受其患。極漲而潰。奔流四溢。其患又且及於上江。此開封陳州迤下及於歸德之柘城。鹿邑汝寧迤下及於西平上蔡。頻年被水之由也。今睢河砂礮一帶。業奉旨興挑。潁亳一帶。臣曰修前與高晉會勘。東面東南面去路無阻。然後中州諸水。可得而治。臣等博探輿論。謂宜先開幹河。繼開支河。繼開溝洫。分要工次。工緩工。次第興修。東面之幹河。在商邱爲豐樂河。在夏邑爲響河。在永城爲巴河。實係一河。而旁受惠民溝陸溝毛家河虬龍溝歧河民便溝諸水。河身既狹。加以日久淤深。不過四五尺。宜大加挑濬。東南面之幹河。大沙河爲最。即古潁水隄岸殘缺。應補築。次則開封之賈魯河。即古汴水。自尉氏以下。周家口以上。宜一律挑濬。又惠民河自杞縣以下。尤淤阻。潁河自鹿邑以上。漫口甚多。並幹河之當挑濬者。此外如永城之溜溝。夏邑之毛家河小引溝。觀音閣引河白河三岔河。虞城之惠民溝。商邱之北沙河大潤溝。鹿邑之清水河。汝寧府之洪河汝河。宜徧加挑濬。一律通流。所挑工。即以加幫兩岸之隄。但一經漫水。汕刷。便成決口。擬於河身最狹及沙鬆溜急處。普加礮夯。臣等通盤籌畫。由引河以達於支河。由支河以達於幹河。其不能歸河者。於田間多作溝渠。導引或窪地。聽爲澤藪。以資

停蓄。總使源之水。既下注無虞。而潢汙野潦。亦有所約束而不至於散漫。得旨如議速行。是月。日修復至山東。偕總河張師載於濟寧。上下查勘。尋偕巡撫鶴年奏言。館陶臨清等州縣。濱運河兩岸。向有民埝。以禦漲水。而衛田廬。因係民築。民修。僅堆填浮土。不及礮夯堅實。今年兩河驟漲。直注東省。致旁決甚多。雖經堵築。水落後殘損坍塌處。亟應增培高厚。若仍責之民修。不免虛應故事。懇恩准照直隸永定河隄工之例。每夫日給米一升。仍責成地方官。督令實力修補。詔如所請。十月。偕新任巡撫蔣州奏言。山東水道應疏濬處。兗州爲要。曹州次之。昔緣微山湖積水不消。致宣洩無路。臣日修與前撫臣鶴年於六月間相度地形。奏開伊家河。今臣到工。復將原估十丈河頭。再展寬數丈。使湖水建瓴而下。則濟寧魚臺滕縣嶧縣以及江南之豐沛二縣。地畝可普行涸出。至水滄後。更有應辦者。就兗州言之。魚臺縣有舊運河一道。界微山湖西面。上接濟寧之牛頭河。金鄉之陳河柳林河。應一併挑濬。使下游直接江南茶陵十字河頭。而脈絡貫通。上游則濟寧金鄉以下各州縣滙注之水。皆有去路。而水患可除。又泗河自濟寧姚安莊以下。河身愈下愈狹。至今泛溢未消。白馬河則中段之董家口與泗河相接。狹不能容。致淤阻。應將二河之尾挑濬。俾兩河分流。消納亦易。府河係泗水分支。向有金口閘。建涵洞二。今淤塞入河底。來路既壅。去路亦斷。若將涵洞改建水閘。楊家壩亦改建石閘。用板啓閉。則上下通流。節宣有制。泇河合流入馬場湖。每多旁溢。查濟寧之興文鎮以下。舊有河形。年久淤塞。亦應行挑濬。就曹州言之。則應分二道。其西南自豫省之延津滑縣封邱。直隸之長垣東明等處。坡水漫溢而來。是以明代築太行隄時。即沿隄開河一道。名順隄河。順軌東流。自微山湖水漲。此河不能下達。致多淤墊。應疏濬。其東北則曹范壽張陽穀等處。上承濮州定陶各坡河之水。從沙河趙王河入運。今歲水勢異漲。運河爲其頂阻。倒漾而上。遂多淹漫。現於八里廟增建壩壩。此處正當沙趙二河之衝。於地勢最爲得宜。總使平槽之水。濟運有餘。而泛漲之時。消滅亦易。再查泇泇二水。皆爲幹河。泇河至江南流陽縣入海。尚屬安流。泇河入江南之駱馬湖。多淤阻。應一併疏通。以除水患。是月。日修復至上江。偕高晉奏言。潁州府屬地勢平衍。北高南下。各河道均以淮河爲歸宿。達洪澤湖。祇以積年上下淤阻。遂多

漫溢。今豫省既將上游疏濬。安省應一體籌辦。其在豫省連界應濬者。亳州之兩河口及三道河。澠河。太和之茨河。明河。商邱之大沙河。均照豫省寬深丈尺興工。本境應濬者。亳州之宋陽河。霍邱之高塘河及茨河。澠河。下流其隄岸均一律修整。又言宿州上承豫省及下江。蕭碭諸水。又洪湖受毛城鋪減洩之黃水。來源甚多。查睢河衝出之南北二段。既經估挑。其上段正身。地居中夾。若併加開濬。三河並行。以中段接洪湖減洩之黃水。以南段接豫省永夏諸水。以北段接下江蕭碭諸水。均順其自然之勢。使分途下暢。至毛城鋪為睢河上游。仍恪守聖訓。堅閉毛城鋪。非盛漲不得開放。其橫壩引河。悉心籌辦。務於河道民田兩無妨礙。又宿州舊有運糧溝二道。大半淤阻。若將此二溝挑治。並澮河下游於淺處一律疏濬。增建石閘。以時啓閉。既可分新衝南段之水。以通澮河。而由澮入淮。糧船從此直達宿城。既增上游洩水之區。又資往來運送之便。兩岸民田積澇。均可分洩。尋調戶部右侍郎。十一月。奏言。全淮俱入洪湖。而去路又以清口為咽喉。疊奉諭旨。令來歲及早多拆東西草壩。以暢其流。今值初冬。東壩蓄水之期。向來口門祇留十八丈至二十丈不等。收束太緊。今擬酌留三十丈。則湖水暢出。且今歲多出一分。來年可多受一分。於宣洩有益。又奏言。上江諸水開通後。歸安河以達洪湖。自歸仁集下至陡門出口之路。蘆葦叢生。淤墊較甚。上游數百里東下之水。至此皆為所格。連年患由於此。惟是水面瀰漫。無從芟壩。若概用罷工。不但天寒艱於入水。亦且蘆根糾結。器具難施。查沿湖一帶。漁船頗多。募四五百隻。掘取蘆根。兼撈淤土。為力較易。尾閘疏通。則壅遏之患可減。至安河河口。亦有應為籌計者。查歸仁集外奎河。潼河。柏家湖。林子河。羅家河水俱入安河。來水既衆。咽喉尚屬狹隘。宜開董家溝一路。又勘得歸仁隄迤下。舊有涵洞。年久湮塞。擬再開通。又分林子河一支。由此經行。則安河進水之地。亦有所分。而壅遏無患。詔如所請。十二月。曰。修復至河南。偕胡寶瑛奏言。開歸陳三府之豐樂河。響河。巴河。渦河。惠濟河。賈魯河。為諸河之幹。現已陸續工竣。其支河三十餘處。有應續議挑濬。臣等再加履勘。如商邱之兩沙河。虞城之苑家隄。遂平縣之石洋河。上蔡縣之柳堰河。泥河。小茅洞。新蔡之三岔河。各相機疏築。中州全省水患可冀無虞。上嘉允。二十三年四月。上江河工告竣。曰。修與協理河工。

安徽巡撫高晉，俱蒙恩議敘。六月奏言，偏災地方，慮糧食短少，例免米豆稅，以招商。但既經免稅，必設法稽查，始則定地給票販米，繼則沿途照票放行。既售又須回票註銷，胥役在在需索，較照例所納之稅增倍，且票中填明往售之地，中途雖有善價，不得隨便他售。商販卻顧不前，致災地米糧稀少，是欲通商而商反以爲累，欲便民而民轉受其不便。請照舊收稅商免守驗需索，米豆自然流通。詔九卿議奏允行。七月，京師米貴，命發官米減價平糶，以日修等董其事。奏言：今歲市價較往年倍增，若減價太多，恐奸徒乘機居積，適滋弊端。臣等酌議，每石減百文。先行試糶數日，後市價稍平，糶價以次遞減，并將平糶錢交庫，爲搭放兵餉用，不必發五城易銀。庶吏胥不得高下其手，從之。十月，充方略館副總裁。十二月，以天津民人潘濬控鹽商牛兆泰案，詞連日修，與兆泰寄書事。上諭：不必在軍機處行走。二十四年六月，江南飛蝗，延及山東，命偕內閣學士海明往勘，尋奏蝗起自海州，其撲捕不力之地方官，治罪如律。閏六月，充江西鄉試正考官。二十五年二月，命偕侍郎伊祿順赴甘肅清查軍需。九月，授倉場侍郎。十月奏言：每年漕艘抵通，必至石壩換剝船，由五關轉運入京。此一帶河道，自大通橋以下至通州之東水關，長四十餘里，淤積既久，河身愈高，遇雨大則衝潰隄岸，闌水盡洩，雨水微弱之年，則又淺阻膠舟。漕運阻滯，查每年修隄挑淺，名爲歲修，與其逐年勞費，不若爲一勞永逸之計。大加挑濬，嗣後可節省過半。允之。二十六年七月，河決楊橋，命赴河南同巡撫常鈞查勘災賑，並疏洩事宜。日修奏言：豫省河水漫溢，當先求堵禦，次籌疏洩，黃水歸槽，溝渠始能料理。至災區宜先行撫卹，但有司拘於成例，以查明申報上司，委員監放，然後給發飢民，迫不及待，致填溝壑。應請一面查點，一面給放，無俟彙齊造冊，所全實多。又粥廠爲惠最溥，有司恐聚集貧人生事，往往阻格不行，不知各縣俱設粥廠，則彼境之人，不入此境。又於一縣中，分東西南北四鄉，則自然散布，不致叢擠。在官費不甚鉅，而飢民實賴全活。上可其奏。八月奏言：南北兩岸漫口，雖有二十餘處，辦料尙易，惟楊橋決口，寬數百丈，必料物雲集，方可蔽事。查河工定例，每料百斤，價銀九分，仍自運到工。此次決口大工，請酌增價一倍，使附近料物，源源而來。遠者亦不致聞風退阻。大工可速就。諭曰：所見得要，如所議速行。是月，欽差大臣劉

統勦兆惠駐楊橋督工。曰：修查勘下淤至穎亳一帶。九月奏言：黃河既斷正流，由賈魯惠濟二河下灌，倘下游不能容納，又生旁瀆，則爲患滋大。臣查賈魯惠濟二河所受黃水，多有通連之處，其斷續隄埝缺口，爲出水之路者，則留資宣洩，其爲河水灌入者，則概行堵禦，俾順勢而下，導之中流，不致復生決裂。又言：豫省決口上流未斷，江南穎亳一帶種麥無期，此時糧價尙平，冬春恐致騰涌，請一概賑恤，給與折色，其穎屬所貯倉糧，俱留爲來春糶借之用。此數州縣糧價不昂，則河南光州固始等出米之鄉，俱可盡留本省，於災黎有益。上報曰：修尋返楊橋勘南北兩岸各工。奏言：曹縣漫口，關係東省運河，今大河正流，直衝北岸，將來汎水一發，仍慮新隄難保。臣聞視河心老灘已成崖岸，河形爲其所逼，是以偏趨，必當挑濬挽留，俾河行中道，應於楊橋決口工畢，詳加估辦。報聞十月奏言：汎水出五龍口，沿河而下，較黃水濁色減，而性之湍悍過之，加以丹水從北來，其力更甚。今歲異漲，隄不能制，大幹東流，至懷慶府城，從北門灌入，復繞城至尋村，衝開決口，奪溜南趨，不由故道，致武陟一帶被浸，決口大小不等，亟應補築高厚，以防來歲汎水。查汎水隄埝，惟武陟縣境之木樂店係官工，餘皆民修。此次工大費鉅，請借帑興工，以紓民力。又言：被水最重之州縣民人，有避赴鄰境者，聞賑來歸，請查明戶口居址，一體賑恤，得旨嘉允。上令其回京任事。十二月，豫省河工告竣，交部議敘，御製中州治河碑。又有嘉其不惜工，不愛帑，不勞民，水用洩，土計方，上源下游，以次就治之語。是月丁憂回籍。二十八年二月，諭曰：直隸連年積水未消，現雖多方宣洩，終不如豫省之妥善。從前河南疏濬河工，皆係侍郎裘曰修協同辦理。此時裘曰修服制將闋，著即馳驛來京，督辦直隸水道溝渠事務。四月，署吏部侍郎。六月，上又以直隸山東界生蝗，命偕尙書阿桂董辦撲捕事宜。尋奏言：吳橋寧津樂陵南皮鹽山慶雲海豐等縣濱河近海，窪處甫經涸出，極熱所蒸，蝗蝻蠕動，現飭各州縣分路撲捕。又直隸之有運河，猶南省之有長江，各水皆由此入海，每有宣洩不及之患，務將減河廓清，並多求出路，以益暢達。報聞。七月，奏督捕滄州靜海霸州文安等處飛蝗，復諭竭力毋忽。九月，曰修奏查辦直隸河渠事竣，請假回籍迎養。上諭曰：睢河久未疏濬，應豫爲籌畫，著裘曰修於歸途之便，即會同高晉等查勘辦理。十月，曰修奏言：勘

辦睢河。必厚蓄清水。以刷淤泥。方爲掣要。各開隨宜啓閉。遇應開黃壩閘。則堵南服河頭。應開西流閘。則堵北服河頭。使水匯入睢河。力足衝刷。庶無淤積之患。上嘉納之。十二月奏言。睢河原係沙積淤。不過黃水之時。但值清水盛漲。兩岸亦不無坍塌。是以兩旁淤沙停積。河底淺滯。應查明段落。擇其淺狹者。疏令寬深。再南北二河口。於秋冬水弱時。築壩堵截。俾兩河清水。全歸睢河。至四月水長。仍啓壩分洩。於蓄洩似屬合宜。詔如所議行。二十九年三月。福建提督黃仕簡據參將溫泰言。總督每年受廈門洋行陋規一萬圓。巡撫受八千圓。具疏劾奏。命曰修。偕尙書舒赫德往查。四月會奏。起獲洋行底簿。查出道府廳員與總督墊買物件等款。請革職。並將巡撫定長解任。實訊。是月。舒赫德傳旨。命曰修暫署福建巡撫事務。曰修等尋奏黃仕簡所劾受一萬八千之數屬虛。洋行年例。督撫衙門實有八千圓領辦燕窩呢羽貼費。其各參員代總督楊廷璋墊買價銀。俱係各員名下陋規屬實。奉旨黃仕簡率臆具奏。本應議處。但所奏尙屬有因。從寬免其交部。楊廷璋交部嚴加議處。著即解任回京候旨。十二月。署倉場侍郎。三十年正月。遷戶部左侍郎。五月。兼管順天府尹事。六月。充經筵講官。三十一年二月。充會試副考官。十月諭曰。江南淮徐支河一帶。所有官修河隄。前經特派裘曰修等查辦。距今爲時已久。且韓家堂現辦漫口。其下游支河汝港。不無淤墊。亦應酌量疏濬。著派裘曰修高恆。前往會同高晉悉心查勘。至淮徐河道。或有毗連山東河南地方。並著一併閱看。十一月奏言。豫省各河。自乾隆二十二年開挑後。每歲照舊後章程。於農隙時查勘疏濬。隄岸亦隨時培補。現無淤墊殘缺。至歸德一帶。渦河上游。並各支河。大局均與初辦相符。且有加深之處。兩岸隄工。亦皆完固。報聞。三十二年七月。遷禮部尙書。仍管順天府尹事。閏七月奏言。京師因兩路甯。通州交倉餘米。商販等艱於載運。是以上月米價稍昂。請將八月甲米。移前數日支放。上從其言。八月。調工部尙書。三十三年八月。調刑部尙書。尋丁憂回籍。三十四年諭曰。裘曰修丁憂回籍。已一年有餘。著補授刑部尙書。俟伊葬事完竣。來京供職。三十五年四月。仍兼管順天府尹事。閏五月。命督捕武清東安一帶飛蝗。諭曰。裘曰修等奏在永定河武清東安連界。撲捕蝗蝻。忽見飛蝗南來。漸往西北。周元理即帶領員役尾追。視其所落之處撲打。自應

如此辦理。至摺內又稱府尹寶光肅前往遼南一帶。照飛蝗往來方向尋覓。所辦甚屬錯誤。裘曰修平日尙屬曉事。如即親往查勘。當不至爲人朦蔽。今既目擊情形。自應迅赴蝗起處所。查明貽誤之地方官。參奏治罪。而留寶光肅在彼督捕。方合事理。乃竟安坐武清等處。僅聽寶光肅前往一查塞責。全不知實心任事。已屬非是。至摺內稱將來或於隱僻無人之河淀等處查得一語。尤爲取巧。其意不過以隱僻河淀尋覓。難於周到。隱爲玩誤。劣員預留地步。此等伎倆。豈能於朕前嘗試耶。著交部嚴加議處。仍著即往遼南一帶。切實根究。倘於起蝗處所之諱匿不報州縣。復爲徇庇開脫。裘曰修能任其咎乎。尋命降補順天府府尹。部議照編職例革職。奉旨帶於新任。十二月。調工部左侍郎。仍管順天府尹事。三十六年二月。命赴滄州一帶。會同直隸總督楊廷璋查勘運河情形。奏言現今閘座高出河面數尺。口不甚寬。兼有閘牆間隔。水勢不免壅滯。應改用減水石壩。並將壩底龍骨石。拆低一尺。則河水不待平槽。即可預殺其勢。並疏下流引河至岐口歸海處。一律深挑。至捷地閘形勢兜灣。將來改壩。應移近河邊。截曲就直。以順水性。至減河每年遇水後。往往受淤。必須節節疏通。使水得順流達海。方無旁溢之患。上從之。是月。補工部尙書。六月。命南書房行走。七月。充經筵講官。八月。倉場侍郎瓦爾達等奏河道淤積久。請挑濬以利漕。命曰修等會同辦理。九月。諭曰。直隸被水之虞。順天所屬者居多。裘曰修於近京水利情形。較爲詳悉。著往來調度查勘。總司其事。三十七年正月。諭曰。永定河北運河等處。督辦工程。著裘曰修協同直隸總督周元理。董率各員。妥協辦理。二月。奏言。直隸河工。需用僱夫錢。請照京城發兌官錢例。許辦工各員。一體交銀領買。從之。四月。奏言。治河之道。挑濬爲要。汎水未發之先。旣發之後。逐段詳勘。一有新淤。卽當乘時急辦。惟水中嫩淤。人夫不能站立。難以施工。請設立撐船。給之器具。人夫可於船上用力。而所挑之土。卽以入船。運至兩岸。實爲事半功倍。詔如所議行。又言直隸諸水。千支萬派。總由三汊河爲入海之路。運河兩岸。則大清河會永定而出。子牙河會三支黑龍港而出。全資西岸疊道諸橋。穿連而東。彙入海河。今東岸自南倉以下。改爲疊道。俾盛漲時可徑達堤壩河淀。不專恃海河一道爲出路。但西岸向祇十一橋。今陸續增建九處。多其出路。上游不致受害。至格定

一隄。原爲隔別清渾而設。查子牙運河。自莊兒頭以下漸清。其來路甚遠。而出口祇有大紅橋一。實爲太偏。是以向來於格淀之尾閘。王家河俞家河各建一橋。與清河通流。然兩橋口面過水有限。兩面衝激。隄工不能經久。每歲徒費增修。莫若自當城以下。改爲疊道。水大聽其自漫。水小仍於行人便利。並酌增涵洞數座。不專恃王家河俞家河兩橋。則出水暢順。而子牙下流澄清之水。亦不致受淤。得旨諸凡皆妥。六月奏言。向來河官祇講築隄。不言濬河。不知治河不外疏築二字。而築不如疏。其理甚明。直隸之弊。近水居民。與水爭地。如兩河之外。所有淀泊。本以儲水。乃水退一尺。則佔耕一尺。既報陞科。卽呈請築埝。有司見不及遠。以爲種地自當防護。隄地直插水中。水從決口而入。被淹更甚。請敕所司。於一切淀泊。毋許報壅陞科。並不得橫加隄埝。則凡水皆有所歸。不致壅遏爲害。上是其言。降敕嚴禁。尋兼管倉場侍郎事。十一月。命偕瓦爾達往盛京查勘民典旗地。奏言。此項地畝。奉旨勅帑回贖。俾出典旗人。不失舊業。受典民人。照舊出得價。聖恩至爲優渥。臣等酌議。自回贖後。原業旗人。果能自種。准其撤回。原佃民有欠地租者。地方官代催。抗不給者。撤地另行招佃。如旗人不能自種。原佃民並未欠租。不能遽行撤回。致佃民失生計。詔如所議行。三十八年二月。充永樂大典總裁。閏三月。充四庫全書館總裁。四月。日修患噎症。遣醫診視。尋請解任調理。上以錢陳羣昔患此症。因年老。尤其告歸。今曰修甫逾六旬。不當如陳羣之引退。賜詩以慰之。是月。命加太子少傅。五月卒。日修品學端醇。才猷練達。諡曰文達。

劉統勳

劉勳統。字延清。號爾鈍。山東諸城人。雍正二年進士。改庶吉士。散館。授編修。入直南書房。七年。充湖北鄉試正考官。九年。遷右中允。十年閏五月。轉左。八月。充河南鄉試正考官。十一年。遷侍讀。十二年十月。充日講起居注官。十一月。遷左庶子。十三年八月。在尙書房行走。十月。充順天武鄉試正考官。尋遷詹事府詹事。乾隆元年六月。擢內閣學士。八月。署刑部侍郎。九月。充武會試副考官。十月。命隨大學士嵇曾筠赴浙江學習海塘工程。二年三月。授

刑部左侍郎。仍留浙江。五月疏言。新任督撫提鎮。往往奏請隨帶人員備委用。在大吏平日真知灼見。自應有幹練之才。足收臂指之益。惟是先寄耳目於數人。即付腹心。以要缺補用。不循資格。輿論指爲私交。更相仿效。滋弊多端。除河工軍前効力外。請概停奏帶。以杜偏袒鑽營之習。若調任後。本省本標實不得人。而舊屬內果有出衆之員。許據實奏保。送部引見。疏下部議。如所請。三年五月。管理武英殿事務。六年六月。特命補刑部侍郎。九月。以母憂服闋來京。擢左都御史。十月。疏禁督撫提鎮各標中軍積弊四事。一中軍例以副將參將游擊充之。承辦公務。支發錢糧。爲各營領袖。原非爲上司服役。乃督撫提鎮出畧。輒步隨。至躬爲料理車馬旗幟。甚爲失體。一中軍朝夕相見。往往代籌米鹽瑣務。不但體統有虧。恐開鑽營之路。一道府州縣等官。以督撫署內之事。中軍無不周知。至省輒先往候。而又與文員兩無統屬。遂宴會往來。藉端營私。一督撫提鎮衙門。遇歲時令節。張燈結彩。中軍每以兵丁子弟。充優伶雜戲。平時則醫卜星相。葦師琴客。藉其梯引。均應嚴禁。部議從之。十二月。疏言。大學士張廷玉。歷事三朝。遭逢極盛。然而晚節當慎。實備恆多。臣竊聞輿論。動示桐城張姚兩姓。占卻半部搢紳。今張氏登仕版者。有張廷璐等十九人。姚氏與張氏世姻。仕宦者有姚孔鋞等十人。雖二姓本係桐城巨族。得官之由。或科目薦舉。襲蔭議敘。日增月益。以至於今。未便遽議裁汰。惟稍抑其陞遷之路。使之戒滿引嫌。即所以保全而造就之也。請自今三年內。除特旨陞用外。概停陞轉。又言。尙書公訥親年未強仕。統理吏戶兩部。入典宿衛。參贊中樞。兼以出納王言。趨承禁近。時蒙召對。需用方隆。我皇上用人行政。無非出於至公。訥親之居心行事。當亦極圖報稱。但臣慮訥親以一人之身。承辦事務太多。或有疏失。又任事過銳。恐逢迎者漸衆。兩疏入。諭曰。朕思張廷玉訥親。若果聲勢赫奕。擅作威福。劉統勳必不敢如此陳奏。今既有此奏。則二臣並無聲勢。可以箝制僚案。可知此國家之祥瑞也。朕心轉以爲喜。且大臣辦公。責任甚重。原不能免人之指摘。即伊等辦事。亦豈能竟無差錯。聞過而喜。古人所尙。大臣爲衆所觀瞻。見人直陳己過。惟當深加警惕。所謂有則改之。無則加勉。若有幾微芥蒂於胸臆間。則非大臣之度矣。大學士張廷玉。親族人衆。因而登仕籍者亦多。此國家運使然。然其親族子弟等。或有矜肆

之念。爲上司者或有瞻顧之情。則非大學士所及料也。今一經查議。人人皆知謹飭。轉於張廷玉有益。至訥親身爲尙書。若於本部之事。稍涉推諉。不肯擔當。則模稜成習。公事何由辦理。但所辦之事。其中未協之處。亦所不免。况朕時加教誨。戒其自備自足。年來已知恪遵朕訓矣。今見此奏。益當留心自勉。至於職掌太多。如有可減之處。候朕酌量降旨。近來參劾大臣者。每多過當。殊不知以今日之勢論之。若有擅權營私者。朕必洞照隱微。斷無不能覺察而陷於不知之理。彈劾大臣。有關國體。此等奏摺。若不發出。皆小無知者。必且以參大臣爲倖進之階。其爲害於人心風俗。實非淺鮮。著將二摺發出。諭衆知之。尋命往勘海塘。十一年正月。充經筵講官。三月。署漕運總督。九月。遷京。十二年。充順天鄉試正考官。十三年三月。命會同大學士高斌查辦山東賑務。五月。查勘河道。奏濟南府屬德州哨馬營有滾水壩。分消運河盛漲。而壩身過高。宜改令低資減洩。東昌府屬聊城縣運河東岸有減水閘引河四。歷久多淤。宜挑濬通暢。令注入海。泰安府屬東平縣之戴村壩。爲汶水分入大清河關鍵。其遏汶入運之石壩過高。宜稍令低。並將壩西歸入大清河之水道疏通。沂州府沂河西岸之江楓口。所建滾水壩二。候秋汛無虞。再加培以衛蘭山郟城一帶田廬。報聞。十四年十月。充國史館總裁。十二月。遷工部尙書。十五年七月。兼管翰林院掌院學士。八月。遷刑部尙書。十六年。充會試正考官。十七年三月。以查驗通倉短少米石不實。詔革職。從寬留任。十一月。軍機處行走。十八年四月。以察擬懦怯債事之把總謝又榮罪名錯誤。部議革任。詔免之。七月。命偕署尙書策楞往勘江南河工。八月。合疏言。臣等巡歷河干。通查工料。實多虧缺不清。察其積弊之由。總在牽前扯後。工員率取入己。上司漫無查考。以一廳論之。每年冬。河臣核減錢糧。並不勒追補項。卽令留爲辦料之用。次年核減。仍復如是。惟指工段消彌了局。此本廳本任牽前扯後之弊也。其調任陞任。仍屬河員者。所欠錢糧。並不實交。復帶至新任。稟請別廳交料。其收料之員。輒報收料若干。用在某工。便可完結。此廳員虛報牽前扯後之弊也。又廳員陞任他處。如平越府知府施廷熾。離任已久。所欠核減帑項數千。尙待補直。此陞任官員牽前扯後之弊也。至緣事離任之員。河臣查明欠項。僅咨追而不參奏。致歷年虧欠至九萬兩之多。此緣事離任官員。牽前

扯後之弊也。現在查出外河同知陳克濬虧空二萬五千二百餘兩。海防同知王德宣虧空一萬八百餘兩。本年高郵州二閘因湖河異漲被衝。聞未衝之前。文武員弁咸謂有料尚可堵塞。而該管下河通判周冕。並無物料。致束手任其衝決。河臣高斌祇以誤事掣回。委員另辦。請澈底清查。詔革高斌及協辦河務安慶巡撫張師載職。留工効力。其優裕各員革職。勒限一年完繳。周冕革職鎖押。二閘漫口。虧空物料。勒限半年完項。時江南秋兩過多。河湖異漲。銅山決口。奪溜南趨。劉統勳規畫堵禦。黃流復歸。改道。二閘漫口。亦同日告成。上嘉其績。與策楞舒赫德等一併議敘。又借策楞條奏稽查工料四事。一各廳庫貯少者至數千。多者至數萬。舊料塵積。復領新料。本年未銷。又領次年。廳員請領款項。不由道詳。河臣約計歷年之數給發。有無核減。俱不詳查。致挪新掩舊。陋弊相沿。請嗣後預辦上游鹽河等項銀兩。由該管道員承領。霜降後分發各廳收工備用。仍報河臣委驗。其在銷算以後之款。仍令廳員照舊承領。責成該管道會同河庫道查明。有無舊欠。具結轉詳。方准給發。統限冬底運柴到工。其雜料限領銀一月到工。並照州縣倉庫例盤查。一河工有歲修搶修之分。而每年核算則在霜降後。塌壩工程。已歷三汛。廳員任意浮開。無憑查驗。請於秋防告竣後。將該廳管所管工程分三等。以暹臨大溜當衝最急者為一等。次險者為二等。又次者為三等。或拆修。或鑲修。或加幫確估。申詳該道核轉。河臣督該道沿隄踏勘。限正月內興工。三月內完竣。該管道親往各工驗收。不得轉委。至伏秋大汛。臨期搶護。難以預定。令該管道駐劄河干。親估親收。詳河臣親驗。一一切物料工程。向係廳員按月申報。往往以少報多。指無作有。甚至甫請驗料。即稱某工動用。甫經驗工。即報墊陷加鑲。弊端不一。查廳管同駐一工。最為親切。運到何項物料。承修何處工程。無不深知確見。請嗣後除廳員照常申報外。并令該管守備汛弁。逐一據實摺報。該管道府。按所報數目。比較抽驗。一河員查工。俱於霜降時照水大小約計准銷。並不按工考驗。致調任離任。輾轉遷延。請於銷算時。經河臣核減者。勒限交完。年清年款。陞調緣事離任。必交代清楚。方准新任出結。徇隱題參。賠補。詔如所議行。先是。大學士陳世倌奏黃河入海。向祇六套六櫃。今增至十。致海口壅塞。十九年正月。命統勳等往勘。奏言河海交會之所。河

水遇潮停阻頗積淤沙而南大口門出水深通無庸疏濬至櫃套均在七曲港之上櫃一里十櫃僅十里套則七八里或十里不等十套計八十餘里不但十櫃去海口甚遠河流通塞與增櫃無涉即十套下河身數十里分流入海並無阻遏報聞尋命清查江南河工未結案統勦奏言水利工程陸續題銷或丈尺數目不符或水方土方各異屢經部駁不准銷算一案不銷遂致全案稽遲而外省輟轉行查至延二十餘年之久官更吏易若再往返駁詰徒滋案牘現查出未銷銀百十三萬三千五百兩有奇請限十月內確核題銷工部於覆到日詳核應銷者即准銷結案應減者即核減著追詔如所請行二月疏言河臣顧琮奏請於祥符盧家莊支河壩榮澤陽武隄內加築土壩並估挑引河奉旨命臣等詳度臣自陳留沿隄而西查支河南由古城村北由盧家莊分流東注宜建土壩堵旁流俾由古城村前歸入正河臣復自陽武十三堡及五堡迤南之三壩迤西之原武榮澤等處詳勘形勢其地土鬆沙厚隄內灘地易成支河兼正河漲溢即成漫口河流自西而東均趨隄根宜幫築三壩埽工及陽鳳大隄並建攔河土壩以資防護至引河一節臣思上乏來源中經沙地難免淤墊應俾估挑從之四月晉太子太傅五月命協辦陝甘總督事務賜孔雀翎十一月疏言陝甘沿邊一帶至巴里坤軍營雍正七年專設塘站馳遞軍機文報乾隆元年撤兵時議裁今議明歲進兵請酌照舊例增設查陝省自神木縣至定邊營九百五十五里設正站九馬各三十腰站二十馬各十七甘肅自花馬池營至嘉峪關二千二百七十里設正站七馬各二十五腰站六十二馬各十六協站七馬各十其口外自嘉峪關至巴里坤千六百五十六里設站二十七馬各二十六十二月疏言西路軍營戰馬約需六萬匹派兵遞送廷議分設五大站臣於分站之中寓脫卸遞更之法第一站安馬十分每分千五百匹二三四五等站各千五百匹每起官兵按站換馬不必回空即留爲後起更換之用官兵既可按程長驅而各站馬行五日即得休息三日仍另備數十匹或百匹以濟疲乏再各標營馬已儘數調撥備戰未便全無守禦今有現議設站之北口解來馬二萬三千七百餘匹及西安駐防兵并固原標標兵騎赴肅州馬八千八百餘匹臣擬於此內以七分留甘三分還陝並阿拉善等換存馬分補缺額詔如所議緩行

二十年二月疏言。巴里坤營屢久廢。倉庫無存。糧餉若儘數運往。必修葺堆貯之所。而大兵進剿後。又宜分兵防守。事多未便。請將進剿口糧。應官運者。自哈密馱載。應裹帶者。運往巴里坤散給。從之。六月。以平定準噶爾。議敘加三級。七月。充平定準噶爾方略副總裁。尋命查勘巴里坤哈密駐兵事宜。九月。逆酋阿睦爾撒納叛。援伊犁。定西將軍永常自木壘退師巴里坤。統勦請棄巴里坤。退守哈密。上諭以永常詭怯於前。劉統勦附和於後。實出情理之外。軍營所恃。全在領兵大臣。今一將軍一總督。無端自相恐怖。衆心其何所恃耶。永常已降旨革職。奉解來京。劉統勦著革職。奉解來京治罪。永常劉統勦在京諸子。並鞏交刑部。所有本籍及任所貲財。並著查出。爲償補軍需馬匹之用。旋從寬免劉統勦罪。發往軍營。在司員內辦理軍需。效力贖罪。二十一年六月。諭以刑部尙書員缺著劉統勦補授。七月。給還本籍家產。閏九月。命勘江南銅山縣孫家集漫工。十月疏言。孫家集向無隄工。以備盛漲。例於秋汛後補築水衝溝渠。今兩年未經補築。致成渠分溜。詔解總河雷勒赫任。以劉統勦暫署。十一月。漫口合龍。上嘉其妥速。下部議敘。二十二年三月。充會試正考官。四月。赴徐州督修近城石壩。五月。充經筵講官。是時雲南巡撫郭一裕。懇恩總督恆文。購金製鐘。以致闔省喧傳。乃許恆文抑勒短價各款。命統勦往會鞠。得實。恆文賜自盡。一裕發往軍臺效力贖罪。十二月。晉太子太保。二十三年正月。遷吏部尙書。先是。徐州黃河北岸無隄。議者以爲留洩漫水。五月。巡漕給事中海斌。疏請補築。統勦往勘。以爲可行。自大孤山至蘇家山。置亂石壩洩漲。且可衛田。上嘉允之。二十四年正月。協辦大學士事務。二月。西安將軍崧阿里。疏參原任將軍都賽剌克兵餉。統勦往鞠得實。擬斬如律。六月。山西歸化城理事同知普喜。許將軍保德。同知呼世圖。侵帑通同掩飾。統勦奉旨與巡撫塔永寧會鞠。保德呼世圖共侵帑一萬八千餘兩。保德又於穆納山私伐木植。受銀千五百兩。上以保德身爲將軍。貪贖敗檢。即行正法。二十六年二月。充會試正考官。五月。授東閣大學士。兼管禮部事務。尋兼兵部事務。八月。偕協辦大學士公兆惠。查勘河南楊橋漫工。合疏言。臣等赴工相度。先將月隄堵築。候大溜斷。再接築大隄。以資鞏固。仍於楊橋原淤河身內。開挑引河。統勦又言。現開引河九百三十六丈。引溜歸入正河。並將正河身內。

濬渠疏引。十一月。奏報合龍。上嘉統勳等董率有方。剋期竣事。下部議敘。二十七年三月。上南巡。以高寶河湖入江之路未暢。命統勳偕兆惠往勘。尋合疏言。湖河之水。以五壩爲來源。江海爲去路。歸江多一分之水。卽下河受一分之利。自邵伯以下。向設灣頭閘。壁虎橋。鳳凰橋。西灣壩。東灣壩。金灣壩。滾壩。金灣六閘共七處。宣洩湖水。由鹽河歸廖家溝。石牟溝。董家溝。芒稻河。四河分流。下注金灣壩。引流緊接。六閘地居上游。由董家溝下注。宣洩湖河。甚爲便捷。惟滾壩僅寬十五丈。未能暢達。請將新挑引河。量爲展寬。使有建瓴之勢。六閘鹽河。向設南中北各二閘。北閘爲鹽運要津。應自中間迤南。改建石壩三十丈。將中間存留。閘下土隄。接築加長。并挑引渠。以順水勢。既與鹽運無礙。而盛漲亦資暢達。其西灣滾壩。照東灣一體落低。並於西灣河頭。酌濬寬深。諸河歸江之路益增。宣洩之形益暢。諭曰。所議甚合朕意。應如是行。四月。以直隸興州被水。命查勘德州運河。統勳疏言。運河自臨清以上。疏洩開壩共八處。而臨清迤北。惟藉四女寺哨馬營兩壩宣洩。必宜疏通。以防盛漲。漫及下游。但兩壩支河。俱會老黃河故道。入海表延三百餘里。居民於淤灘種植。河身易致淤塞。請將德州州判。移駐兩支河交匯之邊陵鎮。專司河捕。實成山東糧道。董理其地。在直隸者。移會天津道商辦。詔如所請。二十八年。兼管翰林院掌院學士。命爲尙書房總師傅。三十年正月。兼管刑部事務。二月。教習庶吉士。七月。充國史館正總裁。三十三年十月。命往江南。酌定清口疏濬事宜。十二月。時統勳年七十。御書贊元介景額賜之。三十四年。復勘挑運河。三十五年。兼管吏部事務。三十六年三月。充會試正考官。三十八年閏三月。充四庫全書正總裁。十一月卒。晉贈太傅。入祀賢良祠。諡文正。有劉文正集。子壻。

嵇會筠

嵇會筠。字松友。號禮齋。江南長洲人。父永仁。以生員隨福建總督范承謨幕。康熙十三年。耿精忠叛。誘執承謨。脅永仁降。不屈。亦被執。十五年。與承謨同遇害。四十七年。承謨子時崇。任廣東巡撫。以永仁隨承謨殉難。疏請贈卹。

並從祀承讓祠。部議生員無贈銜例。特敕追贈國子監助教。准其從祀。雍正二年。入祀昭忠祠。會筠母楊氏。守節八年。賜忠節流芳額。乾隆二年。賜人倫坊表額。並建坊。會筠康熙四十五年進士。改庶吉士。散館。授編修。五十年。充日講起居注官。提督山西學政。六十年。遷左中允。尋遷侍講。雍正元年正月。命入直南書房。復命兼尙書房行走。二月。擢都察院左僉都御史。督河南巡撫。三月。充河南鄉試正考官。六月。遷兵部左侍郎。是月。河決河南中牟縣。詔會筠往督築。七月。奏劉家莊漫口合龍。十一月。奏十里店漫口合龍。俱下所司知之。向例。江南河廳各員。每歲冬領帑購料備用。會筠疏請豫省黃河兩岸工料。亦照此例。於每歲冬。預撥司庫銀。發沿河州縣買貯。備用不敷。近河百里內外。亦發銀購買。量給運費。庶險工應手。不致遲誤。下部議行。二年五月疏言。於黃交會之銚期營寨家廠一帶。皆頂衝。請於倉頭口對面橫灘開引河一道。俾水勢順流。由西北逕達東南。勿令激射。東南再釘船幫大壩。宜鑲建雁翅幫護。更於大壩上下。酌建挑水壩二三座。頂衝勢可減。壩工穩固。詔允所請。又言兩岸隄工久未加幫。在在危險。北隄起榮澤縣。乾山東曹縣界。南隄亦起榮澤縣。乾江南楊山縣界。臣同總河齊蘇勒勤明最險應修處。共長十二萬三千七百九十六丈。請動帑興工。部議從之。四月。特授河南副總河。駐武陟縣。專管河南河務。會筠奏河工調遣不敷。請設標下河兵。王大臣議駁。得旨若無標下河兵。難供驅策。著再議。尋議就近撥河南撫標及河營兵弁。隨工調用。七月疏言。鄭州大隄石家橋迤東一帶。大溜南趨。應於迎溜處下埽簷樁。復於埽灣處建磯嘴壩一。中牟縣拉牌寨黃流逼射。應下護岸埽。加工鑲墊。建磯嘴挑水壩二。其穆家樓隄工坐當頂處。亦應下埽加鑲。又陽武縣黃河北岸。祥符縣珠水牛趙二處隄工。近因南岸中牟迤下。新長淤灘。大溜北趨。成頂衝勢。應下樓岸順埽。下加鑲墊。以資鞏固。部議均如所請。十月疏言。小丹河自辛句口至河內縣清化鎮水口。二千餘里。輝縣五閘。安陽縣之萬金渠及恆河閘。昔人建閘開渠。引水灌田。照官三民一之法。通漕便民。但日久弊生。守口之夫。違禁賣水。致運河淺澀。請嚴飭管河各員稽查。三日放水濟漕。一日塞口灌田。如賣水阻運。嚴治其罪。下部議行。三年三月疏言。祥符縣南岸回回寨對面。淤灘直出河心。致河勢南趨。回回寨以下迤南等處。

係單隄。且逼省城。關係甚重。應由北岸舊回回寨。至官路李家店一帶舊河身。濬引河一道。引溜直行。俾成東西之勢。隄工可得保固。諭與齊蘇勒酌量相度而行。五月。同齊蘇勒奏勘地形。西高東下。引河可開。並於南岸建挑水壩一。逼流入引河。上報可。四年二月。疏言。衛河水勢奔騰。河底浮沙。隨濬隨淤。請於汲縣湯陰內黃等處。築草壩二十六。直隸大名縣張兒莊。亦建草壩一。首尾接應。以濟漕運。四月。又言。鄭州薛家寨等處。隄卑溜衝。請增修埽壩等工。均如所請行。五年正月。命兼管山東黃河隄工。二月。條奏河工六事。下部議行。五月。遷吏部右侍郎。仍留副總河任。是月。奏蘭陽縣管梁蔡耿四水口一帶隄工。河勢衝嘴。請將梁蔡耿三水口下埽加鑊。並於四水口隄南各築月隄作重障。又祥符南岸李盤寨程家寨等處。應增築月隄。陳留縣七八九堡大隄汛水。直射隄根。隄北舊有隔隄。應一例增培。部議從之。十二月。轉吏部左侍郎。六年二月。疏言。儀封北岸水勢衝急。雷家寺上首灘崖刷成支河。請將舊隄加幫高厚。接築土壩一道。跨斷支河。勿使擊溜侵隄。再青龍岡一帶。水勢繁紆。將上灣洶作深兜。與下灣相對。請乘勢開引河一道。導水東行。則大河之水自暢。詔允所請。尋擢兵部尙書。四月。轉吏部尙書。仍管副總河事。九月。奏蘭陽縣耿家寨北岸隄工。因積水深潭。黃流洶湧。請下埽簽椿。加幫築壩。並將月隄增高加厚。從之。七年三月。授河南山東河道總督。兼管運河。八年五月。命署江南河道總督。疏言。豫省黃河北岸荆隆口。大溜頂衝。應開引河一道。自黑岡口至柳園陟崖河尾工。長三千三百五十丈。請動帑興修。允之。六月。抵南河總督任。十二月。疏言。高堰山盱石工最要。奉旨發帑興修。爲久遠計。臣莅任後。嚴催集料興工。題估。幫築戲隄。今查石工內有椿腐石缺。順砌卑矮者。應築越壩。拆修加高。一律堅實。其年久傾圮者。應全拆修砌穩固。始垂久遠。至興石工築壩攔水。湖面水勢浩大。一線孤壩難保。惟有借舊石工連土留寬二丈。暫爲外障。俟新土築定根基。再拆舊石選用。其舊底應留二層。以禦風浪。其清水潭未建石工。應一律戩建。九年四月。疏言。禹王臺壩工。爲江南下游保障。查泚水源長性猛。請於現在竹絡石壩二十七丈外。依其頂衝形勢。統建石工六百餘丈。其接連岡阜。仍築土隄。泚河口門大爲挑濬。順其入海之路。務須壩堅隄厚。堵截泚水。循故道直趨入海。俱如所請。十年

五月。以揚州府屬芒稻河開墾工程。向例商人捐款修築。夤緣率。奏請歸近河各印官轄。並增設關官一。司啓閉。從之。十二月。加太子太保。十一年四月。授文華殿大學士。兼吏部尚書。仍總督江南河道。十二月丁母憂。會筠懇回籍終制。得旨據奏情辭懇切。具見悃忱。准其回籍終制。總河印務。仍著高斌署理。再。高斌會筠本籍常州。距淮安不遠。明歲工程。亦可就近往來協同經理。在伊終制之心。既已得遂。而河防事宜。亦大有裨益矣。十二年四月。同高斌奏增築海口辛家蕩月隄及開座。九月。同副總河白鍾山奏修濬江龍王閘。先濬通鳳陽廠引河利漕運。俱從之。乾隆元年正月。兼任浙江巡撫。三月諭曰。大學士嵇曾筠。現爲浙江巡撫。著照李衛之例。改爲浙江鹽政。六月。條奏鹽政四事。一。商人自僱商捕。皆壯健有力。熟悉梟販蹤跡。每月工食。幾及守兵兩分名糧。一旦革除。數千人失業。勢將轉成梟販。請改爲官役。地方官造入卯簿。不時約束。一。水路私梟積販所在。賴兵役駕舟巡緝。緊要隘口。有司會同營汛確察。責商修理巡船。編號造冊存案。巨商領運官鹽。每有飛渡。灌包夾帶之弊。鹽引相離。卽屬行私。巡船兵役。一體查拏。交地方官訊究。一。兵役宜分別賞罰。拏獲私鹽。鹽船入官。私鹽變價。卽於所變項內。酌量給賞。倘圖賞混。拏誣指。並受財賣放。自行夾帶私販者。按律治罪。一。緝私須實成文武官弁。互相稽查。遇有奸徒搶鹽。及圍鬧場鹽之事。卽即擒拏。獲犯過半。並獲首犯者。免其處分。否則照盜案例參處。限年緝拏。地方官弁。一年內無參案者。准紀錄一次。三年准加一級。大計無鹽案參罰。方准卓薦。若隱匿不報。照盜案例革職。或將大駭之案。巧爲開脫者。照失出例處分。下部議行。十月疏言。江海形勢。南埧則北漲。巨派委員於南岸堆沙。乘冬令北風。易爲衝刷。今東西兩塘根俱漲。有護沙。應建魚鱗石塘。卽在舊塘基開槽築壩。如式甃砌。後面全憑土戩寬厚。一律高堅。以成一勞永逸之鉅工。海寧迤西翁家埠一帶。柴草工程。加鑲高厚。尤爲萬全無弊。詔允所請。十月。來京陛見。加太子太傅。二年八月。嚴州府屬之淳安縣。淳河發源於徽州之徽山。建瓴而下。急湍奔流。直趨北岸。侵民田廬。請築石壩八十五丈護之。三年四月。又言。樂清縣地處海濱。田廬賴頭隄禦潮。今埧缺。請急修築。八月。又請撥省城義倉穀運温台等府屬平糶。俱從之。十二月卒。加贈少保。諡文敏。四年四月。入祀浙省賢良祠。十

一月。又諭曰。前任河臣靳輔齊蘇勒。俱建有祠宇。永享禋祀。嵇曾筠勞績可媿。美二人。著照靳輔齊蘇勒之例。一體祠祀。

陳鳳翔

陳鳳翔。字竹香。江西崇仁人。由監生充國史館謄錄。議敘縣丞。乾隆五十年。揀發直隸河工差委。五十二年。補直隸新城縣縣丞。五十四年。升玉田縣知縣。六月丁母憂。五十六年。以前在玉田縣任。失察流犯田自桐逃逸。鑄職。五十八年。總督梁肯堂奏。令自備資斧。赴豐潤營田效力。五十九年。永定河漫口。奏委挑挖引河工竣。送部引見。奉旨著發往直隸。以永定河沿河知縣用。嘉慶元年四月。奏補寶坻縣知縣。十二月。調天津縣知縣。五年。捐升知府。閏四月。經總督胡季堂奏留本省差委。上允之。六年二月。補永平府知府。六月。擢永定河道。時大雨連朝。盧溝橋一帶決口四處。諭令鳳翔即赴工次。隨同侍郎那彥寶辦理堵築事宜。九月二十三號。壩工合龍。賞戴花翎。十月。北上頭工合龍。全河復歸故道。交部議敘。九月。請假省親。上允之。八年三月。回京供職。十月丁父憂。諭曰。陳鳳翔每於差次召對。奏及伊父年老多病。實因身受重恩。見司河防之責。不敢遽請終養。察其情詞。甚屬真切。恐陳鳳翔已聞訃丁憂。殊為可憫。著於直隸藩庫內賞給銀二百兩。卽令回籍作爲料理喪事之費。十一年六月。兩江總督鐵保等奏請發往江南河工委用。得旨允行。七月。因永定河隄工需員經理。上以鳳翔辦理永定河漫工本係熟手。仍授永定河道。十月。直隸總督袁行簡卒。後署總督秦承恩未經接篆。鳳翔奏永定河北岸五工漫口。工程已經合龍。並以前任道員朱應榮等在工出力。奏請照例開復。其餘出力各員。奏懇恩施。上以鳳翔越分奏請。停其議敘。十三年三月。督辦康家溝抄河堵築合龍。上以辦理妥速。恩加一級。七月。永定河秋汛安瀾。上以鳳翔防守得宜。賞加按察使銜。十四年七月。擢河東河道總督。九月。奏黃河南北兩岸險工林立。前任河臣吳敬奏請於歲料外酌辦備防。稽麻。以資搶險。臣查水勢遷變靡常。工段亦平險時異。與其普添十二廳備防之料。以待險

工之來。莫若暫儲十二廳辦料之需。以濟險工之用。且防料之設。原以濟歲料之不敷。豈有十二廳均爲不足而均險工之理。卽有險工。儘可先用歲料。俟用贖無多。再爲採買。雖價值稍昂。較之各工分貯不急之需。究屬稍省。臣察看情形。祇須於豫省藩庫撥銀八萬兩。以五萬兩貯開歸庫。俟桃汛後。計用過歲料若干。酌量添備。或無需絲毫。不准動用。奏入。命如所請行。十月。奏徵江湖水勢短缺。來歲重運經行。不敷接濟。請導引江境蘇家山關黃水以濟運行。諭曰。所議啓放蘇家山關。仍係以黃濟運。究非善策。萬一湖底漸有淤墊。是目前之獲益無多。而將來之流弊滋甚。自宜加倍詳慎。著吳璣徐端會同陳鳳翔前往履勘。尋偕江南河道總督吳璣副總河徐端。奏如前議。旨下著吳璣徐端會同陳鳳翔再行悉心詳議。十一月。奏會勘蘇家山關。引黃入湖濟運情形。並摺節減估挑渠築壩銀兩。委速興辦。十二月。因河標游擊李永清請補河標參將。經兵部以該員原籍在五百里以內。議駁。鳳翔仍行奏請補用。上責其非是。申飭之。十五年五月。奏汶河水勢微弱。請酌放蜀山湖關。以濟漕運。六月。以上河運通判馮召棠啓閉失宜。致鎮江前後兩幫糧船行走遲延。奏參。十二月。調江南河道總督。十六年正月。奏查明河湖水勢高低尺寸。並備辦挑運各情形。上諭均著照所請辦理。又奏。自河口至寶應一帶應辦工程。分別緩急。備辦情形。一添禦黃壩外鉗口壩。一挑禦黃壩內及運口以下河身停淤。一修運口頭二三草壩壩門。一挑寶應至界首河身淤墊。一加幫運河兩岸埽段。一加培寶應城外及淮關土隄。一補砌臨湖甃石各工。一挑邳宿運河。一堵閉竹絡壩。挑壩頭下引河。仍盤裏裏壩頭以備啓放減淺。以上皆刻不可緩之工。見已派員分投辦理。至裏河廳之徑河開揚河廳之黃浦開。兩廳境內涵洞高堰大隄後之二隄。皆應次第興辦。奏入。允照所請行。又諭曰。至其餘所奏次第應辦之工內。加培高堰二隄一事。前經吳璣條奏。發交廷臣集議。未經准行。今著陳鳳翔再悉心體訪。是否應仍辦碎石坦坡抑二隄。籌辦土方尙可不致棘手。通盤籌畫。奏聞定議。二月。覆奏體訪培築高堰二隄情形。碎石坦坡之制。工費過繁。曠日持久。且上年試作坦坡處所大隄。仍不免塌卸。至加培二隄。工簡效速。今擬於一律加培之外。再接再千有餘丈。得旨著卽照所奏辦理。三月。奏海口一帶自大淤尖起三十餘里內。

深僅三四尺至六七尺不等。形勢紆迴。該處係在攔潮壩以外。上年未能挑空。此時水淺溜水太小。不無窒礙。見擬將鐵篋鐵掃帚混江龍。疏淤各器具。雇船前往疏濬。奏入。得旨是亦辦理之一法。但是否即能疏濬深通。暢毫無阻之處。亦著據實奏聞。閏三月。因糧艘連日行走順利。上嘉其辦理妥速。賞四喜玉扳指等物。尋奏催修洪湖石工。並補砌腰洞海漫。及補築掣刷土隄事宜。上諭照所請辦理。五月。重運糧船全數渡黃。上以鳳翔專司河務。導導有方。恩加二級。旋偕兩江總督勒保。奏禦黃鉗口兩壩。已經堵合情形。摺尾稱海口北岸並無人煙之地。見在隄裏外面面皆水。低窪之處水高於隄。所有該處工程。應俟秋間黃水消落時相機辦理。奏入。六月。奏海口漲水不消。王營城壩土隄因大雨如注。河水增長。陡然坐墊。口門塌開八十餘丈。上命革去翎頂。交部嚴加議處。部議革職。上加恩改爲革職留任。尋偕勒保覆奏。王營城壩旁注。實由偏緊水無他路可行。致有漫溢之患。將來秋深水落。只須修築王營城壩。其海口之新隄。請但保護南岸。以爲民居田廬之衛。其北岸毋庸修築。以免偏水之虞。摺內援引乾隆四十五年高宗純皇帝諭旨。雲梯關外不必與水爭地等語。上諭此事著交百齡會同陳鳳翔親赴海口及北湖河處所。詳細履勘明確。應如何辦理之處。另行繪圖貼說。據實奏聞。七月。兩江總督百齡奏。王營城壩見在漫口水勢情形。查河臣陳鳳翔謂上潰由於下壅。海口不能通暢。係據淮海道黎世序所言。而詢之黎世序稟述情形。又似下壅處在倪家灘新隄上下。並非海口高仰之故。尋以徐屬邵蕭廳境縣揚山李家樓兩處因大風異漲。河水漫隄塌毀。請將專管各員交部議處。並自請嚴加議處。百齡奏查勘海口上年未經挑挖處所。尚係深通。惟中間復挑之處。轉已涸成平陸。詢之河兵土人等。僉稱去歲挑河所挑之土。即在河灘堆積。今春黃水漫灘衝刷。土山坍塌。仍淤河內。又挑工盡處之攔潮壩一道。放水時壩根起除未淨。以致阻梗水中黃水泥沙。俱爲填塞攔阻。停淤特甚。本年凌汛後淮海海道黎世序。即屢次稟明。陳鳳翔批令俟秋後再行籌辦。上以河流不暢。上游漫口。實係該河督因循貽誤。陳鳳翔著交部嚴加議處。尋經部議革任。上加恩改爲革職留任。八月。奏縣拐山漫口堵築合龍。見在馳赴蕭南查勘情形。諭曰。此時李家樓缺口已塌寬至五十餘丈。水勢甚盛。急切

亦難以收功。陳鳳翔到彼勘明情形，卽回至清江浦，協同百齡先將挑濬王營減壩以下河道，並堵築減壩口各事宜。委速籌辦。九月諭曰：百齡甫任兩江，此次河工貽誤，於該督無涉，皆由陳鳳翔玩視河防，及各工員平日辦事草率，以致漫口疊開。本應將伊等斥革，從重治罪。但伊等轉得脫身事外，置要工於不問，所有王營減壩以下挑工堵築事宜，及李家樓以下挑工，著陳鳳翔徐端二人分任其事。尋偕百齡奏減壩以下至海口淤墊河身，見在興工挑空，並籌議分消清水刷河，上命將王營減壩以下與李家樓以下挑工同時並舉，並發給長蘆備辦直隸水利銀五十萬兩，粵東關撥銀五十萬兩，解工備用。尋偕百齡奏請撥銀一百五十萬兩，如所請行。十二月，偕百齡奏長河放水暢行，減壩合龍，穩固下游諸工，一律完竣。又百齡奏查明玩誤河防文武員弁，請分別懲辦。上以陳鳳翔前赴工次，未能訪悉前情具奏，著交部議處。部議革任，奉旨改爲革職留任。十七年三月，偕百齡奏李家樓大工合龍，長河放水暢行，上諭著加恩賞給三品頂帶，仍交部議敘。部議加一級，上加恩改爲加一級紀錄二次。五月，南糧全數渡黃，上以陳鳳翔辦理築壩濟運等事，先期無誤，著交部議敘。八月，百齡奏參鳳翔自李家樓回浦後，安坐衙齋數月，於禮壩要工自四月開放後，並未親往查勘，迨至六月，水已衝動壩下土石樁木，道廳節次稟報，始經察看，行至高堰，仍不親身籌辦，僅委游擊陳岱堵築，鳳翔復藉查陳家浦埽工，遠赴海口。至八月初二日始行赴壩，並查河庫所發禮壩工銀至二十七萬七千餘兩之多，仍未竣工。清水大洩，下河州縣被水成災。上諭陳鳳翔著革職，留於河工。交百齡等差委，令當勞苦差使，時淮安揚州海州等屬田地受淹，邵伯一帶各村莊被水尤重。百齡又奏禮壩急難堵合，清水宣洩過多，見辦減黃助清，並奏鳳翔急於開壩，遲於堵築，以致辦理棘手，請旨嚴加議處，並自請處分。上以此皆由陳鳳翔辦理不善所致，殊堪痛恨，著百齡將陳鳳翔在禮壩工次，枷號兩箇月示衆。如禮壩刻期堵合，再移往他工，限滿疎枷，發往烏魯木齊效力贖罪。十月，鳳翔遣家人赴都察院呈訴被參緣由，上命協辦大學士吏部尙書松筠戶部侍郎彭齡馳往江南查辦。十一月，松筠初彭齡奏查訊情形，前升任淮揚道黎世序稟開督禮兩壩，鳳翔與百齡俱經批准，又鉗口壩不應早開，鳳翔曾經批駁有

據。又鳳翔查出葦蕩營柴束斤重短少之弊。係百齡委用江甯鹽巡道朱爾廣額捏稱。節省糜混。並恐有冒銷工本等弊。請將朱爾廣額革職。鞫問嚴訊。得旨以啓發智禮兩壩緣由。黎世序稟請開壩。百齡既有批示。著黎世序呈出百齡所批是何詞語。著松筠等查明稟公覈辦。本年智禮兩壩。彼時是否應開。開放後。陳鳳翔堵閉遲緩。又於獲罪辨訴。其咎固屬難道。若百齡前曾批准。迨奏參時並不聲敘。全行委過於人。含混入奏。亦著據實奏參。尋松筠初彭齡奏審明黎世序請開智禮兩壩。百齡所批有預籌減洩。甚合機宜之語。百齡於初參摺內漏未聲敘。所參陳鳳翔自李家樓回浦後安坐衙齋數月一款。見經傳訊各河員。僉稱鳳翔自三月回浦。往來三關三壩。並禦黃壩等處。督催糧船渡黃。又親赴中河搶險。並到顧家河汰黃堆等處督工。日期與陳鳳翔所供無異。其朱爾廣額因運柴與鹽請放鉗口壩原稟。陳鳳翔當經批駁。嗣因准徐道王逢源又稟請開放。百齡始行批准。朱爾廣額辦理蕩柴。捏詞邀功。糜粟。百齡毫無覺察。且於原參陳鳳翔摺內未將會據准揚道稟請開放智禮兩壩批示情節聲敘。均有未合。應請將百齡交部嚴加議處。朱爾廣額發往伊犁效力贖罪。上諭著革去百齡太子太保銜。披雙眼花翎。准戴單眼花翎。降爲二品頂帶。陳鳳翔於獲罪後。遣人赴訴。若所控虛誣。自當加重治罪。今蕩柴弊混情形。伊本工竣奏參。因革職呈控全實。餘亦實非虛捏。陳鳳翔著即日疎枷。仍發烏魯木齊效力贖罪。朱爾廣額著在葦蕩營枷號三箇月。滿日發往伊犁。十二月。鳳翔在清河縣地方病故。經初彭齡奏聞。十八年二月諭曰。陳鳳翔前應罰賠山肝壩工銀十萬兩。除已繳五千兩外。尙有未完銀九萬五千兩。見在伊已身故。念其家貧子幼。除將繳出田房契紙飭交原籍地方官估變抵交外。其不敷之數。著百齡黎世序查明同案獲咎各員攤賠歸款。其應賠天津海稅。並剝船等項銀四萬四千餘兩。本係分內扣抵廉俸。見在亦未扣完。並著溫承惠查明。照例攤賠完繳。

劉台斗

劉台斗江蘇寶應人。重修寶應縣志父世蕃。兄台拱。台斗阮元學經室集劉君傳嘉慶四年進士。官工部營繕司主事。傳經學於其父兄。尤究心水利。凡治河得失。漕輸利弊。無不洞知其源流。阮元學經室集劉君傳十一年。治河之役興。大吏薦台斗知河事。朱士彦文定集劉君傳奏留南河協塞王家營減壩。重修寶應縣志時河決。入射陽湖。衆議有欲因其勢改建新河由射陽入海者。台斗作黃河南趨議千餘言駁之。上之總督。曰。今歲黃河漫溢。自陳家鋪地下。漫口數百丈。將有南趨之勢。蓋地勢北高南下。若順其就下之性。則舍舊圖新。似亦因勢利導之機也。然竊見新河有難成者五。有不可不慮者四。夫漫口數百丈耳。而口門以下。愈遠愈闊。至四五十里六七十里不等。河面太闊。無以束水。水寬則流緩。流緩則沙停。此難成者一也。現行溜勢奔騰。四注數十里之地。或東或西。十數日之間。或深或淺。河無一定之形。溜無一定之勢。此難成者二也。且漫口向南。而大溜先向西南轉趨東北。若因之成河。則是折一大灣。迎溜必生險工。對灣仍致淤阻。下壅上瀆。未見其暢流歸海。此難成者三也。且放新河。必須築一南隄。又須於清黃交界之處中間隔一橫隄。乃數十里中汪洋一片。人力既無可施。取土更無所出。此難成者四也。凡言湖者。皆儲水之區。非行水之道。若射陽湖有出水之口。則滔滔下注。久當涸出。五壩之水。不當停積中流矣。謂之爲湖。必如孟如釜。外仰內凹。故水滿則溢。水平則停。蓋盈科而溢出海灘。非暢流而直趨海口也。現在河流南注。勢似湍激者。以瀕湖一帶地勢較河身爲低。以河面較地勢又低。故此時似暢。究之。湖外之海灘仍反高仰。非如海口得建瓴之勢也。河將入海。必束之使高於海面。故能敵逆上之海潮。以衝突入海。若今射陽湖口。則河流趨湖。雖由高入低。而由湖赴海之路。反由低入高。以低就高。數年之後。必至淤阻。此難成者五也。更有不可不慮者。夫五壩減下之水。減入下河者也。往時五壩一開。雖無黃流之阻。尙且淹漫數縣之地。停蓄數月之久。必須開壩而後就涸。未有壩未閉而先行涸出者。若分射陽湖以爲黃水之道。則清水去路爲黃水所奪。減壩之水全積。下河不能容納。此可慮者一也。運河關洞之水。亦歸入下河者也。一爲黃流所阻。去路日高。水無所歸。以內地爲壑。此可慮者二也。淮南之鹽場。東南射賦之藪也。沿海場垣瀕於鹽阜。今若逼近黃流。淡水

內浸。產鹽必少。清水內壅。場垣必淹。此可慮者三也。至於黃河。本有南趨之勢。阜寧地勢高於鹽城。鹽城地勢高於興化。愈南則愈低。今若導之使南。再有漫溢。則就下之勢必入興鹽。一入興鹽。則不能入海。而南入於江。是河與江合。江淮河漢四瀆合流。是古今一大變遷也。杞人之憂。又不止淮揚二郡之生靈。東南一帶之財賦矣。於是南新河之議不果行。阮元擊經室集劉君傳旋奉檄勘下河水利。悉得要領。朱士彥文定集劉君傳又上書曰。山盱五壩減出之水歸入下河者。以高郵各壩爲口。以壩下引河爲喉。以興鹽各路湖蕩爲腹。以串場河各閘爲尾閭。以范隄外各港口爲歸墟。必須節節疏通。使水不中停。層層開鎖。使水不旁溢。方能引水歸海。而保護田廬。數年來各邑受淹之故。以壩下引河淺窄。而兩岸十餘里外即無隄形。是以減下之水。不能下注。先已旁流。此高郵受災之緣由也。壩水注之興鹽。停蓄湖蕩。湖蕩雖能受水。而不能消水。旁無隄阻。下無去路。盈科而進者。仍復泛溢四出。在湖蕩之上者。誤以湖蕩爲歸墟。在湖蕩之下者。止知曲防壑隣。幸游波之不及。而壅極必潰。雖少緩須與。亦復同歸於盡。此興鹽各邑被水之緣由也。場河淺。故上游之水不能驟洩。海口高。故場河之水不能驟出。加以壩面寬而閘面窄。來源多而去路少。猶以斗水注升。欲其暢流不得矣。此范隄內外被水之緣由也。誠使壩下之引河開掘寬深。堅築隄防。引歸湖蕩。則高郵之田可保矣。湖蕩之旁。圍築圍圩。約攔水勢。仍留去路。導入場河。總使水有下注之路。而無旁溢之門。則興鹽一帶之田可保矣。再於場河挑深酌添范隄閘座。並挑通閘外港口。則范隄內外之民甯可無虞矣。惟是場河以外形如釜邊。場河以內形如釜底。以釜底洩入釜邊。必須擡高水面。方成建瓴。若以挑河之上堅築兩岸之隄。則地勢雖內低外仰。而水面仍內高外下也。如此則有溝有防。表裏相應。誠一勞永逸之計矣。總督韙之。未能行。阮元擊經室集劉君傳後六七年。上命大學士松筠履治下河。卒如台斗議。朱士彥文定集劉君傳十二年。以同知簡發江西。阮元擊經室集劉君傳署南昌府吳城同知。吳城去南昌百六十里。糧艘所必經。十三年春。江水小。糧艘不得運。上官命以商船剝糧。台斗親步江上。視有貨貨者悉釋之。以虛舟應。事濟而民不擾。吳城商賈僨集。盜賊滋多。台斗嚴捕緝。寒暑不懈。其地殺牛者。歲進銀四百兩。得不禁。

往往盜之農家。牛值踊貴。台斗卻不受。犯必懲。遂無訟盜牛者。徽州商兄弟訟。台斗勸諭之。皆涕泣自悔。明宸濠之亂。吳城人葉景恩率其族三百人戰不勝。死者四十八。女九姑爲宸濠所得。亦投水死。三百年事未上於朝。台斗以狀上。遂得祠祀。朱士彥文定集劉君傳。吳城民多板屋居。值火災。燔燒千餘家。台斗至。爲設水龍。六坊各一。梯衝鉤鏃及儲水器各數百。坊立役夫二十人。以時習其激躍轉輸之事。官給以食。均勤情爲賞。又多掘井以備。便缶。立數萬算。役夫以外。民有擔水一石。與算一。官給以價。以是吳城不復火。巡撫下其法。通省仿行之。在任二年。阮元韋經室集劉君傳。民懷其德。補瑞州銅鼓營同知。未抵任。謝病歸。朱士彥文定集劉君傳。額行。吳城民持鏡一水盂。一拜舟前曰。象公明且清。相泣別去。其清操感人如此。重修寶應縣志。歸三年。貧不能自存。十八年。復赴江西候補。十九年。卒於南昌。朱士彥文定集劉君傳。所著有下河水利說一卷。阮元韋經室集劉君傳。又星槎遊草一卷。劉台斗星槎遊草。

孫玉庭

孫玉庭。字寄圃。山東濟寧州人。乾隆四十年進士。改翰林院庶吉士。四十二年散館。授檢討。四十五年丁母憂。四十七年服闋。四十八年充廣西鄉試副考官。五十年大考二等。五十一年京察一等。授山西河東道。旋丁父憂。五十五年服闋。遷廣西鹽法道。嘉慶元年。升按察使。二年。黔省狃苗不靖。地接粵之西陲。州。玉庭隨疆臣赴剿。兼治兵餉。事平。敘功賞戴花翎。四年三月。遷湖南布政使。尋調安徽布政使。五月。調湖北布政使。命密察安襄鄭荆道。胡齊崙剋扣軍需。前藩司祖之望扶同徇隱。玉庭以實入告。得旨嘉獎。六年。以軍犯書德發遣廣西。求書屬安置善地。案覺。事涉玉庭。部議奪職。上念其平日官聲尙好。改革職留任。尋以楚省撤兵善後事宜。辦理妥協。加恩賞四品頂戴。時湖北常平社義諸倉。節年碾支八十餘萬石。遠赴隣省糴補。玉庭以經費既難。議加緩急尤恐失恃。請循舊章。於本地富戶分年採買。從之。七年。擢廣西巡撫。復二品頂戴。會安南阮光瓚爲農。耐阮福映所逼。敏關

求內避。命玉庭馳赴廣西會議。比抵桂林。福映已滅。光續遣使納款。玉庭以夷情恭順。代爲奏請。得旨允准。八年正月。福映以其祖居越裳地。本號南越。請即以名國。上不許。三月。福映復請玉庭奏言。福映先有越裳古地。繼有安南。若號以越南。則百越之外皆夷地。既與兩廣地名有別。而於聲錫嘉名之中。仍存其舊。既於國家體制得宜。而又不致稍開邊釁。允之。八月。諭直省倉庫各陳短絀實數。玉庭覆言。粵西庫帑無虧。倉穀已補完實貯。有旨嘉獎。十月。調廣東巡撫。粵中海盜土匪。積年爲商民害。玉庭抵任後。獲巨匪楊亞鹽。鄭亞訂等九十餘人。會匪關念宗等八十人。置之法。先是。雷州盜首鄭一烏石二等。劫掠洋面。戕害弁兵。命與總督倭什布籌議堵剿。九年八月。奏言洋匪來往無常。兵船分則勢單。合則顧此失彼。且外洋捕盜。全憑風信。非如陸路用兵。步伐正齊。可以決勝。故從古治海疆者。有海防而無海戰。應以添駐兵丁。嚴守口岸爲第一要務。十一月。仍調廣西巡撫。時廣東潮陽鄭馬二族。爭地仇殺。玉庭督獲兇徒四百八十餘人。問擬如律。又故金鄉令孫映輝。生員林哲。庇族械鬪。奏請褫職。科罪有差。六月。復調廣東巡撫。以失察南海番禺令逮繫無辜。鑄三級。時總督那彥成招撫洋盜。給投首之袁阿明林亞發等頂帶銀兩。玉庭疏言。海盜投首多係購線招致。並非真心悔罪。今置盜罪不問。而加以頂帶重賞。兵丁備嘗辛苦。欲拔一外委未可得。盜則驟得千把總。頂帶候補。恐失兵民之心。命解那彥成職。按治之。復以那彥成演劇宴飲。玉庭與同城未劫。鑄三級留任。十一年正月。以路臣洋船來粵求通市。玉庭未察情僞。率令回國。又奸民林五通盜濟匪。未與督臣會鞠。輒先決囚。均下部議。鑄級。二月。奏潮高雷廉四郡秋審。請由巡道勘轉。允之。十一月。上以吳川遂溪爲洋盜泊舟之所。東海土饒地僻。尤易藏奸。命疆吏籌法肅清。十二年二月。玉庭奏吳川遂溪入港處。有獅子球激沙二門。應堵塞。再建礮臺防守。得旨勸勉。十月。御史鄭士越以粵東吏治廢弛。列款條奏。上命嚴覈懲治。並以玉庭不加整頓。傳旨申飭之。十三年九月。英吉利兵船駛入澳門。玉庭與總督吳熊光商令英船退出。乃許貿易。上以邊疆重地。洋人輒敢心存覬覦。不此之慮。而惟鯁鯁於數十萬稅銀往復籌計。懦弱不知大體。嚴飭之。十月。調貴州巡撫。十一月。以英吉利兵船前入澳門時。吳熊光不親往驅逐。玉庭未經劾奏。

繡四級。十四年五月，上以兩廣總督百齡劾吳熊光於英吉利入澳門事，逾月始奏。諸形思慮，王庭不以實入告，罷歸。九月上五旬萬壽，玉庭來京祝嘏，諭曰：孫玉庭前辦英吉利一事，近詢之韓蔚，據稱玉庭曾力勸吳熊光迅速入奏，熊光不聽其言，伊不行參劾，失之輒弱，尙非重咎，著賞給編修。在文穎館行走十五年，賞三品頂帶，授雲南巡撫。十一月，借雲貴總督伯麟雲南學政汪潤之奏，請於昭通府學加額，取進文生二名，武生二名，增設廩增各四名，蒙自縣學加額，取進文生三名，武生一名，白鹽井學添設廩增各四名，下部議行。十八年，兼署雲貴總督。二十年，調浙江巡撫。二十一年五月，升湖廣總督。十一月，調兩江總督。二十二年五月，給事中陸泌奏江蘇運漕旗丁於兌費外，復有借索，上命玉庭酌定章程。九月奏言：江南漕糧大要在卹丁除弊，欲禁州縣之浮收，先杜旗丁之苛索，欲減幫船之浮費，先卹丁力之積疲，應卹丁者，一在無屯田之賠墊，一在無漕委之滋累，而弁丁刁難州縣者，一在無故停兌開行，一在勒指通關米結，請籌款生息，津貼無屯之丁，減省漕委，以杜擾累，並令州縣於兌竣時，以兌單先呈糧道，飭令即出米結，不得過五日限，命如所議行。十一月，劾歷任江都令虧帑，上嘉其破除情面，實力整頓。二十三年四月，山東巡撫陳預以修造戰船木料，產自江浙，請由南省成造運送來東，王庭奏言：江蘇戰船木料，遠赴閩浙採購，廠員賠累已鉅，若將山東營船改歸江蘇分造，無論各員賠累難支，且物料並非產在江南，工匠於山東海船亦非所諳，請令東省照例自造，以專責成。上是之。六月，奏准兩河稽料江柴湖蘆濶溪石價俱酌減一成，又奏定江西緝私章程，贛縣磨角駐緝之通判，稜駐收鎮安仁縣藍橋，原派武員改駐長塘藍橋一卡，改委安仁縣縣丞駐巡，新城之杉關金谿之許灣等處委員，向止駐劄一處，私梟得乘間抵隙，令輪流帶兵四處遊巡，南康府屬之青山，爲淮鹽入江門戶，由省按季派委丞倅督率該處巡檢稽驗，並防糧船夾帶私鹽，於湖口縣之梅家洲北姑塘分別設卡，派委員弁查放。九月，奏湖北宜昌府鹽捕通判分銷淮鹽，向止有缺銷，嗣扣薪水章程，請定情銷處分，俾有專責，並令宜昌鎮派弁督兵會同緝私，又奏江蘇東臺漕糧米少船多，請改歸興化通州鹽城三所分裝，以節糜費，並從之。二十四年正月，奏編查保甲章程，閏四月，以沿途驛站勞費，請將

歲解櫻毛。改由水路運京。十一月。請撥太湖營千總一員。移駐徐州豐汛。增置豐汛額外外委一員。豐汛原設經制外委。移駐趙莊集。原設把總。移駐蟠龍集。夏鎮外委。移駐雙溝集。增馬良集經制外委一員。楊家集經制外委一員。裁提標五營。暨太湖福山等六營兵七十名。添趙莊集兵三十九名。蟠龍集雙溝集馬良集楊家集各三十名。均如所請行。二十五年六月。以違例將在籍守制道員。嚴履奏補徐州道。革職留任。八月。命加太子少保銜。九月。請增培黃河隄岸。以工代賑。十月。奏狼山統轄外洋內河。爲東南重鎮。出巡弁兵。資糧營中。無聞款津貼。查通州之小西洲。新漲沙地。四千三百畝。有奇。懇撥歸鎮營。俾資墾牧。皆允之。又奏緝獲海州匪徒。胡大成等首夥多名。得旨。褒嘉。時奉諭。清查各省陋規。並諭令督撫等。明定章程。立以限制。以期久遠可行。玉庭奏言。自古有治人無治法。如果一省之中。督撫兩司。官得其人。則大法小廉。斷無虞所屬苛取病民。儻不得其人。則習爲逢迎。剝削。雖立限制。仍同虛設。弊且滋甚。各省陋規。本干例禁。語云。作法於涼。其弊猶貪。禁人之取。猶不能不取。若准人以取。則益無顧忌。勢必竭民脂膏而後已。迨發覺治罪。而民已大受其累。府廳州縣。祿入無多。自昔以來。即不能不藉陋規以充辦公之需。然未聞准其加取於民。垂爲令甲者。誠以自古無此制祿之經。且不可於常祿外。別開取利之門。是清查徒滋紛擾。尤失政體。乞停止查辦。則天下臣民幸甚。疏入。奉諭。查閱所言。剴切詳明。此事不但無益於民生。抑且有傷於國體。著卽明白宣示。各督撫停止查辦。惟在各大吏正己率屬。獎廉斥貪。如有苛取病民之事。立加參革。釐正。則吏治澄清。民生日臻。饒裕矣。先是。涇縣民徐飛隴。被創死於他人門口。有司以假傷圖詐成讞。屍屬徐玉麟詣京訟冤。自戕刑部門外。特命玉庭親鞠之。玉庭廉得正兇。審擬如律。上嘉其不辭勞瘁。不避嫌怨。使數年不白之冤。一旦昭雪。卒成信讞。交部優敘。道光元年二月。請停淮南北口岸鹽斤加價。略言鹽務疲敝之端有四。一積引過多。一庫儲過絀。一成本過重。一商力過乏。其故總由私鹽充斥。惟減價乃可敵私。銷引方能裕課。章入。上命通盤籌議。復言正不濟源。必自輕減成本始。前因南河工費加價三釐。今工竣已久。應將三釐減除。從之。尋授協辦大學士。留兩江總督任。三月入覲。上語及淮鹽。引墜課絀。命籌議疏銷。玉庭請變通楚岸輪

轉之法。略言楚省漢口。爲淮南售鹽總岸。向來鹽船到岸。聽商店行販。隨時交易。是以年年暢銷。自乾隆年間鹽道保定。立封輪之法。凡鹽船運到。即由鹽道加封。按到岸先後挨次輪售。商情不便。私鹽得乘間侵越。因臚陳六害。請改復舊章。得旨委曲詳盡。深合機宜。六月。奏准淮安徐州二府改題缺。玉庭之議漕務也。以幫費不能盡裁。陋規不能盡革。浮收不能盡去。奏請酌定限制。入折收漕。尋御史王家相奏言。事類加賦。上命玉庭悉心體察。不可迴護前議。會戶部侍郎姚文田湯金劍皆陳其弊。得旨著有漕各督撫。通飭所屬杜絕浮收。以清其源。裁革陋規。以遏其流。務須官民旗丁。均免擾累。以肅漕政。十月。奏准江西南贛各屬秋審及軍流人犯。歸巡道覈轉。尋兼署江南河道總督。十二月。玉庭七十生辰。御書平格延釐額。撫循南國宣猷遠。協贊黃扉受福多聯句。以擒私梟。李克標首夥。并仗頭殿與魯等數十人。獲兵器私鹽無算。得旨嘉勉。二年正月。京察下部優敘。二月。奏民間私造烏槍。立限收繳。申明例禁。酌免處分。又奏泰興營汛官少兵單。請循舊章。置把總二員。增置外委一員。兵丁四十五名。以資巡防。三月。請疏濬銅山境內荆山橋河道。四月。奏三省交界營汛。酌定會哨章程。六月。奏准北收買餘鹽改運章程。均如所請行。又奏酌立滅黃河埝修守章程。得旨准於峯山河埝緊要處所。添設千總一員。協防二員。效用二員。河兵一百名。其天然閘河埝。著設把總一員。協防二員。效用二員。河兵一百名。并籌備歲修經費銀四千兩。存儲府庫。酌發千把總承領。責令隨時督率協防兵夫。周歷防護。七月。河南新蔡教匪朱鳳閣與安徽阜陽教匪邢名章自新蔡起事。突入安徽潁州境。玉庭飭屬剿捕。不及旬日蕪事。上深嘉之。九月。以秋汛安瀾。下部議敘。十月。酌議變通堵緝隣私章程。一原設巡卡請分別裁併增設。一文武員弁請覈實考定功過。一員弁巡費請按獲私多寡分別扣發。一嚴禁私梟請先指拏窩匪。一兵役緝拏大夥私梟請准酌帶烏槍。下部議行。又奏山陽鹽城等縣應疏河道。懇借款挑修。允之。十一月。奏獲洋面逸盜張扣二并販私各犯八十餘人。暨船隻兵器。得旨嘉獎。十二月。奏江都縣瓜洲河道淤塞。請撥款疏濬。諭曰。果於水利民生有益。何吝多金。總在認真經理也。勉之。三年正月。以袁老辭職。上鑒其公誠。慰留之。三月。請築宿州北廳夏家馬路。並築土壩攔截相機啓放。又奏徐州

屬滅黃河堰。請分別讓地挑築。又請修培礪山護城隄工。均如所請。尋以巨鼻穆鳳林劉忠信楊三岡宋五張建禮等先後擒治。上並嘉之。是月。又奏狼山鎮屬掘港營所轄林家墩濱海要隘。距營百數十里。僅設防兵三十名。不足彈壓。請增置千總一員。外委二員。戰兵五十名。下部議行。五月。請將江南葦蕩右營草地仍改歸旗丁墾種。又奏淮徐海三府州屬秋審。及軍流徒犯請歸巡道勘轉。又奏駱馬湖官民灘地。分別蓄草收租章程。六月。奏潁州府屬阜陽亳州鳳陽府屬宿州與河南接壤。時有紅鬃等匪竄入。請將鳳潁捕盜同知移駐阜陽之艾亭集。作為撫民。總捕同知宿州時村集。增置巡檢一員。並於艾亭集方家集暨亳州之滅種店張村鋪宿州之時村集夾溝驛各增置外委一員。并請添潁州營存城兵五十名。艾亭集四十名。銅陽城方家集各二十五名。滅種店張村鋪各十名。夾溝驛十名。以重巡防。七月。奏雲騎尉恩騎尉世職。三年。甄別距總督駐劄處遠者。請由本省巡撫或提督就近考驗。其附近總督鎮協各營有隸提標者。徑送總督考驗。以省勞費。得旨允行。八月。萬壽聖節。幸萬壽山玉瀾堂。賜十五老臣宴。玉庭與焉。繪圖紀事。御製詩有封疆重寄廉兼幹。平成奏績慶河黃之句。九月。奏獲隣省逃匪端金隴。審擬如律。十月。奏獲海州鹽梟張從雲等三十餘人。又獲玉富林等四船私鹽萬餘斤。上嘉之。又奏河道今昔不同。請將原設儀徵攔潮閘稅口移駐新城鎮。得旨允行。尋報秋汛安瀾。上以伏秋雨水過多。疊見盛漲。玉庭督率員弁搶護。不遺餘力。嘉之。并下部議敘。十一月。奏清河縣水陸衝途。請准安府檢校。另於清河攔橋置巡檢一員。就近稽察。十二月。奏龍江淮關章程六條。一商販到關驗放宜速。一扞量貨物宜平。一保家錢戶宜革。一繞越偷放宜懲。一胥吏措單查察宜肅。一看關家丁選派宜慎。均如所請行。四年正月。復督江南河道總督。二月。奏河勢漸變。請挑直引。從之。三月。給事中朱蔣弼奏海口下流壅塞。上命玉庭往勘。擇要疏濬。五月。上言。古之稱三江者。曰東江。曰吳淞江。曰婁江。迨後。東江失其故道。遂以江震下流。澱湖一帶歸於黃浦之水。當之。此東南入海之路也。吳淞江西承江震運道。東合黃浦尾閘。此居中入海之路也。婁江即今之劉河。在太倉州境。此東北入海之路也。婁江之北。又有白茆河。在常熟昭文縣境。分承蘇屬之長洲元和吳縣。常屬之江陰無錫諸

水。下注揚子江尾入海。此三江之外。別爲一大支也。以上皆太湖歸海之要道。未可偏廢。惟一時工鉅費繁。請就太湖下注黃浦一路先行疏濬。餘俟次第興修。上可其奏。是月。秦皖省鳳潁泗三府州屬秋審。及尋常流徒請歸巡道勸轉。六月。奏吳淞營濱臨大海。爲頂衝扼要之區。請於坐落之寶山縣增置把總一員。所屬羅店鎮增外委一員。加派兵十名。南翔汛所管黃渡鎮增外委一員。加派兵五名。封家濱加派兵五名。以資巡緝。皆從之。閏七月。授體仁閣大學士。仍督兩江。八月。議上江西鹽務緝私章程。如所請行。十一月。以漕船回空遲延。下部察議。尋以河督張文浩治河乖謬。玉庭不早參劾。鑄三級留任。會高堰十三堡及息浪庵兩處遇風決口。石工掣塌一萬一千餘丈。上命尙書文孚汪廷珍往勘。解玉庭職。十二月。文孚等以堰貯潰決情形入奏。文浩遣戍伊犁。玉庭有心迴護。下部嚴議。部臣議罷斥。上改爲革職留任。並革去太子少保銜。五年正月。命借漕督顏檢會辦重運。五月。玉庭奏襄河淤塞。酌議盤壩接運。需銀一百二十萬兩。請就近撥發。上從所請。尋又奏在後幫船。因河道淺滯。不能挽抵原議之高坂頭等處。就近盤壩。下部嚴議。尋議覈職。上以玉庭宣力有年。賞編修休致。六月。玉庭等奏察看幫船盤運情形。恐致遷誤。請援照成案。截留存貯。得旨以前後議辦情形層層貽誤。坐失機宜。實屬溺職。孫玉庭著卽革職。以示懲儆。方漕船未渡黃時。廷臣有海運之請。下各督撫會議。以窒礙議格。戶部劾玉庭等不行海運。並請帑不已。借黃而黃轉病。濟運而運更阻。請將滯漕制價。責令玉庭賠繳七成。嗣新任督臣琦善奏幫船淤淺狀。得旨孫玉庭身受三朝厚恩。辦事至於如此。自問當得何罪。著不准回籍。交琦善督令將運河淤墊處挑挖深通。所需挑費與魏元煜履檢分賠。九月。琦善奏運河請停挑辦。十月。以賠繳一萬兩。運河亦刷濶深通。諭令回籍。十四年九月。玉庭以乾隆甲午舉人。至是鄉榜重逢。疆臣以聞。諭曰。前任大學士孫玉庭。因公鑄職在籍。年逾八旬。再遇鄉科。洵屬藝林盛事。著賞四品頂戴。准重赴鹿鳴筵宴。用示朕嘉惠耆儒至意。十月卒。

粟毓美字友梅山西渾源人嘉慶六年拔貢七年朝考二等以知縣用分發河南二十年署寧陵縣知縣二十一年丁父憂二十四年服闋仍赴河南道光元年二月署武陟縣知縣十月河東河道總督嚴烺上其防汛出力功得旨以同知直隸州知州儘先陞用先換頂帶二年六月以購辦稽料稽遲礙陞銜頂帶停陞尋以辦理堵合妥速得旨開復三年正月實授十月遷光州直隸州知州四年陞汝寧府知府五年調開封府知府九年正月擢糧鹽道十月調開歸陳許道十年授湖北按察使十二年陞河南布政使十四年七月以捐資助賑下部優敘尋護理巡撫九月秦桐柏縣查鹽公廠二處實屬虛糜請卽裁撤從之十五年五月擢河東河道總督七月秦原陽支河情形略曰北岸黃沁衛糧二廳黃水漫灘而黃沁原武七堡一帶尤爲喫緊河勢北臥漲水蓋灘而來原武七堡以下進水更形湍急下達衛糧境陽武汛內隄工亦爲喫重除慎守大隄別無良策其切近順隄河之處自原武十五堡至陽武十七堡多有迎溜頂衝形勢見先搶辦隄南韋壩又於隄北及原武隄北幫餞並該汛及原武隄南估築土壩十八道俾免順隄鑿埽險而多費兩汛向無埽工應卽收買堆貯備防總之兩廳灘水串溝久爲隱患蓋因地居上流青峯廣武兩山遙峙對東出山之水勢最猛驟而原武之河灘皆係坡形故一遇盛漲最低處所遂卽刷成溝槽串至順隄河內險無定所卽上流武陟榮澤各路無不匯注合流是以溝形浩濶竟同河形見在晝夜奮激已堵斷合流並繪圖貼說以進八月奏言連日水勢僅長尺餘而王屋莊進水之口較前更寬百餘丈總由中泓大灘益向南淤溜卽南緩而北緊南股正河成爲迂道北股之溜勢轉建瓴至大河中泓淤灘之故由廣武山前老灘塌去一千餘丈河溜先向山根裹臥爲山所逼折回東北中泓遂挺生淤灘此河勢之變遷皆由出山處所先有變遷之原委也前奏應辦物料係就近頂衝迎溜處所爲急則治標之計今水口既日見刷寬又何敢但求撙節貽誤事機通盤籌畫從省估計約需銀十餘萬兩請將兩岸各廳應估來年土工稍可緩者酌量裁減先儘黃衛兩廳估辦其稽料麻土工稍可通融者亦挹彼注茲以免專案請帑至原陽兩岸隄工已被水漫嗣因沿陂試拋甄塊深資保護月石壩堵合加高幫寬迎下楊村封邱二汛灘水均已停淤壩下七十餘

處村莊居民亦得安堵。惟串溝分溜。關繫北岸全局。斷不能緩。至來年與工。見已借撥銀八萬兩。仍俟霜降後。於請撥各廳土工銀內。如數劃還。則錢糧並無加增。而要工得免貽誤。如所請行。尋以支河危險。用輓拋護。化險爲平。入告。上嘉其辦理妥速。仍命詳細籌畫。尋借河南巡撫桂良會勘。以支河分溜已至六分。輓工各壩未可深恃。請款貯料備防。從之。十六年四月。以輓工試有成效。請照時價覈明報銷。下部議行。十月。奏運河廳所屬魚臺汛河道八十餘里。兩岸官隄。日形殘缺。間有民堰。亦甚卑薄。夏秋盛漲。河湖相連。糧船不能通緯。輓運遲延。請將民堰改歸運河廳。於一年內借款修竣。復以各員承修閣座。保固僅限三年。故敢於輕率從事。請於例限之外。再令保固三年。均從之。十七年三月。奏稱前在豫護撫篆時。見速戰陣法。聲勢聯絡。洵稱勁旅。濟城界接兗曹。宵小易於出沒。從前金鄉曹縣匪徒滋事。濟城有兵力防護。得以安堵。地方既關緊要。操防尤宜講求。請以實在城兵一千一百餘名內。挑選六百卅六名。分別各隊操演。兼習速戰陣法。並咨取熟諳武弁教習。上嘉之。十八年七月。奏請多備土工。以固根本。略言豫東黃河。地居上游。向無開壩分洩。全賴隄工高厚。方資抵禦。本年大汛。沁黃洛河接時並漲。今雖已設法疏防。而隄壩實形卑薄。亟應分別估辦。以爲來年修守之資。今擇其首要工段萬不可緩者。豫省十三廳東省兩廳。估需銀兩。請即於兩省藩庫撥給。以便交春興工。其次要工段歸來年估辦者。亦賴先事豫籌。請於來年二月興工時。再由藩庫借銀十萬兩。務使一律完竣。以防大汛。如所請行。時因雨澤偶稀。漕艘輓阻。嚴飭毓美於回空後。實力籌辦。尋疏陳循蓄濟運事宜六條。一。冀成州縣疏濬泉源。遴委幹員估挑河渠。一。濬各湖進水渠道。一。微湖水短。應由江南駱馬諸湖導引以歸搏節。一。微湖節水。應遲啓湖口雙閘。以免消耗。一。臨風輓板二閘。應嚴板少啓。以節汶流。而速漕運。一。曹州濟寧。應擇要估濬河渠。以暢來源。得旨。毓美尙屬周妥。飭屬照辦。十九年二月。奏豫籌微湖收納運水。請於重運過竣後。不必拘定例消存丈尺之數。但計水存一丈三尺以內。卽築壩收水。又以汶河淤墊。旁洩過多。請酌量加高戴村壩。以期攔蓄得力。均如所請行。先是。毓美奏輓工屢著成效。請設窯燒造。得旨允行。御史李純疏其不便。上命偕工部尙書敬徵往勘。至是會奏。請改辦碎石。俾

止置窳。三月，毓美復奏言自來言治河者，謂明險易治，暗險難防，暗險者即隄前之串溝，豈爲可慮者也。豫省歷次失事，皆在無工處所，實因兩岸隄長千里，未能處處籌備，一旦河勢變遷，兼以風馳雨驟，輒蒼黃失措，幸而搶護平穩，而埽工非數萬金，十數萬金不能濟事。古人鑲埽，亦不得已而用之耳。蓋鑲埽引溜，生工久爲河工所戒，在明白工程者，原不肯輕率從事，而昧於機宜者，遂謂非此別無良策。伏查北岸爲運道所關往者，原陽分溜，幾至掣動全河，若非用輓拋護，費何可以數計。今祥符下汛，並陳留一汛，灘水串注隄根，察其形勢，正與北岸相同。濱河士民，多有呈請用輓者，蓋有見於輓工之得力，涸復農田不下萬頃，其爲保衛田廬，情至切也。夫事之有利於民者，斷無不利於國，特事近於叔，難免浮言，前南河用石之始，衆議紛如，良由工程平穩，用料減少，販戶不能居奇，而游客幕友見工簡務閒，不能幫辦謀生，是以妄生浮議，並稱東河漫決，皆由不用碎石之故。賴聖明獨斷，敕下東河試辦，至今永慶平成，惟自拋用碎石後，請銀幾七十餘萬兩，後將每年添料改辦，六成碎石，雖未專案請銀，然因購石不易，埽段愈添愈多，經費仍未能節省，自試辦輓埽以來，三年未生一新工，較十一年至十四年共節省銀三十六萬兩，蓋由豫省情形與江南不同，產石之地，祇有濟源鞏縣，必須春末夏初方能運到工次，輓則沿河州縣，每處民窳不下數十座，隨地隨時皆能應手，可以無誤事機，且石性滑，入水易於流轉，輓性澀，入土即黏，卸成坦坡，自能挑遠溜勢，至每方輓塊各廳均係價銀六兩，石價則自五六兩至十餘兩不等，方便既大小懸殊，而碎石大小不一，堆埽玲瓏，半屬空虛，尺輓一千塊，爲一方平鋪計數，堆埽均實，石每方重五六千斤，輓每方重九千餘斤，是一方碎石之價，可購兩方之輓，而拋一方之輓，又可當兩方碎石之用也。咨調南河弁兵來豫，帶同查驗輓工，僉稱與南河土壩包口無二，而輓壩不更堅於土壩乎，或謂輓可以治將生未生之工，不可治已生已成之險，不知杜一將生未生之工，即少一已生已成之險，或謂輓塊入土，易於損裂，不知拋成輓壩，一經泥淤，即已凝結，嘗見井中之輓，因得水而更堅，見在收買民輓，多有淤入泥土者，皆完整如故，或謂拋築輓壩，近於與水爭地，不知隄前之地，尺寸在所必爭，自來鑲埽之法，隄前必先築土壩數十丈，然後用埽鑲護，輓壩則無須

平埽師土埽之意。不泥其法。拋作垣坡。大溜自然外移。未有可築土壩而不可築甌壩者。又所占河面無幾。安得有與水爭地之患。夫隄前水深則險。水淺則平。水近則險。水遠則平。自拋築甌壩。凡隄前水之深且近者。莫不淺且遠。前尚書敬徵來豫。據道廳密稟。謂用甌壩險工。究未可以深信。亦因近年水小。未敢自謂必可施行。今道光十八年盛漲。較之二年及十二年尤爲猛迅。甌壩均屹立不穩。並未出險生工。可知雖遇大水。亦能抵禦得力。且上年春間儀陟廳。秋間中河廳河水下卸。塌灘匯壩。搶鑲埽段。旋即走失。用甌拋護。均能穩定。是用甌搶辦險工。較鑲埽更爲便捷。今兩岸文武員弁。均已深信不疑。而急公之員。尙有自行捐辦者。天下事可與樂成。難於圖始。大抵皆然。竊聞衡工之失事也。因灘面不能鑲埽。及塌至隄根而已。不可治。馬工之失事也。因串溝塌過隄水。其始僅涓涓細流。求碎石不可得。率成口岸。惜未籌及於甌可代石也。見在各廳有工之處。皆易爲力。惟無工之處。串溝隱患。必應未雨綢繆。今若於黃沁下南。豫貯甌塊。則可有備無患。至於應貯之甌。無論新舊。仍令向民間採買。不必應員燒造。此外亦別無流弊。疏入。八月。奏本年黃河異漲。大隄急應加高。請借土工銀十八萬兩。經部議駁。尋復奏言土工爲修防根本。前者籌議辦甌減壩。即請以減辦埽工之銀。爲添辦土工之用。誠欲隄工增高培厚。異漲永不爲患。始可爲經久不敝之基。本年正月查工。因見水漲較早。又由道庫墊發銀十萬兩。將庚子土工豫竣。迨立秋前後。歷經異漲。向非早爲籌備。已不免泛溢爲災。是豫補庚子年之工。已亥年先收實效。來年汛期。大小無定。何可不先事籌防。惟部臣所駁。爲按年報銷起見。所請分年帶銷。自應遵照停止。今請於豫省藩庫提借土工銀十二萬兩。其不敷六萬兩。卽由道庫籌墊。俟來年估辦辛丑年土工。分別陳請撥還。則於錢糧並未增添。於款目毫無輕重。於要工得資備防。特旨允行。十月。請將添購四成防料銀五萬五千餘兩。改辦甌塊。復附奏曰。考治河諸書。從前係用捲埽之法。並有竹絡木困甌石柳葦。自用料鑲埽。則以稽料爲正宗。而險無定所。亦無一勞永逸之計。緣鑲埽陡立。易於激水之怒。其始水深不過數尺。鑲埽亦不過數段。迨至引溜愈洶愈深。動輒數丈。無工變爲險工。於是溜勢上提。必須添鑲。溜勢下坐。必須接鑲。久之而片段愈長。防守愈難。爲力。豫東土柱埽

鬆。水及隄身不能不用料鑲護。新工既生。日久亦形勞費。近來錢糧按年比較。不敢過於增多。而埽工無法減少。不得已而減土工。少購碎石。皆爲苟且因循之計。於修守更無實濟。自試拋甄壩。或用以杜新工。或用以護舊工。無不著有成效。本年三月。爲籌防黃河。下南廳串溝。復請購買甄塊。故雖伏秋異漲。爲數十年所未有。而化險爲平。固賴隄身加高。亦由兩岸各廳無壩灘潰。提出險生工之處。則甄工之力也。不特可資經久。與稽料大相徑庭。而堆貯之處。並無風火堪虞。是兩岸兵民共知共見。儻從此工固濶安。亦復培增土工。專用功於根本之地。則既可以免漫溢之患。亦保無衝決之虞矣。允之。二十年正月。計典甄絃。上以毓美慎厥修防。安瀾奏績。下部議敘。尋命尙書恩桂等赴豫查驗料埽。查出曹河廳料埽丈尺斤秤。蠶耗短少。請將毓美交部議處。部議降二級留任。二月卒。賞加太子太保銜。照總督例賜卹。尋賜祭葬如例。諡恭勤。二十一年。入祀名宦祠。

蔣攸銛

蔣攸銛。字穎芳。號礪堂。漢軍鑲藍旗人。先世由浙江遷遼東。清初入關。居寶坻。乾隆四十九年進士。改翰林院庶吉士。五十二年散館。授編修。五十三年。充福建鄉試副考官。五十四年丁父憂。五十六年服闋。補原官。五十七年。充貴州鄉試正考官。五十九年。充陝西鄉試正考官。六十年。充河南鄉試正考官。提督廣西學政。於嘉慶三年。改江南道御史。五年。授江西吉南贛寧道。六年八月。上密諭巡撫張誠基曰。察吏所以安民。蔣攸銛。江右之良才也。汝其任用之。九月。署按察使。八年。廣昌縣齋匪廖軫用等作亂。聚五六千人。攸銛率檄營兵剿賊於寧都石城。大敗之。賊平。巡撫秦承恩上其功。時攸銛已丁母憂。論服闋後施恩。十年三月。特旨起復。發往廣東差委。六月。署惠潮嘉道。十一年三月。遷江西按察使。十一月。升雲南布政使。滇省銅廠錢局虧欠久。歷任巡撫兩司。咨追無獲。攸銛奏請攤賠。又於路南州開新廠。得銅五百餘萬斤。以裕京運。十四年三月。調江蘇布政使。旋擢巡撫。八月。調浙江巡撫。海洋自蔡牽亂後。餘匪尙多。攸銛檄定海黃巖二鎮。率舟師捕之。匪船遠竄。洋面肅清。十五年。授江南河

道總督。以不諳河務辭。上諭著仍回浙江原任。十六年三月。命與兩江總督勒保籌海運。攸銛以爲必不可行者。十二事。一海運自元至元十九年。訖明永樂十三年。當時仍有河運。今河運亦不能廢。則禦黃壩仍不能開。運弁仍不能減。徒增海運之費。一江南至天津海道。如吳淞口之陰沙。黃河口之大沙五條沙。山東之貓兒島沙門島。皆沙礁叢雜。天庾正供。非可嘗試於不測之地。一前代欲避外洋之險。議由膠西開陸地。逕通直沽海口。勞費不貲。雍正初。朱軾亦奏開膠萊運道。卒以工力難施而止。一旗丁不習海洋。必責成船戶。又非如旗丁有冊可稽。且不能設官出洋巡視。必至偷竈缺額。捏報沈失。甚或有通盜濟匪諸弊。一海行風信靡常。遲速平險。皆非人力可施。一海運須籌經費。至元間。每石給中統鈔八兩五錢。迨至大延祐間。相距纔數十年。已十三兩。以古準今。其費更大。一海船載二三千石。計造一船。工價不下萬兩。全漕需船一千七八百號。即需銀一千七八百萬兩。一造船既不能行。必雇商船。照民價給之。則費不貲。若祇給官價。則在官支數已多。而船戶猶以賠累爲辭。必多規避。況吳淞頭號沙船。始詣海道。數亦不敷。粵省相距遠。其船向不能北行。浙省相距近。無船可雇。一元明海運。米多漂失。到倉欠交者。每石自數合至一斗數升不等。今生齒日繁。人之所食。浮於地之所產。豈堪再有漂失。一海運須設水師。若令見有水師分段護送。則兵船少而漕船多。必至有名無實。若每船配兵一二千名。即須增兵三四萬。糧餉又復不貲。一京師百貨之集。悉來自糧艘。若由海運。斷不能多攜貨物。將來京地物價驟騰。亦礙生計。一運丁所用兵工短絳等項。總計八九萬人。窮民資以爲生。若由海運。則須另募熟悉海道者。而此常年運漕之衆。一旦失業。難保不流而爲匪。奏入。事遂寢。是月。署浙江鹽政。海寧之南沙與紹興之山陰會稽蕭山等縣。向爲斥鹵之區。無業貧民。往往割淋私煎。嗣設官廠收鹽。招商配運。因該處燒鹽。用柔草鹵耗重。商人虧本者多。攸銛以發帑收買。不令商自辦。官爲督率。且民人與鹽戶雜居。村落散漫。因令各鹽戶聚處成團。每戶一鍋一盤。合鹽煎鹽。可以按團稽覈。並酌裁私設渡船。絕其販私之路。命如所請行。九月。擢兩廣總督。十一月入覲。賞戴花翎。十七年二月奏言。粵東劫案多。與其懲於事發之後。不若防於未發之先。又必得其地以截伏竄之途。得其人以收督捕

之效。臣查廣寧韶連各府州。內河則汊港多歧。陸路則岡嶺環互。水嚴即由陸竄。陸嚴即由水逃。如順德花縣從化增城三水清遠英德高要鶴山等縣。大者八九百里。小者六七百里。其中何處險要。何處通達。爲縣令者。苟非熟於地徑。則不能勝緝捕之任。夫匪徒聚散無常。必有窩藏之地。當於適中要隘。選派勤幹文武大員。給以隨員。居中調度。益以兵役。四路偵探。一有賊蹤。卽分投圍截。而又以時飭州縣官親赴民間。與紳衿耆老。講明勸導。使境內不得藏奸。如此則刑教兼施。文武用命。拔本塞源。莫急於此。因劾三水知縣章家麟。海陽知縣姜樹鶴。山知縣馮克鞏。靈山知縣彭應徵。樂昌知縣勵世馨等不職。舉三江協都司張仁南韶連鎮總兵何君佐可用。時三合會匪嚴貴邱等已獲。被脅者多自首。攸銛請予以自新之路。嚴立再犯之條。奏定懲創章程。下部議行。並交部議敘。九月。豫東教匪倣擾。並有賊潛入紫禁城。持械逞兇。攸銛疏言。我朝聖聖相承。田賦不加戶丁。兵役不用民力。誠史冊所未有。皇上臨御以來。戡定四省教匪。登斯民於衽席。不意光天化日之下。竟有此昏不知恩。敢不畏死之亂民。以臣思之。亦非盡地方官倉卒激變所致。誠如聖諭變起一時。禍積有日。始而萌蘖方滋。漫無覺察。繼而燎原將熾。尙冀消彌。苟且目前。規避處分。以致水懦民玩。釀成亂逆。此因循怠玩之弊。咎在州縣。而表率無方。勸懲不力。則督撫藩臬道府之責尤重。咎尤深。欲防亂於未然。首在甄別道府州縣。近日州縣貪酷者尙少。而委靡者甚多。該道府耳目切近。非不知某員闖冗。某員勤幹。每以闖冗者爲安詳。勤幹者爲多事。黑白莫分。是非倒置。督撫藩臬。稍不加意。卽受其欺蒙。夫闖冗之釀患。與貪酷等。臣竊以爲目前急務。莫先於察吏。而欲振相沿之弊。當用破格之勸懲。凡貪酷者固應嚴參。平庸者亦隨時勒休改用。不必俟計典之年。始行覈辦。其有守有爲。勤能愛民者。卽密奏請旨優獎。以爲之勸。道府得人。則州縣治。州縣得人。則閭閻安。將禍亂之萌自消。太平之福可致矣。疏入。十九年閏二月。疏言。天下道府。由牧令起家者十之二三。由部院外擢者十之七八。誠以司員持進退。准駁之衡。俾之練習日深。通今不至於泥古。然後敷施有本。坐言卽可以起行。聞近來司員。少卓然衆著者。非今之人。必不昔若也。一由滿洲之膺生太易。一由漢員之捐班太多。請飭部臣隨時考覈。於部務不甚相宜者。奏明

以同知通判分發各省。使之勉於猷爲。以供器使。而部曹亦漸疏通。數月以來。迭奉諭旨諄諄。嚴甄別以汰衰庸。臧處分以全幹吏。但恐汰之而復來者。猶是等倫。全之而進用者。不無冒濫。究無以仰副勤求治理之盛心。今之才守克兼。沈於下位者衆矣。請飭公正大臣。薦達皇上。擇其名實相副者。擢而用之。使之連茹彙征。相觀而善。抑臣更有陳者。任事之與專擅。有義利之分。若一人任事。即以專擅陷之。則衆口可以鑠金。官常樂推諉以苟全矣。協恭之與黨援。有公私之別。若兩人協恭。即以黨援目之。則立異可以遠嫌。書吏得乘機而舞弊矣。此近今之積習。爲大臣者當力除之。至於翰林固屬詞臣。然務在崇正學。抑浮華。養成明體達用之才。似不必專以文章課殿最。科道爲朝廷耳目之官。如果真知灼見。則地方大吏之優劣。得自輿論者爲最詳也。然同一敷陳。能否得體。均之糾劾。是否爲公。詢事考言。難逃洞鑒。其有識見卓越。才品清正者。似當由京堂而擢卿貳。與翰詹衙門參用。總之有治人無治法。而用人之道。因才因地因時。臣下無可市之恩。君上有特操之鑑。人無求備。懲貪者不宥其瑕。政在集思。職要者弗撓於衆。粵東嶺海。例准洋船貿易。時英吉利國護貨兵船。不遵定制。停泊外洋。竟抵虎門。餒示以兵威。復召大班益花臣詰責之。英人屈服。遂揚帆去。因請嚴禁民人私爲洋人服役。及洋行不得建洋式房屋。舖戶不得用洋字店號。稽查商欠。不准身家殘薄之人濫充洋商。並不准內地民人私往洋館。均如所議行。二十年四月。南澳鎮總兵羅鳳山巡洋疏失。攸銜奏請革職。上以事係革兵林勇鄭高挾恨搶船。若罪鳳山則二人轉得快其私忿。命傳旨申飭。七月。暹羅國王籲請中華商民代駕貢船。攸銜不許。先是。商民陳金負該國王貨本銀三千餘兩。攸銜於司庫開款內墊給。至是貢使來粵繳還墊項。攸銜以既經奉旨頒給。即係天朝恩賚。若又准繳還。轉非俯卹外人之道。應卻之。上嘉其得體。二十一年。英吉利國遣使入貢。由海道赴天津。攸銜請敕諭該國王嗣後入貢。當照琉球等國定例。就近由廣東北上。不可冒風濤之險。遠赴他處收口。若不恪守章程。船到天津。不許登岸。並不接收貢物。此次貢使。似當由陸路派員伴送來粵。其餘仍由海道原船回國。均不許逗留。上甚嘉納。二十二年正月。署粵海關監督。閩皖茶商。向由江西內河入粵。時洋西肅清。諸商利於海運。攸銜恐其與外

人通。且私帶違禁貨物。奏請禁之。粵東屯田。自改設衛所。招民佃種。可以照額徵輸者。不過十之五六。其衝陷廢豁除者。以新墾沙灘抵補。土瘠不能足額。丁多逃亡。攸銛奏請覈實。沃壤照上則徵收。新灘則減之。九月。調四川總督。上諭以清慎居心。勤明任事。察吏宜嚴。治民以正。二十三年三月。奏省標爲各營表率。臣與將軍提督。隨時操演。復每日抽閱二三十名。其戰守糧缺。向由本營驗充者。臣亦親閱。期一兵有一兵之用。上嘉之。川民帶刀防身。動輒命案。攸銛飭各州縣查明境內鐵匠若干家。鎮市以十家爲一牌。鄉場以五家爲一牌。如保甲法。取其連環結。一家有犯。一牌連坐。若孤村販店。有設鑪者。必造刀窩匪之人即逐之。民以違禁物呈官者免罪。川北羣俗尤甚。請於廣元巴州各添游擊營。縣州添都司營。設弁駐兵。即於營制中抽移抵補。以節經費。從之。十一月。署成都將軍。時御史程伯燮奏四川州縣有棚杆釣杆貼籠等刑。諭攸銛查禁。因奏川省前辦啊匪及教匪初平。餘氛未靖之時。不得不齊以嚴刑。今承平日久。聽斷自有常刑。臣已嚴飭各屬銷毀非刑器具。惟匪徒仍須按法懲治。不得博寬厚之名。留閭閻之害。蓋匪徒之斂肆。視州縣之寬嚴。稍存姑息。則水懦之患。甚於火烈。上深然之。瀘縣江都堰。爲秦李冰所築。析江流爲三分。溉成都十四州縣民田。惟歲修經費不足。攸銛以官捐則恐藉口累民。民捐又恐派收滋弊。請動撥義倉租息。幫貼堰工。以民間自出之財。爲民間至要之用。上以事屬兩益。如所請行。二十四年諭曰。川省地廣民稠。從前教匪滋事。閭閻被其蹂躪。軍興之際。小民不無勞費。自蕩平之後。十餘年來。休養涵濡。元氣已復。本年朕六旬慶辰。普免天下積欠。蔣攸銛奏該省錢糧年清年款。並無積欠。可免蜀民踊躍奉公。輸將恐後。亦由該地方官撫綏化導。督率有方。甚屬可嘉。本年京察。蔣攸銛著賞加一級。二十五年七月。仁宗龍馭上賓。上命攸銛來京叩謁梓宮。特加太子少保銜。道光元年二月。雲南永北廳有勞勞夷人。讎殺漢民。所至焚搶。地與四川之會理鹽源接壤。攸銛選練材武。治戰守具。撤金沙江打衝河渡船。諭沿邊夷民。築寨禦之。撫難民一萬三千九百餘人。事聞。上嘉之。曰。實力急公。不存彼疆此界之念。所謂大臣者。不應若是耶。二年二月。京察下部議敘。松潘廳黃勝關外有果洛克野番。素剽悍。因搶劫玉樹番族羸馬及西藏巴雅爾堪布貢物。頻年用兵。

是年八月。提督桂煥。深入夷寨。擒耶結等四十六人。悉誅之。並破其唐凹唐玉達凹三寨。番衆股栗。誓受約束。上以倭銛調度得宜。下部議敘。九月。召爲刑部尙書。十月。管理戶部三庫事務。十二月。賜紫禁城騎馬。三年四月。授直隸總督。諭曰。蔣攸銛受兩朝知遇。惟當力圖報效。國爾忘家。不准以身係旗人。世居寶坻爲辭。時直隸久旱。倭銛既抵任。奏官民彫敝。整飭與調劑兩難。六月。以直隸頻年災賑。見值久旱。繼潦。田禾受傷。恐糧價日昂。農民艱於口食。請截南漕四十萬石。存天津北倉。以備緩急。從之。時永定河因大雨連縣。水勢異漲。北三工南二工。及北中汛。先後出槽漫灘。所在危險。倭銛赴工督辦。尋奏臣奉職無能。致屢經漫口。請交部議處。時方興畿輔水利。以服闋江南河道總督署工部侍郎張文浩董其事。倭銛固請飭文浩赴工查勘。以免貽誤。奉諭所奏不爲無見。但永定情形與南河異。卿仍應留心。不可以張文浩熟悉河務。遂全然諉卸也。又奏北運河亦有漫口。請照歷辦成案。由各廳汛賠修。尋各險工平穩。諭倭銛查辦災務。既而通省百餘州縣。先後報災。倭銛請飭部速撥賑餉銀一百二十萬兩。經費銀六十萬兩。十一月。奏永定河自康熙三十七年始建隄工。嗣因下游受淤。至乾隆三十七年。河已六徙。此後沙積淤停。去路不通。屢有旁溢之患。近見河流北趨。方冬水涸。尙不免潰隄。若不籌備。來年汛漲可憂。因勘估減水閘壩越隄等工。請於浙江江西湖南江蘇廣東封存款內。提銀五十萬兩。解交藩庫。以備支發。下部議行。十二月。奏災歉州縣。來春青黃不接之時。須商販流通。以資接濟。請將奉天米船。暫免納稅。至災重之區。春耕未齊。必須展賑者三十八州縣。不可使災黎失所。又不可多糜帑項。臣極意撙節。尙須撥銀二十萬兩。俱從之。四年二月。請修永定河閘壩。以工代賑。時流民出關。扶攜塞路。上切責倭銛。令飭所在有司。毋玩視民瘼。倭銛奏近海東南一帶。積水之區。至今未涸。災民得賑後。仍赴奉天等處營生。禁之適以擾民。得旨己飢己溺之懷。不可忽諸。時張文浩補江南河道總督。上以工部左侍郎程含章代之。倭銛與含章奏言。治水之大綱。有九。一東淀。一西淀。一大清河。一永定河。一子牙河。一南運河。一北運河。一天津海口。一千里長隄。此九者均不可緩之要工。請飭部先撥銀一百二十萬兩。從之。閏七月。命協辦大學士仍留直隸總督之任。五年倭銛六十生辰。賜

御書宣勤篤祐扁額。及福壽字並壽佛如意各物。五月議上長隄善後事宜六條。上諭速行。六月。授體仁閣大學士。是年禦黃壩以南運道淤甚。江廣各幫糧船留滯者一百九十餘萬石。既盤運北來。而天津北河至通州。又多古淺新淤。上以爲遲。至冬令水落難行。若北風驟起。必連檣凍阻。迭飭攸銜爲計。十月。奏接運滯漕已全數入直隸境。上嘉之。十一月。召回京。命在軍機大臣上行走。管理刑部事務。六年三月。充會試正考官。十二月。充經筵講官。七年三月。上以河湖交敞。運道不通。命攸銜往勘。尋奏清水不能敵黃。督臣琦善。因開王營城壩。挑濬正河。而下游關孟兩灘。俱膠淤。該督泥於逢灣。取直成法。並力主隄南同知唐文馨兩灘並挑之說。致黃水倒漾。糜帑殃民。五月。罷琦善兩江總督。命攸銜以大學士代之。攸銜具疏辭謝。不許。嘉慶十五年七月。以西陲用兵。四城克復。加恩軍機大臣。攸銜晉太子太保。八年正月。西師報捷。生擒逆裔張格爾。以攸銜在軍機大臣上行走。贊襄軍務。晉太子太傅銜。五月。以全漕渡黃。下部議敘。九年四月。署漕運總督。十二月。署河道總督。十年二月。御史王贈芳奏陳課歸場鹽之法。事下攸銜等會議。攸銜言。臣與兩淮鹽政福森。再四籌之。有不可行者六。兩淮鹽場墾地。多極貧之戶。而嗜利之心。十倍於長法。若買鹽之銀。先入其手。非以多報少。卽有售無徵。及欠課不完。雖日日追比。百不償一。其不可行者一。淮鹽引地最大。如河南之光州汝寧。湖北之襄陽宜昌荊門安陸。湖南之衡州永州寶慶。江西之贛州吉安建昌。道遠則運艱。商人必裹足不前。鄰私益售。官引益滯。鹽積而不銷。焉能使窮鹽照額納課。其不可行者二。場鹽透漏私鹽久矣。今若不憑引目。聽其轉販。則透漏更多。而販私無課。人皆私而趨之。場員官卑役少。防範難周。不但不能化私爲官。轉恐驅官爲私。而匪徒壟斷馬頭。益無所忌。其不可行者三。向來鹽課歸商。鹽丁只納折色。蠲緩之年。在折色而不在鹽課。若課歸鹽戶。則一遇偏災。刁頑卽有所藉口。額課幾歸無著。其不可行者四。鹽場數十。皆濱海斥鹵之區。居民寥落。場官旣難於徵。更難於守。若築城建庫。不特無此經費。亦且無此政體。若隨徵隨解。則日日愈差。程程護課。煩擾甚矣。其不可行者五。淮南之有根窩者。每次給單十綱。以單質銀。得千數百萬。爲辦運資本。若根窩廢。則質單卽成廢紙。恆業頓失。生計立窮。其世業鹽務之捆工箕秤。

鈎楯杖帚等。又不下數十萬人。遽令星散。必至流離。亦非仰體聖主子惠元元之至意。其不可行者六。奏入。報聞。閏四月。諭曰。有人密陳。兩淮巨梟黃玉林。以儀徵老虎頸水次。爲匪聚籌運之所。以湖北之陽邏江西之藍涇爲屯私發賣之處。大者沙船由海入江。小者貓船由場河入瓜口。器械林立。輻輳轉運。長江千里。呼吸相通。甚則劫掠官鹽。每次以數百引計。資本既多。黨羽益衆。立約束以要結人心。且於大小衙門。俱有耳目。上官爲屬員蒙蔽。下僚以畏葸偷安。所獲者不過肩挑負販。零駁小梟。張大其詞。藉此爲官弁升遷之地等語。巨梟肆行。地方官豈竟毫無聞見。若恐查拏激變。相率容隱。是不但爲害鹽務。必致釀成他變。蔣攸銛接奉此旨。務當不動聲色。先將黃玉林一犯拏獲。嚴究黨羽。盡絕根株。既不可輕率偵事。亦不可任令潛逃。尋奏。臣前以儀徵縣有梟販潛蹤。請將流陽知縣王用賓調署。以其緝捕勤能也。頃聞黃玉林聲勢已重。非一縣令所能制。而老虎頸濱臨大江。若用兵力。必走漏風聲。非畏罪遠逃。卽聚衆拒捕。因密委常州營游擊金萬全潛往誘擒。五月。奏黃玉林率駁犯八名。船十二隻。私鹽三萬七千斤。赴官自首。願立功贖罪。兩淮私販甚多。正須以次翦除。若令黃玉林作線偵捕。未始非靖私疏引之機。揚州總散各商。俱願聯名結保。懇恩寬其既往。予以自新。如該犯不能立功。仍重治其罪。八月。黃玉林復圖販私。潛與其黨伍步雲書。爲江寧協副將惠普恩所獲。攸銛與新任總督陶澍。聯銜奏請。將黃玉林改發新疆。復恐其到配潛回。致貽後患。遂單銜密奏。請卽行處絞。諭曰。黃玉林反覆無常。自外生成。著卽行正法。蔣攸銛辦理此案。事前既無主張。事後又復苟且。以大學士膺封疆重寄者。固應如是耶。下部嚴加議處。部議革職。上加恩以侍郎降補。九月。補兵部左侍郎。十月卒。照尙書例賜卹。諡文勤。著繩樞齋集。黔軹紀行集。

陸建瀛

陸建瀛。字立夫。湖北沔陽州人。道光二年進士。改翰林院庶吉士。三年散館。授編修。九年。充會試同考官。十年。充文淵閣校理。十二年三月。充會試同考官。五月。充雲南鄉試正考官。六月。丁母憂。十四年。服闋。十五年閏六月。命

在南書房行走。七月。充山東鄉試正考官。十六年正月。命在上書房行走。三月丁父憂。十八年十月。服闋。十二月。陞右春坊右贊善。十九年二月。遷右中允。大考二等。陞翰林院侍講。尋署日講起居注官。六月。轉侍讀。二十年二月。京察一等。記名以道府用。三月。授直隸天津道。二十二年。以英吉利船竄擾浙江。各海口戒嚴。建瀛在天津籌辦防堵出力。下部優敘。並賞加按察使銜。尋遷按察使。仍留天津辦理善後事宜。二十三年。陞布政使。二十六年正月。擢雲南巡撫。八月。兼署雲貴總督。尋調江蘇巡撫。二十七年正月。兼署兩江總督。先是。戶部以南漕缺額。奏請於江蘇設局。官民捐米運京。以裕倉儲。兩江總督璧昌等。奏由海運京。上命妥議章程具奏。至是二月。建瀛偕璧昌奏言。納粟本爲古制。海運又有成規。但使經理得宜。自當聞風鼓舞。惟米價長落無常。當示以定數。運費雜耗多端。宜酌有定制。官司專其責成。以杜牽制。吏役嚴其禁令。以防阻撓。至米質必取乾潔。海面宜慎巡防。放洋或有折耗。應籌彌補。以足數。商船原准帶貨。似可變通而帶米。此外如風迅定期。關津免稅。探買之就近取便。運送之定限無遲。船戶之照案鼓勵。均宜詳覈定議。因條舉章程入奏。嗣復奏籌未盡事宜。一捐米運津。宜自備漕斛。與天津鐵斗。倉場木斛。呈驗米大臣較驗。以昭畫一。一由津赴通剝運。宜全雇民船。一海運糧米改用麻袋裝盛。黏貼印花。呈驗米大臣查對。均下部議行。四月。河南河決。給事中江鴻升疏請令江蘇督撫籌買米石。由沙船運至河南。上命建瀛等酌辦。尋奏言。江蘇頻年歲歉。戶鮮蓋藏。新穀尙未登場。若探買驟多。恐糧價增昂。於本境民食有礙。擬於藩運二庫籌款。先行探運十萬石。俟秋成後。再行酌辦。旋以歲收歉薄。奏懇蠲緩額漕。俱允之。並諭以統覈漕糧實數。酌分幾成。改由海運。尋建瀛等遵議請將蘇州松江太倉白糧。改由海運。下軍機大臣等議行。十月。奏請改蘇州府屬總捕同知爲衝繁難要缺。在外揀補。無錫縣知縣爲衝繁中缺。歸部銓選。如所請行。二十八年五月。奏請將兩江各員。應賠墊項。援照道光十五年分限攤賠例。接續起限。以期有著。從之。尋以各關徵銀虧短。應照舊例著落賠補。建瀛違例。請免場關例稅之半。降二級留任。九月。遵議奏減漕船幫費章程四條。一驗米請實成糧道。一開船請立定期。一米色請分別縣幫換易。一幫費請查照舊案酌給。下部議行。先是。御史

曹林堅疏劾建瀛奏保卓異人員劣跡昭著命吏部右侍郎福濟右庶子駱秉章馳往查辦十月查實覆奏建瀛坐姑容寬縱降四級留任初沛縣寨子堰被水冲刷建瀛請飭歸東河興修以紓民力嗣河東河道總督及軍機大臣議奏均以民修爲便二十九年正月建瀛復奏言極知改歸官辦經費攸關無如民田既淹與辦動須借款計日重運經臨當先其所急擬酌定段落勸民認修或借帑與辦攤徵還款允行時王大臣會議南漕政徵折色兩江總督李星沅遵旨覆議疏陳利弊上命建瀛參酌妥辦四月建瀛偕李星沅等以諸多窒礙奏覆如其所請尋陞兩江總督五月以洪澤湖水漲險工疊出偕江南河道總督楊以增奏請於下河築隄束水創立滾壩引使歸海又以江寧揚州蘇州常州等屬圩圍被冲糧價騰貴疏陳招徠商販籌辦賑卹並疏消積水均從之七月遵旨裁汰河工冗員奏請裁場運通判丹陽縣丞靈璧縣主簿銅山縣呂梁供巡檢下部議行時楊以增以黃水盛漲吳城七堡危險奏請開六堡洩黃減漲得旨俟積漲稍退立即趕築建瀛復疏言河工積習類多偷減料物一遇水長卽議開壩是於先事豫防之法殊未講求奏入上是之八月以江蘇被水較廣災象已成請籌撥銀一百五六十萬兩以備賑卹允之尋遵旨奏覆兩江庫虧清查全數並疏言近年江蘇元氣未復銀價日昂催徵之難倍於曩時地方官竭力張羅無非東挪西掩今澈底查明原不難將虧欠最多各員盡寬之法第清查本意首在杜絕新虧補苴舊欠若操之過急卽有鹵莽滅裂之虞諷之稍寬又成江河日下之勢措置之難莫甚今日惟有破除情面謹守章程比及三年總期漸臻完善報聞時浙江洋盜陳雙喜營聚東甯山洋面伺劫商船建瀛檄上海縣知縣王紹復與千總胡維榮協力掩捕破其巢奏入上嘉其調度有方下部優敘十月以所屬水災捐銀備賑復下部優敘尋奏高淳縣被災較重請展給半月口糧以資接濟允之又以江海關口岸各國通商納稅餉江蘇巡撫傅繩勛疏請建造卡房巡船增添書役下部議行十一月以江西安徽各屬被水較重籌銀賑卹買米平糶偕巡撫費開綬王植具奏均如所議行時吳城六堡潰隄堵合遲延運道淤墊命戶部右侍郎福濟於典試江南事竣偕建瀛親往履勘尋偕福濟馳抵清江將六堡合龍運船渡黃情形查明入奏並疏陳通籌湖河大局

酌讓添塘避牐。以時啓開。各壩及對壩逼溜攻刷海口各事宜。均如所議行。三十年二月。以兩淮鹽務商引備銷。庫款支絀。奏請立限清查運庫。允之。並統籌淮南鹺務。略言鹽務疲敝。由口岸之不銷。不銷之故。在官價昂於私價。官本重於私本。而成本過重之故。又在銀價日貴。浮費日增。今欲暢官。必先敵私。欲敵私。必先減價。欲減價。必先輕本。欲輕本。必先大裁浮費。減攤科則。謹酌擬章程。一按舊科則。酌減外費。一酌復額引。加帶乙鹽。一永禁整輪。疏通銷路。一覈實岸費。由司酌解。一分岸運銷。利商便民。一綱食各鹽。科則盡一。一官定場價。以免居奇。一鹽包改捆。以杜夾帶。一矜恤災商。分年批補。一刪除繁文。以歸簡易。時鴻臚寺少卿劉良駒奏請變通淮南鹽務。宜仿准北改行票法。部議以所請與建廠前奏。大略相同。請敕下一併覈議。四月。遵旨駁覆。並陳見辦情形。將前議詳晰聲敘。奏入。下軍機大臣議行。又以給事中曹履泰奏請復根窩舊制。御史周炳鑑疏陳淮南改票。未可輕行。復遵旨體察情形議奏。並將曹履泰周炳鑑之議。逐層辨駁。疏入。諭曰。淮南鹽課。帑項攸關。該督綜理鹽務。實力講求。既經屏絕聚議。必係確有把握。即著寬成陸建瀛統籌全局。除弊興利。總期於國計民生。均有裨益。尋復疏陳新章未盡事宜。略言淮南疲敝之由。首在成本過重。而成本之重。有由折運案內科則增加者。亦有由運司衙門需索過甚。以及楚西糜費太濫者。臣所議章程。以應運之乙鹽。為新引之加斤。雖已攤輕成本。而運司書吏需索不除。楚西岸費浮糜不裁。仍屬無益。因議於揚州鼓局收呈納銀。以清運司衙門需索之源。於九江等處。驗照發販。以清楚西等省岸費之源。其把握則在正雜錢糧。同時並納。無虞課額之虧欠。新舊商販。一體准運。無慮引額之虛懸。至緝隨私。緝場私。專責江南。緝江私。緝鄰私。兼責各省。若招徠商販。收繳帑課。則臣實無旁貸。斷不敢稍有推諉。因臚陳具稟納課。減折引數。新綱科則。儀徵解捆。泰壩掣鹽。雇船運岸。苗疆酌帶。五岸科則。鹽價隨時禁除。黑費。鹽照編號。鹽照截角。司房歸併。舊鹽酌辦各條奏聞。先是。江運入岸之天長縣。係准北引地。嗣因准北行票。恐侵灌淮南。仍留商運。至是奏請復歸准北。統行票鹽。無論新舊商。俱不得作為專岸。均下部議行。方准鹽新法試行之始。上以裁減浮費。必不便于貪蠹官吏。諭建瀛查有掣肘阻撓之具。即行參辦。旋訪聞湖北鹽道

鄒之玉不遵永禁整輪辦法。江西鹽道慶雲需索月費。奏請查辦。允之。五月以蘇州府常熟昭文二縣境內河道間多淤塞。其出水之海口石閘。易於傾圮。請移建適中之地。如所請行。六月。漕運總督楊殿邦奏准揚運河水淺。漕船阻滯。命建瀛嚴飭員弁挖空。建瀛偕楊以增奏稱。運河水勢有贏無絀。勿庸議挑。惟江西各幫。行抵瓜洲已遲。咨商漕臣。提灌二塘北上。楊殿邦未允。以致轉多守候。上以建瀛等各執己見。動輒齟齬。嚴飭之。先是。傅繩勛以漕額日減。輒回無術。請將蘇州松江太倉三屬額糧改折。上命建瀛會同妥議。九月。建瀛以會議需時。新漕請仍照舊章辦理。並奏陳窒礙情形。應緩前議。詔如所請。初。建瀛在江蘇巡撫任內。偕兩江總督李星沅奏籌江蘇水師巡洋事宜。以狼山鎮總兵統巡內外洋。請改令蘇松鎮總兵春秋統巡外洋。夏冬統巡內洋。福山鎮總兵夏冬統巡外洋。春秋統巡內洋。輪值之。總兵常川寄棹崇明縣之黑河灣洋面。稽查策應。仍派參游帶領兵船。輪守余山要隘。十一月。復遵旨查覆。奏言。自定新章後。屢次獲盜。擄船。匪徒斂跡。請仍照新章。得旨。既有成效。自應不必更張。咸豐元年四月。遵旨訊明湖北同知勞光泰奉差催鹽。以船戶肆市無據之言。作為移岸三論。刊板傳播。阻撓掣制。奏請革職。五月。以揚州私梟出沒。州縣諱飾消弭。奏請將揚州府屬販私人犯。由運司勘詳。均允行。閏八月。楊以增奏黃河水勢日長。高過隄頂。豐北三堡漫水。隄身坐墊。諭建瀛嚴督廳汛。趕緊盤裹。旋以續經塌漫。掣動大溜。正河斷流。居民被淹。下部議處。初。建瀛疏請崇正學以黜邪教。上以性理諸書。均為導民正軌。諭各督撫。飭屬實力講習奉行。至是。建瀛刊御纂性理精義。聖諭廣訓直解進呈。並擬定宣講章程。教官課士。書院授徒。均加試性理論。並請特頒欽定四字韻文。以正蒙始。上嘉允之。又會勘豐北漫口工程。奏請以工代賑。十二月。戶部尚書孫瑞珍以海運著有成效。請將新漕援照辦理。詔建瀛妥籌。尋奏將蘇州松江常州鎮江太倉五屬糧米。改歸海運。如所議行。二年四月。倉場侍郎朱燾。以豐北漫口尚未合龍。恐南北運道阻隔。請敕催河運漕糧。上命建瀛體查情形。趕緊籌辦。旋偕楊以增奏。豐北興工後兩次走占。復因水勢陡長。西壩又塌。三占金門。業已刷深。夏汛不時漲發。請於霜降後補築。並自請嚴加治罪。上諭楊以增革職。暫留工次督辦河務。陸建瀛降為四品頂

帶均責令秋間堵築合龍。以觀後效。五月。籌辦黃河歸海之路。分飭廳管將邵宿運河開壩展拓。一律疏暢。並加培緯隄。安設水撥估挑替河。奏入報聞。六月。遵籌漕運事宜。以東河水勢驟長。重運難輓。奏請分別變價。海運酌量起卸。辦賑截漕抵餉。俱如所議。行。尋以漕行遲誤。由豐工未能合龍。下部議處。七月。奏請截留江廣尾幫漕糧備賑。上允留湖南米十三萬六千四百餘石。時洪秀全等。由湖南進湖北。漢陽武昌相繼陷。勢將蔽江東下。十二月。賞還建瀛頭品頂帶。授爲欽差大臣督師。赴江西九江上游扼守。三年正月。敵由水路攻九江。遣兵迎擊失利。城陷。建瀛遽退保江寧。自請治罪。上責其毫無布置。命先行革職。仍責成防守江寧。並派兵援應安徽。尋敵由九江而下。江寧將軍祥厚偕副都統霍隆武提督福珠洪阿布政使祁宿藻以建瀛棄險失機。進退無據。並江蘇巡撫楊文定奉旨保守江寧。亦率行退回鎮江。據實奏劾。諭曰。陸建瀛總督兩江。朕特授爲欽差大臣。令其馳赴九江上游防堵。乃遲之又久。方抵九江。且以水路行走不爲迂緩自解。未及調度周妥。而賊蹤已至。一戰兵潰。不知收合餘燼。與向榮大軍合力攻擊。並不知力守小孤山。扼賊入皖之路。又不親督官兵。據守東西梁山。爲金陵保障。遽行折回江寧。以致省城紳民驚擾。紛紛遷徙。嘗經祥厚等函屬陸建瀛。仍赴上游迎擊。乃安坐督署三日。並無回信。當此危急之時。同城文武。竟不能面商防禦事宜。巡撫楊文定。遂藉詞防守鎮江。即行出省。民情更增惶惑。封疆大吏。遇事張皇失措。退縮自全。均屬罪無可道。朕因陸建瀛若不退回江寧省城。楊文定何至藉詞出守。鎮江合城紳民。又何至紛紛驚徙。既據祥厚等合詞參奏。陸建瀛辜恩昧良。厥罪尤重。著即交祥厚傳旨鞫問。委員解交刑部治罪。二月。籍其家。並革其子鍾漢刑部員外郎職。是月。江寧城陷。建瀛遇賊被害。六月。兩江總督怡良以聞。上以建瀛尙未失城亡與亡之義。賞還總督銜。並賞還家產。

實業 交通

端方 榮端錦

第三編實業 交通 端芳

端方字午橋。托忒克氏。滿洲正白旗人。由蔭生中舉人。入賞爲員外郎。遷郎中。光緒二十四年。出爲直隸霸昌道。京師創設農工商局。徵還筦局務。賞三品卿銜。上勸善歌。稱旨。除陝西按察使。晉布政使。護巡撫。兩宮西幸。迎駕。設行在。調河南布政使。擢湖北巡撫。二十八年。擢湖廣總督。三十年。調江蘇。攝兩江總督。尋調湖南。顯志興學。貴。遣出洋學生甚衆。逾歲召入覲。擢閩浙總督。未之官。詔赴東西各國考政治。既還。成歐美政治要義。獻上。議政立憲自此始。三十二年。移督兩江。設學堂。辦警察。造兵艦。練陸軍。定長江巡緝章程。聲聞益著。宣統政元。謁直隸。孝欽皇后梓宮奉安。端方輿從。橫衝神路。農工商部左丞李國杰劾之。坐違制。免。既而御史胡思敬又彈其貪橫。凡十罪。事下張人駿覆奏。入。以不治崖檢被訶斥。因已罷官。貨勿問。三年。命以侍郎督辦川漢粵漢鐵路。時部議路歸國有。而收路章程。湘川不一致。川人大譁。川鄂爲黨人所萃。乘機發動。端方行次漢口。亟入川。並劾川督趙爾豐操切。命率師往按。尋詔代攝其事。所過州縣。輒召父老宣諭威德。至夔州。所部鄂軍皆變。軍官劉怡鳳率衆入室。語不遜。端方以不屈遇害。端方性通悅。不拘小節。篤嗜金石書畫。尤好客。建節江鄂。燕集無虛日。一時文采幾上希畢沅云。弟端錦。字叔綱。河南知府。赴東西各國考路政。著日本鐵道紀要。從兄入川。變作。以身蔽其兄。極口晉軍士無良。同被殺。事聞。贈端方太子太保。諡忠敏。端錦諡忠惠。

盛宣懷

盛宣懷字杏蓀。江蘇武進人。以諸生納賞爲主事。改官直隸州知州。累至道員。嘗贊置輪船招商局。開採湖北煤鐵礦。李鴻章頗信任之。英商擅築鐵軌。首選逕寶山訖吳淞。上海道數阻弗聽。宣懷與英官梅輝立折辯。償銀廿八萬有奇。始歸於我。光緒五年。署天津道。時鴻章督畿輔。方嚮新政。以鐵路電報事專屬宣懷。宣懷以英丹所設水陸綫漸侵內地。迺集費設津滬陸綫。建電報學堂。並援萬國公例與爭。始克釐定條款。會訂水綫相接合同。於是與輪船招商同爲商辦兩大局。八年。英法德美議立萬國電報公司。增造自滬至香港水綫。壟斷利權。宣懷復

勸集華商自設緣海各口陸綫以絕覬覦。十年。署天津海關道。會法越擗。海防急。迺移金州礦。治蘇浙閩粵。電綫便軍事。而部議指爲含混。科以降級調用。左宗棠爲言於上。事下南洋大臣曾國荃等上其續狀。始改留任。十二年。授山東登萊青道。法領事林椿詣煙臺。與訂越南北圻綫約。朝旨既報可矣。而張之洞執言不可行。宣懷曰。今瓊春海蘭泡欲接俄綫。俄方有挾求。法既許接綫。彼必易就範。且英丹皆與約。奚拒法。總暑然之。果不數年。而俄約成。十八年。除真。滬上織布局廠災。宣懷籌設華盛織廠。復任鄂漢冶鐵廠。於。是之洞賞其才。與王文韶交薦之。遂擢四品京堂。督辦鐵路總公司。入覲。奏言築路與練兵理財育才互爲用。並請開銀行。設達成館。稱旨。補太常寺少卿。與比訂貸款草約。二十四年。詔趣造粵漢路。宣懷建議。貸美款歸自辦。具改歸商辦本末以上。而言者盛毀其所爲遲滯。被訶責。宣懷具報曲折。上乃慰而勉之。宣懷自請解職。仍留京會議洋貨稅則。已而徐桐劾兩局有中飽。適剛毅按事南下。銜命察覆。宣懷具以實對奏。上勉之。二十六年。拳禍作。各國兵艦紛集江海各口。宣懷倡互保議。電粵江鄂閩諸疆吏。獲同意。遂與各領事訂定辦法九條。世所稱東南保護約款是也。又電奏請下密詔平亂。發國電國書。懲禍首。卹五忠。所言動關大計。事甯。加大子少保。除宗人府府丞。明年。充辦理商稅事務大臣。以和約既成。償費過鉅。迺奏豫籌四策。而注重加稅。復以償款稱息負累劇。請婉商各國分攤免息。嗣與各國商加稅免釐。議垂成。英忽中悔。厥後宣懷數續議。仍無效。是歲。奏設勘礦總公司。越二年。而有爭粵漢廢約事。滬甯蘇杭甬踵之。衆大譁。詔禁宣懷干預。命唐紹儀代督兩局。宣懷遂奏罷鐵路總公司。後四年。浙路事益棘。上終以宣懷諳諸路政。復召見問籌策。宣懷言既借款。不應令商造。既商造。不應再借款。民情可用不順用之。恐激變。上是之。拜郵傳部右侍郎。命甫下。而浙路總理湯壽潛因言宣懷短請離路事。壽潛獲嚴譴。宣懷亦不復久居中。仍命詣滬辦商約。宣統改元。奏言推廣中央銀行。先齊幣制。附陳辦法成式。逾歲。命充紅十字會會長。先是。日俄戰爭。宣懷與呂海寰等謀加入瑞士總會。中國有紅十字會自此始。既拜命入都。時朝廷方整麗幣制。遂救遷郵部本官。參與度支部幣制事。督尙書。數上封事。先是。給事中石長信疏論各省商民集股造路公司弊害。

宣勅部臣將全國幹路定爲國有。其餘枝路仍准各省紳商集股自修。諭交部議。宣懷復奏言中國幅員廣袤。邊疆遼遠。必有縱橫四境諸大幹路。方足以利行政。而握中樞。從前規畫未善。致路政錯亂紛歧。不分枝幹。不量民力。一紙呈請。輒准商辦。乃數載以來。粵則收股及半。造路無多。川則倒帳甚鉅。參追無着。湘鄂則開局多年。徒供坐耗。循是不已。恐曠日彌久。民累愈深。上下交受其害。應請定幹路均歸國有。枝路任民自爲。曉諭人民。宣統三年以前。各省分設公司集股商辦之幹路。應卽由國家收回。亟圖修築。悉廢以前批准之案。川湘兩省租股並停罷之。於是有鐵路國有之詔。並起端方。充督辦粵漢川漢鐵路大臣。宣懷復與英德法美四國結借款之約。各省聞之。羣情疑懼。湘省首起抗阻。川省繼之。湘撫楊文鼎川督王文先後以聞。詔切責之。諭嚴行禁止。儻有匪徒從中煽惑。意在作亂者。照懲治亂黨例格殺勿論。宣懷又會度支部奏收回辦法。請收回粵川湘鄂四省公司股票。由部特出國家鐵路股票換給。粵路發六成。湘鄂路照本發還。川路宜昌實用工料之款四百餘萬。給國家保利股票。其現存七百餘萬兩。或仍入股。或與實業。悉聽其便。詔飭行。四川紳民羅綸等二千四百餘人。以收路國有。盛宣懷端方會度支部奏定辦法。對待川民。純用威力。未爲持平。不敢從命。人文復以聞。再切責之。趙爾豐等復奏川民爭路激烈。請仍歸商辦。不許。川亂遂成。而鄂變亦起。大勢不可問矣。資政院以宣懷侵權違法。罔上欺君。塗附政策釀成禍亂。實爲誤國首惡。請罪之。詔奪職。遂歸。後五年卒。宣懷有智略。尤善治賑。自成豐季葉畿輔被水。菑嗣是而晉邊。而淮徐海。而浙。而鄂。而江皖。皆起募款籌賑撫。因封剿受菑之故。益究心水利。其治小清河利尤溥。以實業起家。

第四編 學術

理學

呂留良

呂留良字莊生，別號晚邨，浙江石門人也。幼有異稟，穎悟絕人。八歲善屬文，十二歲即與里中人爲社，一時名宿皆避其鋒。時國勢岌瀕，內外交訖，卽慨然有經世之志。未幾，李自成陷北京，烈皇帝崩於亂，留良哭臨甚哀。或過而勞之，曰：莊生何太自苦？留良正色曰：今日天崩地坼，神人共憤，君何出此言也？於是散萬金之家以結客，往來湖山之閒，跋風涉雨，備嘗艱苦，其詳不可得聞。然怨家嘗以是訐之，其從子亮功，獨自引服，亮功竟論死，而留良幸存。隱於醫，嘗提囊行市，遠近爭求之，乃歎曰：豈可令人更識韓伯休耶？願身益隱，名益高。戊午歲，有宏博之舉，浙省大吏以留良薦，自誓必死，以免。其後三年，郡守又欲以隱逸舉，留良聞之，噴血滿地，乃於枕上翦髮，雙僧伽服，曰：如是，庶可以舍我矣。更法名曰耐可，字不昧，號何求老人。留良於諸儒語錄，佛老家言，靡不究極，其是非，於朱子之書，信之最篤，故其教人大要，以格物窮理，辨別是非爲先。其友桐鄉張考夫以書來曰：行年卽同衛武，已去其半，中夜以興，橫渠猶將不及，事固有大於此者，乃爲無益身心，有損志氣之事，耗精神而廢日月，且將久與汗濁中，苟盜浮名者，流動若絮，長角勝者，私心竊不爲兄甘之。留良曰：道之不明也久矣，今欲使斯道復明，舍目前幾個讀書識字秀才，更無可與言者，而舍四子書之外，亦無可講之學。又疾世之講學者，多以聲利相招集，以爲學者當先從出處去，就辭受交接處，畫定界限，札定腳根，方可下手入德，而負塗之豕，往往害其潔身，院行而警之，然究於留良無損也。自傷幼孤，不逮事其父，祭祀必盡其誠，不以病憊自免。甲辰有故人死於西湖，爲位以哭，壞牆裂竹，擬於西臺之慟，已而葬於南屏山石壁下。他日過其墓，猶作詩曰：僧帽故人今不識，酒樓往事老難忘。癸亥忽賦祈死詩六篇，詞音淒厲，斯可哀已。竟以是年八月十三日沒。病革神明不亂，徐曰：我此時鼻息閉氣。

有出無入矣。言畢。叉手安寢而逝。距生崇禎己巳正月二十一日。享年僅五十有五。

王夫之

王夫之。字而農。號薑齋。湖南衡陽人。兄介之。邃於經學。明亡。匿不復出。著有周易本義質四卷。詩經邊序十卷。春秋四傳質十二卷。夫之少負備才。讀書十行俱下。與兄介之同舉崇禎十五年鄉試。流賊張獻忠陷衡州。設僞官招夫之。夫之走匿南嶽雙髻峯下。賊執其父爲質。夫之引刀自刺肢體。昇往易父。賊見其創也免之。父子俱得脫歸。既而何騰蛟屯湖南。堵允錫屯湖北。不相能。夫之上書章曠請調和兩軍。曠不能用。順治四年。大兵下湖南。夫之入桂林。依大學士瞿式耜。嘗三上疏劾王化澄。化澄欲殺之。會有救者得不死。聞母病。乃間道歸。築土室石船山。名曰觀生居。杜門著述。其學深博無涯涘。以漢儒爲門戶。以宋五子爲堂奧。所作大學衍中庸衍。皆力闢致良知之說。以羽翼朱子。而於正蒙一書。尤有神契。精繹而暢衍之。爲正蒙注九卷。思問錄內外篇各一卷。以爲張子之學。上承孔孟之志。下救來茲之失。如皎日麗天。無幽不燭。聖人復起。未之能易。惟其門人未有。殆庶世之信從者。寡。道之誠然者。不著。是以不百年而異說興。又不二百年而邪說熾。因推本陰陽法象之狀。往來原反之故。反覆辨論。所以歸咎上蔡象山姚江者甚峻。所著諸經。有易書詩春秋稗疏共十四卷。其說易不信陳搏之學。亦不信京房之術。於先天諸圖及緯書雜說。排之甚力。而亦不空談元妙。附合老莊之旨。其說尙書詮釋經文。多出新意。駁蘇軾傳及蔡傳之失。大都辭有根據。不同游談。其說詩辨正名物訓詁。以補傳箋諸說之遺。不爲臆斷。辨叶韻一篇。持論明通。足解諸家之膠轕。其說春秋考證地理。多可以糾杜注之失。清朝經學繼起者。無慮百十家。然諸家所著。有輒爲夫之所已言者。後人彙刊之爲船山遺書。康熙間吳道在衡州。夫之又逃入深山。吳逆平。巡撫鄭端嘉之。餽粟帛請見。夫之以病辭。受粟反帛。三十一年卒。年七十四。特悔內儒碩推餘姚黃宗羲崑山顧炎武。夫之多聞博學。志節皎然。世謂相亞云。所著有周易內傳十二卷。發劄一卷。周易大象解一卷。周易稗疏四卷。周

易考異一卷。周易外傳七卷。書經稗疏四卷。尚書引義六卷。詩經稗疏四卷。詩經考異一卷。詩說命五卷。禮記章句四十九卷。春秋稗疏二卷。春秋家說七卷。春秋世論五卷。續春秋左氏博議二卷。四書訓義三十八卷。四書稗疏二卷。四書考異一卷。讀四書大全說十卷。說文廣義三卷。讀通鑑論三十卷。宋論十五卷。張子正蒙注九卷。思問錄內篇一卷。外篇一卷。侯解一卷。墨夢一卷。黃書一卷。誠小錄一卷。老子衍一卷。莊子解三十三卷。龍溪夜話一卷。愚鼓歌一卷。相宗絡索一卷。楚辭通釋十四卷。薑齋文集十卷。詩集十卷。詩餘三卷。詩話三卷。外集四卷。次堂永日八代文選十九卷。共計三百二十四卷。

彭士望

彭士望。字遠生。又字躬庵。一字樹廬。江西南昌人。明諸生。少與新建歐陽斌元相屬。爲有用之學。父哲。聞漳浦黃道周平臺召對語。歎曰。鐵漢也。臨卒。語士望師之。道周爲江西布政都事。以黨禍逮。士望周旋緹騎間。慷慨不撓。明年。太學生徐仲吉上疏訟道周冤。並下獄。辭連士望。幾不測。道周論戍。事乃解。史可法督師揚州。招士望。斌元已先在。士望至。則進奇策。請用高左兵。清君側之惡。斌元助之。可法不能用。遂辭歸。會金聲桓入南昌。士望乃率妻子走寧都。贛州破。故職方司主事楊廷麟。以孤屬諸生彭銀。錫死。孤爲兵所掠。士望贖之。遂與同郡林時益。依魏禮兄弟居翠微峰。講學易堂。與程山謝文滄。晉山宋之盛。諸人相往復。嘗攜其子壻。讀書程山。獨孤之琴臺。與文滄論學爲日記。其學以陽明念庵爲宗。謂從二先生書。以仰溯周程朱陸。其源無不同者。其有不同。僅循途之蹟。或舟或車。或馬或步。然並達於所詣之地。又謂陽明致良知。體用完備。從萬死一生得來。非可倖致。念庵表之曰。世間那有現成良知。此最足救龍溪輩狂禪之弊。晚講求實用。與之盛書曰。天下五六十年。患虛病極矣。其下者不足言。文章經義。名譽氣節。皆虛病也。相延而至於理學之議論。鄂廡。經濟之影響。雲霧。袞袞坐談。行義高舉。願爲世之龍肉醴泉。而不能爲世之布帛菽粟。於民生之酷烈。飢寒。氣運之傾危。陷溺。則相與從容拱手。特虛美

以救之。謂可以易天下。亦徒見其迂疏憤亂。至困弊而莫之救。而相隨以死也。其真欲救之者。亦惟覈名實。黜浮僞。專事功。省議論。畢力於有用之實學。膽識以充。器量以宏。精神以斂。博雜以去。疆力以優。以生爲寄。以死爲歸。以濟整爲家。以忠信才敏之友爲性命。操練精熟。寵辱不驚。庶足以任宇宙之大常大變。無所於撓耳。時之盛文。沛頗不謂然。士望自信益堅。不自悔也。生平嗜朋友。海內宿望。結納殆徧。規諍過失。踈切深痛。而樂道人之善。至老不衰。著有手評春秋五傳通鑑。及詩文集二十八卷。卒年七十四。

王宏撰

王宏撰。字無異。一字山史。陝西華陰人。明南京兵部侍郎之良子。少與兄宏學。宏嘉互相師友。博雅能古文。尤深於易。隱居華山下。築讀易廬居之。其論易。闡焦京之術。闡周文之理。推本經義。一以朱子邵子爲歸。尤究心濂洛關閩之學。嘗以周子無極之說。陸九淵爭之於前。朱子格物之說。王守仁軋之於後。宏撰則謂格物當以朱子所注爲是。無極則以陸九淵所辨爲是。又謂崇朱學者。稱先朝之亂。由於學術不正。其首禍爲陽明。崇陸學者。稱無極二字出於老子。爲周子真贖竇犯。其說皆爲太過。又謂陽明之定論。予不敢以爲定。篋墩之道。予不敢以爲一。即陳建之通辨。亦間有已甚之詞。又謂學者爲學。以平心靜氣爲第一義。凡讀書論人。當求其實。爲吾所最尊之人。或有一失。不必爲之掩。爲吾所深排之人。或有一得。不必爲之廢。本諸天地之理。證諸聖賢經傳。反之。爲心惟求其是而已。初與李因篤不識。一日邂逅長安茶肆。各以意擬姓名。及詢之。皆不謬。遂定交焉。崑山顧炎武偏觀四方。至華陰。謂秦人慕經學。重處士。持清議。他邦所少。欲定居。宏撰爲營齋舍。炎武曰。好學不倦。篤於朋友。吾不如山史。嘗一至延安。著延安屯田議。謂今延安綏德宜君等處。各設兵防。人不下數千。大亂之後。閒田頗廣。誠諭令所在地方有司。並鎮守將官。一心規畫。設給牛糧。每軍一人。量給閒田若干。務有餘裕。期年之間。將變荒磧爲豐壤。易流徙爲樂康。足食足兵。莫善於此。又著延安紡織議。謂延安布帛價貴於西安數倍。生計日蹙。國稅日

道。非盡其民之情，無教之紡織者耳。今當於每州縣各發紡織具，令有司依式造成，散給里下募外郡能織者爲師，即以民之勤惰工拙爲有司殿最。一二年間，民享其利，將自爲之，不煩程督矣。康熙十八年，舉博學鴻儒，徵至京師，居城西昊天寺，不謁貴游。左都御史魏象樞招之，亦不往。遂以老病不能試罷歸。卒後，睢州湯斌題其像曰：胸懷端穆，立行介確，蓋具經綸天下之才，而退藏不見其崖略也。其推挹如此。古文簡潔有法，汪琬稱其得史遷遺意。當時關中碑誌，非三李則宏撰，而宏撰工書法，故尤多於三李焉。

周夢顏

周夢顏，一名思仁，字安士，崑山諸生。博通經藏，深信因果，居常念言：衆生蚩蚩，造無量罪，淫殺二業，實居大半。古今世典，懲勸頗詳，不斷其源，川壅則潰，爰竭苦衷，深維經義，扶微洞幽，披山擣穴，勒成二書，戒淫與殺，其戒殺書言多深痛，大要云：刀兵之難，在於人道，或數十年，或百餘年，僅一二見，至於畜生無日得脫，普天之下，一遇雞鳴，無量無邊，狼心屠戶，手執利刀，奮向羣豕，爾時羣豕自知難到，大聲哀號，救援不至，各被彼人裂腹刺心，抽腸拔肺，哀號未斷，又投沸湯，受大苦惱，片刻之間，閻浮世界，萬萬生靈，頭足異處，積羣豕骨，過高山巔，漂羣豕血，赤江水流，如是惡因，如是惡果，詰其根由，皆爲我等口腹所致，世人動稱我不作惡，何必持齋，豈知爾等偃息在牀，妻孥聚首，即有素不相識之人，先爲汝等徧造惡業，無量無邊，諸佛菩薩神通天眼，見諸衆生，輪迴大趣，如旋火輪，或爲大身，更相殺食，或爲細身，更相殺食，或爲父母六親眷屬，更相殺食，發大悲心，說真實語，導彼迷途，開爾覺路，我勸世人未能持齋，先須斷殺，孟子有言：仁者人也，人不信佛，何不信人，若信是人，何不斷殺，仁則不殺，殺則非仁，諦聽吾言，免入異類，夢顏每過一切神祠，必祝願云：惟願尊神發出世心，勿受血食，一心常念阿彌陀佛，求生淨土，思仁自今二十四歲，直至壽盡，中間若殺一小魚蝦，願尊神是糾是殛，迅雷擊碎所著書板，思仁自今二十四歲，直至壽盡，家中眷屬，若有一人，傷一蚊蟻，亦同此誓，思仁自今二十四歲，直至壽盡，中間若遇身及眷屬，

嬰諸重病。忽一仙人來告之言。投一小鈴於沸湯中飲之。則生。不然則死。以貪生故。竟從其言。亦同此誓。思仁自今二十四歲。直至壽盡。倘有毒蛇噬我垂斃。家衆憤憤欲殺此蛇。而我不能極力救阻。亦同此誓。思仁自今二十四歲。直至壽盡。臨河見魚。仰面見鳥。不思救度。反萌殺機。亦同此誓。思仁自今二十四歲。直至壽盡。若夢寐中見人殺生。不能至心稱佛名號。發救度心。而反歡喜贊成其事。亦同此誓。其戒淫書勸諸淫者。先觀胎獄。了種種苦。是謂患淫原始方便。繫以偈曰。父母未生時。因業多掛帶。一點無明根。見慾生貪愛。淫心纔一起。忽被精血蓋。從此十月中。次第還宿債。母嗽熟食時。如受鑊湯煎。母飲冷水時。若臥寒冰塊。腹中常飽滿。頂上懸鐵袋。五內如飢虛。空洞失依賴。會當出胎時。翻身若旋岱。產母忽墮眩。眷屬盡惶駭。身逼兩山中。熱窄不可耐。穩婆牽其頭。痛極心肝碎。嫩顏扼麤手。刀劍無能賽。放聲嗚其哀。旁人乃稱快。豈知稱快人。經過忘悔艾。昧昧極思量。咄咄詫災怪。此言非虛說。五王經所載。凡夫戀慾榮。輾轉沉黑穢。生生受煩惱。曾見何人代。欲破煩惱軍。智者擒其帥。主帥是淫魔。魔死餘兵敗。我將胎形慘。屈指陳其概。珍重世間人。可一不可再。次觀此身。諸蟲蟬集。宛轉遊行。食人腦髓。是爲初開不淨方便。繫以偈曰。穢哉血肉軀。無量蟲所萃。潛伏四大中。其形甚微細。凡夫不覺知。天眼方能覩。靜氣一返觀。男女真兒戲。次觀男女膿血。洩唾。惡露中滿。猶如溷廁。糞穢所都。是爲患淫對治方便。繫以偈曰。世間苦惱事。皆從愛慾生。愛心不能斷。對色形神傾。水從骨內出。火自心中騰。平時顧禮義。或復愛聲名。到此霎時間。開眼投深坑。鬼神且不畏。名教豈能繩。茫茫五濁世。獄訟滋繁興。幸有如來教。暗室懸明燈。示以不淨觀。慾火消爲冰。我從昔年來。亦復似摩登。多方用強制。對境還復萌。自作此觀後。結習日以輕。今者稍覺悟。歸命佛法僧。誓於未來世。埽盡羣魔兵。分身無量刹。普利諸有情。冰菴張夫子。誨我嘗叮嚀。其言修觀法。譬諸學庖丁。庖丁技成後。不見金牛形。用刀十九載。猶如新發硎。我此降魔劍。百鍊剛所成。斬盡妖容鬼。觸樓莽縱橫。西施捧膝坐。蔓草纏紫刺。三十六種物。到鼻知殮腥。此觀得成就。萬象都空明。爰述爲偈句。聞者應惕驚。齊心出苦海。濁世皎然清。次設九想。想初死人正直仰臥。寒氣徹骨。一無所知。而我此身。終亦如是。又想死人一二日往。黑氣騰溢。轉成青

紫。甚可怖畏。而我此身。終亦如是。又想死人尸停既久。黃水流出。臭不可聞。而我此身。終亦如是。又想死人徧體生蟲。處處鑽嚼。骨節之內。皆如蜂窠。而我此身。終亦如是。又想死人皮肉已盡。惟筋在骨。如繩束薪。而我此身。終亦如是。又想死人筋已爛盡。骨節縱橫。不在一處。而我此身。終亦如是。又想死人被火所燒。焦縮在地。或熟或生。而我此身。終亦如是。又想死人冢破骨出。日暴兩侵。其色轉白。或復黃朽。人獸踐踏。而我此身。終亦如是。次想經要。深自策發。經言菩薩。修於死想。觀其壽命。常爲無量。冤讎所繞。念念損滅。無有增長。猶山瀑水。不得停住。亦如朝露。勢不久停。如囚趣市。步步近死。如牽牛牛。詣於屠所。繫以偈曰。人想死亡日。慾火頓清涼。愚人若聞此。愁眉歎不祥。究竟百年後。同入灰燼場。菩薩九想觀。苦海大津梁。次念法華所說因緣。生相滅相。與不生滅。是爲斷淫窮源方便。繫以偈曰。衆生長苦果。菩薩斷惡因。惡因既已斷。苦果無遺根。譬如猛獅子。利鏃中其身。急顧發的處。獵戶羣波奔。犬若遭人繫。但向棒頭呻。一智視一愚。不啻霄壤分。又如止沸湯。爨者去其薪。十二因緣內。無明爲之君。一斷一切斷。淨掃鄰虛塵。次當觀佛坐寶蓮華。及諸種種莊嚴瑞相。發願往生西方極樂。是爲究竟解脫方便。繫以偈曰。修行無別法。出世爲究竟。出世有多途。淨土爲捷徑。述此觀想法。言言宗大乘。託質上品蓮。永遠脫怪筭。他諸辨難。究析因果。語多造微。行世者有愆悔回狂。萬善先資諸書。

朱用純

朱用純。字致一。江蘇崑山人。明諸生。父集璜。以諸生貢太學。清兵下江東。城陷。不屈死。用純恫焉。慕王裏攀柏之義。自號曰柏廬。授徒贍母。潛心宋儒書。其學確守程朱知行並進。而一以主敬爲程。長洲徐枋言。先須發悟而後可以言學。用純曰。聖賢之道。不離乎事事物物。即事事物物而道在。即事事物物而學生。苟欲先得乎道而後言學。則離道與事物而二之。亦析學與道而二之矣。又曰。聖賢之學。不外一敬。敬猶長隄巨防。滴水不漏。敬之至也。一敬而天下之理得。天下能事畢。變通鼓舞。盡利盡神。希望希天之學。俱在於是。居平精神寧謐。動止有常。晨起

謁家祠。卽莊誦孝經。友愛諸弟。白首無間。爲學戒十則。以教學者。雖祁寒酷暑。講論終日無倦容。已復作輟。講話曰。中庸成己成物。祇是一誠字統括。實實做得聖賢學問。不踰一分。實實盡得聖賢道理。不欠一分。方始是誠。余今自反。果能如是否。而欲妄居舉比。多見其不知量也。又曰。今人日用常行。無非種種惡習。人心中祇辦得卑鄙二字。倫理上祇辦得苟且二字。必須勤破從前魔障。跳出阨坎。更從上面探討精微。方可進道。諸君猛力向前。某亦願拜下風。何必鄙言是聽哉。鄉里爭曲直。得用純一言卽解。嘗曰。識得天理熟。當機立應。如離弦之矢。更不擬議。更不矜張。真是何思何慮。真是行所無事。病革。語弟子曰。學問在性命。事業在忠孝。言盡此矣。康熙二十七年卒。年七十二。著有刪補易經蒙引。四書講義。恥躬堂詩文集。無欺困衡諸錄。媿訥集。其家訓一篇。海內稱誦焉。同里弟子王喆生。能得其傳。

沈昫

沈昫。字朗思。原名蘭先。字甸華。浙江仁和人。明諸生。父之龍。以學行著聞。昫讀書好古。聞劉宗周講學叢山。渡江往聽。遂爲正學。室無容榻。析無懸衣。披帙覽書。凝坐終日。以貧故。與父皆教授於外。及侍親庭。動循法度。不苟言笑。其學以誠敬爲宗。以適用爲主。專宗考亭。不雜金谿姚江之緒。於二氏。則辭而闢之。晚節見習之者多。亦不與較辨也。平居日有課。月有程。每月則綜其所得。與同人相質難。聞四方有賢士。卽書其姓氏。置夾袋中。冀一見之。然不肯妄交。於取與尤介。連日絕炊。掘階前馬蘭草食之。鄰有餽之米者。昫宛轉謝辭。德而仆。其人駭走。良久始蘇。因笑曰。其意可感。然適以困我耳。同邑應橋謙與昫友善。嘗歎曰。辭受一節。生平自謂不苟。然以視沈先生。猶覺愧之。宗周卒後。傳其學者。頗滋諍訟。昫曰。尼父言躬行君子。若騰其口說以求勝。非所望於吾輩也。遭明亡。棄舉業。誨二子。止令下學。弗令干祿。雖極困躓不變。疾革。門人問曰。此時先生誠敬之功。當無稍間。昫曰。唯唯。至夜半。遂卒。年六十三。時康熙十九年也。卒後。貧無以殮。橋謙至。涕泣不知所出。曰。我不敢輕受賻。祇以好先生。其門

人姚宏任趨進曰。若宏任者。可以殮先生乎。搆謙曰。子篤行殆可也。乃殮而葬焉。陶著有宋五子要言。四先生輯略。四書宗法。七經評論。名臣言行錄。居求編等書。以貧累。無副本。搆謙所見。不過數卷。後全祖望求其遺書。竟不可得。陶居父喪時。蒼萃先儒之言。訂士喪禮。

李顥

李顥。字中孚。號二曲。陝西藍屋人。父可從。爲明材官。崇禎十五年。張獻忠寇鄜西。巡撫汪喬年總督三邊軍務。可從隨征討賊。臨行。挾一齒與顥母彭曰。如不捷。吾當委骨。子善教兒矣。兵敗。死之。顥母葬其齒。時顥年十六。母曰。言忠孝節義以督之。顥事母孝。飢寒清苦。無所憑藉。而自披流俗。以昌明關學爲己任。自經史子集。以至二氏書。無不博觀。而不滯於訓詁文義。曠然見其會通。其學以尊德性爲本體。以道問學爲工夫。以悔過自新爲始基。以靜坐觀心爲入手。關學自馮從吾後。漸替。顥曰。與其徒講論不輟。當事慕其名。踵門求見。力辭不得。則一見之。不報謁。曰。庶人不可入公府也。有餽遺者。雖十反不受。或曰。交道接禮。孟子不卻。顥曰。我輩百不能學孟子。即此一事。不守孟子家法。正自無害。陝撫欲薦之。哀籲得免。然關中利害在民者。亦未嘗不爲當事言之也。先是。顥欲求父遺骸。以母老而止。既而母歿。廬墓三年。乃徒步之襄城。徧覓不得。服斬衰。晝夜哭。知縣張允中感其孝。爲其父立祠。且造塚戰場。名之曰義林。常州府知府駱鍾麟官陝時。嘗師事顥。謂祠未能旦夕竣。請南下詣道南書院。發願高遺書。且講學以慰東林學者之望。顥赴之。凡講於無錫。於江陰。於靖江宜興。所至學者雲集。旣而幡然悔曰。不孝此行何事。而喋喋於此。即戒行赴襄城。常州人士思慕之。爲建延陵書院。肖像其中。顥旣至襄城。適祠成。乃哭祭招魂。取塚土西歸。附諸墓。持服如初喪。康熙十二年。陝督鄂善以隱逸薦。有詔起之。固辭以疾。十七年。詔舉博學鴻儒。禮部以海內真儒薦。大吏親至其家促之起。昇牀至省。顥絕粒六日。至拔刀自刺。大吏駭去。乃得予假治病。顥戒其子曰。我日抱痛。自期永棲聖室。平生心迹。願在聖室錄感一書。萬一見僞而死。斂以粗衣白棺。勿受。

弔也。自是閉關不與人接。惟崑山顧炎武及同邑惠思誠至。則款之。思誠顧四十年所心交也。四十二年。聖祖西巡。召顧見時。顧已衰老。遣子慎言詣行在陳情。以所著四書反身錄。二曲集奏進。上謂慎言曰。爾父讀書守志。可謂完節。特賜御書志操高潔及詩幅以獎之。顧學亦出姚江。謂學者當先觀陸九淵楊簡王守仁陳獻章之書。闡明心性。然後取二程朱子以及吳與弼薛瑄呂柟羅欽順之書。以盡踐履之功。初有志濟世。著帝學宏綱。經筵僭擬。經世蠹劑。時務急策等書。既而盡焚其稿。又著十三經注疏糾繆。二十一史糾繆。易說象數蠹劑。亦謂無當身心。不以示人。居恆教人。一以反身實踐爲事。謂孔會思孟。立言垂訓。蓋欲學者體諸身。見諸行。充之爲天德。達之爲王道。有體有用。有補於世。否則假途干進。豈聖賢立言之初心。國家期望之本意耶。時容城孫奇逢之學盛於北。餘姚黃宗羲之學盛於南。與顧鼎足。世稱三大儒。惟顧起自孤根。上接關學之傳。尤爲難及云。晚年寓富平。有富平答問。四十四年卒。年七十六。門人王心敬傳其學。其四書反身錄七卷。二曲集二十二卷。亦心敬所撰次。

李柏

李柏。字雪木。陝西郿縣人。九歲失怙。事母至孝。備歷艱辛。而色養不衰。稍長。讀小學。曰。道在是矣。遂盡焚帖括。日誦古書。嘗東登首陽。拜夷齊墓歸。而師扑之曰。汝欲學古人。吾必令汝學今人也。則應曰。必學古人。師再三扑之。應如前。以母命。一就試。遂補諸生。母卒。入太白山中。布衣蔬食。極人之所不堪。時自誦曰。貧賤在我。實有其門。出我門死。入我門存。又曰。牛被繡。鸞刀就。又曰。古之人有七日不火食者。有三旬九殮者。有食木子橡栗者。有屑榆者。有一日長坐者。有餐麩齧雪十九年者。蓋有主於中。不動於外。所謂不忘溝壑也。年四十八。將貢。或勸之行。愴然曰。昔爲吾母應此役。今奚戀耶。康熙三十三年卒。年七十一。著有櫛葉集十卷。蓋厓李顧與因篤及柏相箴。康熙間。關中稱儒者。咸曰三李也。

李因篤

李因篤。字天生。一字子德。陝西富平人。明諸生。時天下大亂。因篤走塞上。求勇敢士。殲賊以報國。無應者。歸而閉戶讀書。博聞強記。黃串注疏。康熙間。詔舉博學鴻儒。因篤夙負重名。公卿交薦。母勸之行。試列一等。授翰林院檢討。未逾月。以母老乞養。疏曰。臣竊惟幼學壯行者。人臣之盛節。辭榮乞養者。人子之苦心。故求賢雖有國之經。而教孝實人倫之本。比者。內閣學士項景襄。李天馥。大理寺少卿張雲翼等。旁采虛聲。聯塵薦牘。陝西巡撫促臣赴京。臣自念。臣母年逾七十。屬歲多病。因頓牀褥。轉側需人。臣止一弟。因材。從幼過繼。臣年四十有九。並無兒女。跬步難離。屢具呈辭。疊奉部駁。竊思己病。或可僞言。親老。豈容假借。臣雖不肖。詎忍藉口所生。指爲推卸之端乎。痛思。臣母垂暮之年。不幸身嬰殘疾。臣若貪承恩詔。背母遠行。必致倚門倚閭。風病增劇。况衰齡七十。久因扶牀。羸路三千。難通醫指。一旦禱北辰而已。遂回西景。以無期。萬一有爲人子所不忍言者。則是毛義之捧檄。不逮其親。溫嶠之絕裾。自忘其母。風木之悲。何及。蚡蟲之恥。奚償。臣永爲名教罪人。不惟始進已乖。無顏以對皇上。而循陔負咎。躁進貽譏。則於薦臣亦爲有醜面目。去歲臺司郡邑。絡繹遣臣長行。急若風火。臣趨朝之限。雖迫於戴星。問寢之私。倍懸於愛日。然呼天莫應。號泣就途。志緒荒迷。如墮雲霧。低頭轉瞬。輒見臣母在前。寢食俱忘。肝腸迸裂。其不可瀆官常而干祿位也明矣。况皇上至仁。至孝。遠邁前朝。而甘違老親。致傷風化。有臣如此。安所用之。乃臣自抵都以來。屢次具呈。具疏。九重嚴邃。情壅上聞。隨於三月朔。扶病考試。復蒙聖恩。授職檢討。纂修明史。受恩深重。何忍言歸。惟是臣自去秋入京。奄更十月。數接家信。臣母以晝夜思子。流涕無已。雙目失明。臣仰圖報君。俯迫諗母。欲留不可。欲去未能。瞻望闕廷。進退維谷。查見行事例。凡在京官員。家無次子。聽其終養。臣身爲獨子。與例正符。伏祈特沛恩慈。許臣歸養。以終天年。臣母子銜環鑲骨。永矢畢生矣。疏入。詔許歸養。母歿。仍不出。因篤性忼直。然尙氣節。急人之急。顧炎武在山左。被誣陷。因篤走三千里。爲脫其難。嘗著詩說。炎武稱之曰。毛鄭有嗣音矣。又著春秋說。汪琬見之。亦折服。與毛奇齡論古韻不合。奇齡強辨。炎武是因篤而非奇齡。所著音學五書。因篤與有力焉。歸後岐山令及淳化宋振麟等。請講學於朝陽書院。因篤首發橫渠以禮教人之旨。次論有守有爲之義。

而斷之於審幾。以著思誠之體。其論學必縮以經。說經必貫以史。使表裏參伍。互相發明。當時學者。灑然有得。因記之爲會講錄。尤熟於有明事蹟。王鴻緒史稿成就正因篤。時老病。臥牀褥。令二人讀稿。命之竄易。半載而畢。由是史稿知名。他著有受祺堂集三十五卷。漢詩首注五卷。漢詩評五卷。古今均考一卷。

孫奇逢子博雅

孫奇逢。字啟泰。一字鐘元。直隸容城人。少個儻好奇節。而內行篤修。負經世之學。欲以功業自著。年十四。謁尙寶楊補庭。問曰。設在圍城中。外無救援。內無糧芻。如之何。對曰。效死勿去。補庭奇之。年十七。舉明萬曆二十八年鄉試。與定興鹿善繼講學。一室默對。以聖賢相期許。既連丁父母憂。哀毀成疾。廬墓六年。家故貧。糗餼不給。巨室以金粟餽。婉卻之。嘗自言於哀慟窮苦中。證取本來面目。覺向來氣質之偏。其學問實得力於此。後入京師。見曹于汴。舉仁體以告。恍然此心與天地萬物相通。左光斗魏大中周順昌。皆與定交。天啟末。魏忠賢竊柄。左魏被逮。遣子弟相投。奇逢與鹿善繼之父正。及張果中共調護之。時善繼賀大學士孫承宗軍事。奇逢上書承宗。責以大義。請急營救承宗。疏請入覲。忠賢懼。繞御牀哭。詔止承宗。獄益急。坐賊酷拷。奇逢復與正果中集士民。贖金代輸。至都。左魏已死。逾年。周順昌被逮。贖金一如左魏時。俄而順昌又死。奇逢正果中咸傾身護濟。使得歸骨。世所稱范陽三烈士也。孫承宗以奇逢有經世才。欲以職方題授。命茅元儀致意。奇逢辭不就。謂元儀曰。朝野倚重者。關門一片地。將相不調。未有能立功於外者。君文士。與二三大帥共事。儻一有見才之心。便不能容人。人肯爲我用乎。元儀服其言。後祖大壽以疑懼東奔。元儀鼓勵馬世龍追還。得和衷共事。奇逢一言之力也。崇禎時。督學李蕃舉孝行。建坊旌表。御史黃宗昌給事中王正志咸交章保薦。大兵薄畿輔。容城被圍。土垣將圯。奇逢率宗黨矢志守禦。城賴以完。巡撫張其平甚器之。疏請擢用。尙書范景文。亦以軍務聘。並辭不赴。時畿內盜賊數驚。乃攜家入易州五峯山。門人親故相保者數百家。奇逢爲條教。部署守禦。又以其暇賦詩習禮。絃歌聲相聞。寇盜屏迹。順治二

年祭酒薛所蘊具疏讓官。以元許衡吳澄相擬。有旨徵爲國子監祭酒。奇逢以病辭。三年移居新安縣。七年南徙輝縣之蘇門。九年工部郎中馬光裕奉以夏峯田廬。乃闢兼山堂。讀易其中。率子弟躬耕自給。四方來學願留者亦授田使耕。所居遂成聚。居夏峯二十五年。屢徵不起。奇逢之學。原本象山陽明。而兼采程朱之旨。以彌闕失。其論學以慎獨爲宗。以體認天理爲要。以日用倫常爲實際。而其大本主於窮則勵行。出則經世。其治身務自刻勵。而於人無町畦。有問學者。隨其高下淺深。必開以性之所近。使自力於庸行。上自公卿大夫。下及野人牧豎。武夫悍卒。壹以誠意接之。用此名在天下。而人無忌嫉。嘗學易於雄縣李對。及老。乃撮其體要。以象傳通一卦之旨。由一卦通六十四卦之義。發明義理。切近人事。所言皆關法戒。著讀易大旨四卷。又於四子書挈其要領。統論大指。開引先儒之說。以證異同。著四書近指二十卷。又表周程張邵朱陸及薛瑄王守仁羅洪先顧憲成爲十一子。以爲直接道統之傳。別爲諸儒考附之。著理學宗傳二十六卷。他著有尙書近指。聖學錄。兩大案錄。甲申大難錄。乙丙紀事。孫文正年譜。歲寒居文集。答問日譜。畿輔人物考。中州人物考。孝友堂家規。四禮酌等書。凡百餘卷。奇逢之學。盛於北方。與李容黃宗羲鼎足。年踰耄耋。講道不倦。嘗自言六十以後。工夫每十年而較密。生平於嫻族故舊。恩意篤厚。聞節孝事。必爲之表揚。閨門肅穆。寂若無聲。每晨興。拜謁家祠。退坐空齋。終日無情容。子孫甥姪數十人。揖讓進退。皆有成法。康熙十四年卒。年九十二。河南北學者祀之百泉書院。容城與劉因楊繼盛同祠。保定與孫承宗鹿善繼並祠。道光八年。奉上諭。孫奇逢學正醇篤。力行孝弟。其講學著書。以慎獨存誠。闡明道德。實足扶持名教。不愧先儒。著從祀文廟西廡。以崇儒術。而闡幽光。子六人。第四子博雅最知名。弟子甚衆。而新安魏一黿。灤州趙御衆。清苑高鑑。范陽耿極。從遊最早。睢州湯斌。登封耿介。皆以仕至監司歸里。後往受業焉。博雅。字君僑。明亡。絕意仕進。奇逢遷蘇門。獨留奉母。母歿。三年不見齒。奇逢年老重聽。諸弟子問難。必藉博雅轉達。聞有未暢。輒援據經傳。發言外之意。聞者往往灑然解悟。奇逢著書不下數百卷。編摩訂正。博雅力居多。康熙八年。郡守程啟朱以山林隱逸薦。以父老辭。奇逢卒。哀毀骨立。廬墓三年。十五年。弟韻雅坐事逮繫刑部。博雅竭產供弟。凡

四年。往來省視。徒步烈日中。兩足皆腫。或遇雨雪。飢渴僵仆於途。卒以致病。病時假寐。口中喃喃。皆其弟事也。及彌留。猶張目曰。吾弟免矣。遂卒。年五十五。卒後數日。弟事漸解。蔚州魏象樞稱其愛弟忘身。成仁取義云。所著有約齋集。

陳瑚

陳瑚。字言夏。太倉州人。明崇禎十六年舉人。陸世儀作格致篇。首提敬天二字。瑚由此用力。遂得要領。每日課程。以敬愈善。過自考。嘗與世人論致中和工夫。瑚答之曰。工夫全在存養省察。玩注中約之精之二語。約之有漸漸收斂入內意。精之有漸漸擴充向外意。卽如戒慎恐懼。何得徧擇。所謂不睹不聞者。而用功祇是持敬於己。不問其睹聞與否。步步存天理於胸中。然後漸漸收斂。直至夢寐所不及簡。精神所不及持。純是一團天理。此之謂約之。此之謂致中。慎獨則先從己所獨知之地用力。然後推向外去。自一事一物。以至萬事萬物。無不各當。絕無一毫人欲。此之謂精之。此之謂致和。世儀諸人。皆然其言。著聖學入門。書分小學爲六。入孝出悌。謹行信言。親愛學文。大學爲六。格致誠意。正心修身。齊家治平。謂小學先行後知。大學先知後行。小學之終。卽大學之始。瑚之學博。大精深。尤講求經濟大略。暇則橫槊舞劍。響弓注矢。其擊刺妙天下。值婁江堙塞。江南大饑。瑚上當事救荒書。其預備之政四。曰慎災沓。早奏報。懲浮惰。勸節省。補苴之政四。曰通商勸分。興役弭亂。軫恤之政四。曰招流亡。緩徵索。審刑獄。恤病囚。又陳支吾三議。其議食四條曰。勸義助。勸轉輸。招商米。優米肆。饑兵八條曰。嚴保甲。練鄉民。設偵探。勸習射。練夫役。練牙兵。備城守之人。備城守之器。議信六條曰。勵士節。和大戶。巡郊野。安典肆。清獄囚。嚴督察。又籌江南二策曰。定常賦以絕蠹熈。此治標之法。與水利以闢田疇。此治本之法。皆精切可施行。時不能用。其論理財。謂管子富國之法。大約籓山澤之利。操輕重之權。可施之一國。不可施之天下。苟利吾國。鄰國雖害不恤也。爲天下則不然。此有餘彼不足。不足者。亦王土也。此享其利。彼受其敝。敝者。亦王民也。故桑孔用之。漢而耗王。

呂用之宋而亡。時稱爲篤論。瑚嘗自言其學。如醫之治病。求之於古。猶方藥也。求之於今。猶切脈也。按脈求病。按病定方。按方用藥。故百發不爽。然主人諱疾。則良醫亦束手矣。明亡。絕意仕進。奉父寓崑山之蔚村。田沮。瑚導鄉人築岸禦水。用兵家東伍法。不日而成。歲獲豐稔。又立孝弟力田爲善三約。衆皆悅從。父病。刺血籲天。願以身代。父卒。遺產悉讓之弟。康熙八年。詔舉隱逸。知州白登明將以其名上。瑚力辭乃已。遊其門者。多俊偉英略之士。十四年卒。年六十三。卒後。村人立祠祀之。巡撫湯斌。卽其居爲安道書院。他著有求道錄。淮雲問答。築圃說。治病說。救荒定議等書。其孫搜輯彙編。爲五十八卷。

陸世儀

陸世儀。字道威。自號曰樗亭。江南太倉州人。年十六。父勗之曰。一飲一食。常維經義。可以收放心。或坐或臥。如對聖賢。可以卻邪念。世儀揭之座隅。年二十七。爲主敬之學。慮敬之。或至散漫。時奉一天以臨之。功乃大進。嘗欲從劉宗周問學。不果。後與同里陳瑚盛敬。江士韶諸人。倡明正學。慮驚世駭俗。深自韜秘。或橫經論難。或卽事窮理。反覆以求。一是。甚有商榷未定。徹夜忘寢。質明而後斷。或未斷而復辨者。世儀之學。篤守程朱。自言初有得於心。爲嚴師。隨事精察八字。謂心爲嚴師。卽居敬。隨事精察。卽窮理。既有得於理。一分殊四字。謂聖賢工夫。隨事精察是起手。一以貫之是究竟。而此四字。自精察而造一貫之階梯也。旣而曠觀天地古今。無有不貫。謂邵子遇物皆成四片。此祇是於陰陽老少處看得熟。然終落氣數。若見得理一分殊親切。則遇物一片亦可。千萬片亦可。其論太極圖說。謂主敬二字。是立人極之本。中正仁義。又是主靜之實落處。周子自注云。無欲故靜。無欲則純平理。是以天理爲靜。人欲爲動。乃知仁義中正之外。別無主靜也。其論性。謂孟子祇就四端發現處言。不必說到渾然至善。又謂論性。離不得氣質。一離氣質。便要離天地。蓋天地亦氣質也。離天地則於陰陽外。別尋太極。太極不落空虛。卽同於一物。世儀不喜陳王之學。然能平心以論之。其論白沙曰。世多以白沙爲禪宗非也。白沙曾點之流。其

意一主於灑脫曠閒。以爲受用。故與禪思相近。其靜中養出端倪之說。中庸有之。然不言戒懼慎獨。與惟詠歌舞蹈以養之。則近於手持足行。無非道妙之意矣。不言睹聞見顯。而惟端倪之是求。則近於莫度金鍼之意矣。白沙本與敬齋俱學於吳氏。皆以居敬爲主。後來自成一家。始以自然爲宗。而敬齋則終身無所轉移。此狂狷之分。其實白沙所謂自然者。誠也。稍有一毫之不誠。則粉飾造作。便非自然。或者以率略放誕爲自然非也。其論陽明曰。陽明之學。原自窮理讀書中來。不然。龍場一悟。安得六經皆濼泊。但其謂庭前格竹。七日而病。是則禪家參竹篋之法。原非朱子格物之說。陽明自誤會耳。蓋陽明少時。實嘗從事禪宗。而正學工夫尙寡。初官京師。雖與甘泉講道。非有深造。居南中三載。始覺有得。而才氣過高。遽爲致良知之說。自樹一幟。是後畢生執筆軍旅之中。雖到處講學。然終屬聰明用事。而少時之熟處難忘。不免逗漏出來。要之致良知。固可入聖。然切勿打破敬字。乃是壞良知也。其致之亦豈能廢窮理讀書。然陽明之意。主於簡易直捷。以救支離之失。故聰明者。厭窮理讀書之繁。動云一切放下。直下承當。心曩膽大。祇爲斷送一敬字。不知卽此簡易直捷之一念。便已放鬆腳根也。論者謂其洞見得失。足廢諸家紛爭之說。生平於象緯律曆。及禮樂政事異同。無所不究。所著思辨錄疏證剖析。蓋數百萬言。分小學大學。立志居敬。格致誠正。修齊治平。天道人道。諸儒異學。經史子籍十四門。凡三十五卷。大旨主於敦守禮法。不虛談誠敬之旨。施行實政。不空爲心性之功。於近代講學諸家。最爲篤實。故其言曰。天下無講學之人。此世道之衰。天下皆講學之人。亦世道之衰。嘉隆之間。書院徧天下。呼朋引類。動輒千人。甚有借以行其私者。此所謂處士橫議也。又曰。今所當學者。不止於六藝。如天文地理河渠兵法之類。皆切於用世。不可不講。其言足砭虛僞之弊。後儀封張伯行。序其書。謂世儀爲朱子後一人。余不敢知。然其於內聖外王之道。思辨有素。不可謂非正學干城云。明季流寇事亟。世儀謂平賊在良將。尤在良有司。宜大破成格。凡進士貢監諸生。不拘資地。但有文武幹略者。輒與便宜。委以治兵積粟守城之事。有功卽以爲其地之牧令。如此則將兵者。所至有呼應。今拘以吏部之法。重以賄賂。隨人充數。是賣封疆也。時不能用。明亡。不復出。擊地十畝。築亭其中。不通賓客。自號粹亭。順治

十五年始應學政張能騰聘。爲輯儒宗理要。十七年應諸生之請。講學東林。康熙五年復講學毘陵。已復歸講里中。當事屢欲薦之。力辭。十一年卒。年六十二。他著有論學酬答。宗禮典禮折衷。禮衡易窺。詩鑑。書鑑。春秋考論等四十餘種。國朝諸儒。恪守程朱家法者。世推二陸。謂世儀及隴其也。光緒元年。禮部議覆江蘇巡撫張樹聲疏奏。奉旨從祀文廟。

陸隴其

陸隴其。字稼書。浙江平湖人。康熙九年進士。十四年授江南嘉定知縣。十五年十二月巡撫慕天顏請行州縣煩簡更調之法。因言嘉定及崑山丹陽金壇等縣。政務甚煩。賦多逋欠。如隴其之操守。稱絕一塵。才幹實非肆應。若調補稍簡之縣。必勵其素守。惠愛百姓。疏下部議。謂煩簡更調非例。既無肆應之才。應照才力不及。例降三級調用。會縣民有被盜殺。而其親屬以警殺訴。隴其詳報是警是盜。候緝獲後擬。既而獲盜鞠實。論如律。總督阿席熙入奏。部議隴其初報不直指爲盜。應照諱盜例革職。隴其遂罷歸。十七年詔舉博學鴻儒。工部主事吳源起薦隴其理學純深。文行無愧。得旨召試。隴其赴京。未及試。丁父憂歸。十八年左都御史魏象樞。應詔舉清廉官。疏言隴其任嘉定知縣。清操飲冰。愛民加子。去官之日。萬民遮道攀轅。既去之後。家家戶祝。比於父母。部議俟服滿日。仍補知縣。上曰。陸隴其係保舉廉能之官。如直隸清苑。江南無錫等縣。最稱煩難之區。用之庶可展其才。二十二年補直隸靈壽知縣。二十三年六月。直隸巡撫格爾古德疏言。隴其潔己奉公。實心任事。革除火耗陋規。務農重穀。匪類斂跡。履任未久。而教化已洽輿情。循例薦揚。以備擢用。疏下部議。予紀錄。時九卿奉旨公舉清廉官。格爾古德以兗州知府張鵬翮與隴其並舉焉。二十九年吏部以科道需人。奉命九卿舉學問優長。品行可用者。九卿以隴其與清苑知縣邵嗣堯。三河知縣彭鵬並舉。得旨行取。授隴其四川道監察御史。十月疏言。畿輔沿山州縣。士瘠民貧。荒多熟少。自昔而然。數年以來。皇上加意撫綏。禁止私派。不惜蠲賑。鳩鵠之民。得有延殘喘。然以言平家

給人足則未也。上年荒旱，雖間有未被災之處，不過差勝於被災者。初奉諭，概予蠲免二十八年全租，及二十九年半租，後因部議分別被災輕重，撫臣奏災輕田畝秋後帶徵，今雖秋收稍稔，所入無幾，私債之迫索者，衣服之典當者，已去其大半，仰事俯育，仍憂不足，又可責其兼完新舊之糧乎？若非皇上曲加垂卹，恐有司惟考成是急，不顧民力難勝也。疏下部議，尋敕部遵前旨，盡行蠲免。十二月，湖廣總督丁思孔，以偏沅巡撫于養志，在任守制題請，隴其疏言：天下當承平之時，湖南非用兵之地，無藉於養志在任守制，若因督臣之題請而留，將來督撫丁憂，皆將援此爲例，其不奪情者鮮矣。名教自此而弛，綱常自此而壞，關係世道人心非淺也。上覽疏，即以順天府尹王樸代于養志爲偏沅巡撫。三十年正月，戶部以大兵征噶爾丹，軍用浩煩，奏行運輸糧草，准作貢監及紀錄加級復級封贈與捐免保舉例。御史陳菁奏請刪捐免保舉條，而增捐應陞先用。部議不准。隴其疏言：捐納一事，原非皇上所欲行，不過因一時軍需孔亟，不得已而暫開。若許捐免保舉，則與正途無異。且督撫保舉之人，必曰清廉方可合例，保舉可捐納，是清廉可捐納而得也。至於捐納先用，大抵皆奔競躁進之徒，多一先用之人，即多一害民之人。此皆不待辨而知其不可者也。臣更有請者，竊見近日督撫於捐納之員，有遲之數年，既不保舉，又不糾劾者，不知果清廉乎？非清廉乎？抑在清濁之間乎？夫既以捐納出身，又不能發憤自勵，則其志趣卑陋，甘於污下可知，使之久居民上，其荼毒小民，不知當何如。乞敕部通稽捐納之員，到任三年而無保舉者，即行開缺休致。庶吏治可清，選途可疏，而民生可遂矣。疏入，下九卿議。九卿言：先用未准捐，止捐免保舉，實無礙正途。若定限到任三年而無保舉者，即行休致，則營求保舉，奔競益甚，應俱無庸議。議上，得旨：保舉一條，著會同陳菁、陸隴其再行詳議。及議，陳菁與九卿等並言：事例已行，次年三月即停止，可不必更張。隴其遂獨爲一議曰：捐納一途，實係賢愚錯雜，惟恃保舉以防其弊，雖不敢謂督撫之保舉盡公，然猶愈於竟不保舉也。今若并此去之，何以服天下之心？即貪污之輩，自有督撫糾劾，而其僥倖獲免者，遂與正途一體陞轉。雖有次年三月停止之期，而此輩無不先期捐納，即無不一體陞轉，未可云無礙也。至於到任三年無保舉者，令休致，謂恐近於刻，不知此輩由白丁

捐納得官。其心惟思償其本錢。何知有皇上之百姓。踞於民上者三年亦已甚矣。又可久乎。况休致在家。仍得儼然列於搢紳。爲榮多矣。若謂將屆三年。輒營求保舉。此在督撫不賢則誠有之。若督撫賢。何處營求。且即使督撫不賢。亦必不能盡捐納之員而保舉之。此休致之議。亦從吏治民生起見。未有吏治不清。而民生可安者。未有仕途龐雜。而吏治能清者。俱難無庸議者也。於是陳菁與九卿等各爲一議曰。捐納官員。倘有劣蹟。可隨時糾劾。捐納保舉之後。仍按俸陞轉。督撫既未保舉。必無徇庇之情。而官之賢否。自有分別。何處龐雜。至到任三年之內。雖無奇政動上官之保舉。亦無劣蹟來下民之告發。卽爲安養無事之官。何可勒令休致。以從前急公之人。附入法之末乎。且天下何地無才。何途無品。貲郎始自漢文。而文章如司馬相如。政事如張釋之。皆以貲郎顯。故國家用人不必分其門。而阻其途。實政惠民。不必格成議而徇迂見。邇者軍需孔亟。計各項之捐納人少。而保舉之捐納人多。是以增列此項。隴其不計緩急輕重。浮詞粉飾。寸步難行。致捐納之人。猶豫觀望。緊要軍需。因此遲誤。務虛名而債實事。莫此爲甚。應請革職。發往奉天安插。議上。上曰。陸隴其居官未久。懜懜不知事情。妄昧陳奏。理應依議處分。念係言官。著寬免。六月。命巡視北城。八月。以試俸期滿。甄別。應外調。遂乞假歸。三十一年十二月。卒於家。年六十有三。三十三年正月。江南學政許汝霖任滿。上諭大學士等曰。學政關係人才。甚屬緊要。朕觀原任御史陸隴其。學問優長。操守甚善。若以補授。必能秉公考校。破除積弊。有裨士習。大學士王熙以隴其已故。奏上。乃以前此與隴其同舉清廉之直隸守道邵嗣堯爲江南學政。隴其尋祀直隸江南名宦。浙江鄉賢。雍正二年帝臨雍釋奠。諭九卿議增文廟從祀賢儒。因議曰。隴其自幼以斯道爲己任。精研程朱之學。兩任邑令。務以德化民。平生孝友端方。言笑不苟。其所著述。實能發前人所未發。弗詭於正。允稱純儒。宜配饗俎豆。得旨。俞允。今上乾隆元年。詔九卿核議。應予追諡。諸臣因議曰。宋儒胡瑗。呂祖謙諸儒。皆未居顯職。而有諡。隴其雖官止五品。已從祀文廟。應予追諡。上特賜諡曰清獻。尋禮部以會典未載。五品官予諡。立碑給價之例。請上裁定。得旨。陸隴其著加贈內閣學士兼禮部侍郎。照例給予碑價。隴其推崇程朱。力闡陽明。一以居敬窮理爲主。薛瑄胡居仁後。惟隴其得其

正焉。著有三魚堂集四書大全。古文尙書考。讀書志疑。禮志疑。讀經會元註。戰國策去毒。呻吟語質疑。衛濱日鈔。問學錄。學術辨。讀朱隨筆。三魚堂賸言。松陽鈔存。靈壽縣志。因勉錄。松陽講義等諸書。

張履祥

張履祥。字考夫。又字淵甫。浙江桐鄉人。九歲喪父。哀毀如成人。家貧。母沈教之曰。孔孟亦兩家。無父兒也。祇因有志。便做到聖賢。及長。與同里顏統錢寅海鹽吳蕃昌輩。以文行相砥。時東南社事方興。各立門戶。統與履祥。戒勿往。年三十二。見漳浦黃道周於杭州。道周以近名爲戒。履祥謹誌之。年三十四。如山陰。受業劉宗周之門。歸而自謂有得。年三十九。友人規之曰。欲誠其意。先致其知。因覺人譜。獨體猶染陽明。遂一意程朱之學。與烏程凌克貞海鹽何汝霖歸安沈嘉切劇講習。專務躬行。其學大要以仁爲本。以修己爲務。而以中庸爲歸。窮理居敬。宗法考亭。知行並進。內外夾持。無一念非學問。無一事非學問。與汝霖書曰。承喻頭腦之說。按論語一書。謹言慎行爲多。不亟亟於頭腦也。顏子述善誘之功。則曰博文約禮而已。請爲仁之目。則曰非禮勿視聽言動而已。此卽所謂約禮之實也。曾子一貫之旨。則曰忠恕而已。子思受曾子之學者也。中庸所述。與論語曾子之言。如合符節。故曰。忠恕違道不遠。孟子傳子思之學者也。其言曰。居仁由義。曰求放心。其曰求其志。無暴其氣。卽求放心之謂也。求放心。則中庸戒慎恐懼之謂。而論語曰省其身。臨淵履冰之旨也。仁義二字。論語未嘗並舉。易傳則曰立人之道曰仁與義。中庸則曰仁者人也。義者宜也。則亦夫子之言也。至云反身而誠。樂莫大焉。強恕而行。求仁莫近焉。則與曾子子思。先後一轍矣。三代而下。濂溪則曰。主靜立人極。關中則曰。知禮成性。程門則曰。敬義夾持。曰存心致知。曰理一分殊。朱子則曰。居敬窮理。要而論之。豈有異旨哉。居敬所以存心也。窮理所以致知也。惟居敬故能直其內。惟窮理故能方其外。惟內之直。故能立天下之大本。惟外之方。故能行天下之達道。然居敬窮理。又非截然有兩種工夫也。博學審問。慎思明辨。是爲窮理。其不敢苟且從事。勤始怠終。及參以二三。卽爲居敬。故又曰。學者用

功當在分殊上。其曰知禮成性，卽約禮之謂。親親之殺，尊賢之等，皆天理也。故曰：禮所生也。三百三千，所從出也。所謂分殊。其曰主靜立極者，定之以中正仁義而已也。仁義不軌於中正，則仁或流於兼愛，義或流於爲我，而人極不立矣。禮以敬爲本，敬則自無非僻之干。人欲退而天理還矣。欲退理還，則終日言，言所當言，終日行，行所無事而靜矣。故又曰：無欲故靜。然則濂溪橫渠，雖不言主敬，而敬在其中矣。由是而上，質之鄉魯，豈不同條而共貫哉。吾人學問舍居仁由義，更無所謂學問。吾人工夫，舍居敬窮理，更無所謂工夫。凡先儒之言，若志伊尹之所志，學顏子之所學，若爲天地立心，爲生民立命，若以興起斯文爲己任，種種道術，舉不外是，更何有於頭腦之求。古人騎驢覓驢之喻，是之謂矣。特患居敬之不熟，而有或得或失之憂。窮理之未精，而有或然或不然之慮。要亦無他道也。有不熟則勉進於熟而已，有未精則勉求其精而已。平日工夫，惟在涵養其本原，以爲制事酬物之主爾矣。朋友講習，養也。獨居思索，亦養也。讀書考究，養也。飲食動作，亦養也。念茲在茲，釋茲在茲，如伏雌之抱卵，其退不舍，其進不銳，如日月之貞恆，修其疆畔，時其耔耘，如農夫之力穡，而後可致其精也。而後可幾於熟也。必若先儒云：滿腔子皆惻隱之心，盎然若太和元氣之流行於天地之間，必若先儒云：在我之權度，精切不差，截然如萬物之各正性命，子思所云：擇善固執，孟子所云：深造自得，其或以此也歟。夫學問者，將以盡性命之理也。苟不本於天之所賦，物之所受，非學問之正也。安可使之有兩截乎。事物者，身心之準則也。苟事至物來，而處之不當其分，正身心之病也。安可視爲兩途乎。事物之不能不日至者，勢也。迎之非也，拒之亦非也。以其皆不免於自私而用智也。非順應之道也。無事則讀書，讀書者，所以維持此心，而不使其或怠也。非以務博也。默坐則思索，思索者，所以檢點其身，而不使其有闕也。非以耽寂也。事至則泛應泛應者，所以推行天理於事事物物，而不使其有過不及也。非以外馳也。無衆寡，無小大，無敢慢則一矣。無有事無事，無有人無人，無敢慢則一矣。一則窮通一矣。壽夭亦一矣。死生亦一矣。晚爲汝霖評王氏傳習錄，以爲讀其書，使長傲文過，輕自大而無得。又曰：一部傳習錄，竊吝二字，足以蔽之。所自著備忘錄，篤實正大，足救俗學之弊。論者比之河津讀書續錄。他著有願學記，讀易筆記。

讀史偶記。言行見聞錄。經正錄。初學備忘近鑑。近古錄。訓子語。補農書。喪葬雜錄。訓門人語。及詩文集。凡四十五卷。履祥少有大志。明亡。乃避世。畏聲利若燒。以訓蒙自給。交友盡規。而不喜講學。來學之士。一以友道處之。黃宗羲方以紹述宗周。鼓動天下。履祥曰。此名士。非儒者也。歲耕田數十畝。草履箬笠提筐佐饁。嘗曰。許齊齋言學者以治生爲急。愚謂治生當以稼穡爲先。能稼穡。則無求於人。而廉恥立。知稼穡艱難。則不妄取於人。而禮讓興。廉恥立。禮讓興。世道可復古矣。又嘗言嘉郡水利不講。時被旱潦。其要在濬吳淞江。其後嘉善柯養達議濬之。本履祥說也。康熙十三年卒。年六十四。同治十年。禮部奏請從祀文廟。在東廡先儒孫奇逢之次。奉旨依議。初。履祥弱冠時。兄事統。周鍾之寓桐鄉也。至其門者踵接。統曰。鍾爲人浮僞。不宜爲所惑。履祥嘗曰。自得統而始聞過。余不失足於周鍾張傳之門者。皆其力也。及從宗周遊。與寅偕。宗周曰。二子有親乎。對曰。俱幼喪父。宗周色動。徐曰。修身所以事親也。海寧祝淵抗疏論宗周被逮。履祥與寅送之吳門。寅造履端謹。寇盜充斥。不廢學。與統俱早卒。

應應擢謙

應擢謙字嗣寅。浙江仁和人。明諸生。生而有文在手曰八卦。左耳重輪。右目重瞳。少即以斯道爲己任。年二十三。作君子自勉論。確心理學。以躬行實踐爲主。與錢塘虞錫蔣志春等爲獯社。取有所不爲也。性至孝。授徒養母。三旬未娶。人問之。曰。娶則無以養母。餼居可俟也。歸安沈士毅慕其義。妻以兄女。資使奉養。擢謙終不肯入私室。母歿。除喪始成禮。家居足不出百里。隘屋短垣。貧甚。淡如也。杭州府知府嵇宗孟數式。屢欲有所贈。囁嚅未出。及贖擢謙所作無悶先生傳。乃不敢言。海寧知縣許西山請主書院。造廬者再。擢謙辭曰。使君學道。但從事於愛人。以德足矣。康熙十七年。詔徵博學鴻儒。內閣學士項景襄李天馥交章薦。擢謙輿牀以告。客有勸者曰。昔太山孫明復。嘗因石介等請以成丞相之賢。何果於卻薦哉。擢謙正色曰。我不能以我之不可學。明復之可。巡撫爲言。實老病不能行。乃免徵。擢謙爲學不喜陸王家言。嘗謂陽明之功。譎而不正。又謂陽明自少獨學無師。堅於自用。其論

性論太極亦頗與程朱不同。然其教人用功必以窮理格物爲本。謹守朱子家法。讀書務窮底蘊。所著述二十八種。於經有周易集解。詩傳翼書傳拾遺。春秋傳考禮學彙編。論孟拾遺。學庸本義。孝經辨定。而古樂書二卷。議論醇正。考訂簡覈。深得要領。自序曰。夫樂何爲而作也。民受天地之生。稟陰陽之氣。有清濁之聲。而性情形焉。聲之變有萬。而不離於五。喉音宮。齒音商。牙音角。舌音徵。脣音羽。五者備矣。無中聲則不發中氣。實矣。無五者則不聲。此民之具於天者也。然此五者。惟中土之人得其中。九州之外。偏氣所極。皆得其一。方之音而不能變。至於禽蟲。則唯具一聲。聖人懼人之習於偏音。而失其中性。乃取十二月之中氣。命神瞽考中聲而量之以制。此十二律所由起也。其聲之下而濁者。至黃鐘而極。高而清者。至應鐘而極。彼此旋宮。因時發斂。大聲不至震越。小聲不至哀細。使天下之人。皆以爲節聽而法之。以和其聲。以平其心。然後耳目聰明。血氣流行。風俗變化。師訟不興。職是故也。今宗伯不考聲。學宮不正律。使俗樂恣行於天地之間。以敗亂人心。而蠱惑風俗。嗚呼。豈不痛哉。又著性理大中二十八卷。因性理大全增損之。而退太極圖說於末卷。其論陽明一卷。陸隴其嘗特表之曰。王學考。又教養全書四十一卷。分選舉學校治官田賦水利國計漕運治河師役鹽法十考略。仿文獻通考。而於明代事實尤詳。其不載律算者。以徐光啟已有成書。不載輿地者。以顧炎武顧祖禹方事纂輯也。又齋齋文集十卷。康熙二十二年卒。年六十九。門人錢塘凌嘉印沈士則能傳其學。而姚宏任尤以篤行稱。

顏元

顏元。字易直。又字渾然。號習齋。直隸博野人。明末。父戍遼東。歿於關外。元年五十。貧無立錐。百計負骨歸葬。世稱孝子。居喪守朱子家禮惟謹。古禮。初喪朝一盞米。夕一盞米。食之無算。家禮刪去無算句。元遵之。過朝夕不敢食。當朝夕。遇哀至。又不能食。病幾殆。又喪服傳。既練舍外寢。始食菜果飯素食。哭無時。家禮改爲練後。止朝夕哭。惟朔望未除服者會哭。凡哀至皆制不哭。元亦遵之。既覺其過抑情。校以古喪禮非是。因歎先王制禮盡人之性。後

儒無德無位。不可作也。其爲學以堯舜之道在六府三事。周公教士以三物。孔子以四教。非主靜專誦讀。流爲禪宗俗學者所可託。乃易靜坐以習恭內。而敬直外。而九容交攝。讀書擇經史有用者。餘不盡究。嚴課孝弟謹信。稽禮樂兵農之允宜。今古者。爲倡六藝以教來學。又置日記自省。時下一圈心。慊則書白。否則黑。與蠡縣劉崇文王養粹李璩等。以聖賢相勉。每會。各出日記相質。勸善規過。或諍譏致愧。無以自容。元嘗欲置妾。爲媒所欺。璩責之。亦即屈服也。同時容城孫奇逢講學百泉山中。元嘗上書辨論。謂不宜徒爲和通朱陸之說。又與祁州刁包。上蔡張沐辨學。謂世儒躐講性天。非孔子不可得聞之教法。且聖門經世之撰皆廢失。何以學成致用。因著存性篇二卷。大旨謂孟子言性善。孔子言性相近。習相遠。語異而意同。宋儒誤解相近之意。以善爲天命之性。相近爲氣質之性。遂使爲惡者諉之氣質。不知理即氣之理。氣即理之氣。清濁厚薄。純駁偏全。萬有不齊。總歸一善。其惡者引蔽習染耳。譬之於目。光明能視則目之性。其視之也。則情之善。視之詳略遠近。則才之強弱。皆不可謂之惡。惟若邪色引動。然後有淫視。是所謂非才之罪。是即所謂習。又謂性之相近。如真金輕重多寡。雖不同。其謂金俱相若也。惟其有差等。故不曰同。惟其同一善。故曰近。舉天下不一之姿。以性相近一言包之。是即性善。是即人皆可以爲堯舜。舉世人引蔽習染。無窮之罪惡。以習相遠一言包之。是即非才之罪。是即非天之降材爾。其說雖稍異先儒。而於孔孟之旨。會通一理。同時陸世儀李光地。頗見及之。而牽於程張。不能決。乾隆中。休寧戴震作孟子字義疏證。始本此說。而暢其旨。又存學編四卷。大旨謂聖賢立教。所以別於異端者。以異端之學空談心性。而聖賢之學。則事事徵諸實用。自儒者失其本原。以心性爲宗。一切視爲末務。其學遂與異端近。如無極太極河洛先後天之說。皆出自道家。而以此當聖人言性與天道。至謂與伏羲畫卦同功。宜其參雜二氏而不自知也。又存治編一卷。大旨欲全復井田。封建。學校。徵辟。肉刑。及寓兵於農之法。又存人編四卷。大旨戒愚民奉佛。及儒者談禪。肥鄉有禪南書院。邑人郝文燦請元往教。元爲立規制。有文事武備。經史藝文等科。從遊者數十人。會天大雨。潭水溢。堂舍悉沒。元歎曰。天不欲行吾道也。乃辭歸。康熙四十三年卒。年七十。李璩弱冠與元交。年三十一。乃投門。

人刺與元。門人王源同編元年譜二卷。鍾鏐又輯言行錄二卷。闕異錄二卷。今不存。其所存者惟存性存學存治存人四編。元之學大抵亦出姚江。而加以刻苦。介然自成一家。以明季諸儒。崇尚心學。無補於時。嗣至大亂。士廢而靡。兵專而弱。故其學主於勵實行。濟實用。常謂後人動詆宰我樊遲季路冉求子貢子張游夏諸子。而欲陞周程與顏曾接席。然聖門弟子。以兢業爲本。惟在實學實行。實用之天下。後儒薄事功。故其視諸賢甚卑也。又常語友人曰。如天不廢予。將以七字當天下。墜荒。均田。興水利。以六字險天下。人皆兵。官皆將。以九字安天下。舉人才。正大經。興禮樂。蓋其自負如此。

李璩

李璩。字剛主。別字恕容。直隸蠡縣人。康熙二十九年舉人。年六十。選通州學正。居官八十餘日。以病告歸。父明性。明諸生。入清朝。不與試。以孝行旌。與博野顏元善。元見其所輯性理諸書。深歎服焉。璩弱冠。學禮於元。又學琴於張而素。學射於趙思光。學數於劉見田。學書於彭通。學兵法於王餘祐。於田賦。穉裕郊社宗廟諸大典。靡不研究。摛撫史志。所載經史大略。爲廖志編以備用。旣而深服元六藝之教。遂執贄稱弟子。友人郭金揚知桐鄉縣。邀璩往議政。遂之蕭山。學樂於毛奇齡。盡得其舊所傳五聲二變。四清七始。九歌十二律諸遺法。並受其經學。時與往復論易。辨太極圖河洛之僞。論尙書。辨考古文爲僞之說。論詩。言小序不可廢。奇齡常稱爲蓋世一人。尋遊京都。交鄧萬斯同。斯同見所著大學辨業。爲之序。時四方名士。競聚都門。斯同夙有講會。每講皆顯宦主供。張翰林部。即處士數十人環聽。一日。璩往。斯同揖衆言曰。此李先生也。負聖學正傳。請先講以爲求道者路。璩遜謝去。已而諸人復回請講。璩乃暢發以周官大司徒三物解大學格物之旨曰。人受天地之中以生。則有仁義禮智之性。性先見於行。則爲子臣弟友。行實以事。則爲禮樂兵農。周公以三物教天下。三物之六德。有聖忠和。猶是四德而分其名也。六行有睦嫻任卹。五倫所推及也。六藝有射御書數。兵農禮樂之分判也。非六德無以善六行。非六行無

以成大德。而非六藝則無以盡六德六行之實事。三者乃本末兼賅之道。外此則異端曲學。烏可訓哉。衆皆曰然。友人楊勤知富平縣。復邀璩往。卽至。陳光陸黎宋淳魯登闕蔡麟張中等皆從之遊。時會諸名士於寓。相與論學。璩喜曰。光陸學易。宋淳學禮。登闕學樂。麟學兵。中學平書。吾道其遂興乎。平書者。大興王源所著。璩訂之。爲分民分土建官取土制田武備六政者也。安溪李光地聞璩學行。使徐用錫招之。不往。已而諸王交聘。皆避去。晚交桐城方苞。苞與璩所學不同。而志相得。其遊如家人。時有謗璩者。苞釋之。爲作釋言。苞嘗以程朱之學規璩。璩雖引以自責。然不能革也。璩性至孝。父在時。與嫡母鄉居。留璩及生母居城。率四弟課讀。每朔望前一日。薄暮步二十里至鄉省安。夙興拜父母各四。乃返城拜生母。父歿。辯誦痛絕。三日不食。斂葬虞祭。皆如禮。雍正十一年卒。年七十五。著有周易傳注七卷。筮考一卷。郊社考辨一卷。論語傳注二卷。大學傳注一卷。中庸傳注一卷。傳注問一卷。李氏學樂錄二卷。大學辨業四卷。聖經學規纂二卷。論語二卷。小學稽業五卷。擬太平第七卷。閩史鄙視五卷。怒谷後集十三卷。璩解格物心性。多本之說。惟論封建郡縣語不強同。其解釋經義。多與宋儒相反。然其論易以觀象爲主。兼用互體。謂聖教罕言性天。乾坤四德。必歸人事。屯蒙以下。亦皆以人事立言。陳搏龍圖。劉牧鉤隱。以及探無極。推先天者。皆使易道入於無用。其說頗醇實。不涉支離恍惚之說。其於大學所爭。在以格物爲周禮三物。謂孔子時三物教法尙存。人人所習。不必再言。惟以明德親民標其目。以誠意指其入手而已。格物一傳。可不必補。奇齡獨惡其說異己。作逸講箋以攻之。然當時多難璩說焉。璩弟子汪衆。清苑馮辰威縣劉調贊。皆能傳其學。辰爲撰年譜四卷。調贊又續一卷。

釋通理

釋通理。字達天。家直隸新河。族趙氏。髮黻之年。投本邑妙音鐸師。雖染。從祖顯如珍公受學。年十二。待顯至檀樹家。值衆僧誦法華經。師隨誦之。若宿習然。舉衆稱異。謂再來人也。至年十九。禮岫靈德彰律師。稟具足戒。遂依座。

下學律。未幾辭去。徧遊講席。謁衍法元。香岳來等諸老宿。皆以大器期之。雍正三年乙巳。居妙峯石草精舍。撰法華新疏。至方便品。初疑情頓發。執筆經旬。一詞難措。讀經至如是相處。恍然大悟。回觀諸經。向所疑滯者。皆洞然矣。歲庚戌。出世遺光。一住二十餘年。道風大振。乾隆辛未。受檀那請。開法於嘉興寺。居無何。復領香界之命。甲申。修三山菴。爲休老所。遂有終焉之志。丙戌夏。皇六子質王力挽。復出主拈花寺。師受濟北密印於古梅成禪師。傳賢宗教。觀於永祥煥法。主城市山林。歷遷四刹。皆以苦心實行爲住持。著述講演。爲佛事。乘戒俱急。爲策進。福慧圓修。爲自宗。兼復善開喻。而接納不倦。故四方學者。奔赴恐後。爰以道聲日著。上達宸聰。於辛卯冬仲。賜紫色伽黎。以旌異之。壬辰。開清字譯館。翻大藏諸經。師統三宗。通曉經旨。沙門日於館所。講證大義。庚子冬。復蒙勅旨。闡教禪師。時年八十矣。辛丑。盡出衣鉢之資。修華嚴永安塔。次年夏。示微疾。至六月十三日。集衆告別。泊然而逝。師生於康熙辛巳。世壽八十二。僧臘六十有三。門弟子奉全身塔於永安塔前。師貌溫和。氣剛果。質體豐厚。慧解過人。持身尙儉約。不憚勞苦。所至輒有興建。處順逆之際。操行無少變。有古尊宿風。住遺光嘉興日。敗壁頽垣。殊不介意。日與學者坐瓦礫堆中。激揚法華楞嚴等要旨。行道垂六十年。戒傳十四期。說法三十餘會。居常除齋粥。蒞衆外。便焚香注經。執筆輒竟日。若忘人間世。臨示寂。猶命弟子取圓覺新疏稿讀之。師危坐靜聽。恐錄者或有訛脫也。其生平著述。珍重可知矣。晚年嘗語曰。老僧別無長處。特六十餘年未離佛法耳。蓋誠諦語也。有法華等六疏行世。

全祖望

全祖望。字紹衣。一字樹山。浙江鄞縣人。年十六能爲古文。討論經史。證明掌故。雍正七年。以諸生充選貢。至京師。上侍郎方苞書。論喪禮或問。苞大異之。旋舉順天鄉試。戶部侍郎李紱見其文。曰。此黃震王應麟以後一人也。乾隆元年。薦舉博學鴻詞科。是春會試。先成進士。改翰林院庶吉士。不再與鴻博試。二年散館。以知縣用。遂歸。不復

出。方詞科諸人未集。紱以問祖望。祖望爲記四十餘人。各列所長。乃彙爲詞科摭言一書。先以康熙十八年百八十六徵士。接以今科。采諸人所著入之。已成大半。會將歸。未卒業。僅得前後姓名及舉主試錄三卷。性伉直。既歸。貧且病。饔飧不給。人有所餽。弗受。主講蕺山端谿書院。爲士林仰重。二十年卒於家。年五十有一。祖望爲學淵博。無涯涘。於書靡不貫串。在翰林與李紱共借永樂大典讀之。每日各盡二十卷。時開明史館。復爲書六通移之。先論藝文。次論表。次論忠義隱逸。兩列傳。皆以其言爲選。生平服膺黃宗羲。宗羲於明季諸人。刻意表彰。祖望踵之。詳盡而覈實。可當續史。家居後。修宗羲宋儒學案。又七校水經注。三箋困學紀聞。皆足見其汲古之深。又答弟子董秉純張炳蔣學鏞盧鏞等所問經史疑義。錄爲經史問答十卷。儀徵阮元嘗謂經學史才詞科三者得一足傳。而祖望兼之。其經史問答實足以繼古賢。啟後學。與顧炎武日知錄相埒。晚手定文藁。刪其十七。爲鮚埼亭文集五十卷。又著有讀易別錄。孔子弟子姓名表。漢書地理志稽疑。公車徵士小錄。續甬上耆舊詩。天一閣碑目。

江縉

江縉。字大紳。江蘇吳縣人。諸生。少不善記誦。逮弱冠。試爲文。數百言立就。詩宗陳子昂。杜少陵。袁枚盛稱之。時有僧不二。本滕縣諸生。厭棄世法出家。傳磬山宗。隱於吳。一日見縉虎邱題壁詩。詫曰。此白衣大有根器。縉後見寒山拾得詩。喜其從性海流出。因是爲學務通儒釋。與彭紹升往來最密。所爲古文。覃思奧蹟。其出儒入佛之作。言思難合。不可思議。紹升許之曰。噓氣成雲。王鳴盛亦云。讀大紳文。十洲三島。悉在藩溷間矣。嘗謂趙宋以來。儒與佛爭。儒與佛爭。輻輳紛紜。莫能是正。乃統其同異。通其隔閡。做明趙大洲二通之作。著二錄三錄。以明經世之道。又著讀書四十傷私記。以通出世之法。著讀易老私記。以貫穿天人之際。主建陽書院。昌明正學。既歸。閉戶習靜。不復應制舉。作無名先生傳云。先生講學不朱不王。先生著書不孟不莊。先生吟詩不宋不唐。先生爲人不獮不狂。先生處世不圓不方。又作撞庵先生記。自稱學无牆壁。行无轍迹。其孤往如此。晚年與彭紹升書。論孤往之趣。

曰。天之高也。不附於天。地之厚也。不附於地。古今之寥闊也。不附於古今。孤往而已矣。人物。孤往也。交游。孤往也。著述。孤往也。名海中人。老死不相往來矣。紹升歎焉。自莊屈以來。述作相望。具此心眼者。曾無幾人云。乾隆五十七年卒。年六十八。又有汪子文錄。

羅有高

羅有高。字臺山。江西瑞金人。乾隆三十年舉人。少慕馬周張齊賢之為人。負氣睥睨。習技擊。讀兵書。聞粵都宋昌圖有迂怪名。往見之。自陳所學。昌圖愀然曰。非儒者之急務也。則述張子見范文正言兵法。文正弗答。箴之。授以主敬持一二銘。有高翻然悔悟。介昌圖受業於鄧元昌。因徧讀先儒書。後見雷鉉。鉉戒之曰。子太聰明。如水銀瀉地。吾懼其流也。初以優行貢京師。及歸。忽登樓縱火自焚。家人驚救。得不死。狂走入山。數月後。迹得之。服沙門服。跌坐。與人言孝弟。歌泣無時。既渡錢塘揚子江。過甬東。多託迹佛寺中。及鄉薦。出彭啟豐之門。與其子紹升友善。因相勗爲性命之學。兼參竺乘。汪縉一見心折。爲文章。絕去依傍。務抒其所獨契。有與紹升書。言道必以文傳。詞甚辨。謂文與道一而已。修之於身。措之事業者。道也。修之於身。而次第其功候。節目之詳。明其甘苦得失之故。措之於事業。而條布其治蹟。數悉其德產。精微涵樑之極致。彰往察來。相協倫類。出於憂患。同民不得已之誠。其言奇正不同。其氣之行止。節族之長短。高下。抗除疾徐。壹順法象之自然。而不與以私智。以其燦著。陳修能之矩。昭事爲之則。烜照心目。物察倫章。則文命焉。豈得歧於道而二之也。又與法坤宏論春秋大旨。南宋諸儒所以評論之故。謂聖人作春秋。東規西矩。南衡北權中繩。五則不爽。萬物就裁。其本在於學易。學易之本。在於謹彝倫。慎言行。約之於禮。人之彝倫言行。壹於禮。則性復仁全。措之正。施之行。變化生而經緯天地之事起。此聖人所自盡。而願天下萬世同歸而無歧者也。南宋諸大儒。所爲固持堯舜孔孟之道。於國事慳德之會者。此春秋之義也。孟子述唐虞三代。於戰國擾攘之時。朱陸陳誠正義利之辨。於南北交訖之日。其揆一也。南宋諸大儒之所評論。天經

也。地義也。人行也。烏得而不斤斤也。繙見其書數曰。上帝臨壇。萬靈拱肅。世尊下降。諸天震動。於此文見之矣。紹升亦稱其文華梵交融。奏刀善然。傾倒甚至。又嘗見戴震於京師。爲訓故之學。著有釋蠹一篇。晚益歸心淨土。閉關七旬。讀楞嚴。謂東西二聖人權實互用。門庭迥別。其歸宿名相。離言思絕。一旦不立。二復何有。惟自證者知之。非可以口舌爭也。四十四年卒。年四十六。卒之日。盡焚其所著書。紹升輯其遺文。爲尋聞居士集八卷。

釋際醒

釋際醒。字徹悟。一字訥堂。又號夢東。京東豐潤縣人。族姓馬。父諱萬璋。母高氏。幼而穎異。長喜讀書。經史羣籍。靡弗采覽。二十二歲。因大病。悟幻質無常。發出世志。病已。至房山縣投三聖庵。榮池老宿。薙髮。越明年。詣岫雲寺。恆實律師圓具。次年聞香界寺隆一法師開演圓覺。師預會焉。晨夕研詰。精求奧義。遂悟圓覺全經大旨。復依增壽寺慧岸法師。聽講相宗。妙得其要。後歷心華寺。徧空法師座下。聽法華楞嚴金剛等經。圓解頓開。於性相二宗。三觀十乘之旨。了無滯礙。乾隆三十三年冬。參廣通粹如純翁。以向上事。師資道合。乃印心焉。是爲臨齋三十六世。觀山七世也。三十八年。粹翁遷萬壽寺。師繼席廣通。率衆參禪。策勵後學。津津不倦。十四年如一日。聲馳南北。宗風大振。每憶永明延壽禪師。乃禪門宗匠。尙歸心淨土。日課十萬彌陀。期生安養。況今末代。尤宜遵承。遂栖心淨土。主張蓮宗。日限尺香。晤客。過此。惟禮拜持念而已。五十七年。遷覺生寺住持。八年百廢盡舉。於淨業堂外。別立三堂。曰涅槃。曰安養。曰學士。俾老病者有所依託。初學者便於誦習。師於禪淨宗旨。皆深造其奧。律已甚嚴。望人莊切。開道說法。如瓶鷲雲興。與衆精修。蓮風大扇。遐邇仰化。道俗歸心。當時法門爲第一人。嘉慶五年。退居紅螺山資稭寺。以期終歲。奈因衲子依戀。迨隨。致難避跡。師爲法爲人。心終無厭。遂復留衆。欵成叢席。擔柴運水。泥壁補屋。一飲一餐。與衆共之。如是者又十年。十五年二月。詣萬壽寺。掃粹祖塔。辭諸山外護。囑曰。幻緣不久。人世非常。虛生可惜。各宜努力念佛。他年淨土好相見也。三月還山。命預辦茶毘事物。十月十七日。集衆付院務。命弟子

松泉領衆住持。誡曰。念佛法門。三根普被。無機不收。吾數年來與衆苦心建此道場。本爲接待方來。同修淨業。凡吾所立規模。永宜遵守。不得改絃易轍。庶不負老僧與衆一片苦心也。臨示寂半月前。覺身微病。命大衆助稱佛號。見虛空中幢旛無數。自西而來。乃告衆曰。淨土相現。吾將西歸矣。衆以住世相勸。師曰。百年如寄。終有所歸。吾得臻聖境。汝等當爲師幸。何苦留耶。十二月十六日。命監院師黃一設涅槃齋。十七日申刻。告衆曰。吾昨已見文殊觀音。勢至三大士。今復蒙佛親垂接引。吾今去矣。衆稱佛號愈勵。師面西端坐。合掌曰。稱一聲洪名。見一分相好。遂手結彌陀印。安詳而逝。衆聞異香浮空。供奉七日。面貌如生。慈和豐滿。髮白變黑。光潤異常。二七入龕。三七茶毘。獲舍利子百餘粒。門弟子遵遺命。請靈骨葬於普同塔內。師生於乾隆六年十月十四日未時。終於嘉慶十五年十二月十七日申時。壽七十。僧臘四十九。法臘四十有三。所著有示禪教律。念佛伽陀行於世。

顧棟高

顧棟高。字復初。又字震滄。江蘇無錫人。康熙六十年進士。授內閣中書。雍正時引見。以奏對越次罷職。乾隆十五年。特召內外大臣薦舉經明行修之士。時所舉四十餘人。惟大學士張廷玉尙書王安國侍郎歸宣光舉江南舉人陳祖范。尙書汪由敦舉江南舉人吳鼎。侍郎錢陳羣舉山西舉人梁錫瑛。大理寺卿鄒一桂舉棟高。此四人。論者謂名實允孚焉。尋奉旨皆授國子監司業。棟高以年老不任職。賜司業銜。皇太后萬壽。棟高入京祝嘏。特旨召見。拜起令內侍扶掖。棟高奏對。首及三吳敏俗。請以節儉風示海內。上嘉之。陛辭。賜七言律詩二章。以寵其行。十二年南巡。召見行在。加祭酒銜。賜御書傳經耆碩四字。二十四年卒於家。年八十一。棟高少與同里蔡德晉金匱吳鼎精心經術。尤嗜左氏傳。遇拂意。家人置左傳於几上。則怡然誦之。不問他事。著春秋大事表五十卷。輿圖一卷。附錄一卷。以春秋列國諸事。比而爲表。又爲辨論以訂舊說之譌。凡百三十一篇。條理詳明。議論精覈。多發前人所未發。又毛詩類釋二十一卷。續編三卷。采錄舊說。發明經義。頗爲謹嚴。又有尙書質疑二卷。大抵棟高窮

經之功。以春秋爲最。其論學則合宋元明門徑而一之。據新安以合金谿。爲調停之說。著有《大儒粹語》二十八卷。

凌廷堪

凌廷堪字仲子。又字次仲。安徽歙縣人。生有異稟。觀書十行俱下。幼孤貧。母氏授之讀。稍長。工詩及駢散文。兼爲長短句。客揚州。金博士兆燕目爲奇人。勸入都。遊翁覃溪門。乃究心經史。以國子生應京兆試。不售。南還。阮元時尙未遑。因與訂交。再赴試。仍報罷。愈發憤攻苦。遂中乾隆戊申北榜副貢。己酉。本省鄉試中式。聯捷成進士。以知縣用。自請改教職。遷寧國府學教授。奉母之官。畢力著述。久之。丁母憂去。主講敬亭紫陽書院。免喪。阮元撫浙。延訓其子。歸卒於家。年五十三。廷堪於學無所不窺。自就官陵陽。尤專攻禮學。著《禮經釋例》十卷。謂《禮經》委曲繁重。不得其經緯塗徑。雖上哲亦苦其難。苟得之。中材可勉赴焉。經緯塗徑之謂何。例而已矣。如鄉飲酒。鄉射。燕禮。大射。不同也。而其爲獻酢。酬旋酬。無算爵之例。則同也。聘禮。覲禮。不同也。而其爲郊勞。執玉行享。庭實之例。則同也。特牲。饋食。少牢。饋食。不同也。而其爲尸飯。主人初獻。主婦亞獻。賓長三獻。祭畢飲酒之例。則同也。鄉射。大射。不同也。而其爲司射。誘射。初射。不釋。獲再射。釋獲。飲不勝者三射。以樂節射。飲不勝者之例。則同也。不會通其例。一以貫之。祇厭其糾葛重複已耳。烏覩所謂經緯塗徑者哉。乃區區爲八例。以明同中之異。異中之同。曰通例。曰飲食例。曰賓客例。曰射例。曰變例。曰祭例。曰器服例。曰雜例。又著《燕樂考原》六卷。以隋沛公鄭澤五且七調之說。爲燕樂之本。而參以段安節《琵琶錄》。張叔夏詞原。遼史樂志諸書。考之琴與琵琶之弦音。從遼史四且定四均二十八調。自謂孤學獨鳴。無師無友。爲宋以來講樂家所未悟焉。其《校禮堂文集》三十六卷。中如《九慰》。《七戒》。兩晉辨亡論。十六國名臣序贊。皆上推騫選。鄉射五物考。九拜解。九祭解。釋牲。詩楚茨考。旅酬下爲上解。則專在詁經。皆卓然可傳者。推復禮三篇。大致言古聖使人復性者。學也。所學卽禮也。孔子言勇而無禮則亂。直而無禮則絞。又曰。好直不好學。其蔽也絞。好勇不好學。其蔽也亂。孟子曰。上無禮。下無學。故知所學者卽禮也。顏淵問仁。孔子告之者。惟

禮焉爾。顏子歎道之高堅，前後迥博文約禮。然後如有所立，即立於禮之立也。子思言天命之爲性，率性之謂道，修道之謂教。所教者，因人所當行而品節之，卽禮也。盡乎禮，斯可以復性。故所謂格物者，物卽理也。所謂慎獨者，亦卽禮也。禮有節文、度數，非空言理者可託也。餘有詩集十四卷，梅邊吹笛譜二卷，充渠新書二卷，元遺山年譜二卷，劄記若干卷，欲撰魏書音義未成。

程瑤田

程瑤田，字易田，又字易疇，安徽歙縣人。少入塾，塾師詰之曰：「盍言爾志。」曰：「無志。」窮達由天命，窮爲匹夫，不得曰非吾志而卻之也。達爲卿相，不得曰吾志不及此而逃之也。時坐者起敬曰：「是聖賢之志也。」瑤田復應曰：「讀書不當師聖賢耶？」顧讀書百徧，或不能成誦，而好深沈之思，比長，與戴震金榜俱學於江永，雞鳴而起，夜分就寢，數十年如一日。補諸生。鄭虎文掌教紫陽書院，甚重之。九應鄉試，至乾隆庚寅恩科始中式。大挑二等，選嘉定縣教諭。時年已六十有四矣。尋乞歸。嘉慶元年，舉孝廉方正。卒年九十。瑤田篤志著述，其學長於涵泳經文，得其真解，不屑屑依傍傳注。所撰通藝錄十九種，附錄七種，凡義理、訓詁、制度、名物、聲律、象數，無不賅備，尤精者爲儀禮喪服、緦麻章末、長殤中殤降一等四句。鄭氏以爲傳文，不杖期章，惟子不報傳文，公妾以及土妾爲其父母傳文。鄭氏以爲失誤。大功章大夫之妾爲君之庶子，女子子嫁者未嫁者爲世父母叔父母姑姊妹，舊讀以大夫之妾爲建首，下二爲字皆貫之。鄭氏謂女子別起黃下，斥傳文爲不辭，皆一一援據經史，疏通證明，以規鄭氏之失。成儀禮喪服足徵記，考工記諸言聲句聲折，鄭君度直矩解之，致與前後經文不合，則謂聲折不明，由於倨句不明，欲明倨句，先辨倨字。矩有直者有曲者，倨句之云，折其直矩而爲曲矩也。又曰：車人爲耒曰倨句聲折，韋人爲皋陶曰倨句聲折，匠人行莫水曰聲折者，以參伍此三聲折，不見倨句之度者，同乎聲氏之倨句。一矩有半爲聲折也。成聲折古義，自來言九穀者，梁稷不分，乃據說文禾嘉穀也。粟嘉穀實也。米粟實也。梁米名也。稷齊也。五穀之長，證梁

即今之小米連囊者。曰禾實曰稟。稟實曰米。米曰梁。此穀古人貴之。故曰嘉穀。即今之高梁。其種最先。故曰五穀之長。成九穀考。以揚州三江只一江。班固地理志三見揚州川者是。志職方之其川三江非。說禹貢主鄭康成。正鄆氏水經注之譌。成禹貢三江考。考匠人爲溝洫之制。謂溝。溝也。縱橫之說也。名之曰溝。所以象其形。象形曰溝。會意曰洫。洫字从血。以洫承溝。是血脈之流通也。滄。會也。會上衆水。以達於川。初分終合。所以盡水之性情而不使有汎濫之害也。成溝洫疆理小記。又論學小記一卷。外篇一卷。其論性謂性從質形氣。而有譬之水與鏡。水之薄。鏡之明。質形氣之清明也。是卽性也。清明能鑑物。濁暗不能鑑物。此智愚所由分。然極濁極暗。清明自在其中。是卽下愚不移者。其性之善自若也。又謂性不可見於情。見之情。是心之起念。心只一念。善者居其先。惡則從善而轉之耳。今爲盜賊者。其初只有謀生一念。豈不欲擇其善者爲之。至皆不可得。乃不得已而爲盜賊。又必有一二爲盜賊者。從而引之。所謂習也。其餘爲宗法小記。釋宮小記。考工創物小記。水地小記。數度小記。聲律小記。解字小記。釋草釋蟲小記。論學外篇等。晚年失明。口授琴音記。續編使其孫寫定。旁及詩歌書法。無不精覈。別有讓堂詩鈔十八卷。藏於家。

楊文會

楊文會。自號仁山。安徽石埭人。母孫氏。夢至古剎。見巨甕覆以笠。啓視之。蓮也。驚而寤。生文會。年十四。能屬文。不喜舉子業。暇則與朋友聯社角詩爲樂。性喜書。嘗昇大籠自隨。凡音韻曆算天文輿地。以及黃老莊列之術。靡不探蹟。會大病。見馬鳴菩薩起信論。大好之。先是。有老尼授以金剛般若經。歎其微妙。飯仰轉竺。自後遇親朋客遠方者。輒就求遺典。見行脚僧。必詢所學。於是一以西土聖賢爲宗。發寤於起信。充之以法華。大而化之以華嚴。會通之以唯識。而歸其墟於淨土。畫作務。夜則誦經念佛號。或習靜作觀。至漏盡始就寢。又考造像度量。取淨土諸經。審定其章品。延畫者作極樂世界依正莊嚴圖。大悲觀世音像。張之壁以崇供養。其論學大旨。統以十宗。以爲

出世三學。持戒爲本。首標律宗。佛轉法輪。先度聲聞。次之以小乘成實俱舍二宗。東土學者。羅什之徒。首稱與盛。繼以三論宗。建立教觀。天台方備。賢首闡華嚴。慈恩宏法相。稱爲教下三家。拈花一脈。達摩別傳。灌頂一家。金剛密授。專脩何門。皆能證道。但根有利鈍。學有淺深。其未出生死者。亟須念佛向西。以防退墮。卽已登不退者。尤當面觀彌陀。親承法印。故淨土橫超。實爲捷要。又嘗答西蜀德高長老質疑十八問。痛抉禪病。其書曰。觀所質其弊有二。一者誤認六塵緣影爲自心相。以爲現前知覺之心。卽是教外別傳之心。若果此心卽是祖師心印。何待達摩西來。始傳二祖。又何待五祖門下七百餘僧衆。獨傳六祖。當知祖師心印。超越常情。非過量英傑不能領薦。近代根器淺薄。輒以禪宗自命。究其旨趣。茫無所知。何論凡聖。情盡體露。真常二者。但闕宗門語錄。經論全未措心。不分解行。不明歷位。處處扞格。無由自通。欲除二弊。須誦說大乘起信論。通利造微。深究賢首義記。起信論者。馬鳴菩薩所造。馬鳴禪宗十二祖。教宗圓融。爲學佛之要典。進之以楞嚴正脈。唯識述記。楞嚴唯識通。則他經可解矣。所答折收互用。兼綜性相二家。識者謂靈峯示滅以來。現居士身說法者。未曾有也。父卒。旣返葬。旅食金陵。一時遽於佛學。真定王梅叔。邵陽魏剛己。陽湖趙惠甫。武進劉開生。嶺南張浦齋。長沙曹鏡初。皆與之游。共切磋大事。閱末法衆生。不見全經。文雙經冊書遭兵燹。多零敝。於是始發大心。流布龍藏。誓以宏法度人爲務。手定章程。規金陵隙地爲度經板所。同時江都鄭學川。亦創江北刻經處於揚州。與金陵後先倡導焉。又親航大海至英倫法蘭西。購日本新輯小字藏於其國。旣走京師。禮旃檀釋迦像。會妻弟蘇少坡隨節而東。則郵書南條文雄。求中土失傳諸籍。又偕英李提摩太繙起信論成歐文。曰。此他日佛教西行之漸也。印度摩訶波羅者來游。文會訂佛教教科書授之。使歸而振興母邦。是時日本真宗建本願寺金陵。頗嘗蓄淨土諸宗。幻人上人著法華性理會解或問。拂事相而談性理。文會皆馳書辨其失。其宏護勸勉如此。歲丁酉。丁孫太夫人憂。服闋。詔其三子曰。我年二十八。聞佛法。已誓出家。徒以母故。今母亡而我亦老。無能持出家律儀矣。汝等當自謀食。丐我一席地。盡佛教事。勿廂我。於是析所置金陵房舍器具。及所藏經典造像歸刻經處。公之十方。又就刻經處立校。顏曰。祇洹精舍。設

佛學研究會。月一會。七七講經。興起者日益衆。未幾。示微疾。知不起。召同志至。視所刻經大藏輯要者。規其目。爲華嚴部三十二。方等部六十六。涅槃部十二。般若部二十三。法華部十六。法相部二十五。密部五十六。淨土部五十七。小乘經律論二十七。大乘律論三十八。西土撰集禪宗法宗傳記等。又若干部。像十萬餘張。倍刻經。凡雕二百五十八。未泐者半之。則曰。四大無常。我在世一分時。一分時報佛恩。我力不能報。有陳穉菴陳宜甫歐陽競無在。今屬累三君。我何憂。及革。禁家人勿哭。示以往生正因。曰。此彌陀願力也。生平乘急戒緩。生品不高。花開見佛。自謂差速。遂卒。年七十有五。時宣統辛亥八月一日也。文會少不羈。習騎射擊刺之術。洪楊亂。里居佐當事者。襄團練。跣足荷槍。先士卒。得謀。手刃之。血濺裾。曾文正克金陵。飭辦穀米局。董工程。經理漢口鹽局。會隨曾惠敏劉芝田兩使英法。入世出世隨化無方。殆不可測。其學佛因緣。學學大者。若有大宗地玄文本論略注。陰符道德莊列發隱。嘗以日本續藏多駁糅。謾提要正之。竟未成。歿後同志輯其生平論學諸文爲等不等觀雜錄。配蘇夫人先卒。

嚴復

嚴復。初名宗光。字又陵。一字幾道。福建侯官人。早慧。嗜爲文。閩督沈葆楨初創船政。招試英俊。結海軍將才。得復文奇之。用冠其曹。則年十四也。既卒業。從軍艦練習。周歷南洋黃海。日本窺臺灣。葆楨奉命籌防。擊之東渡。飄敵。勘測各海口。光緒二年。派赴英國海軍學校肄戰術及礮臺建築諸學。每試輒最。侍郎郭嵩燾使英。賞其才。時引與論析中西學術同異。學成歸。北洋大臣李鴻章方大治海軍。以復總學堂。二十四年。詔求人才。復被薦。召對稱旨。諭繕所擬萬言書以進。未及用。而政局猝變。越二年。避拳亂南歸。是時。人士漸傾向西人學說。復以爲自由平等權利諸說。由之未嘗無利。脫靡所折衷。則流蕩放佚。害且不可勝言。常於廣衆中陳之。復久以海軍積勞。敝副將。盡棄去。入貴爲同知。累保道員。宣統三年。海軍部立。特授協都統。尋賜文科進士。充學部名詞館總纂。以碩學

通儒徵爲資政院議員。又授海軍一等參謀官。復殫心著述。於學無所不窺。舉中外治術學理。靡不究極原委。抉其失得。證明而會通之。精歐西文字。所譯書以瓊辭遠奧旨。其天演論自序有曰。仲尼之於六藝也。易春秋最嚴。司馬遷曰。易本隱而之顯。春秋推見至隱。此天下至精之言也。始吾以爲本隱之顯者。觀象繫辭。以定吉凶而已。推見至隱者。誅意褒貶而已。及觀西人名學。則見其格物致知之事。有內籀之術焉。有外籀之術焉。內籀云者。察其曲而知其全者也。執其微以會其通者也。外籀云者。援公理以斷衆事者也。設定數以逆未然者也。是固吾易春秋之學也。遷所謂本隱之顯者。外籀也。所謂推見至隱者。內籀也。二者。卽物窮理之要術也。夫西學之最爲切實。而執其例可以御蕃變者。名數實力四者之學而已。而吾易。則名數以爲經。實力以爲律。而合而名之曰易。大宇之內。實力相推。非質無以見力。非力無以呈質。凡力皆乾也。凡質皆坤也。奈端動之例三。其一曰。靜者不自動。動者不自止。動路必直。速率必均。而易則曰。乾其靜也專。其動也直。有斯賓塞爾者。以天演自然言化。其爲天演界說曰。倉以合質。闢以出力。始簡易而終雜糅。而易則曰。坤其靜也翕。其動也闢。至於全力不增減之說。則有自強不息爲之先。凡動必復之說。則有消息之義。居其始。而易不可見乾坤或幾乎息之旨。尤與熱力平均。天地乃毀之言相發明也。大抵古書難讀。中國爲尤。二千年來。士徇利祿。守闕殘。無獨闢之慮。是以生今日者。乃轉於西學。得識古之用焉。辛酉秋卒。年六十有九。著有文集。及譯天演論。原富羣學肆言。穆勒名學。法意羣己權界論。社會通經等。

朱次琦

朱次琦。廣東南海人。道光二十七年進士。分發山西。咸豐二年。攝襄陵縣事。縣有平水。與臨汾縣分蹊。田畝。居民爭利構獄。數年不決。次琦至。博詢訟端。則強豪壟斷居奇。有水無地者。有地無水者。有地無水者。向無買水券。予之地。弗予之水。有水無地者。向有買水券。雖無地得以市利。於是定以地隨糧。以水隨地之制。又會臨汾縣

知縣躬親履畝。兩邑田相若稅相直也。迺定平水爲四十分。縣各取其半。復於境內設四網維持之。曰水則。曰用人。曰行水。曰陡門。實得水田萬四百畝有奇。邑人立碑頌之。繫囚趙三。不稜劇盜也。越獄逃。次琦未抵任。先出重賞。購知其所適。亟假郡捕。前半夜疾馳百二十里。至曲沃郭南以俟。盜衆方飲酒。家役前持之。忽樓上下百炬齊明。則赫然襄陵縣燈也。迺伏地就縛。比縣人迎新尹。尹已尺組繫原賊入矣。遠近以爲神。河東歲患狼。次琦募獵戶捕之無獲。乃檄禱西山神祠。天忽大霧。旬日。人得跡獸所出。攢火槍擊之。無脫者。半月得狼百有七。患遂絕。每行縣所至。拊循煦煦。老稚迎笑。有遮訴者。索木倚在道與決。能引服則已。恆終日不答一人。其他預讀書日程。創保甲。追社倉二萬石。禁火葬。罪同姓爲婚。卓卓多異政。在任百九十日。民俗大化。其去也。攀留萬人。至門陔橋折。爲立主祀之鄧伯道祠。後別建朱使君祠。春秋報祀弗絕。先是。南方盜起。北至揚州。次琦猶在襄陵。謂宜綢繆。全晉聯絡關隴。爲三難。五易十可守。八可征之策。大吏不能用。遂引疾去。歸則講學九江鄉。生徒百數十人。晉省弟子亦有來學者。足不入城市。有後朱子之稱。時稱說浦江鄭氏。江州陳氏諸義門。及朝廷捐產准旌之例。由是宗人捐產贍族。合金數萬。次琦呈請立案。爲變通范氏義莊章程。設完課祀先養老勸學。矜恤孤寡諸條。刊石世守之。同治元年。與同邑徐台英奉旨起用。次琦竟不復出。光緒七年。兩廣總督張樹聲巡撫裕寬疏其學行。特賞五品卿銜。逾數月卒。次琦生平論學。平實敦大。嘗論漢之學。鄭康成集之。宋之學。朱子集之。朱子。又即漢學而精之者也。宋末以來。殺身成仁之士。遠軼前古。皆朱子力也。然而攻之者互起。有明姚江之學。以致良知爲宗。則攻朱子以格物。乾隆中葉。至於今日。天下之學。以考據爲宗。則攻朱子以空疏。一朱子也。攻之者乃矛盾。嗚呼。古之言異學也。畔之於道外。而孔子之道隱。今之言漢學宋學者。咻之於道中。而孔子之道歧。果其修行讀書。斷至於古之實學。無漢學無宋學也。凡示生徒修行之實。四曰敦行孝弟。曰崇尚氣節。曰變化氣質。曰檢攝威儀。讀書之實。五曰經學。曰史學。曰掌故之學。曰性理之學。曰詞章之學。一時咸推爲人倫師表云。著有國朝名臣言行錄。五史實徵錄。晉乘國朝逸民傳。性學源流。蒙古聞見等書。手輯朱氏傳芳集五卷。撰定南海九江朱氏家譜十二卷。

大雅堂詩集一卷。燔餘集一卷。彙中集二卷。

夏震武

夏震武字伯定。號滌菴。世居富陽之靈峯山。學者稱靈峯先生。其先本媯姓。周時受封於杞。杞亡。遂改姓夏。後回會稽。析居永興。吳時有五官中郎將方者。以孝子顯。晉表其鄉。爲夏孝三都。永興。今蕭山也。元時乃徙今里。父範金。好宋儒之學。以強己。恐人求實踐。勝其堂曰隘恕。太平軍之亂。拯活數十百人。有德鄉里。族黨間。母同邑汪廷斌女。通知詩書。震武生五歲。母授之讀。舉毛詩大學中庸章句。輒能成誦。同治十二年。舉於鄉。明年。成進士。會試。總裁萬青黎見而歎曰。舉頭天外。不世才也。以疾未覆試歸。侍郎宗室寶廷。故爲鄉試舉主。尤重震武。嘗謂閩海內士大夫多矣。未有堅定如震武者。由是益奮勵。以聖學自期。後入京覆試。朝貴聞其名。爭欲致之門下。震武兢兢持名節。不爲阿附之行。數年。以朝考授主事。選職工部營繕司。入則正色危坐。出則讀書私舍。凜然不可干以非義。同部皆嚴憚之。既而乞養。改教職。父語之曰。吾所望於汝者。豈爲養哉。故事。部曹仰給於印結錢。戒勿取。光緒六年八月。上疏請修明祖制。以扶國本。不報。時收復新疆。與俄畫界。使臣受俄脅制。多違失。中樞不知所爲。震武憤甚。疏劾枋臣沈桂芬王文韶。乞賜罷責。又劾恭親王寶鋆畏廉。請下部嚴議。復具疏言俄事有五誤。十可戰。一不可戰。陳戰守十六策。皆人所不敢言者。願司員上封事。必請於尙書。乃得代奏。尙書不嘗至。震武乞掌印白尙書。封事不可私達。請尙書到衙視疏。存體制。全士名節。管部務大學士尙書侍郎等至。揭封視疏。相顧失色。謂不可以危詞聳聽。震武慨然曰。疏既具矣。尙書不代奏。司員願不可至。都察院劾尙書乎。時尙書常熟翁同龢也。乃曰。言戰守十六策甚當。安敢不代奏。獨司員劾大臣。本朝無此例。震武謂欽定臺規現在。何司員有不可劾大臣例。本朝二百餘年。無劾大臣之司員者。非例不可。人不爲也。非例所必禁。即義所當言。楊椒山參嚴嵩。劉念臺參魏忠賢。皆司員也。尙書受國厚恩。視樞臣主議。誤國不力爭。反阻遏言路。何面目對士大夫。天下後世。其謂尙

書何等。司員何等人。同蘇聞言。乃代奏。旨下留覽。遂乞歸。父歿。遵遺命以禮治喪。不飲酒。不食肉。不脫衰絰。僧道悉屏不用。既葬。寢苦枕塊於墓側。母歿。遵命治喪亦如之。再廬母墓。甲午。東事起。我軍敗績。明年。和議成。草疏千言。欲以死諫。咸舊交書切責。謂墓廬非死諫之地。廢員無死諫之責。震武默然。乃毀其草。江蘇巡撫趙舒魁。微寧池太廣道袁飛遺書徵聘。並辭不赴。二十四年七月。朝廷下詔。吏民皆得上書言事。震武草疏乞政科舉新章。防流弊。會政變作。罷前詔。疏不得上。慮官闈有非常。書抵浙江學使徐公致祥。使調和兩宮。請太后旨。廣求忠孝儒臣。置上左右。朝夕納誨。二十六年七月。京畿亂。民以拳教肇禍。殺外使。入國聯軍陷京師。兩宮西狩。浙江學使文治以其名薦。恐終不出。踵門親勸。九月。聞召。疾奔行在。以外兵蹂宮禁。爲國大辱。奏兩宮罷和決戰。外人脅戮親貴大臣。損國體。必不可從。乞急召雲南提督馮子材。付以戰守事。疏上。皆軍國大計。太后覽之痛哭。諭以所奏定國是一條。寄議和全權大臣李鴻章。恐鴻章置不顧。遣震武至鴻章所。宣諭之。震武奏謂。命臣宣諭李鴻章。不如命臣宣諭洋人。臣願以死力爭。時大臣榮祿王文韶鹿傳霖皆袖手俟和議。太后揮涕責之曰。夏震武一草莽小臣。知主憂臣辱之義。眷眷愛國若此。汝等身爲朝廷大臣。受國厚恩。乃竟不若彼耶。震武直言極諫。整震中外。一時正人君子。皆倚以爲重。交章薦於朝。始有存記之命。震武既歸。省吏邑宰。交相推重。以修邑志。任學校聘。皆不就。宣統元年。浙江教育總會公舉爲會長。代表踵門交請。乃允受代。三月。學務公所議長陸元鼎。巡撫增韞。提學使司李傳元。復請監督兩級師範校。亦受代。三月。當其任教育會長。既至。即以廉恥教育宣於衆。及任師校。亦以是勉諸生。謂今日大亂將作。救亡之策。莫急於倡廉恥以正人心。聞者汗浹。受任六月。絕干請。杜奔走。忤當事意。有教習同盟會惑諸生以絕震武。日本教習喟然歎曰。中國必亡。忠孝節義有一字即可立國。夏君廬墓大年。孝子也。彈劾親貴。奔走行在。忠臣也。若此。在我國則歡迎不暇。而中國拒之。惟恐不速。中國必亡。紳士蔣慶振等五十餘人。具詞營路。挽震武復出。引日教習語。用相誥誡。衆不能聽。而震武則已歸矣。時竇廷早薨。兩子殉庚子之難。震武爲至京弔其家。搜遺稿刻之。時劉廷琛方爲大學堂總監督。以總教七科相聘。乃以孟子講義大學

衍義講授教諸生。未幾舉御史安維峻自代。以去國變以後。大總統袁世凱。浙江都督朱瑞。呂公望。皆以書來。政事堂遣吏齋玄纁聘辭。至皆以書辭。由是杜門講學。足跡不及城市。謂今日大變。儒者當爲先聖先王之道法守節。而拘拘於一姓之存亡者。乃匹夫之小諒。非儒者之節也。自是笄髮委貌。玄衣垂紳。昭其志節。聞望既隆。從學之士。北至秦晉。南極滇粵。東越朝鮮。咸以北面師事爲幸。十數年間。絡繹於道。乃慨然歎曰。遠而在上。救天下以政。窮而在下。救天下以學。國無道。至死不變。今其時矣。又以儒者處困慮難。不幸生值禍變。當自驗其定力。孔門弟子。汲汲皇皇。權門有所不避。而孔子不非之者。聖賢救世之心也。而門下私讖。以爲救人心莫急於廣聖學。廣聖學莫先於求友聲。於是倡教孔學會。亦有請墾田於關外者。震武皆許焉。自言爲學。少嘗喜老氏之說。專主靜坐。觀妙觀斂。參以佛氏說。認取本來面目。雞鳴而起。靜坐達旦。旣而悟靜坐乃異端。放任自由所爲。非聖門居敬之學。以用敬不用靜爲程朱晚年定論。又以陸王認心爲性。必至猖狂無忌。其害不止陽儒陰釋。自此確守程朱。以居敬窮理。力行交修爲用力之途。以窮理爲知言之本。以居敬力行爲養氣集義之功。合孟子程朱而一之。平居處己接物。動必以禮。禮又致嚴於喪祭。求備於冠昏。兩居親喪。旣衰經廬墓。而妻喪衰經屨杖。一遵儀禮。妹喪爲之卜地治葬。旣望。挂片席。居旬日乃去。姊弟之喪。衰經疏食。不以老辭。前居寶公之喪。推朋友總之義。以及師門。制服三月。隆裕太后崩於國變以後。則曰。禮爲舊君爲舊君母妻。皆齊衰三月。不以國之存亡改易。前居穆宗德宗孝貞孝欽帝后之喪。皆已行之。今於后不忍有異。亦持服三月。昔應召行在。以外兵深入。宗社震驚。旣七上疏。有中興十六策。尤請兩宮援太廟毀例。素服減膳。爲十六策先。兩宮旣崩之十九年。盜發高宗孝欽陵寢。卽援太廟毀例。爲位而哭。其制服則以弟喪齊衰在身。不復變易。門人孫迺瑤卒於門。哭而斂之。告其孤歸葬。其祀祖則守父遺法。謂舅婦不能同席。家堂地室。四親不能異席。則合四代之考居右。妣皆居左。分爲二席。忌日則考妣合祀。求通於情。亦不肯禮。祀聖則就精舍廣其堂楹。中奉孔子神主。周四子顏曾思孟。宋五子周程張朱。皆直捷道統。配饗兩序。其他不得與。臨祭。席地陳饌。奉主就席。儀物器數。則遵周制。爲子娶婦。先行冠禮。嫁女先行笄禮。

昏禮。以儀禮爲本。輔以書儀家禮。日常昧且興起。讀書處事。鉅細精審。終日不見倦容。周旋賓客。揖讓雍容。對越神明。登降肅穆。歿之前三日。爲母忌日。具衣冠致祀。拜跪不許扶持。其執禮之恭類如此。所著已梓行者。悔言辨正。入道大義錄。袁經考覈。資治通鑑後編校勘記。孟子講義。大學衍義講授文集。續著有論語講義。孟子講義。生於咸豐三年。癸丑十二月十八日。歿於庚午歲五月朔日。年七十八。

學術 樸學

毛奇齡

毛奇齡。字大可。一字齊于。浙江蕭山人。康熙十八年。以廩監生薦舉博學鴻儒科試。列二等。授翰林院檢討。充明史館纂修官。二十四年。充會試同考官。尋假歸。得痺疾。遂不復出。奇齡少穎悟。明季避兵縣之南山。築土室。讀書其中。著毛詩續傳三十六卷。既以避警流寓江淮間。失其稿。乃就所記憶。著國風省篇一卷。詩劄一卷。毛詩寫官記四卷。復在江西參議道施閩章處。與湖廣楊洪才說詩。作白鷺洲主客說詩一卷。明嘉靖中。鄞人豐坊僞造子貢詩傳。申培詩說行世。奇齡作詩傳說駁議五卷。引證諸書。多所糾正。消在史館。進所著古今通韻十二卷。聖祖仁皇帝善之。詔付史館。歸田後。僦居杭州。著仲氏易。一日著一卦。凡六十四日而書成。託於其兄錫齡之緒言。故曰仲氏。凡三十卷。又著推易始末四卷。春秋占筮書三卷。易小帖四卷。易韻四卷。河圖洛書原舛編一卷。太極圖說遺議一卷。其言易。發明荀虞干侯諸家。旁及卦變卦綜之法。自後儒者多研究漢學。不敢以空言說經。實自奇齡始。而辨正圖書。排擊異學。尤有功於經義。奇齡分校會聞時。閱春秋房卷。心非故傳之偏。有意傳述。至是乃就經文起義。著春秋毛詩傳三十六卷。春秋簡書刊誤二卷。春秋屬辭比事記四卷。條例明哲。考據精覈。又欲全著禮經。以衰病不能。乃次第著昏喪祭禮。宗法廟制。及郊社禘祫明堂學校諸問答。多發先儒所未及。至於論語

大學中庸孟子各有考證。而大學證文及孝經問。援據古今。辨後儒改經之非。持論亦有可采。奇齡淹貫羣書。詩文皆推倒一世。而自負者在經學。然好爲駁辨。他人所已言者。必力反其詞。古文尙書自宋吳棫後。多疑其僞。及閻若璩作疏證。奇齡力辯爲真。遂作古文尙書冤詞八卷。又刪舊所作尙書廣聽錄爲五卷。以求勝於若璩。而周禮儀禮。奇齡又以爲戰國之書。所作經問。其中排斥如錢丙蔡氏之類。多隱其名。而指明攻駁者。惟顧炎武閻若璩胡渭三人。以三人博學重望。足以攻擊。而餘子以下。不足齒錄也。素曉音律。家有明代宗藩所傳唐樂笛色譜直史館。據以作竟山樂錄四卷。及在籍。聞聖祖仁皇帝論樂。諭羣臣以徑一圓三隔八相生之法。因推闡考證。撰聖諭樂本解說二卷。皇旨定聲錄八卷。三十八年。聖祖南巡。奇齡迎駕於嘉興。以樂本解說進。溫諭獎勞。聖祖三巡至浙。奇齡復謁行在。賜御書一幅。五十二年。卒於家。年九十一。門人蔣樞編輯遺集。分經集文集二部。經集自仲氏易以下凡五十種。文集合詩賦序記及他雜著。凡二百三十四卷。著述之富。甲於近代。李天馥嘗謂奇齡有不可及者三。不挾書冊。而下筆有千萬卷。一也。少小避人。盛年在道路得怔忡疾。遇疾發。求文者在門。捫腹四應。頃刻付去無誤。二也。讀書務精覈。羣經諸子及諸瑣屑事皆極其根柢。而貫其枝葉。偶一論及。輒能使漢宋儒者拄口不敢辨。三也。然奇齡恃其縱橫博辨。肆爲排擊。欲以劫服一世。漢以後人。俱不得免。而其所最詆者爲宋人。宋人之中。所最詆者爲朱子。故後人反詆之者亦多。全祖望嘗發其集。爲蕭山毛氏糾謬十卷。祖望稱奇齡之才。要非流輩所易及。使其平心易氣以立言。其足以羽翼儒苑無疑。世謂公論云。

胡渭

胡渭。初名渭生。字融明。號東樵。浙江德清人。年十五。爲縣學生。入太學。篤志經義。精輿地之學。尙書徐乾學奉詔修一統志。開局洞庭山。延常熟黃儀顧祖禹太原閻若璩及渭分纂。渭著禹貢錐指二十卷。圖二十七篇。謂漢唐二孔氏宋蔡氏於地理多疏舛。如三江當主鄭康成說。禹貢達於河。河當從說文作蒗。梁波既蒗。波當從鄭康成

作播。梁州黑水與導川之黑水不可溷爲一。及博稽載籍考其同異而折衷之山川形勢郡國分合同異道里遠近平險討論詳明。宋以來傳實程大昌毛晃而下注再頁者數十家精覈典臚此爲之冠。又撰易圖明辯十卷專爲辨定圖書而作。初陳搏推闡易理衍爲諸圖其圖雖易而生故以卦爻反覆研求無不符合。傳者務神其說遂歸其圖於伏義謂易反由圖而作。又因繫辭河圖洛書之文取大衍算數作五十五點之圖以當河圖取乾鑿度太乙行九宮法造四十五點之圖以當洛書陰陽奇偶一一與易相應。傳者益神其說真以爲龍馬神龜之所負謂伏義由此而有先天之圖實則唐以前書絕無一字符號而突出於北宋之初由邵子以及朱子但取其數之巧合未暇究太古以來誰從授受故易學啟蒙易本義前九圖皆沿其說。然考宋史儒林傳啟蒙本屬蔡元定創稿非朱子自撰其答劉君房書曰啟蒙本欲學者且就大傳所言卦畫著數推尋不須過爲浮說而自今觀之如河圖洛書亦不免尙有贗語至於本義卷首九圖爲門人所依附朱子當日未嘗堅主其說元陳應潤作爻變義蘊始指諸圖爲道家假借吳澄歸有光諸人亦相繼排擊國朝毛奇齡黃宗羲爭之尤力然皆未能窮溯本末一挾所自來。謂則於河圖洛書五行九宮參同先天太極龍圖易數鉤隱圖啟蒙圖書先天後天卦變象數流弊引據舊文互相參證以箝依託之口使學者知圖書之說乃修鍊術數二家旁分易學之支流非作易之根柢視禹貢雖指尤爲有功經學又撰洪範正論五卷謂漢人專取災祥推衍五行穿鑿附會亂彝倫攸斂之經撰大學翼真七卷大旨以朱子爲主僅謂格致一章不必補傳力闢王學政本之誤所論一軌於正。漢儒傳會之談宋儒變亂之論埽而除焉。康熙四十三年聖祖南巡。謂以禹貢雖指獻行在御覽嘉歎宣至直廬賜饌並御書詩扇及耆年篤學四字賜之。五十三年卒。年八十二。

徐乾學弟秉義

徐乾學字原號健庵江南崑山人。康熙九年一甲三名進士授編修。十一年充順天鄉試副考官以給事中楊雍

建勛奏副榜遺取漢軍卷。與正考官修撰蔡啟偉並降一級調用。十四年。援例捐復原級。仍任編修。尋遷左春坊左贊善。充日講起居注官。二十一年。充明史總裁官。二十二年。遷翰林院侍講。二十三年。遷侍講學士。時乾學之弟元文。以左都御史降調候補。其子樹聲與乾學子樹屏並中順天鄉試。聖祖以是科取中南皿卷。皆江南浙江。而湖廣江西福建無一人。下九卿詹事科道磨勘。舉出文理悖謬者一名。文體不正者樹屏等三名。字句疵累者樹聲等八名。請與正副考官諭德秦松齡編修王師恩同考官主事張雄中書王鐔等。並褫革嚴究情弊。得旨此次取中各卷。顯有情弊。姑從寬免究。其文理悖謬。文體不正四名。及徐元文之子。並革去舉人。餘照例議處。是年十二月。乾學遷詹事。二十四年正月。召試翰詹諸臣於保和殿。乾學列上等第一。諭獎乾學暨侍讀韓爌編修孫岳頌侍講歸允肅編修喬萊等五人。學問優長。文章古雅。優加賞賚。乾學旋奉命直南書房。擢內閣學士。充大清會典一統志副總裁。教習庶吉士。時臺灣初平。戶部郎中色楞額往福建稽察鼓鑄。疏請禁用明代舊錢。戶部尙書科爾坤余國柱等讖如所請。上以詢內閣諸臣。乾學言。自古皆新舊兼行。以從民便。若設例禁。恐滋煩擾。因考自漢至明故事。爲議以獻。諭曰。舊錢流布。不止福建一省。他省亦皆有也。若驟爲禁止。恐不肖之徒。借端生事。貽害平民。色楞額所奏不准行。會有詔購采遺書。乾學以宋元經解十種。李燾續資治通鑑長編。及唐開元禮。或繕寫。或仍古本。綜其體要。條列奏進。得旨所奏進藏書善本。足資考訂。俱留覽。二十五年諭吏部曰。學士徐乾學張英。學問淹通。宜留辦文章之事。嗣後勿開列巡撫。尋授禮部侍郎。充經筵講官。二十六年九月。擢都御史。二十七年二月。充會試正考官。卽於是月遷刑部尙書。二十八年。乾學弟元文任大學士。子樹穀由中書考選御史。時解任修書少詹事高士奇丁憂在籍。左都御史王鴻緒爲左都御史郭琇疏劾。植黨營私。招搖撞騙諸款。得旨休致。副都御史許三禮疏劾乾學曰。聖主必需賢佐。懲貪不外遠奸。大小臣工。幸逢聖主。應爲賢臣。乃有原任刑部尙書徐乾學者。不顧品行。律身不嚴。致被罪臣張汧所供。皇上寬仁。不加譴責。卽宜引咎自退。乞命歸里。又復優柔繫戀。潛住長安。乘留修史爲名。出入禁廷。與高士奇相爲表裏。物議沸騰。卽無官守。落得招搖納賄。五方寶物歸

東海之謠。所自來也。其子試御史徐樹穀。不遵成例。朦朧與考。明有所恃。獨其弟徐秉義。文行兼優。實係當代偉人。原任禮部尙書熊賜履。理學醇儒。可稱千古人品。臣職居言路。知而不言。卽爲不忠。俯探輿論。直陳實奸。乞卽召用熊賜履。徐秉義。以佐盛治。徐乾學。既無好事業。焉有好文章。應逐出史館。以示遠奸。徐樹穀尙書之子。中堂之姪身爲御史。太覺招搖。應調部屬。以遵成例。臣不避嫌疑。披瀝直陳。乾學奏曰。憲臣謂臣律身不嚴。致罪臣張汧所供。臣若果受張汧一錢。臣甘寸磔。祇以臣爲臺長。聞張汧狼籍。屢向僚屬斥言其非。汧知而恨臣。遂肆誣。業蒙皇上洞鑒。臣以性不諧俗。遭人嫉忌。具疏懇歸田里。蒙恩准解部務。仍領各館總裁。早夜編摩。每隔數日入直。與高士奇等共訂書史。校讐御選古文。此外一無干涉。臣在任之日。尙且嚴絕苞苴。豈解任以後。反行招搖納賄。憲臣忽云潛住。忽云招搖。皆臣所惶惑不解者。臣子樹穀考選。經吏部及臣弟元文奏明。其時大臣子弟與考者。不止臣子一人。特恩簡用。安得朦朧。皆由臣平時好講忠孝大義。言論時或激切。易以招尤。乞賜罷斥歸田。并罷臣子官職。以安愚分。疏並下部察議。以所劾招搖納賄。皆無實據。卽所劾朦朧考選。亦不詳確。許三種應降二級調用。議甫上。三禮復疏劾乾學曰。三品以上大臣子弟。不得考選科道。成例遵行已久。無敢紊越。今乾學回奏。指稱吏部題請閣臣奏明。以鈇制言官。要知皇上之留乾學者。豈留潛地招搖。物議沸騰。閣臣之奏明者。不過奏避闕卷之嫌疑。豈有題破歷來之定例。乾學雕琢字眼。粉飾要旨。欲坐臣以指參不實。而使徐樹穀仍居御史之職。明欲聲震開端。紊亂國制。專擅之漸。不可不防。更奇者。乾學律身不嚴。教子無方。穢迹昭著。有案可據。尙敢肆口狂言。好講忠孝大義。希圖夤緣聖聰。不得不列款糾參。懇乞窮究。一乾學於丁卯鄉試。戊辰會試。在外招搖。門生親戚。有名文士。各與關節。務期中試。有蘇州府貢生何焯。往來乾學門下。深悉其弊。特作會試墨卷序文。刊刻發賣。寓言譏刺。乾學聞知。卽向書鋪將序抽燬。刻板焚化。囑託江蘇巡撫訪拏何焯。至今未結。一乾學發本銀十萬兩。交鹽商項景元於揚州貿易。每月三分起利。本年七月間。令伊孫塔史姓家人李湘押同景元於八月二十四日到京算帳。共結本利一十六萬餘兩。又布商程天石新領乾學本銀十萬兩。現在大蔣家橋

衛開張當舖。其餘銀號錢店。發本放債。違禁取利。怨聲滿道。一乾學以門生李國亮爲江蘇按察使。代爲料理。國亮差劉管家送銀一萬兩。交乾學管家吳子彥。吳子彥收。遇節送銀四百兩。小禮銀四十兩。生日送銀一千兩。吳子彥爲張汧事發逃回。吳子彥胞弟子章收伊弟元文入閣辦事。國亮差劉管家送賀禮銀五千兩。交吳子彥收。一乾學認光棍徐紫賢。徐紫書二人爲姪。通同扯縫。得贓累萬。徐紫賢徐紫書。現造爛面衛衙花園房屋。書辦之子。一朝富貴。胡爲平來。乾學之賊。半出其手。一乾學因弟拜相後。與親家高士奇更加招搖。以致有去了余察檄。來了徐嚴嵩。乾學似龐涓。是他大長兄之謠。又有五方寶物歸東海。萬國金珠貢詹人之對。京城三尺童子皆知。若乾學果能嚴絕苞苴。如此醜語。何不加之他人。而獨加之乾學耶。一乾學遣弟徐宏基。遍遊各省抽豐。剋剋民膏。獨於河南磁州彰德等處。久戀一載有餘。放賭宿妓。良民受害。怨聲載道。一乾學買憲臣傅感丁在京房屋一所。價銀六千餘兩。買學士孫在豐在京房屋一所。價銀一千五百兩。買慕天顏無錫縣田一萬頃。京城繩匠衛衙與橫街新造房屋甚多。不能枚舉。蘇州太倉崑山吳縣長洲常熟吳江等州縣。俱係徐府房屋田地。一乾學子姪徐樹屏徐樹聲於甲子科。資緣中式。弊發黜革。行止有虧。莫此爲甚。以上各款。百未盡一。乾學身受國恩。乃敢植桃李於一門。播腹心於九州。橫行聚斂。不顧枉直。順之則生。逆之則死。勢傾中外。權重當時。朝綱可紊。成例可滅。伏乞皇上立賜處分。國家幸甚。萬民幸甚。疏入。得旨許三禮身爲言官。凡有糾劾。當據實一併指陳。乃於交部議處後。復列款具奏。明係圖免己罪。著嚴飭行命免許三禮調用。仍留任。是月十一月。乾學疏言。臣年六十。精神衰耗。祇以受恩深重。依戀徘徊。憲臣許三禮。前因議先賢先儒坐位。其言不合經典。臣與九卿奏對之時。斥言其非本。以公事相爭。不謂獨觸其私怒。捏造事款。逞忿劾臣。幸聖主洞燭幽隱。臣欣荷再生。但臣方寸靡寧。不能復事鉛槧。且恐因循居此。更有無端彈射。乞恩終始矜全。俾得保其衰病之身。歸省先臣邱隴。庶身心閒暇。願比古人書局自隨之義。屏跡編摩。少報萬一。得旨卿學問淹博。總裁各館書史。著有勤勞。覽奏請歸省墓。情辭懇切。准假回籍。書籍著隨帶編輯。明年二月陛辭。賜御書光篋萬丈扁額。五月兩江總督傅拉塔劾乾學於三月內回籍。

即於四月內欲沽名譽。囑託蘇州府貢監等。具呈巡撫洪之傑。建造生祠於虎邱山上。平日縱其子樹敏樹屏與元文之子樹聲樹本。交結洪之傑。借勢招搖。競利害民。乞敕部嚴擬。語詳元文傳。聖祖命元文休致。劾款免究。三十年。山東巡撫佛倫鞠離縣知縣朱敦厚加收火耗事。劾乾學曾致書前任巡撫錢鈺。徇庇敦厚。部議乾學與鈺均革職。先是。乾學未罷歸時。嘉定知縣聞在上。爲縣民告發私派事。革任究擬。閱二年不結。至是。按察使高承爵窮詰聞在上。追憶未告發時。因徐樹敏聲言私派。有干功令。會以贓銀二千兩餽之。至告發追還。論樹敏嚇詐取財。應絞。江寧巡撫鄭端。因疏劾休致左都御史王鴻緒。曾受聞在上。餽銀五百兩。爲之設計。私派亦於告發後追還。應與不約束子弟之徐乾學並敕部嚴議。部議乾學已革職。免議。王鴻緒應令總督審供定議。尋奉詔。嚴戒內外各官。私怨交尋。牽連報復。於是釋鴻緒弗問。乾學子樹敏亦贖罪。三十三年七月。諭大學士於翰林官員內。奏舉長於文章學問超卓者。大學士王熙張玉書等薦乾學與王鴻緒高士奇。得旨徐乾學等著來京修書。徐乾學之弟徐秉義學問亦優。並著來京。乾學未聞命。於四月疾卒。年六十有四。所著有澹園集讀禮通考。會典明史纂輯。鑑古輯覽。古文淵鑑。讀禮通考。文集。外集。虞浦集。詞館集。碧山集諸書。遺疏進其所纂一統志。於時四方平定。內外諸臣。各樹朋黨。互相攻訐。如大學士明珠之黨。皇族噶禮。皆其最著者。然是時非獨滿大臣有黨也。漢大臣亦有之。如徐乾學高士奇王鴻緒陳元龍之徒。皆自以高文碩學。通籍詞館。遂互相標榜。以獵取身譽。依附權貴。而以徐乾學爲之魁。乾學兄弟三人。長即乾學。次元文。次秉義。皆以鼎甲致位通顯。時號崑山三徐。鴻緒亦兄弟三人。長九齡。次項齡。次鴻緒。與士奇並稱徐王高三家。一時學士非出三家之門者。輒不爲世所重。元文項齡。皆官至大學士。乾學雖未登揆席。而望則過之。康熙一代。欽定官書。什九皆乾學監修總裁。其引疾歸里也。猶命以一統志局自隨。如司馬溫公修通鑑故事。帝親書光焰萬丈額以賜之。其恩遇之隆如此。同時許三禮郭琇彭鵬輩。俱居諫垣。以清流自命。亦彼此相爲聲援。而以許三禮爲之魁。與乾學等分爲兩黨。琇既疏參靳輔。治河無功。鵬後亦奏李光地貪位奪情。二人皆名臣清望。先後被搖撼。於是朝端訐奏之風熾。而黨派之傾軋亦愈烈。既而

士奇元龍鴻緒三人爲郭琇所攻。俱休致回籍。斯時惟內閣學士韓菼。雖出乾學門下。而生平巖然自立。不倚於徐許之黨。亦復享盛名。躋顯仕。物論多之。

高士奇

高士奇。字澹人。號江村。浙江錢塘人。初由監生充書寫。序班供奉內廷。授詹事府錄事。遷內閣中書。食六品俸。賜居西安門內。康熙十七年。聖祖特賜表裏十疋。銀五百兩。以旌其勤勞。十九年。授額外翰林院侍講。二十二年。補侍讀。充日講起居注官。二十三年。遷右春坊右庶子。尋擢翰林院侍講學士。二十四年。轉侍讀學士。充大清一統志副總裁官。二十六年。遷詹事府少詹事。二十七年。法司逮問貪黷劾罷之。巡撫張汧。因汧未被劾時。曾遣人齎銀赴京。詰其行賄何人。初以分餽甚衆。不能悉數抵塞。既而指出士奇徐乾學。會奉諭。勿令滋蔓。得置弗問。士奇因疏言。臣等編摩纂輯。惟在直廬。宜諭奏對。悉經中使。於進講外。或數月不覲天顏。從未於政事有所干涉。此不獨臣士奇爲然。從前入直諸臣。如熊賜履。葉方鵠。張玉書。孫在豐。王士禎。朱彝尊等。近今同事諸臣。如陳廷敬。徐乾學。王鴻緒。張英。勵杜訥等。莫不皆然也。至於人物之臧否。事務之利弊。皇上明見萬里。洞澈隱微。素未蒙皇上詢及。臣何敢輕進一言。獨是供奉日久。嫌疑日滋。考之古昔。儒臣侍從禁密。恆難調於衆口。卽今張汧無端疑怨。含沙污蠚。臣將無以自明。幸賴聖明在上。誣搆難施。張汧旋即自吐真情。臣心始得大白。但禁廷清秘。職任恭嚴。來茲夔斐。實幸聖恩。豈容仍玷清班。伏乞賜歸田里。疏入。得旨。覽所奏情辭懇切。准以原官解任。其修書副總裁等項。著照舊管理。二十八年春。從上南巡。至杭州。駕幸士奇之西溪山莊。賜御書竹窗扁額。九月。左都御史郭琇疏劾之曰。皇上宵旰焦勞。勵精圖治。用人行政。皆出睿裁。未嘗纖毫假手左右。乃有植黨營私。招搖撞騙。如原任少詹事高士奇。左都御史王鴻緒等。表裏爲奸。恣肆於光天化日之下。罪有可誅。罄竹難悉。試約略陳之。高士奇出身微賤。其始也徒步來京。覓館爲主。皇上因其字學頗工。不拘資格。擢補翰林。令入南書房供奉。不過使之考

訂文章。原未假之與聞政事。爲士奇者。卽當竭力奉公。以報君恩於萬一。計不出此。而日思結納。諂附大臣。攬事招權。以圖分肥。凡內外大小臣工。無不知有士奇之名。夫辦事南書房者。先後豈止一人。而他人之聲名總未著聞。何士奇一入辦事。而聲名赫奕。乃至如此。是其罪之可誅者一也。久之羽翼既多。遂自立門戶。結王鴻緒爲死黨。科臣何楷爲義兄弟。翰林陳元龍爲叔姪。鴻緒胞兄王頊齡爲子女媼親。俱寄以腹心。在外招攬。凡督撫藩臬道府廳縣。以及在內之大小卿員。皆王鴻緒何楷等爲之居停哄騙。而夤緣照管者。魏至成千累萬。卽不屬黨護者。亦有常例。名之曰平安錢。然而人之肯爲賄賂者。蓋士奇供奉日久。勢燄日張。人皆謂之曰門路真。而士奇遂自忘乎其爲撞騙。亦居之不疑。曰我之門路真。是士奇等之奸貪壞法。全無顧忌。其罪之可誅者二也。光棍俞子易。在京肆橫有年。惟恐事發。潛遁直隸天津。山東洛口地方有虎坊橋瓦房六十餘間。價值八千金。魏送士奇。求託照拂。此外順城門外斜街。並各處房屋。總令心腹出名置買。何楷代爲收租。打磨場士奇之親家陳元師。夥計陳季芳。開張緞號。寄頓各處賄銀。資本約至四十餘萬。又於本鄉平湖縣置田產千頃。大興土木。修整花園杭州西溪。廣置田宅。蘇松淮揚。王鴻緒等與之合夥生理。又不下百餘萬。竊思以寬館餬口之窮儒。而今忽爲數百萬之富翁。試問金從何來。無非取給於各官。然官從何來。非侵國帑。卽剝民膏。夫以國帑民膏而填無厭之豁壑。是士奇等真國之蠹。而民之賊也。其罪之可誅者三也。皇上聖明。洞悉其罪。止因各館史書編纂未完。著解任竣事。矜全之恩。至矣極矣。士奇乃不思改過自新。仍怙惡不悛。當聖駕南巡時。上諭嚴戒魏送。定以軍法治罪。誰敢不遵。惟士奇與王鴻緒駭不畏死。卽淮揚等處。王鴻緒招攬府廳各官約魏萬金。潛遣士奇。淮揚如此。他處又不知如何索詐矣。是士奇等欺君滅法。背公行私。其罪之可誅者四也。更可駭者。王鴻緒陳元龍。鼎甲出身。亦儼然士林之翹楚。竟不顧清議。爲人作壘斷。而不以爲恥。且依媚大臣。無所不至。卽人之所不屑爲者。亦甘心爲之。而不以爲辱。苟圖富貴。傷敗名教。豈不玷朝班而羞當世之士哉。總之高士奇王鴻緒陳元龍何楷王頊齡等。豺狼其性。蛇蝎其心。鬼蜮其形。畏勢者旣觀望而不敢言。趨利者復擁戴而不肯言。臣若不言。有負聖恩。臣罪滋大。故不

避嫌怨。仰請皇上立賜罷職。明正典刑。人心快甚。天下幸甚。疏入。得旨。高士奇。王鴻緒。何楷。陳元龍。王頊齡。俱著休致回籍。時解任尙書徐乾學。管修書總裁事。副都御史許三禮。以士奇既奉旨回籍。乾學亦不應留京。疏劾乾學。士奇爲子女姻親。其招搖納賄。相爲表裏。有五方寶物歸東海。萬國金珠貢滄人之語。疏下吏部。以所劾無據。寢議。乾學尋以省墓回籍。三十三年。命大學士於翰林官員內奏舉長於文章學問超卓者。大學士王熙。張玉書等薦乾學。鴻緒及士奇。並召來京修書。士奇既至。仍直南書房。三十六年。以養母乞歸。特授詹事府詹事。允其請。四十一年。授禮部侍郎。以母老未赴。四十三年。聖祖南巡。士奇於淮安迎駕。扈蹕至杭州。及回鑾。隨至京。優賚以歸。是年六月。卒於家。賜諡文恪。所著有經進文稿。天祿識餘。讀書筆記。扈從日錄。隨筆集。城北集。苑西集。清吟堂集。春秋地名考略。左傳國語輯註。松亭行記。江村消夏錄。北墅抱瓮錄等書。

唐甄

唐甄。字鑄萬。四川達縣人。父階。泰。明吳江知縣。甄性至孝。侍親官舍。親疾。衣不解帶。及居喪。獨處殯室三年。枕塊席苦。痛故鄉淪陷。遂卜地葬吳門之虎邱。順治十四年舉人。遷山西長子縣知縣。導民蠶桑。以身率之。日省於鄉。三旬而樹桑八十萬本。民業利焉。甫十月。以逃人註誤去官。僦居吳市。僅三數椽。蕭然四壁。炊煙管絕。日采廢圃中。枸杞葉爲飯。衣敗絮。陶陶然振筆著書不輟。曰。君子當厄。正爲學用力之時。窮阨生死外也。小也。豈可求諸外而忘其內。顧其小而遺其大哉。乃研精覃思。著衡書。曰。衡者志在權衡天下也。後以連蹇不遇。更名潛書。書分上下篇。言學者爲上篇。始自辨儒。終於博觀。凡五十篇。言治者爲下篇。始於尙治。終於潛存。凡四十七篇。其自述曰。上觀天道。下察人事。遠正古迹。近度今宜。根於心而致之行。如在其位而謀其政。非虛言也。寧都魏禮見而歎曰。是周秦之書也。今猶有此人乎。康熙四十三年卒。年七十有五。又著有毛詩傳箋合義。春秋述傳。潛文潛詩日記。

張爾岐

張爾岐字稷若號蒿庵山東濟陽人祖以上皆力農父行素教以儒業遂篤守程朱之說遜志好學著天道論中庸論篤終論爲時所稱又著學辨五篇曰辨志曰辨術曰辨業曰辨成曰辨徵又著立命說辯斥袁氏功過格立命說之非明季行素官石首縣丞罹兵難爾岐欲身殉以母老止年三十單心儀禮以鄭康成注文古質賈公彥釋儀曼衍學者不能尋其端緒乃取經與注章分之定其句讀疏其節錄其要取其明註而止有疑義則以義斷之亦附於末著儀禮鄭註句讀十七卷附以監本正誤石經正誤二卷崑山顧炎武遊山東交爾岐讀而善之曰炎武年過五十乃知不學禮無以立濟陽張爾岐作儀禮鄭注句讀一書根本先儒立言簡當以其人不求闡達故無當世名然書實可傳使朱子見之必不僮謝監獄之稱許矣爾岐又著周易說略八卷詩說略五卷夏小正傳註一卷弟子職註一卷老子說略一卷蒿庵集三卷蒿庵閒話二卷所居敗屋不修藝蔬果養母集其弟四人講說三代古文於母前愉愉如也妻朱婉婉執婦道勸爾岐勿出遂教授鄉里終其身康熙十六年卒年六十六

黃宗羲

黃宗羲字太冲浙江餘姚人年十四補諸生父魯素明天啟間官御史以抗直死魏闖之難宗羲年十九袖長錐入京頌冤至則魏闖已殛即疏請誅曹欽程李實又於對簿時錐許顯純流血毆崔應元胸按其鬚歸祭其父又與吳江周延祚等錐牢子葉咨顏文仲應時立斃時欽程已入逆案宗羲復於對簿時錐實獄竟偕同難諸子弟設祭詔獄中哭聲如雷聞禁中及歸從劉宗周遊姚江末派援儒入釋宗羲力摧其說時稱禦侮陳貞慧等作南都防亂揭署名日被難諸家推宗羲居首稱王時阮大鍼案揭中姓名欲殺之會大兵至得免尋歸浙東糾合黃竹浦子弟數百人隨諸軍於江上時呼世忠營大兵定浙宗羲間行歸家遂奉母里門畢力著述既而請業者日

至乃復舉證人書院之會於越中。以申宗周之緒。其後東之鄭。西之海寧。皆請主講。守令亦或與會。然非其志也。康熙十七年。詔徵博學鴻儒。掌翰林院學士葉方藹欲薦之。宗羲辭以疾。且言母老。十九年。左都御史徐元文監修明史。薦宗羲。辭如初。及詔取所著書。關史事者。宣付史館。二十九年。上訪求遺獻。刑部尚書徐乾學復薦宗羲。仍不出。然宗羲雖不在史館。而史局每有疑事。必諮之。宗羲之學。雖出宗周。不恣言心性。教學者說經。則宗漢儒。立身則宗宋學。嘗自謂受業戴山時。頗喜爲氣節。斬斬一流。所得尙淺。憂患之餘。始多深造。又謂明人講學。襲語錄之糟粕。不以六經爲根柢。束書而從事於游談。更滋流弊。故學者必先窮經。然拘執經術。不適於用。欲免迂儒之誦。必兼讀史。又謂讀書不多。無以證理之變化。多而不求於心。則爲俗學。所著易學象數論六卷。謂聖人以象示人者七。有八卦之象。六爻之象。象形之象。爻位之象。反對之象。方位之象。互體之象。後儒之爲僞象者四。納甲也。動爻也。卦變也。先天也。乃崇七象而斥四象。又謂遁甲太乙六壬。世謂三式。皆主九宮。以參人事。乃以鄭康成太乙行九宮者證太乙。以吳越春秋占法。國語伶州鳩之對證六壬。以訂數學。其持論皆有依據。授書隨筆一卷。則太原閻若璩問尙書而告之者。春秋日食曆一卷。辨衛樸所言之謬。律呂新義二卷。少時取餘杭竹管。斷之爲十二律。與四清聲試之。因廣其說。孟子師說二卷。以闡發良知之旨。史學則欲輯宋史而未就。僅存叢目補遺三卷。又輯明史案二百四十四卷。其明史有三例。一國史。取詳年月。二野史。取當是非。三家史。備官爵世系。明史彙出於萬斯同。斯同之學出於宗羲也。天文則有大統法辨四卷。特憲書法解。新推交食法一卷。圖解一卷。割圓入線解一卷。授時法假如一卷。西洋法假如一卷。回回法假如一卷。其後。梅文鼎本周髀言天文。世驚爲不傳之秘。而不知宗羲實開之。又著明儒學案六十二卷。敘述明代講學諸儒流派。分合得失甚詳。後又輯宋儒學案元儒學案。以誌七百年儒學源流。又明文海四百八十二卷。彙集明人文集二千餘家。擷其菁華。典章人物。燦然具備。與十朝國史。亦多彈駁參正。文集則有南雷文案。吾悔撰杖屨山諸集及詩集。後又分爲南雷文定。晚年復定爲文約文定十一卷。文約四卷。又深衣考一卷。今水經一卷。四明山志九卷。歷代甲子考一卷。二程學案二卷。尙書

湯斌嘗曰。黃先生論學。如大禹導山導水。脈絡分明。吾黨之斗杓也。晚好聚書。范氏天一閣。鄭氏叢桂堂。曹氏倦圃。徐氏傳是樓。並假鈔焉。別有台宕紀游。匡廬游錄。姚文江略。姚江瑣事。補唐詩人傳。病榻隨筆。黃氏宗譜。黃氏喪制。及自著年譜共若干卷。又嘗續宋文鑑。元文鈔。以補蘇呂二家之闕。未成而卒。年八十六。時康熙三十四年也。

潘耒

潘耒。字次耕。江蘇吳縣人。幼孤。生而宿慧。讀書目數行下。受業於同郡徐枋。顧炎武。能承其教。羣經諸史。旁及算術宗乘。無不通貫。嘉定陸元輔。平湖陸隴其。交口許爲淹洽。康熙十八年。以布衣召試博學鴻儒。授翰林院檢討。與修明史。卽作修史議以上。謂明更三百年。未有成史。今欲創爲一書。前無所因。視昔之本東觀。以作後漢。政書以修新唐者。其難百倍。宜搜探博而考證精。職任分而義例一。槩筆直而持論平。歲月寬而卷帙簡。總裁善其說。令撰食貨志。兼他紀傳。自洪武以下五朝。彙皆所訂定。尋充日講起居注官。纂修實錄聖訓。二十一年。充會試同考官。稱得士。名益盛。忌者頗衆。二十三年。甄別。譴起。坐浮濫降調。遂歸。四十二年。上南巡。復原官。大學士陳廷敬欲薦起之。力辭而止。耒有至性。初被徵。辭以母老。不獲命。乃行。除官後。復牒吏部。以獨子終養。請代題者三。卒格於讒。始受職。遽居喪。哀毀骨立。尤篤師門之誼。枋歿。周恤其孤孫。俾得所。刻顧炎武日知錄。並詩文集。生平嗜山水。歷遊羅浮。天台。雁蕩。武夷。黃海。匡廬。中岳。盡窮其勝。各紀以詩文。有遂初堂詩集十六卷。文集二十卷。別集四卷。詩不事雕飾。直抒所見。登臨懷古諸作。一時名流多折服。文蹊徑較平。而氣體渾厚。空所依傍。耒又因炎武音學五書爲類音八卷。炎武欲復古人之遺。耒則務窮後世之變。以爲舊字母三十六。有複有漏。今刪五增十九。成五十母。各具陰陽。每母之字。橫播爲開口齊齒合口撮口四呼。四呼之字。各縱轉爲平上去入四聲。四聲之中。各以四呼分之。惟入聲十類。餘三聲皆二十四類。凡有字之類二十二。有聲無字之類二。以有字者。排爲韻譜平

聲得四十九部。上聲得三十四部。去聲得三十八部。入聲得二十六部。共爲一百四十七部。蓋因等韻之法。而又推求之己意。於古不必合。於今不必可施用。然審辨通微。實自成一家的言。晚歲研究易象數。著論十三篇。多所心得。四十七年卒。年六十三。

劉獻廷

劉獻廷。字繼莊。順天大興人。先世本吳中。以祖父官太醫。遂家順天。獻廷年十九。復寓吳。居吳江者三十年。晚更楚遊。復之燕。後返於吳。康熙三十四年卒。年四十八。少穎悟絕人。嗜讀書。竟夜不臥。父母禁不與膏火。則然香代之。因眇一目。旋又折其左肱。居恆落落。躡屨風塵中。遭際國變。亟亟以經世爲務。性慷慨。嘗毀產濟人。妻卒。家益落。欲徧歷各州。覽其山川形勢。交其豪傑。觀其土俗。以益廣其聞見。而質證於所學。獻廷博覽經史百家。慨然負大志。不肯爲詞章之學。嘗言聖人所以謂人爲天地之心者。以天地不能爲者。人心之知能爲之。劍復否泰存乎運。而轉移者心之仁。人苟不能斡旋氣運。徒以其知能爲身家之謀。則不得謂之人。何足爲天地之心哉。故其爲學。主於經世。自象緯律曆。邊塞關要。財賦軍器之屬。旁而岐黃者流。以及釋道之言。無不留心。生平講學之友。嚴事者無錫顧培。衡陽王夫之。而尤心服者。南昌彭士望也。崑山徐乾學。善下士。又多藏書。大江南北宿老爭赴之。獻廷遊其間。超然獨得。議論不隨人後。鄒萬斯同於書無所不讀。最心折獻廷。引參明史館事。顧祖禹黃儀長於輿地。亦引獻廷參一統志。獻廷謂諸公考古有餘。而猶未切於實用。其論向來方輿書。大抵詳於人事。而天地之故。概未有聞。當於疆域之前。別添數則。先以諸方之北極。出地爲主。定簡平儀之度制。爲正切綫表。而節氣之後。先日蝕之分秒。五星之陵犯。占驗皆可推矣。諸方七十二候。各各不同。如嶺南之梅。十月已開。桃李臘月已開。而吳下梅開於驚蟄。桃李開於清明。相去若此之殊。今世所傳七十二候。本諸月令。乃七國時中原之氣候。今之中原。與七國之中原不合。則曆差爲之。今於南北諸方。細考其氣候。取其核者。詳載之爲一則。傳之後世。

則天地相應之變遷。可以求其微矣。燕京吳下。水皆東南流。故必東南風而後雨。衡湘水北流。故必北風而後雨。諸方山水之向背分合。皆當按籍而列之。而風土之剛柔。暨陰陽燥濕之徵。又可次第而求矣。其論水利。謂西北乃二帝三王之舊都。二千餘年未聞仰給東南。何則。溝洫通而水利修也。自劉石雲擾以訖金元。千餘年不知水利為何事。故西北非無水也。有水而不能利用也。不為民利乃為民害。旱則赤地千里。潦則涇沒民居。無地可儲。無道可行。虞集始奮然言之。郭守敬始毅然行之。未幾。寬廢。三百年無過而問者。有聖人者出。經理天下。必自西北水利始。西北水利。莫詳於水經。鄭注雖時移勢易。十猶可得六七。鄭氏略於東南。人以此少之。不知水道之當詳。正在西北。欲取二十一史。關於水利農田戰守者。詳加考覈。附諸家論說為之疏。以資異日施行者之考證。又言朱子綱目。非其親筆。故多迂而不切。而關係甚重者反遺之。當別作紀年一書。凡獻廷所撰者。其運量皆非一人一時所能成。故雖言之甚殷。而難於畢業。是亦其好大之疵也。其生平自謂於聲音之道。別有所窺。足窮造化之奧。百世而不惑。嘗作新韻譜。其悟自華嚴字母。入而參之。以天竺陀羅尼。泰西臘丁語。小西天梵書。暨天方蒙古女真等音。又證之以遼人林益長之說。而益自信。同時吳及自謂蒼頡以後第一人。獻廷則曰。是其於天竺以下書皆未得通。而但略見華嚴之旨者也。獻廷之法。先立鼻音二。以鼻音為韻本。有開有合。各轉陰陽上去入之五音。陰陽即上下二平。共十聲。而不歷喉腭舌齒唇之七位。故有橫轉無直送則等韻。重疊之失去矣。次定喉音四。為諸韻之宗。而後知泰西臘丁語女真國書梵音尙有未精者。以四者為正喉音。而從此得半音轉音伏音送音變喉音。又以二鼻音分配之。一為東北韻宗。一為西北韻宗。八韻立而四海之音可齊。於是以喉音互相合。凡得音十七。喉音與鼻音互相合。凡得音十。又以有餘不盡者三合之。凡得音五。共三十二音為韻父。而韻歷二十二位為韻母。橫轉各有五子。而萬有不齊之聲攝於此矣。嘗聞康甲夫家有紅毛文字。惜不得觀之。以合泰西臘丁語之異同。又欲譜四方土音以窮宇宙元音之變。乃取新韻譜為主。而以四方土音填之。謂諸方有土音又有僅音。蓋五行氣運所宣之不同。各譜之為一。則合之土產。則諸方人民性情風俗之徵。皆可推而見矣。又言聖王之

始天下，自宗法始。無宗法，天下不可得治。宜特爲一書以發明之，亦未就。故有貲數千金，以從遊者。衆有困乏，或罹患難，則傾貲濟之。用是遂置倦遊歸。方謀與同志著書，不一年而歿。歿後其弟子黃宗夏輯其遺書，爲廣陽雜記。鄭全祖望稱爲薛季宣王道甫一流云。

錢澄之

錢澄之，初名秉鐙，字飲光，安徽桐城人。明諸生，弱冠時，有闖黨爲御史巡按，至皖盛威儀，謁孔子廟，觀者如堵。澄之徐正衣冠，植立昌言以詆之。由是名聞四方。崇禎朝，以明經貢京師，屢上書言時政得失，不報。游吳越間，復社幾社名流，雅相引重。遂爲雲龍社，以聯吳淞。董捷武於東林，雲間陳子龍、夏允彝、嘉善魏學渠與相友善。又嘗問易於漳浦黃道周，後避黨禍至震澤，遇兵跳身南遷。崎嶇閩越間，亂定歸里，遂杜足田間。治諸經課耕，以自給。著田間易學十二卷。其學初從京房邵康節入，故言數頗詳。蓋道周之餘緒也。後乃講求義理，參取注疏。及程傳本義，而本旨以朱子爲宗。其說不廢圖，而以陳搏先天圖及河洛二圖，皆因易而生，非易因此而作。圖中奇偶之數，乃揲著之法，非畫卦之本。持論極爲允當。又著田間詩學十二卷，謂詩與尙書春秋表裏，必考之三禮，以詳其制作。徵諸三傳，以審其本末。稽之五雅，以覈其名物。即今輿記，以考古之圖經，而參以平生所親歷。其書以小序首句爲主，所探諸儒論說，自注疏集傳外，凡二程、張子、至明、黃道周、何楷共二十家，持論精覈，無所攻，亦無所主。而於名物訓詁山川地理，言之尤詳。他著有屈宋合詁二冊，詩集二十八卷，文集三十卷。康熙三十二年卒。年八十二。

閻若璩

閻若璩，字百詩，號潛丘，山西太原人。世業鹽筴，僑寓淮安。生而口吃，性頗鈍，讀書千遍不能熟。年十五，冬夜寒甚。

兀坐沈思。心忽開明。自是聰穎異常兒。研究經史。深造自得。歲補學官弟子。嘗集陶宏景皇甫謐語。題其柱云。一物不知。以爲深恥。遭人而問。少有暇日。其立志如此。海內名流過淮。必主其家。年二十。讀尙書。至古文二十五篇。卽疑其僞。沈潛三十餘年。乃盡得其癥結所在。作古文尙書疏證八卷。引經據古。一一陳其矛盾之故。古文之僞大明。所列一百二十八條。毛奇齡尙書古文冤詞。百計相軋。終不能奪也。其疏證之最精者。謂漢藝文志言魯共王壞孔子宅。得古文尙書。孔安國以考二十九篇得多十六篇。楚元王傳亦云。逸書十六篇。天漢之後。孔安國獻之。古文篇數之見於西漢者如此。而梅賾所上。乃增多二十五篇。此篇數之不合也。杜林馬鄭。皆傳古文者。據鄭氏說。則增多者。舜典汨作九共大禹謨益稷五子之歌。嗣征典寶湯誥咸有一德。伊訓肆命原命武成。旅獒命凡十六篇。而九共有九篇。故亦稱二十四篇。今晚出書無汨作九共典寶等。此篇名之不合也。鄭康成註書序於仲虺之誥。太甲說命。微子之命。蔡仲之命。周官君陳畢命。君牙。皆注曰亡。而於汨作九共典寶肆命等。皆注曰逸。逸者。卽孔壁書也。康成雖云受書於張恭祖。然其書贊曰。我先師棘下生子安國。亦好此學。則其淵源安國明矣。今晚出書與鄭名目互異。其果安國之書耶。又云。古文傳自孔氏。後惟鄭康成注得其真。今文傳自伏生。後惟蔡邕石經所勒者得其正。今晚出書。昧谷鄭作柳谷。心腹腎腸鄭作憂腎陽。剗則剗剗鄭作臈宮剗剗頭庶剗。與真古文既不同矣。石經殘碑遺字。見於洪适隸釋者五百四十七字。以今孔書校之。不同者甚多。碑云高宗饗國百年。與今書之五十有九年異。孔紱三宗。以年多少爲先後。碑則以傳序爲次。則與今文又不同。然後知晚出之書。蓋不古不今。非伏非孔。而欲別爲一家之學者也。班孟堅言。司馬遷從安國問故。故典與禹貢。供範微子金縢諸篇。多古文說。許慎說文亦云。其稱書孔氏。今以史記說文與晚出書校。又甚不合。安國注論語予小子履。以爲墨子引湯誓其辭若此。不云此出湯誥。亦不云與湯誥小異。然則予小子履云云。非真古文湯誥。蓋斷斷也。其注雖有周親二句。論語尙書詮釋縣絕。此豈一人之手筆乎。又云。書序益稷。本名棄稷。馬鄭王三家本皆然。蓋別是一篇。中多載后稷與契之言。揚雄法言孝至篇云。言合稷契之謂忠。讓合皋陶之謂嘉。雄親見古文。故有此言。晚出

書析舉陶讓之半爲益稷。則稷與契初無一言。雄豈鑿空者耶。若璩又以朱子以來。已疑孔傳之依託。遞有論辨。復爲朱子尙書古文疑。以伸其說。康熙元年。遊京師。旋改歸太原故籍。補廩臚生。十八年。應博學鴻儒科試。報罷。崑山顧炎武以所撰日知錄相質。卽爲改定數條。炎武虛心從之。編修汪琬著五服考異。若璩糾其繆數條。尙書徐乾學歎服。及乾學奉敕修一統志。開局洞庭山。旣又移嘉善。復歸崑山。若璩皆與其事。局中人輯其緒論一編。曰閩氏碎金。若璩於地理尤精審。山川形勢。州郡沿革。瞭如指掌。撰四書釋地一卷。續編兼及人名物類訓詁典制。又解釋經義諸條。共爲五卷。事必求其根柢。言必求其依據。旁參互證。多所貫通。又據孟子七篇。參以史記諸書。作孟子生卒年月考一卷。又著孔廟從祀末議十一事。一曰。孔廟祀典宜復八佾十二簋豆於太學。二曰。十哲之外。宜進有若公西華於廟庭。廣爲十二哲。三曰。秦冉顏何宜從祀。縣亶宜補入。四曰。公明儀宜從祀。樂正克宜進入兩廡。五曰。曾申申詳均宜從祀。六曰。河間獻王劉德宜入從祀。七曰。諸葛孔明宜入從祀。八曰。范仲淹宜入從祀。九曰。蔡元定宜進於兩廡。十曰。黃幹請援蔡沈之例以進。十一曰。兩廡先聖先儒位次多凌躐。宜請釐正。其後康熙五十四年。增祀范仲淹於西廡。雍正二年。復祀秦冉於東廡。顏何於西廡。增祀諸葛亮於東廡。縣亶樂正克黃幹於西廡。乾隆三年。以有子升配東序。皆從若璩議也。又著潛邱劄記六卷。毛朱詩說一卷。手校困學紀聞二十卷。因凌儀之舊。而駁正箋說推廣之。評定古文百篇。其師山陽吳一清所手授。續加闡發。又有日知錄補正喪服翼注。宋劉攽李燾馬端臨王應麟四家逸事。博湖掌錄諸書。詩有眷西堂諸集。世宗在潛邸。聞其名。延至賜坐。索觀所著書。每進一篇。必稱善。疾革。請移就外。以大牀爲輿。上施青紗帳。二十人舁之出。安穩如牀養。不覺其行也。康熙四十三年卒。年六十九。世宗遣使經紀其喪。親製輓詩四章。復爲文祭之。

顧炎武

顧炎武。初名絳。字寧人。江蘇崑山人。明左贊善紹芳孫。學者稱亭林先生。年十四。補諸生。落落負大志。與同里歸

莊善。共遊復社。一時有歸奇顧怪之目。南都既破。與莊應縣令楊永言辟。起兵應夏允彝於吳江東南。魯王授爲兵部司務。事敗。不遭株連幸也。母王氏。素貞孝。聞變。絕不食。彌留時。誠以勿事二姓。明年。唐王由閩中遣使以職方郎召。以母未葬不赴。會有陷之者。乃喬作商賈。客游江浙間。復之金陵。屢哭於孝陵。居神烈山下。自署曰蔣山傭旋之山東。墾田長白山下。北抵山海關。遷過昌平。謁諸明陵。由太原入關中。至榆林。復墾田於雁門五台間。苦其地寒。經始粗具。付門人掌之。更歸淮安。自山東入京師。復坐萊州黃氏獄。馳赴聽勘。訟繫將半年。李因篤爲奔走告急於有力者。事白。再入京師。先後六謁思陵。五謁孝陵。往返河北諸關塞者且十載。最後至陝之華陰。謂秦人募經學。重虞士。持清議。他方所不及。而華陰縮數關河之口。足不出戶而能見天下之人。聞天下之事。一旦有警。入山守險。不十里之遙。若志在四方。一出關門。亦有建瓴之勢。遂卜居焉。置田五十畝以自給。而東西開壘所入。則別儲之。以備有事焉。所至以驢馬載書自隨。凡阨塞海陬。必呼老兵詢其曲折。與平日所聞不合。卽發書檢勘。炎武之學。大抵主於斂華就實。凡國家典制。郡邑掌故。天文儀象。河漕兵農之屬。莫不窮原究委。考正得失。撰天下郡國利病書百二十卷。遍覽諸史。圖經文編。說部之類。取其關於民生利病者。且周流西北。歷二十年。其書始成。別有聲域志一編。則考察之餘。合圖經而成者。尤精韻學。撰音論三卷。言古韻者始自明陳第。然劍關榛蕪。猶未蘊密。炎武乃推尋經傳。探討本原。又詩本音十卷。其書主陳第詩無協韻之說。不與吳棫本音爭。亦不用械之例。卽即本經之韻互考。且證以他書。明古音原作是讀。非由遷就。故曰本音。又易音三卷。卽周易以求古音。考證精確。又唐韻正二十卷。古音表二卷。韻補正一卷。皆能追復三代以來之音。分部正帙而知其變。又撰金石文字記。求古錄與經史相證。而日知錄三十卷。尤爲精詣之書。蓋積三十餘年而後成。其論治綜覈名實。於禮教尤兢兢。謂風俗衰。廉恥之防潰。由無禮以維之。常欲以古制率天下。炎武又以杜預左傳集解時有闕失。作杜解補正三卷。其他著作。有石經考。九經誤字。五經異同。二十一史年表。歷代帝王宅京記。營平二州地名記。昌平山水記。山東考古錄。京東考古錄。顧氏譜系表。雜錄。菰中隨筆。教文格論。亭林文集詩集。清朝稱學有根柢者。以炎武

爲最。又廣交賢豪長者。虛譽商榷不自滿。而精詣所在則尤在日知錄三十二卷。於經義。史學。官方。吏治。財賦。典禮。輿地。藝文之屬。一一疏通其源流。考正其謬誤。慎於去取。空諸依傍。晚益篤志經學。力排陽明。以爲經學卽理學也。自有舍經學以言理學者而邪說以起。康熙十七年。詔舉博學鴻儒科。次年。修明史。大臣爭薦之。並力辭不赴。二十一年卒於華陰。年七十。無子。門人率喪禮葬崑山。

顧祖禹

顧祖禹。字復初。又字景范。江蘇無錫人。性沈敏。有大略。善著書。性廉介樸厚。不求名於時。學者稱宛溪先生。父柔謙。精於史學。嘗謂明一統志於戰守攻取之要。類皆不詳。山川條列。又復割裂失倫。源流不備。祖禹承其志。撰歷代州域形勢九卷。南北直隸十三省一百十四卷。川廣異同六卷。天文分野一卷。共一百三十卷。名曰讀史方輿紀要。凡職方廣輿諸書。承譌襲謬。皆爲駁正。詳於山川險易。及古今戰守成敗之蹟。而景物名勝。皆在所略。創稿時年二十九。及成書。年五十矣。寧都魏禧見之。歎曰。此數千百年所絕無。僅有之書也。其論最偉且篤者有二。一以爲天下之形勝。視乎建都。故邊與腹無定所。有此爲要害。彼爲散地。此爲散地。彼爲要害者。一以爲有根本之地。有起事之地。立本者。必審天下之勢。而起事者。不擇地。蓋深思遠識。有在於言語文字之外。其傾倒如此。世以其書與梅文鼎曆算全書。李清南北史合鈔。稱三大奇書。然李書實非二者匹也。祖禹與禧爲金石交。禧客死。祖禹經紀其喪。徐乾學奉敕修一統志。延致祖禹。將薦起之。力辭罷。後終於家。

王鴻緒

王鴻緒。字季友。號儼齋。又號橫雲山人。江南婁縣人。康熙十二年一甲二名進士。授編修。初名度心。因父名廣心。奏改今名。十四年。充順天鄉試副考官。十六年。充日講起居注官。授左春坊左贊善。十八年。遷翰林侍講。十九年。

加侍讀學士銜。時湖廣有朱方旦者，自號二眉山人，聚徒橫議，造中說補，謂中道在兩眉之間，山根之上，又自謂前知，與人決休咎，初爲湖廣巡撫董國輿以左道惑衆劾奏，逮至京，得旨寬釋。及吳三桂反，順承郡王勒爾錦統師駐荊州，方旦以占驗出入軍營，巡撫張朝珍稱爲奇異神人，聖祖密諭勒爾錦軍機大事，勿爲蠱惑。方旦乃往江南浙江，二十年七月，鳩緒得方旦所刻中寶秘書，遂以奏進，指摘其與徒問答語，有誣罔君上，悖逆聖道，搖惑民心三大罪。言方旦擁妻妾，廣田宅，爲子納官，交結勢要，其所造中說補，不外坐功鍊氣之術，而妖黨互相標榜，謂今之眉山，古之尼山，方旦亦全無畏忌，居之不疑，刊書流播，向在荊州，軍前煽惑兵事，後復遍遊江浙，乘輿張蓋，徒黨如雲，遠近奔走，祈問吉凶，常聚至數千人，輒以小信小惠，勾連入教，雖漢之張角，元之劉福通，亦不過以是術贖亂，臣切思侍從本無言責，因見邪教橫行，不勝憤激，具疏糾劾，得旨，朱方旦以市井匪人，妄言休咎，詭立邪說，招致羽黨，誣罔悖逆，搖惑民心，情罪重大，此疏所劾俱實，著湖廣巡撫嚴拏究擬，在外督撫，不先究治，在內言官，未會糾劾，並嚴行申飭，方旦尋論斬伏法。二十一年，鳩緒轉侍讀，充明史總裁官，二十二年九月，遷庶子。十二月，擢內閣學士，充大清會典副總裁。二十三年九月，擢戶部右侍郎。二十四年，充會試正考官。二十六年三月，擢左都御史，會靈臺郎董漢臣上疏論時事，以諭教元良，慎簡宰執爲言，御史陶式玉劾漢臣撫拾浮詞，欺世盜名，請逮治。疏下內閣集九卿議，未決，奉特旨免職。鳩緒疏言，欽天監靈臺郎博士等官，無知蒙昧者多，皆由其始不擇流品，星卜屠沽之徒，粗識數字，便得濫授，授官之後，又不專心學習，勉盡職掌，惟行險僥倖，希圖遷擢，請敕下考試，分別去留。疏下禮部議行。董漢臣及博士賈文燦等十五人，並以詞理舛誤黜革。時尙書湯斌爲太子講官，先是，九卿集議董漢臣罪，斌有慚對董漢臣語，至是，鳩緒同左都御史瑯丹副都御史徐元珙鄭重等，劾斌務名鮮實，並追論其於江寧巡撫去任，巧飾文告，以博虛譽，聖祖素重斌操守清廉，置弗問。九月，鳩緒丁父憂歸里服滿，將赴補，爲左都御史郭琿所劾，得旨休致，詞詳高士奇傳。三十年，江寧巡撫鄭端，鞠嘉定知縣聞在上，爲縣民告發私派事，先由按察使高承爵等訊結，聞在上，曾以贓銀二千兩分給，聲言私派，有干功令之舉人徐樹敏。

至告發乃遣還。論樹敏恐嚇取財。應絞。及鄭端覆訊衆證。復得聞在上以贓銀五百兩餽送松江王總憲。亦於告發後退還狀。乃疏劾之曰。舉人徐樹敏。卽原任刑部尙書徐乾學之子也。松江王總憲。卽原任左都御史王鴻緒也。一爲司寇。一爲總憲。富貴已極。雖被論聞。住當一飯不忘君恩。潔身自好。約束子弟。使鄉里仰其德行。後進奉爲典型。乃不思自反。專以招攬納賄爲事。蠶食鄉井。而爲心。而且忌刻陰毒。狡猾反覆。士民則做風俗。薄惡。其未嘗敗露者。不敢以風影入告。今聞在上一案。乾學縱子行詐。鴻緒竟染贓銀。修身教家之道已虧。有玷大臣名節。而司擬止及乾學之子。不敢發鴻緒之奸。殊非法紀之平。乞敕部將乾學鴻緒嚴加議處。以儆官邪。臣非不知乾學士風民俗同歸於厚。彼雖巧於中傷。聖明在上。臣亦不敢他顧矣。疏下部察議。以乾學已革職。免議。鴻緒應令總督審供定議。鄭端復疏劾鴻緒曰。聞在上私派一案。據糧里口供。聞在上係鴻緒投拜門生。私派之時。聞在上先到鴻緒處商量。鴻緒爲之設計。恃其奸謀勢力。屢審漏網。臣題參後。部覆奉旨。交督臣審供定議。爲鴻緒者。自應靜聽質審。乃敢串通原供。犯官聞在上等。欲圖改供。從中暗行調度。若不嚴懲。將來紳棍效尤。必至毫無忌憚。仰請敕革王鴻緒職銜。與一千人犯。交與督臣親審定擬。勿發下司。致令如前徇情畏勢。中其奸謀。所關於風俗人心。非淺鮮矣。疏下部嚴察議奏。尋諭曰。朕崇尙德教。獨滌煩苛。凡大小諸臣。素經披擢者。咸思恩禮下逮。曲全始終。卽或因事放歸。罹咎罷斥。仍令各安田里。樂業遂生。乃近見各官內外。間有彼此傾軋。伐異黨同。私怨交尋。牽連報復。或己所銜恨。而反囑人代糾。陰爲主使。或意所欲言。而不直指其事。巧陷術中。雖業已解職投閒。仍復吹求不已。株連逮於子弟。顛覆及於身家。甚且市井奸民。亦得借端陵侮。蔑紀傷化。不可勝言。朕總攬幾務。已三十年。此等情態。知之最悉。夫讒譖媚嫉之害。歷代皆有。而明末爲甚。公家之事。置若罔聞。而分樹黨援。飛誣排陷。迄無虛日。朕於此等背公誤國之人。深切痛恨。自今已往。內外大小諸臣。應仰體朕懷。各端心術。盡蠲私忿。共矢公忠。倘仍執迷不悟。復踵前非。朕將窮極根株。悉坐以交結朋黨之罪。時鴻緒就質。詔至得釋。三十三年。命大學士

於翰林官員內舉奏長於文章學問超卓者。大學士王熙張玉書等薦鴻緒與徐乾學高士奇。並召來京修書。三十八年。授工部尚書。三十九年奉命同尚書范承勳監修高家堰隄工。尋以與河督張鵬翮持議不協撤回。四十二年。充經筵講官。四十三年。以開濬京城河道。浮銷經費。坐失察部議革職。得旨留任。尋以濬河工竣。予開復。四十七年。調戶部尚書。五十三年疏言。臣舊居館職。奉命爲明史總裁官。與湯斌徐乾學葉方藹互相參訂。僅成數卷。及臣回籍多年。屢召重領史局。而前此纂輯諸臣。罕有存者。惟大學士張玉書爲監修。尚書陳廷敬爲總裁。各專一類。玉書任志。廷敬任本紀。臣任列傳。因臣原銜食俸。此二臣得有餘暇。刪繁就簡。正謬訂譌。如是數年。彙分成帙。而大學士熊賜履續奉監修之命。檄臣列傳諸稿備錄奏進。玉書廷敬暨臣皆未參閱。臣恐傳稿尙多舛誤。自蒙恩歸田。欲圖報稱。因重理舊編。搜殘補闕。薈萃其全。復經五載。成列傳二百八卷。其間是非邪正。悉據已成公論。不敢稍逞私臆。但年代久遠。傳聞異辭。臣未敢自信爲是。謹繕寫全稿。齎呈御鑒。宣付史館。以備參考。五十四年。復召來京修書。五十七年。大學士王揆監修省方盛典。奏薦鴻緒學問素優。堪任編輯。命爲承修總裁官。六十年。尙書田從典侍郎張伯行副都御史李紱爲會試考官。既發榜。有下第舉人喧譁李紱之門。御史舒庫入告。以紱不自奏聞。部議革職。發永定河工效力。鴻緒奉命同大學士王瑣齡學士阿克敦等磨勘取中卷。得文理疵謬者十二人。三年後。再令會試。雍正元年八月。卒於京禮部。循例議卹。有賜金園集。明史稿。

孔廣森

孔廣森。字衆仲。號搗約。又號躡軒。山東曲阜人。衍聖公傳鐸孫。父繼汾。戶部主事。廣森生而穎異。年十七。舉於鄉。嘗從戴東原游。因得盡傳其學。經史訓詁。六書九數。靡不貫通。乾隆辛卯成進士。官翰林院檢討。年少入官。翩翩華胄。人目之爲衛洗馬。王長史焉。然性恬淡。耽著述。不與要人通謁。丁內艱。陳情歸養。築儀鄭堂。讀書其中。旋遭家難。以父所著書爲族人訐訟。將西戍塞外。扶病走江淮河洛間。稱貸四方。納贖錢。父卒得甯。未幾。居大母暨父

憂哀毀卒。年僅三十有五。廣森博涉經籍。尤長春秋戴記。而積力則在春秋公羊傳。謂昔夫子有帝王之德。而無其位。乃以其治天下之大法。損益六代禮樂文質經制。發爲文章。以垂後世。而見夫周綱解弛。魯道凌遲。攻戰相尋。彝倫或熄。以爲必將因衰世之宜。定新國之典。寬於勸賢。而峻於治不肖。庶幾風俗更仁義明。政教興。烏乎託託之春秋。春秋之爲書也。本天道。用王法。理人情。不奉天道。王法不正。不合人情。王法不行。天道者。一日時。二日月。三日日。王法者。一日讒。二日貶。三日絕。人情者。一日尊。二日親。三日賢。此三科九旨。既布。而壹裁以內外之義例。遠近之異辭。錯綜酌劑。相須成體。凡傳春秋者三家。粵惟公羊氏。有是說焉。方今左氏學。僅於征南。穀梁本義。汨沒於武子。惟此傳相沿。以漢司空掾任城何休解詁列在注流。漢儒授受之旨。藉可考見。其餘公羊墨守。穀梁廢疾。左氏膏肓。春秋漢議文證例等。尙數十篇。惜無存者。解詁體大思精。詞義奧衍。然亦時有承譌率臆。未能純會傳意。今將祛其所惑。歸於大道。乃輒因原注。存其精粹。刪其支離。破其拘窒。增其隱陋。成春秋公羊通義。冀備一家之言。依舊次爲十一卷。於胡毋生董仲舒何劭公條例。悉能不墜師法。他著有詩聲類十三卷。大戴禮記補注十四卷。禮學卮言六卷。經學卮言六卷。其於算數。則因秦氏方斜求圓術及算經商功章求方亭術引申推衍。廣秦氏得四術補斛方得二十五問。成少廣正負術內外篇六卷。工爲駢體。有儀鄭堂駢儷文三卷。

任大椿

任大椿。字幼植。又字子田。江蘇興化人。祖陳晉。字似武。乾隆四年進士。官徽州府教授。以通經聞。著易象大意存解一卷。發揮明簡。切於人事。又有燕喜堂文集。后山詩集。大椿乾隆三十四年二甲一名進士。授禮部儀制司主事。儀制號繁劇。大椿請移司簡曹。俾得竭半日一夜之力。假書誦習。四庫館開。以薦爲纂修官。時非翰林而預纂修者八人。大椿博於聞見。考訂精當。禮經類提要雖不出一手。皆大椿詳定。旋以憂歸里。服闋。遷員外郎。陞郎中。五十四年。授陝西道監察御史。甫一月而卒。年五十二。大椿家貧。盡色養。讀書守道義。素不以空言講學。服官行

己無媿古人。少工文詞。既與休寧戴震同舉於鄉。習文論說。究心漢儒之學。初爲衿帶喪服等辨。駁孔賈諸儒。兼難鄭君。震以其思銳而讜堅。引鄭樵毛奇齡賊經害道爲戒。自是實事求是。所學淹通於禮。尤長名物。始欲奮萃全經。久之。知其浩博難罄。因思卽類以求。一類既貫。乃更求他類。所著弁服釋例八卷。深衣釋例三卷。釋緡一卷。皆博綜羣籍。衷以己意。或視爲爾雅廣疏。實經禮別記之意。又以字書傳世。莫古於說文玉篇。而呂忱字林。實承說文之緒。開玉篇之先。字林不傳。則六書相傳之脈。中闕弗續。著字林考逸八卷。又輯蒼頡篇逸文爲二卷。後族弟兆麟以二書未備。爲之補正。他著又有小學鈎沈二十卷。吳越備史注二十卷。列子釋文考異一卷。詩尙清遠。爲嘉定王鳴盛所稱。有集六卷。其考逸有傳爲小正作者。

戴望

戴望。字子高。浙江德清人。少儻有大志。補諸生。一赴秋試。遂棄舉業。初致力攷據詞章之學。繼從陳碩甫宋于庭游。通知西漢經師家法。性倨傲。門戶之見甚深。論學有不合。必反覆辨難。然後已。嘗本劉申受述何于庭發微說。以公羊義釋論語。謂鄭康成何劭公皆注論語。而康成遺說。今猶存佚相半。劭公爲公羊大師。其本當依齊論。必多七十子相傳大義。而孤文碎句。百不遺一。良可痛也。魏時。鄭仲何晏包咸王肅諸家作解。至梁皇侃附以江熙等說。爲之義疏。雖舊說略具。而諸家之說因此亡佚矣。遂使聖緒就湮。經義晦塞。乃博稽衆家。皆隱括春秋及五經義例。爲書二十卷。凡三易稿始成。以于庭治管子。復成管子校正二十四卷。精博過洪氏顯焯。又先世藏顏習齋先生書。讀而好之。以爲顏李之學。周公孔子之學也。當舊學久衰。奮然欲追復三代教學成法。比於親見聖人。何多讓焉。因條次言行及師承。作顏氏學記十卷。是時。湘軍甫克金陵。公卿幕儒術者。多托宋學以投時尙。望游江南。所講肄多與世違。竟以此弗克伸其志。嘗繪夢隱圖見意焉。願留心兵農禮樂諸務。曉然於民生利病所在。慨民柄之不申。每謂舜禹有天下。咸與天下共之。未嘗以己意與其間。更謂。毀生於造惡。譽生於造好。惟驗以

民言，斯好惡出於公。其精理粹言，迨一於論語注發其微焉。喜讀習齋亭林遺書，以表潛闡幽爲己任。於明儒書刊禁目者，隻字殘篇，珍若拱璧。尤留心明末紀載，擬輯續明史一書未就。卒年止三十有七。生平作書點畫，悉本小篆，不作徒隸書。見者目爲江長庭復生。並精校勘於詩、工、五言，所著有讀聖堂集若干卷。

朱筠

朱筠，字竹君，一字美叔，號笥河。順天大興人。贈太傅大學士珪之兄。父文炳，陝西蓋屋縣知縣。筠與珪皆生於蓋屋。九歲至京師，與珪同讀書通經，文成斐然。乾隆十九年進士，改翰林院庶吉士，散館，授編修。三十二年，授贊善。三十三年，大考二等，擢侍讀學士，充日講起居注官。三十五年，充福建鄉試正考官。三十六年，提督安徽學政。三十八年，詔求遺書，筠奏前明永樂大典一書，陳編羅載，請擇其中若干部，分別繕寫，以備著錄。下軍機大臣議，議上，奉旨軍機大臣議覆。朱筠條奏內，將永樂大典擇取繕寫，各自爲書一節，議請分派各館修書翰林等官前往檢查，恐責成不專，徒致歲月久稽，汗青無日。蓋此書移貯年深，既多殘缺，又原編體例，分類類次，先已割裂全文，首尾難期貫串。特因當時採撫甚博，其中或有古書善本，世不恆見，今就各門彙訂，可以湊合成部者，亦足廣名山石室之藏。著即派軍機大臣爲總裁官，仍於翰林等官內，選定員數，責令專司查校，將原書詳細檢閱，並將圖書集成互爲校覈，擇其未經採錄，而實在流傳已少，尙可裒集成編者，先行摘開目錄奏聞，候朕裁定。其後纂輯四庫全書，得之大典中者五百餘部，皆世所不傳。次第刊布海內，實筠發之。筠又奏言，請做漢唐故事，擇儒臣校正十三經文字，勒石太學，奉諭緩辦。旋因生員欠考捐貢案降三級用，得旨朱筠學問尙優，著加恩授爲編修。在辦理四庫全書處行走，比選總辦日下舊聞纂修事。四十四年，提督福建學政。筠博聞宏覽，以經學六書倡，謂經學本於文字訓詁，周公作爾雅，釋詁居首，保氏教六書，說文僅存。於是刊布許氏說文解字敘說，以教士。視學所至，尤以人才經術名義爲急。在安徽時，躬拜奠蔡故士江永汪紱，祀之紫陽書院。每試，進諸生教之，辨色坐堂。

皇。至然燭不倦。好金石文字。謂可證佐經史。爲文以鄭孔經義。遷固史書爲質。嘗謂取法乎上。僅得乎中。書法參六書。有隋唐以前體。承學之士。望爲依歸。筠宏獎後進。惟恐不至。陸錫熊程晉芳任大樞。皆筠所取士。李威洪亮吉武億黃景仁吳森。皆其弟子。陽湖孫星衍爲諸生時。以不見筠爲恨。介亮吉爲紹。願遙執弟子禮。筠嘗言翰林以立品讀書爲職。不能趨謁權要。少會館於劉統勳家。及統勳爲大學士。筠不通謁。統勳遇於朝。詢之。筠曰。非公事不敢謁貴人。統勳嘆息稱善。四十六年卒。年五十三。著有筍河集三十六卷。

江永

江永字慎修。安徽婺源人。諸生。少讀書。日記數千言。嘗見大學衍義補徵引周禮。愛之。求得其書。朝夕誦誦。遂研覃十三經注疏。凡古今制度。及鐘律聲韻。無不探蹟索隱。尤深於三禮及天文地理之學。年二十一。爲縣學生。三十四補廩膳生。四十一。以朱子晚年治禮。爲儀禮經傳通解。書未就。黃氏楊氏相繼纂續。亦非完書。乃廣摭博討。大綱細目。一從吉凶軍賓嘉五禮舊次。題曰禮經綱目。凡八十八卷。引據諸書。釐正發明。實足終朱子未竟之緒。嘗一至京師。桐城方苞荆谿吳絃質。以禮經疑義。皆大折服。讀書好深思。長於比勘。明推步鐘律聲韻。歲實消長。前人多論之者。梅文鼎略舉授時。而亦疑之。永爲說曰。日平行於黃道。是爲恆氣。恆歲。實因有本輪。均輪高衝之差。而生盈縮。謂之視行。視行者。日之實體所至。而平行者。本輪之心也。以視行加減平行。故定氣時刻。多寡不同。高衝爲縮。末盈初之端。歲有推移。故定氣時刻之多寡。且歲歲不同。而恆氣歲實。終古無增損。當以恆者爲率。隨其時之高衝。以算定氣。而歲實消長。可勿論也。其論黃鐘之宮。據管子呂氏春秋。以正淮南子天文訓。漢書律曆志之膠。曰黃鐘之宮。黃鐘半律也。卽後世所謂黃鐘清聲是也。唐時風雅十二詩譜。以清黃起調。畢曲琴家正宮調。黃鐘不在大絃。而在第三絃。正黃鐘之宮。爲律本遺意。國語伶州鳩因論七律。而及武王之四樂。夷則無射曰上宮。黃鐘太簇曰下宮。蓋律長者用其清聲。律短者用其濁聲。古樂用均之法。雖亡。而因端可推。韓子外儲篇曰。

夫瑟以小絃爲大聲，大絃爲小聲，雖詭其辭以諷，然因是知古者調瑟之法。黃鐘大呂太簇夾鐘姑洗仲呂蕤賓用半而居小絃，林鐘夷則南呂無射應鐘用全而居大絃也。管子書五聲徵羽宮商角之序亦如此。永此言實漢以來所未尋究者。其論古韻曰：考古音者，昉於吳才老。崑山陳氏援證益精博，然顧氏考古之功多，審音之功淺。顧氏分古音爲十部，猶未密也。真諱以下十四韻，當析爲二部，而先韻半屬真諱，半屬元寒，考之三百篇，用韻蓋然。侯之正音近幽，當別爲一部。虞模部之隅淪驅婁等字，蕭豪部之蕭寥包好等字，皆侯幽之類，與本部源流各別。三百篇亦盡然。侵覃以下九韻，亦當以侈斂分爲二部，而覃鹽半屬侵，半屬嚴添。蓋平上去三聲，皆當爲十三部，入聲當爲八部，而三代以上之音，始有條不紊也。論今韻曰：平上去三聲多者六十部，少者五十餘部，惟入聲祇三十四部，或謂支至哈，蕭至麻，尤至幽，無入聲。崑山顧氏古音表，又反其說，於是舊有者無，舊無者有，皆拘於一偏。蓋入聲有二三韻，而同一入者，如東尤侯同以屋爲入，真脂同以質爲入，文微同以物爲入，寒桓戈歌同以曷未爲入之類，按其呼等，察其偏旁，參以古音，乃無憾也。其深衣考誤，謂深衣之制，諸儒論者凡數十家，大率踵襲交解十二幅之譌，據玉藻言衽當旁，則非前後之正幅也。舉鄭君之注以正疏誤，因爲深衣圖考。晚年讀書有得，隨筆撰記，謂周易以反對爲序次，卦變當於反對取之，否反爲泰，泰反爲否，故小往大來，大往小來，是其例也。凡曰來，曰下，曰反，自反卦之外卦，來居內卦也。曰往，曰上，曰進，曰升，自反卦之內卦，往居外卦也。又謂兵農之分，春秋時已然，不起於秦漢，證以管子左傳，兵常近國，都野處之，農固不隸於師旅也。其於經傳稽考精審，多類此。所著有周禮疑義舉要七卷，禮記訓義擇言六卷，深衣考誤一卷，律呂闡微十卷，律呂新論二卷，春秋地理考實四卷，鄉黨圖考十一卷，讀書隨筆十二卷，古韻標準四卷，四聲切韻表四卷，音學辨微一卷，河洛精蘊九卷，四書典林四十卷，推步法解五卷，七政衍，金水二星發微，冬至權度恆氣注曆辨，歲實消長辨，曆學補論，中西合法擬草各一卷，近思錄集注十四卷，考訂朱子世家一卷，乾隆二十七年卒，年八十二，休寧戴震歛縣金榜之學，得於永爲多。永卒後，震攜其書入都，故四庫全書收永所著書至十餘部，尙書秦蕙田撰五禮通考，撫永說入觀象授

時類。而推步法解。則載其全書焉。

沈彤

沈彤。字冠雲。江蘇吳江人。自少力學。讀書以窮經爲事。貫串前人之異同。折衷至當。文章不屑辭華。獨抒心得。願闡淡自修。世鮮知之者。逮乾隆元年。薦舉博學鴻詞。緣奏賦於夜半。不及成詩。不入選。與修三種及一統志。書成。授九品官。恥不仕。以親老歸。彤淹通三種。以歐陽修有周禮官多田少祿且不給之疑。後人多沿其說。卽有辨者。不過以攝官爲詞。乃詳究周制。撰周官祿田考三卷。以辨正歐說。分官爵數公田數祿田數三篇。積算至爲精密。其說自鄭注賈疏以後。可云特出。又撰儀禮小疏一卷。取士冠禮。士昏禮。公食大夫禮。喪服士喪禮。爲之疏箋。足訂舊義之譌。其果堂集十二卷。後訂正經學之文。若周官頒田異同說。五溝異同說。井田軍賦說。釋周官地徵等篇。皆援據典覈。又撰春秋左傳小疏。尙書小疏。氣穴考略。內經本論。彤性至孝。親歿三年中。不茹葷。不內寢。居恆每講求經世之務。所著保甲論。其後吳德旋見之。稱爲最善云。十七年卒。年六十五。

杭世駿

杭世駿。字大宗。別字蕙甫。浙江仁和人。家貧。力學。假書於人。窮晝夜讀之。父母禁止。輒篝燈帳中默誦。與同里名人輩結讀書社。五日一相聚。互爲主客。問難。以多聞見者勝。世駿尤強記。同輩推服。雍正二年舉人。乾隆元年。召試博學鴻詞。授翰林院編修。校勘武英殿十三經。二十四史。纂修三種義疏。世駿性仇爽。能面責人過。同官皆嚴憚之。有先達以經說相質。一覽便稱某事見某書。某說見某集。拾唾何爲。學子有欲受教者。問其所業。以一經對。則以經詰之。以一史對。又以史詰之。窮不能應。乃曰。某於西晉末十六國事。差能詳耳。復問汝知是時有慕容垂乎。垂長若干尺。得年幾何。其人慚。去。值亢旱。高宗思得直言及通達治體者。特設陽城馬周科。試翰林等官。世

駁預焉。日未中。條上四事。數千言。語過懇直。有意見不可設。畛域不可太多。滿洲賢才雖多。較之漢人十之三四。天下巡撫常滿漢參半。總督則漢人無一也。何內滿而外漢也。三江兩浙。天下人才淵藪。邊隅之士。間出者無幾。今則果於用邊者之人。不計其才。不計其操履。不計其資俸。而十年不調者。皆江浙之人。豈非有意見畛域等語。上怒抵其卷於地者再。復取視之。時世駿試畢。方趨同官寓邸。忽傳言罪且不測。同官恐。促世駿急歸。世駿笑曰。即罪當伏法。有都市在。必不污君一片地也。何恐。尋放還。其論直省藩庫。宜有餘款存留以備不虞。亦篤論。然已削棄。語多不傳。罷歸後。杜門奉母。益併力肆志。發揮才藻。與同里厲鶚周京符曾陳撰趙昱趙信汪沅吳穎芳丁敬等。皆爲密友。近賓。言懷敘懽。各有構屬。平日通禮學。有請復漢儒盧植從祀議。又議師當制服。可以立師道。厲鶚季。朋友不嘗制服。防不肖者貢媚權勢。賢者結怨流俗。時論甚以爲洽。尤深於詩。嘗曰。吾遇杜韓當北面。若蘇則兄事之。刻嶺南集。詩風格適上。最爲當時所稱。後高宗巡幸塞外。天雨新霽。馬上吟迎風葦露清於染。過兩山痕。瘡入詩二句。顧謂從臣曰。此杭世駿詩也。惜其沒稱耳。嘗作方鏡詩二十四首。一時輦下傳誦。和者幾及千家。晚主講揚州粵東書院。以實學課士子。嘗有商人獲罪。離使。非世駿莫能解。夜半走世駿所乞救。并置重金案上。世駿擲出之。後迎駕西湖。賜復原官。三十八年卒。年七十六。性簡傲通脫。不事修飾。雖同輩時或遭其睥睨。然自謂吾經學不如吳東壁。史學不如全樹山。詩學不如厲樊榭。其學實於史爲精。既爲諸史然疑。史記攷異。兩漢書疏證。三國志補注。晉書補傳贊。北史稟復諸書。復思補集金史。至特構補史亭。成書幾百餘卷。在館閣嘗自永樂大典鈔輯宋元來諸儒禮記說數百卷。以續宋衛正叔書。惟所著除道古堂文集四十八卷。詩集二十六卷外。僅石經攷異二卷。諸史然疑一卷。兩漢蒙拾二卷。晉書補傳贊一卷。文選課虛四卷。續方言二卷。榕城詩話三卷。三國志補注六卷。質疑二卷。詞科掌錄若干卷。均刊行。續禮記集說若干卷。近始付梓於浙局。金史補殘存五卷。藏江南圖書館。餘若史漢北齊疏證暨歷代藝文志。兩浙經籍志。續經籍攷等遺稿。均散失不可得矣。

周永年

周永年。字書昌。山東歷城縣人。結茅林汲泉側。因自號林汲山人。平居但喜聚書。久之。近十萬卷。古槧繕鈔。希觀之本。略具。感古人柱下藏書之義。以謂釋老反藉藏以永久其書。乃作儒藏說十八篇。復約桂馥等買田築借書園祠。漢經師伏生諸人。藏書其中。招致來學。以力絀不就。縣令胡德琳延借青州李文藻同修縣志。朱筠見之。稱其詳慎。乾隆辛卯成進士。特授庶吉士。徵纂四庫全書。時議采輯永樂大典。館臣多次擇其易爲功者。遂謂無所遺逸。永年獨固爭。以爲尙多可錄。同列無如之何。盡舉而委之。永年不聞所夕。目盡九千鉅冊。丹鉛標識。摘抉編摩。於是永新劉氏兄弟。公是非。諸集以下。又得十有餘家。皆前此所未見者。咸著於錄。實有功斯文焉。散館。授編修。充文淵閣校理。乾隆四十四年。任貴州鄉試主考。永年闢於世故。而論學則切實深至。往往溯源官禮。嘗謂宋儒以後。學統授受。學案異同。言人人殊。皆逐末而遺本。夫學安得有統。周官禮千古之學統也。學安得有案。春官禮千古之學案也。又曰。君子思不出其位。位於古文同立。禮有定位。所以立不易方。不知禮。無以立也。鄭孔諸儒之於禮。往往張之。或失其位。周官之禮。遂失其傳。而人且無所措手足矣。故於宮室制度。登降儀節。講求甚悉。以爲學而不明此。皆面牆也。居京師時。學士大夫聞聲爭欲納交。投刺者踵相接。而深相知者。程晉芳。丁杰。邵晉涵。數人而已。卒年六十有三。

范家相

范家相。字左南。浙江會稽人。乾隆十九年進士。授刑部主事。洊陞郎中。三十三年。出知廣西柳州府。歲餘。以疾告歸。尋卒。家相幼時。母授之書。每篝燈治紡。即令侍讀。丙夜不少假。弱冠薄遊。爲人主幕務。稍廢學。年至四十。母責其泯泯無聞。乃復杜門研誦。其學源出蕭山毛奇齡。奇齡說經。引證浩博。善於詰駁。而盛氣所激。其受攻擊亦

最甚。家相持論。一出和平。不敢放言高論。生平最服膺者。尤在餘姚黃宗羲。性孝友。直諒敦古。晚歲手一編。矜矜不置。於詩尤深。著三家詩拾遺十卷。謂三家之說。與禮記周官左國多不合。而毛獨條條可復。此毛所以得掩前人。然朱子集傳。每取匡劉韓子之說。以糾毛失。使三家並存。其駁三家者。或當甚於毛。惟僅一二。彌覺可重。然則三家之是者。固當信從。其非者亦不妨兩存也。其書撫拾經傳子史。比惠棟九經古義。余蕭客古經解鈎沈。尤爲賅備。又著詩譜二十卷。以注疏集傳爲兩大樞紐。惟其合者從之。間出新義。補所未備。而折衷孟子逆志論世之法。其謂三百篇之韻叶之而不協者有三。列國之方音不同一也。古人一字每兼數音。而字音傳譌已久。非可執一以諧聲。二也。詩必歌而後出。每以餘音相諧。自歌詩之法不傳。而餘音莫辨。三也。其說足解顧炎武毛奇齡兩家之闕。他著有易說二卷。書義拾遺七卷。夏小正輯注四卷。四書實約十卷。家語證僞十卷。韻學考原二卷。今韻津五卷。史漢義法十卷。史記叢拾三卷。廟制問答二卷。刑法表四卷。南中日札四卷。文集二十卷。

秦蕙田

秦蕙田。字樹峯。號味經。江蘇金匱人。乾隆元年一甲三名進士。授編修。命南書房行走。六年。充順天武鄉試副考官。七年。命尚書房行走。八年閏四月。遷侍講。六月。遷右庶子。八月。遷右通政。十一月。擢內閣學士。十年。遷禮部右侍郎。十二年五月。丁本生父憂。十三年四月。奉旨秦蕙田服制將滿。著仍以禮部侍郎調用。十五年。調刑部侍郎。二十九年。充經筵講官。二十二年正月。擢工部尚書。四月。署刑部尚書。七月。疏言。工部爲工程總彙。辦法難易不同。委辦司員。每意存趨避。請照刑部現審案件。製籤均派之例。將應派各員設名簿。以工程大小。分別等次。一百兩以上。滿郎中員外籤掣。三十兩以下。筆帖式籤掣。仍註簿堂官留心體察功過。示懲勸。得旨允行。二十三年正月。調刑部尚書。仍兼管工部事。尋加太子太保。四月。疏請將各省流巧遞籍編甲收管。以清逃盜之源。十月。疏言。尚例各部院赴閣傳鈔事件。係當月司員專責。而當月止滿員一人。遇漢字事件。假手鈔寫。每致草率遺漏。請增

源漢司員一人。下部議行。二十四年。御史觀成挾嫌誣奏民人張九違禁晒麪一案。蕙田擬罪失當。部議革職。奉旨寬免。二十五年。充會試正考官。二十八年。充會試正考官。二十九年四月。以病請解任。不許。八月復請。准給假。南旋就醫。九月卒於途。賜祭葬如例。予諡文恭。時年六十有三。蕙田少承家學。以經術篤行爲江陰楊名時所知。官翰林時。月進劄子。原本經術。迨官侍郎。嘗舉仁和孫瀛自代。世服其知人。領西曹最久。遇事沈毅果斷。退則閉戶著書。夙精三禮之學。按周官吉。凶。軍。賓。嘉。之目。撰爲五禮通考二百六十二卷。因徐乾學讀禮通考體例。網羅衆說。以成一書。凡爲類七十有五。以樂律附於吉禮。宗廟制度之後。以天文推步句股割圓。立觀象授時一題。統之。以古今州國都邑山川地名。立禮國經野一題。統之。並載入嘉禮。先儒所聚訟者。一一疏其脈絡。破其癥結。上探古人制作之原。下不違當代之法。殫思二十餘年。彙易三四而後定。又少喜談易。謂易者象也。先儒詳於言理。略於言象。故撰周易象義日箋若干卷。又謂詩三百篇。古人皆被之管絃。漢魏以降。始失其傳。然天籟之發。今猶古也。因與同志講求。欲以今曲歌古詩。庶幾協詩樂合一之旨。又以近代聲韻之書。未有善本。奏請刊正。上命與武進劉公任其事。蕙田建議言古韻二百六部。今併爲一百七韻。如元與魂痕當析爲二。殷韻宜併入真部。不當入文韻。上聲拯韻。去聲證韻。宜分出。各自爲韻。又考定四聲表。兼采顧亭林江慎修之說。欲通古音於等韻。其著述大略如此。

莊存與

莊存與。字方耕。江蘇武進人。乾隆十年。一甲二名進士。授編修。十三年五月散館。考列二等。諭曰。歷科進士殿試。一甲第一名。即授爲修撰。二名三名。即授爲編修。至散館時。並無所更易。伊等恃已授職。遂自甘怠忽。學業轉荒。即如今年散館。修撰錢維城。考列清書三等。編修莊存與。考列漢書二等之末。其不留心學問。已可槩見。但錢維城係派習清書。或尙非其所素習。著再試以漢書。候朕閱定。莊存與不准授爲編修。俟引見時。朕酌量其人才。或

以部屬。或以知縣。或歸班選用。則此後一甲之人。皆有所警惕而專心學問矣。若有仍考列三等者。其例視此十六年五月引見。仍授編修。是年。孝聖憲皇后六旬聖壽慶典。特開鄉會恩科。命於次年春舉行鄉試。十二月。充湖北鄉試副考官。十七年六月。大考二等。升侍講。尋入直南書房。十八年六月。擢翰林院侍讀學士。充湖北鄉試正考官。九月。提督湖南學政。二十年四月。遷少詹事。六月。擢內閣學士。兼禮部侍郎。二十一年。充浙江鄉試正考官。九月。提督直隸學政。二十二年。奏直隸冒籍生員自首改正。每學多至五六十名。少者十五六名。尙有未經查出者。恐此後有將本身入學姓名。令兄弟子姪頂替。甚或賣與各省童生頂名呈首。或本人自首於北。而他人頂替於南。若但據自首改回。弊恐不少。請將冒籍各生。暫停南北歲科兩試。定限一年。著落本身自首。即據所首姓名三代籍貫。一面咨禮部存案。一面行該省取具父師親族鄰里切實甘結。地方官加具印結。方准咨回該省學政入冊。如查有假冒頂替。照例辦理。首明雖限一年。咨查需日。己卯鄉試應停收考錄送下部議行。二十三年二月。存與考試滿洲蒙古童生。因不能傳遞。各童生擁擠鬧堂。經御史湯世昌奏參。命革存與職。尋諭曰。莊存與於考試童生鬧場一案。既不能奏參於前。及朕面召詢問。又不據實陳奏。是以將伊革職。但各童生喧鬧。究因該學政辦理尙屬嚴密。不能傳遞之故。今既審明情節。而該學政竟因此罷黜。殊非懲創惡習之意。莊存與著帶革職。仍留內閣學士之任。又諭曰。朕以滿洲蒙古童生。皆世受養養之人。乃不知遵奉教約。恣效外省惡習。此於八旗風俗。大有關繫。不可不嚴行根究。乃派出查審之大臣等。於案內情事。並未嚴行窮究。而贖罪之處。又不允當。所審皆旗人。故不能不掣肘。而朕豈肯一任其意存瞻徇。而顛預了事耶。當經親臨覆試。隨獲挾帶如許之多。因復親加鞫訊。務得實情。而童生海成。係包攬傳遞。首先倡議鬧場之犯。一聞覆試。輒將鬧場時帶出之卷。倩人補作。捏飾投遞。希圖狡脫。已屬刁頑。至在場放鴿傳遞。包攬受賄各情。業經羅保等供證確鑿。乃於朕前。又復挾嫌誣陷和安。肆其狡獪。抗不吐實。及加嚴訊。而狂悖無禮。竟有何不殺之之語。滿洲世僕中。有如此敗類。斷不可留矣。因降旨將伊正法。其附和鬧場之羅保和安。即得妥訊。並搜出懷挾。又復強辯之訥拉善。俱發往拉林種地。至隨從

開場及夾帶草藁字片之烏爾希蘇等四十人。本應如議發遣。但既經訓責示懲。俱從寬令其在旗披甲。永遠不准考試。滿學教授旺衍。係專管伊等之人。臨時已不能約束。而大臣等詢問。伊尙模稜含糊。不肯吐實。著發往熱河披甲。此次莊存與所錄。尙屬秉公。而交卷之人。非開場之人可知。著加恩仍准作生員。尋奏請酌減各直省鄉試官卷中額。諭曰。前據莊存與條奏。各直省鄉試官卷。應酌減中額一摺。隨經蔣傅奏請。將官卷裁去一併歸入民卷。均交大學士九卿議奏矣。朕昨敬閱聖祖仁皇帝實錄。內載上諭。令大臣子弟。另編字號。考試取中。既已肅清弊端。又不致有妨孤寒進取。恭覽之下。仰見皇祖慎重科名。嘉惠士子。立法之始。本爲防弊。而被時諸臣奉行。不無偏袒子姓親族之見。含糊具奏。分定中額。未便過多。遂使以憐卹寒賤之意。轉成僥倖搢紳之路。揆之情理。實未允協。此議減議裁者所由來也。朕思中額貴有限制。而立法務在均平。嗣後各直省鄉試官卷。於見在中額酌酌公當。大省二十名。取中一名。中省十五名。取中一名。如此辦理。則官卷既免濫取之弊。亦不致有妨孤寒。不必去官卷之名。而於制科取士。兼收並探之道。庶爲平允。其如何酌量妥辦。無致偏枯。並著大學士九卿詳議具奏。旋議定直隸江南浙江江西福建湖廣等大省官生。二十名。取中一名。三十一名。取中二名。山東河南山西廣東等中省十五名。取中一名。二十三名。取中二名。廣西雲南貴州等小省。十名。取中一名。十六名。取中二名。順天鄉試滿洲蒙古漢軍。照小省取中。南北貢監。照中省取中。不及額者。歸民卷。從之。又奏磨勘舊例。內筆誤二三字。停會試一科。與字句偶疵。不妨寬貸一條。前後互異。請嗣後字句疵謬。罰停會試一科。筆誤無關弊竇者免議。又奏場內經題。向例同考官先擬。考官書籤製用。請嗣後令考官自擬。以杜同考官代士子豫擬經題之弊。均如所議行。四月。擢禮部右侍郎。二十四年四月。奏各省優生赴京朝考。請照考試續後拔貢。不拘人數之例。一體辦理。從之。閏六月。丁父憂。二十七年正月。服闋。補內閣學士。三十三年。命在上書房行走。三十六年三月。充會試副考官。六月。充浙江鄉試正考官。三十七年。命教習庶吉士。三十八年。仍補禮部右侍郎。三十九年。提督山東學政。尋調河南學政。四十一年。丁母憂。四十三年。服闋。四十四年六月。署禮部左侍郎。十月。補禮部右侍郎。四十九年。

二月轉禮部左侍郎五十年八月。命偕禮部尙書德保。重輯律呂正義。五十一年正月。上以存與年力就衰。予原品休致。五十三年十月卒。存與爲學貫通六經。悉有撰述。說易以孟氏六日七分爲經。以馬班天官地理律曆各書志爲緯。其爲文。辨而精。醇而肆。旨遠而義近。舉大而不遺小。能言諸儒所不能言。計爲象傳論一卷。象傳論一卷。繫辭傳論一卷。附序卦傳論。八卦觀象解二卷。卦氣解一卷。於書不分今古文文字同異。而剖析經義。深得孔子序書孟子論世之意。爲尙書既見二卷。書說一卷。於詩詳於變雅。發揮大義。凡毛鄭異說者。多是毛而非鄭。爲毛詩說二卷。補一卷。附一卷。則專釋楚茨一章。申傳箋以難集傳焉。於禮獨重周官。原本經籍。博采傳記諸子。爲周官記五卷。家宰記有官屬表。司徒記有載師任地譜。司馬記則補其缺文。無宗伯司寇記。而別采掇尙書國語等周秦古書。作司空記一篇。復探經中大典。如郊廟族屬之類。原本鄭氏。又徧覽古人所論列者。件繫而折衷之。爲周官說五卷。於春秋專主公羊董子。雖略采左穀及宋元諸家之說。而無何劭公所譏倍經任意。反傳違戾諸弊。本趙氏坊春秋屬辭例。槩括其條。正列其義。以成一家之言。爲春秋正辭十二卷。至舉例一卷。要旨一卷。尤足闡明家法。示治公羊春秋者以途徑。於四書不崇虛語。而歸本於六經。蓋深得漢人遺意。雖多非考亭。要可處乎評友之列。爲四書說一卷。厥後從子述祖外甥劉逢祿等暢發其春秋遺緒。遂衍常州派今文學之緒焉。

黃丕烈

黃丕烈。字紹武。號蕘夫。又號復翁。江蘇長洲人。少讀書。務求精純。發爲文章。必根柢六經。嘗仿宋人春秋類對之法。摘經語彙爲駢四儷六之文。以類相從。哀然成編。年十九。受知學使彭侍郎芸楣。補諸生。乾隆戊申。舉本省鄉試。禮闈數上不售。大挑一等。以知縣用。發直隸。無意仕宦。乃援例得主事分部。復即告歸。旋丁外艱。性至孝。友父柩在室。會不戒於火。將及寢。則撫棺大慟。誓以身殉。火竟滅。丕烈博學膽闊。寢食於古。好蓄書。尤好宋槧本。嘗構專室藏所得宋本。名之曰百宋一廬。自稱佞宋主人。願廣圻爲之賦。謂其馳香嚴與芳茶。思計日而取儻。範屋

室於衛荆。姑掩昭而一怒。香嚴者。同郡周錫瓚書屋名。芳茶者。歸安嚴元照堂名。皆藏有宋槧本。其後丕烈復收得宋本數十種。自喜。以爲符掩昭之頌。昭二百也。尤精校勘之學。所校周禮鄭氏注。夏小正國語國策。皆有功來學。好刻古籍。每刻一書。行款點畫。一仍舊本。卽有譌踈。不敢擅改。別爲札記。綴於卷末。錢大昕段玉裁甚稱之。謂可以矯近世輕改古書之弊。嘗著汪本隸釋刊誤一卷。謂洪文惠密於考史。而疏於證經。婁彥發長於體勢。而短於音訓。大昕以爲知言。他所著有盲史精華。百宋一廬賦。注百宋一廬書錄。堯言等書。

惠士奇

惠士奇。字天牧。一字仲孺。周惕子。弱冠爲諸生。不就省試。或問之。則曰。胸中無書。焉用試焉。於是益奮志讀書。凡九經四史國語國策楚辭之文。皆能闡誦。嘗對座客誦史記封禪書終篇不失一字。康熙戊子。舉鄉試第一。明年。成進士。選庶吉士。授編修。癸巳乙未會試。兩充同考官。己亥。充祭告炎帝陵舜陵使臣。庚子。主湖廣鄉試。督學廣東。雍正元年癸卯。留任三年。嘗謂漢時蜀郡僻陋。文翁守蜀。選子弟就學。遣雋士張寬等東受七經。還以教授。其後司馬相如王褒嚴遵揚雄相繼而起。文章冠天下。漢之蜀。今之粵也。於是毅然以經學倡諸子。三年之後。通經者多。文體爲之一變。又謂今之校官。古博士也。博士明於古今。通達國體。今校官無博士之才。弟子何所教法。訪得海陽進士翁廷賓。卽具疏題補韶州教授。部議學臣向無題補屬吏例。特旨許之。在任遷右中允。超擢侍講學士。轉侍讀學士。任滿還京。粵人思之。設木主。配食先賢。廣州於三賢祠。潮州於昌黎祠。惠州於東坡祠。每元旦及生辰。諸生肅衣冠入拜。其得士心如此。丁未五月。奉旨修鎮江城。以產盡停工罷官。乾隆初入京。以講讀用。所欠城修銀得寬免。丁巳六月。補侍讀。己未春。以病告歸。辛酉三月卒。年七十有一。士奇盛年兼治經史。晚年專精於經學。撰易說六卷。禮說十四卷。春秋說十五卷。其論易曰。易始於伏羲。盛於文王。大備於孔子。而其說猶存於漢。不助孔子之易。不足與言文王。不明文王之易。不足與言伏羲。舍文王孔子之易。而遠問庖犧。吾不知之矣。漢儒

言易。孟喜以卦氣。京房以適變。荀爽以升降。鄭康成以爻辰。虞翻以納甲。其說不同。而指歸則一。皆不可廢。今所傳之易。出自費直。費氏本古文。王弼盡改爲俗書。又創爲虛象之說。遂舉漢易而空之。而古學亡矣。易者。象也。聖人觀象而繫辭。君子觀象而玩辭。六十四卦皆實象。安得虛哉。其論春秋曰。春秋三傳。事莫詳於左氏。論莫正於穀梁。韓宣子見魯春秋曰。周禮盡在魯矣。然則春秋本周禮以記事也。左氏褒貶。皆春秋諸儒之論。故記事皆實。而論或未公。公羊不信國史。惟篤信其師說。師所未言。則以意逆之。故所失嘗多。要之。左氏得諸國史。公穀得之師承。雖互有得失。不可偏廢。後世有王通者。好爲大言以欺人。乃曰。三傳作而春秋散。於是啖助趙匡之徒。爭攻三傳。以伸其異說。夫春秋無左傳。則二百四十年盲濡如坐闇室中矣。公穀二家。即七十子之徒所傳之大義也。學者當信而好之。擇善而從之。若徒據孟子盡信書不如無書之說。力排而痛詆之。吾恐三傳廢而春秋亦隨之而亡也。其說周禮曰。禮經出於屋壁。多古字古音。經之義存乎訓。識字審音。乃知其義。故古訓不可改也。康成注經。皆從古讀。蓋字有音義相近而譌者。故讀從之。後世不學。遂謂康成好改字。豈其然乎。康成三禮。何休公羊。多引漢法。以其去古未遠。故借以爲說。賈公彥於鄭注如飛矛扶蘇。薄借。茶之類。皆不能疏。所讀之字亦不能疏。輒曰。從俗讀。甚非不知蓋闕之義。夫漢遠於周。而唐又遠於漢。宜其說之不能盡通也。況宋以後乎。周察諸子。其文雖不盡雅馴。然皆可引爲禮經之證。以其近古也。幼時讀廿一史。天文樂律二志。未能通曉。及官翰林。因新法坑。推步之原。著交食舉隅二卷。又撰琴瑟理數考四卷。所著詩有紅豆齋小草。賦史樂府。南中集。采蓴集。歸耕集。各一卷。人海集四卷。時術錄一卷。晚年自號半農居士。學者稱紅豆先生。

惠棟

惠棟。字定宇。一字松崖。半農次子。學者稱爲小紅豆先生。初爲吳江縣學生。改歸元和籍。自幼篤志向學。家多藏書。日夜講誦。於經史諸子。裨官野乘。及七經。茲緯之學。靡不通曉。乾隆十五年。詔舉經明行修之士。陝甘總督尹

繼善。兩江總督黃廷柱。文章論薦。會大學士九卿索所著書。未及呈進。罷歸。乾隆二十三年戊寅五月卒。年六十有二。棟於諸經熟洽貫串。尤邃於易。既作九經古義二十二卷。其撰易漢學。乃追考漢儒易學。掇拾緒論。使學者得窺其門徑。凡孟喜易二卷。虞翻易一卷。京房易二卷。干寶附焉。又鄭康成易一卷。荀爽易一卷。其末一卷。則發明漢易之理。以辨正河圖洛書先天太極之學。撰易例二卷。乃鑄鑿舊說。以發明易之本例。其撰周易述二十三卷。以荀爽虞翻爲主。而參以鄭康成宋咸干寶之說。約其旨爲注。演其說爲疏。書垂成而疾革。遂闕草。至未濟十五卦及序卦雜卦兩傳。又撰明堂大道錄八卷。帝說二卷。謂帝行於明堂。明堂法本於易。古文尙書考二卷。辨鄭康成所傳之二十四篇爲孔壁真古文。東晉晚出之二十五篇爲僞。又撰後漢書補注二十四卷。王士禛精華錄訓纂二十四卷。九曜齋筆記。松崖筆記。松崖文鈔。及諸史哲景。竹南漫錄諸書。

萬斯大

萬斯大。字充宗。斯同兄也。遭亂赤貧。授徒以自給。聞黃梨洲之學。偕同學十數子執贄其門。因爲講經之會於甬上。質疑辨難。號稱極盛。斯大屢試有司不合。抽身隱退。日沈酣六經之中。專長於春秋三禮。其讀書大旨。以爲非通諸經不能通一經。非以經釋經則無由悟傳之失。治春秋有專傳論世屬辭比事原情定罪諸義例。專傳者。經無事實。待傳而明。公殿左氏。互有異同。左氏親承所見。事多詳覈。當以爲主。論世者。春秋二百四十二年。世皆無道。孔子但據專直書。是非自別。初未嘗以後起之匹夫。責以往之天子。屬辭比事者。春秋一事必有本末。異事亦有同形。如衛人殺州吁。衛人立晉。此屬辭而見爲一人也。立晉則書衛人。主王子朝則書尹氏。此比事而見其有公私也。原情定罪者。如魯桓公見殺于齊。時莊公尙幼。法無可施。故書薨。至書葬。一似賊之已討者。及莊公既長。則書如齊。書如莒。莊子是不得辭其忘讎之責矣。初纂諸家說。得二百四十二卷。癸丑。燬於火。辛酉。海昌陳令延主其家。以經義相質。尙力能著書。較前更倍。癸亥七月。至昭公而疾作。臨歿時。猶惓惓季武子立後一事。其

苦心壹志如此惜傳者止讀春秋隨筆十卷則編纂時間有獨得另爲劄記亦迄於昭多以禮釋者用其所長猶康成之用禮注易箋詩視宋人憑理妄說有霄壤之判焉若其治三禮於儀禮則有商權三卷於禮記則有偶箋三卷於周官則有辨非二卷類能取甲乙之證據剖前人之聚訟而總義則有學禮質疑二卷梨洲稱其宗法入篇爲冠古絕今必傳之作他如論郊曰郊惟日至一禮社數不名郊論社曰大社在北郊主月王社在國中論禘曰禘與祫一事魯禘不追所自出論祖宗曰東周主文而宗武論泰壇明堂曰儀禮方明壇即泰壇即圓丘其宮方三百步上有明堂日至郊天即于方明壇謂之方明郊天主日也季秋大享于明堂明堂圓丘同在三百步內非有兩地論喪服曰承重之喪皆從夫服又曰庶子爲其生母之黨服與適子爲其母黨服同悉皆發先儒所未發爲人剛毅見有不可者輒形於色而嗜義若渴張蒼水死國難棄骨荒郊爲醜金葬之南屏居家兄弟怡怡修輯譜牒成十卷條理井然雜文存丁炎甲陽草各一卷亦以說經爲多足徵病因自號跛翁云卒年五十一

萬斯同

萬斯同字季野生而異敏年十四五取家藏書徧讀之皆得其大意從黃宗羲得聞戴山劉氏之學以慎獨爲主以聖賢爲必可及寧波有五經會斯同年最少遇疑義輒以片言析之尙書徐乾學撰讀禮通考斯同與參定焉博通諸史尤熟於明代掌故嘗作明開國以後至唐桂功臣將相內外諸大臣年表康熙十七年薦博學鴻儒科辭不就會詔修明史大學士徐元文爲總裁欲薦斯同入館局斯同復辭乃延主其家以刊修委之元文罷繼之者大學士張玉書陳廷敬尙書王鴻緒皆延之乾隆初大學士張廷玉等奉詔刊定明史依據鴻緒彙本而增損之鴻緒彙本實出斯同手嘗病唐以後設局分修之失謂昔選固才既傑出又承父學故事信而言文其後專家之學才雖不逮猶未至如官修者之雜亂也官修之史倉猝成於衆人不暇擇其材之宜與事之習是猶招市人而與謀室中之事也吾辭史局而就總裁所者惟恐衆人分操割裂使一代治亂賢姦之跡昧晦而不明耳又嘗語

方苞曰。史之難爲久矣。非論其世知其人。具見其表裏。則吾以爲信而人受其枉者多矣。吾少館某氏。其家有列朝實錄。吾默識暗誦。未敢有一言一事之遺也。長游四方。就故家長老求遺書。考問往事。旁及郡志邑乘雜家傳誌之文。靡不網羅參伍。而要以實錄爲歸。蓋實錄者。直載其事與言。而無所增飾者也。凡實錄之難詳者。吾以他書證之。他書之謬且濫者。吾以實錄裁之。雖不敢自謂可信。而是非之枉於人者鮮矣。昔人於宋史已病其繁蕪。而吾所述倍焉。非不知簡之爲貴也。吾恐後之人務博而不知所裁。故先爲之極。使知吾所取者有可損。而所不取者。必非其事與言之真而不可益也。建文一朝無實錄。野史因有遜國出亡之說。斯同斷之曰。紫禁城無水關。無可出之理。鬼門亦無其地。成祖實錄稱建文閣宮自焚。上望見宮中煙起。急遣中使往救。至已不及。中使出其屍於火中。還白上。所謂中使者。乃成祖之內監也。安肯以后屍誑其主。而清宮之日。中涓嬪御。爲建文所屬意者。逐一刑訊。苟無自焚實據。豈肯不行大索令耶。且建文登極二三年。削奪親藩。曾無寬假。以至燕王稱兵犯關。逼迫自殞。即使出亡。亦是勢窮力盡。謂之遜國可乎。由是建文之書法遂定。斯同性不樂榮利。見人惟以讀書勵名節。相切劘。初至京師。時讖意其專長在史。及徐乾學居憂。請纂讀禮通考。自國卹及家禮。十四經之箋疏。廿一史之志傳。漢唐宋諸儒之文集。說部無或遺者。又以其餘爲喪禮辨疑四卷。廟制折衷二卷。乃知斯同故深於經。徐因請編成五禮之書二百餘卷。當是時。京師著彥雲集。各以所長自見。斯同獨闒然自守。自王公以下。爭相從問。古儀法。月再三會。聽講者嘗數十人。錄所聞共講肄。呼曰萬先生。時督師之姻方居要津。乞史館少寬假之。斯同數其罪以告之。有運餉官以棄運走道死。其孫以賂乞入死事列。斥之。康熙四十一年。卒於王尙書史局中。年六十。門人私諡曰貞文。斯同於前史體例。貫穿精熟。指陳得失。雖劉知幾鄭樵不及也。馬班史皆有表。而後漢三國以下無之。劉知幾謂無關得失。斯同則曰。史之有表。所以通紀傳之窮。有其人已入紀傳而表之者。有未入而牽連以表之者。表立而後紀傳之文可省。讀史不讀表。非深於史者也。所著補歷代史表六十卷。又紀元彙考四卷。安季忠義錄十六卷。南宋六陵遺事一卷。庚申君遺事一卷。河源考二卷。河渠考十二卷。儒林宗派八卷。石經考

二卷。石經文考二卷。羣書疑辨十二卷。書學彙編二十二卷。周正彙考八卷。歷代宰輔彙考八卷。石園詩文集二十卷。而明史稿及讀禮通考別爲書。

齊召南

齊召南。字次風。號瓊臺。晚號息園。浙江天台人。幼有神童之目。十六補諸生。二十二選拔貢成均。雍正七年。己酉科鄉試中副車。十一年。詔復詞科之制。總督學使以博學鴻詞薦。乾隆元年。召試於保和殿。欽定二等第八名。改翰林院庶吉士。充大清一統志纂修官。授檢討。四年。充武英殿校勘經史官。又充明鑑綱目館纂修官。累遷右春坊右中允。日講起居注官。侍讀學士。充大清會典。續文獻通考纂修官。主順天鄉試。充會試同考官。擢內閣學士。禮部侍郎。旋充續文獻通考館副總裁。特旨勘定通禮。十四年四月。充冊封婉嬪副使。二十九日。自圓明園直上書房。歸澄懷園。甫及門。馬驚墮。觸大石。負重傷幾殆。上爲動容。賜藥。遣中官就寓探問。傳蒙古醫療治。醫以牛腦實之。三月始能起。既乞歸。高宗南巡。數召對。賞賚頻多。主敷文書院。上幸書院。制詩索和。三十二年。因族子周華黨呂留良遺戍歸。刻其書呈於巡撫熊學鵬。並列召南十罪。學鵬上其書於朝。讞定。磔周華。其近族弟姪子孫論大辟者凡十人。召南遽至京。法司當召南徇隱之罪。盡籍其產。後予革職。還其產之十三。旋卒。年六十六。召南觀書。目十行下。一覽終身不忘。應徵北上。過某邑宰。架有異書八冊。一夕覽畢。誦之不遺一字。召南目力異人。瞳小而能遠視。每登山見江船。能辨舟人服色及杯盤壺觴之屬。所著書在史局。爲一統志中河南山東江蘇安徽福建雲南。其所編輯。外藩屬國向無底本。召南所勅撰也。明史綱目前紀二卷。神光燾三朝。召南所輯也。其分撰經史考證。經則尙書禮記春秋三傳。史則史記功臣侯表五卷。漢書百卷。後漢書郡國志五卷。隋書律曆天文五卷。舊唐書律曆天文二卷。嘗言酈氏之注水經。明於西北。而闕於東南。且域外之水道未詳。因撰水道提綱三十卷。大而河海。小而溪澗。溯源窮委。一覽可悉。又有史漢功臣侯第考一卷。歷代帝王表十三卷。後漢公卿表一卷。宋

史目錄等。皆藏於家。

盧文弨

盧文弨字召弓。號磯矣。又號檠齋。號更號弓父。抱經其堂也。人稱抱經先生。浙江餘姚人。父存心。乾隆初。舉博學鴻詞科。文弨乾隆十七年一甲三名進士。授翰林院編修。上書房行走。歷官左春坊左中允。翰林院侍讀學士。三十年。充廣東鄉試正考官。三十一年。充湖南學政。以條陳學政事宜不當。部議降三級用。三十三年。乞養歸。文弨孝謹篤厚。潛心漢學。與戴震段玉裁友善。好校書。所校逸周書孟子音義荀子呂氏春秋賈誼新書韓詩外傳春秋繁露方言白虎通獨斷經典釋文諸善本。鏤板惠學者。又苦鏤板難多。則合經史子集三十八種。而名之曰羣書拾補。所自著有抱經堂集三十四卷。儀禮注疏詳校十七卷。鍾山劄記四卷。龍城劄記三卷。廣雅釋天以下註二卷。皆能使學者誤正積非。蓄疑煥釋。其言曰。唐人之爲義疏也。本單行。不與經注合。單行經註。唐以後尙多善本。自宋後附疏於經注。而所附之經注。非必孔賈諸人所據之本也。則兩相齟齬矣。南宋後。又附經典釋文於注疏間。而陸氏所據之經注。又非孔賈諸人所據也。則齟齬更多矣。淺人必比而同之。則彼此互改。多失其真。幸有改之不盡。以滋其齟齬。啓人考覈者。故註釋文合刻。似便而非古法也。其特識多類此。文弨嘗歷主江浙各書院講席。以經術導士。六十年卒。年七十九。

戴震

戴震字東原。安徽休寧人。讀書好深湛之思。少時。塾師授以說文。三年盡得其節目。年十六七。研精注疏。實事求是。不主一家。與郡人鄭牧汪肇龍汪梧鳳方矩程瑤田金榜從婺源江永游。震出所學質之永。永爲之駭歎。永精禮經及推步鍾律音聲文字之學。惟震能得其全。性特介。年二十八。補諸生。家屢空。而學日進。與吳縣惠棟吳江

沈彤爲忘年友。以避讐入都。北方學者。如獻縣紀昀。大興朱筠。南方學者。如嘉定錢大昕。王鳴盛。餘姚盧文弨。青浦王昶。皆折節與交。尙書秦蕙田。纂五禮通考。求精於推步者。大昕舉震。蕙田延之。纂觀象授時一門。乾隆二十七年。舉鄉試。三十八年。詔開四庫館。徵海內淹貫之士。司編校之職。總裁薦震充纂修。四十年。特命與會試。中式者。同赴殿試。賜同進士出身。改翰林院庶吉士。震以文學受知。出入著作之庭。館中有奇文疑義。輒就咨訪。震亦思勤修其職。晨夕披檢。無閒寒暑。經進圖籍。論次精審。所校大戴禮記。水經注。尤精覈。又於永樂大典內。得九章五曹算經七種。皆王錫闡梅文鼎所未見。震正譌補脫。以進。得旨刊行。御製詩冠其卷首。四十二年。卒於官。年五十有五。震之學。由聲音文字以求訓詁。由訓詁以尋義理。謂義理不可空憑胸臆。必求之於古經。求之古經。而遺文垂絕。今古懸隔。必求之古訓。古訓明則古經明。古經明則賢人聖人之義理明。而我心之所同然者。乃因之而明。義理非他存乎典章制度者也。彼歧訓詁義理而二之。是訓詁非以明義理。而義理不寓乎典章制度。勢必流入於異學曲說。而不自知也。震爲學精誠解辨。每立一義。初若剝獲。及參考之果。不可易。大約有三。曰小學。曰測算。曰典章制度。其小學書。有六書論三卷。聲韻考四卷。聲類表九卷。方言疏證十卷。漢以後。轉注之學失傳。好古如顧炎武。亦不深省。震謂指事象形諧聲會意四者。爲書之體。假借轉注二者。爲書之用。一字具數用者。爲假借。數字共一用者。爲轉注。初哉首基之皆爲始。叩吾台予之皆爲我。其義轉相注也。又自漢以來。古音變微。學者於六書之故。靡所從入。顧氏古音表入聲。與廣韻相反。震謂有入無入之韻。當兩兩相配。以入聲爲之樞紐。真至仙十四韻。與脂微齊皆灰五韻。同入聲。東至江四韻。及陽至登八韻。與支之佳哈蕭宥肴豪尤侯幽十一韻。同入聲。侵至凡九韻。之入聲。則從廣韻。無與之配。魚虞模歌戈麻六韻。廣韻無入聲。今同以鐸爲入聲。不與唐相配。而古音遞轉及六書諧聲之故。胥可由此得之。皆古人所未發。其測算書。有原象四篇。迎日推策記一篇。句股割圓記三篇。曆問一卷。古曆考二卷。續天文略三卷。策算一卷。自漢以來。疇人不知有黃極。西人入中國。始云赤道極之外。又有黃道極。是爲七政恆星右旋之樞。詫爲六經所未有。震謂西人所云赤極。卽周髀之正北極也。黃極。卽周

牌之北極璿璣也。虞書在璿璣玉衡。以齊七政。蓋設璿璣以擬黃道極也。黃極在柱史星東南上弼少弼之間。終古不隨歲差而改。赤極居中。黃極環繞其外。周髀固已言之。不始於西人也。又月建所指。亦謂黃極。夫北極璿璣。冬至夜半恆指子。春分夜半恆指卯。夏至夜半恆指午。秋分夜半恆指酉。以周髀四遊所極推之。則月建十有二辰。爲黃極夜半。所指顯然。漢人以爲斗杓移辰者。非也。又漢以來。九數佚於秦火。儒者測天。多不能盡句股之蘊。西人傳弧三角術。推步始爲精密。其三邊求角及兩邊夾一角求對角之邊。加減捷法。梅氏用平儀之理。爲圖闡之。可謂剖析淵微。然用餘弦折半爲中數。則過象限。與不過象限。有相加相減之殊。未爲甚捷也。震謂用餘弦者。或加或減。易生歧惑。乃立新術。用總較兩弧之矢。相較半折爲中數。則一例用減。更簡而捷矣。蓋餘弦者。矢之餘也。八線法。弧小則餘弦大。弧大則餘弦小。弧若大過象限九十度。則餘弦反由小而漸大。惟矢不然。弧小則矢小。弧大則矢大。弧若大過象限九十度。則矢更隨之而大。是矢與弧大小相應。不似餘弦之參差。故以易之。此立法之根。古人所未及也。震所著典章制度之書未成。有詩經二南補注二卷。毛鄭詩考四卷。尙書義考一卷。儀禮考正一卷。考工記圖二卷。春秋即位攷元考一卷。大學補注一卷。中庸補注一卷。孟子字義疏證三卷。爾雅文字考十卷。經說四卷。水地記一卷。水經注四十卷。九章補圖一卷。屈原賦注七卷。通釋二卷。原善三卷。緒言三卷。直隸河渠書六十四卷。氣穴記一卷。藏府算經論四卷。葬法贅言四卷。文集十二卷。震卒後。其小學則高郵王念孫。金壇段玉裁傳之。測算之學。則曲阜孔廣森傳之。典章制度之學。則興化任大椿傳之。皆其弟子也。後十餘年。高宗以震所校水經注問南書房諸臣曰。震尙在否。對曰。已死。上惋惜久之。

丁杰

丁杰。原名錦鴻。字升衢。號小正。浙江歸安人。乾隆四十六年進士。寧波府學教授。杰純孝誠篤。嘗奔走滇南。迎父柩歸葬。少家貧。就書肆中讀。肆力經史。旁及說文音韻算數。初至都。適四庫館開。任事者延之佐校。遂與朱筠戴

震盧文昭金榜程璠田等相講習。於大戴禮用功尤深。著有大戴禮記釋。又易鄭注久佚。宋王應麟哀輯成書。國朝惠棟復有增入。杰審視兩本。以爲多屬入鄭氏易乾鑿度注。又漢書注所云鄭氏。乃卽注漢書之人。非康成。乃刊其譌定其是。復摘補其未備。著周易鄭注定後凡十二卷。杰爲學長於校讐。與盧文昭最相似。得一書爲審定句讀。博稽他本同異。胡渭禹貢錐指號爲絕學。杰摘其誤甚多。嘗謂緯書移河爲界。在齊呂填闕八流以自廣。夫河患之棘。由九河堙廢。而害始於齊。管仲能臣。必不自貽伊戚。班固敘漕洫志云。南竭周祿。秦決南澗。自茲距漢北亡八支。則九河之塞。當在秦楚之際矣。又惠棟尙書大傳輯本。杰以爲疏舛。謂如鮮度作刑以詰四方。誤讀困學紀聞。此謬之甚者。五行傳文不類。讀後漢書注。始知誤連皇覽也。杰嘗與翁方綱補正朱彝尊經義考序年月。博采見聞。以相證合。又與許宗彥蘭繹墨子上下經。大有端緒。其爲人校定之書。曰毛詩草木蟲魚鳥獸疏。方言漢隸字原復古編。困學紀聞補箋。字林考逸。蘇詩補注。方言善本。始於戴震。杰采獲裨益最多。盧文昭以爲不在戴下。漢隸字原考正。錢塘謂得隸之義例。又言。字母三十六字。不可增併。不可顛倒。見端知邦。非精照爲孤清。不可增濁聲也。疑泥孃明微來日。爲孤濁。不可併清聲也。非卽邦之輕唇。不可併於敷。微卽明之輕唇。不可併於奉。影爲曉之深喉。喻爲匣之深喉。曉匣影喻。不可顛倒。爲影曉喻匣也。所著有小西山房文集。嘉慶十二年卒。年七十。子授經。嘉慶三年優貢。傳經。六年優貢。皆能世其家學。有雙丁之目。授經佐其友嚴可均造甲乙丙丁長編。以校定說文。

王鳴盛

王鳴盛。字鳳喈。號禮堂。又號西莊。晚號西泚。江蘇嘉定人。幼從長洲沈德潛受詩。後又從惠棟問經義。遂通漢學。乾隆十九年。一甲二名進士。授翰林院編修。二十三年。大考翰詹第一。擢侍講學士。充日講起居注官。二十四年。充福建鄉試正考官。尋擢內閣學士。兼禮部侍郎銜。坐濫支驛馬。左遷光祿寺卿。丁內艱。遂不復出。鳴盛性儉。素

無聲色玩好之娛。晏坐一室。呼晤如寒士。嘗言漢人說經。必守家法。自唐貞觀撰諸經義疏。而家法亡。宋元豐以新經學取士。而漢學殆絕。今好古之儒。皆知崇注疏矣。然注疏惟詩三禮及公羊傳。猶是漢人家法。他經注則出魏晉人。未爲醇備。著尙書後案三十卷。專述鄭康成之學。若鄭注亡逸。采馬王注補之。孔傳雖出東晉。其訓詁猶有傳授。間亦取焉。又謂東晉所獻之太誓僞。而唐人所斥之太誓實非僞。故附書今文太誓一篇。存古之功。自謂不減惠氏周易述也。又著周禮軍賦說四卷。發明鄭氏之旨。又十七史商榷一百卷。於一史中。紀志表傳。互相稽考。因而得其異同。又取稗史叢說。以證其舛誤。於輿地職官典章名物。每致詳焉。別撰蛾術編一百卷。其爲目十說。錄說字說地說制說人說物說集說刻說通說系。蓋倣王應麟願炎武之意。而援引尤博。詩以才輔學。以韻達情。古文用歐曾之法。闡許鄭之義。有詩文集四十卷。嘉慶二年卒。年七十六。

金立榜

金榜。字藥中。一字輔子。號檠齋。安徽歙縣人。乾隆二十九年。上南巡。召試舉人。授內閣中書。軍機處行走。三十七年。一甲一名進士。授翰林院修撰。充山西副考官。丁外艱歸。遂不出。著書自娛。卒年六十七。榜少工文詞。以才華爲天下望。後師事江永。友戴震。遂深經術。榜治三禮。最尊鄭康成。然博稽而精思。慎求而能斷。嘗因司馬法難通。乃舉小司徒正卒羨卒以釋之。累千餘言。東原讀之歎曰。此有益於爲周官之學者矣。餘若論三江漢爲北。岷爲中。浙爲南。秦正月用亥。穉兼天地人。每卑用樂之差諸條。均極明確。晚得風痺疾。臥床第間。手次其稿。成禮箋三卷。以鄭毛書爲言。禮者之舌人。而病賈孔二疏不能補其漏疏。宜其奧密。乃自著論。祖毛詩鄭箋之義。名曰禮箋。以爲釋鄭云爾。凡周禮十五篇。禮經十七篇。戴記十六篇。附圖四。答汪綱書一。大而天文。地域。田賦。學校。郊廟。明堂。下逮車旗器服之細。罔弗貫串羣言。折衷一是。

紀昀

紀昀，字曉嵐，一字春帆，晚號石雲，直隸獻縣人。乾隆十二年，第一名舉人。十九年，成進士。改庶吉士。二十二年，散館。授編修。洊擢詹事府左春坊左庶子。充日講起居注官。昀官編修，於二十六年京察一等。以道府記名。三十三年二月，補貴州都勻府知府。上以昀學問優，外任不能盡長，命加四品銜，留庶子任。四月，擢翰林院侍讀學士。六月，前兩淮鹽運使盧見曾獲罪，有旨籍其家。昀與盧爲姻，漏言於見曾孫蔭恩，革職逮問。戍烏魯木齊。三十五年釋還。三十六年，上幸熱河，十月，昀迎鑾密雲，御試士爾扈特全部歸順詩，立成五言三十六韻以進，得旨優獎。復授編修。三十八年二月，命儒臣校覈明代永樂大典，詔求天下遺書，開四庫全書館。選翰林院官專司纂輯。大學士劉統勳以昀名薦，充纂修官。後又奏全書浩博，應斟酌綜覈，以免挂漏參差。舉昀及提調官耶中陸錫熊爲總辦。搜輯大典中逸篇陸簡，及海內秘笈萬餘部，釐其應刊應鈔應存者，依經史子集部分類聚。撮其大凡，列成總目，爲提要二百卷。上之。諭曰：四庫全書處將大典內檢出各書，陸續進呈，朕詳加披閱，閒予題評，見其考訂分排，具有條理，而撰述提要，粲然可觀，則成於紀昀陸錫熊之手。昀學問本優，校書亦極勤勉，甚屬可嘉。著加恩授爲翰林院侍讀，以示獎勵。十一月，補侍讀。三十九年七月，上以總目提要卷帙繁，命紀昀輯簡明書目一篇。上求遺書，凡中外所獻，擇其珍本，製詩弁於首。昀進書部凡百，御題所進孫覺春秋經解，有邵張珍弄今歸紀。汲古深心，有足多之句。十月，以子汝傳詰逋負呈議，降調。詔改降三級留任。故事，降留官遇升缺，不予開列。四十年，吏部請除翰林院侍讀學士，無昀名。上以昀於四庫全書盡心襄輯，命一體列名。四十一年正月，擢侍讀學士。充文淵閣直閣事。九月，復充日講起居注官。四十二年，館臣校書錯誤，應議。昀以特旨免。四十四年三月，擢詹事府詹事。四月，擢內閣學士兼禮部侍郎。四十六年，提要成進御。上嘉其詳覈，命優敘。四十七年，擢兵部侍郎。四十八年，轉左侍郎。四十九年，上南巡，行在發御製濟水考寄昀，命據各說經家及輿地家詳考之。五十年正月，擢都察院左都御史。四月，員外郎海昇毆繁妻吳雅氏，詭言自縊死，事覺，命昀鞠其獄。覆檢不實，部臣譴備職。詔改革職留任。五十二年，遷禮部尙書。充經筵講官。五十四年，賜紫禁城綺馬。五十六年，再調左都御史。五十七年，畿輔歲歉，餓民

多就食京師。均奏言。直隸河間等府。二麥歉收。命截漕五十萬石備賑。而領賑百姓。有極貧次貧之不同。次貧之戶。可以支持待賑。不肖輕去其鄉。至極貧之戶。一聞米貴。不能不就食他方。近京之處。多先赴京城備工餬口。恐聚集日多。未必能人人得所。又業已扶老挈幼。拮据得至。勢難即返。就糧。是此項流戶。以極貧之故。離其鄉井。轉不能同沐皇仁。似為可憫。定例每年自十月初一日起。至次年三月二十日止。五城原設粥廠十處。每日領官米十石。由坊官煮粥。外來流戶原可同霑。但自夏至冬。為期尚遠。恐貧民迫不及待。且人數較多。米數亦未必能敷。伏思偏災不過四府。賑米有餘。請於原額五十萬石內。酌撥京城數千石。自六月中旬為始。每廠煮米三十石。至十月初一日後。則於原額十石之外。加煮米二十石。仍均以三月二十日為止。其米先於京倉支用。將來於截漕數內撥還。庶貧民就食者得以在京存留。不致閉關遠去。明春易於還鄉。不誤耕作。即各處聞有此信來者較多。伊等本係應賑之人。此間多一人領粥。則本地少一人領米。計人數米數。仍屬相當。亦不慮本處給散之不足。如此一轉移間。所需賑米。仍在截漕原額之內。而貧民在鄉在外。皆得均霑。於賑務更為周到。疏聞。下廷臣議。從之。八月。復遷禮部尚書。仍署左都御史。十二月。奏考試春秋向用胡安國傳。而胡傳一書。中多有經無傳。出題之處。不過數十。即如本年鄉試。竟有一題而五省同出者。其三四省相同。不一而足。士子不讀全經。不知本事。但記數十破題。便敷入試之用。且胡安國當宋南渡時。不附和議。作是書以諷高宗。而斥秦檜。其人品正。而借經立說。與孔子意不相比附。恭讀聖祖仁皇帝欽定春秋傳說彙纂。駁胡傳者數十百條。皇上御製之文。亦多駁其說。而科場所用。以重複相同之題。習偏謬失當之論。殊覺無謂。請嗣後春秋題俱以左傳本事為文。參用公羊穀梁之說。在三傳親承聖教。既較千年後儒學家之論為得其真。而士不讀左傳。不能成文。亦足以勸經學而裨文風。疏入。得旨。允行。六十年。與千叟宴。嘉慶元年六月。調兵部尚書。十一月。復調左都御史。二年。遷禮部尚書。四年。充高宗純皇帝實錄館副總裁。七年。明年八十生日。命署上駟院卿。賞賚珍幣。至胸家賜之。六月。署兵部尚書。七月。上孝淑皇后奉安事宜。陳奏失詞。部臣議鐫職。詔改革職留任。又以咨送議處司員。祇宋其沅一人。為御史鄭敏行所劾。部

臣如前議。詔改降三級留任。其後孝淑皇后奉安禮成。命再予量減有差。十月。奏定例。凡婦女強姦不從。因而被殺者。皆准旌表。其猝遭強暴。細縛受污。不屈見戕者。則例無旌表。伏思此等婦女。舍生取義。其志本同。徒以或辱弱而遭獷悍。或孤身而遇多人。此其勢之不敵。非其節之不固。卒能捍刃捐生。與抗節被殺者無異。譬如忠臣烈士。誓不從賊。而紮縛把持。強使跪拜。可謂屈膝賊庭者乎。請敕交大學士九卿科道公議。與未被污者略示區別。量予旌表。尋議如兇手在兩人以上者。顯係孱弱難支。與強姦被殺者一體予旌。令各督撫勘明奏請。上裁報可。是月。昫有疾。命軍機章京富縣率醫官王詔恩視之。十年正月。以禮部尙書協辦大學士。加太子太保管國子監事。二月卒。予諡文達。昫於書無所不通。尤深漢易。力闢圖書之謬。四庫全書提要簡明目錄。皆出其手。大而經史子集。以及醫卜詞曲之類。其評論抉奧闡幽。詞明理正。識力在王仲寶阮孝緒之上。而胸懷坦率。性好滑稽。尤有陳亞之稱。其一生精力萃於提要一書。又好爲釋官小說。而懶於著書。少年間有撰述。今藏於家。是以不傳。惟其遺集與閱微草堂筆記傳世。他所纂輯。如熱河志。歷代職官表。河源紀略。八旗通志。暨方略。會典。三通。諸館。咸總其事。

段玉裁

段玉裁。字若膺。一字懋堂。江蘇金壇人。生而穎異。讀書有兼人之資。年十三補諸生。學使尹會一授以小學書。遂究心焉。乾隆二十五年舉人。至京師。見休寧戴震。好其學。遂師事之。以教習得貴州玉屏縣知縣。旋調四川。署富順及南溪縣事。又辦理化林坪站務。時大兵征金川。輓輸絡繹。玉裁處分畢。輒篝燈著述不輟。著六書音韻表五卷。古韻自顧炎武析爲十部。後江永復析爲十三部。玉裁謂支佳一部也。脂微齊皆灰一部也。之哈一部也。漢人猶未嘗淆借通用。晉宋而後。乃少有出入。迄乎唐之命令支注脂之同用。佳注皆同用。灰注哈同用。於是古之截然爲三者。罕有知之。又謂真臻先與諄文殷魂痕爲二。尤幽與侯爲二。得十七部。其書始名詩經韻譜。羣經韻譜。

嘉定錢大昕見之。以爲鑿破混沌後。易其體例。增以新加十七部。蓋如舊也。書成。自蜀寄震。震偉其所學之精。云自唐以來。講韻學者所未發。尋任巫山縣。年四十六。以父老引疾歸。卜居蘇州之楓橋。鍵戶不問世事者三十餘年。玉裁於周秦兩漢書無所不讀。諸家小學皆別擇其是非。於是積數十年精力。專說說文。著說文解字三十卷。謂爾雅以下義書也。聲類以下音書也。說文形書也。凡篆一字。先訓其義。次釋其形。次釋其音。合三者以完一篆。故曰形書。又謂許以形爲主。因形以說音說義。其所說義。與他書絕不同者。他書多假借。則字多非本義。許惟就字說其本義。知何者爲本義。乃知何者爲假借。則本義乃假借之權衡也。說文爾雅相爲表裏。治說文而後爾雅及傳注明。又謂自倉頡造字時。至唐虞三代秦漢。以及許叔重造說文曰某聲。曰讀若某者。皆條理合一不紊。故既用徐鉉切音。又某字志之曰古音。第幾部後附六書音韻表。俾形聲相爲表裏。始爲長編名。說文解字讀凡五百四十卷。既乃隱括之成此注。書未成。海內想望者幾三十年。嘉慶十七年始付梓。高郵王念孫序之。曰千七百餘年無此作矣。玉裁又以說文者。說字之書。故有讀如無讀爲說。經傳之書。必兼是二者。漢人作注於字。發疑正讀。其例有三。讀如讀若者。擬其音也。比方之詞。讀爲讀曰者。易其字也。變化之詞。當爲者。定爲字之誤聲之誤而改其字也。救正之詞。三者分。而漢注可讀。而經可讀。述漢讀考。先成周禮六卷。又撰禮經漢讀考一卷。其他十六卷未成。儀徵阮元謂玉裁書有功於天下後世者三。言古音一也。言說文二也。漢讀考三也。其他說經之書。以漢志毛詩經毛詩故訓傳本。各自爲書。因釐次傳文。還其舊者。重訂毛詩故訓傳三十卷。以諸經惟尙書離厄最甚。古文幾亡。賈逵分別古今。劉陶是正文字。其書皆不存。乃廣蒐補闕。正晉唐之妄改。存周漢之駁文。著古文尙書撰異三十二卷。又錄左氏經文。著春秋左氏古經十二卷。而以左氏傳五十九卷附後。又有毛詩小學三十卷。汲古閣說文訂十六卷。經韻樓集十二卷。二十年卒。年八十一。初玉裁與念孫俱師震。故戴氏有段王兩家之學。玉裁少震四歲。謙焉執弟子禮。雖毫。或稱震必垂手拱立。朔望必莊誦震手札一通。卒後。王念孫謂其弟子長洲陳奐曰。若膺死。天下遂無讀書人矣。玉裁弟子長洲徐頌。嘉興沈瀛。及女夫仁和龔颺。正俱知名。而奐尤得其傳。

孫星衍

孫星衍字淵如。江蘇陽湖人。少與同里楊芳燦洪亮吉黃景仁文學名齊。袁枚品其詩曰。天下清才多。奇才少。淵如天下奇才也。與訂忘年交。星衍雅不欲以詩名。爲文風骨遒勁。深究經史文字音訓。旁及諸子百家。皆心通其義。既從錢大昕遊。精研漢學。元和江聲注尙書。以堯稽古爲同天。皋陶稽古爲順考古道。前後歧說。星衍著論云。鄭注稽古同天。言堯同於天也。鄭意蓋以堯稱帝爲同天。書正義引其文云。稽同也。古天也。天爲古之說。雖見周書。未必唐時卽有此義。又嘗於江寧瓦官寺閣。見元應一切經。并慧苑華嚴經音義。引倉頡爲多。乃刺取其文。兼摭他書。爲倉頡篇三卷。謂元應慧苑書。世多不傳。然足與陸德明經典釋文並垂於世。屬友人刊行。乾隆五十一年。朱珪典試江南。在都與彭元瑞約曰。吾此行必得汪中孫星衍。及搜遺卷。得經文策曰。此必汪中也。拆卷得先生。而汪實未就試。明年。賜進士第二人。授編修。充三通館校理。五十四年。散館。試屬志賦。用史記騶駒如畏語。大學士和珅疑爲別字。置二等。改刑部主事。故事一甲進士改部。或奏請留館。又編修改官。可得員外郎。前此吳文煥有成策。大學士和珅示意欲使往見。星衍不肯。自是編修改主事。遂爲成例。官刑部。爲法寬恕。大學士阿桂尙書胡季堂悉器重之。有疑獄。輒令依古義平議。平反甚衆。退直之暇。仍理舊業。高麗使臣朴齊家入貢。特謁星衍。爲書問字堂扁。賦詩以贈。五十七年。遷員外郎。洊陞郎中。六十年。授山東兗沂曹濟道。嘉慶元年七月。曹甯水漫灘。潰決單縣地。星衍與按察使康基田鳩工集夫。五日夜從上游築隄逼禦之。不果決。基田謂此役省國家數百萬帑金。尋權按察使。凡七閱月。平反數十百條。活死罪誣服者十餘獄。濰縣有武人犯法。賄和神門屬託大吏。星衍訪捕。鞠之。械和門來者於衢。及回本任。值江南豐工及山東曹工同時漫溢。星衍以無工處所得疏防咎。特旨予留任。曹工分治引河三道。星衍治中段。工畢。較濟東道登萊道上下段省三十餘萬。先是河工分賠之員。或得羨餘。謂之扣費。星衍不取。悉以給引河工費。時曹工尙未合。河督巡撫亟奏合龍。移星衍任。尋又奏稱合而復。

開。開則分賠兩次。壩工銀九萬兩。當半屬後任。而司事者並以歸星衍。星衍亦任之。曰。吾既兼河務。不能不爲人受過也。四年六月。丁母憂歸。儀徵阮元撫浙。聘主詁經精舍。星衍課諸生以經史疑義。及小學天部地理算學詞章。不十年。舍中士皆以撰述名家。服闋入都。奉旨仍發山東。十年。補督糧道。十二年。權布政使。值侍郎廣興在省。供張煩擾。星衍不肯妄支。後廣以賄敗。豫東兩省多以支庫獲罪。星衍不與焉。湯陵舊在山西榮河。星衍據漢榷。駟晉伏酒。及皇覽說。皆云濟陰有湯陵。任曹南時。常申上府請釐祀典。至是陵始修整。給地畝。奉香火。並訪左伯桃羊角哀墓。皆爲文紀其事。又得秦時展氏先塋墓。知柳下惠墓在泰安。更封柩之。又考太平寰宇記。知先賢閔子墓在范縣。今所傳在歷城者。誤。爲修築之。申禁樵采。又以伏生傳書二十七篇。使二帝三王之訓典不墜於地。欲奏請建立伏博士。乃具稿稜學政。屬鄒平令訪其嫡裔。資使讀書。越七年。竟得入告。奉旨准以伏生六十五代孫敬祖世襲五經博士。十六年。引疾歸。星衍博極羣書。勤於著述。又好聚書。聞人家藏有善本。借鈔無虛日。金石文字。靡不考其原委。常病古文尙書爲東晉梅賾所亂。官刑部時。即集古文尙書馬鄭注十卷。逸文二卷。歸田後。又爲尙書今古文注疏三十九卷。其序例云。尙書古注散佚。今刺取書傳。升爲注者五家。三科之說。一司馬遷從孔氏安國問故。是古文說。一書大傳伏生所傳歐陽高大夏侯勝小夏侯建。是今文說。一馬氏融。鄭氏康成。雖有異同。多本衛氏宏。賈氏逵。是孔壁古文說。皆疏明出典。其先秦諸子所引古書說。及緯書白虎通等。漢魏諸儒今文說。許氏說文所載。孔壁古文注中。存其異文異字。其說則附疏中。其書意在網羅放失。舊聞。故錄漢魏人佚說爲多。又兼采近代王鳴盛江都段玉裁諸人書說。惟不取趙宋以來諸人注。以其時文籍散亡。較今代無異。聞。又無師傳。恐滋臆說也。凡積二十二年而後成。論者以爲勝王鳴盛書。星衍又善校書。寫刻必訪宋本。所校刊者。有周易口訣義六卷。尙書考異五卷。春秋釋例十五卷。孫子十家注十三卷。元和郡縣志四十卷。景定建康志五十卷。唐律疏議三十卷。金石文字及古彝鼎書畫。皆能窮原竟委。文在大朝。漢魏間。不欲似唐宋八家。所著又有周易集解十卷。夏小正傳校正三卷。魏三體石經殘字考一卷。倉頡篇三卷。孔子集語四卷。史記天官書考證十卷。

寰宇訪碑錄十三卷。平津館金石萃編二十卷。孫氏家藏書目內編四卷。外編三卷。讀古文苑二十卷。問字堂文稿五卷。岱南閣文稿五卷。五松園文稿一卷。平津文稿二卷。續古文苑二十卷。詩集若干卷。卒於嘉慶二十三年正月。年六十有六。星衍性誠正。無僞言僞行。立身行事。皆以儒術。尤喜獎借後進。所至之地。士爭歸附。其所撰輯。能集衆人之才智。準以己之識力。再三審擇。而後成篇。其卒也。海內學者。皆悼慕之。配王采微。工詩善書。有長離閣集。

桂馥

桂馥。字東卉。一字未谷。山東曲阜人。乾隆五十五年進士。選雲南永平縣知縣。居官多善政。嘉慶十年。卒於任。年七十。馥博涉羣書。尤潛心小學。精通聲義。嘗謂士不通經。不足致用。而訓詁不明。不足以通經。故自諸生以至通籍。四十年間。日取許氏說文。與諸經之義相疏證。爲說文義證五十卷。云義證者。取梁書孔子祛傳中語也。其書蒼萃羣書。力窮根柢。爲一生精力所在。馥與段玉裁生同時。同治說文。學者以桂段並稱。而兩人兩不相見。書亦未見。段氏之書。聲義兼明。而尤邃於聲。桂氏之書。聲義並及。而尤博於義。段氏鈎索比傳。自以爲能。冥合許情。勇於自信。自成一家之言。故破字叔義爲多。桂氏數佐許說。發揮旁通。令學者引申貫注。自得其義之所歸。故段書約。而猝難通闢。桂書繁而尋省易了。其專臚古籍。不下己意。則以意在博證求通。輾轉孳乳。觸長無方。亦如王氏廣雅疏證。阮氏經籍纂詁之類。非可以己意爲獨斷者也。馥尙有說文諧聲譜考證。本欲與義證并行。歿後遇亂。散失數卷。馥又繪許祭酒以下及魏濟陽江式唐趙郡李陽冰南唐廣陵徐鉉徐鉉兄弟宋吳興張有錢塘吾邱衍之屬。爲說文統系圖。大興朱筠嘗爲之記。及就宦滇南。追念舊聞。隨筆疏記十卷。以其細碎。比之匠門木杙。題曰札樸。然馥嘗引徐幹中論。鄙儒博學。務於物名。詳於器械。考於訓詁。摘其章句。而不能統其大義之所極。以獲先王之心。故使學者勞思慮而不知道。費日月而無成功。謂近日學者。風尙六書。動成習氣。偶涉名物。自負倉雅。

略講點畫。妄議斯冰。叩以經典大義。茫乎未之聞也。此尤爲同時小學家所不能言。足以鍼育起廢。他著有疏學集十二卷。繆篆分韻五卷。續三十五舉一卷。

張惠言

張惠言。字皋聞。江蘇武進人。少受教經。卽通大義。年十四。爲童子師。修學立行。敦品自守。嘉慶四年進士。時大學士朱珪爲吏部尙書。以惠言學行特奏。改庶吉士。充實錄館纂修官。六年散館。奉旨以部屬用。珪復特奏。改授翰林院編修。七年卒。年四十二。惠言鄉會兩試。皆出朱珪門。未嘗以所能自異。默然隨羣。弟子進退而已。珪潛察得之。則大喜。故屢進達之。而惠言亦斷斷相諱。不敢隱。珪言。天子當以寬大得民。惠言言。國家承平百餘年。至仁涵育。遽出漢唐宋之上。吏民習於寬大。故奸孽萌芽其間。宜大伸法。以肅內外之政。珪言。天子當優有過大臣。惠言言。庸猥之輩。倖致通顯。復壞朝廷法度。惜全之。當何所用。珪喜進淹雅之士。惠言言。當進內治官府。外治疆場者。與同縣編修洪亮吉於廣坐諍之。惠言少爲辭賦。擬司馬相如揚雄之文。及壯。又學韓愈歐陽修篆書。初學李陽冰。後學漢碑額及石鼓文。嘗奉命詣盛京。篆列聖加尊號玉寶。惠言言於當事。謂舊藏寶不得磨治。又謂翰林奉命篆列聖寶。宜奉請馳驛。以格於例。不果行。生平精思絕人。嘗從欽金榜問故。其學要歸六經。而尤深易禮。著有周易虞氏義九卷。虞氏消息二卷。嘗謂自漢武帝時。劉向校書考易說。以爲諸易家皆祖田何。楊叔丁將軍。大義略同。惟京氏爲異。而孟喜受易家陰陽。其說易本於氣。而後以人事明之。八卦六十四象。四正七十二候。變通消息。諸儒祖述之。莫能具當。漢之季年。扶風馬融作易傳授。鄭康成作易注。而荊州牧劉表。會稽太守王朗。潁川荀爽。南陽宋忠。皆以易名家。各有所述。惟翻傳孟氏學。既作易注。奏上之獻帝。翻之言易。以陰陽消息六爻發揮旁通。升降上下。歸於乾元用九。而天下治。依物取類。貫穿比附。始若瓊碎。及其沈深解劍。離根散葉。暢茂條理。遂於大道。後儒罕能通之。自魏王弼以虛空之言解易。唐立之學官。而漢世諸儒之說微。獨資州李鼎祚作周易集解。

頗采古易家言。而翻注爲多。其後古書盡亡。而宋道士陳搏以意造爲龍圖。其徒劉牧以爲易之河圖洛書也。河南邵雍又爲先天後天之圖。宋之說易者。翕然宗之。以至於今。牢不可拔。而易陰陽之大義。蓋盡晦矣。大清有天下。元和徵士惠棟始考古義。孟京荀鄭虞氏作易漢學。又自爲解釋曰周易述。然撥捨於亡廢之後。左右采獲。十無二三。其所述。大抵宗稱虞氏而未能盡通。則旁徵他說以合之。蓋從唐五代宋元明朽壞散亂。千有餘年。區區修補收拾。欲一旦而其道復明。斯固難也。翻之學既盛。又具見馬鄭荀宋氏書。考其是否。故其義爲精。又古書亡而漢魏師說可見者十餘家。然惟鄭荀虞三家略有梗概。可指說。而虞又較備。然則求七十子之微言。田何楊叔丁將軍之所傳者。舍虞氏之注。其何所自焉。故求其條貫。明其統例。釋其疑滯。信其亡闕。庶以探蹟索隱。存一家之學。其所未籍。俟有道正焉耳。又著虞氏易禮二卷。虞氏易候一卷。虞氏易言二卷。初惠棟作周易述。大旨遵虞翻。補以鄭荀諸儒學者。以未能專一少之。儀徵阮元謂漢人之易。孟費諸家。各有師承。勢不能合。惠言傳虞氏易。卽傳漢孟氏易矣。孤經絕學也。惠言又著周易鄭氏義三卷。周易荀氏九家義一卷。周易鄭荀義三卷。易義別錄十四卷。易緯略義三卷。易圖條辨二卷。其易義別錄序。謂不盡見其辭。而欲論其是非。猶以偏言決獄也。不盡通各家。而欲處其優劣。猶援白而嘲黑也。故其所著。皆羽儀虞氏易者。於禮有儀禮圖六卷。讀儀禮記二卷。皆特精審。又有茗柯文五卷。詞一卷。所纂說文諧聲譜未就。

邵晉涵

邵晉涵。字與桐。一字二雲。念魯從孫。晉涵以禹貢三江。其南江從餘姚入海。遂自號南江。世傳道學。性質貞亮。乾隆三十年舉於鄉。三十六年。會試第一。成進士。廷試二甲。歸部銓選。三十八年。詔開四庫館。大學士劉統勳首薦之。特旨改庶吉士。充纂修官。踰年。授編修。五十六年。遷中允。擢侍講。轉侍讀。歷左庶子。侍讀學士。充日講起居注官。直文淵閣。歷充成安宮總裁。萬壽盛典。八旗通志。三史館。三通館。纂修官。又爲國史館提調。兼掌進擬文字。典

試廣西者一。教習庶吉士者二。分校石經。晉涵職春秋三傳。亦多所校正。晉涵至性過人。執親喪。哀毀骨立。與人交。始終如一。未嘗以博雅自矜。惟以非義干者。不待語竟。即拂衣起。人以是嚴憚之。少多病。左目微瞽。清羸如不勝衣。而獨善讀書。數行俱下。寒暑舟車未嘗頃刻輟業。於四庫七略無不研究。而能推極本原。實事求是。在館時。總裁問以某事。答曰。在某冊第幾葉中。不失一字。咸訝以爲神。與戴東原同在四庫館。當時言經學必推戴氏。言史學必推晉涵云。其學以浙東三先生爲宗。每上下古今。凡政治得失。人才消長。君子小人之元黃水火。皆能抉其弊之所由始。與害之所由終。尤熟於明代掌故。於朋黨奄禍及唐魯二王起兵始末。口講指畫。往往出正史之外。會稽章學誠恆與言。史學不求家法。則愈奇務瑣。但知日務增華。不過千年。特恐大地不足容間架矣。聞之撫膺歎絕。欲以斯意刊定前史。自成一家。時議前史榛蕪。莫甚於元修三史。而措功宋史尤難。遂獨慨然自任。以宋史自南渡後。益爲荒謬。原東都尙賴有王無事略也。乃先輯南都事略。將使前後條貫粗具。然後別加裁斷。更爲趙宋一代全書。惜未竟業。在四庫館時。見永樂大典載有薛居正五代史。因蓄萃編次。第其前後。再取冊府元龜。太平御覽。並通鑑長編諸書。以補治所闕。始末飭備。部帙如舊。書成。奏上。高宗稱善。壽。令依舊唐書例。列爲二十四史。頒行天下學宮。畢制府秋帆。嘗以二十年之久。集賓客續宋元通鑑。大率就徐氏本稍爲損益。殊不愜心。爰屬晉涵訂正。卽大改厥觀。秋帆旋薨。嗣其家所刻。仍係初稿。非晉涵定本。可慨也。晉涵於學無所不窺。浩廣初未易裁。頗用累志。及在安徽。依朱竹君督學幕。竹君謂之曰。經訓之義荒久矣。雅疏尤蕪陋不治。以君子與博。宜與郭景純氏先後發明。庶幾嘉惠來學。於是殫思十年。成爾雅正義二十卷。取景純爲宗。而兼采舍人樊光李巡孫炎諸家之注。有未詳者。摭他書補之。凡三四易稿。始定。他著有韓詩內傳考。穀梁正義。孟子述義。輜軒日記。方輿金石編目。而傳者獨爾雅正義。皇朝鑑述錄。南江詩文集。數種。五代史考異二卷。僅存殘本。嘉慶元年卒。年五十四。

章學誠

章學誠字實齋。浙江會稽人。稟賦孱弱。日僅誦百餘言。猶不中程。然性耽典籍。雅好乙部之學。塾課餘暇。常私取左國諸書。分紀表志傳。作東周書幾百卷。比長。從山陽劉文蔚量鉅游。習聞鼓山南雷之說。學遂日進。乾隆庚辰。始應順天鄉試。不售。肄業成均。乃問學於大興朱竹君先生。即館其邸舍。得徧覽羣書。獲交當世聞人。名漸起。尋中戊子科北榜副車。竹君督學安徽。學誠暨邵晉涵。洪亮吉。黃景仁等。皆延致幕中。而與邵論史尤訢合無間。初隨父客湖北天門。適改修縣志。爲撰修志十議。後亦嘗就南北方志之聘。修和州亳州永靖諸志。更創州縣立志科。方志立三書議。顧未能行用。戴東原見其和州志例。謂修志當詳沿革。不當侈言文獻。學誠則謂方志如古國史。不得已而勢不兩全。無寧重文獻而輕沿革。往復辨難。終不相屈。觀其爲畢秋帆制府修湖北通志稿。大略分四部。以圖經合列傳爲一部。掌故文徵各爲一部。附以叢談爲一部。即可概見其義法焉。丁酉。秋闈獲雋。逾年成進士。官國子監典籍。絕意進取。至開選垂得。仍舍去。苦家貧不能著書。疊主近畿及河南山東諸書院講席。館穀所入。藉佐探討。獨特才睥睨。所持論務高遠。恆與俗迕。知之者寡。祇筭河身山深相推挹。兩先生旣歿。益寥落無所合。晚歲病瞽。撰述每倩寫官。迄死弗輟。卒年六十有八。學誠於古今學術淵源。輒能條別而明其宗旨。下筆沈雄醇茂。尤長攻難駁詰之文。班范以次。均遭指摘。所著書以史籍考爲最博。文史通義爲最精。史籍考代謝蘇潭侍郎撰。踵竹垞成例。凡十二綱。五十七目。三百二十五卷。其言史部雖佔羣籍四之一。而實上援甲而下合丙丁。故範圍廣博。竭畢生心力然後成。惜遺稿竟不傳。至於文史通義。共數十萬言。則以六經皆史書。與春秋同原。詩教最廣。太史陳之。官禮制作。與大易之制憲明時。聖王經世之大。皆所以爲史也。每一篇就。率寫寄友人。因之傳錄多有異同。道光壬辰。次子華紱始編定爲文史通義內篇五卷。外篇三卷。校讎通義三卷。刊於大梁。全彙除史籍考外。卒前存諸蕭山王宗炎處。近烏程劉氏翰怡得之。重加校訂。凡三十卷。益以信摭。乙卯丙辰劉記。閱書隨劄。永靖和州兩志。爲外集十八卷。并目錄附錄各一卷。共五十卷。於是章氏遺書。粲然大備矣。

許宗彥

許宗彥字積卿。浙江德清人。父祖京。乾隆三十四年進士。官至山東布政使。著有詩經述八卷。詩四卷。宗彥九歲能讀經史。善屬文。侍郎王昶愛其才。作積卿字說以贈。嘉慶四年進士。是科得人最盛。總裁朱珪尤重宗彥。謂兼有張惠言王引之吳禛諸子之長。授兵部主事。就官兩月。以親老遽引疾歸。親歿。卒不出。居杭州。杜門以讀書爲事。其學問無不通。宗彥爲學務求六經大義。深觀自漢以來二千年治亂得失。究古今儒道隆替。文章真僞。不屑屑校讎文字。辨析偏旁訓詁。不惑於百家支離蔓衍迂疎寡效之言。其言曰。所謂下學而上達者。詩書執禮則下學也。知天命則上達也。後之儒者。研窮心性。而忽略庸近。是知有上達而不由於下學。必且虛無惛恍而無所歸。考證訓詁名物。不務高遠。是知有下學不知有上達。其究瑣屑散亂無所統紀。聖賢之學。不若是矣。又考周五廟二稅。以爲周制五廟之外。別有二稅。爲遷廟之殺。以厚親親之仁。宗廟之外。別立祖宗。與禘郊同爲重祭。以大尊尊之義。諸經無文武二廟不毀之說。誤始於韋元成。而劉歆因之。鄭康成亦因之。稅者遷廟。乃謂爲不遷之廟。名實乖矣。又考文武二世室。以爲周文武皆配於明堂太室。故有文武世室之號。孔穎達誤謂伯禽稱文世室。武公稱武世室。以公羊傳周公稱太廟。魯公稱世室。羣公稱宮。證之舛甚。又考禹貢三江。以爲漢志言分江水首受江。東至餘姚入海。夫曰分江水。曰首受江。則非南江之正流可知。曰東至餘姚入海。則非在吳入海可知。與禹貢三江無與。又考太歲太陰。以爲太歲者。歲星與日同次。斗杓所建之辰也。太陰始寅。終丑。太歲始子。終亥。漢律志曰。太初元年歲前十一月朔旦冬至。歲在星紀。婺女大度。歲名困敦。此太歲始子之確證。武帝詔曰。年名焉逢。攝提格。此太陰始寅之確證。漢書天文志。始誤以甘石之言。太陰者係之太歲。而與太初之太歲。遂差兩辰。乃以爲星有贏縮非矣。又說六書轉注。以爲從偏旁轉相注。說文曰。轉注者。建類一首。同意相受考老是也。後序曰。其建首也。立一爲端。卽建類一首之謂也。如示爲部首。從示之偏旁。注爲神祇等字。從神祇。注爲祠祀祭祝等字。輾轉相

注。皆同意爲一類。戴震指爾雅詁訓爲轉注。而不知詁訓出於後來。非制字時所豫有也。段玉裁引戴說。又言爾雅字多假借。而不知假借者。本無其字。今如初哉首基之訓。非本無首字。而假初哉等字以當之也。其他所著學說。能持漢宋儒者之平。禮論治論諸篇。皆稽古證今。通達政體。尤精天文。得泰西推步祕法。自製渾全球。別具神解。嘗援緯書四游以疏本天高卑而不知不同心。非渾圓之理。考周髀北極璣璣。以推古人測驗之法。七政皆統於天。而知東漢以前用赤道。不用黃道。爲得諸行之本。又論日左右旋一理。以王錫蘭解黃道右旋赤道平行。戴震分黃道黃極爲二行。其說頗不分明。爲剖析之。皆言天家所未及。性孝友。慎於交游。體羸而神理激發。見者皆肅敬之。儀徵阮元會試舉主也。重其學術行誼。以子女爲媼家。宗彥嘗訓諸子曰。讀書人第一須使此心光明正大。澄清如止水。無絲毫苟且私曲。不可對人處。故名所居曰鑑止水齋。二十三年卒。年五十一。著有鑑止水齋集二十卷。

畢沅

畢沅字纒衡。一字秋帆。自號靈巖山人。江蘇鎮洋人。乾隆二十二年。以舉人爲內閣中書。軍機處行走。二十五年。一甲一名進士。授修撰。三十年。升侍讀。三十一年。升左庶子。授甘肅鞏秦階道。嘗從總督明山出關查屯田。奏請調安肅道。三十五年。擢陝西按察使。三十六年。升陝西布政使。三十八年。授陝西巡撫。三十九年。與陝甘總督勒爾謹奏言。甘省地瘠民貧。全賴官倉接濟。前收捐監銀。以補常平缺額。嗣因日久弊生。奉諭停捐。而倉儲缺額尙多。不能如數籌補。竊謂捐監之弊。皆大吏稽察不嚴所致。甘省農民藉糶糧爲生。邇來歲慶屢豐。價值平減。若乘此有秋。准復捐監舊例。聽閭閻自爲輸納。以裕倉儲。以濟民生。於事誠便。奏上。得旨允行。並命沅詳定章程。嚴密稽察。四十一年。賞戴花翎。四十三年。以高樸在葉爾羌私採玉石。運送回京。沅審訊樸家人。供辭不實。降旨責沅草率。四十四年十二月。丁母憂去職。四十五年十月。諭以陝西巡撫。見在一時不得其人。著前往署理。亦非開在

任守制之例也。四十六年三月，甘肅撒拉爾番回蘇阿洪等爭立新教，互相仇殺，並害知府副將等官，搶占河州。沅聞報，即遣西安綠營精兵，會西安將軍伍彌泰提督馬彪等剿捕，賊偏蘭州。又調各路官兵守禦進剿，安設臺站，以速郵傳。糧餉馬匹，軍火器械，籌備皆裕。逆番就擒，收復河州。上諭畢沅在陝西境內，聞甘省有事，即能悉心調度，事事妥協，實屬可嘉。著賞給一品頂帶，並交部優敘。七月，奏率獲川省囑匪艾隆等，旋以甘省捐監州縣，通同捏災冒賑，沅未據實查參，諭令沅自行議罪。沅請罰繳銀五萬兩，備甘省官兵犒賞之用。御史錢澧奏參沅前署督篆時，於該省折捐冒賑諸弊，瞻徇前任，其罪較捏災各員無減。請敕部比照議處。四十七年正月，上諭畢沅在甘省兩署督篆，於該省歷年積弊，亦無不知之理，乃竟巧爲支飾，降三品頂帶，仍留巡撫停止俸廉。並不許呈進貢物。四十八年正月，復還原品頂帶，仍准給養廉。是月服闋，實授巡撫。四十九年，甘省鹽茶廳屬回民聚衆滋事，沅奏調各路官兵搜剿。又奏籌辦軍需，及沿站供支各事宜，俱得旨獎勵。五十年二月，調河南巡撫。二月，奏河北一帶未得雨澤，各屬倉儲，因連年積歉，蠲緩散賑，所存無多，請截留漕糧二十萬石，以備賑借之需。上如其請。又奏請將民欠錢糧，粟予緩徵，及展賑兩月。溫諭嘉之。五月，奏柘城縣奸民聚衆抗官，帶兵親往率獲要犯，審明正法。又奏諭民毋得私自囤積，以平糧價。又濬賈魯惠濟等河，奉硃批：諸凡皆妥。十月，奏查明淮水發源在桐柏山，賜御製准源記。五十一年五月，奏豫省連歲不登，山西舊戶，聞風赴豫放債，準折地畝，貧民失業。見飭屬曉諭報明地方官，酌覈原價取贖。奉諭有盡心民事，居心公正，深識大體之獎。六月，擢湖廣總督。因伊陽縣狀官首犯秦國棟等，日久未獲，不准前赴新任。旋因陝省盤獲秦國棟，沅以緝捕不力，仍回巡撫本任。五十三年，荊州被水，復擢湖廣總督。奉諭即速往荊州辦理撫卹事宜。旋奏與修監利江陵公安廣濟黃梅等縣隄工。五十四年，奏續添荊江雞嘴壩工，及打築萬城隄工。上嘉之。嗣以河南考城縣稔建城垣非地糜費，沅會奉飭未據實陳奏。有旨交部嚴議。五十九年，以湖北竹谿縣民人王占魁等傳習邪教，川省委員查拏匪犯，鞫黨糾搶，毆斃差役。沅未奏及。奉旨降補山東巡撫，摘去花翎，罰繳湖廣總督養廉五年。再罰山東巡撫養廉三年。是年，奏臨清等十州縣，疊

被旱澇。飭屬及時探買存貯。以備平糶。六十年。仍授湖廣總督。時湖南苗石三保滋事。命往荊州常德等處。籌辦糧餉軍火等件。沅抵常德。設局籌運。又以瀘溪爲辰州門戶。浦市爲沿江大市。且轉運必由之路。守兵單弱。奏調湖北省兵。分助防守。又於湖北省州縣。與永順接壤各隘口。俱添兵防守。且爲聲援。又奏辰州三廳及瀘溪等處。村市焚燒。被難之民。既妥爲安置。其中不乏壯丁。見飭屬招募團練。又各寨熟苗。近來亦知大義。且步履健。用以先驅。必能得力。見已出示曉諭招徠。又以各苗寨中有寄居客戶。不皆安分之人。趁此點出散賑。就便清查客民。訊明鄉里。遞回原籍。於撫輯之中。卽寓剔除之意。諸奏皆有旨嘉獎。旋以轉運妥協。賞戴花翎。又以各苗寨紛紛投誠。官兵攻賊。節經痛剿。糧餉軍火。均得應期足用。交部優敘。嘉慶元年正月。湖北省邪匪聶人傑等滋事。自辰州馳赴枝江等處。帶兵會剿。當陽又有匪徒戕官。沅奏往荊州。就近調度。又奏賊情鬼域。輾轉煽惑。鹽梟土棍。多附和入夥。愚民被脅相從。蔓延可慮。請發京營勁旅三千名。酌量分駐。上諭畢沅因州縣紛紛稟報。未免張皇失措。不能得有把握。又以襄陽賊匪潛出滋事。由沅調度失宜所致。傳旨申飭。六月。又以攻剿當陽。曠日持久。傳諭履行申飭。旋降旨交永保總督統辦。七月。沅奏督率兵勇。將當陽賊匪全數剿滅。上諭畢沅已將當陽肅清。所有湖廣總督篆。仍交畢沅接管。繼以惠齡奏生擒首逆張正謨等。沅並賞給輕車都尉世職。作爲二等承襲。九月。奏抵襄陽偵探逃匪。生擒頭目田德魁等。又奏刊發簡明告示。令生擒各賊內曉事者。齎回賊營。徧行曉諭。日來悔罪投誠者。絡繹不絕。十月。奏言。黔楚苗匪首逆吳半生石三保吳八月等。俱以次就擒。僅石柳鄧未獲。已屬勢窮力蹙。請將各省營兵撤回本省營伍。所有苗疆地方扼要處所。酌撥二三十萬名。分布控制。上諭以平隴尙未攻克。卽行撤兵。必非良策。十二月。明亮等奏斬梟石柳鄧等。戴功獻誠。上以沅於苗疆情形諳悉。命速馳往湖南。會同鄂輝姜晟悉心籌酌。加意鎮撫。沅奏言襄陽等處教匪。尙稽殄滅。先儘楚北之兵。撤回歸伍。以資彈壓。又奏樊城爲漢南一大都會。本年猝被賊擾。因無城垣可恃。遂多蹂躪。臣駐守以來。察看形勢。必須建築甌城。方可捍衛。今乘難民空閒。需食正殷。就地招徠。以工代賑。均爲一舉兩得。得旨俞允。二年二月。奏辰州逼近苗疆。爲三廳

門戶。請將提督常駐辰州。稽查彈壓。提標四營兵於常德辰州分駐。俟苗地安靜。提督每歲於辰州常德往來駐劄。又請添設總兵於花園汛。又於附近平隴之強虎哨。撥駐守備一員。以資犄角。三月。又奏鳳凰永綬乾州等處酌添兵丁分駐。又請各處修城築堡。酌給新設苗弁餉銀。諸奏入。奉旨皆依議行。時上以邪匪尙未剿淨。諭沅查明焚掠處所難民復業者。妥爲撫綏。六月。以疾入奏。七月。卒於官。著有傳經表。經典辨正。續資治通鑑。山海經。晉書地理志校注。關中勝蹟圖記。西安省志。關中中州山左金石諸記。靈巖山人詩文集。旋晉贈太子太保。

莊述祖

莊述祖。字葆琛。江蘇武進人。從父存與。十歲而孤。乾隆四十五年進士。遷山東昌樂縣知縣。調濰縣明暢吏。治刑獄得中。豪猾斂跡。嘗勘隸地。衆以爲斥鹵也。述祖指路旁草間何名。曰馬帚。述祖笑曰。此於經名莽。夏小正莽秀記時。凡沙土草莽者宜禾。何謂隸。衆皆服。尋授桃源同知。不一月。以乞養歸。著書色養者十六年。未嘗一日離左右。嘉慶二十一年卒。年六十七。述祖原本家學。研求精密。於世儒所忽不經意者。覃思獨闢。洞見本末。以爲連山亡而尙存夏小正。歸藏亡而尙有倉頡古文。畧可稽求義類。乃著夏小正經傳考釋十卷。以斗柄南門織女記天行之不變。以參中火中紀日度之差。以二月丁卯知夏時。以正月甲寅啓蟄爲曆元。歲祭爲郊。萬入入學爲禘。又著古文甲乙篇。謂許叔重始一終亥。偏旁條例所由出。日辰幹支。黃帝世大撓所作。沮誦倉頡名之。以易結繩。伏羲畫八卦。作十言之教之後。以此三十二類爲正名百物之本。故歸藏爲黃帝易。就許氏偏旁條例。以幹支別爲序次。凡許書所存及見於金石文字者。分別部居。各就條例。書未竟而條理粗備。其餘五經。悉有撰述。旁及逸周書尙書。大傳史記。白虎通。於其舛句訛字佚文說簡。易次換第。草薙腋補。咸有證據。凡所著十七種。又有尙書今古文考證七卷。毛詩考證四卷。毛詩周頌口義三卷。五經小學述二卷。歷代載籍足徵錄一卷。弟子職集解一卷。漢鏡歌句解一卷。石鼓然疑一卷。文鈔七卷。詩鈔二卷。說文古籀疏珍藝宦詩文鈔等。刊行於世。

姚際恆

姚際恆字立方，一字首源，安徽桐城人。浙江仁和籍。諸生。少折節讀書，泛濫百家，西河作山陰何氏藏書記，毛會侯見之曰：何氏藏書有幾，不及姚立方腹笥耳。其傾倒如此。既而盡棄詞章之學，專精經學。年五十，曰：向平婚嫁畢而遊五嶽，予婚嫁畢而注九經，遂屏絕人事。閱十四年而成九經通論。又著庸言錄若干卷，雜論經史理學諸子。未附古今僞書攷，持論雖嚴，足以破惑。學者稱之。所居海峯閣，西窗面湖，儲藏古籍善本及書畫金石甚富。惜九經通論遺稿散佚，止尙書通論辨僞例十卷。見朱竹垞經義攷，其攷駁僞古文當不在潛邱之下。詩經通論數稱於方玉潤詩經原始，專主廢序，尤爲言人所不敢言。餘則杭大宗續禮記集說間引其禮經通論，他皆不可問矣。今存者惟古今僞書攷二卷，分經史子三類，共七十種。又有真書間以僞者，凡八。有本非僞書，而後人妄託其名者，凡六。有兩人共定一書，無從識其主名者，凡三。有未足定著書之人者，凡四。而近代不傳，與夫瑣細無裨之書，並弗錄。其前人辨論精確可取，悉載於前，以期徵信。務使千百年來疑案昭然判黑白焉。今通論暨庸言錄已無從搜訪。此外好古堂書目四卷，書畫記二卷，收入叢書中。

崔述

崔述，字武承，號東壁，直隸大名，父元森，治朱子之學。嘗語述曰：爾知吾名汝之故乎？吾素有志于明道經世，欲爾述吾志耳。年十四，卽泛覽羣書。時渾決城壞，轉徙流連，衣敝糧罄，誦讀不輟。乾隆壬午舉于鄉，嘉慶初，選授福建羅源縣知縣。武弁多藉海寇邀功，誣商船爲盜，述屢平反之。奸徒控其擅釋巨盜，臺使者故知其持平，得免議。旋調署上杭縣。縣饒關稅，官閩者視爲利藪，述以關稅所餘數千金解充緝盜公費。日食蔬飲粥，繼復反任羅源。邑人迎者萬餘，乃革弊俗，修文廟，課諸士講學。嘉慶六年，老病乞休，既歸，往來河北，以著述自娛。其學考據詳明。

如漢儒而未嘗墨守舊說。一求其心之安。辨析精微如宋儒。而未嘗空談虛理。唯求核乎事之實。其所著書有考古提要二卷。上古考信錄二卷。唐虞考信錄四卷。夏商考信錄各二卷。豐鎬考信錄八卷。別錄三卷。洙泗考信錄四卷。餘錄三卷。孟子事實錄二卷。考古續說二卷。附錄二卷。是爲崔氏考信錄。其自叙曰。述自讀書以來。奉先人之教。不以傳注雜于經。不以諸子百家雜于經傳。久之。始覺傳注所言。有不盡合于經者。百家所言。往往有與經相背者。於是歷考其事。彙而編之。以經爲主。傳注之與經合者則著之。不合者則辨之。而異端小說不經之言。則闕其謬而刪削之。題曰。考信錄。其與考信錄相輔者。別有王政三大考典三卷。讀風偶識四卷。尙書辨僞二卷。論語餘說一卷。讀經餘論二卷。五服異同彙考三卷。易卦圖說一卷。與翼錄十二卷。惟春秋類編四卷未成。自述其著書之旨曰。古人之學貴精。後人之學貴博。故世益古則取舍益慎。世益晚則采擇益濬。而文人學士又好議論。古人是非。而不復考其事之虛實。不知虛實既明。則得失是非昭然不爽。故今爲考信錄。專以辨其虛實爲先務。凡無從考證者。輒以不知置之。寧缺所疑。不敢妄言以惑世。若摘發古人之誤。則必抉其致誤之由。使經傳之文。不致終晦。至其書之凡例。則見于考古提要中。曰。漢初傳經。各有師承。傳聞異詞。不歸于一。于戰國處士說客之言。難于檢覈。流傳既久。學者習熟見聞。不復考其所本。但以爲漢儒近古。其言必有所本。近世諸儒。類多掇拾陳言。盛談心性。以爲道學。而于唐虞三代之事。罕所究心。復參以禪學。自謂明心見性。反以經傳爲膚末。而向來所沿之誤。遂莫復過問。而淺學之士。一語一言。必據秦漢之書。見有駁其失者。則攘臂而爭。但殉其名。莫窮其實。故舛誤乖刺。罔可詰窮。又謂凡人多所見則少所誤。少所見則多所誤。而凡人之情。好以己度人。以今度古。以不肯度聖賢。至于貧富貴賤。南北水陸。通都僻壤。亦莫不在相度。往往逕庭懸隔。而其人終不自知。故以戰國秦漢之人。言唐虞三代之事。有移甲爲乙者。有以今度古者。加以戰國之時。說客辯士。往往借物以寓意。後世以虛言爲實事。篤信不疑。故有古有是語。未必有是事者。如列女傳采漆室之女是也。亦有古有是語。而相沿失其真解者。如以轍和日馭爲御車之御是也。非惟秦漢之事多誤也。卽近代之書。述近代之事。其誤者亦復甚多。舉是以推。

則古書所紀聖賢之事。其有年世不符者。均不可盡憑。又非惟漢儒多信戰國策士寓言也。卽前人所言。本係實事。而遞傳遞久。因以致誤。舉是以推。則古史既亡。若僅據傳記。古人之受誣者。豈可勝道。蓋傳記之文。有傳聞異詞。而致誤者。有記憶失真而致誤者。有兩人分言而不能悉符者。有數人遞傳而失其本意者。又有因傳聞異傳。遂誤而兩載者。後人之書。又往往因前人之小失。巧爲曲全。互相附會。以致大謬于事理。學者不察其致誤之由。遂信其說爲固然。不敢少異。良可嘆也。又謂二帝三王。去今甚遠。言語不同。名物各別。且易竹而紕。易象而隸。遞相傳寫。豈能一一得其真。故漢人說經。多出于意度。漢代以後。兼從事于作僞。致帝王聖賢之行。事爲異說所誣。雖有聰明俊偉之才。亦俯首帖耳。莫敢異詞。故辨異端于戰國之時。易。辨異端于兩漢之世。難。辨異端于唐宋之世。尤難中之難。蓋人之信僞也久矣。但震其名而不復察其是非。此考信所由難也。復謂經傳之文。賢哲之語。亦往往過其實。學者惟當求其意旨所在。不必泥詞而害意。况傳雖美不可合于經。記雖美不可齊于經。後世廢經而崇記。故古制雜亂不可考。本末顛倒。於斯而極。其意皆前人所未發。嘉慶二十一年卒。年七十有七。

彭元瑞

彭元瑞。字掌仍。一字輯五。號芸楣。江西南昌人。父廷誥。康熙癸巳恩科副榜貢生。星子縣教諭。本生父廷訓。康熙丙戌科進士。由編修擢贊善。入直南書房。元瑞以乾隆十八年舉於鄉。二十二年中式進士。改庶吉士。二十三年丁母憂。二十六年服闋。二十八年散館。授編修。充武英殿提調。三十二年。入直懋勤殿。命寫經爲孝聖憲皇后祝釐。三十三年四月。廷試翰林詹事等官。特旨免考。尋奉諭曰。中允曹文植編修彭元瑞。沈初。董誥。學問俱優。因內廷有承辦事件。考試翰詹。降旨停免。未得與諸臣一體升轉。著加恩各加一級。九月。充日講起居注官。十二月。遷侍講。三十五年。上六旬萬壽。進萬福集成讀十章。用唐懷仁所輯聖教序。晉王羲之書。排次成文。上嘉之。命以內府所藏宋搨本摹勒。頒賜內外臣工。三十六年五月。擢詹事府少詹事。六月入直南書房。旋充江南鄉試正考官。

九月奉命提督江蘇學政。初松江府屬有金山衛學。起自明代。爲勳屯軍戶。舊設學額十二名。而隸籍生童散處各縣。冒混頗多。難於稽覈。疏請裁汰。將原額十二名散歸松江所屬各學。遵照通例。不分民衛進取。下部議行。三十八年十月。遷內閣學士。兼禮部侍郎。三十九年。受代回京。署工部右侍郎。兼管錢法堂事。四十年三月。充三通館副總裁。四月。充殿試讀卷官。旋丁本生母憂。四十一年服闋。署工部左侍郎。四十二年。充浙江鄉試正考官。尋奉視學浙江之命。四十三年十月。頒賜聖製全韻詩。元瑞排集梁周興嗣千字文恭跋。御書獎諭。並賜古研御墨。並貂裘。四十四年二月。授戶部左侍郎。四十五年。上南巡。命隨至江南。閱召試卷。三月。調江蘇學政。八月恭遇上七旬萬壽。御刻古稀天子之寶。獻古稀頌。蒙恩賞賚。其明年。聖製古稀說勒石。命以頌附於後。是歲。各省學政受代。奉旨仍留江蘇學政任。四十七年四月。調吏部右侍郎。四十八年五月。調兵部右侍郎。十月。回京。充國史館四庫全書館副總裁。四十九年正月。調吏部右侍郎。十一月。充經筵講官。五十年正月。詔開千叟宴。元瑞年五十五。亦叨宴賞。如一品例。遷進千叟宴樂章。命工歌之。尋奉敕撰擬甯壽宮皇極殿鐙聯。稱旨。聖製詩曰。凡事曾聞豫立銓。嘉稱元瑞製鐙聯。東西次序南而北。左右分明後與前。神以通靈氣以運。大爲之儷。四爲駢。雙撐寶柱輝皇極。虔祝天恩待八年。越十年。重荷御題詩云。入柱鐙聯元瑞彭。豫教琢句十年成。東西南北方隔列。左右前後次第呈。詰武敷文勤實政。撫遐惠近戒虛名。恐難符願竟如願。頌以爲規燭照明。元瑞以是年正月丙辰。詔舉千叟宴。越月丁亥。辟雍告成。釋奠講學。越月辛亥。親耕藉田。一時而三大禮行焉。進三大禮賦。五十一年。正月。擢禮部尙書。舊無以新銜請封之例。茲奉特旨。予一品封典。八月。充順天鄉試正考官。五十二年正月。調兵部尙書。充武英殿三通館總裁。四月。充殿試讀卷官。五十三年二月。賜紫禁城騎馬。五十四年二月。京察屆期。奉上諭尙書彭元瑞夙夜宣勤。著交部議敘。尋議加一級。三月。調吏部尙書。管理國子監。四月。充殿試讀卷官。五月。教習庶吉士。十二月。賜第於宣武門內。五十五年四月。充殿試讀卷官。五月。教習庶吉士。八月。恭遇上八旬萬壽。敬集聖製詩。爲萬壽衢歌三百首。偕工部侍郎臣鄒奕。孝填註宮譜奏進。得旨優獎。詔於聖節日。自圓明園入宮。樂工歌以導。

駕。又以是年歲陽在庚。進入庚全韻詩冊。上親加裁定。賜題曰。羣臣所進萬壽詩詞。自當以彭元瑞此冊爲巨擘。愛其用意巧而不纖。文正而胥實。因自首聯讀至末。惜其尾聯平仄不諧。蓋長律格調所最重也。翌日。召見元瑞。言及之。實亦驚惶無措。予當下恍然有悟。庚韻一百八十有九字。讀至尾聯。自當不諧首句。因卽口占。將尾聯上句之庚。移爲首句用韻。去一聯。將末句諧平仄。卽爲全璧。此實西情佳話。不可不紀。因命董誥書冊後。元瑞踞誦感服。重繕一冊。恭附跋語云。自古人臣以文章受知者。若楊微之之選十聯。柳公權之庚一韻。卽已詫爲殊榮。傳諸詩話。從未有臣下之詩。仰邀天章筆削者。不材之木。露猶露而向榮。在礦之金。入紅鑪而成器。臣以構味仰邀誨育。有言偶獲一知半解。皆由漏迪之恩。三生多幸。君以作師。執經請業。正未有艾。所爲服膺者真服。而心悅者莫悅也。謹重繕一通。附識末簡。以彰詩教。以寫感銘。又敬集聖製文爲聖德頌。均蒙寵錫。十一月加太子少保。十二月。奉上諭吏部尙書彭元瑞供職內廷。勤勞夙夜。學問優長。本日朕至甯壽宮見其所製鐙聯。莊雅典切。見在詞臣無出其右者。協辦大學士員缺。久未簡用。有人彭元瑞著加恩協辦大學士。尙其益勵操修。勉勤職業。以副朕造就成全至意。五十六年四月。以從子良彝爲其子頂冒吏員職名事覺。未將容隱之處據實檢舉。經御史初彭齡劾奏。部議奪職。奉旨革去太子少保。協辦大學士吏部尙書。仍加恩降授侍郎。南書房行走。尋補禮部侍郎。十月遷工部尙書。仍賜紫禁城騎馬。十二月。以大學石刻十三經暨石鼓文。命充副總裁。五十七年十月。授翰林院掌院學士。充經筵日講起居注官。五十八年五月。教習庶吉士。五十九年九月。石經告成。恭編考文提要十三卷。得旨褒獎。晉太子少保。賜資有加。旋充文淵閣領閣事。上以廓爾喀歸降。武功告蒞。計自初定金川。至是而十月。刻十全老人之寶。聖製記。元瑞推廣聖意。恭集聖製詩爲十全詩十章。恭跋進呈。六十年五月。教習庶吉士。八月。充順天鄉試正考官。敬排御極六十年紆繩賑貸御製詩章。纂爲李惠全書六十四冊。具表進呈。嘉慶元年。授受禮成。太上皇帝御皇極殿舉千叟宴。元瑞恭預着筵。敬集聖製詩。爲衍聖製千叟宴詩八章。並進千叟宴樂章。四月。充殿試讀卷官。五月。教習庶吉士。十一月。充武會試總裁。二年。命管理詹事府。四年正月。高宗純皇帝龍馭。

上賓。奉旨總理喪儀。四月。命充高宗純皇帝寶錄副總裁。專司編纂。九月。高宗純皇帝奉安禮成。奉上諭工部尙書彭元瑞敬擬祝文。措詞得當。著晉太子太保。嗣因長子翼蒙。官江南鹽巡道緣事被劾。自以不能教訓。疏請議處。上宥之。五年四月。充寶錄館正總裁。六年二月。京察屆期。奉上諭尙書彭元瑞恭辦高宗純皇帝寶錄。盡心編纂。著交部議敘。尋議加一級。三月。充會試總裁。七年四月。充殿試讀卷官。五月。教習庶吉士。七月。管理御書處。充會典館總裁。十二月。奉上諭翰林院掌院學士例應滿員在前。見在彭元瑞以尙書兼充。英和係屬侍郎。其班次在彭元瑞之後。嗣後衙門一切應奏事件。彭元瑞著列銜在英和之前。遇有引見人員。專著英和帶領。彭元瑞年逾七十。兼有廢疾。著不必帶領。會川楚邪匪蕩平論功。上以元瑞雖未入直樞廷。亦能留心軍務。每有敷陳。命交部議敘。尋議軍功加一級。旋以寶錄館奏請議敘。聲明總裁總纂不敢仰邀敘錄。奉旨尙書彭元瑞專勘纂本。尤爲出力。此次即著交部議敘。元瑞以旬日之間。疊被恩命。具疏懇辭。得旨俞允。八年正月。以疾請解職。溫諭慰留。至六月。始得請開缺。仍留充寶錄館總裁。食尙書俸。九月。疾益劇。半載以來。仰蒙眷念。命軍機大臣遣章京往視者三。命侍衛同太醫往視者二。至是復命軍機大臣遣章京汪彥博往詢所服藥餌及病增減狀。猶口授子翼蒙等繕摺奏謝。逾時卒。遺疏不陳官闕。不言子孫。惟依戀恩德。籲請皇上治益求治。安益求安。訓大臣以實心。飭外吏以勤事。官多缺。惟堅持資格。以正士趨。詢事考言。惟嚴辦公私。以厚風俗。疏如上。震悼。諭曰。尙書彭元瑞。著加恩以工部尙書加贈協辦大學士。應得卹典。該衙門察例具奏。禮臣議上賜祭葬如例。予諡文勤。編有祕殿珠林。石渠寶笈。編續西清寶鑑。甯壽鑑。古天祿琳瑯諸書。十一年。以疆臣請命入祀鄉賢祠。嘉慶十二年三月。高宗純皇帝寶錄告成。奉上諭加恩賜祭一壇。入祀賢良祠。

焦循

焦循。字里堂。江蘇甘泉人。嘉慶六年舉人。曾祖源。祖鏡。父葱。世傳易學。循少穎異。八歲在阮廣堯家。與賓客辨壁

上焉夷字曰此當如楚辭讀皮冰切不當讀如縫阮奇之妻以女既壯雅尙經術與阮元齊名元督學山東浙江俱招徠往遊性至孝丁父及嫡母謝艱哀毀如禮一應禮部試後以生母殷病愈而神未健不復北行殷歿循毀如初服除遂託足疾不入城市者十餘年葺其老屋曰半九書塾復構一樓曰雕菰樓有湖光山色之勝讀書著述其中嘗歎曰家雖貧幸蔬菜不乏天之疾我福我也吾老於此矣嘉慶二十五年卒年五十八循博聞彊記每遇一書無論隱奧平衍必究其源以故經史曆算聲音訓詁無所不精幼好易父問小畜密雲二語何以復見於小過循反復其故不可得既學洞淵九容之術乃以數之比例求易之比例漸能理解著通釋二十卷自謂所悟得者一曰旁通二曰相錯三曰時行旁通者在本卦初與四易二與五易三與上易本卦無可易則旁通於他卦亦初通於四二通於五三通於上先二五後初四三上爲當位不俟二五而初四三上先行爲失道易之道惟在變通二五先行而上下應之此變通不窮者也或初四先行三上先行則上下不能應然能變而通之仍大中而上下應如乾四之坤初而成小畜復失道矣變通之小畜二之豫五姤二之復五復初不能應姤初則能應小畜四不能應豫四則能應坎三之離上成井豐失道矣變通之井二之噬嗑五豐五之渙二豐上不能應渙上則能應井三不能應噬嗑三則能應此所謂時行也比例之義出於相錯如睽二之五爲无妄井二之噬嗑五亦爲无妄故睽之噬膚即噬嗑之噬膚坎三之離上成豐噬嗑上之三亦成豐故豐之日昃即離之日昃豐之日中即噬嗑之日中漸上之歸妹三歸妹成大壯漸成蹇蹇大壯相錯成需故歸妹以須須即需也歸妹四之漸初漸成家入歸妹成臨臨通遯相錯爲謙履故眇能視跛能履臨二之五即履二之謙五之比例也既復提其要爲圖略八卷又成章句十二卷總名易學三書初循以易學質王引之引之以爲鑿破混沌年四十七病危以書未成爲憾後乃誓於先聖先師盡屏他務凡四易稿乃成其學易時隨筆記錄有易餘篇錄二十卷易話二卷註易日記三卷易廣記三卷又以古之精通易理深得羲文周孔之精者莫如孟子生孟子後深知其學者莫如趙氏僑疏躋駁未能發明著孟子正義三十卷謂爲孟子作疏其難有十然近代通儒已得八九因博采諸家之說而下以己

意。合孔孟相傳之正情。又著六經補疏。以說漢易者每屏王弼。然弼解箕子用趙賓說。讀彭爲旁。借雍爲甕。通乎爲浮。解斯爲廡。蓋以大書通借。其解經之法。未逮於馬鄭諸儒。爲周易王注補疏二卷。以尙書僞孔傳。說之善者。如金藤我之不辟。訓辟爲法。居東卽東征。罪人卽管蔡。大誥周公不自稱王而稱成王之命。皆非馬鄭所能及。爲尙書孔氏傳補疏二卷。以詩毛鄭義有異同。正義往往雜鄭於毛。比毛於鄭。爲毛詩鄭氏箋補疏五卷。以左氏傳稱君。君無道。稱臣。臣之罪。杜預揚其辭而暢衍之。預爲司馬懿女婿。目見成濟之事。將以爲司馬飾。卽用以爲己飾。萬斯大惠士奇顧棟高等。未能摘姦而發覆。爲春秋傳杜氏集解補疏五卷。以禮以時爲大。訓詁名物。亦所宜究。爲禮記鄭氏注補疏三卷。以論語一書。發明義文周公之情。參伍錯綜。引申觸類。亦與易例同。爲論語何氏集解補疏三卷。合之爲二十卷。又錄當世通儒說尙書者四十一家。書五十七部。仿衛湜禮記之例。以時之先後爲序。得四十卷。曰書義叢鈔。又著禹貢鄭注釋一卷。毛詩地理釋四卷。毛詩爲獸草木蟲魚釋十一卷。陸璣疏考證一卷。羣經宮室圖二卷。論語通釋一卷。循於天文算術。以梅文鼎弧三角舉要。環中黍尺。撰非一時。繁複無次。戴震句股割圓記。務爲簡要。變易舊名。著釋弧三卷。又以弧線之生。緣於諸輪。輪之弗明。法無從附。著釋輪二卷。又以雍正癸卯律書。用橢圓法實測。隨時而差。則立法亦隨時而改。著釋橢一卷。又以九章不能盡加減乘除之用。而加減乘除可以通九章之窮。著加減乘除釋八卷。又得秦道古數學大略。因著天元一釋二卷。開方通釋一卷。吳縣李銳序之云。此書於帶分寄母同數相消之故。發揮無餘蘊。李樂城郭邢臺後爲此學者。未能如此妙也。他著有北湖小志六卷。揚州足徵錄一卷。邗記六卷。里堂道聽錄五十卷。最愛柳柳州文。習之不倦。謂唐宋以來一人而已。著有雕菰樓文集二十四卷。又詞三卷。詩話一卷。循壯年卽名重海內。錢大昕王鳴盛程瑤田等。皆推敬之。始入都。謁座主英和。和曰。吾知子之字曰里堂。江南老名士。屈久矣。歿後。阮元作傳。稱其學精深博大。名曰通儒。世謂不愧。

臧庸

臧庸字西成。又字拜經。本名鏞堂。乾隆中。廣學士文昭主常州書院。庸往受經學。抱其高祖玉琳所著經義雜記相質證。學士驚異之。嗣在蘇州從錢辛楣。王德甫。段若膺諸先生游。錢王爲薦於鄂督畢秋帆。授其孫蘭慶經。嘉慶丁巳。阮文達督浙江學政。輯經籍纂詁。延庸爲助。書成復爲校刊於廣東。庚申。文達撫浙。新闢詁經精舍。復延之佐校十三經注疏。兩應順天鄉試不售。在京師。侍講王伯申。桂香東。編修吳笑存。並加禮重。既受笑存聘。修中州文獻。卽卒於吳氏館中。年四十五。庸其爲學。根據經傳。剖析精微。德清許兵部周生謂其好學深造如皇侃熊安生。當求之唐以上也。所著書。擬經義雜記爲拜經日記八卷。高郵王懷祖亟稱之。平生考古最勤。輯古之書亦多。子夏易傳一卷。謂爲韓學所撰。非卜子夏。惟採釋文。正義集解。不取宋以後。說詩考異四卷。大致如王應麟。但逐條必自考輯。絕不依循王本。韓詩遺說二卷。訂譌一卷。顧千里以爲輯韓詩者衆矣。此爲最精。盧植禮記解詁一卷。爾雅古注三卷。說文舊音考三卷。蔡邕月令章句二卷。王肅禮記注一卷。聖證論一卷。帝王世紀一卷。尸子一卷。賈唐國語注二卷。校鄭康成易注二卷。蕭該漢書音義二卷。皆詳密過人。他著有月令雜說一卷。樂記二十三篇注一卷。孝經考異一卷。臧氏文獻考六卷。拜經堂文集四卷。弟禮堂字和貴。少溺苦於學。擅稽大藝。討論蒼雅。從兄鏞堂受業。事之如師。大興朱文正公嘗稱其文行。阮文達聘襄經籍纂詁。所著說文引經攷十三卷。段若膺王伯申皆服其精確。又輯錄傳記孝子孝婦諸節行。成古今孝傳。他著南宋石經攷。愛日居筆記共若干卷。卒年止三十。

劉台拱

劉台拱字端臨。江蘇寶應人。幼不好戲。六歲母歿。哀毀如成人。九歲作顏子頌。心慕理學。及長。見同里王懋竑朱澤澧書。遂篤志程朱之學。乾隆三十五年舉人。屢試禮部不第。大興朱珪校禮。闈得其卷。歎爲續學之士。時四庫館開。台拱在都與朱筠程晉芳戴震邵晉涵及同郡任大椿王念孫等遊。稽經考古。旦夕討論。台拱齒最少。每發

一義。諸人莫不折服。其學自天文律呂至聲音文字靡不該貫。考證名物。精研義理。未嘗離而二之。於漢宋諸儒之說。不專一家。惟是之求。精思所到。如與古作者晤言一室。而知其意指之所在。以論語禮經爲孔氏微言大義所在。用力尤深。遷丹徒縣訓導課士。以教品立行爲先。暇則誦習古訓。親爲講畫。取儀禮十七篇。除喪服外各繪爲圖。與諸生習禮容。爲發明先王制作之精意。迎兩親學。畢。雍雍色養。事繼母尤孝。母或返家。書至目輒開。嘗客他所。忽心痛驟歸。母病危甚。台拱侍湯藥。衣不解帶者數旬。病遂愈。及兩親歿。水漿不入口。哀動鄰里。旣斂。枕苦啜粥。自是出就外癯。蔬食者五年。青浦王昶以爲有曾閔之孝。而王念孫則稱其學與閻若璩相伯仲。朱筠嘗曰。台拱大賢也。豈獨學問過人也。邵晉涵亦曰。予交友中。淵通靜遠。造次必儒者。台拱一人而已。然台拱以聖賢之道自繩。與人遊處。未嘗一字及道學也。卒以哀毀過情。臥病不起。嘉慶十年卒。年五十五。台拱慎於接物。而好誘掖後進。與王念孫及金壇段玉裁江都汪中。最稱莫逆。中恃才傲物。獨心折台拱。嘗曰。君欲吾養德性。無騁血氣。使吾見所不足。吾所以服也。及中歿。台拱撫其孤。喜孫成立。武進臧庸常以經義請益。台拱飲食教誨之。十七年如一日。庸心感焉。生平無他嗜好。唯聚書數萬卷。及金石文字。日夕冥搜。而不務著述。卒後稿多零落。有漢學拾遺一卷。文集一卷。及方言補校淮南子補校國語補諸書。所撰論語駢枝一卷。說子所雅言。詩書執禮。推廣鄭義。攝齊升堂。駁正孔安國注。疑出魏人依託。君召使攢節。謂交攢傳辭。旅攢亦傳辭。均極明確。餘如疏釋儀禮經文屬官屬吏之分。卿大夫鄉大夫之辨。南陔之之爲取矢。張侯設立之在前朝。祖之奠之非用脯醢醴酒。與夫釋尙書維天陰隲下民。釋詩十千維綱。并轉注假借。說黃鐘之度說。則雜見漢學拾遺一卷。經傳小記三卷。古文集一卷。中尙有荀子補注一卷。凡皆僅存之稿。合刊爲端臨遺書。先生讀書。意有所得。卽書一籤投敗篋。若已經人道者。又檢而棄之。用力勤至如此。故恆發先儒所未發云。

錢大昕，字曉徵，又字辛楣，號竹汀，江蘇嘉定人。十五補諸生。乾隆十六年，召試舉人，授內閣中書。十九年進士，改翰林院庶吉士。二十二年散館，授編修。二十三年，大考二等一名，擢右春坊右贊善。二十四年，充山東鄉試正考官。二十五年，充會試同考官。二十七年，充湖南鄉試正考官。二十八年，大考一等三名，擢翰林院侍講學士。三十年，充浙江鄉試副考官。三十二年，乞假歸。三十四年，補原官，入直上書房，遷詹事府少詹事。三十九年，充河南鄉試正考官，尋提督廣東學政。嘉慶九年卒，年七十七。大昕幼聰慧，善讀書，有神童之目。初從長洲沈德潛游，辭章之學，爲吳中七子之冠。既忽嘆曰：經之未通，乃從而瀟其盤悅乎。由是博覽羣籍，綜貫六藝，適紫陽院長王侍御峻詢本邑人才，王鳴韶光祿以大昕對待御因告之，巡撫雅公檄召至院，試周禮文獻通考兩論，下筆千餘言，悉中典要，驚爲奇才。大昕在京，與褚寅亮、吳昉、魏講明、九章算術、璽西洋測量、弧三角諸法，尙書何國宗久領欽天監事，精於推步，與之論宣城梅氏及明季利徐諸家之學，何輒遜謝，以爲不及，出語人曰：今之賈遠也。又以御製數理精蘊兼綜中西法之妙，悉心探覈，曲邇旁通，由是用以觀史，則自太初三統，四分中至大衍，下迄授時，盡能得其測算之法。於各史朔閏剝蝕，凌犯進退強弱之殊，咸爲抉擇而攷定之。時休寧戴震同居朝列，戴守江氏之說，曲護西法，大昕謂江氏論歲實論定氣，大率祖歐羅巴之說而引伸之，其意頗不滿於宣城，而吾益以見宣城學之高。蓋宣城能用西學，江氏則爲西人所用而已。乃取算術二十四條，演爲答問，皆考核詳審，各具神解。復參泰西日躔最高車之說，以知尙書緯四遊升降，暢劉歆三統曆之意旨，因以彈定班志譌文舛義，探頤索奧，前所未有也。大昕旣以績學著聞都下，秦蕙田輯五禮通攷及奉勅修音韻闡微，皆資相助。修熱河志，續文獻通攷，續通志，一統志，天球圖，亦率任纂修官。願淡於榮利，以識分知足爲懷。四十年夏，丁父憂歸里，遂不復出。壘主鍾山，壘東紫陽等書院，主紫陽至十六年。門下士積二千餘人。大昕博極羣書，不專治一經，而無經不通，不專攻一藝，而無藝不習。凡經史文義、音韻、訓詁、歷代典章制度、官職、氏族、地理、金石、遼金國語，以及中西曆算之法，莫不晰其是非。自其少時，吳江沈氏、元和惠氏，卽以經術著稱東南。大昕推而廣之，錯綜貫串，開示學者，其論易先後天。

之說曰。漢唐以前。儒家與方士均未言先天圖者。宋初。方士始言之。而儒家尊信其說。欲取以驚乎文王孔子之上。毋乃好奇而誣聖人。夫天高而尊。地下而卑。古今不易之位也。地勢北高而南下。君位北而南面。臣位南而北面。信如乾南坤北之說。上下俱倒甚矣。安得云定位乎。論虞氏之卦之說曰。之卦。卽變卦也。虞仲翔說易。專取旁通與之卦。旁通者。乾與坤。坎與離。艮與兌。震與巽。交相變也。之卦則以兩爻交易而得一卦。乾坤者。諸卦之宗。復之泰。大壯。夬。陽息卦。始遯。否。觀。剝。陰消卦。皆自乾坤來。而諸卦又生於消息。卦臨二之五爲屯。觀上之初亦爲屯。臨初之上爲蒙。觀五之二亦爲蒙。故不從自臨觀來之例。於屯曰坎二之初。於蒙曰艮三之二也。遯二之五爲鼎。大壯之初亦爲鼎。遯初之上爲革。大壯五之二亦爲革。於例不當從遯大壯來。而仲翔於鼎曰。大壯上之初。於革曰遯初之上。失其義矣。愚謂。鼎蓋離二之初。革蓋兌三之二也。又頤大過中孚小過與坎離乾坤皆反覆不衰之卦。故別自爲例。而仲翔於大過仍取大壯五之初。於頤兼取臨二之上。又於坎云觀上之二。於離云遯初之五。皆自紊其例也。論鄭爻辰之例曰。康成初習京氏易。復從馬季長授費氏易。費氏有周易分野一書。其爻辰之法。所從出乎。論孔壁書增多二十四篇。康成既親見之。何以不爲之注曰。漢儒無無師之學。古文尙書初得之屋壁。未有能通之者。孔安國始以今文讀之。而成孔氏之學。若增多之書。既無今文可相攷。雖亦篤定。而不爲訓詁。故馬季長云逸十六篇。絕無師說也。自安國以及衛賈馬諸君。皆未有說此逸篇者。康成又何以無徵不信之說。著於竹帛也。論春秋宗左氏說。謂君誠有道。何至於弑。遇弑者皆無道之君。辨婦人七出。謂去婦之義。非徒以全丈夫。亦所以保匹婦。尤發前人所不敢發。至於正文字之訓詁。通古今之音韻。則有耳舌同音假借說。古今方言說。說文答問諸篇。攷輿地之變遷沿革。則有秦三十六郡攷。漢百三郡國攷。論孟子決汝漢排淮泗諸篇。大昕復以自惠戴之學盛行。學者但治古經。略涉三史。未爲通儒。因著廿二史攷異。又以史之蕪陋。無過於元史。因搜羅元人詩文集小說筆記金石碑版。擬爲重修。恐違功令。攷題曰元詩紀事。成補氏族表。藝文志。其金石跋尾。攷據鑿密。多出翁畢各家之外。著述總哀爲潛研堂全書。凡三史拾遺五卷。諸史拾遺五卷。元史氏族表三卷。補元史

藝文志四卷。通鑑注辨正二卷。洪忠惠。洪文敏。陸放翁。王伯厚。王弼州年譜各一卷。元詩記事二卷。金石文跋尾六卷。續七卷。又續六卷。三續六卷。目錄八卷。十駕齋養新錄二十卷。續錄三卷。三統術衍三卷。鈐一卷。文集五十卷。詩集十卷。續集十卷。別刊者。經典文字攷異三卷。唐石經攷異一卷。聲類四卷。廿二史攷異百卷。唐五代宋中興學士年表各一卷。四史朔閏攷四卷。擬年錄四卷。日記鈔三卷。恆言錄六卷。未刊者。尙若干種。弟大昭。從子塘。弟東垣。繹。侗。子東壁。東塾。一門羣從。皆治古學。能文章。蔚爲東南之望焉。

王引之

王引之。字伯申。江蘇高郵州人。祖安國。官吏部尙書。引之嘉慶四年一甲進士。授翰林院編修。六年充貴州鄉試正考官。八年大考一等。擢侍講。九年二月。駕幸翰林院。與諸臣做柏梁體聯句。引之與焉。又以張說東壁圖書府五律。分字賦之。引之分得竭字。禮成。賜味餘書室全集。暨茶綺箋硯等物。尋充皇朝詞林典故纂修官。三月。京察一等。六月。升右春坊右庶子。充湖北鄉試正考官。九月。丁母憂。十一年。服闋。會皇朝詞林典故成。下部議敘。十二年五月。補原官。八月。提督河南學政。十三年五月。轉左庶子。十二月。升翰林院侍講學士。十四年。轉侍讀學士。十五年。回京。十六年。充日講起居注官。十七年五月。遷通政使司副使。十二月。稽察右翼宗學。十八年八月。升太僕寺卿。十月。升大理寺卿。十九年。提督山東學政。奏申嚴五重互結法。令先期識認。點名時挨次細認。頂冒之劉雲漢等。因是敗露。治如律。殊批以實心整飭士習勸勵之。先是。河南滑縣教匪煽亂山左。多從逆者。上命學臣撰論說以化之。引之著闡訓化愚論。見利思害說。進御。奉命刊布。二十一年十月。還京。十二月。擢都察院左副都御史。二十二年二月。充會試知貢舉。三月。擢禮部左侍郎。會福建龍溪縣知縣朱履中攷教。後因欠鹽課銀二千餘兩。請以吏欠追抵。不允。遂訐藩司李廣芸任道府時。有受陋規事。總督汪志伊等劾廣芸。解其職。會鞠之。知府徐以翰迎合志伊意。倡令誣承。廣芸故廉潔。不能堪。遂自縊。事聞。上命引之偕吏部侍郎熙昌往按。白其誣。乃褫志伊

等職。以勦履中遣戍新疆。引之等復言。閩省士民數百。請爲廣芸建遺愛祠。上以斯民直道之公。聽其捐建。八月遷京。奏江蘇高郵等州縣低地。因洪澤湖水漲淹浸。命驅吏履勘撫卹。二十三年六月。充浙江鄉試正考官。十一月。以禮部覈議。原任侍郎錢樹入祀鄉賢祠。不置可否。率請欽定。下部議處。引之降二級留任。二十四年三月。充會試副考官。閏四月。署兵部左侍郎。九月。教習庶吉士。尋以萬壽節前遇忌辰。不於先期奏請。輒照常素服。降正三品京堂。又以罪應戍邊廢員朱錫爵。呈進萬壽頌冊。禮部一律接收。下部議處。十一月。補通政使司通政使。十二月。授吏部右侍郎。二十五年七月。進爵秩全覽。繕寫譌誤。下部議處。九月。充實錄館副總裁。十月。充武會試知武舉。道光元年六月。畿輔及山左旱蝗。諭疆吏飭屬親勘搜除。引之疏言。捕蝗一事。惟在辦理得法。若專任胥役。則蝗蝻未除。而農民反受騷擾之害。蓋胥役一經奉票捕蝗。則計畝派夫。藉端取費。及率人撲捕。則又故踐禾苗。偏令出錢。無蝗地畝。亦復肆行蹂躪。是爲民除害之事。轉爲貽害於民之事。恭讀欽定康濟錄。捕蝗必覽。所載捕蝗十宜。以設廠收買爲最要之策。其法或錢或米。捕蝗一斗。給以若干。捕蝗一斗。給以若干。使百姓捕蝗而得賞。則趨之如鶩。不假胥吏之催促。非惟受效甚速。且免作踐騷擾之患。請將捕蝗必覽。頒示直隸山東地方大員。令其相度機宜。速行籌辦。上如所請行。六月。充浙江鄉試正考官。八月。充國史館副總裁。十二月。充經筵講官。二年三月。轉左侍郎。閏三月。充殿試讀卷官。八月。署刑部左侍郎。三年三月。充會試副考官。四月。仁宗睿皇帝實錄漢本告竣。上嘉其恪恭將事。辦理妥速。賜紗一端。旋充教習庶吉士。九月。充武會試正考官。四年四月。聖訓實錄告成。上嘉其盡心編輯。在館四年。始終經理其事。予其子候補主事壽昌遇缺卽補。先是。吏部奏請官員遇生祖母之喪。父故在先。本員爲庶長孫者。令承重離任。丁憂三年。是年五月。引之更定前議云。孫之於祖。服止齊衰一年。嫡長孫父故在先。遇祖父母之喪。則持服三年。蓋以承父之重。與祖爲體。宗祧大法。於是乎在。其於祖母從同者。一本相承。敵體之義也。至庶祖母非祖敵體。固不得以承重言矣。卽如次子三子。其受父母之恩與長子同。若其身先死而父母後歿。爲其子者。不能代服三年之喪。且爲人後者。爲本生父母止服降服一年。庶長孫之分。原止

儕於孫生。祖母之恩，不能加於父母。蓋緣情則罔極之恩，即終身不足以言報。制禮則承重之義，斷不能加於支庶。嗣後官員遇生祖母之喪，其父先故，別無與父同母之伯叔，本員於庶祖母爲長孫者，無論嫡祖母是否見在，槩令治喪一年，許其離任。從之。十一月，署戶部左侍郎。五年八月，署戶部右侍郎。十月，充武鄉試正考官。六年，充殿試讀卷官。七年五月，擢工部尚書。七月，充武英殿總裁。八年七月，承修文廟碑亭。引之等勘估草率，下部議處。是月，上面諭康熙字典間有譌字，今重加刊刻，自應詳考更正。引之校正二千五百八十八條，另輯考證十二冊，進呈欽定。八月，署戶部尚書。九年，署吏部尚書。十年，調禮部尚書。十一年七月，署工部尚書。十月，充武鄉試正考官。十二年，丁父憂。十四年服闋，補工部尚書。尋卒。予諡文簡。引之幼承家學，精研古義，嘗曰：吾之學，於百家未暇拾，獨治經。吾治經於大道不敢承，獨好小學。夫三代之語言與今之語言，如燕越之相語也。吾治小學，吾爲之舌人焉。其大歸曰：用小學說經，用小學校經而已矣。又曰：吾用小學校經，有所改，周以降，書體六七變，寫官主之，寫官誤，則爲改。孟蜀以降，槩工主之，槩工誤，則爲改。唐宋明之士，或不知聲音文字而改經，以不誤爲誤，是妄改也，則爲改其所改。若夫周之沒，漢之初，經師無竹帛異字，博矣。吾不能擇一以定，則不改。假借之法，由來舊矣。其本字什八可求，什二不可求，必求本字以改假借字。則考文之聖之任也。則不改。寫官槩工誤矣。吾疑之，且思而得之矣。但羣書無佐證，懼後來之藉口也。則又不改焉。嘗本石臚先生爾雅疏證所詮，及平日趨庭所聞者，成經義述聞三十一卷，皆摘經句而解之。間有摘一字及類摘二句三句數句不等。其前人傳注，不皆合於經。則擇其合經者從之，其皆不合，則以己意逆經意，而參之他經，證以成訓，而別爲之說。非專守一家，無少出入。如何劭公之墨守，故即毛鄭詩禮傳注，且憑文字假借，辨其是非。於近時惠戴諸家，號爲通儒音，亦輒引古義以駁正之。莫不旁徵曲喻，融會貫通，其解及大戴，以宋人曾升之爲十四經國語，則漢律原志有春秋外傳之目也。引之復怪自漢以來，說經者崇尚雅訓，實義所在，既明著之矣，而語詞之例則略而不究，即以實字釋之，遂使其文扞格，而意亦不明。因見石臚論詩終風且暴，禮記此若例也，諸條發揮意情，於是始渙若冰釋，得所遵循，益引而

伸之。以盡其義類。自九經三傳及周秦西漢之書。凡語助之文。莫不徧爲搜討。分字編次。成經傳釋詞十卷。都百六十字。前人所未及者補之。誤解者證之。易曉者則略而不論。與述聞益互爲表裏。

王念孫

王念孫。字懷祖。號石臞。江蘇高郵人。父安國。官吏部尙書。諡文肅。念孫八歲能屬文。十歲讀十三經畢。旁涉史鑑。有神童之目。高廟南巡。以大臣子迎鑾。獻文冊。賜舉人。乾隆四十年進士。改翰林院庶吉士。散館。授工部主事。游陞郎中。擢陝西道御史。轉吏科給事中。嘉慶四年。仁宗親政。時川楚教匪猖獗。念孫陳剿賊六事。首劾大學士和珅。疏語援據經義。大契聖心。是年。命巡淮安及濟寧漕。授直隸永河道。六年。以河隄漫口罷。特旨留督辦河工。工竣。賞主事銜。河南衛家樓河決。命隨尙書費淳查勘。且籌新漕。又命馳赴臺莊。隨同吉綸辦河務。尋授山東運河道。在任六年。調永定河道。會東河總督與山東巡撫。以引黃利運異議。召入都。決其是非。念孫奏引黃入湖。不能不少淤。然暫行無害。詔許之。已而永定河水復異漲。如六年之溢。念孫自引罪。得旨休致。道光五年。重宴鹿鳴。賞給四品銜。十二年卒。年八十有九。念孫故精熟水利。官工部。著導河議上下篇。及奉旨纂河源紀略。識者或誤指河源所出。念孫力辨其譌。議乃定。紀略中辨譌一門。念孫所撰也。任河道十餘載。查工節帑。積弊一清。累得旨獎。所條上河務事。多議行。既罷官。日以著述自娛。著讀書雜誌八十二卷。分逸周書戰國策管子荀子墨子春秋。墨子淮南子史記漢書漢隸拾遺凡十種。於古義之晦誤。寫校之妄改。皆一一正之。一字之證。博及萬卷。其精於校讎如此。初從休寧戴震。受聲音文字訓詁。手編詩三百篇。九經楚詞之韻。分古音爲二十一部。於支脂之三部之分。段玉裁六書音韻表。亦見及此。其分至祭蓋輯爲四部。則段書所未及也。念孫以段書先出。遂輟作。又以邵晉涵先爲爾雅疏。乃綜其經學。撰廣雅疏證。日三字爲程。閱十年而書成。凡三十二卷。其書就古音以求古義。引仲觸類。擴充於爾雅說文。無所不達。然聲音文字部分之嚴。一絲不亂。蓋藉張揖之書以納諸說。而實多揖所未

知。及同時惠棟戴震所未及。嘗語予引之曰。詰訓之旨。存乎聲音。字之聲同聲近者。經傳往往假借。學者以聲求義。破其假借之字而讀本字。則渙然冰釋。如因假借之字。強爲解。則結縉不通矣。毛公詩傳。多易假借之字。而訓以本字。已開改讀之先。至康成箋詩注禮。屢云某讀爲某。假借之例大明。後人或病康成破字者。不知古字之多假借也。又曰。說經者期得經意而已。不必墨守一家。引之因推廣庭訓。成經義。述闡十五卷。經傳釋辭十卷。引之字伯申。能世其學。由編修官至禮部尙書。諡文簡。論者謂清代經述。獨絕千古。高郵王氏一家之學。三世相承。自長洲惠氏父子外。蓋鮮其匹云。

江藩

江藩。字子屏。號鄭堂。江蘇甘泉人。監生。受業吳縣余蕭客及元和江聲。得惠棟之傳。博綜羣經。尤深漢詁。旁及九流二氏之書。無不綜覽。所爲古文詞。豪邁雄俊。作河賦以匹景純。元虛江海二賦。性不喜唐宋文。每被酒。輒自言文無入家氣。人目爲狂。不顧也。爲人權奇倜儻。能走馬奪槊。兼飲。徧遊齊晉燕趙閩粵江浙。韓城王杰極重之。曾撰純廟詩集注。由杰進呈。賞御製詩五集。後諭召對圓明園。值林爽文陷臺灣。報至。遂輟。落泊而終。幼蓄書萬餘卷。以好客貧其家。歲饑。盡以易米。作書窠圖志。感年五十。以易筮之。得坎之節。乃思守所傳之經。終老於家。因自號節甫。初惠棟作周易述。未竟而卒。闕自鼎至未濟十五卦序卦雜卦二傳。藩乃著周易述補五卷。羽翼惠氏。欽峻廷堪謂棟猶不免用王弼之說。藩悉無之。方之惠書。有過之無不及也。又著漢學師承記八卷。於兩漢儒林家法之承授。清朝經學之源流。釐然可考。又取諸家撰述。專精漢學者。做唐陸德明經典釋文傳。姓氏之例。著國朝經師經義目錄一卷。凡言不關乎經義小學。意不純乎漢儒詁訓者。悉不著錄。論者以爲二百年來。談漢學不可少之書。又錄孫奇逢以下諸人。分南學北學附記。著宋學淵源記三卷。少嘗爲爾雅正字。道光元年。年六十一。復重加刪訂。爲爾雅小箋三卷。他著有隸經文四卷。炳燭室雜文一卷。江湖載酒詞二卷。樂懸考二卷。卒窮困以

終。初藩著漢學師承記。仁和翼自珍評之。大旨謂讀書者。實事求是而已。若以漢與宋爲對峙。恐成門戶之見。其後壽陽祁賓藻。曬光澤何秋濤爲續記。秋濤曰。是編當依阮元疇人傳之例。改爲學人傳。若特立一漢學之名。宋學家羣起而攻之矣。方東樹漢學商兌。所由作也。

阮元

阮元。字伯元。號芸台。江蘇儀徵人。乾隆五十四年進士。改翰林院庶吉士。充萬壽盛典纂修。五十五年散館。授編修。五十六年二月。大考一等第一名。超擢詹事府少詹事。入直南書房。充石渠寶笈協修日講起居注官。十月。遷詹事。充文淵閣直閣事。十一月。詔充石經校勘官。五十八年。提督山東學政。六十年八月。調任浙江學政。九月。擢內閣學士。兼禮部侍郎銜。嘉慶三年八月。升兵部右侍郎。旋調禮部右侍郎。仍留學政任。九月。任滿回京。仍入直南書房。四年正月。轉左侍郎。署兵部左侍郎。三月。充經筵講官。尋調戶部左侍郎。充會試副考官。七月。兼署禮部左侍郎。九月。兼管國子監算學。十月。署浙江巡撫。五年正月。實授。先是。浙洋有安南夷艇及鳳尾幫水澳幫。著黃幫盜船數百隻。出沒爲患。元赴溫台督飭定海鎮總兵李長庚率兵攻剿。並捐廉添設大船大礮。以資攻擊。陸路兵按三成挑選。專司訓練。得旨嘉獎。二月。檄黃巖鎮總兵岳璽剿著黃幫。獲船十二。生擒盜匪一百七十餘人。著黃幫由是遂滅。又訪獲南沙海濱疊次窩劫盜犯陳阿三等。上嘉悅。交部議敘。五月。夷艇復竄至浙。元馳赴台州。請以定海鎮總兵李長庚總統溫州黃巖兩鎮。協同策應。並請調粵閩舟師會剿。允之。六月。夷艇私入浙洋之松門山。勾結水澳鳳尾各幫。屯聚伺劫。元駐師台州。先布間諜。令互相猜忌。水澳幫駛退。颶風夜起。賊艇百數十號。爲海濤衝擊覆溺無算。元檄兵乘機奮擊。棄艇登山。元復檄各陸路兵赴山搗捕。先後生擒八百餘賊。得安南僞總兵印。首從以下。治如律。難民及脅從者釋之。黃巖縣知縣孫鳳鳴等。擒獲安南僞總兵倫貴利。磔於市。自是夷艇鳳尾幫皆滅。九月。檄黃巖鎮總兵岳璽溫州鎮總兵胡振聲。會剿水澳幫於東白洋。礮沈船一。奪船二。生擒三

十餘人賊潰。水澳幫亦滅。十一月疏言。清查倉庫彌補情形。大略以本官尙在。即分別咨追。若參革身故。即著見任次第彌補。每年節省浮費。按月解交。以補本缺之虧。次劃補同府州縣。次劃補通省最苦州縣。十年以外。守此不變。始能清楚。得旨所辦甚是。彌補之法宜緩不宜急。於官有益。於民無損。日計不足。月計有餘。六年正月。以兩浙所屬歷代帝王陵寢。及名臣先賢祠墓。舊冊里漏甚多。考訂補闕。咨部註冊。又奏温州披山洋。礮沈侯齋添盜船一。生擒十二人。定海鎮游擊許松年。雪夜入馬磧洋。獲盜船一。生擒十九人。礁潭洋。截獲盜船一。生擒十人。均報聞。五月。土盜張阿愷等九十名。悔罪投誠。奏請分別入伍安插。七月。請以蕭山牧地。每畝減徵錢一二百文不等。其課銀上中兩則者。俱改爲下則。請於牧租錢二萬二千二百五十餘串內。歲減三千三百串有奇。鹽課銀三千六百九十餘兩內。歲減一千九十九兩有奇。別籌生息。以足旗營之用。藉紓民力。如所議行。八月。檄李長庚岳璽會剿盜匪蔡牽於三盤洋。獲船二。生擒十五人。十一月。疏報臨海開墾田六十四畝。有奇。升科。七年八月。請添設乍浦卡房。增兵防守。彩旗門西山。著添設大礮二門。大劈山。添設大礮八門。得旨允行。時有賣油幫土盜楊課等百數十人投誠。繳鐵礮六十二門。槍械百餘器。奏請分別入伍安插。十一月。以南沙私鹽充斥。請發帑官收皆從之。八年正月。偕學政文幹會奏。創修玉環廳學。並添設學額。以温州府學訓導。改爲玉環廳學訓導。閏二月。奏請立杭嘉等八府昭忠祠。以歷年剿捕洋匪。傷溺官兵二百九十餘人。從祀。上聽其奏。嗣洋盜有黃葵者。聚十餘船。創名新興幫。又稱再興幫。在洋面行劫。元檄黃巖鎮總兵張成捕之。獲船三。生擒七十餘人。五月。奏台州颶風。玉環廳屬。擄捕登岸洋匪八十餘人。六月。入覲。賞賚錫宴有加。上詢問海塘。元奏經費不敷。請以嘉慶五年所停西湖歲修銀。及商捐存息銀。統交商領生息。歲撥一萬六千兩。爲兩塘掃工之用。允之。九月。回任。十一月。總兵胡振聲。夜襲蔡牽於南麂洋。未獲。參將李景曾等復襲之。礮沈船三。生擒九十六人。蔡逆遁。元親往寧波。檄提鎮分擊而南北麂洋。礮沈船一。獲船二。生擒八十餘人。先是。給事中蕭芝奏。請探買米石。由海北運。有旨命元議覆。是月。疏陳浙西地狹民稠。蓋藏不足。向皆仰食客商接濟。連年荒歉。買米補倉。若再探買。恐妨民食。況海運經數百

年不行。猝支國帑。輕試風濤。非慎重之道。米多則未能猝辦。米少則於事無濟。未便舉行。報聞。九年正月。奏張成追捕黃葵幫於茶盤洋三蒜洋。獲船六。礮沈船二。生擒百餘人。二月。京察屆期。上以元有守有為。清儉持躬。下部議敘。六月。偕閩浙總督玉德會奏。海盜蔡牽滋擾。請以提督李長庚總統閩浙兩省水師。不分畛域。合力兜拏。是月。總兵胡振聲率兵赴閩。在臺灣陣亡。元以遊擊高麒瑞救護不力。請奪職。八月。奏提督李長庚率將弁攻蔡牽於定海北洋。獲船一。礮沈船一。生擒五十餘人。蔡逆自是遁閩。時杭嘉湖三府水災。元請借支帑項。運川楚米。減價平糶。並倡捐賑恤。分別蠲緩。借給籽種。緩徵漕幫扣項。覈減鹽價。皆如所請行。時江南清口水溢。元請漕船迎兌。並採購運米十二萬五千石。搭解通州。得旨所辦俱妥。十年三月。黃葵幫盜首五百餘人。以十船赴溫州投誠。繳械。元以其人衆分別安頓。黃葵幫自是亦滅。奏入。上嘉其辦理妥協。又疏報定海縣開墾塗田二千二百餘畝。升科。上軫念浙省偏災。恩賞米十五萬石。命元分派被水地方。辦理平糶。閏六月。丁父憂。十一年。上以元將服闋。命署福建巡撫。兩江總督鐵保代元陳奏。因病籲辭。上命鐵保派員診視。十二年十月。服闋。署戶部右侍郎。十一月。補兵部右侍郎。復授浙江巡撫。暫署河南巡撫。十三年三月赴浙。七月。蔡逆與洋盜朱濱合幫。嘯聚百船。擾定海洋面。元馳赴寧波。檄三鎮防剿。令海口大船收入口內。小船不許出洋。以防被掠。且杜接濟。時將屆鄉試。奏以學政劉鳳誥代辦監臨事。八月。以蘇庫平餘銀八千兩。修杭州石塘。尋擊敗蔡逆。遁入閩洋。十一月。蔡逆復由閩竄浙。元赴寧波檄兵會剿。敗賊於落伽洋。礮沈船一。生擒賊匪八人。及之於馬磧山。又乘勝追至黑水洋。蔡逆棄船。乘夜仍遁入閩洋。初。元之在豫也。魏送侍郎廣興銀千兩。廣興因事被許。元以是里吏議。降四級調用。上加恩。改爲降三級留任。十四年正月。奏請以河莊山煎蓬改歸許村場管轄。蕪山煎蓬改歸錢清場管轄。二月。濬西湖。時有土盜亞盧幫爲患海上。元檄温州鎮總兵李景會捕之。四月。臨海縣知縣王維培。率鄉勇追捕。定海鎮總兵朱天奇繼之。先後共獲八船。擊沈船一。擒斬百數十人。餘匪南遁。尋滅。元飭提鎮專注蔡逆。分兵隔其餘船。五月。疏報寧海開墾沙田一千六百二十六頃升科。六月。修錢塘江岸。七月。奏稱建提督王得祿浙江提督邱良功。會

劉蔡逆於寧波。獲船一。俘賊百餘人。時御史陸言奏參浙江學政劉鳳誥。代辦監臨舞弊。上諭元曰。朕聞劉鳳誥沈溺於酒。任性妄爲。罵詈教官生員。以致下人肆行亂法等事。汝係巡撫。又係伊同榜。必應嚴參。以示大公於天下。若意存徇庇。恐汝不能當此重咎。尋奏劉鳳誥實無使酒諸事。惟代辦文闈監臨。場規從嚴。士子懷恨。致滋事端。得旨所奏皆非確事。命侍郎托津周兆基光祿寺少卿盧蔭禔赴浙按問。八月奏覆。劉鳳誥代辦監臨時。印用聯號屬實。附參元查訪不確。含混覆奏。上以元袒庇同年。不顧公議。交部嚴加議處。尋議上。得旨阮元止知友誼。罔顧君恩。輕重倒置。即著革職。九月。上五旬萬壽。單數愷澤。以元官聲尙好。學問素優。賞給編修。在文穎館行走。十五年四月。擢侍講。九月。充日講起居注官。十六年七月。擢詹事府少詹事。十二月。擢內閣學士兼禮部侍郎銜。十七年五月。擢工部右侍郎兼管錢法堂事務。八月。授漕運總督。十八年二月。會同兩江總督百齡奏添海州揚州官兵俸餉。令鹽商捐辦。有旨嚴飭。斷不可行。仍交部議處。旋降二級留任。又奏微山湖水淺。不敷濟運。請加隄閘。從之。五月。全漕渡黃以盤查迅速。下部議敘。又請修邳宿一帶河閘。諭曰。阮元奏請添閘。所論甚爲通暢。邳宿一帶。每年因水淺加築草壩。臨時多購土方。事後又聽墾卸。下年所挑之土。即上年所築之壩。官員利每年開銷。一經建閘。水蓄舟行。無可藉口。遂多阻撓。其實添建一二閘。所費無多。而年年轉可節省此事。不可再有因循。七月。上以江慶各幫趨行較遲。敕元督運事竣。不必陞見。即督飭幫船。迅速南旋。趕兌新運。十九年閏二月。全唐文告成。以元前在文穎閣行走。議敘。加二級。三月。調江西巡撫。九月。奏獲謀逆姦匪。訊出胡秉耀買得殘書。內有陣圖及悖逆俚語。即向逆夥邱添澤楊易盧勝輝誇稱楊易以朱毛匪。可以假託前明後裔。邀赴謀逆。僞封胡秉耀官職。輾轉糾約入夥。見往奉賢縣查辦。上以元到任未久。即將鉅案立時發覺。溫諭嘉獎。賞加太子少保銜。賞戴花翎。十二月。獲傳徒匪犯鍾錦龍等寘之法。二十年正月。奏獲進賢縣結盟擄匪會文彩等擬罪如律。二月。奏停止官辦粵都煎磺。又奏江西倉庫錢糧。皆有虧欠。稽查之法。可一試。不可屢行。州縣處出通關。騰愈大而辦理愈難。國帑反多無著。請立二法。一則以交代爲盤查。一則以比較驗彌補。皆從之。四月。黃溪安仁兩縣首先拾獲逆

詞。鈐用九龍硃印。有在江寧聚會等語。奏入。命交兩江總督百齡查辦。旋獲逆犯方榮陞。伏誅。二十一年正月。奏改南昌府爲衝繁難三字要缺。請旨簡放贛州府爲題缺歸覲。南昌府同知爲衝繁中缺歸選。下部議行。六月。禱兩廬山。請以廬山列入祀典。從之。閏六月。調河南巡撫。十一月。擢湖廣總督。十二月入覲。二十二年二月。奏修省垣江隄。七月。建江陵范家隄。沔陽州龍王廟石閘。請移湖南沅州涼傘通判駐晃州。改爲直隸廳通判。移黔陽訓導一員爲晃州訓導。苗民應考。除去新童字樣。以民籍應試。增定學額。並添設巡檢一員。下部議行。八月。調兩廣總督。十二月。奏建大黃窖大虎山兩礮臺。二十三年正月。請撥通省兵二百名。以百名安置閩西。把總領之。八十名安置大虎山。千總領之。二十名添置焦門礮臺。外委領之。裁水師千總一員。陸路把總外委各一員。下部議行。二月。密陳豫防英人事宜。略言英人恃強桀驁。性復貪利。以目前情形論。似宜多鎮以威。未便全綏以德。否則所求或遂。所望愈奢。貪得之心。曾無厭足。倘敢擅入內洋。卽隨機應變。加之懲創。一則停止貿易。一則斷其食用。買辦。一則開礮火攻。惟當嚴飭各礮臺備弁。督率兵丁。不動聲色。暗加嚴備。彼國伎倆。惟恃船堅礮利。一經上岸。則無拳無勇。與東倭不同。或謂攻擊恐生事端。此似是而非之論也。疏入。奉硃批。總須德威相濟。不可妄動。慎之。五月。兼署廣東巡撫。復密陳英人情形。略言定例夷人貨船不准擅入內洋。天朝界限。極爲嚴肅。向設各處礮臺。正爲豫防偷越之用。查英人懼強欺弱。其伎倆長於水。短於陸。強於外洋。弱於內洋。汪洋巨海之中。橫行無忌。不值與之相角。倘違例禁駛進礮臺地界。則以石臺之礮。攻木板之船。使彼望而生怯。其勢如魚困轍。一人之力。足以制彼數人。蓋勢強則彼不敢輕犯。理足則彼不敢藉口。各國商船。皆知彼犯我禁。非我輕啓彼釁也。得旨國家撫馭外夷。具有一定規制。尺寸不可稍踰。遵守者懷之以德。干犯者示之以威。如該英人不遵定制。妄希進口。亦先當切切曉諭。以杜其覬覦之心。倘竟恃強。不能不使攝我兵威。總之懷柔之道。當先以理勝。使直常在我。則彼無所藉口。斷不可孟浪從事。亦不可過示怯弱也。又奏改廣州佛山同知爲要缺。在外調補。改瓊州同知爲簡缺。仍駐本府。毋庸駐崖州彈壓。從之。三十四年三月。以廣西六塘墟地方盜犯劉老晚連劫翁一怒等六家。元坐失察。

部議降一級調用。上以元駐紮較遠，改爲降一級留任。閏四月，請築桑園圍石隄，以衛民田。添設豐順縣留隍巡檢一員。裁稅課大使一員，移黃岡司巡檢。駐饒平柘林地方。移大埔縣大產司巡檢駐白猴地方。將同仁巖上三甲等處撥歸兼管。六月，請裁各營繪艦艇仔等船。改造大八槳船，爲深洋捕盜之用。八月，奏請疏通潮橋鹽商積引，並展徵課項。均從之。是月，復兼署廣東巡撫。疏報南海嘉應等縣補墾沙田五千三百三十七頃，有奇。升科。請飭學政以雷瓊二府歲科兩試連考，俾士子少涉風濤之險。用示體恤。得旨允行。十月，來京祝嘏。命與正大光明殿筵宴。屢拜玉如意文綺荷囊之賜。二十五年正月，復兼署廣東巡撫。七月，奉命馳赴廣西，查辦藩陽添弟會匪。旋獲唐三莪等，治如律。道光二年五月，奉命查閱兩廣營伍。奏廣東省額設馬步戰守兵六萬二千八百十五名。又添設六千四百九十名。請於馬多營分酌裁馬五百三十五匹，以馬兵作爲守兵。廣西省額設馬步戰守兵二萬一千四百三十名。又添設二千一百五十三名。除地居邊要，額設無多營，分外酌裁兵六百三十名。上允所請。九月，兼署學政。兼署粵海關監督。查禁夷船夾帶鴉片煙，參摘洋商伍敦元頂帶。二年二月，請撥存庫馬甲銀一萬兩生息，爲駐防八旗文武舉人會試之用。得旨著照所請。每名給二十兩外，再加三十兩。其驍騎校領催前鋒及筆帖式進京引見各員，除原賞二十兩外，亦著加恩加賞三十兩。是月，率獲高要會匪陳亞等冥之法。先是，英人護貨兵船泊外洋伶仃山，登山汲水，與內地關毆，互相傷斃。英人延未交出兇手。三月，元飭弁兵封該夷貨船，禁止貿易。尋呈請展限。元諭嗣後護貨船俱有大班管束，定爲例。閏三月入覲。冀文綺三年正月，復兼署廣東巡撫。七月，請建肇慶南門外礮臺。又奏改平樂府通判爲平樂縣縣丞。移駐沙子街地方，以資彈壓。均下部議行。四年正月，請定洋米易貨例。諭曰：粵海關向准洋米進口糴賣，免輸船鈔。糴竣回國，不准裝載貨物。近來該夷因回空無貨壓艙，難禦風濤，且無多利。是以米船來粵者少，自應量爲變通。著照所請，准原船載貨出口，徵收稅課。以示體恤。二月，奏廣東沿海匪徒肆擾民居，勒令給錢，名曰打單辦案。例無明文。請援恐嚇取財例，分別首從，從重治罪。五月，請於番禺縣屬添建倉屋二十四間，並女監提牢等房。凡外解命盜人犯及罪止軍流者，均歸監禁。令

河泊所大使。就近兼管。皆允之。六年。調雲貴總督。七年三月。添設安順府屬郎岱廳學。增定學額。移永寧州訓導爲學正。以滇省產鹽子井。衰旺不齊。雲龍等五井缺額。在石膏等井代徵抵補。又以新開鹽井試辦期內。向以溢課充公。請於奏銷款內。歲撥三千兩爲公費。於奏銷時造冊報部。均如所請。十月。籌邊費一萬兩。招募猓猓三百戶。駐騰越廳屬邊界。給以山地屯種。以防野匪。從之。八年二月。奏滇鹽盜銷。諭曰。阮元奏滇鹽大有起色。上年鹽課奏銷。溢出餘銀一萬五六千兩。覈計本年較上年溢餘數倍之多。請將此項銀兩。酌撥量濟邊費。所辦甚好。嗣後於每年奏銷時。查明以一半報部。一半存庫。以備邊用。三月。奏獲謀刻石篆寫逆詞。匪犯王士林等。冥之法。八月。請於昆明改建新倉。以一米易二穀存倉。又奏運銅官沿途支借水脚。其項每至虛懸。請加給運費。得旨。增給運費。由湖北江寧二省藩庫各半發給。作正開銷。滇省於請撥銅本銀內扣除。免其入冊報銷。十二月入覲。賜紫禁城騎馬。十年三月。龍陵廳芒市土司放承恩所屬夷人波岩蕪滋事。元檄官兵剿捕。餘匪潰散。十一年。奏騰越廳邊界。原駐猓猓夷練三百七十戶。以防野匪。每年公項本數支用。得旨。准於司庫備邊項下。先借二萬兩。飭發該府廳置田招佃。其銀由本省捐廉分補。十二年六月。奏黎平各屬離省較遠。秋審之案。請歸貴東道審勘。核報臬司。以免拖累。九月。奏裁雲南曲靖同知一員。彌沙井大使一員。曲靖大理永昌三府司獄三員。順寧府知事一員。裁貴州盤石司巡檢一員。錦屏縣知縣典史訓導各一員。所管地丁糧米。撥歸開泰縣管理。添設教諭一員。作爲錦屏鄉學。歸開化考試。添設錦屏縣丞一員。悉如所請行。是月。命協辦大學士。仍留雲貴總督任。十三年正月。請於雲貴兩省。才具較優之遊擊。遇有題升參將缺出。兩省互爲升調。下部議行。二月入覲。時元七十生辰。御書堯功賜秬穎。福壽字。及珍玩文綺賜之。三月。充會試副考官。十四年四月。奏普洱府思茅廳所屬車里土司。繩武速逃地方安靖。撤回兵練。另請襲職。如所請行。十五年三月。召來京。擢體仁閣大學士。管理刑部事務。旋管理兵部。時越南保樂土州目農文雲內閣。爲防兵追捕。走死事竣。奏撤兵練。八月來京。上以元老。免帶引見。十二月。兼署都察院左都御史。十六年二月。充經筵講官。四月。充殿試讀卷官。教習庶吉士。十七年三月。上詣。書

山拈香。命留京辦事。十八年三月。上恭謁西陵。復命留京辦事。五月。以老病請致仕。上諭准其開缺。以大學士致仕。加恩賞給半俸。八月。奏回籍日期。諭加恩晉加太子太保銜。二十三年。元八十生辰。御書頤性延齡額。數歷宣勤嘉茂績。優遊養福錫蕃釐。及善佛如意諸珍物頒賜之。二十六年。舉行丙午科鄉試。元以乾隆丙午科舉人。至是重逢鄉榜。上加恩晉賞太傅銜。准其重赴鹿鳴筵宴。並在籍支食全俸。二十九年卒。遺疏入。諭曰。致仕大學士阮元由翰林。俯躋卿職。久任封圻。朕御極以來。優加倚任。特畀綸扉。宣力中外。五十餘年。學裕識優。勤勞懋著。上聞著。加恩照大學士例賜卹。予諡文達。咸豐二年三月。入祀鄉賢祠。九月。入祀浙江名宦祠。元淹貫羣書。長於考證。其論學。在實事求是。自經史小學以及金石詩文。鉅細無所不包。而尤以發明大義爲主。所著性命古訓。論語孟子論仁論。曾子十篇注。推闡古聖賢訓世之意。務在切於日用。使人可身體力行。在史館時。探諸書爲儒林傳。合師儒異派而持其平。不稍存門戶之見。嘉慶十二年。奏進恭注御製味餘書室隨筆二卷。其餘說各經之精義。載於研經室集者。不可枚舉。所編經籍纂詁。十三經校勘記。傳布海內。爲學者所取資。曠人傳。惟海英靈集。鐘鼎款識。山左兩浙金石志。並爲考古者所重。即隨筆記錄如廣陵詩事。小滄浪筆談。定香亭筆談等書。亦皆有關於掌故。所刻之書尤多。最著者爲十三經注疏。皇清經解千四百卷。

李兆洛

李兆洛。字申普。晚號養一老人。江蘇陽湖人。本姓王。其先明中世育於李。遂冒姓李氏。幼聰慧。好讀書。日熟百餘行。廣頤深目。峻聳若不可近。而性甚和易。未嘗有疾言遽色。當乾隆中葉後。海內士大夫爭治訓詁音聲。兆洛獨治通鑑通考之學。疏通知遠。不趨聲氣。不囿小近。年甫三十。而學大成。嘉慶甲子。以第一人舉於鄉。明年。成進士。授庶吉士。散館。遷知縣。分四川。告近。得安徽鳳臺縣。縣治與壽州同城。古爲南北用兵地。風氣犷悍。素號難理。蒞任。知故漢芍陂即邑之焦岡湖。濱淮而環山。易爲旱潦。爲增隄防。設溝閘。督耕耘。民以有歲。邑多豪猾。逮盜歸焉。

常騎引健勇巡閭里。每出不意得其魁。率擇而撫用之。盜以斂戢。兵民爭樵牧地於城西湖下窪。爲白大府平亭其事。數載。縣大治。暇日。詳利弊。稽古蹟。考金石。手纂縣志十卷。先後在縣七年。以父憂去官。起服不赴選。乃恬退無宦情。惟一佐孫讓修懷遠志。未竟。巡撫康紹鏞固聘始往。適康調廣東。偕之行。嗣復隨康處揚州。作四方遊者數歲。節修脯所入。刻鄉先哲遺書十餘種。并纂駢體文鈔三十一卷。皇朝文典七十四卷。所至按其山川道理。士俗利病。既倦遊。主江陰暨陽書院講席。自是遂不復出。所藏書。逾五萬卷。弟子日衆。分治天文輿地二業。康熙乾隆皇輿一統圖藏內府。民間不易得。晚始得董方立撫本。顧分四十一圖。大小不離。不便披覽。且無歷代沿革。乃改爲繡圖每方百里。而以虛線存天度之經緯。先朱印數十部。墨注古地名其上。起三代兩漢魏晉南北朝唐宋元明。檢各史地志。以沿革表及一統志覈其沿革。並得其實地而著之。爲歷代輿地沿革圖若干幅。別鈔各史地志。編以歸韻。既得實地。乃會前代郡縣注之韻下。爲歷代地理韻編二十卷。弟子徐思鏞宋景昌實襄其成。後又撰皇朝輿地韻編二卷。歷代紀元編一卷。同治中。合肥李氏與一統圖刻於江寧。總顏曰。李氏五種。李銳有三統四分乾象三術注。兆洛欲推廣之。取歷代史中律厓志盡通其法。未能竟業。乃先成地球及天文圖。地球以銅與木爲之。各一。懼學者不能明。爲文以釋之。星圖則依會典天文圖以視法變赤道爲直線。分十二宮爲十二圖。而別繪近南北極星爲圓圖列於前後。較之赤道南北分圖尤便稽覽。且較原圖補入增星推準度分。以便占天者之考察焉。主暨陽者二十年。年七十三卒。所自撰書多未就。而勇於刊布前人遺著。弟子蔣彤爲年譜一卷。復述平日所聞。仿宋語錄。爲暨陽答問二卷。其養一齋文集二十六卷。則弟子高承鈺所輯也。

俞樾

俞樾。字蔭甫。號曲園。浙江德清人。幼具慧根。九歲戲爲書。卽自注其下。道光庚戌進士。改庶吉士。以覆試詩有落花春仍在之句。爲會文正公所賞。散館。授編修。咸豐乙卯。放河南學政。因人言罷歸。時年甫三十八。乃暨意始經。

讀高郵王氏書，善之。其羣經平議，則繼經義述聞而作。諸子平議，幾與讀書雜誌抗衡。古書疑義舉例，條理畢貫。視經傳釋詞變而愈上，且益恢廓矣。逮後俞樾雜志、曲園雜纂諸書出，析疑振滯，更能學隨年進，嘗受學長洲陳奐。罷官僑吳，猶及見宋翔鳳，得聞武進莊氏之說。故治經頗右公羊。然爲學無常師，好改經字。末年稍自勦，成經說十六卷。比前異矣。治小學，不擁商周彝器，謂多後世所僞託，辨形體，識通假，嘗止於秦漢碑銘。曾文正督兩江，李文忠撫吳下，咸禮重之。時以巾服從遊，往來如處士。主講蘇州紫陽。上海求志、德清清溪、歸安龍湖等書院。主杭州詒經精舍，至三十一年。先是，浙江治樸學者，本之金鶚沈濤。其他率屬雜漢宋，及越施教、學者，鄉方始屯固不隳節。凡所造就，蔚爲通材。性不好聲色，既喪母妻，終身不肴食，衣不過大布。遇人豈弟，臥起有節，保真持滿，故老而神志弗衰。讀書著作，守常程，每竟一歲，輒以寫定之書刊布於世。晚年聲名揚溢海內外，居林下，閱四十餘載。光緒癸卯，大吏以重寔鹿鳴請，得旨復編修原官，授孫陞雲讀，親見其以第三人及第。典試蜀中，舉特科，乞假侍左右。亦幾若高郵王氏文肅之於文簡。雖得年略遜懷祖，名山之業固足紹述。惟既博通典籍，旁涉稗官雜流，復以筆札汎愛人，論者遂以比之隨園。卒年八十有六。所著凡五百餘卷，名曰春在堂全書。除羣經平議五十卷，諸子平議五十卷，茶香室經說十六卷，古書疑義舉例七卷外，其第一樓叢書三十卷，曲園俞樓雜纂共百卷，並足資攷證。餘見自著全書錄要中。

孫詒讓

孫詒讓，字仲容，浙江瑞安人。太僕依言子。少好六藝古文。太僕諷之使爲經世致遠之學。詒讓謂先漢諸黎獻，風義矚然，經訓固未嘗不可通於治也。太僕乃授以周官經。同治丁卯科鄉試中式，援例得主事。從父官江甯，與德清戴望、海甯唐仁義、儀徵劉壽曾等游。學益進。詒讓以爲典莫備於周官，故疏周禮，取爾雅說文，正其詁訓。禮經大小戴記，證其制度。復博采漢唐宋以來，迄於乾嘉諸儒舊說，參互稽繹，藉發鄭注之淵奧，裨賅疏之遺闕。始爲

長編數十巨冊。顧最錄多則異義。滋抵牾。不免雜出。嗣更改定韻例。一切依古文。彈正。刪繁補失。凡屢易稿。成書八十六卷。並輯三家佚注一卷附焉。甲戌間。鑒於國勢浸弱。謀所以致富強者。作政要二卷。都四十篇。又以行莫賢於墨翟。故釋墨子。因墨學既不合於儒術。其傳中絕書。雖僅存。脫誤幾不可讀。而古字古言。轉多沿襲未改。非精究形聲通假之原。無由貫晰。畢氏校注。初啓途徑。尙待補苴。乃集合諸本。爲依經韻字例。逐加詮釋。其訂補經說上下篇旁行句讀。正兵法各篇之訛文錯簡。致力獨深。成間詰十五卷。目錄一卷。附錄一卷。後語二卷。又以文莫正於宗彝。故攷金文。蓋自經典相承。諸文字少半缺略。後世遂欲以金石款識。彌其缺乏。薛書固不足道。卽清阮鏡諸家。亦不審形聲。無以下筆。仁和龔氏。廖辰尤衆。特詳審彝器情僞。擴宋人所假名。置其不可知。取可知者。辨其刻畫。不爽毫髮。然後傳之六書。使所定文字。皆隱括就繩墨。成古籀拾遺三卷。餘論一卷。仍推闡古人造字之精微。成名原二卷。辨析龜甲文。成契文舉例二卷。他著有札遼十二卷。書少於王氏雜志。俞氏平議。而讎校之勤倍之。周書斟補四卷。九旗古義述一卷。復哀其考辨雜文。爲籀書述林十四卷。輯永嘉郡記一卷。至於經遠。尙書駢枝。大戴禮記斟補。六曆甄微。廣韻姓氏刊誤。凡若干卷。均未刊。其學術。兼包金榜錢大昕段玉裁王念孫四家。其明大義。鉤深窮高。幾駕四家上。巋然爲清三百年樸學之殿焉。晚歲。嘗主温州師範學校。充浙江教育會會長。朝議徵主禮學館。不起。卒年六十一。

劉師培

劉師培。字申叔。江蘇儀徵人。曾祖文淇。祖毓。伯父壽會。均以治左傳春秋名於道咸同光間。父貴會。亦以經術發名東南。師培少承先業。服膺漢學。以春秋三傳同主。經。左傳爲書。說尤賅備。審其義例。或經無傳者。或經略傳詳。以傳勘經。知筆削所昭。類存微情。漢儒說左氏。據本傳以明經義。凡經字相同。卽爲同情。又引月冠事明經。有繫月不繫月之分。創獲實多。亦較二傳爲密。爰闡厥科條。著之凡例。成春秋左氏傳例略一卷。又據漢志禮古

經五十六卷。卷與篇同。謂於今文十七篇外。增多三十九篇。故合五十六篇言。則曰古經。亦曰古文禮。即三十九篇言。則曰逸禮。至五十六篇所自出。劉歆發書太常博士云。魯恭王得古文於壞壁之中。逸禮有三十九篇。書十六篇。天漢之後。孔安國獻之。藏於祕府。伏而未發。據是。則祕府所藏。即係孔壁所得。志云出於魯淹中及孔氏。孔氏即安國也。是則古經篇目。當據班書逸禮。源流當宗歆說。西漢之時。其古文舊簡。蓋惟藏於祕府。民間亦私有傳授。然其說不昌。是以絕無師說。東漢古經之行於民間者。別本滋多。然逸禮三十九篇。當世經師。均不作注。計其散亡。蓋在東晉以前。而遺文佚句。時見鄭氏及諸家稱引。宋王應麟元吳澄並事考輯。所采未備。爰舉佚禮篇名之確可徵信者。成佚禮考一卷。又以禮經十九篇目次。大小戴及劉向別錄所次不同。鄭註據小戴本。其篇次則從別錄。既夕有司徹二篇。篇名仍從小戴。魏晉以下。推崇鄭本。三家舊說。遂以湮沒。考鄭氏目錄於經文十七篇分屬吉凶嘉賓四禮。前此禮家並無此說。鄭義雖合古文。然不得目爲此經舊說。爰廣徵兩漢經師之說。爲禮經舊說考略若干卷。又以周禮先師說六卿之吏。即冢宰六官。亦即六軍之將知者。賈公彥引賈逵說。以爲六卿之吏。則冢宰以下。是說文鄉字注云。封圻之內。六卿六卿治之。勘以五經異義。所引古周禮之說。符契適合。自馬鄭始以鄉吏別六官。則王國之卿。十有二人。併數三孤則爲十五。迥異古說。近孫詒讓爲正義。一是折衷馬鄭。發實鮮。師培爰申古說。正其遺失。著周禮古注集疏二十卷。又以古文尙書安國所得。既獻漢廷。因藏祕府。仁和翼自珍願云。秦燒天下圖書。漢因秦官室。不應獨藏尙書。假使官中有尙書。不應安國獻孔壁書。始知曾多十六篇。不知漢收圖籍。非謂詩書。若實有書。安國無緣再獻。史公云獻。則是未有其書。是知中祕古文。藏自武帝。既爲孔壁之書。即匪嬴秦之籍。觀劉歆言。安國獻古文。又言藏於祕府。伏而未發。成帝乃陳發祕籍。校理祕文。所云祕藏。即謂中文之屬。所云校理。蓋即劉向所司。是則劉向所觀。安國所獻。既無殊本。應即一書。翼氏所疑。不析自解。著駁太誓答問一卷。又以漢志書類。著錄周書七十一篇。自注云。孔子所刪百篇之餘。近儒每援之以說羣經。爰參校異同。詳加編次。成周書補正六卷。若五官三監五服濮路月令明堂諸考。則別著爲篇。成周書略說一卷。師

培說經之書。略具於此。其他間有撰述。未遑寫定。或孤文隻義。靡得而詳焉。清代經師治古文者。自高郵王氏父子以降。迄於定海黃氏。德清俞氏。瑞安孫氏。各揭厥議。匡微補缺。闡發宏多。若夫廣徵古說。足辨馬鄭之違。且鉗令師之口。則諸家未之或逮。故述造視前師爲楷。而精當優渥過之。信乎研精覃思。持之有故者矣。又歷檢羣籍。至於內典道藏。無不究宣。嘗取老莊荀董之書。警正譌脫。獨創新解。按文次列。成老子勣補二卷。莊子校義一卷。荀子勣補若干卷。呂氏春秋勣補一卷。楚辭考異八卷。賈子新書勣補一卷。春秋繁露勣補三卷。計所發正凡數百事。均王黃俞孫之所未詮。每論定一說。必旁推交通。百思莫能或易。乃著簡畢。其精審有如此。民國八年十一月二十日。卒於北京。距生於清光緒甲申年五月二日。享年三十有六。生平精力奮於著述。世變紛綸。匪所能悉。昔曾用文學鼓吹革命。後以貧病故。爲僉王牽引。入於坎陷。論者惜之。師培于學無所不窺。而論文則考型六代。揮源兩京。嘗謂漢魏之際。文學未嘗別自成科。宋立四學。文學乃與儒玄分館。故南史恆以文史文義並詞。而文章志諸書。亦以當時稱盛。凡所持論。見文說廣文言說文筆詩筆詞筆考。又哀次所爲辭賦詩文若干首。成左庵文集五卷。末季主講安徽公學。兩江優級師範。四川國學院。執經問業者幾千人。民國以來。主講北京大學。女子高等師範。弟子從游者益進。聞其喪。莫不爲之哀慟流涕云。

繆荃孫

繆荃孫。字炎之。一字筱珊。晚號藝風。江陰人。生而穎異。十一歲畢五經。十二歲遭母喪。哀毀如成人。事繼母能盡孝。父煥章。連試禮闈不得志。從張忠武軍。旣而入蜀。省兄酉陽州任所。兵亂阻隔。久不相聞。咸豐庚申。太平軍陷江陰。荃孫奉母渡江避亂。居淮安。肄業麗正書院。爲漕帥吳勤惠所識拔。從院長丁儉卿受經學小學。久之。父得官。佐黔撫田興恕幕。遣人迎眷。中途聞田去黔。父亦牽罷罷官。復游蜀。遂至成都。時年二十有一。從陽湖湯秋史。翠坑文史。始爲改訂之學。會四川舉行了卯正科。並補壬戌恩科。寄籍華陽。應試獲舉。政歸原籍。先後入將軍崇

文勤總督吳勤惠川東道姚彥士幕。徧歷川東北諸郡。搜搨石刻。始爲金石之學。張文襄視蜀學。執贊門下。爲撰書目答問。始爲目錄之學。光緒丙子。恩科成進士。改庶吉士。開館大課。以重修庶常館賦命題。擢第一。次年散館。授職編修。在館殫心著述。暇卽日涉海王村書肆。搜訪異本。典衣購取。知交通假鈔校攷訂。日益博通。張文襄總纂順天府志。招之相助。明志簡略。二百餘年未有續修。乃與文襄發凡起例。以宋臨安兩志爲法。加恢擴焉。旣而文襄出任晉撫。遂繼爲總纂。歷七年而告成。時推鉅製。己卯。分校順天鄉試。得士最盛。福山王文敏以經策補薦。獲售。衆尤稱之。歷充本衙門撰文教習庶吉士。國史館纂修總纂。京察一等。吳縣潘文勤爲國史總裁。疏請編輯儒林文苑循吏孝友隱逸五傳。資續阮文達所未竟。先奏派爲分纂。尋偕南海譚叔裕同爲總纂。後譚外任。遂獨任其事。文勤以憂去。掌院徐蔭軒繼爲總裁。初亦甚相推挹。旣而示以紀大奎易說。命編入儒林傳。荃孫謂易有經學之易。有術數之易。朱子注參同契。四庫列之道家。而不入經部。大奎未可補入儒林也。後有相忌者。譖言荃孫恃才獨斷。遂相齟齬。戊子。丁繼母憂。居廬數月。整理五傳告成。繕稿呈館。始奉圍歸里。主講南菁書院。分經學詞章。與定海黃元同分任之。服闋。起復。京察覆帶引見。記名以道府用。未幾。復奉父諱。主講山東濼源書院。張文襄招主湖北經心書院。未赴。歸里營葬。服闋。充國史館提調。甲午大考翰詹。原列三等一名。已拆卷露名。徐張兩相國翁協揆奉命覆閱。以題字筆誤。改置三等一百二十四名。荃孫以徐蔭軒史館宿嫌。有意來疵。遂浩然有歸志矣。張文襄聞而招之。重修湖北通志。逾年。文襄移督兩江。聘主江寧鍾山書院。自丙申至辛丑。主講凡六年。復遙領常州龍城書院。課士之暇。一意刻畫。日事校勘。叢書數集。陸續告成。金陵爲東南都會。故家藏庋。時時散出。蘇滬密邇。估客奔轅。所收舊籍金石書畫乃益富。庚子之變。海內震擾。江南幸稍安。及和議成。朝廷銳意變法。張文襄集東南名流於武昌。討論時局。荃孫應招往。遂領江楚編譯書局。在江寧舉其事。改鍾山書院爲高等學堂。充監督。兼領中小學堂。親赴日本考察學務。歸乃酌定課程。編輯課本。一切草創。中西之學兼重。訪聘教員。皆取淹通篤實之士。講求教授管理之法。實事求是。力戒襲取皮毛陋習。第一屆畢業諸生。頗有明達通才。後膺政治

教育之選者。置吏援故事疏陳績學碩儒。士林矜式。詔加四品卿銜。尋辭學堂監督。專辦江南圖書館事。時江浙藏書家。常熟瞿氏。歸安陸氏。錢塘丁氏。號為鼎足。陸氏書為日本購去。而丁氏亦中落。時論頗懼蹈陸氏覆轍。流落外邦。急赴浙與議。以七萬金全購善本書室所藏。益之捐贈之本。至今海內各省圖書館。美富以江南為冠。戊申。張文襄管學部。疏薦。特旨徵召。以圖書館事未竟。請緩行。宣統紀元。學部奏充京師圖書館正監督。次年至京。召對養心殿。詔以學部參議候補。時圖書館猶未建。暫借城北積水潭廣化寺為儲書之所。既任事。先分類清理書籍。內閣大庫檢出元明舊帙。其中宋本猶為元師平宋時。由臨安秘閣所收一鱗片甲。有自來藏書家所未覩者。集刻為宋元本留真譜。牒文牌子序跋述源流者均著之。加考一篇。又編本館善本書目八卷。各省志書目四卷。初江蘇續修通志。延為總纂。當事屢更。迄無端緒。至是始重定條例。分授協纂諸人。尅期編輯。意俟京師圖書館規模略具。書目編成。即乞長假。專辦志事。無何。湖北兵起。東南諸省應之。詔下遜位。海內雲擾。荃孫亦辭歸矣。自是卜居滬上。慨歎滄桑。杜門不出。惟以書籍遺日。整理舊著。四方知舊。大都避亂來滬。訪書問字。踵接於門。國變後。文獻凋零。咸懼國粹湮沒。購書刻書之風轉盛。吳興劉翰怡張石銘並哀集叢書。咸向就正。武進盛氏。自建圖書館。雖無秘冊。通行精本甚備。亦請編書目。寓滬遺老結詩社。荃孫年最高。稱祭酒焉。甲寅。清史開館。趙次珊尙書聘為總纂。荃孫身為舊史。生平網羅文獻。有遺山石園之志。欣然應招。先為條舉大綱。貽書商榷。及至館。與同人集議。開館之始。多所贊畫。因不能久居京師。趙尙書許攜書自隨。以國史儒林文苑循吏孝友隱逸五傳初稿。原出手纂。後經他人增改。仍願引為己任。閱兩年。除循吏一傳。讓歸他手。餘四傳皆脫稿。又成土司傳明遺臣傳。則國史所未具。而創輯者也。又擬全書凡例一卷。又徧閱明史列傳。一過發明其每卷編次義法筆錄寄館。以備印證。甲辰戊午。兩次至京。商辦史事。力主先擬定傳目。以時代為段落。擇人分任。久之乃定議。自任康熙一朝。而時局日紛。牽於生計。遂分日力。於所任史傳。僅脫稿十之六七。每自引以為憾。江蘇通志重議開局。馮夢華主之。以金石一門。非專家莫辦。荃孫命子僧保預其事。自發家藏搨本。編錄考訂。一手成之。江陰續修縣志。為定大

網。延里中著舊通才任分纂。而自總其成焉。荃孫三十通籍。早負時望。以性剛不能諧俗。棄官時。甫逾五十。取竹垞語以七品官歸田。刻小印用識微尚。後勉應召一出。本擬即賦遂初。尋遭世變。終隱海濱。溯二十年來。各山壇坫。著述自娛。自謂不以富貴易其樂也。己未春。感疾。尋愈。猶鉛槧不輟。江陰志及通志金石。皆於是秋告成。十一月初一日卒於上海寄廬。年七十有六。荃孫恪守。乾嘉諸老學派。治經以漢學爲歸。有清一代經學。搜羅甚勤。王夔園續刻經解。多所取資。早膺史職。於乙部致力最深。拾遺訂誤。悉本錢氏考異。王氏商榷家法。於當代掌故。徵求討論。心得甚多。爲文私淑全氏。結埼亭內外編。以翔實爲主。不尙空言。凡考古述今。論治論學。生平蘊蓄。皆於文集。中見焉。駢體少喜小倉山房。後乃取法北江。出入鄧軒。亦歸紀實。而戒浮靡。詩多指事類情。主雅澹。不矜格調。晚好輯詞。而不多作。酷嗜金石。先後得劉燕庭韓小亭馬硯孫英蘭坡崇兩翰樊文卿沈訥初諸家所藏搨本。宦游所至。又得打碑人李雲從聶明光等。並善搜訪。於戲輔山右山左。大江南北。及皖中石刻。椎搨幾徧。所編收藏目錄。共得一萬有八百餘種。凡僞造摹刻無時地可考者。皆不錄。甄與瓦亦不預。後續得復千餘種。藏本之富。爲前此金石家所未有。又補正孫趙兩家訪碑錄。爲金石分地錄。初擬補續金石萃編。先就遠金元輯錄。以非獨力能成。輟而未作。考證未有專書。散見文集筆記。及順天湖北江蘇金石志中。目錄之學。實串古今。尤慕士禮居黃氏。早年助潘文勤搜輯黃氏題跋。編刻行世。續得者江建霞及鄧秋湄。分爲刻印。後復有得。經章式之吳印丞蒼萃諸本。各將所得增入。合爲一編。晚乃索稿刊成。海內藏書。瞿楊丁陸諸家皆至契。互通借閱。資以鈔校。自編藏書記。欲然謂限於力。僅可與陽湖孫氏五松園相頡頏。續記。及再續記。較初編數且過之。所校刻古書。詳溯源委。剖析異同。具載於序跋論者。謂與藝圃書跋。尤稱同調。祕籍孤稿。以力薄不能多刊。每貽同志好事者。如張文襄王夔園劉聚卿劉翰怡張石銘諸人。所刻叢編。每有贊助。盛愚齋刻常州先哲遺書。則全出荃孫藏本。編校亦一手所成。原擬分爲三集。寫定目錄。因辛亥之變。就已刻者結束。尙餘二十種。存俟同郡後來者廣續之。筆記續數十冊。皆關掌故。晚年志在理董。略創類例。擬刪去重複瑣屑。及習見者。未及編成。藏待來者。其著述已刻者。蘇

風堂文集八卷。續集八卷。辛壬稿三卷。乙丁稿五卷。金石目十八卷。讀書記四卷。藏書記八卷。續藏書記八卷。遼文存六卷。續國朝碑傳集八十六卷。常州詞錄三十一卷。孔北海魏文靖韓致堯李忠毅年譜各一卷。未刻者詩存四卷。詞一卷。尺牘二卷。金石分地錄二十四卷。再續藏書記不分卷。碑傳集補遺十四卷。秦淮廣紀十二卷。代端陶齋撰王寅消夏錄若干卷。所編刻叢書。鑒自在龕叢書五集共十九種。對兩樓叢書五卷。藕香零拾三十八種。煙畫東堂小品十二種。自輯古書及國朝人小集家集。皆在其中。對兩樓刻成贈友餘版並藏於家。

胡承珙

胡承珙。字景孟。號墨莊。安徽涇縣人。嘉慶十年進士。改翰林院庶吉士。散館。授編修。十五年。充廣東鄉試副考官。尋遷御史。轉給事中。自以身居言路。當周知天下利弊。陳之於上。方不負職。故其數年中陳奏。多見施行。而其條陳虧空弊端一疏。尤爲深切著明。二十四年。授福建延建邵道。尋調補臺灣道。臺灣素稱難治。承珙力行清莊。弭盜之法。在臺三年。民番安肅。旋乞假歸里。道光十二年卒。年五十七。承珙究心經學。尤專意於毛氏詩傳。歸里後。鍵戶著書。與長洲陳奂往復討論。不絕於月。著毛詩後箋三十卷。其書主於申述毛義。自注疏而外。於唐宋元明諸儒之說。及近人爲詩學者。無不廣徵博引。而於名物訓詁及三家詩異同。類皆剖析精微。折衷至當。其最精者。能於毛傳本文前後。會出指歸。又能於西漢以前古書中。反復尋考。貫通詩義。證明毛旨。凡四易稿。手自寫定。至魯頌泮水章而疾作。遺言屬奂校補。奂乃爲續成之。又以鄭君注儀禮參用古今文二本。撮其大例。有必用其正字者。有卽用其借字者。有務以存古者。有兼以通今者。有因彼以決此者。有互見而並存者。閱意妙旨。有關於經實數。遂取注中疊出之字。並讀如讀爲當爲各條。排比梳櫛。考其訓詁。明其假借。參稽旁采。疏通而證明之。作儀禮古今文疏義十七卷。又謂惠氏棟九經古義。未及爾雅。遂補撰數十條。成二卷。小爾雅原本不傳。今存孔叢子中。世多謂爲僞書。作小爾雅義證十三卷。斷以爲真。復著有求是堂詩文集三十卷。奏摺一卷。文集六卷。駢體文

胡培翬

胡培翬字載平一字竹村安徽績溪人嘉慶二十四年進士官內閣中書戶部廣東司主事居官勤而處事密時人稱其治官如治經一字不肯放過絕不受胥吏賄賂而挾隱指弊胥吏咸憚之假照案發司員失察者數十人惟培翬及蔡紹江無所污然猶以隨同鹽諾鑄級歸里後立東山書院又主講鍾山雲間於涇川一再至並引翼後進爲己任去涇川日門人設飲餞者相望於道篤友誼郝懿行胡承珙遺書皆賴培翬次第付梓道光二十九年卒年六十八門人祀之鍾山書院績溪胡氏自明諸生東峯以來世傳經學培翬涵濡先澤又學於歛淩廷堪尤邃精三禮官京師時嘗與新城陳用光涇朱瑋胡承珙桐城徐璈光聰韜武進張成孫元和蔣廷恩太倉陳奐陳兆熊鶴山馮啓泰邵陽魏源考定鄭康成之生爲永建二年七月五日公祀之萬柳堂初著燕寢考三卷王引之見而善之既爲儀禮正義上推周公孔子子夏垂教之情發明鄭賈得失旁逮鴻儒經生之所議張皇幽渺闡揚聖緒二千餘歲絕學也其旨見與順德羅惇衍書曰培翬撰正義約有四例一曰疏經以補注二曰通疏以申注三曰彙各家之說以附注四曰采他說以訂注書凡四十卷至賈氏公彥之疏或解經而違經旨或申注而失注意不可不辨別爲儀禮賈疏訂疑一書宮室制度以朝制廟制禮制爲綱以天子諸侯大夫士爲目學制則分別庠序館制則分別公私皆先將宮室考定而以十七篇所行之禮條系於後名曰宮室提綱陸氏經典釋文於儀禮頗略擬取各經音義及集釋文以後各家音切按次補錄名曰儀禮釋文校補培翬單精是書凡四十餘年晚歲患風痺猶力疾從事尙有土昏禮鄉飲酒禮鄉射禮燕禮大射儀五篇未卒業而歿門人江寧楊大培從學禮爲補成之他著有稀珍答研六室文鈔

俞正燮

俞正燮，字理初，安徽黟縣人。讀書過目不忘。年二十餘，負其所業，北謁孫星衍於兗州。時星衍既爲伏生建立博士，復求左氏後裔，正燮因作左邱明子孫姓氏論。左山攷左墓考，申雜難篇，星衍多采其文，以折衆論。故其議論學術，與星衍恆相出入。道光元年舉人。十二年，館新城陳用光所，爲校顧氏方輿紀要。明年，儀徵阮元主會試，闈中經義策問，皆折衷羣言。如讀唐人正義馬氏通考，而汰其繁縟，會有驚其迂誕者。東之高閣，元後知之，嘗語人，引以爲恨。正燮足跡半天下，得書卽讀，讀卽有所疏記。每一事爲一題，巨冊數十，鱗比行篋中。積歲月，證據周備，斷以己意，一文遂立。其始經以漢儒爲宗，不纏牽於注疏。偶有所作，薈萃羣書，走筆立就。尤善言天象，暨日官法，以爲泰西法極精，然豈三代秦漢人所豫解。以某時法衡某時象，是非犁然，則三代秦漢人不能委其過。又善言地輿，說方域，以爲中外同軌，不道險。今昔異履，不詳憲，惟殊方遐國，人所忽，必當察。乃至掌故之巨，名物之細，聲詁之雅，七緯三式，釋典道藏，素靈之冊，景教之碑，諸儒播舌方皇者，引稱首肯。如肉黃串，皆非恆量所測識。手成官私鉅書。如欽定左傳讀本，續行水金鑑之類，不自名者甚多。自名者有癸巳類稿，癸巳存稿，而類稿爲最著。十九年，爲江蘇學政，壽陽祁雋藻校寫三古六朝文目，因聘學教惜陰書舍。未逾年卒。年六十六。性孝友，少時侍父，獻句容縣訓導署中，飲食必先嘗味，不正者不敢進。居鄉邑，言動不苟，誘掖後進，塵塵忘倦。所得修脯，盡濟親友之急。補藻嘗以經師人表稱之。所著尙有說文經緯各一卷，校補海國紀聞二卷。咸豐間燬於兵火。四養齋詩三卷，另梓行。

郝懿行

郝懿行，字恂九，號蘭皋，山東棲霞人。嘉慶四年進士，授戶部主事。二十五年，補江南司主事。道光三年卒。年六十。

九。懿行謙退。峭若不出口。然自守廉介。不輕與人晉接。遇非素知者。相對竟日無一語。迨談論經義。則喋喋忘倦。所居四壁蕭然。庭院蓬蒿常滿。僮僕不備。懿行處之晏如。毋沈郎疑。視官之榮悴。若無與於己者。而一肆力於著述。漏下四鼓者四十年。所著有爾雅義疏十九卷。春秋說略十二卷。春秋比一卷。山海經箋疏十八卷。易說十二卷。書說二卷。鄭氏禮記箋四十九卷。懿行嘗曰。邵晉爾雅正義。蒐輯較廣。然聲音訓詁之原。尙多墜闕。故鮮發明。今余作義疏。於字借聲轉處。詞繁不殺。殆欲明其所以然。又曰。余田居多。載遇草木蟲魚。有弗知者。必詢其名。詳察其形。考之古書。以徵其然否。今茲疏中。其異於舊說者。皆經目驗。非憑胸臆。此余書所以別乎邵氏也。懿行之於爾雅。用力最久。孺凡數身。垂歿而後成。訓故同異。名物疑似。必詳加辨論。疏通證明。故所造較晉涵爲深。高郵王念孫爲之點閱。寄儀徵阮元刊行。元總裁會試時。從經義中識拔懿行者也。其著春秋說略有十例。一曰。說春秋不得喪貶天王。以明臣子之義。二曰。說春秋不得妄生喪貶。春秋直書其事。喪貶自見。三曰。說春秋者。好於經所無處尋喪貶。春秋皆實錄。其多一字。少一字。皆事實如此。非聖人意爲增減。四曰。春秋多闕文。然以義推之。皆大略可見。五曰。春秋經文當從左氏。左氏闕誤。乃從公穀。六曰。左氏深於經。公穀說經字字求喪貶。左氏但敘本事。喪貶自見。得聖人渾厚之旨。七曰。說春秋者。好緣傳生義。不顧經文。說經當一以經爲主。范武子曰。三傳殊說。擇善而從。此言可爲治經者法。八曰。春秋刑書也。刑書之例。一成不移。故法必行。而人和畏。九曰。春秋聖人義理之書。本不待傳而明。十曰。比事屬辭。春秋教也。事同相比。事異相比。辭同相屬。辭異相屬。其義自見。河間紀昀觀其書。以爲能剴盡千秋藤葛。其箋疏山海經。援引各籍。正名辨物。事刊疏謬。辭取雅馴。阮元謂吳氏廣注徵引雖博。失之蕪雜。畢沅校本。訂正文字。尙多疏略。惟懿行精而不鑿。博而不濫。懿行妻王照圓。字瑞玉。博涉經史。當時著書家。有高郵王父子。樓霞郝夫婦之目。照圓聰慧過人。每與懿行持論不合。諍辨竟日。著有詩說一卷。烈女傳補注八卷。附女錄一卷。女校一卷。又與懿行以詩答問。懿行錄之。爲詩問七卷。其爾雅義疏。亦間取照圓說。光緒七年。倉場侍郎游百川。進呈懿行所著春秋爾雅山海經四種。奉旨郝懿行所著書。當交南書房翰林閣看。據

稱郝懿行學問淵博。經術湛深。嘉慶年間。海內推重。所著各書。精博邃密。足資考證。即著留覽。八年。府尹畢道遠等。續進懿行及照園所著書六種。奉旨著留覽。懿行所著未經進者。有詩經拾遺一卷。汲冢周書輯要一卷。竹書紀年校正十四卷。荀子補注一卷。晉宋書故一卷。補晉書刑法志一卷。食貨志一卷。宋瑣語一卷。寶訓八卷。蜂衙小紀。燕子春秋。海錯各一卷。證俗文十八卷。筆錄六卷。文集十二卷。懿行以養疴輟爾雅業。時瀏覽晉宋史鈔。晉文百數十首。謂王右軍虛談廢務。浮文妨要二語。切中當時之弊。所鈔屏黜虛浮。一以切實為主。其自作雜文。亦出入漢魏晉宋之間。雜記數帙。旁徵稗說。聞采時事。皆意主勸戒。照園所著未經進者。又有列仙傳校正二卷。夢書一卷。

陳壽祺

陳壽祺。字恭甫。號左海。福建閩縣人。父鶴書。歲貢生。以質行稱。壽祺少能文。年十八。臺灣平。撰上福康安百韻詩。並序。沈博絕麗。時稱爲才子。然壽祺自咎。不能高行邃學。不可告人。乃從同縣孟超然游。爲宋儒之學。凜然以古君子自期。嘉慶四年。成進士。改翰林院庶吉士。散館。授編修。尋告歸。性至孝。不忍言仕。家貧無食。父命之入都。九年。充廣東鄉試副考官。十二年。充河南鄉試副考官。十四年。充會試同考官。旋記名御史。壽祺以不得迎養。常愀然不樂。將告歸。俄聞父憂。慟幾絕。奔歸。服除。乞養。母。母終。喪年五十三。有密薦於朝者。卒不出。壽祺會試出朱珪阮元門。乃專爲漢儒之學。與同年張惠言王引之齊名。又及見錢大昕段玉裁王念孫程瑤田諸人。故學益精博。解經得兩漢大義。每舉一義。輒有折衷。兩漢經師。莫先於伏生。莫備於許氏鄭氏。壽祺闡明遺書。著尙書大傳箋三卷。序錄一卷。訂誤一卷。附漢書五行志。綴以他書。所引劉氏五行傳論三卷。序曰。伏生大傳。條撰大義。因經屬情。其文辭爾雅深厚。最近大小戴記。七十子之徒。所說非漢諸儒傳訓之所能及也。康成百世儒宗。獨注大傳。其釋三禮。每援引之。及注古文尙書洪範五事。康誥孟侯文王伐崇錢耆之歲。周公克殷踐奄之年。咸據大傳以

明事。豈非得識博通。信舊聞者哉。且夫伏生之學。尤善於禮。其言巡狩朝覲郊尸迎日廟祭族燕閭塾學校養老擇射貢士考績郊遂采地房室路寢之制。后夫人入御。太子迎問。諸侯之法。三正之統。五服之色。七始之素。八伯之樂。皆唐虞三代遺文。往往六經所不備。諸子百家所不詳。今其書散逸。十無四五。尤可寶重。宋朱子與勉齋黃氏。纂儀禮經傳通解。攬摭大傳獨詳。蓋有裨禮學不虛也。五行傳者。自夏侯始昌。至劉氏父子傳之。皆善推厥福。著天人之應。漢儒治經。莫不明象數陰陽。以窮極性命。故易有孟京卦氣之候。詩有翼奉五際之要。春秋有公羊災異之條。書有夏侯劉氏許商李尋洪範之論。班固本太傳。摭仲舒。別向歆以傳春秋。告往知來。王事之表。不可廢也。是以錄漢書五行志附於後。以備一家之學云。又著五經異義疏證三卷。序曰。石渠讎奏之體。先臚衆說。次定一尊。覽者得以考見家法。劉更生采之爲五經通義。惜皆散亡。白虎通義亦多闕佚。且經班固刪集。深沒衆家姓名。殊爲疏失。不如異義所援古今百家。皆舉五經先師遺說。其體仿石渠論。而詳贍過之。許君又著說文解字。綜黃萬原。當世未見遵用。獨鄭君注儀禮既夕記。小戴禮雜記。周禮攷工記。嘗三稱之。所以推重之者至矣。顧於異義爲之駁者。祭酒受業賈侍中。敦崇古學。故多從古文家說。司農囊括網羅。意在宏通。故兼從今文家說。此其判也。案張懷瓘書斷。叔重安帝末年卒。鄭君別傳。康成永建二年生。鄭氏於許爲後進。而繩糾是非。爲汝南之評友。夫向歆父子。猶有左穀之遺。何鄭同室。奚傷箴育之作。聖道至大。百世莫殫。仁者見仁。智者見智。斷於事得其實。道得其真而已。今許鄭之學。流布天下。此編雖略。然典禮之闕達。名物之章明。學者循是而討論焉。其於昔人所譏。國家將立。辟雍巡守之儀。幽冥而莫知其原者。庶乎可免也。他著又有左海經辨二卷。左海文集十卷。左海駢體文二卷。絳跌宕詩集六卷。東粵儒林文苑後傳二卷。東觀存稿一卷。壽祺歸後。阮元延課詰經精舍。趙坦徐養原嚴杰洪頤煊等皆從問業。元纂羣經古義爲經郭。壽祺定義例十條上之。一曰探原本。二曰鉤微言。三曰綜大義。四曰備古禮。五曰存漢學。六曰證博注。七曰通互詮。八曰辨勦說。九曰正謬解。十曰廣異文。明所以原本訓辭。會通典禮。存家法而析異同之意。惜書未就而罷。後主泉州清源書院十年。主鼇峰書院十一年。與諸生言修

身勵學。教以經術。作義利辨。知恥說。科舉論。以示學者。規約整肅。士初苦之。久乃悅服。家居與諸當事書。於桑梓利弊。著目海心。雖觸忌諱。無所隱。明儒黃道周。孤忠絕學。壽祺搜輯遺文。爲之刊行。又具呈大吏。乞疏請從祀孔廟。議上。如所請。道光十四年卒。年六十四。子喬樞。

劉逢祿

劉逢祿。字申受。江蘇武進人。祖綸。大學士。謚文定。外祖莊存與。眞莊述祖。並以經術名世。逢祿盡傳其學。嘉慶十九年進士。改翰林院庶吉士。散館。授禮部主事。二十五年。仁宗睿皇帝大事。逢祿搜集大禮。創爲長編。自始事至奉安山陵。典章具備。道光四年。補儀制司主事。時河南學政。請以尙書湯斌從祀文廟。儀者以斌康熙中。在上書房獲譴。乾隆中嘗奉駁難之。逢祿攬筆書曰。后襲典樂。猶有朱均。呂望陳書。難匡管蔡。尙書汪廷珍。善而用之。遂奉俞旨。是年。越南貢使陳請爲其國王母請人禮。得旨賞給。而諭旨有外夷貢道之語。其使臣欲請改爲外藩。部中以詔書難更易。逢祿草牒復之曰。周官職方。王畿之外分九服。夷服去王國七千里。藩服九千里。是藩遠而夷近。說文羌狄蠻貊。字皆從物旁。惟夷從大從弓。考東方大人之國。夷俗仁。仁者壽。有東方不死之國。故孔子欲居之。且乾隆間奉上諭。申敕四庫館。不得改書籍中夷字作彝裔。舜東夷之人。文王西夷之人。我朝六合一家。盡去漢唐以來拘忌嫌疑之陋。使者無得以此爲疑。越南使者。遂無詞而退。逢祿在禮部十二年。恆以經義決疑事。爲衆所欽服。類如此。其爲學務通大義。不專章句。由董生春秋闢大藝家法。由六藝求觀聖人之志。嘗謂世之言經者。於先漢則古詩毛氏。後漢則今易虞氏。文辭稍爲完具。然毛公詳故訓而略微言。虞翻精象變而罕大義。求其知類通達。微顯闡幽者。則公牟在先。漢有董仲舒氏。後漢有何劭公氏。子夏喪服傳有鄭康成氏而已。先漢之學。務乎大體。故董生所傳。非章句訓詁之學也。後漢條理精密。要以何劭公鄭康成氏爲宗。然喪服於五禮特其一端。春秋文成數萬。其旨數千。天道淡。人事備。以之黃羣經。無往不得其原。以之斷史。可以決天下之疑。以之持身。

治世。則先王之道可復也。於是尋其條貫。正其統紀。爲公羊春秋何氏釋例三十篇。又析其凝滯。彊其守衛。爲箋一卷。答難二卷。又推原穀梁氏左氏之得失。爲申何難鄭四卷。又博徵諸史刑禮之不中者。爲議禮決獄四卷。又推其意。爲論語述何。夏時經傳箋。中庸崇禮論。漢紀述例各一卷。別有緯略二卷。春秋賞罰格一卷。愍時學者說春秋。皆襲宋儒。直書其事。不煩褒貶之說。獨孔廣森。爲公羊通義。能抉其蔽。然不能信三科九旨。爲微言大義所在。乃著春秋論上下篇。以張聖權。逢祿論春秋左氏傳。據太史公書。本名左氏春秋。若晏子春秋。呂氏春秋。比自王莽時。國師劉歆。增設條例。推衍事迹。彊以爲傳春秋。冀奪公羊博士師法所當。以春秋歸之春秋。左氏歸之左氏。而刪其書法凡例。及論斷之謬。於大義孤章斷句之依附經文者。庶以存左氏之本真。俾攻左者。不得爲口實。更成左氏春秋考證二卷。知者謂與閻惠之辯古文尙書等。逢祿於易主虞氏。於詩初尙毛學。後好三家。有易虞氏變動表。木爻發揮旁通表。卦象陰陽大義。虞氏易言補各一卷。又爲易象賦卦氣頌。撮其旨要。尙書今古文集解三十卷。書序述聞一卷。詩聲演二十七卷。又以其餘力取史記天官書及甘石星經。爲之疏證。成書數卷。又著說文衍聲記。以舉分韻之要。又仿經典釋文之例。存異文古訓。爲五經考異。已就兩經。而未成。道光九年卒。年五十六。又旁求之於禮。本六經論語之文。考諸國語周官。漢儒傳記。正其舛誤。志其大略。爲締議一卷。少作尙有毛詩譜三卷。詩說二卷。甘石星經疏證二卷。輯石渠禮議一卷。在官有庚辰大禮記注長編十二卷。春闈雜錄一卷。東陵勘地圖說一卷。又選定八代文苑四十卷。唐詩選四十卷。絕妙好詞二十卷。詞雅四卷。詩文集八卷。

錢儀吉

錢儀吉。字鶴人。號衍石。一號心壺。初名遠吉。字衍石。浙江嘉興人。刑部尙書陳羣曾孫。侍讀學士福胙子。年十二。效選體作山賦千言。張問陶見之。擊節稱賞。嘉慶十三年成進士。改翰林院庶吉士。散館。授戶部主事。累遷至工

科給事中。尋罷歸。儀吉於學。無所不通。其治經。先求故訓。博考衆說。而折衷以本文大義。嘗謂欲得經解。必通訓詁。而泛濫訓詁。未必遽獲神解。著經典證文雅厭。雅厭者。以十九篇之次。寫九百四部之文。而以經籍傳註推廣之。其讀史。則補晉兵志。及朔閏諸表。又撰三國會要。博采見聞。旁羅散失。期拾遺於正史。不限斷。以本書帝系輿地。或爲之圖。或爲之表。條繫字綴。鉅細畢駘。嘗爲會典館總纂。專辦天文輿地諸圖象。復手撰皇輿圖說四十卷。又嘗仿明焦竑獻徵錄爲國朝獻徵錄。得將相大臣循良忠節儒林文苑等凡八百餘人。又於獻徵錄之外。節錄名臣。爲先正事略。官戶部時。值現審處。剖決如流。及改御史。吏皆拊掌相告曰。錢公去此。吾屬無患矣。巡城稅事。隨到隨決。無稽留旬日者。至有主講粵東學海堂。定諸生讀書法四則。至今仍之。晚主河南大梁書院。道光三十年卒。年六十八。他著有行石齋記事稿十卷。續稿十卷。刻楮集四卷。旋逸小稿二卷。

龍啓瑞

龍啓瑞。字翰臣。又字輯五。廣西臨桂人。父光甸。字見田。嘉慶二十四年舉人。歷官黔陽武陵知縣。乍浦台州同知。所至斷滯獄。修文教。摘叢發伏。以廉幹稱。著有宰黔防乍錄及詩文集。道光二十九年卒。年五十八。啓瑞道光二十一年一甲一名進士。授翰林院修撰。二十三年。充順天鄉試同考官。二十四年。充廣東鄉試副考官。二十七年。大考翰詹二等七名。以待講陸用。七月。提督湖北學政。湖北人士知禮尚文。啓瑞專以根柢之學振之。著經籍舉要一書。以示學者。又以學政之職有三要。一曰防弊。二曰厲實學。三曰正人心風俗。故所作文檄。告誡周詳。旣復舉舊日所闕及近所施行者。爲視學須知一卷。三十年。丁父憂回籍。咸豐元年六月。廣西巡撫鄒鳴鶴奏辦團練。以啓瑞總其事。二年七月。省城圍解。以守城敘功。得旨以待講學士陸用。並賞戴花翎。五年回京。六年四月。擢通政司副使。十一月。提督江西學政。七年三月。授江西布政使。時太平軍踞東南。江西僅省會暨一府未陷。庫藏久虛。啓瑞焦勞籌度。鑲精賴以不竭。會歲旱蝗。齋心祈禱。力求驅捕之法。蝗患頓除。嘗勸民積穀備荒。復以暇修普

濟育嬰諸善政。惠心澤民。郡邑感慕。八年九月卒於官。同治十一年。奉旨入祀江西名宦祠。啓瑞少與其鄉呂瓚朱琦王錫振爲古文。步趨桐城。已從上元梅曾亮遊。文日益進。後交漢陽劉傳瑩。切劘經義。尤講求音韻之學。黃穿於顧江苗段王孔張劉諸家之書。而著古韻通說二十部。其論古韻寬嚴得失曰。論古韻者。自顧氏以前失之疏。自段氏以後過於密。江氏酌中。亦未爲盡善。顧氏規模粗備。其考據精確。有不可磨滅者。段氏分之脂支三部。發前人所未發。餘所分者。求之古經。率多可據。雖分配入聲。未極精審。不免千慮之失。然而分合周備。條理井然。可謂文而不煩。博而知要者矣。後之陽湖張氏。高郵王氏。曲阜孔氏。歙江氏諸子之學。博足以綜其蕃變。精足以定其指歸。皆由段氏精而求之。以極於無可復加之地。至張氏之分爲二十一部。與高郵王氏略同。其依據說文。折衷經韻。使人觀形可以得聲之說。復審音可以定形之譌。而於通轉流變之間。尤能言之盡意。同時武進劉氏。復有詩聲衍之作。觀其序論及標目部分。蓋亦竊取張氏之意而爲之者也。其論入聲同部異韻。及異部同用。較諸家尤爲明備。覺段氏之精於說文。猶未見及張氏。有言凡言古韻者。分之不嫌密。合之不嫌廣。惟分之也密。故其合之也。脈絡分明。不至因一字而疑各韻可通。亦不至因各韻而疑一字之不可通。故今之集古韻也。意主於嚴。而其爲通說也。則較之顧氏而尙覺其寬。其分也有所以可分之由。其合也有所以得合之故。皆爲剖而明之。不敢拘前人成說。不敢執一己私見。亦曰參之古書以求其是。質之人心而得其安而已。論本音曰。許書實兼音形義三者爲訓。諧聲一門。幾居全書之八。然比而論之。無不與經訓符合。未有母聲在此。而子聲在彼者。間有出入。即可據爲古音通轉之證。中有讀若讀同之例。雖偶用方言俗字。未必盡出古音。然要取諸同部其轉入他部者。亦必有說。每文下所載古文或體亦然。今於經韻後載說文諧聲諸字。以見音隨字寓之原。而於偏旁讀若小異者。皆爲梳鬚而證明之。其有古今音變。難爲強說者。仍從蓋闕。論通韻曰。二十部大旨貴於密。而不貴於疏。然證之於古。或齟齬而不合。則不得不爲之說以通其變。然其所通者。必有其所以可通之故。而非若唐人之通韻。僅取便於時俗而已。論轉音曰。轉音即雙音之異名。天地間自有不可磨滅者。古經中用韻。及字書偏旁有不合。

者。苟求之於是。無不可通。此謂古一字祇有一音。非確論也。此條所以濟本音通韻之窮。而讀古書及說文者。愈釋然而無疑矣。論通說曰。學者從事於二十部之古韻。則於其紛紜膠轕者。有若涇渭之難辨。燕越之各判矣。然於此而與之道古。或不免拘執而難通。又將諱其所不合以爲安。則又與於誣古欺人之甚。故爲之說。有十以通之。大都本通韻之文爲之根柢。通韻祇通其數字。通說則舉其一字。蓋全書皆嚴其所以分之界。而於此終著其所以合之由。是古韻之學之大成也。故以名其全書焉。啓瑞又以爾雅一書。學者多苦其難讀。因采邵郝盧阮諸說。於發疑正讀之交。講明至是。間復參以己見。著爾雅經注集證三卷。他著有小學高注補正。是君是臣錄。班書識小錄。通鑑識小錄。諸子精言。莊子字詁。及經德堂詩文集十二卷。

嚴可均

嚴可均。字景文。號鐵橋。浙江烏程人。嘉慶五年舉人。官建德縣教諭。引疾歸。可均博文強識。精考據之學。與姚文田同治說文。徧索異同。爲說文長編。亦謂之類考。有天文算數地理類。草木鳥獸蟲魚類。聲類。說文引羣書類。羣書引說文類。積四十五冊。又輯鐘鼎拓本爲說文翼十五篇。將校定說文。撰爲疏異。孫星衍促其成。乃撮舉大略。就毛氏汲古閣初印本。別爲校義三十卷。專正徐鉉之失。又與丁榕同治唐石經。著校文十卷。自序云。余弱冠治經。稍見宋槧本。既又念若魏若唐若孟蜀若宋嘉祐紹興。各立石經。今僅嘉祐四石。紹興八十七石。皆殘本。而唐太和石壁二百二十八石。巋然獨存。此天地間經本之最完最舊者。夫唐代四部之富。埒於梁隋。而鄭單唐元度輩皆通儒。頗見古本。苟能彙正積非。歸於真是。卽方駕熹平不難。而僅止於是。今也古本皆亡。欲復舊觀。已難爲力。可慨也。然而後唐雕版。實依石經句讀鈔寫。歷宋元明轉刻轉誤。而石本爭存。縱不足與復古。以匡今謬。有餘也。獨怪數百年來。學士大夫。鈔或過問者。閒有一二好古之士。亦與冢碣寺碑同類。而並道之。康殿初。顧炎武始略校焉。觀其所作九經輿字金石文字記。刺取庸厚。是非算當。又誤信王堯惠之補字。以誣石經。顧氏且然。

况其他乎。嗚呼。石經者。古本之終。今本之祖。治經不及見古本。而並荒石經。匪直荒之。又交口誣之。豈經之幸哉。余不自揆。欲爲今版本。正其謬。爲唐石經釋其非。爲顧氏等祛其惑。隨讀隨校。凡石經之磨改者。旁增者。與今本互異者。皆錄出。輒據注疏釋文。旁稽史傳。及漢唐人所徵引者。爲之左證。而石臺孝經附其後焉。嘉慶十三年。詔開全唐文館。可均以越在草茅。無能爲役。慨然曰。唐之文盛矣哉。唐以前要當有總集。乃輯全上古三代秦漢三國六朝文。使與全唐文相接。多至三千餘家。人各系以小傳。足以考證史文。皆從蒐羅殘牘得之。覆檢羣書。一字一句。稍有異同。無不校訂。一手寫定。不假衆力。唐以前文。咸萃於此焉。又校輯諸經逸注及佚子書等數十種。合經史子集爲四錄堂類集。千二百餘卷。又著有鐵橋漫稿十三卷。其說文類考。稿佚。惟聲類二卷存。道光二十三年卒。年八十二。

王筠

王筠。字黃山。號葦友。山東安邱人。道光元年舉人。游京師。三十年。與漢陽葉志詵道州何紹基晉江陳慶鏞日照許瀚。商確今古。後官山西鄉寧縣知縣。鄉寧在萬山中。民樸事簡。訟至立判。暇則把一編不去手。權徐溝。再權曲沃。地號繁劇。二縣皆治。然亦未嘗廢學。少喜篆籀。及長。博涉經史。尤長於說文。嘗謂桂馥書。專臚古籍。取足達許說而止。不下己意。惟是引據失於限斷。且泛及藻曠之詞。段玉裁書。體大思精。所謂通例。又前人所未知。惟是武斷支離。時或不免。又謂文字之奧。無過形音義三端。古人之造字也。正名百物。以義爲本。而音從之。於是平有形。後人之識字也。由形以求其音。由音以考其義。而文字之說備。六書以指事象形爲首。而文字之樞機。即在乎此。其字之爲事而作者。即據事以審字。勿由字以生事。其字之爲物而作者。即據物以察字。勿泥字以造物。且勿假他事以成此事之意。勿假他物以爲此物之形。而後可與蒼頡籀斯相質於一堂也。今說文之詞。足從口。木從艸。鳥鹿足相似從匕。苟非後人所竄亂。則許君之意荒矣。乃標舉分別。疏通證明。著說文釋例二十卷。釋例云者。即

許書而釋其條例。猶杜元凱之於春秋也。又以二徐書多涉草略。加以李燾亂其次第。致分別部居之脈絡。不可推尋。段玉裁既創爲通例。而體裁所拘。未能詳備。乃采桂段諸家之說。著說文句讀三十卷。句讀云者。用張爾岐儀禮鄭注句讀之名。謂漢人經說。率名章句。此書疏解許說。無章可言。故曰句讀也。筠治說文之學。垂三十年。其書獨闢門徑。折衷一是。不依傍於人。論者以爲許氏之功臣。桂段之勁敵。其後吳縣潘祖蔭見其書。謂筠書晚出。乃集厥成。補弊救偏。爲功尤鉅云。又有說文繫傳校錄三十卷。文字蒙求四卷。他著有毛詩重言一卷。附毛詩雙聲疊韻說一卷。夏小正正義四卷。弟子職正音一卷。正字略二卷。蛾術編。小學三支別。禹貢正字讀。儀禮鄭注句讀刊誤。四書說略。其馬首農言一卷。典雅翔核。有六朝地志風度。咸豐四年卒。年七十一。

朱駿聲

朱駿聲。字豐芑。號允倩。江蘇吳縣人。年十三。受許氏說文。一讀卽通曉。十五爲諸生。從錢大昕遊。錢一見奇之。曰。衣鉢之傳。將在子矣。嘉慶二十三年舉人。官黟縣訓導。肆力著述。諸生造門請業者。常數十人。官舍至不能容。俞正燮歎曰。朱君真名士也。咸豐元年。以截取知縣入都。進呈所著說文通訓定聲等四十卷。序云。此書以直說文轉注假借之隱略。以稽羣經子史用字之通融。題曰說文表所宗也。曰通訓。發明轉注假借之例也。曰定聲。證廣韻今韻之非古。而導其源也。先之以東字。遵康熙字典之例。使學者便於檢閱也。終之以韻準。就今一百六韻區分之。俾不繆於古。亦不悖於今也。附之以說雅。明說文之上繼爾雅。可資以參互考訂也。文宗披覽。嘉其賅洽。賞國子監博士銜。旋遷揚州府學教授。引疾未之官。六年卒。年七十一。駿聲著述甚博。不求知於世。兼長推步。明通象數。嘗論爾雅太歲在寅。推大昕說。謂其時自以寅測之。歲星在亥。定太歲在寅。命之曰攝提格。以紀年。歲星所合之辰。卽爲太歲。然歲星閏百四十四年而起一辰。至秦漢而甲寅之年。歲星在丑。太歲應在子。漢詔書以太初元年爲攝提格者。因六十紀年之名。歷年以次排敘。不能頓超一辰。故仍命以攝提格也。於是後人以寅卯等爲

太歲。強以攝提格等爲歲陰。其實爾雅所云歲陽歲陰。非如後人說也。他著有六十四卦經解八卷。尙書古注便讀四卷。詩傳箋補十二卷。儀禮經注一隅二卷。夏小正補傳二卷。大戴禮記校正二卷。左傳旁通十卷。左傳識小錄三卷。論孟摘解二卷。懸解四卷。經史問答二十六卷。天算瑣記四卷。數度衍約四卷。離騷補注一卷。淮南書校正六卷。說解商十卷。小學識餘四卷。說叢十二卷。

宋翔鳳

宋翔鳳。字虞廷。一字于庭。江蘇長洲人。少嗜讀古書。不樂舉子業。不得。則竊衣物以易。祖父夏楚賈之。不能禁也。毋陽湖莊氏。爲珍藝先生妹。嘗隨母歸甯。因留常州。從舅父受業。遂得聞莊氏今文學之家法。緒論比長。更游段懋堂門。兼治東漢許鄭之學。嘉慶庚申舉於鄉。大挑授泰州學正。丁艱服闋。改安徽旌德縣訓導。保知縣。試吏湖南。用材幹。見知大府。歷任劇邑。以州牧致仕。咸豐乙未。重寔鹿鳴。加知府銜。卒年八十七。生平淹貫羣籍。尤長治經。珍藝嘗謂。吾諸甥中。劉申受可以爲師。宋虞廷可以爲友。珍藝發明歸藏之說。世多不能曉。翔鳳則曰。歸藏首坤。坤辟亥。王甲之所藏也。則大壬大甲之占。皆本於歸藏。惜僅存於術家耳。著卦氣解一卷。尙書略說一卷。悉本珍藏說也。復取周易經文文字異同之見於說文音義及羣籍者。一一疏通而證明之。成周易考異一卷。條舉今文二十八篇與僞書序百篇目暨馬鄭本比較。其有無。論列於其後。成尙書譜一卷。以康成論語注雖久佚。而散見他書。尙存梗概。輯論語鄭注十卷。以論語說曰。子夏六十四人共撰。仲尼微言。以當素王。微言者。性與天道之言也。惜自漢以來。諸家之說。時合時離。未得畫一。乃綜覈之。撰論語纂言。文繁未就。先別成說義十卷。以少習孟子。得轉附朝儻之訓。見許珍藝。至京師。王石臞聞其解西喪地於秦七百里。亦以爲然。簿書餘暇。遂取邠卿舊注補所不逮。成孟子趙注補正大六卷。又以劉熙之學出於鄭氏。如南河牛山諸注。考其地形。並勝於趙。輯孟子劉注一卷。謂大學爲禮記四十九篇之一。首尾完具。脈絡貫通。無經傳之可分。無缺亡之可補。成大學古義說二卷。

謂小學義在通博。故方言釋名等鮮獲所宗。獨小雅依循古文。罕見凌雜。成小爾雅訓纂六卷。其餘尙有四書釋地辨證二卷。爾雅釋服一卷。輯五經要義一卷。五經通義一卷。攷證經史劄記總哀爲過庭錄十六卷。詩詞。亦雋雅可誦。

劉寶楠

劉寶楠。字楚楨。號念樓。父履恂。乾隆五十一年舉人。著有秋槎雜記一卷。寶楠道光二十五年以優貢生中式鄉試。二十年成進士。歷任直隸文安。寶坻。固安。元氏三河知縣。文安境內各莊堤歲久失修。令甲凡堤工族丁及民均赴役。執法不阿。工賴以濟。在縣三載。無水災。官元氏時。值歲旱。蝗蝻大作。爲分設三廠。自捐金收捕淨盡。得轉豐稔。比調三河。東省兵過境。故事。兵車皆出里下。謂兵多差重。非民所堪。遣往通州。以民價雇車應役。民以不擾。在官十六年。衣履素樸如諸生。勤於聽訟。遠近欽然。循良稱最。咸豐五年病卒。年六十五。鄉人私謚曰孝獻先生。寶楠內行嚴整。笑言悉有矩矱。爲學不堅持門戶。嘗病論語皇邢疏蕪陋。蒐采漢儒舊說。益以近世諸家及宋人長義。作正義一書。未竟業。命子恭冕成之。他著有釋穀四卷。漢石例六卷。愈愚錄六卷。韞山樓詩文集若干卷。其纂輯鄉里文獻者。有寶應圖經六卷。文徵百餘卷。紀述實政者。有文安堤工錄六卷。表徵闡幽者。有勝朝殉揚錄三卷。哀集先世遺言者。有清芬集十卷。外集。家譜傳稿。各若干卷。

魏源

魏源。字默深。湖南邵陽人。道光二年。順天舉人。試卷進呈。宣廟手批嘉賞。名籍甚。入貲爲內閣中書。改知州。二十四年。成進士。發江蘇。以知州用。權東臺興化縣事。二十九年大水。河督將啓開。源力爭不能得。則躬赴制府擊鼓。總督陸建瀛聞報。立往勘。始得免啓。七州縣士民皆德之。未幾。補高郵州。坐驛遞遲誤免。尋以緝獲彙匪功。副都

御史袁甲三奏復其官。咸豐六年卒。年六十三。源經術湛深。讀書精博。初崇尚宋儒理學。後發明西漢人之誼。於書則專申史記伏生大傳。及漢書所載歐陽夏侯劉向遺說。以難馬鄭。撰書古微十二卷。於詩則謂毛詩晚出。顧炎武闢若璩胡渭戴震。皆致疑於毛學。而尙知據三家古義以證其源。因表章奮韓陸緒。以匡傳箋。撰詩古微二十二卷。於春秋則謂漢書儒林傳。言董生與胡毋生同業治春秋。而何休注但依胡毋生條例。於董生無一言。及近日曲阜孔廣森武進劉逢祿。皆公羊專家。亦止爲何氏拾遺補缺。而董生之書未之詳焉。若謂董生疏通大義。不列經文。不足頡頏何氏。則其書三科九旨。燦然大備。且宏通精微。內聖而外王。蟠天際地。遠在胡毋生何休章句之上。撰董子春秋發微七卷。他所著有庸易通義。說文疑雅。兩漢經師今古文家法考。論語孟子類篇。孟子小記。小學古經。大學古本。孝經集傳。曾子章句。明代食兵二政錄。老子本義。孫子集注。元史新編。多未成。其例目見集中。性兀傲。高自標樹。惟論古今成敗。國家利病。學術本末。反復辨論不少衰。四座皆屈。嘗謂禹分天下爲九州。外薄四海。咸建五長。而朔南所暨。說者謂北距大漠。不能越乎其外。至我朝而龍沙雁海之國。萬潼億彘之民。獨峯駝無尾羊之部。奔走萬里。臣妾一家。因借觀史館秘閣官書。參以士大夫私家著述。故老傳聞。排比經緯。馳騁往復。成聖武記十四卷。統四十餘萬言。又喜談經濟。其論河務。謂宜改復北行故道。咸豐五年。銅瓦廂之決。河復北流。由大清河入海。適與所論相合。又作籌鹺篇。上兩江總督陶澍。謂鹺政之要。不出化私爲官。而緝私不與焉。自古有緝場私之法。無緝鄰私之法。鄰私惟有減價敵之而已。非減價何以敵私。非輕本曷以敵減價。非裁費曷以輕本。非變法曷以裁費。迨陸建瀛當漢岸火災之後。始力主行之。晚遭夷變。謂籌夷事必知夷情。知夷情必知夷形。因據粵督林則徐所釋西夷之四州志。及歷代史志。明以來島志。近日夷圖夷語。成海國圖志一百卷。番禺陳澧常歎以爲奇書。又謂其調客兵不如練土兵。及裁兵併糧。水師將弁。用舵工礮手出身諸條。爲最善。後源至粵。聞其說大悅。因定交焉。其虛心受善如此。所自著有古微堂文內集三卷。外集七卷。詩集六卷。而賀長齡所著皇朝經世文編。亦源襄輯之力居多。其餘尙有公羊古微。春秋繁露注。曾子子思子章句等十餘種。多不傳。

陸心源

陸心源字剛父號存齋晚稱潛園老人浙江歸安人資稟奇穎讀書目數行下年三十通九經尤精鄭許之學受知于萬青藜吳式芬張錫庚先輩如徐有壬朱緒曾皆引爲忘年交與同郡姚宗誥戴望施補華俞剛王宗箴凌震以古學相切劘時有七子之目性喜管商書於國朝諸儒尤服潛亭林之學中咸豐己未舉人遵例以知府分發廣東奉直督劉長佑奏辦直東豫交界勒匪事宜告竣以才識精明志行清直奏留直隸整頓吏治薦擢道員乙丑簡廣東南韶兵備道行抵英德即聞長寧土匪擾六里鄉翁源知縣張興烈被戕嶺南姑息成政戕官之案疊出每辦匪鄉必有耆老數輩攜婦女哀乞承認繳匪官民相爲粉飾心源視事檄遊擊湛恩榮率兵勦洗罪人斯得地方救平自是十餘年粵中無戕官案會霆軍叛勇突湖南入粵勢洶洶急檄湛遊擊回援樂昌益以壯土千礮船二十水陸並捷敵遁江西而洪秀全餘黨踞閩粵之交思復蹂江楚南韶當其衝始由龍南撲始興即檄副將朱國雄扼縣城再由連平犯翁源檄參將任玉田扼雞仔嶺敵不得逞南韶卒無恙韶關商賈貨物盈廩一物漏稅全船充公心源革除弊政凡漏稅者祇准補繳不准充公積蠹一清商民感悅六年調高廉道旋奉旨開缺送部引見繼丁外艱星奔回籍壬申閩督李鶴年以佐治需人奏調赴閩總辦稅釐通商善後諸局並海防事宜署糧鹽道與署督不合即乞養歸仍以鹽務加耗參奏劾職時心源歸里已二載矣循陔之暇娛意林泉就城東蓮花莊北闢小園水木明瑟極清曠之致署曰潛園酷嗜異書大江南北兵燹之後故家藏書出以求售所得宋元版書於斯爲盛光緒戊子進書國子監舊刻舊鈔一百五十種計二千四百餘卷附以所刻叢書三百餘卷奉旨褒獎心源在家獨建昇山橋修復安定愛山兩書院仁濟善堂義學無不具舉張曜撫山左李鴻章督直隸並推於朝得旨開復原官交軍機處記名簡放癸巳引見召對一次歸抵天津即嬰未疾次年十一月九日卒於里第年六十有一所著儀顧堂文集二十卷儀顧堂題跋十六卷續跋十六卷皆古書源流金石考證之學藏宋

刊書至一百餘種。元刊至四百餘種。諸之。詔宋樓。作詔宋樓藏書志一百二十卷。續志四卷。所得金石碑版九千餘通。多青浦王尙書未著錄者。作金石粹編續二百卷。鑿藏書畫。作穰梨館過眼錄四十卷。續錄十六卷。生平篤嗜唐文。於蟬斷衰朽。掇拾錄存。與金石之文。新出土者。成唐文拾遺八十卷。唐文續拾十六卷。樊榭山人宋詩紀事。於兩宋詩人。搜羅備至。復輯得三千餘人。得詩八千首。作宋詩紀事補遺一百卷。其厲書小傳。有仕履不詳。時代未著者。別爲小傳補正四卷。其他善本。卷帙繁重。不及編刻者。作羣書校補一百卷。搜故鄉風雅補志。乘闕遺作。吳興詩存四十卷。吳興金石記十六卷。歸安縣志四十八卷。病宋史蕪簡。考黨禁始末。作宋史翼四十卷。元祐黨人傳十卷。嘉定錢氏疑年錄之作。大抵詳於儒林文苑。及書畫之士。心源既校正錢解蕪疑年錄四卷。復益以名臣大儒。氣節文章之士。作三續疑年錄十卷。儲藏三代秦漢鐘鼎彝器百餘種。晉唐古鏡六十餘種。輯古今言金石者。以補李學博富孫之缺。得三百餘人。作金石學錄補四卷。合畧曰潛園總集。共九百四十餘卷。

祁寓藻

祁寓藻。字叔穎。又字淳甫。後改實甫。號春圃。晚號觀齋。山西壽陽人。幼而歧嶷。性至孝。年十二。父以事繫刑部獄。寓藻隨侍讀書不少輟。越歲事白。遣戍伊犁。請從行。不許。乃奉母返里。益篤苦於學。嘉慶十九年進士。改翰林院庶吉士。二十年丁父憂。二十四年散館。授編修。道光元年。命在南書房行走。二年三月充會試同考官。五月充廣東鄉試正考官。三年五月。提督湖南學政。六年正月。召還京。命仍在南書房行走。七年。充文淵閣校理。八年正月。京察一等。二月。陞詹事府右春坊右中允。十月。遷翰林院侍講。旋充日講起居注官。九年。陞詹事府右春坊右庶子。十年。疏請開缺。回籍省親。十一年九月銷假。命仍在南書房行走。十一月。補原官。十二年二月。遷翰林院侍講學士。復充日講起居注官。六月。署國子監祭酒。七月。因母病。疏請開缺。不許。十月。授通政司副使。十三年二月。陞光祿寺卿。四月。擢內閣學士兼禮部侍郎銜。十四年丁母憂。十六年六月服闋。先於五月授兵部右侍郎。命仍在

南書房行走。九月轉左侍郎。充武會試校射大臣。時圓明園不戒於火。礮藻偕王大臣督率官員弁兵撲救出力。賞加三級。十七年正月。署戶部左侍郎。八月。調戶部右侍郎。兼管錢法堂事務。尋提督江蘇學政。十二月。轉左侍郎。兼管三庫事務。十九年九月。調吏部右侍郎。均留學政。任。十月。偕署兩江總督陳鑾。署江蘇巡撫裕謙。疏請飭下儒臣。敬謹推闡聖諭廣訓內黜異端以崇正學一條。撰擬有韻之文。頒發各省。如所請行。十二月。御史杜彥士條陳海防各事宜。命偕侍郎黃爵滋會同閩浙總督鄧廷楨查辦。甯藻由江蘇赴閩。旋擢都察院左都御史。二十年二月。陞兵部尙書。三月。奏閩省海防緊要。請令總督每歲暫駐泉州。督辦南臺福廠戰船。修造草率遲延。議令迅速修補。四月。奏查禁海口鴉片烟販。首在嚴辦漢奸。責成地方官兵。盡力查拏。並嚴密巡防。永杜洋船竄至控制海口。請易礮臺爲礮墩。並詳陳建立保護及安礮施放之法。又以漳州泉州府屬行使洋錢。請令沿海地方官。於商船進口時。嚴查夾帶。其私鑄者治罪。並限一年赴官呈繳。官爲給價。又查奏晉江等縣械鬪情形。請嚴緝會首人犯。拆毀私設槍樓。並奏禁械鬪章程六條。均得旨允行。八月。還抵浙江。遵旨查奏台州温州各府屬栽種罌粟。業經疊次剷除。仍令各廳縣隨時履勘。台州府知府潘觀藻。疲懦無能。請勒令休致。特旨令革職。已革温州府知府劉煜。試行票鹽不審。被議定罪。遣人赴京翻控。九月。遵旨訊明。並無枉屈。奏請仍遣戍新疆。允之。先是。英吉利兵船。由廣東犯福建各海口。經鄧廷楨奏報廈門攻擊英船。擒獲奸匪。並保奏出力員弁。至是。命偕黃爵滋仍回閩確查。並歷次官兵防堵接仗。及英船停泊各情。均遵旨查實陳奏。十二月。回京。命仍在南書房行走。二十一年三月。充會試副考官。閏三月。調戶部尙書。九月。命在軍機大臣上行走。二十三年正月。充經筵講官。二月。命查戶部銀庫所收豫工事例捐項。並捐輸經費確數。十月。命清查內務府見存金銀課錢文。並另款封儲銀兩。十一月。管理戶部三庫事務。二十六年四月。以失察戶部司員得受陋規。下部議處。閏五月。長蘆鹽政士魁奏。前任運司李百齡。呈訴懸墊庫項。並歷任動墊情形。命偕尙書文慶前往查辦。尋奏李百齡接收前護運司陳鑑等交代。其徵存各項。本由前任動墊。並據詳明前任鹽政普琳有案。惟卸事兩月。始行稟詳。其本任祭課。並非按款清完。

普琳於交代懸款批令追補並不奏參均請下部嚴議陳鑑於補欠加價鞭轉挪撥作爲各商無利運本尤屬率混取巧應請褫職其率准挪撥之前任鹽政德順一併下部嚴議歷任動墊之運司鹽政均查取職名分別議處其應報解課利等款令新任鹽政趕緊催收並清釐未完商欠均如所請八月充順天鄉試正考官二十九年二月充上書房總師傅七月命以戶部尚書協辦大學士管理戶部三庫事務三十年二月充實錄館總裁四月稽察欽奉上諭事件處六月授體仁閣大學士十月充實錄館監修總裁十二月充文淵閣領閣事咸豐元年正月管理工部事務三月兼署管理戶部事務十二月偕部臣疏請將長蘆河東兩廣閩浙四川鹽政仿照兩淮改票成案各省挨次辦理尤之二年二月以捐輸原籍軍餉下部優敘自道光二十三年至是年四屆京察均奉旨交部議敘而自軍興以來夙夜在公殫心竭慮尤爲上所倚重三月題宣宗成皇帝神主贊太子太保銜五月奉諭祁雋藻見在園值班嗣後如遇輪應赴庫日期毋庸前往六月六十生辰賜珍物多件九月命管理戶部事務三年二月上臨雍充進講官遷保前鴻臚寺卿賈克慎等辦理團練是月因左都御史花沙納御史王茂蔭先後條陳試行鈔法左副都御史和溥文瑞又請易銀鈔爲錢鈔偕部臣邊議請設立官錢總局將寶泉寶源二局每月鼓鑄卯錢全行運解作爲票本並由部庫應放款項內酌提見銀藉資轉運總計轄轄收發以見銀一百萬兩見錢一百萬串爲率凡官俸兵餉及各衙門支用雜款分成搭放詔如所請先是二月太平軍竄撲江寧省城竊藻之弟江寧布政使宿藻以守城病歿迨城陷後其家人趙興董位乘間出城四月到京具陳城內文武各員殉難并見在賊匪情形竊藻以聞八月以河南懷慶府解圍賞加一級十一月偕部臣邊議巡防王大臣等奏請推廣加鑄當百至當五百當千大錢旋以行使不便奏罷之自道光十七年至是年歷充拔貢會考閱卷大臣一次覆試宗室舉人閱卷大臣四次覆試順天舉人閱卷大臣二次補行覆試順天等省舉人閱卷大臣五次覆試新貢士閱卷大臣五次殿試讀卷官一次新貢士朝考閱卷大臣七次庶吉士散館閱卷大臣四次教習庶吉士三次大考翰詹閱卷大臣二次考試試差閱卷大臣二次考試漢御史閱卷大臣三次入直南書房除出差回籍外歲

蒙頒賞福壽字及珍玩文綺等件。四年六月，以積勞成疾，屢請假調理。八月，陳請開缺。十年七月，英人犯天津。上將符木蘭、馮藻密疏切諫。九月，復疏言：英人此次狂悖無理已極，即令就撫，其需索無厭，動多牽掣，必不能日久相安。而天津海口逼近京師，非廣東省城江蘇上海可比。豈堪數至驚擾，撓我事權，竊念天下形勢，以關中爲勝，自黃河南徙，則以燕薊爲勝。今河流北歸，故道又以西北爲勝。雍州土厚水深，城池雄闊，且駐防人材輩出，官兵整練，與都城八旗不相上下。若因其地勢，拓此宏規，外無海寇之虞，內有山河之固，此亦窮變通久一大機會也。又言：釐捐一事，窮民未免受累，南省尙有水路運載，北省則皆肩挑負販，備極困苦，所得甚少，所捐甚多，請將北省釐捐先爲停止。報聞。十一年，穆宗御極，諭曰：予告大學士祁寯藻，忠清亮直，學問優長，著來京聽候簡用。寯藻因疏言：臣受三朝知遇之恩，至深且厚，值此時事艱危，稍有所見，何敢緘默不言。謹條列數事，敬爲皇上陳之。一、保護聖躬，以崇帝學也。伏維皇上繼承大統，兩宮皇太后朝夕保護，懿訓常親，不獨寒煖起居，隨時調適，即心思耳目，亦可默收養正之功。自古帝王之學，與儒生異，今日進講之方，亦與平時書房功課不同。蓋讀一句書，即有一句之用，講一件事，即得一事之宜。臣愚擬請侍讀儒臣，除每日功課外，先擇取五經四子書中，有益聖心治道切要之語，講解數條，義取明簡，不可太繁。更取史籍所載古聖帝王往事，明顯易解者，日進一二條。大致分仁正勤儉四端，如禹泣罪，湯解網，文王掩骼等類，並令畫院按照故事，作爲畫幅，復綴講說數語，於進講後，即請黏貼繡座宴息之所，以備隨時觀覽。心不厭則易入，力不勞則有功。此亦古人左圖右史之遺意也。至於天下輿圖，亦宜漸次口講指畫，明其山川道里，關隘夷險，然後恭舉列聖嚴恭寅畏之心，艱難創垂之意，明白陳說，積時既久，衆理貫通，所謂日就月將，學有緝熙於光明也。至左右近侍，尤宜擇老成謹愨之人，每日侍讀時，勿令攙雜言語，其有導引嬉戲，呈進玩好滑稽佻巧便佞者，難逃兩宮皇太后洞鑒之中，自必力與屏斥，不少姑容。庶幾聖德益致純粹，而聖學日崇矣。一、綏輯民心，以清盜源也。粵匪跳梁已逾十載，東南省分蹂躪殆徧，推原其故，雖由奸民犯法，亦由吏治廢弛，養癰貽患。州縣爲親民之官，誠能兼正勤明，則吏胥不敢欺誑，聽斷自無偏枉，官民相信，衆

小潛蹤。縱有竊發。隨起隨滅。卽令辦理團練。必不致聚衆把持。辦理捐輸。亦不致抑勒生事。前者天津縣知縣謝子澄。六合縣知縣溫紹原。皆以民情愛戴。捍衛一方。生而立功。歿而優卹。其明徵也。今民生困憊極矣。其被賊擾害處所。業已被蠲貸之恩。卽完善地方。亦不勝徵調騷擾之苦。卽如礦稅一端。無業遊民。易聚難散。動輒釀成巨案。且所得無幾。所害實多。似宜停罷。以弭後患。釐捐之設。雖爲軍餉起見。而窮民受累實深。其勢縱難悉罷。亦宜於通衢要口。酌量抽留。其餘僻地小商。似應概免擾累。此所謂捐小利而施大惠。山陬海澨。咸頌皇仁。自必愈形鼓舞。今之急務。惟在固結民心。而固結民心。必先體恤民隱。臣聞湖北巡撫胡林翼。辦理清漕之法。於兵燹之後。催科不擾。而額徵易完。官民兩便。此當今挽救漕政之善法也。擬請江浙諸省。漸次廓清之後。卽須仿照湖北辦法。一洗從前勒折浮收。包攬侵蝕等弊。庶東南民困日蘇。莠民不致藉口倡亂。而國家漕運之利。亦可經久無弊矣。一請重守令以固民心也。民心之得失。視乎州縣之賢否。而州縣之賢否。惟知府知之最悉。知府州縣能使民心愛戴。而猶犯上作亂者。未之有也。各省督撫司道大員。黜陟悉聽聖裁。優劣無難立判。至知府州縣職分較卑。若非大吏認真考察。吏治何由整飭。大抵循吏廉正自持。廉則不肯妄取。豈能應酬。正則不肯干求。豈能迎合。爲大吏者察其官聲。覈其詳案。知其才而舉之。舉數人而通省風氣爲之一變。否則民之所親。上司之所厭也。同官之所忌也。或以爲迂拘。或以爲才欠開展。含混註考。因而黜之。黜數人而通省風氣亦爲之一變。在知府尙不致輕易甄別。州縣則改佐貳。改教職。投閒置散。未由自見。誠可惜也。今欲重守令。必以民情愛戴爲憑。若聽斷不公。操守不潔。而欲沽名邀譽。勢必不能。以臣所知。乾隆年間山西知縣汪志伊。嘉慶年間四川知縣劉清。皆因廉明有聲。特徵聖製詩章以獎勵之。淳摺至總督布政使。劉清更由布政使改官總兵。以其文武兼資。故不限一格也。道光年間。知府無論特簡部選外陞。均蒙召見。州縣亦每蒙召對。咸豐初年。州縣亦有豫備召見者。列聖相承。心法治法。卽此一端。具有深意。蓋以親民之官。職分雖微。關係綦重。偶蒙召對。於聽斷操守大端。加以策勵。卽中人之材。亦知感懼被濯。勉爲良吏。風聲所樹。各省大吏。風氣亦爲之一變。所舉如此。所劾可知。吏治澄清。民心自然

固結盜賊自然潛消。且今日之守令即可爲他日之督撫。未有始基不懷而能表率屬員者也。應請敕下各省督撫。隨時認真考察。大計舉劾亦必陳明優劣實跡。不得以空言註考。以符定制。軍興十載。捐例頻開。仕途流品較雜。其中可膺民社者甚多。而由科甲出身者。轉形壅塞。部選之缺。及外省請補人員。似宜量爲變通。不致互有滯礙。請敕下部臣妥議章程。以昭公允。庶人材各效其長。而庸劣者亦不得濫竽貽誤。於吏治民心。似有裨益也。一請詔開制科。以收人才。並請復各省駐防文舉人生員之例。以廣入旗登進之路也。軍務未息。南北各省停科太多。或數科併爲一科。或臨期又復停止。按科舉行者。惟順天山西陝甘等省。此中人材匯沒不少。其安分積學之士。無由上達。而性情不定。挾才欲試。又恐誤入歧途。外則海洋招致。內則盜賊擄脅。鋌而走險。甚可慮也。以臣愚見。撥請特開制科。仿照康熙乾隆年間博學鴻詞之例。詔下中外大臣。及有言責准奏事諸臣。各舉所知。而策以經世之學。進士舉貢生監皆得與選。其布衣中有品學素著。才識優長者。亦許覈實保薦。此亦古人茂才異等。直言極諫之遺意也。惟所保之人。必須真知灼見。臚陳所學實據。毋得含混冒濫。空言保薦。至京師入旗。各省駐防。如有研習經史。通達治體軍務者。並由都統將軍副都統等。覈實保薦。統限一年內咨送到京。禮部彙齊造冊具奏。恭請欽派大臣。考取候旨錄用。其有道路阻滯。限期外始到京者。另作一次考試。臣惟時事艱危。非才不濟。而盤錯之會。尤人才奮興之時。卽如湖南一省。兩廣總督勞崇光。兩江總督曾國藩。湖北巡撫胡林翼。皆由翰林游擢封疆。見辦軍務地方大員。如左宗棠劉長佑彭玉麟李續宜。皆此數年間。仰蒙先皇簡拔。內擢京卿。外擢巡撫。其死綬之臣。如江忠源羅澤南李續賓等。忠義聚著。聲名卓然。一省如此。他省可知。各省督撫。果能認真延訪。循名實賞。必有碩學奇才。爲國家宣力。奏績者文則整頓地方。武則振興軍務。搜羅愈廣。收效必多。士氣由此日興。賊勢由此日蹙。轉移之機。大有關繫。然非朝廷特開一科。旁求俊乂。亦不能四方輻輳。薈萃一時也。至各省士民中。如有武略過人。或團練著有功效者。並請由各督撫。督率鎮將。留心訪察。拔入標營備用。其中果有才識卓犖。堪勝大任者。准令破格保奏。再各省駐防。向有考取文舉人生員之例。至道光年間。改爲繙譯。駐防入旗中。

達漢文積學之士，無路上進，人才難得，誠爲可惜。即如瑞常倭仁，皆係駐防科甲，由翰林擢正卿，其餘京外各官，由駐防科甲出身者，亦復不少。臣任江蘇學政時，考試駐防生童，文理優長者頗多，方今時事艱難，需才甚急，各省遺才，尙須搜取，八旗舊例，更宜疏通。臣愚擬於駐防繙譯科甲外，請復駐防考取文舉人生員之例，與繙譯一體錄用，以廣登進。從此八旗人才日衆，足備器使矣。一請速剿山東河南賊匪，並嚴防山西陝西要隘，以衛畿輔而肅餉道也。竊聞粵匪自竄擾浙江以來，延蔓日衆，雖江南有曾國藩，江北有袁甲三，暨江蘇安徽浙江巡撫分扼要害，屢次克復郡縣，賊勢漸蹙，仍恐康清尙須時日。至山東河南兩省，比年捻匪土匪勾結搶掠，出沒無時，漸漸侵及河北地方，此實畿輔之大患，斷不可任其盤踞巢穴，恣肆橫行也。聞僧格林沁勝保各統大軍，屢有勝仗，擒剿計已不少，河南山東巡撫亦各督兵練剿辦，但恐此剿彼竄，兵去賊來，而防河要口，又恐兵力單薄，偶被逸賊搶渡，其勢更難撲滅。又聞聯捷等在大名一帶剿匪，此則直隸重地，尤當及早肅清也。至山西陝西，皆與河南接壤，雖有河山之險，而隘路處處可通，前此江南逋寇，即由蒲州平陽潞安一帶竄入直境，幸而剿滅淨盡，然前車之鑒，可爲寒心。且山陝兩省，尙屬完善之區，京餉及各路軍餉，皆所取給，設有疏失，餉道阻隔，不堪設想。應請敕下統兵大臣，及直隸總督河南山東巡撫，合力會剿，勿令滋蔓，蓋必東豫肅清，而後畿輔安謐，山陝無事，而後餉道暢通。方今軍務莫急於此。臣聞副都御史張芾，見在幫辦陝西團練，臣知其前任江西巡撫守城，已著成效。即徽州防堵，亦無大失事，惟須專其責成，俾令獨當一面，必可有益。又聞前任雲貴總督吳振械告病，見寓西安省城，該督曾任陝西四川大員，熟悉地方情形，可否會同陝西巡撫辦理防堵？又有前任四川總督王慶雲，曾任陝西山西巡撫，見以告病寓汾州府，前任順天府府尹蔣琦齡，曾任陝西首府，見以養親寓澤州府，二人於澤潞平定遼州一帶，地勢民情，亦必諳習，可否會同山西巡撫辦理防堵，伏候聖裁。至南省用兵日久，必須多方激勵，以振軍心。臣思江蘇安徽死事之臣，名望最著者，如江蘇巡撫吉爾杭阿，安徽巡撫江忠源，道銜六合縣知縣溫紹原，或親督官兵攻城陣亡，或身經百戰，守城盡節，或以小邑危城，屢挫賊氛，明知無援，死守不去，又如提督

張國樞自廣西投誠以來。深明大義。衝鋒陷陣。屢建奇功。卒以力竭捐軀。此數臣者。可否特旨。再加褒卹。遣官於殉難處所致祭。以作戰守將弁感奮之氣。其各省陣亡殉難。曾邀恩旨。褒贈建祠者。並請敕令地方官致祭。此亦激勵軍心之一端也。一敦崇節儉。以培元氣也。我朝休養生息二百餘年。列聖深仁厚澤。漸致豐亨豫大。至乾隆時。焉極盛。嘉慶初年。川楚教匪滋事。連歲用兵。耗帑七千餘萬兩。庫儲不敷。始開捐例。而水旱賑貸。河工經費。仍復日不暇給。宣宗成皇帝建極之初。御製聲色貨利論。所以涵養聖心。訓誡後嗣之意。至深且切。三十年中。減免貢獻。罷斥玩好無益之費。西苑三海圓明園三山工程。大半停止。又出內務府帑金數百萬兩。以實部庫。此誠古帝王克勤克儉之心法也。是以咸豐初年。先皇特諭館臣。纂修實錄。恭載崇儉一門。宣昭聖德。垂示天下。後世繼志述事。合揆同符。自軍興以來。各省餉需。約略所費萬萬有餘。其中實用實銷者固多。而虛糜者亦恐不少。比年京餉不敷。旗兵困苦。而都城內外。風氣轉益奢靡。若非朝廷示以節儉。何以挽回積習。我皇上躬膺寶祚。時值艱難。罷貢卻珍。已聞恩諭。仰見宸衷默契。尙儉黜奢之至意。竊念聖駕恭奉梓宮。還宮慶勤惕厲。日昃不遑。御園修葺。自必緩圖。卽日後經營。亦殊匪易。且遊豫隨意。則啓宴安之漸。寶膳多欲。則啓進奉之漸。杜漸防微。正在此日。擬請敕下工部內務府。會同查勘園庭及三山坐落等處。繕以周垣。敬謹看守。切勿更議繕修。其香山健銳等營。操練處所。仍照舊章辦理。南苑歲修。亦請暫止。其餘一切修造可停者即停。可緩者即緩。至各省織造關差進奉之件。並請敕諭內務府大臣。查覈需用緩急。量爲裁減。俾中外人心。皆知深宮儉約。慎懷永圖。庶奢靡之風漸斂。帑餉不靡。而元氣日培日厚矣。總之。致治之要。本諸聖心。書曰。非知之艱。行之惟艱。詩曰。靡不有初。鮮克有終。方今治象清明。彰善癉惡。大小臣工。孰敢不振刷精神。力圖報稱。第恐數年之後。奉行者視爲具文。漸就懈弛。而揣摩逢迎之習。緣隙而生。卽言路亦恐因之而塞。竊見乾隆初年。直隸總督臣孫嘉淦有三習一弊之奏。其言剴切。深中事情。大致謂習於所見。耳習於所聞。心習於所安。以此三習。卒歸一弊。其弊維何。速君子而近小人而已。疏入。上嘉納之。次第施行。十一月。疏薦科爾沁親王僧格林沁。忠勇樸直。終始如一。前兵部侍郎王茂蔭。遇事敢

言，不避權貴。報聞。十二月，命以大學士銜，授禮部尚書。同治元年二月到京。是月皇上入學讀書，窩藻奉兩宮皇太后懿旨，偕大學士翁心存尙書倬仁編修李鴻藻在弘德殿授讀。窩藻自陳衰病，懇辭部務，上不許。令免其帶領引見，並免派一切差使。尋進呈摘錄經史二帙，上嘉其條分縷晰，切要簡明，命陳弘德殿以資講肄。四月，以西辨防需才，疏薦前大理寺少卿田雨公、太僕寺少卿徐繼畬、江蘇巡撫趙德輿、榆次縣知縣俞世銓、絳州直隸州知州李廷樟、奉天知縣張保衡六員。時刑部定擬已革兩江總督何桂清罪名，照臨陣先逃斬監候律。上從重擬爲立決。六月，窩藻請仍照本律定擬。上從之。七月，以北省軍務緊要，請欽派科爾沁親王僧格林沁節制山東河南山西陝西四省，以一事權。是月，雲南學政張錫鏞奏請崇祀文宗顯皇帝於大饗殿，以合孝經明堂之義。窩藻偕王大臣等遵旨會議，以考之今制，稽之古禮，事多窒礙，未可依行。上聽之。十一月，疏薦端木埰、鄭珍、莫友芝、閻汝弼、王軒、楊寶臣，經行修明，有體有用。寶臣兼通天算，疏云：臣恭讀上諭，見在中外臣工薦舉賢才，尙不乏人，而山林隱逸，以及未秩下僚，或以德行，或以政事，或以文學，各擅所長，湮沒不彰，殊爲可惜。允宜及時登庸，以副闡門籲俊之典。著京外三品以上各員，並直省學政，悉心訪察，臚舉所長，咨調來京，候旨考試。視其器識，破格錄用，不得視爲具文等因。欽此。仰見皇上典學求賢，敷奏明試之至意。臣竊惟近來考試詞章之學尙多，根柢之學甚少，士不通經，不足致用，而通經之學，義理與訓詁不可偏重。漢儒許慎說文解字，鄭康成詩禮箋注，各有師承，羽翼經傳，厥功甚鉅。歷代名臣碩彥，由此其選。至宋周程張朱數大儒，因注疏以闡明義理學術人心，允足範圍後世。此大學正心誠意之功，必本於格物致知也。後學不察，往往以訓詁專屬漢唐諸儒，以義理專屬宋儒，遂使聖門四科，畫分界限。卽如制藝，代聖賢立言，明季國初，本多經意，而後來流弊，漸就空疏，非立法之不善，乃學術之日歧也。方今聖學初基，屢奉諭旨，釐正文體，整飭考試。臣愚竊謂經術之士，知之者希，亟應先爲表彰，俾士氣文風，有所矜式。亦吏治儲材之亟務也。臣素知寒士中有器識文藝者數人，雖不遠言德行，而由文學以達政事，各有所長，堪資器使。若知而不舉，不特貽蔽賢之譏，實重負朝廷咨訪之意。二年十一月疏云：臣聞國史館循吏

傳。自嘉慶年間編輯後。久未續纂。近年封疆大吏。以此奏請者亦甚罕見。且自軍興以來。徵兵籌餉。幾視吏治爲緩圖。不知地方果得一賢有司。平日弭盜安良。化民成俗。實足以消患於未萌。其曲突徙薪之功。不在敵愾捐軀者下。現在城守陣亡各員。均蒙隨時賜卹。或奉特旨宣付史館。此等地方循吏。功在無形。譽傳衆口。若不及時表彰。致令湮沒。何以昭激勵而勸後來。應請旨飭各省大吏。加意訪查政績官聲。遺愛在民者。奏明。並咨史館編入循吏列傳。以資觀感。臣更有請者。竊見各省州縣。供軍需辦團練。不得不藉資民力。其假公濟私。拂衆斂怨者。無論已。即一二清潔自好者。亦不過詭勉辦公。先其所急。設卡抽釐。方慮聚衆滋事。團練築堡。又虞負固抗糧。救過方且不遑。於民生疾苦。地方利弊。勢更不暇兼顧。苟非至誠之心。兼濟變之才。安能用民財力。而民不怨。故至今日而言循吏。操術爲至難。用心爲更苦也。其已故者。固應特予表揚。其見任者。尤宜急加褒勉。俾得殫竭心力。以衛民生。應請救下中外大臣。保舉循吏。確覈品行。臚列事蹟。奏備簡用。其有伏處之士。潛修力行。堪膺循吏之選者。如確有見聞。亦准一體保奏。並以原任同知劉大紳。按察使李文耕。大順廣道劉煦。循聲卓著。請宣付史館。入循吏傳。直隸任邱縣知縣張光藻。獻縣知縣陳崇砥。知縣王蘭。廣山東知縣蔣慶第。山西徐溝縣知縣程豫。汾陽縣知縣吳輝。祖及江南優貢端木琛。山西舉人秦東來等。請送部引見。均得旨允行。五年卒。晉贈太保。予諡文端。甯藻。好許氏學。其視學吳中。獲景宋鈔本說文繫傳。錢諸版。於是小徐書始行於世。一時游其門者。如安邱王筠。順德苗夔輩。率精研訓詁聲韻。頗篤於故舊。每卹其後人。刻其遺書。欽程侍郎恩澤諸人著作。先後助之付刊。所自撰詩文。曰饒飢亭集。四十四卷。他著馬首農言。勤學齋筆記。

何秋濤

何秋濤。字願船。福建光澤人。道光癸卯舉於鄉。逾年成進士。授刑部主事。廣交遊。博覽傳記。學乃大進。著律心一書。上自呂刑。下至當代律文。貫串一編。書陽邪相國見而奇之。惜臺本爲人所竊。竟不獲傳。時京師言宋學者。倏

文端公。曾文正公。何文貞公。吳侍郎廷棟。邵員外懿辰。丁正中彥傳。言漢學者。何編修紹基。張州判穆。苗貢生夔。及鄉人陳御史慶鏞。言古文者。梅郎中會亮。朱御史琦。王都御拯。馮按察志炳。秋濤專漢學。日與諸人討論。未嘗以門戶標異。其於經史百家之詞。事物之理。攷證鉤析。務窮其原委。而要歸於實用。刑部奉勅撰律例根源。多秋濤所手定。陳御史壇嘗得匿名書。法當燬。疑以相質。秋濤謂軍國重計。宜上聞。援引故事。文詞典贍。陳遂據以入告。其通識如此。秋濤尤精輿地之學。以俄羅斯地居北徼。與我朝邊卡切近。而未有專書以資考鏡。著北徼彙編六卷。繼加詳訂。本欽定之書。及正史爲據。旁采圖理琛而下。以遠西洋文儒略南懷仁輩各家論述。正其舛譌。去其荒謬。首列聖訓御書十二卷。次聖武述略六卷。次考二十四卷。傳六卷。紀事四卷。攷辨合二十卷。次表七卷。末爲圖說一卷。總八十卷。咸豐八年。尙書陳孚恩疏薦秋濤暨郭嵩燾通達時務。曉暢戎機。時秋濤居憂在籍。命先將所纂書籍呈進。九年服闋。入京。文宗覽所著北徼彙編。稱其於制度沿革山川形勢考據詳明。足徵學有根柢。因賜名朔方。備乘召見。後復命賦讀書破萬卷。下筆如有神詩二章。晉官員外郎。懋勤殿行走。旋復以憂去官。咸豐庚申。外寇入京師。書旋散亡。秋濤亦窮困。同治元年卒。客死於保定蓮池書院。年三十九。所著王會篇箋釋三卷。以王氏補注爲本。并取諸家。於訓詁地理考證鉤析。觀者咸服其精博。又有篆隸源流一鏡。精舍甲部稿。其刑部奉勅撰律例根源。亦秋濤在官時創稿云。

黃式三

黃式三。字薇香。浙江定海人。歲貢生。事親孝。父與梧。性端嚴。先意承志。恆得歡心。嘗赴鄉試。母衰。暴疾卒於家。馳歸痛絕。誓不再應鄉試。父老。且臥病數年。衣食饋洗。必躬親之。比歿。持喪以禮。於學不立門戶。博綜羣經。治易。言卦辭。一意相承。六十四卦爻辭。同者亦一意相承。又釋繫辭。傳衰世之意。謂伏羲氏衰而神農作。易之興也。其於中古乎。中古。謂神農也。以此申鄭若神農重卦之義。著易釋四卷。治春秋。作釋教執釋人釋名釋殺盜釋入釋以。

以訂杜預釋例之訛。謂魯春秋一國之史。不赴告不書。孔子修之。不得增史之所不書。傳引列國史文之異者。以備參攷。疑以傳疑。其事不可牽合爲一。必牽合。反害於經也。著春秋釋二卷。尤長三禮。論禘郊宗廟謹守鄭學。論封域井田兵賦學校明堂宗法諸制。有大疑義。必釐正之。其復禮說崇禮說約禮說。識者以爲不朽之作。生平於經說不拘漢宋。擇是而從。恆恐私智穿鑿。得罪聖經。中夜自思。怵然不寐。嘗著論語後案二十卷。謂鄭康成就魯論篇章攷之。齊古爲之注。當時貴之。魏末何平叔之徒。嗜嗜莊老。而作集解以行世。晉宋齊梁。媚佛成俗。聖教不明。其始以儒亂釋。其終遂以釋亂儒。皇疏黜鄭注而宗何。有由來矣。邢氏祇刪皇氏而就簡耳。自朱子注既出。六百餘年之儒說。羣奉正宗。後之人。補輯鄭君之遺逸。考校何氏之異同。各明嫡家。卒未聞有繼漢軼魏。實能駕朱子而上者。則朱子之所得大且多也。雖然漢魏諸說之醇。有存於何氏之解。皇邢之疏。及陸氏釋文諸書。而不可盡廢者。諸經注疏。與子史中雜引經文。及諸說解。有可拾遺而補闕者。元明數百年。遵朱子注。有能發明之。而糾正之者。近日大儒。實事求是。各盡所長。有考異文者。精訓詁者。辨聲類者。稽制度名物者。讓聖賢事蹟者。有考驗身心。辨析王霸。學務見其大者。有不惑於老釋。復明析於儒之近老釋。學務得其正者。凡此古今儒說之薈萃。苟有裨於經義。雖異於鄭君朱子。皆宜擇是而存。因廣收衆說。附以己意。而爲是書。吳縣吳鍾駿上元朱緒曾。皆以爲漢宋持平之著。可垂國寶。他著有尙書啓蒙四卷。詩叢說一卷。詩序說通二卷。詩傳箋考二卷。周季編略九卷。做居集經說四卷。史說四卷。嘗作求是室記曰。天假我一日。即讀一日之書。以求其是。作畏軒日記。讀經而不治心。猶將百萬之兵。而自亂之。蓋自道云。讀史喜文獻通考。而時論定馬氏之闕失。嘗應聘佐軍幕。當路以外寇間。作備外寇議。問者色沮。式三曰。不從此言。數年後必有大寇。事果驗。同治元年卒。年七十四歲。從子以恭。子以周。俱能傳其學。江東稱經師者。必曰黃氏。以恭。字質庭。光緒元年舉人。著有尙書啓蒙疏二十八卷。讀詩管見十二卷。八年卒。年五十四。

劉熙載，字融齋，晚號寤崖。江蘇興化人。少孤貧，力學篤行，讀書指識微，約言屏守，中道光甲辰進士，改庶吉士，授編修。咸豐癸丑，召對稱旨，奉命直上書房，并賜性靜情逸四大字。丙辰，京察一等，記名以道府用。不樂爲吏，請假客山東，授徒自給。久之，湖北巡撫胡林翼延主江漢書院，疏薦其貞介絕俗，學冠時人。同治甲子，徵爲國子監司業，督學廣東，歷遷左春坊、左中允、行部所至，蕭然如寒素，晝乞病歸，襍被篋書而已。卒年六十九。熙載治經，無漢宋門戶之見，如論格物，兼取鄭義，論毛詩古韻，不廢吳棫叶音，嘗讀爾雅釋詁，至卍吾台予，以爲四字能攝一切之音，以推開齊合撮，靡不若矢之貫的。復論六書中較難知者，莫如諧聲，疊韻雙聲，皆諧聲也。許君時雖未有雙聲疊韻之名，然河可疊韻也。江工雙聲也。孫炎以下切音下一字爲韻，取疊韻，上一字爲母，取雙聲，非許君實開之乎。徐注說文字音取孫愔唐韻音切爲定，要之許氏之聲本可爲切，由古人制字，其中本具字母也。苟以許聲加孫韻，皆可爲切，而一切雙聲之字不可以類求乎。因著四音定切四卷，說文雙聲二卷，疊韻二卷，且於音韻小學確抒卓見，外而潔身修行，與宋儒相爲表裏，日有心得，隨筆記載，成持志塾言二卷。又探討古今人詩賦古文詞曲書法經義，深造淵奧，成藝槩六卷。其自著詩文，則總萃爲昨非集四卷，并旁通疇人術，作天元正負歌，用加乘除相消開方諸法。子彙程，遂以算學有聲于時。

陳喬樞

陳喬樞，福建閩縣人。字樸園，一字樹滋，壽祺長子。年十七，舉於鄉。七上春官不第，以大挑分發江西，歷官分宜、弋陽、德化、南城、知縣，署袁州、臨江、撫州、知府。所至以經術飭吏治，喬樞嘗憶左海先生之遺訓曰：吾生平疲於文字之役，纂述忽忽未盡，就爾好漢學，治經知師法，他日能成吾志，九原無憾矣。乃力自奮勉，每簿書之暇，絀繆舊聞，次第勒爲定本，謂凡古文易書詩禮論語孝經所以傳悉，由今文爲之先驅，今文所無，輒廢。如書有歐陽大小夏侯詩，有齊魯韓各守師法，苟能得其單辭片義，以尋千百年不傳之緒，則今文之維持聖經於不墜者，實非淺鮮。

撰今文尙書經說考三十四卷。歐陽夏侯遺說考一卷。魯詩遺說考六卷。齊詩遺說考四卷。韓詩遺說考五卷。魯齊韓毛四家詩異文考五卷。又謂齊詩之學。宗旨曰。四始。五際。六情。皆以明陰陽終始之理。考人事盛衰得失之原。顧先亡。最爲寡證。獨翼奉傳其百一。且其說多出詩緯。察躔象。推厯數。徵休咎。蓋齊詩所本也。詩緯亡。則齊詩遂爲絕學矣。撰齊詩翼氏學疏證二卷。詩緯集證四卷。又謂禮記四十九篇。本出孔壁。及河間獻王所得。皆古文。其後禮家傳授變爲今文。師承各出。傳寫日繁。鄭所政讀。略有四例。而一孔之士。乃以爲鄭好改字。非也。撰禮記鄭讀考六卷。復推其義。撰毛詩鄭箋改字說一卷。別撰禮堂經說二卷。則雜說羣經者也。凡所論列。一時名公碩彥。莫不欽服焉。尙書說最後成。其時宿學漸蕪。微言衰落。而曾文正公見之。獨許以爲可傳。年六十一。卒於撫州官舍。

鄭珍

鄭珍。字子尹。晚號紫翁。貴州遵義人。道光十七年舉人。以大挑二等。選荔波訓導。咸豐五年。叛苗犯荔波。知縣蔣嘉穀病。珍率兵拒戰。卒完其城。苗退告歸。同治二年。大學士祁雋藻薦於朝。特旨以知縣分發江蘇補用。卒不出三年。卒。年五十九。珍初受知於歙縣程恩澤。語之曰。爲學不先識字。何以讀三代秦漢之書。乃益進求諸聲音文字之原。與古宮室冠服之制。方是時。海內之士。崇尚攷据。珍師承其說。實事求是。不立異。不苟同。洞知諸儒者之得失。復從莫與僊游。益得與聞鉅儒宗旨。於經最深。三禮。墨守司農。不敢苟有出入。儀禮十七篇。皆有發明。半未脫稿。所成儀禮私箋。僅有士昏公食大夫喪服士喪四篇。凡八卷。而喪服一篇。反覆尋繹。用力尤深。又以周禮攷工記輪輿。鄭注精微。自賈疏以來。不得正解。說者日益支蔓。成輪輿私箋三卷。尤長於說文之學。所著說文逸字二卷。附錄一卷。說文新附考六卷。皆見稱於時。他著有魯氏圖說。深衣考。汗簡箋。正說隸。樞繭錄。母數錄。世系一綫圖等書。又有業經室詩鈔文鈔。明鹿忠節公無欲齋詩注。而所撰遵義府志古今文獻。蒐羅精密。好古之士。比

之華陽國志。珍嘗謂遵義。漢牂柯也。自郡人尹珍道真從許慎應奉受經書圖緯。教授南域。後無有以經術發聞者。於是以道真自命。而取以爲名。故學成而哀然爲西南巨儒焉。

朱一新

朱一新。字鼎甫。浙江義烏人。同治九年舉人。官內閣中書。光緒二年進士。改翰林院庶吉士。散館。授編修。十一年。充湖北鄉試副考官。轉陝西監察御史。十二年。上遇災修省疏劾。及內侍懿旨詰責。降主事。告歸。二十年卒。年四十九。二十三年。以學政譚彥彬奏。奉旨賞加五品銜。一新生而穎異。四歲與羣兒戲。慮有傾跌者。輒趨掖之。長嗜濂洛關閩之學。務通經以致用。學政徐樹銘亟賞之。受知劉有銘李文田。官翰林時。與袁昶朱采黃國瑾相友善。嘗偕諸友游西山。遇雨感疾。狂言所語。皆民窮財盡。不力求振作。非祇外患。必有內憂。而尤以俄爲慮。聞者咸慨其忠義憤發。法蘭西窺越南。上疏請擊之。嘗畫海防策。謂宜分北洋爲一軍。江浙爲一軍。閩粵爲一軍。治水師。扼險要。儲將才。精器械。興團練。開餉源。而歸於本。求實是而勵人才。時論壯之。及遷臺諫。數上封事。侃侃直陳。惟論是非。不計利害。歸後。兩廣總督張之洞延主廣雅書院講席。院中額取兩廣生監百名。分齋肄業。一新設院規。先讀書而後考藝。重實行而屏華士。仿古韻蒙之學。分經史理文四者。延四分校主之。諸生入賦。以冊記。質疑問難。以次答焉。成就甚衆。因輯其講學之詞。成無邪室答問五卷。其論學術。謂近世漢與宋分。文與學分。道與藝分。豈知聖門設教。但有本末先後之殊。初無文行與學術治術之別。又以道咸以來。士夫好講西漢公羊之學。流弊至於蔑古荒經。因反覆論難。以正其失。謂公羊家多非常可怪之論。西漢大師。自有所受。要非心知其意。鮮不以爲悖理傷教。故爲此學者。稍不謹慎。流弊滋多。近儒惟陳立深明家法。不過爲穿鑿餘多。蔓衍支離。不可究詰。凡羣經略與公羊相類者。無不旁通而曲暢之。即絕不相類者。亦無不鍛鍊而傳合之。憑臆妄造。以誣聖人。二千年來經學之厄。蓋未有甚於此者。至其論西學西教新疆鐵路吉林兵防等數十條。尤爲學識通達。論日本民情浮動。

而狡悍好勝。與西俗同。故西人之親中國。不如其親日。第日之患俄。則視中國尤甚。俄既得庫頁島。勾結蝦夷。爲居高臨下之勢。則日之陸路可危。以海參崴爲泊舟之地。直指長崎。一帆可達。則日之水路可危。故俄之經營海參崴。中國之憂。亦日人之患也。乃不思唇齒輔車之至計。轉爲遠交近攻之狡謀。螳螂捕蟬。黃雀在後。愚亦甚矣。彼惟刻不忘俄。故竭力要結西人。欲爲連橫之計。其變服色易徽號。皆所以媚西人耳。抑知天下惟壤地相接者。利害相同。日處東海。不能爲歐洲輕重。歐美諸國。惟利是視。若有事時。欲如英法之救土耳其。豈可得哉。雖然。當今時勢。既不能閉關自治。則交鄰之道。固不能不講求。日之交鄰。雖云下策。差愈於無策耳。時中日之釁未兆。論者歎其見之遠。又著有奏疏一卷。詩古文詞雜著八卷。京師坊巷志四卷。漢書管見四卷。德慶州志東三省內外蒙古地圖考證。

陳澧

陳澧。字蘭甫。廣東番禺人。道光十二年舉人。河源縣訓導。澧九歲能爲詩文。及長。與同邑楊榮緒。南海桂文耀爲友。復問詩於張維屏。問經學於侯康。凡天文地理樂律算術古文駢文填詞篆隸真行書。無不研究。中年讀諸經注疏。千史及朱子書。日有課程。遂輟作詩。初著聲律通考十卷。謂周禮六律六同。皆文之以五聲。禮記五聲六律十二管。還相爲宮。今之俗樂。有七聲而無十二律。有七調而無十二宮。有工尺字譜。而不知宮商角徵羽。懼古樂之遂絕。乃考古今聲律爲一書。自周禮三大祭之樂。爲千古疑義。今考唐時三大祭。各用四調。而周禮乃可通。以此知古樂十二宮。本有轉調。又據隋書及舊五代史。而知梁武帝萬寶常。皆有八十四調。宋姜夔謂八十四調。出於蘇祗婆琵琶。近時凌廷堪燕樂考原。遂沿其誤。至唐宋俗樂。凌氏已披尋門徑。然二十八調之四韻。實爲宮商角羽。其四韻之第一聲。皆名爲黃鍾。凌氏於此未明。其說亦多不合。且宋人以工尺配律呂。今人以工尺代宮商。此今人失宋人之法。律呂由是而亡。凌氏乃以今人之法駁宋人。尤不可不辨。若夫古今樂聲高下。則有隋志所

載歷代律尺，皆以晉前尺爲比，而晉前尺則有王厚之鐘鼎款識傳刻尙存。今依尺以製管，隋以前樂律皆可考見。宋史載王朴律準尺，亦以晉前尺爲比，又可以晉前尺求王朴樂。求唐宋遼金元明樂，高下異同，史籍具在，可排比句稽而盡得之。至於晉泰始之笛，可仿而造，唐開元之譜，可按而歌，古器古音，千載未泯。又切韻考六卷，外篇三卷，謂孫叔然陸法言之學，存於廣韻，宜明其法，而不惑於沙門之說。又漢志水道圖說七卷，謂地理之學，當自水道始。知漢水道，則可考漢郡縣，湘鄉會國藩見聲律水道二書，服其精博。南海鄒伯奇亦謂所考切韻，超越前人。其於漢學宋學，能會其通，謂漢儒言義理無異於宋儒，宋儒輕蔑漢儒者非也。近儒尊漢儒而不講義理，亦非也。若漢儒通義七卷，晚年尋求大義，及經學源流，正變得失所在，而論贊之外，及九流諸子，兩漢以後學術，爲東塾讀書記，謂孝經爲道之根源，六藝之總會，謂論語爲五經之館錄，謂中庸肫肫其仁，此語最善形容。可據以增成朱注愛之理，心之德之說，爰是肫懇，心德亦是肫懇，論語言仁者五十八章，以愛與心德解之，而稍覺未密合者，以肫懇之意增成之，則無不合。謂孟子所謂性善者，人人之性皆有善，荀楊輩所未知，程朱謂論性不論氣不備，然孟子言性，非不兼氣質，性中有仁義禮智者，乃所謂善，本無不圓備之病。其論治經之法，謂說詩者解釋辨駁，然不可無紬繹詞意之功，謂讀禮者，既明禮文，尤明禮意，而禮意則鄭注最精，謂鄭氏諸經注有宗主，復有不同，中正無弊，勝於許氏異義何氏墨守之學。時惠棟張惠言孔廣森劉逢祿之書盛行於世，禮謂虞氏易注，多不可通，所言卦象，尤多纖巧，惠棟易學有存古之功，然當分別觀之。又謂漢書儒林傳云，費直以象象系辭十篇文言，解說上下經，此千古治易之準的，謂公羊以叔術爲賢者，此公羊之謬，不宜墨守，謂何劭公注，有穿鑿之病，謂孔廣森通義序云，春秋重義不重事，以宋伯姬爲證，然若公羊，不詳記此事，則伯姬死於火耳，何以見其賢？又謂三傳各有得失，知三傳之病，而後可以治春秋，知杜何范注孔徐楊疏之病，而後可以治三傳，三傳注疏之病，動關聖人之褒貶，宜棄其所滯，擇善而從，其論漢以後諸儒，謂魏晉以後，天下大亂，聖人之道不絕，惟鄭學是賴，謂國朝考據之學，源出朱子，不可反詆朱子，嘗曰，吾之書，但論學術，非無意於天下事也，以爲政治由於人才，人

才由於學術。吾之意專明學術。幸而傳於天下。此其效在數十年後。故於論語之四科。學記之小成大成。孟子之取狂狷。惡鄉原。言之尤詳。則意之所在也。其教人不自立說。嘗取顧炎武論學之語而申之。謂博學於文。當先習一藝。韓詩外傳曰。好一則博。多好則雜也。非博也。讀經史子集四部書。皆學也。而當以經爲主。尤當以行己有恥爲主。爲學海堂學長數十年。至老。主講菊坡精舍。與諸生講論文藝。勉以篤行立品。成就甚衆。邵陽魏源著海國圖志初成。中有可議者。禮辯辦之。後源至粵。見而大悅。遂與定交。並改其書。寶應劉寶楠著論語正義。未成而卒。命子恭冕成之。並言當就正於禮。恭冕後寄書至粵道意。光緒七年。粵督張樹聲巡撫裕寬以南海朱次琦與禮。皆青年碩德。奏請哀異。奉旨朱次琦陳澧均著加恩。賞給五品卿銜。八年卒。年七十三。卒後門人請於大吏。祀其主菊坡精舍。所著讀書記已成十五卷。又稿本十卷。遺命名曰。東塾雜俎。他著有說文聲表十七卷。水經注提綱四十卷。水經注西南諸水考三卷。三統術詳說三卷。弧三角平視法一卷。琴律譜一卷。申范一卷。摹印述一卷。東塾集六卷。

黃以周

黃以周。字元同。同治九年舉人。由大挑教職。歷署遂昌海鹽於潛訓導。光緒十四年。以學政瞿鴻禨保薦。賜內閣中書銜。十六年。復以學政潘衍桐保薦。奉旨陞用教授。旋補處州府教授。二十五年卒。年七十二。性孝友。四歲喪母。長而追思不已。事繼母如所生。少傳父式三學。與從兄以恭作經課。互相質。督學吳存義試寧波。以明堂考命題。以周據隋宇文愷傳。謂考工記夏后氏世室堂修二七二爲衍文。存義深賞之。嘗居浙城。聞兵警。以周獨研索經義。積十晝夜。而知孟子夏五十。殷七十。周百畝之異。異在步尺。非在井疆。自謂足破二千年之疑難。其堅銳如此。初治易。著十翼。後錄治羣經。著讀書小記。而三禮尤爲宗主。以爲三代下經學。鄭君。朱子爲最。而漢學家破碎大道。宋學家棄經臆說。不合鄭朱。何論孔孟。因守顧炎武經學卽理學之訓。以追討孔門之博文約

禮。其考帝王禮典。務在求通以告。後聖可行。如後世不明報祀立廟之典。說之曰。劉歆云。天子七廟。七者。其正法數。可常數者也。宗不在此數中。宗。變也。苟有德則宗之。不可預爲設數。故周公爲無逸之戒。舉殷三宗以勸成王。劉氏此說甚明。蓋殷三宗。周成宣後。世宗其德。別立廟以報祭之。凡報必有廟。特不在宮纓左。與正廟並爾。展禽言虞報墓。夏報杆。商報上甲微。周報高圉太王。竊謂三宗祖甲。亦商之所報也。姜嫄亞圉成王宣王。亦周之所報也。魯頌閟宮。毛傳以爲先妣姜嫄之廟在周。左傳敬忘高圉亞圉。賈逵服虔。以爲周人不毀其廟。而報祭之。王子朝之亂。單子盟百官於平宮。杜預以爲平王廟時尙在。則成王宣王亦必有宮矣。又如舊說。誤指饋食爲時享禮。說之曰。周官大宗伯。分肆獻裸饋食時享爲三等。禮經特牲少牢。皆以饋食名篇。非時享矣。士虞禮云。孝子某哀薦禘事適爾皇祖某甫。以饗。祫事於皇祖。歲事者。祫事也。以薦歲事於皇祖。告卽特牲禮。告以適爾皇祖之義。則特牲少牢饋食。爲薦禘事也。明矣。自注疏不以饋食爲祭名。編禮家遂以此爲大夫土之時祭禮。而天子時享。據此爲例。則天子饋食禮遂失。而時享一日歷七廟。反有日力不足之疑矣。時享之禮。殺於饋食。鄭注以饋食當時享失之。時享日享一廟。而七廟之牲可同日視之。祭後有繹爲饋食時享無繹。又如詳考明堂封禪之制。則曰。封禪古禮也。自漢人侈其志。後世莫敢舉。明堂古制也。自漢人侈其事。後世莫敢行。皆議禮者之失也。詳考學校選舉之制。則以古學校必升土而斥。漢以後。學校不升土之弊。以古鄉舉里選。在學校賢能。皆有學之人。而斥漢以後選舉不由學校之弊。凡此類皆務告古禮可行。初讀秦蕙田五禮通考。病其吉禮好難鄭。軍禮太阿。鄭因著禮說略後。乃放戴君石渠奏議。許君五經異義。爲禮書通故一百卷。凡敘目四十九。閱十九年而後成書。自敘稱高密箋詩而屢易。毛傳注禮而屢異。先鄭識已。精通乎六藝。學不專守於一家。是書之作。竊取茲意。論者謂其博學詳說。去非求是。足以窺見先王制作之譚奧。比秦蕙田書。博雖不及。精或過之。又以經有訓詁。所以明經而造乎道。

也。乃仿儀徵阮元性命古訓。廣爲二十四目。著經訓比義三卷。論者謂陳北溪字義。墨守師說。戴震孟子字義疏證。專難宋儒。是書詳引諸經各注。異於陳戴之自立一幟。有益後學。生平以明經傳道爲己任。辨虛無。辨絕欲。而以執一端立宗旨爲賊道。鎮海胡洪安悅象山之言。與以周縱言義禮。以周曰。經外之學。非所知也。江蘇學政黃體芳。聘主南菁講舍。凡十五年。又兼課寧波辨志精舍諸生。經成就甚衆。晚以子思承孔聖以啓孟子。著子思子輯解七卷。舉子思所述夫子之教。必始詩書而終禮樂。及所明仁義爲利之說。謂其爲傳授之大旨。書成。年六十九矣。他著有軍禮司馬法攷徵二卷。傲季雜著二十二卷。黃帝內經九卷。集注九卷。

潘祖蔭

潘祖蔭。字伯寅。號鄭盦。江蘇吳縣人。祖世恩。官太傅武英殿大學士。道光二十八年。祖蔭以世恩八十賜壽。賞舉人。咸豐二年。一甲三名進士。授職翰林院編修。四年二月。充國史館協修。四月。世恩遺疏上。奉旨以侍讀候補。六月。充實錄館纂修。六年正月。充功臣館纂修。三月。充會試同考官。五月。補侍讀。九月。充咸安宮總裁。十一月。詔在南省房行走。宣宗成皇帝實錄成。奉旨遇缺題奏。即行陞用。十二月。充文淵閣校理。以捐備軍餉。賞戴花翎。四月。署日講起居注官。閏五月。授侍講學士。八年四月。英人窺天津。上疏請戰。六月。充陝甘鄉試正考官。尋疏請酌加旗兵放款。以固巡防。下戶部議行。十月。回京。署國子監祭酒。十二月。轉侍讀學士。九年三月。早上詣黑龍潭禱雨。有廣開言路之奏。九月。補日講起居注官。大考二等。賞文綺。十二月。授大理寺少卿。十年三月。因湖南舉人左宗棠襄理巡撫駱秉章戎幕。有齟齬之者。祖蔭三疏密保。有云楚南一軍。立功本省。援救江西湖北廣西貴州。所向克捷。固由駱秉章調度有方。實由左宗棠於地形阨塞險要。瞭如指掌。故賊縱橫數千里。皆在宗棠規畫之中。是國家不可一日無湖南。即湖南不可一日無宗棠也。見在賊勢披猖。東南蹂躪。兩湖亦賊所必爭之地。仰懇天恩。飭下會國藩駱秉章胡林翼。酌量任用。庶於湖南及左右鄰省。均有裨益。旋奉旨左宗棠以四品京堂。隨同會國

藩襄理軍務。又有四川軍務宜籌防禦之奏。四月。疏陳救時八策。並團練章程十二條。八月。駕幸木蘭。上疏切諫。十一年八月。署宗人府府丞。十月。與議文宗顯皇帝郊祀大禮。偕太常寺卿許彭壽疏言。臣伏讀大行皇帝聖製甲寅孟夏詣齋宮卽事成什未句。以後無須再變更。注云。天壇配享。以三租五宗爲定。永不再增配位。已見庚戌之旨。恐後代無知。故違朕旨。則儀文太煩。又有變更。故未句云。聖製詩恭懸齋宮。永垂法守。臣等誦維之下。仰見大行皇帝言法行則。至當至精。初非博謙讓之虛名也。臣等久值內廷。仰瞻聖藻。足爲千古定評。何期弓劍未寒。頓生異議。爲臣子者於心何安。伏乞皇上本繼志述事之誠。盡每親養志之道。將王大臣會議及載垣陳李恩黃宗漢各摺。一併交大臣敬謹會議。從之。又應詔陳言疏云。伏見皇上迴鑾之後。首斥奸佞。綱紀一新。朝野臣民。額手相慶。臣世受厚恩。何敢安於緘默。謹就構昧之見。爲我皇上陳之。一曰勤聖學。夫典學之教。三代所同。周成以史佚爲師。漢昭有章賢之教。降而東漢。桓焉桓郁。入授帝經。史冊流傳。侈爲盛美。故宜首擇耆德重臣。如翁心存。倭仁王茂蔭者。時加延訪。以資矜式。國朝向有日講之制。大行皇帝初政。曾國藩會疏請行之。今請救下部臣。酌議變通康熙舊制。並於翰林中選擇數員。日備顧問。歲月漸靡。養成聖德。正本清源。莫先乎此。一曰求人才。保國之道。得才爲先。多事之秋。用人尤亟。方今理兵理餉。動有乏人之憂。惟楚南一隅。得人爲盛。要由會國藩駱秉章。胡林翼提倡。以此而論。天下大矣。何才蔑有。臣愚謂宜令在廷大小諸臣。各抒所見。各舉所知。廣開言路。毋拘常例。果有學識超羣。名實兼副者。破格錄用。夫使拘成格以求英俊。是反鏡而索照也。戒傲倖而絕言事。是懲羹而吹蘆也。且自載垣等數年用事以來。內外臣工。未有一疏劾其罪者。遂日長其跋扈不臣之氣。其餘臺諫章疏。大率毛舉細故者居多。今請嗣後所有封奏。卽賜批發。其不足採擇者。立予擲還。庶委瑣之談。不敢上瀆。而伉直之氣。得以稍申。臣下所受者虛名。國家所收者實效。不亦可乎。一曰整軍務。今天下之亂日亟。而軍事之弛日甚。則事權不一。軍法未彰之故也。朝廷命將不下數十人。或已闕於穴中。或猶觀於壁上。各分畛域。坐失事機。臣愚以爲宜設經略。節制各省。如嘉慶年間辦川楚故事。至若失事者。自江浙兩省統兵大員張玉良李定泰等。未嘗顯

戮人有玩心。甚或如張玉藻者。逃脫經年。未聞就獲。朝廷之法將何所施。嗣後凡臨陣逗留。城池失陷者。立正典刑。庶人知警畏矣。一曰裕倉儲。國本以足食爲先。今盜賊外訂。倉儲內罄。一旦乏食。可爲寒心。畿輔不足自食。宜急籌採買之法。見在湖廣漸就肅清。已可耕種。廣東上海寧波福建各海口。道途通順。宜廣設方略。招集商人。當於天津設立收米局。派員董其事。俟飛芻輓粟。水陸壺集。然後徐平其價。如經費無出。權開米捐。照戶部捐輸例。再減一成。庶幾偏僻咸來。可以集事。一曰通錢法。自咸豐四年。改用大錢後。錢法益壞。戶部鑄當十錢。僅行都城之內。鼓鑄累年。徒耗經費。至使銀價消長。什一相懸。官號奸商。浮開虛票。近復改行私票。而銀價雖落。錢價不增。夫既無當十之用。而存當十之名。無以利民。適以病國。臣愚以爲宜復制錢。與大錢並用。大錢又不可即廢。每緡用制錢十之七。用大錢十之三。俟一年以後。大錢漸盡。乃專用制錢。一面令戶部採銅精鑄。一面令順天府尹督京縣官。嚴諭各鋪。力平物價。庶幾上下交濟。而錢法可修矣。復陳時務四事。一免各省之錢糧。以蘇民困。一汰釐捐之名目。以紓民力。一嚴行軍之紀律。以拯民生。一廣鄉會之中額。以收土心。疏劾候補鹽運使金安清。在江北辦理釐捐。大爲民害。尋覈金安清職。又以各省設立團練大臣。辦理無效。請分別裁撤。以一專權而節糜費。如所請行。同治元年正月。遷光祿寺卿。二月。兼署都察院左副都御史。先是。上諭南書房上書房翰林院等。將歷代帝王政治及前史垂簾事蹟。擇其可爲法戒者。據史直書。簡明注釋。彙爲一冊。至是年三月書成。祖蔭等表進。賜名治平寶鑑。有文綺之賜。六月。因陝西營務廢弛。疏劾副將張維義總兵閻丕敏提督孔廣順等罪狀。以聞。又以陝西回匪械鬪起事。拘留督辦陝西團練大臣張芾。殺斃武弁。巡撫瑛榮不能聲罪致討。徒以粉飾了事。一誤再誤。將爲雲南之續。請命將如多隆阿者。以剿甘肅撒匪爲名。亟由潼關商維兩路進剿。劾署淮揚鎮總兵龔耀倫縱寇肆掠。請旨查辦。時捻匪披猖。安徽山東江蘇河南四省尤甚。祖蔭奏請於徐州四界司。添設重鎮。以制之。略曰。伏查安徽之賊。蒙城池西而南數百餘里。多爲賊巢。而大股屯聚。則在宿亳太和靈璧一帶。其地西界河南。北界江蘇。是安徽之邊境也。山東之賊。匪類紛雜。嘯聚劫掠。出沒無常。不獨曹濮之間。鄰於直隸河南者。叢生姦宄。其

沿海則曰青曰萊。其在山則曰蒙曰泗。而賊勢尤熾之處。厥惟沂郡之西。兗郡之東。其南界江蘇者。山東之邊境也。河南之地。其界於山東江南者曰陳州。曰歸德。而賊蹤之往來。賊壘之屯集。則虞城夏邑永城之東。履錯而踵接焉。是河南之邊境也。江蘇之地。徐州一屬。實界三省。賊之竄匿海沭者。其餘餘耳。若邳州。若蕭碭。則狼跳其穴。而虎負其隅也。是江蘇之邊境也。夫統計四省。而賊之所據邊境最多。是由封疆大吏。未忘畛域之心。致使草澤奸民。日長蔓延之勢。賊之出掠。名曰裝旗。任其所之。而被掠遂爲習見之事。賊之歸巢。名曰回哨。聽其自反。而賊巢儼如化外之鄉。勢必舉數省交錯之地。委而棄之。使賊得而蹂躪焉。盤踞焉。且紛歧而錯出焉。而鄰省州縣。止爲護卸之謀。邊境防兵。徒作送迎之計。揆茲積弊。有由來焉。且夫團練之法興。而械鬪抗糧之案踰時疊出矣。堅壁之議建。而分疆畫界之圖立。塞爭雄矣。招撫之策施。而陽奉陰違之患乘機竊發矣。近來東省皖豫圩寨皆成。其顯踞爲賊巢者。固無論矣。至如江蘇徐屬境內。圩寨頭目。類多恣睢自專。通賊藐官。截遏行旅。驕蹇跋扈。無所不爲。不於此時畫策以制之。臣恐陰懷巨測。據有事權者。馳一介之使。要結而迫脅之。奉其號令。恃其聲援。一旦有變。固東路咽喉之慮。亦中原心腹之憂也。臣聞方今剿匪。僧格林沁一軍。督戰最爲得力。捻逆畏威。往往望風納款。受降之後。給與免死大旗。及至兵退。而焚掠如前。地方官莫敢過問。見如鄒縣鳳凰山一帶之匪。既降復叛。將山口堵塞。擁衆數萬。劫掠公行。名爲就撫。其實緩兵。此其明證也。是卽轉撫爲剿。而歲月遷延。餉需糜費。事機更變。精銳摧殘。臣不知一戰之勝。賊被芟夷者幾何。而一日之間。民被裹脅者幾何。曠日持久。庸有濟乎。臣舊聞徐州府屬。地當孔道。設有四界司一官。彼固未秩微員。據四縣之衝而名之耳。竊見徐州一郡。實爲四省交衝。擬請添設四界鎮總兵一員。四界分巡兵備道一員。凡四省沿邊州縣。悉歸管攝。其駐紮之所。必酌乎四界之中。其餉由四省籌辦。其兵由四省酌撥。抑或自行招募。務使糧足兵強。克爲重鎮。然後責以辦賊。來者拒之。過者遏之。四界之內。有警則救之。四界之外。乘便則攻之。與以專制之權。卽重以守邊之罰。並合界內外寨圩。聽其節制。或更選各寨頭目之子弟。置之軍中。量能委用。羈縻駕馭。必惟其宜。庶諸路有進擣之軍。而衝要有控扼之鎮已。方

今四省撥兵甚難。查有田在田一軍。素在徐屬屯紮。田在田統兵無律。畏葸居心。曩時捻匪出巢。田在田名爲巡剿。其實避道而趨。今春檢匪竄擾清淮。田在田行至宿遷。並未見賊。欲進城圩。居民防守甚嚴。不能縱掠。竟敢開槍攻圩。踏毀宿遷縣官坐轎。搶奪守城將弁器械。田在田並不查究。所統兵勇。又多係徐宿之人。與賊潛通。是不獨虛糜軍餉也。卽有制寇之兵。而田在田一軍。在彼牽掣擾亂。勢必無功。相應請旨將田在田從嚴查辦。按其見統兵數。加以挑選淘汰。作爲四界鎮主。兵其有不足。再由四省酌撥。方今將才難得。時會難稽。擬請敕下兩江總督會同藩保送文武幹員。並會同署漕運總督吳棠暨四省巡撫妥速具贖章程。又因楚軍近徧金陵。請嚴通州靖江泰興等處江防。劾浙江金衢嚴道江允康西安縣知縣丁壽辰劣蹟。爲蘇常殉難紳民援案請卹。天津通州一帶。疫氣流行。請照乾隆道光年間諭旨。敕下直隸總督順天府尹五城御史。遵照舊章。妥爲辦理。七月。充山東鄉試正考官。十一月。奏劾陝西布政使毛震書擁兵騷擾。索賄貪婪狀。以直隸總督文煜持祿養交。事多坐廢。請旨早予罷斥。另簡重臣。以慎畿防。疏薦前任提督鄭魁士傅振邦。已革副將吳再升。請旨起用。又以欽差大臣勝保驕蹇不法。列狀請旨查辦。二年正月。署宗人府府丞。四月。以江南郡邑漸就蕩平。奏請酌減賦額。會江蘇巡撫李鴻章。亦以入奏。部議蘇松太三屬三分減一。常鎮二屬十分減一。三年三月。補都察院左副都御史。七月。署工部右侍郎。兼管錢法堂事務。四年三月。恭親王被劾獲譴。奉旨會議。祖蔭覆奏云。毀譽之言。聽者必察。家庭之事。人所難爭。恭親王自議政以來。各固難辭。功原足紀。重臣進退。關繫安危。尙祈持平用中。熟思深計。察其悔過。酌予轉圜。庶不素黜陟大綱。滋天下後世之惑。五月。山東曹州一帶。捻逆披猖。奏請由上海運解火器。以資攻剿。十一月。署禮部右侍郎。稽察西四旗覺羅學。五年三月。署刑部右侍郎左侍郎。十二月。補工部右侍郎。兼管錢法堂事務。六年四月。派查勘稻陵工程。七年三月。署吏部左侍郎。閏四月。調戶部右侍郎。兼管錢法堂事務。恭進篆寫說文藝文備覽各四函。賜文綺。十二月。充經筵講官。八年。轉左侍郎。兼管三庫事務。九年十月。充武鄉試副考官。十一月。署吏部右侍郎。以捐備軍餉。賞正一品封典。十年正月。充會試知貢舉。九月。充武會試副考官。十一年。穆

宗毅皇帝大婚禮成。賞頭品頂戴。十二年三月。上謁東陵。充隨扈大臣。尋以戶部行印遺失。部議革職留任。六月。署吏部左侍郎。八月。充順天鄉試副考官。十二月。以中式舉人徐景春試卷文理荒謬。部議降二級調用。奉旨改爲革任。十三年正月。賞翰林院編修。仍在南書房行走。六月。因報效銀兩。詔開復革職留任處分。以三品京堂候補。十月。慈禧皇太后四旬萬壽。恭進賦冊。命以侍郎候補。光緒元年三月。授大理寺卿。八月。署禮部右侍郎。二年正月。署刑部右侍郎。四月。補禮部右侍郎。八月。署工部右侍郎。兼管錢法堂事務。九月。充玉牒館總裁。十月。充武鄉試正考官。三年。充武會試正考官。四年五月。調戶部右侍郎。兼管錢法堂事務。管理三庫事務。七月。派稽查十七倉。九月。充寶錄館副總裁。十二月。復充經筵講官。署工部右侍郎。兼管錢法堂事務。五年正月。轉左侍郎。擢都察院左都御史。三月。遷工部尚書。穆宗毅皇帝孝哲毅皇后奉安惠陵禮成。賞加太子少保銜。管理溝渠河道。四月。遵議吏部主事吳可讀遺疏。請豫定大統之歸。偕尚書徐桐翁同龢疏云。閏三月十七日。發下主事吳可讀一摺。臣等謹赴內閣公同集議。竊思吳可讀所陳豫定大統。此窒礙不可行者也。我朝家法不建儲。此萬世當謹守者也。臣等恭摺同治十三年十二月懿旨。於皇子承嗣一節。所以爲統緒計者。至深且遠。聖諭煌煌。原無待再三推闡。今吳可讀既有此奏。而懿旨中復有即是此意之諭。特命廷臣集議具奏。若不將聖意明白宣示。恐天下臣庶。轉未能深喻慈衷。臣等以爲宜申明列聖不建儲之彝訓。將來皇嗣蕃昌。默定大計。以祖宗之法爲法。即以祖宗之心爲心。總之。紹膺大寶之元良。卽爲承繼穆宗毅皇帝之聖子。揆諸前諭。則合準諸家法。則符使薄海內外。咸識然於聖意之所在。則詒謀久遠。億萬世無疆之業。實基於此。疏存毓慶宮。是月。調刑部尚書。十一月。穆宗毅皇帝實錄聖訓全書告成。賞加一級。六年三月。署工部尚書。九月。命偕惇親王醇親王翁同龢條陳善後五事。一曰練兵。一曰簡器。一曰開鑛。一曰造船。一曰籌餉。八年八月。署禮部尚書。十一月。命在軍機大臣上行走。九年。丁父憂。十一年四月。服闋。命署兵部尚書。仍在南書房行走。八月。充順天鄉試正考官。尋遵議江西學政陳寶琛奏請。以故儒黃宗羲顧炎武

從祀文廟。祖蔭履疏云。臣等謹按從祀之典。古無所見。禮記文王世子。凡學春官釋奠于其先師。秋冬亦如之。又凡始立學。必先釋奠于先聖先師。鄭元注。先聖周公。若孔子。先師漢禮有高堂生。樂有制氏。詩有毛公。書有伏生。此爲言從祀之始。漢魏以還。闕焉未舉。唐貞觀二十二年。詔左邱明二十二座。春秋二仲。行釋奠之禮。繼遂以周公配成王。而以孔子爲先聖。此爲定從祀之始。推原事始。蓋本樂祖瞽宗之義。凡從祀先聖者。皆博士弟子所從承學。轉相授受之本師。沒則各以其師附祀。所謂將習其道。必各祭其師。證諸古誼。斯爲最合。濂洛諸賢。挺生宋代。卓然爲世大師。元明以來。疊爲增祀。亦因土習其教。故以崇德爲報功。追契始初。並非相悖。厥後請祀紛紛。無關茲義。我朝禮教昌明。動循古法。道光九年。特旨不准李容從祀。蓋懼空談心性者。冒越其間。實與唐人創始之心。若合符節。臣等遠遵其義。近稟聖謨。謹覈黃宗羲顧炎武之生平。及素所服習。該故儒之遺書。竊謂宗羲炎武。皆有傳經之功。衛道之力。崇正遏邪之實效。敢舉其合於從祀之誼者。條列上聞。我朝文治昌明。經師輩出。諸經各有專家。專家各有疏義。精研小學。淹黃羣經者。尤難指數。蓋自三代以來。經學至國朝而極盛。而上溯淵源。並推至黃宗羲顧炎武而止。卽至辨書古文之僞。發古韻之微。深通天算。博稽地理。凡樸學之專門。皆二儒之遺緒。迄今著述。炳在人寰。傳授既繁。淵源有在。是凡讀其書。習其言者。皆以二儒爲轉相授受之本師。故道光年間。京朝各官。特建顧炎武祠於京師。春秋祀事。直省學人。咸爲執事。迄今不絕。蓋亦未有之創舉矣。臣等以爲人心所在。卽定論所憑。各省名臣。遠官。實不乏人。何以獨祀該故儒。此卽所謂將習其道。必各祭其師。皆發於人心之不自覺。臣等準之古誼。以爲黃宗羲顧炎武當從祀者。此其一。然僅合古誼。而或乖今制。臣等亦不敢妄請。伏讀道光九年。宣宗成皇帝聖訓。先儒升祔學宮。祀典至鉅。必其人學術精純。經綸卓越。方可以俎豆馨香。用昭崇報。咸豐年間。議准從祀先儒。應以闡明聖學。傳授道統爲斷。臣等查黃宗羲編定明儒學案。綜二百年學術升降之原。會通融貫。雖出自戴山。而於姚江未派。痛予斥絕。故河東姚江。兩得其正。創修宋元學案。條分派別。祇斥邪而崇正。不伐異而黨同。其稱朱子謂致廣大。盡精微。綜羅百代。推挹可云極至。顧炎武不立講學之名。而有蹈道之實。

其論學之旨。謂聖人之道。曰博學於文。曰行己有恥。又謂今之理學。禪學也。不取之論語五經。而但資之語錄。不知本矣。故所學一以肫篤精實爲主。而無囂張之氣。門戶之私。至推崇朱子。其所著日知錄。皆可覆按。夫亦足以當學術精純之目矣。然猶未證諸實效也。明季心學盛行。顏山農何心隱。李贄之徒。標目狂禪。蕩無禮法。細行不矜。束書不觀。學術既壞。國運隨之。黃宗羲排斥其根株。顧炎武痛絕其支蔓。自二儒興。而禪學息矣。禪學息。而樸學起矣。絕續之交。固由國運之隆。亦該故儒教渾之力。所謂闡明聖學。傳授道統者非與。至於經綸卓越之稱。二儒皆以經濟交推。特以身丁未造。心在勝國。自不能奮跡聖朝。各抒偉略。如顧炎武。日知錄所載。正定之轄五州二十七縣。蘇州之轄一州七縣。而蘇州之糧三百三萬八千石。正定之糧止一十萬石。王者則壞成賦。豈有大小輕重之不同若此者。後之王者。審形勢以制郡縣。則土田以起。徵科乃平。天下之先務。此即刻聖滅定。碎糧。及增設直隸州。改併州縣之議。其他鑒明人之失。開我朝之法者。不可枚舉。而肇域志宅京記諸書。具有深意。尤非僅輿地之學。蓋與宗義明夷待訪錄。同爲經濟家必資之書矣。夫空言經濟。能欺一時。而不能垂之後世。至傳之二百餘年。而讀者尤思取法則。其非空言經濟可知矣。臣等準之今則。以爲黃宗羲顧炎武當從祀者。又其一。凡若此而無列聖之定評。猶未敢遽定也。黃宗羲顧炎武經四庫著錄之書。原案已經詳列提要。襲許之語。學者無不周知。臣等勿庸復爲引敘。惟欽定國史儒林傳。於黃宗羲傳內。稱其上下古今。穿穴羣言。自天文地志。九流百家之教。無不精研。於顧炎武傳內。謂其斂華就實。扶弊救衰。又謂國朝學有根柢。以炎武爲最。如謂四庫提要中有一二糾正之語。遂即疑議。此正不然。提要爲敘錄之體。意在解題。係專爲一書而發。非是統論全學。譬如詩有正變。書有真僞。而至今並尊爲經。未嘗有所偏廢。遠者無論矣。臣等即就國朝之得從祀者言之。如陸世儀思辨錄。提要則謂其不免迂闊。陸隴其向學錄。提要則謂其過於主持。孫奇逢四書近指。提要則謂其不免高明之病。至張伯行所著理學各書。斥入儒家存目。一字不登。向使當時禮臣必據提要之辭。以爲論定。則陸世儀即不應俎豆於兩廡矣。湯斌國朝從祀之儒之至純至正者也。而推黃宗羲之辭曰。黃先生論學。如大禹導水導山。脈絡分

明。吾黨之斗杓也。其與顧炎武書。謂吾道之衰久矣。得大力闡明。豈非斯人之幸。茲數語者。苟非宗羲炎武。孰敢當此。苟非湯斌深知宗羲炎武。亦何能發此。況湯斌在史館。得黃宗羲一書。謂宋史道學傳。乃元人之陋習。遂示於萊而去之。其志同道合。可略見矣。聖主之評如此。賢臣之評如此。幾乎無所致疑矣。此臣等準之成憲。以爲黃宗羲顧炎武當從祀者又其一。以上三端。容有未盡之語。而初無溢美之詞。俎豆馨香。洵無愧色。乃者。禮臣具稿。力從駁議。臣等實不敢苟立異同。亦不敢隨事附和。卽如陳寶琛疏中。有宗羲與於前。炎武繼於後二語。查二人。生既同時。初無先後之分。學又異派。更無倡繼之說。該學政措詞偶誤。臣等亦不曲爲之諱。然因此謂其不明學術。因並斥其所請之人。固不可也。臣等稽之古訓。求之輿論。以爲該故儒之從祀。實順人心而不違成例。況我皇上。緝熙典學。正當審辨學術。以風示天下。將因以求所謂師以賢得民。儒以道得民者。以爲治天下之本。是該故儒從祀之典。似亦繫平時政。而非徒滋論議者矣。臣等公同商酌。擬請旨准將黃宗羲顧炎武。從祀文廟。儻因祀典重大。未能驟定。應請旨敕下大學士六部九卿翰詹科道。再行詳議具奏。部議格不行。十一月。補工部尚書。十二年二月。上奉慈禧皇太后謁東陵。充隨扈大臣。十月。充會典館副總裁。十二月。管理溝渠河道。十三年四月。充管理八旗官學大臣。九月。兼理順天府尹事務。議增建貢院號舍。十四年。署戶部尚書。復管理溝渠河道。十五年正月。慈禧皇太后歸政屆期。交部議敘。是月。皇上下婚禮成。賞加太子太保銜。並加二級。三月。充會試副總裁。七月。充順天鄉試監臨。時浙江水災。奏請由順天府撥賑銀各一萬兩。捐廉爲本籍助賑。十六年六月。順天二十四州縣水災。偕府尹陳彝箴放義賑。疏請擇地添設粥廠。以便附近災民就食。並懇欽派三四品京堂。分駐稽察。彈壓監放。八月。以順屬飢民衆多。轉瞬嚴寒。生路更窘。奏請更賞給米石。九月。奏大興縣境添設粥廠兩處。冬春賑務。爲日方長。請撥銀米。以資要需。十月患病。猶疏請撥銀米以備冬撫之用。均如所請行。旋以疾甚請假。越三日卒。祖蔭自任侍郎後。鄉試覆試閱卷十三次。會試覆試朝考散館閱卷各七次。殿試讀卷四次。考試試差優貢朝考閱卷各四次。拔貢朝考閱卷二次。考試御史閱卷六次。考試學正學錄漢廩生閱卷各一次。考試漢教習閱

卷二次。考試孝廉方正。閱卷五次。考試漢曆錄。閱卷三次。遺疏上。晉贈太子太傅。予諡文勤。十七年。直隸總督李鴻章奏。寶坻縣紳士前湖南衡永郴桂道方學蘇等呈稱。去歲大水爲災。數十年所罕見。寶坻地居窪下。受惠尤深。原任工部尙書兼管順天府府尹潘祖蔭。一聞災信。先行撥款。飛飭印委。辦理急撫。內則瀝情入告。外則函電四馳。爲民救災。無微不至。本屆待賑人數。倍於往時。飢者給食。寒者授衣。全活甚衆。秋冬以來。屢傳該紳等詳詢賑事。形神顛頓。若疾痛之在身。竟以積勞一病不起。聞信之日。士民相弔。若喪其私。感人之深。實難泯沒。今擬集資爲故兼尹潘祖蔭建立專祠。由地方官春秋致祭。以申報饗。臣維去歲被水以後。屢接兼尹臣潘祖蔭來函。言及災況。憂勤之意。流溢行間。心竊敬之。身後檢其遺牘。手寫告災乞賑之書。多至千數百件。病中喃喃。皆言賑務。揆之禦災勤事之義。洵爲無愧。詔如所請。祖蔭幼好學。涉獵百家。尤喜搜羅善本書。金屬碑版之屬。於經。通公羊春秋。爾雅。於史。通范氏後漢書。同光間。承襲魏餘風。今文經學盛行。許鄭之誼。遂微。祖蔭益從而左右之。惟生平絕少著述。除所刊滂喜齋叢書。問存并世通儒遺著。自撰祇攀古樓彝器款識。秦輶日記等零星小品而已。

王先謙

王先謙。字益吾。湖南長沙人。初學爲古文詞。師曾文正。已益泛濫羣籍。頗識制度名物。同治乙丑成進士。散館授編修。歷官國子監祭酒。督江蘇學政。踵阮文達後。輯刊續皇清經解。凡二百十種。一千四百三十卷。雖不如文達之精萃。而有清一代經師經說。無賴以傳。又仿姚姬傳編續古文辭類纂二十八卷。亦嚴謹有義法。王湘綺嘗謂之曰。經解縱未能抗行芸臺。類纂差足以比肩惜抱。在蘇數年。多延通儒主南菁書院。造士甚衆。自蘇學還朝。即謝病歸。爲城南書院院長。撰述愈富。治經循乾嘉遺軌。重考證。而小學頗疏。惟尙書孔傳參正。辨析詳確。比他書爲醇。復用考據校讎諸史地志。蓄集羣言。成漢書補注一百卷。水經注合箋四十卷。獨荀子集解二十卷。用高郵王氏讀書雜誌例。取諸家校本。參稽考訂。補正楊注。凡數百事。可謂蘭陵功臣。岑春萱撫湘。上所著書。得旨嘉獎。

晉內閣學士。陳寶箴徐仁鑄等初建湘學。先謙與讎不合。屢書讓之。光緒己酉。乞糴變起。兩湖總督瑞澂疑其所主。奏劾免職。旋卒。別有天命以來十朝東華錄若干卷。虛受堂詩文集若干卷。

學術 藝事

額爾德尼

額爾德尼。世居都英額。姓納喇氏。太祖時來歸。隸滿洲正黃旗。賜號巴克什。每從上征蒙古諸部。能因其土俗語言文字。傳宣詔令。招納降附。天命三年。取撫順。師還。明總兵張承蔭自廣寧糾眾追躡。額爾德尼與諸將還擊。敗其眾。斬承蔭。敘功授男爵。初己亥二月。額爾德尼奉命與理事大臣噶蓋。創立國書。噶蓋以蒙古字傳習已久。難以更製。上曰。我國之語必譯蒙古爲語讀之。則未習蒙古語者。不能知也。奈何以我國語製字爲難。反以習他國語爲易耶。今以蒙古字。合我國語音。聯綴成句。即可因文見義矣。會噶蓋以事伏法。額爾德尼獨任擬製。奏上。裁定頒行。國書傳布自此始。額爾德尼既卒。太宗復命儒臣達海庫爾禪等述其義益之。順治十一年。追諡文成子薩哈連。官至鑾儀衛冠軍使。攻入大學士希福族中。賜姓赫舍里。

喻昌

喻昌。字嘉言。別號西昌老人。新建人。崇禎中。以選貢入都。上書欲有爲。無所就。順治初。常熟錢謙益數至邑中。結廬虞山之麓。昌少時遇異人授內養法。遂終身不臥。明禪理。兼善黃白術。弟子有欲得其術者。昌曰。吾誓以濟世不己私。尙未能免大譴。不天殛。卽無後。汝願天殛乎。無後乎。二者居其一。乃可授。弟子聞而懼。不復請。人或疑爲託詞。然喻昌實無子。昌精醫藥。所至活人。尤能恤貧苦。嘗於藥籠中預貯白金。三星或四五星。有來就醫者。輒語

之曰。歸家須自檢點。乃可煮也。其人如其言。每得金。其金即黃白術成之也。聞其煉時。掌火者皆隔以壁。於穴中運扇。不令一人見。然亦不常煉也。煉亦不過數十金而止。一日。錢謙益赴親朋家宴。肩輿歸。過迎恩橋。輿夫蹉跌。謙益驚。忽得奇疾。立則目上視。頭翻柱於地。臥則否。診治不效。時昌適往他郡。亟遣僕邀歸。問致疾之由。曰。易治耳。因命輿夫強有力善走者。數人來。命飲以酒飯。然後命分列庭之四角。先用兩人夾其主疾趨。自東則疾趨之西。自南則疾趨之北。互相更換。無一息停。主人苦顛播。而昌促之益驟。及止。病已霍然矣。時他醫在旁。未曉其故。昌曰。是因下橋倒仆。左邊某葉肝播播。今挾之疾走。則肝葉可舒。木氣暢。而頭目安矣。此非藥餌之所能爲也。謙益益神其術。稱爲聖醫。又嘗往鄉。舟過一村。落見一少女子沙際搗衣。注視久之。忽呼停舟。命壯僕登岸。潛近女身。亟從後抱持曰。非我命無釋手也。僕如其言。女怒且罵。僕抱之益力。女益怒罵。其父母出欲毆之。徐曰。我喻昌諦視此女將攫危症。故急救之。非惡意也。女父母素聞昌名。乃止。昌問曰。汝女未發痘乎。曰。然。數日發悶痘。無可救。吾令僕激其怒者。乘其未發。先洩肝火耳。勢少衰。藥力可及也。如期至北城外某處取藥。無遞。越數日。有夜叩昌門者。則向所過村中少女父也。細言女得熱疾。煩躁不甯。狀。昌問膚間有痘影否。曰。不且現影。且現形。昌曰。汝女得生矣。乃昇以託裏之劑。痘發。女得無恙。常熱北城外敗屋。居民多停棺其中。昌偶見一棺似新殯者。而底縫中流血若滴。驚問旁鄰。則曰。頃某鄰死婦。厝棺於此。昌急求見其人。語之曰。汝婦未死。凡人死者血動。生者血鮮。吾見棺底血鮮。可施救也。蓋婦實以臨產昏迷一日。夜。夫以爲死。故殯焉。聞昌言。啓棺。診婦脈未絕。遂於心胸間針之。針未起。而兒下。呱呱作聲。產婦亦起矣。又某紳致仕家居。其夫人年已五十。忽嘔吐不欲飲食。諸醫羣集。投劑俱不效。邀昌視脈。昌沈思良久。而出。拍某紳肩曰。高年猶有童心耶。是娠非病。吾所以沈思者。欲一辨其男女耳。以脈決之。其象爲陽裏陰。男也。已而果驗。昌以醫名世。其奇效甚多。茲不具載。所著有尙論篇八卷。因方中行傷寒條辨。重爲補正。尙論後篇四卷。發明溫疫之旨。醫門法律六卷。以金匱要略爲宗。每門先冠以論。次爲法。次爲律。法皆療病者之例。律者糾誤療之失。寓意草一卷。乃所注醫案。皆一一明辨。審證用藥。頗見詳盡。又選古方

四卷。以李氏綱目集方萬餘首。用者病其龐雜。遂精加選定。又著傷寒答問一卷。溫證語錄一卷。三書皆世所罕見。行世。又好弈。年八十餘。與國手李元兆對弈三晝夜。斂子而逝。

王錫闡

王錫闡。字寅旭。又字昭冥。號曉庵。又號餘不。別號天同一生。江蘇吳江人。少友張履祥。講學以濂洛爲宗。壯益耽究文藝。博覽羣書。厯象之學。尤所篤好。生於明季。當徐光啓等修新法時。聚訟盈庭。錫闡獨閉戶著述。潛心測算。每夜遇天色澄霽。輒登屋臥聽叩問。仰觀景象。竟夕不寐。復發厯書玩索。精思於推步之理。宏亮而不滯。久之。則中西兩家異說。皆能條其原委。考其得失焉。嘗謂厯法測實增減。宜求定率。說之曰。古測既爲今日所疑。近測又非今人所信。畫一之法。何時可立。不如及今求其定率。既有微差。他日測驗修改亦易爲力矣。其論經星云。夫距度既殊。則分至諸限亦宜隨易用求差數。其理始全。然必有平行之歲差。而後有朧胸之歲差。有一定之歲實。然後有消長之歲實。以有定者紀其常。以無定者通其變。乃可垂久而無戾。其辨西法宮閏之失云。大略西之宮閏實難與中法并行。而會通兩家又非目前諸人所及。故不勝齟齬之病。新法推步交食密於舊法。而亦有差失。推求其故曰。交食之法。西厯亦略盡矣。乃所推戊戌仲夏朔食己亥季夏望食差數已著。則致差之故豈宜不講。不知日食不惟虧復二限不在定限。即食甚之時亦非真遠。正論食甚已不能以入轉均數求其必合。况初虧復明。距度尤殊。地景日景。實因遠近損益。最卑之地景大。日入景深。食分不得反小。最高之地景小。月入景淺。食分不得反大。此與幾何公論自相矛盾。儻亦致差之一端乎。其論日月五星天因及新法推測之誤曰。新法既謂星天以太陽爲心。則本天之行既爲歲行。乃復設本天仍以地心爲心。法既不定。安所取衷。考木火土三星之行。與金水二星不同。金於本圖右旋。木火土三星於本圖左旋。皆爲日天所挈而東。左旋之數。土最疾。木次之。火又次之。自右旋論。則疾者反遲。遲者反疾。故今日在最高者法應遲。而視行爲疾。衝日在最卑者法應疾。而視行爲遲。爲

退蓋本圖之遲疾爲左旋而視行之遲疾則右旋也。此理甚明。何莫之察耶。復統論新法舊法曰。欲知新法之誠非。須覈其非之實。欲使舊法之無誤。宜釐其誤之由。然後天官家言在今可以盡革其弊。將來可以益明其故矣。舊法之屈於西法也。非法之不若也。以甄明法意者無其人也。若是則何從而可。從乎天而已。古人有言。當順天以求合。不當爲合以驗天。法所以差。固必有致差之故。法所吻合。猶恐有偶合之緣。測愈久則數愈密。思愈精則理愈出。以古法爲型範。而取才於天行。考畧漏審主表。慎擇人。詳著法。則異同之見。漸可盡泯。成憲一定。不難媿美。較和高出近代矣。錫闡心以明大統。厯爲疏。崇禎間。改用新厯法。亦未盡善。乃著曉庵新法。兼探中西。去其疵類。參以己見。成厯法六篇。會通若干事。考正若干事。增補若干事。表明若干事。立法若干事。且於序中具列西人不知法意者五。當辨者十。其書定爲六卷。雖私家撰述。未見施行。而爲術精妙。識者莫不稱善。更彙括中西步術。作大統西厯啓蒙。丁未歲。因推步大統法。作丁未厯彙。辛酉八月朔日食。以中西法及己法豫定時刻分秒。至期與徐發等以五家法同測。己法獨合。作推步交朔測日小記。西法謂五星皆右旋。則以爲土木火實左旋。當改歲輪爲不同心圈。則理數盡一作五星行度解。術家言日月右旋。儒者云左旋。二說不同。今定爲日月實右旋。作日月左右旋問答。治厯首在割圓。作圓解。測天當據儀畧。造三辰畧。兼測日星。因作三辰畧志。其書又若干卷。以布衣終於家。年五十五。時康熙二十一年也。梅勿菴曰。從來言交食者。只有食甚分數。未及其邊。惟王寅旭則以日月圓體分爲三百六十度。而論其食甚時所虧之邊。凡幾何度。今爲推衍。其法頗精確。然則厯象攷成。以以上左右算交食方法。蓋本於錫闡矣。

張璐

張璐。字路玉。號石頑。長洲人也。故明廉憲少峯公孫。撰醫通十六卷。首以素問靈樞。難經金匱。次以諸家名論。博采精詳。條理分明。又著傷寒續論二卷。亦能補前人之未備。傷寒緒論二卷。於外感諸證。盡能發明其所自。診宗

三昧一卷。圃發脈理。本經逢源四卷。詳明藥性。自甲申至癸酉。凡五十載而成書。稿凡十易。誠國初醫書之一大集也。其醫通自敘云。齊一變。至於魯。魯一變。至於道。道之興廢。靡不由風俗之變通。非明道人不能達權通變。以挽風俗之墮弊也。今夫醫道之變。至再至三。豈特一而已哉。余生萬曆丁巳。於時風俗雖漓。古道未泯。業是道者。各擅專科。未嘗混廁而治也。甲申世變。黎庶奔亡。流離困苦中。病不擇醫。醫隨應請。道之一變。自此而始。當是時也。煢煢孑遺。託跡靈威丈人之故墟。賴有醫藥種樹之書。消磨歲月。因循十有餘載。身同匏繫。聊以著書自娛。歲己亥。賦歸故園。篋中輯得方書一通。因名醫歸。大都脗合準繩。其間會集往古。傳習諸篇。多有不能暢發其義者。次第以名言易之。草創甫成。同人速予授梓。自揣多所未愜。難以示人。僅以傷寒續緒二論。先行問世。頗蒙宇內領之。壬寅以來。儒林上達。每多降志於醫。醫林好尚之士。日漸聲氣交通。便得名譟一時。於是醫風大振。比戶皆醫。此道之再變也。嗟予固陋。不能與世推移。應接物而外。時與先聖晤對一堂。無異手提面命。近年以來。穎禿半牀。稿凡十易。惜乎數奇不偶。曩因趨赴孝伯耿公之招。攜至晉川公署。失去目科一門。先是內姪顧惠吉。持去痘疹一冊。久假不歸。竟成烏有。知機不偶。已將殘編置之高閣。無復行世之心矣。近聞懸壺之士。與垂簾之侶。互參恆德之術。聖門之教無違。炎黃之德不顯。道之三變。匪特自今。吾於志學之年。留心是道。迄今桑榆入望。歷世頗多。每思物壯則老。時盛必衰。欲挽風俗之墮弊。寧辭筆削之罪知。因是仍將夙昔所述之言。從頭檢點。爰命俾兒補輯。目科治例。柔兒參入痘疹心傳。足成全編。易以通名。標諸籤額。書未竟。適逢客至。隨手開函而語予曰。在昔韓氏醫通。名世已久。今予亦以是名。得無名實相混之處乎。予謂不然。吾聞元氏集名長慶。白氏之集。亦名長慶。二集並驅。後世未嘗因名混實。奚必拘拘於是耶。客莞爾而退。遂以醫通定名。迨夫三變之術。法外之法。非可以言語形容也。康熙四十四年。天子南巡。至吳。子以柔以其書獻。奉旨交與御前儒醫張獻直看。四十七年。具摺覆奏云。此書各卷。全是原於內經。可比證治準繩。奉旨是。即發同德堂。另為裝訂備覽。年至八十餘。以壽終。子三登。俾以柔。

周揚俊

周揚俊，字禹載，蘇州人也。著《溫熱暑疫全書》。又《金匱補註》，其自敘云：嘗思事不師古，其法不立；師古而不師聖人，其理不精。聖人每於禮樂教養之外，凡可以愛護斯民者，無所不至。視人疾痛，如在己身。故仲景既著傷寒論，垂萬世法，而復出其心思，著《金匱玉函經》，爲雜證矩範，使天下後世有志此者，於此啓悟，以拯濟斯人。固聖人無已之心，不易之學者。後之學者，若東垣之脾胃，河間之溫熱，丹溪之濕熱，王安道之統論，易思蘭之發明，薛立齋之虛弱，莫不各擅其長，要皆得力於此。今之學者，能稱述諸家，而不知溯流窮源，上稽聖訓，積數十年之敏悟，爲百尺竿頭之進步，終爲淺寡而已矣。然則要略爲雜病方圓之至也，爲方不多，立論殊少，其間推測病由，如六淫之氣，七情之感，臟腑之傷，及湯丸之補瀉，氣味之緩急，罔不畢備。有志之士，苟得其二三，已足名世。及觀從來註釋諸家，未能久讀其書，豈能心知其意？又何從闡發其理？適者程公雲來，徐公忠可，各有註疏行世，已足發揮底蘊，表彰絕業。獨趙以德先生衍義，理明學博，意周慮審，本軒岐諸論，相爲映照，合體用應變，互爲參酌，庶幾大道之明也。惜乎未有梓本，讀者甚少，更有遺漏，注疏頗缺。余購之二十餘載，未得全璧，因不揣疎漏，擬爲補註。又大半采嘉言之議，融會成之，而續紹之，銷知不免也。倘海內君子，有志以斯道自任者，如脈訣、藥性賦、回春入門等書，決不可讀，幸免力於聖緒，無自安於苟且。又敘《玉函金匱二註》曰：予讀此十方，具出人意表，其間次序緩急，可謂千百世法，即不必十方並用，要無能出其範圍者矣。一方之中，自得肯綮，即不必全用其藥，亦可以細推其理矣。乃今日之治血症者，輒用六味地黃增減，冀其收功，皆由醫費入手，而未嘗從神書體會者也。彼謂腎水衰，則火炎爲患，壯水之主，可鎮陽光也。孰知人之犯此病也，陰虛固多，而他因者亦復不少。假如從勞力而得者，其傷在足太陰矣。從憂思而得者，其傷在手少陰矣。從嗜飲而得者，其傷在手太陰矣。從憤怒而得者，傷又在足厥陰矣。皆致吐血、咳血、咯血等症。豈一壯水可以勝其任乎？總之，人身之血，附氣而行者也。一臟傷則氣必不調，而血遂

溢於外。故逆則上出。墜則下行。滯則阻痛。寒則凝。熱則散。此自然之勢也。後之君子。於診視之際。聞問之餘。斟酌而得其情否乎。果能於此着眼。視其病之所傷在何臟。脈之所傷在何部。時之所在何季。思過半矣。余曾治一咯血之人。平日極勞。每咯紫黑色。俱成小塊者。然必是飽食則多。少食則少。不食則或少或無。予以韭菜。薑。便。製大黃。治之。二服而安。後以補中益氣加血藥而愈。知者以為怪妄。予謂極平常。蓋純從神書究心。而置醫黃為談料者也。

張志聰

張志聰。字隱庵。錢塘人。著有靈素集註二十四卷。靈樞經集注十卷。屏棄舊文。每多創解。其言曰。先儒有云。經傳而經亡。非經亡也。亡於傳經者之精。而以粗求之。深而以淺視之。之失其旨歸也。夫靈素之為烈於天下也。千百年於茲矣。然余嘗考漢藝文志曰。黃帝內經一十八卷。而靈樞居其九。素問亦居其九。昔人謂先靈樞而後素問者。何也。蓋以素問為世人病所由生也。病所生而弗慎之。則無以防其深。故篇中所載陰陽寒暑之所從。飲食居處之所攝。五運生制之所由勝復。六氣時序之所由逆從。靡弗從其本而謹制之。以示人維持。而生人之患微矣。若靈樞為世人病所由治也。病既生而弗治之。則無以通其源。故本經所論榮衛血氣之道。路。經脈臟腑之貫通。天地歲時之所由發。音律風野之所由分。靡弗藉其針而開導之。以明理之本始。而惠世之澤長矣。是靈樞素問為萬世所永賴。靡有息也。故本經曰。人與天地相參。日月相應。而三才之道大備。是以人氣流行。上應日行於二十八宿之度。又應月之盈虧。以合海水之消長。且以十二經脈臟腑外合於百川滙集之水。咸相符也。故本經八十一篇。以應九九之數。合三才之道。三而三之。成九九八十一篇。以起黃鐘之數。其理廣大。其道淵微。傳竹帛而使萬世黎民不罹災眚之患者。孰不賴此經也哉。乃自皇甫士安類為甲乙針經。而玄臺馬氏又專言針而昧理。俾後世遂指是經為針傳而忽之。而是經幾為蕢旒矣。余憫聖經之失傳。懼後學之沿習。遂忘愚昧。素問註疏告

竣。復集同學諸公。舉靈樞而詮釋之。因知經義深微。旨趣層折。一字一理。確有指歸。以理會針。因針悟證。殫心研慮。雞鳴風雨。未敢少休。庶幾藉是。可告無罪乎。俾後之人。讀素問而悉病之所以起。讀靈樞而知病之所由廖。則臟腑可以貫通。經脈可以出入。三才可以合道。九針可以同法。察形氣可以知生死。壽夭之源。觀容色可以辨邪正。美惡之類。且也因九針而悟洛書之妙理。分小針而并識河圖之微情。則前民用而範圍不過者。大易之傳。統乎是矣。則利民生而載成不遺。墳典之傳。亦統乎是矣。又著侶仙堂類辦二卷。本草崇原注三卷。行於世。及門甚衆。王弘義。黃紹姚。朱景韓。莫昌善。徐永時。王廷貴。金紹文。倪昌大。朱翰。最有名。子兆璜。能世其業。

汪昂

汪昂。字詼庵。休寧人也。爲邑諸生。踰壯。厭舉業。自逸以老。經史百家。靡不殫究。而於岐黃之書。爲尤嗜。所著有本草備要。素靈類纂。醫方集解。湯頭歌括。經絡歌括。日食藥物等書行世。其本草備要。自敘曰。言之可貴。而足以垂後者。必性命之文也。其次則經濟之文也。余於理學。既無所窺。又六經四子之書。燦如星日。即漢疏宋註。且有遺譏。况余愚瞽凡民。安敢以管蠡仰測高深也哉。性命之文。吾無及矣。如經濟之文。必須見諸實事。方能載諸簡編。余少困棘闈。壯謝制舉。長甘蓬藜。終鮮通榮。經濟之文。吾無望焉耳。至於詞章詩賦。月露風雲。縱極精工。無裨實用。揚子所謂雕蟲篆刻。壯夫不爲。不其然乎。竊謂醫藥之書。雖無當於文章鉅麗之觀。然能起人沉疴。益人神智。弱可令壯。鬱可使寬。無關道脈。而能有助剛正之形軀。不係政形。而實有裨生成之大德。言不墮綺語之障。用有當施濟之仁。羣居飽食之餘。或可以愧小慧而勝猶賢也乎。是用寄意此中。思以壽世。初則謂醫學。與堪輿不同。堪輿當有祕奧。天機不欲輕泄。若醫藥。所以濟世救疾。自應無微不闡。無隱不彰。恣意極言。不遺餘蘊。及泛覽諸書。惟靈素難經。仲景叔和。奧衍宏深。不易究殫。自唐宋而下。名家百代。方書非不燦陳。而義蘊殊少詮釋。如本草第言治某病某病。而不明所以主治之由。醫方第云用某藥某藥。而不明所以當用之理。千書一律。開卷茫茫。即

間有辨析病源，訓解藥性者，率說稱而不詳，語焉而不暢，醫理雖云深造，文字多欠通明，難以鑒觀者之心目，良用無然。不揣固陋，爰採諸家之長，輯爲本草備要，醫方集解二篇，理法全宗，古人體裁，更爲創制。本草則字箋句釋，做傳記之詳明，醫療則詮症釋方，泰百家之論辨，書分兩帙，用實相資，要令不知醫之人，讀之瞭然，庶裨實用。兩書甫出，幸海內名賢，頗垂鑑許。今本草原刻，字已漫滅，特再加釐訂，用酬世好，抑世尙有議余藥味之簡者，余惟歌賦湯液，藥僅二百四十種，拙集廣至四百種，不爲少矣。如食物僅可充口腹，僻藥非治所常需者，安能盡錄。蓋既取其備，又欲其要，應如是止也。茲因重梓，更增備而可用者，約六十品，聊以厭言者之口，仍不礙采者之艱，苟小道之可觀，倘不至致遠之恐泥也乎。其素問靈樞類纂，自敘曰：醫學之有素問靈樞，猶吾儒之有六經論孟也。病機之變，萬有不齊，悉範圍之，不外是焉。古之宗工與今之能手，師承其說，以之濟世壽民，其功不可究殫。願吾儒率專精制，舉以是爲方伎，而莫之或習，卽涉獵亦未曾及之。愚謂先王之制六經，凡以爲民也。有詩書禮樂以正其德，復有刑政以防其淫，其間不順於軌者，雖殺之而罔或惜焉。然其要則歸於生之而已。至於天厲爲災，疾痛愁苦，坐視其轉死而莫之救，而禮樂刑政之用，於是乎或窮。是以上古聖人，作爲醫術，用以輪旋器用，調劑羣生，使物不疵癘，民不夭札，舉世之所恃賴，日用之所必需，其功用直與禮樂刑政相爲表裏。顧安得以方伎之書而忽之歟。况其書理致淵深，包舉弘博，上窮蒼穹七政之精，下察風水五方之宜，中列人身賅存之數，與夫陰陽之闔闢，五行之勝復，可以驗政治之得失，補造化之不齊，非深於性命之旨者，其孰能與於斯乎。第全書浩衍，又隨問條答，不便觀覽，雖岐黃專家，尙望洋意沮。况於學士大夫乎。余衡泌之人，無事棄日，不揣固陋，竊欲比類而分次之，偶見馬伯仁有素問鈔一編，其用意頗與余同，然而割裂全文，更爲穿費，雖分門類，而凌躐錯雜，遂失原書之面目，得無疑誤後學而獲罪先聖也乎。又謂兩經從未有合編者，特爲珠聯，以愚意分爲九類，雖有刪節，而段落仍舊，下註出於某編，不敢謬爲參錯，其存者要以適用而止，且參酌諸註，務令簡明，使讀者瞭然心目，聊取反約之意，以就正於有道云爾。其生平行事不詳。

葉桂

葉桂字天士。號香巖。先世自歛遷吳。祖時。父朝采。皆精醫術。范少參長僂晚年生子。無穀道。延朝采視之。曰。是在腹裏。用金刀割之。而開。子即伏庵太史也。朝采兼工書畫。好吟詠。善鼓琴。輕財好施。年未五十卒。時桂年才十四耳。父既歿。從學於父之門人朱某。朱即以得於師者授之。桂聞言即解。見出朱上。有聞於時。桂切脈。望色。聽言。病之所在。如見五臟。治方不執成見。嘗云。藥之寒溫。視疾之涼熱。自劉河間以暑火立論。專用寒涼。東垣論脾胃之火。必務溫養。習用參附。丹溪創陰虛火動之論。又偏於寒涼。嗣是宗丹溪者多寒涼。宗東垣者多溫養。近世醫者。茫無定識。假兼備以倖中。借和平以藏拙。甚至朝用一方。晚易一劑。無有成見。蓋病有見症。有變症。必胸有成竹。而後可施之以方。人服其論。桂治病多奇中。一富室新娶婦。病如駭。治而無效。桂診之。命於空室掘地作池。貯不潔其中。覆板昇病者臥其上。靜伺之。俄而呻吟。逮旦移還內室。神識清爽。或問其故。曰。此香閉也。臭可以解香耳。一女子性嗜笋。臥病經年。如癱瘓狀。投以白鳳仙根。病若失。天官坊章松巖司馬。老年致仕。患呃逆不能言語。延視。令人參四兩。附子四兩。同煎一大盃。小匙頻進。一夜藥盡。呃止而安。其時章之子器商侍側。桂熟視之。曰。日內必瘧作。勢重且久。疏方令服。明日果患瘧。醫治百日始愈。桂治痘尤神。遠立而驗之。死生立判。其次孫坤出痘。桂揭帷即嘻。曰。此死氣也。不視而出。卒不治。長孫堂。幼時身甫熱。桂診之。驚曰。此兩痘也。急疏方與服。危而後安。桂易餐時。執堂手曰。汝脈色可得大年。惟終身不可服涼藥。後堂年踰七十。嬰小疾。偶服鈴傘。連翹等藥。即汗出神昏。憶德前言。改服溫劑而愈。又有人患痼疾。桂往診之。曰。此時尙可治。十二年後復作。則不可爲矣。其人果歷十二年而歿。有富人眠食如常。忽失音。百藥無效。延桂診之。曰。此有痰結在肺管阻其音。非藥力所能化也。邀針科尤松年至。令於肺俞穴下針。少遷。病者猛嗽一聲。吐出痰核而愈。又嘉興人以病兩月。偏服柴胡。葛根等解散之劑。不效。就診於桂。桂於原方中加厚朴一錢。老薑三錢。一服而洞下。宿垢盈器。寒熱大作。再服大汗。至家霍然。

其神效如此。桂內行修備。尤能拯人之危。卒年八十。臨歿戒其子曰。醫可爲而不可爲。必天資敏悟。讀萬卷書。而後可借術以濟世。不然鮮有不殺人者。是以藥餌爲刀刃也。吾死。子孫慎毋輕言醫。生平無暇著述。行世者有臨證指南等書。皆及門弟子研書輯。或爲後人所僞託云。

薛雪

薛雪。字生白。別號一瓢老人。居吳郡南園。多學能詩。精醫。著醫經原旨八卷。醫案未刊若干卷。與葉桂齊名。有人久痢十年。雪診之曰。脈來數而細。此腎傷。而羣醫作脾胃病治。謬矣。因用熟地。歸身。補骨脂。五味。菟絲。等藥。十餘劑而愈。一人右腹痛如刀割。必泄氣痛稍緩。會服蚌灰。小效而復發。雪曰。蚌屬介類。味鹹。攻堅直入至陰。是病在陰絡。絡病在下屬血。用麝蟲。桃仁。酒炒大黃。加入麝香少許。飲之下黑血數次而瘥。一閩賈。病垂危。延雪診之。曰。已不治。逆旅主人進曰。死生有命。但能延旦夕之喘。俟其子至。我等可無累矣。雪曰。試爲之。遂進以藥。病勢少瘳。至十三日。已能稍稍坐起。其子亦至。雪密告主人曰。此人今夕當死。主人大駭。雪曰。我許汝延旬日之命。不曾許汝活也。其人果至中夜而殞。又有洞庭山人傷寒甚劇。詣雪求藥。雪曰。吾新製一方。試服之。第一日用棗三枚。葱根三個。生薑三片。次日減爲二。又次日減爲一。其人果三服而愈。因名其方曰三妙湯。雪生平與葉桂不相能。自名其所居曰掃葉莊。以寓意。然每見葉處方而善。未嘗不擊節也。善拳勇。嘗手置一銅杖。鑄曰銅婢。旦夕攜之。兼善畫蘭。與袁枚善。嘗贈枚曰。我之醫。如君之詩。俱以神行。所謂人居室中。我來天外是也。族孫承基。字公望。亦以醫名。

徐大椿

徐大椿。後更名大業。字靈胎。號洄溪。吳江人。鮑之孫。養浩子也。生有異稟。初學畢業。補邑諸生。弗屑。去而窮經。探

研易理。好黃老陰符家言。既益泛濫。凡星經地志九宮音律刀劍使擊句卒羸越之法。靡不通究。而於醫理尤邃。其投藥造方。輒與人異。徵士雲龍病六日。不言不食。目炯炯直視。延大椿按之。曰。此陰陽相搏證也。投以劑。再飲以湯。迨躍然起。張兩村子生無膚。駭欲棄之。大椿令以糯米作粉糝其體。以絹裹之。埋土中。出其手乳之。兩日夜而皮生。任氏婦患風痺。兩股如針刺。痛甚。大椿令作厚褥。遣幹嫗挽持之。任其顛撲叫號。汗出而痛止。竟勿藥而愈。市有好拳勇者。與人角。胸受傷。氣絕矣。大椿急命覆臥。拳擊其尻三。忽嘔黑血數升而愈。沈德潛未遇時。大椿切其脈。許其大黃。熊季輝壯歲。大椿撫其背以爲不壽。後皆如其言。乾隆庚辰。大學士蔣溥病。高宗訪海內名醫。刑部尙書秦蕙田以大椿薦。特詔徵召。辛巳春至京。命視溥病。大椿奏言疾不可治。上命入太醫院供奉。大椿辭歸。乾隆辛卯。再召入京。年已七十有九矣。其冬卒於京師。詔賜白金。大椿爲人權奇自喜。舞鎗奪槊。有不可一世之氣。晚益放達。作道情以自娛。額所居處曰。第三十七洞天。又嘗自題墓門云。滿園靈草仙人藥。一徑青松處士墳。著有難經釋。神農本草經百種錄。傷寒類方。醫學源流論。醫質砭。蘭臺軌範。慎疾劄言。涸溪醫案。涸溪道情。樂府傳聲。道德經註釋。陰符經註釋等書行世。

吳瑭

吳瑭。字鞠通。淮陰人也。年甫弱冠。以父病年餘而卒。遂棄舉子業。讀靈素書。凡十載而成溫病條辨一書。首卷歷引經文爲綱。分註爲目。原溫病之始。一卷至三卷爲三焦篇。凡一切溫病。各隨其所屬而係之。四卷雜說。病後調治。末附一卷。專論產後調治。與產後驚風。小兒急慢驚風痘證。自敘有云。夫立德立功立言。聖賢事也。瑭何人斯。敢以自任。緣瑭十九歲時。父病年餘。至於不起。瑭愧恨難名。哀痛欲絕。以爲父病不知醫。尙復何顏立天地間。遂購方書。伏讀於苦塊之餘。至張長沙外逐榮勢。內忘身命之論。因慨然棄舉子業。專事方術。越四載。猶子巧官病溫。初起喉痺。外科吹以冰硼散。喉遂閉。又遍延諸時醫治之。大抵不越雙解散。人參敗毒散之外。其於溫病治法。

茫乎未之聞也。後至發黃而死。瑋於初學。未敢妄贊一辭。然以是證未得其要領。蓋張長沙悲宗族之死。作玉函經。爲後世醫學之祖。奈玉函中之卒病論。亡於兵火。後世學者無從做效。遂至各起異說。得不償失。又越三載。來遊京師。檢校四庫全書。得明季吳又可溫疫論。觀其議論宏闊。實有發前人所未發。遂專心學步焉。細察其法。亦不免支離駁雜。大抵功過兩不相掩。蓋用心良苦。而學術未精也。又遍考晉唐以來諸家論。非不珠璧琳瑯。求一笑備者。蓋不可得。其何以傳信於來茲。瑋進與病謀。退與心謀。十閱春秋。然後有得。然未敢輕治一人。癸卯歲。都下溫疫大行。諸友強起瑋治之。大抵已成壞病。幸存活數十人。其死於世俗之手者。不可勝數。嗚呼。生民何辜。不死於病。而死於醫。是有醫不若無醫也。學醫不精。不若不學醫也。因有志采輯歷代名賢著述。去其駁雜。取其精微。間附己意。以及考驗。合成一書。名曰溫病條辨。然未敢輕易落筆。又歷六年。至於戊午。吾鄉汪瑟庵先生促瑋曰。來歲己未。漏土正化。二氣中溫厲大行。子盍速成是書。或者有益於民生乎。瑋愧不敏。未敢自信。恐以救人之心。獲欺人之罪。轉相做效。至於無窮。罪何自贖哉。然是書不出。其得失終未可見。因不揣固陋。驅勉成章。就正海內名賢。指其疵謬。歷爲駁正。將萬世賴之無窮期也。又著醫醫病書若干卷。用以針砭庸俗之流。醫案若干卷。評章虛谷醫門棒喝。糾正章氏謬誤不少。惜除溫病條辨外。皆少行世。

吳儀洛

吳儀洛。字遵程。海鹽人也。事跡未詳。所著行世者。有成方切用十四卷。傷寒分經十卷。又本草從新大卷。原本於汪昂本草備要。而衍出之。其自敘曰。余先世藏書最夥。凡有益於民用者。購之尤亟。以故岐黃家言。亦多海內稀見之本。余自髫年。習制舉業時。即旁覽及焉。遇有會意。輒覺神情開豁。於是盡發所藏。而精繹之。迄今四十年矣。夫醫學之要。莫先於明理。其次則在辨證。其次則在用藥。理不明。證於何辨。證不辨。藥於何用。故拙著醫學十種。其一曰一源必徵。其二曰四證須詳。於經義病情。必斟酌羣言。必期於至當也。而又念天之生藥。凡以濟斯人之

疾苦者也。有一病必有一藥。病千變。藥亦千變。能精悉其氣味。則千百藥中任舉一二種。用之且通神。不然。則歧多而用眩。凡藥皆可傷人。況於性最偏駁者乎。自來注本草者。古經以下。代有增訂。而李氏綱目爲集大成。其徵據該洽。良足補爾雅詩疏之闕。而以備醫學之用。惟病其稍繁。踵之者有繆氏之經疏。不特著藥性之功能。且兼言其過劣。其中多所發明。而新建喻嘉言。頗有異議。最後新安汪氏。祖述二書。著備要一編。卷帙不繁。而采輯甚廣。宜其爲近今膾炙之書。惜其本非岐黃家。不臨證而專信前人。雜采諸說。無所折衷。未免有承襲之失。余不揣固陋。取其書重訂之。因仍者半。增改者半。旁摭舊文。參以涉獵。以擴未盡之旨。書成名曰本草從新。付之剞劂。庶幾切於時用。而堪羽翼古人矣乎。其餘數種。將次第刊布。與有識者商之。

王貞儀

王貞儀。字德卿。先爲安徽泗州人。其祖者輔。字惺齋。遷居金陵。父錫琛。母洪氏。孕十三月而生。貞儀幼讀書。聰穎絕倫。惺齋官宣化府知府。以事遣戍。歿於吉林。貞儀時年十一。侍祖母董氏及從父。奔喪塞外。其祖藏書七十五櫃。乃護持而涉獵焉。又嘗學射於蒙古阿將軍之夫人。發必中的。每角射跨馬。橫戟往來若飛。年十六。回江南。又隨父由京師至關西。復自楚之粵東。年二十五。乃適宣城詹氏子。名枚。字文木。年三十而歿。貞儀淹貫羣籍。復嫻武藝。精梅氏天文算法。下及醫卜壬遁。靡不通貫。嘗夜坐觀天象。言晴雨豐歉皆奇驗。時有吳江蒯夫人。亦僑居金陵。貞儀一見如舊相識。嘗以文字往還。蒯夫人名與齡。字九英。爲嘉興錢文端之孫女。適權廣西太平府明江。同知吳江蒯君嘉珍。幼承家學。工詩書畫。信厚明達。故與貞儀尤爲相得。貞儀所著有星象圖釋二卷。籌算易知重訂策算證訛。西洋籌算增刪。女家拾誦。沈疴嚙語各一卷。象數窺餘四卷。術算簡存五卷。文選詩賦參評十卷。德風亭初集十四卷。二集大卷。繡紙餘箋十卷。將歿。謂其夫文木曰。君家門祚薄。無可爲者。妾今先死。不爲不幸。吾生平手稿。其爲我盡致蒯夫人。蒯夫人能彰我於身後者也。夫如其言。蒯夫人總爲一縷囊珍襲之。時嘉慶二

年也。後六年嘉興錢衍石給諫訪其姑劄夫人於黎里。得見貞儀諸稿本。其詩文皆質實。說事理不爲藻采。諸稿不獲徧錄。僅得術算簡存五卷。序而識之。謂爲班惠姬後一人云。又上元朱緒曾嘗見德風亭初集文九卷。詩三卷。詞一卷云。雜文如句股三角論。日食論。歲差日至辨疑。盈縮高卑。辨經星。辨黃赤二道。辨地圖論。地球比九重天論。歲輪定於地心論。五星隨天左旋論。籌算易知自序。歷算簡存自序。皆足以見天文算學之大略。其讀詩私箋序。韻學正譌序。論史偶序。葬經闕異序。醫方驗鈔序。原原本本。見聞該洽。詩五古如吉林塗中頗近選體。七古如飼蠶詞。擣練圖。枯樹歎。皆有篇法。體律佳句亦多可采。貞儀歿後數年。其夫文木亦亡。無子。

陳厚耀

陳厚耀。字泗源。號曙峯。江蘇泰州人。康熙丙戌進士。官蘇州府教授。李光地薦其通天文算法。引見。改內閣中書。聖祖命試以算法。繪三角形。令求中線及問弧背尺寸。先生具劄進。稱旨。命入直內廷。授編修。與梅穀成同修書。聖祖嘗謂梅穀成云。汝知陳厚耀否。他算法近日精進。向曾受教于汝祖。今汝祖若在。尙將就正于彼矣。又嘗召至御座旁。教以幾何算法。上嘗問曰。汝能測北極出地高下否。對曰。遇春秋二分用儀器測之。可得高度。若餘節氣。又有加減之異。然亦不準何也。地上有朦氣之差。以人目視之。有升卑爲高。映小爲大之異。故以渾儀測之多不合。惟在天度數則不差耳。又問。地周三百六十度。依周尺每度二百五十里。今尺二百里。地周幾何。徑幾何。對曰。依周尺地周九萬里。今尺七萬二千里。以圓三徑一推之。地徑二萬四千。以密率推之。當得地徑二萬二千九百一十八里有奇。又問。地圖出何書。對以周髀算經會言之。問。何以見其圓也。對曰。職方外紀西人言繞地過一周四市皆生齒所居。故知其爲圓。且東測影有時差。南北測星有地差。皆與圓形相合。故益知其爲圓。累遷司業。左諭德。以老疾致仕。卒於家。年七十有五。厚耀治春秋。尤究心天算。嘗補杜預長曆爲春秋長曆十卷。其凡有四。一曰曆證。備引漢晉隋唐宋元諸史志及朱載堉曆書諸說。以證推步之異。又引春秋屬辭杜預論日月差謬一

條爲注疏所無。大衍曆議春秋曆考一條亦唐志所未錄。尤足以質考證。二曰古術。古以十九年爲一章。一章之首。推合周術正月朔冬至前列算數。後以春秋十二公紀年橫列爲四章。縱列十二公積而成表。以求術元。三曰曆編。奉春秋二百四十二年一一推其朔閏及月之大小。而以經傳干支爲證佐。皆述杜預之說而考辨之。四曰曆存。以古術推隱公元年正月庚戌。杜預長曆則爲辛巳朔。乃古術所推之上年十二月朔。謂元年前失一閏。蓋以經傳干支排次知之。先生則謂如預之說。元年至七年中書日者雖多不失。而與二年八月之庚辰。三年十二月之庚戌。四年二月之戊申。又不能合。且隱公三年二月己巳朔日食。桓公三年七月壬辰朔日食。亦皆失之。蓋隱公元年以前非失一閏。乃多一閏。因退一月就之。定隱公元年正月爲庚辰朔。較長曆實退兩月。推至僖公五年止。以下朔閏因一一與杜術相符。故不復續載焉。其所推較杜預爲密。原書采進四庫。傳刻漸稀。光緒間。長沙王益吾祭酒。督學江蘇。刊入皇清經解續編。民國癸亥。泰縣韓止石省長。得羅士琳手勦本。刊入海陵叢刻第十二種。益足資明算經師證訂焉。又撰春秋戰國異辭五十四卷。通表二卷。摭遺一卷。春秋世族譜一卷。馬宛斯爲釋史。兼采三傳國語國策。先生則皆摭於五書之外。尤獨爲其難。氏族一書。與顧棟高大事表互證。則春秋氏族之學幾乎備矣。此外尙有禮記分類。十七史正譌諸書。今不傳。

龔鼎莘

龔鼎莘。字孝升。號芝麓。江南合肥人。明崇禎七年進士。授兵科給事中。十六年。大學士周延儒罷歸。舊輔王應熊赴召將至。鼎莘疏劾應熊結納延儒。營求再召。政本重地。私相援引。延儒甫出。應熊復來。天下事豈堪再誤。疏入。留中未下。會延儒被逮在道。不即赴冀。應熊先入爲之解。莊烈帝知之。命應熊歸。賜延儒死。時兵部尙書陳新甲獲罪棄市。鼎莘又疏詆呂大器爲陳新甲私人。不宜令總督保定山東河北。忤旨鐫秩。及流賊李自成陷京師。鼎莘從賊。受僞直指使職。巡視北城。本朝順治元年五月。睿親王多爾袞定京師。鼎莘迎降。授吏科右給事中。尋改

禮科。二年九月。遷太常寺少卿。三年六月。丁父憂。請賜卹典。給事中孫昌齡疏言。鼎孳明朝罪人。流賊御史。蒙朝廷拔置諫垣。優轉清卿。曾不聞夙夜在公。以答高厚。惟飲酒醉歌。俳優角逐。前在江南。用千金置妓。名顧眉生。戀難割。多爲奇寶異珍。以悅其心。淫縱之狀。哄笑長安。已置其父母妻孥於度外。及聞父訃。而歌飲留連依然如故。虧行減倫。獨冀邀非分之典。誇耀鄉里。欲大肆其武斷把持之伎。請敕部察核停格。疏下部議。降二級調用。尋遇恩詔免。九月補原官。十年擢刑部右侍郎。奏定本部事宜。一諸司問擬大小獄情。宜悉依律文確議。不得棄律科罪。一折獄務得其情。虛者卽爲申雪。實者推詳定案。毋持兩可。一獄訟宜令滿漢司官會訊。錄詞呈堂復審。或擬罪。或釋放。加以勘語。付司存案。一處決重囚。宜令科臣將應決人犯詳註姓名。其有情罪失當者。許卽時執奏。一遣戍罪人。宜就原籍遠近定地發遣。一畿輔州縣旗民交訟。惟命盜案情。仍赴部質審。鬪爭細事。請卽令各州縣審擬。申報督撫結案。一老幼篤病。律有收贖之條。請再爲申明。凡重犯連坐之家屬。卽與依律科斷。下所司議行。明年二月轉戶部左侍郎。五月。遷都察院左都御史。十一月。疏請招納流民。先擇寺院聚處編列保甲。互爲稽查。仍仿京城賑粥例。有司親爲經理。其往他省者。卽令所在道廳招集。量給資本留屯。毋令失所。十二年八月。詔停刑部秋決。鼎孳疏請令內外概行停決。以彰一視之仁。又奏每年六月審定立決重犯。俟七月具題正法。並下部議行。先是。給事中許作梅莊憲祖等交章劾大學士馮銓。睿親王集科道各官質問。鼎孳曰。馮銓乃背負天啓。黨附魏忠賢作惡之人。銓曰。流賊李自成陷害明帝。竊取神器。鼎孳反順逆賊。竟爲北城御史。鼎孳曰。豈止鼎孳一人。何人不會歸順。魏徵亦曾歸順太宗。王笑曰。人果自立忠貞。然後可以責人。鼎孳自比魏徵。而以李賊比唐太宗。可謂無恥。似此等人。祇宜縮頸靜坐。何得侈口論人。遂罷不問。嗣以陝西地震。鼎孳疏論任捕滿酌銓絃黃考課諸事。上知其意必有所指。令指實回奏。又語涉馮銓。上以馮銓果有罪。卽宜糾劾。何待責令回奏。始引銓抵塞。諭責之。至是上以鼎孳自擢任左都御史。每於法司章奏。倡生議論。事涉滿漢。意爲輕重。敕令回奏。鼎孳具疏引罪。詞復支飾。下部議應革職。詔改降八級調用。尋以在法司時獻盜事後先異議。又曾薦舉納賄伏法之巡按

顯仁再降三級。十三年四月補上林苑蕃育署丞。閏五月大學士成克鞏論鼎革黨護左通政使吳達隱其弟吳達通賊事請勘訊下部察問鼎革以不知達爲達弟申辯罰俸一年十七年詔甄別京員以鼎革素行不孚衆論復降三級調用罷署丞康熙元年諭部以侍郎補用明年起都察院左都御史奏免康熙元年以前催徵未完錢糧三年遷刑部尙書疏言法司審擬事件若非徇私枉法雖或讞罪稍輕引律未協既行改正應免處分從之五年轉兵部八年轉禮部九年充會試正考官十二年再充會試正考官八月以疾致仕九月死賜祭葬如例諡端毅有定山堂集

洪亮吉

洪亮吉字君直又字稚存號北江江蘇陽湖人六歲而孤母蔣賢明督課嚴風雪夜受經至雞鳴亮吉純孝既壯爲嬰兒戲娛母家貧囊筆出遊節所入養母會客處州母卒弟不敢訃聞但爲書言母病促歸途次得狀號踊落水得救免三年撤酒肉不入中門少工文辭與同邑黃景仁詩歌唱和時稱洪黃居陝時黃病困安邑將死亟託以身後事聞訊卽四晝夜走七百餘里扶其柩歸且妥爲卜葬後從安徽學政朱筠遊同幕戴震邵晉涵王念孫汪中等皆通古義乃立志窮經家居與孫星衍相擊摩學益宏博其文樸質若中郎適宕若參軍蕭穆若燕公其自敘所著書與他人說經之書皆用偶語述其宗旨乾隆五十五年一甲二名進士授翰林院編修五十七年充順天鄉試同考官卽督貴州學政亮吉以古學教士黔省僻遠無書籍爲購經史通典文選等散置各府書院奏禮記宜用鄭氏注今功令試士從元陳澧注舛漏不足闡發經義未奉部議施行嘉慶二年命在上書房行走三年正月大考命擬征邪教疏時川陝餘匪未靖亮吉指陳規畫慷慨數千言是月因弟鶴吉卒引古人期功去官之義病免家居又明年高宗上賓亮吉以供奉內廷奔京哭臨仁宗親政詔求直言極諫之士亮吉念身自微賤受知兩朝居侍從之列欲終不言則非人臣匪躬之義言之又慮其不可以徑達也自聞詔後不知寢食者累月

一日奮曰。吾終不可以立仗馬。奉聖天子恩。乃反覆極陳時事。累數千言。略謂。故福郡王所過。繁費州縣供億。致虛帑藏。故相和珅擅權時。違官清選。或執贊門下。或屈膝求擢。羅列中外官罔上負國者四十餘人。手書爲三函。乞成親王大學士朱珪兵部尙書劉權之代奏。上見視朝稍晏。小人熒惑等語。以爲論及宮禁。震怒革職對簿。詔亮吉讀書人。體弱。毋許用刑。亮吉感慟伏地。問何爲上書。從容應曰。庶人傳語。況翰林乎。王大臣等當亮吉大不敬。律斬立決。奉旨免死。發往伊犁。交將軍保寧嚴加管束。明年二月。亮吉至伊犁。四月。京師旱。特旨釋放回籍。是日午刻即得甘霖。乃將其原書裝潢成卷。常置座右。以作良規。自關新疆以來。漢員賜環之速。未有如亮吉者。既歸。因自號更生居士。由是枕藉墳籍。放浪山水者十年。十四年卒。年六十四。亮吉忼爽有志節。自稱性褊急。不能容物。好古人偏奇之行。每惡胡廣中庸。不悅孔光張禹之爲人。生平好學。不以所遇榮枯釋卷帙。嘗舉荀子語爲人戒。有暇日。故其學於經史注疏說文地理。靡不參稽鉤貫。窮日著書。老而不倦。少好春秋左氏傳。覺杜注望文生義。不遵古訓者十居五六。於是冥心搜錄。以他經證此經。以別傳校此傳。寒暑不輟者十年。遵漢藝文志例。分經爲四卷。傳爲十六卷。訓詁則以賈許鄭服爲主。其掇及通俗文者。亦服子慎之所注。與李虔所續者。截然而兩。徐堅初學記等所引可證也。地理則取班固應劭京相璠等。而晉以前輿地圖經之可信者。間酌採焉。成左傳註二十卷。又輯三傳古義。成公羊穀梁二卷。於六書。通諧聲。謂古之訓詁。卽聲音展轉相訓。不離其初。漢儒言經。咸臻斯義。以遂劉熙釋名。張揖廣雅。魏晉而還。聲類字詁諸作。靡不皆然。故聲音之理明。而六經之旨得矣。成漢魏音四卷。復次轉互之訓。成六書轉注錄十卷。依廣雅例。成比雅十卷。在尙書畢沅幕中最久。預修續資治通鑑。陝西河南各州縣志。常仿宋書州郡志作補三國疆域志二卷。於要害爭奪之可攷者。著於郡縣下。其郡縣次第於未經分割者。據續漢郡國志。分割及廢而復置者。據晉書地理志。上與東漢下與西晉判然不相淆疑者。缺之。又以東晉疆志與實土廣狹不同。僑置名目益多複混。且有不明其地者。取晉書紀傳。參諸宋魏書。及古地志之僅存者。作東晉疆域志四卷。一以義熙爲斷。其州郡之得而旋失。咸附見焉。又用前例。雜採御覽等書所引當時羈

史及見諸晉宋紀傳均確有可據者。作十六國疆域志十六卷。既復纂乾隆府廳州縣志。以今布政司所轄。充以三京。爲圖二十。戶口道里物產悉準一統志輿地表會典等書。詳於城池之興廢。山川之開鑿。暨同知通判駐所。郵亭。鎮堡。水道。陂塘。莫不由今溯古。至形勢戰爭之區。則因事附錄。而名人古蹟冢墓祠宇。概削不載。成書五十卷。其餘詩文集。共八十三卷。詞二卷。樂府三卷。詩話六卷。曉讀書齋雜錄八卷。傳經表。通經表。各二卷。伊犁日記。天山客談。外家記聞。各一卷。曾孫用勲重編刊。附以年譜一卷。史目表二卷。題曰。洪北江遺書。惟公穀古義及西夏國志十六卷。稿佚未梓。

張琦

張琦。字玉可。江蘇陽湖人。嘉慶十八年舉人。以臚錄議敘知縣。道光三年。分發山東。署鄒平縣。歲且盡。琦閱村四百七十。麥無入土者。卽申牒報災。明年正月四日。卽赴省呈牒布政使朱桂楨面言狀。大樹北抑樹南也。曰。大樹北。琦曰。若是。則我界也。民愕然曰。誠鄒平耶。卽不欲以數疋布煩父母官持牒去。後權知章邱鄒平。民時赴訴。琦曰。此於法不當受者也。慰遣之。章邱民好訟。院司道府五署吏皆籍章邱。走書請託。揜揜短長無虛日。琦莅任歲餘。五署內無一紙至。結案二千有奇。亦無一翻控者。五年補館陶。會久旱。風霾三日。沙塵壓麥苗皆死。饑民聚掠。琦禱得雨。乃嚴捕倡者。得富民閉糶居奇狀。分別按治。民大悅。琦因請普糶口糧。人兩月。館陶地褊小。琦造應賑冊。多鄰邑數倍。大吏呵之。忽有詔責問歲饑狀甚切。乃按臨災區。民迎訴賑弊。惟館陶得實。始劾罷他邑。令而厚慰琦。在章邱館陶鄰邑。大蝗。皆不入境。及秋。大雨雹。亦皆在不耕之地。土有訟者。閱其辭不直。則曰。課汝文不至。訟乃至耶。試責以文。不中程。後乃決事。士訟遂稀。其仁術兼濟類如是。館陶地斥鹵不宜穀。又衛水數敗田。琦精求古溝防及區田法。試行之。未遂病卒。琦善醫術。民有病者。設局自診之。尤長人物。不問妍媸老幼。靡不神肖。精輿地之學。

與兄編修惠言齊名。著有戰國策釋地二卷。素問釋義十二卷。詩文集四卷。

華蘅芳

華蘅芳字若汀。無錫蕩口人也。父翼綸。江西永新縣知縣。蘅芳年十四。得程大位算法統宗殘帙。讀而好之。中列飛歸等題。皆世俗所謂難能者。不數日而通其術。父喜其早慧。因購求數理精蘊及九章算術等書相授。由是所學益進。嗣從同縣歲貢生鄭安鳴游。得讀秦九韶李冶朱世傑諸家之書。豁然通天元四元之術。校補數書九章凡數百字。皆宋景昌校勘所未詳者。咸豐初。西人開墨海書館於上海。代數幾何微積重學博物之書。次第譯出。是時西學初入中國。士大夫故見自封。率鄙不措意。獨蘅芳與徐壽能以是相砥厲。目驗手營。然無所得。器械實試。偶有疑難。兩人斷斷。日夜不休。必求渙然冰釋而後已。知三稜玻璃之分光七色也。求之不可得。乃用水晶印章磨成三角以驗之。知槍彈之行拋物線。而徐壽疑仰攻與俯擊之矛盾也。乃設立遠近多鵠射擊。以測視之。其好學深思有如此者。既徐壽以同治元年應兩江總督曾國藩辟。召蘅芳偕往。壽之造黃鵠輪船也。一切繪圖測算。推求動力。蘅芳之力居多。國藩奏設江南機器製造局於上海。遂委蘅芳佐徐壽。經始其事。及國藩用徐壽識。於製造局附設繙譯館。繙譯西書。而蘅芳乃與徐壽分門認任。徐壽任化學汽機。而蘅芳則任算學地質。其後遂各以專門名家。而蘅芳譯本文辭明暢。論者謂足兼信達雅三者之長。西士傅蘭雅曾著譯書事略。備詳其事。居上海幾四十年。覃心譯述。成書十二種。百六十卷。嘗以其間兩至天津。一至湖北。其在天津東局也。駐德使署。購歸新出試彈速率電機一具。見者莫知其用。蘅芳以微分之理解之。理明而用亦明。其在天津武備學堂也。德教習購得法越戰時所用行軍瞭望輕氣廢球一具。主者欲新之。以授學生演放。而教習居奇。久之而功不就。蘅芳乃督工別製。徑五尺。小球用強水發輕氣。以實其中。演放飛升。觀者贊歎。德教習內慚。廬乃竣事。其教授上海格致書院湖北自強學堂兩湖書院及無錫竣實學堂也。一時承學之士。聞風興起。而蘅芳誘掖獎勵。口講指畫。

務以淺顯易明之語。達精奧之思。學生皆翕然稱之。惟蘅芳謂講學之功。不如著書之功爲尤大云。其著作之精者。如開方別術。併諸商爲一商。海寧李善蘭推爲空前絕後之作。積較術三卷。與後來日本推差新法軌轍相同。而積較之成書。遠在推差法十數年前。則其於算學爲先知先覺可知也。弟世芳亦善算學。著有恆河沙館算草。

端木國瑚

端木國瑚。字子彝。浙江青田人。生有異稟。七歲入塾。數月輒盡誦。同學所誦書年十二。或假以尙書。四日即成誦。阮元督學浙江時。試青田畫虎賦。得國瑚。歸與秦瀛言曰。此青田鶴也。檄之來杭州讀書數文書院。學使署西園有定香亭。使賦之。賦成。海內傳誦焉。旋由舉人大挑知縣。改。任歸安教諭十五年。清介絕俗。未嘗妄受一錢。貧士有志者。輒分俸助之。道光十年。宣宗改卜壽陵。那彥成。恩禮以所著地理元文注獻。上問近臣知此人乎。曹振鏞對曰。此浙江名士。臣久聞其名。上使召之。國瑚方倚隱囊注周易。聞命顛出坐後。左右扶之起。乃曰。吾竟以方技名乎。壽陵既定。將以知縣用。原薦者稱國瑚不願上。乃特授內閣中書。道光十三年成進士。仍以知縣改請歸中書。國瑚好學深思。通天人之奧。旁及陰陽術數。尤深於易。同時龔自珍治經有聲。傲視一切。常與國瑚論易。歎爲聞所未聞。朝鮮使臣入貢。通問致殷。勤曰。君所爲定香亭賦。東國人已傳誦。請講易。國瑚爲發揮旁通之旨。皆鑿心而去。詩蠲強生峭。耐人咀嚼。不屑依傍。自成一家。所著有周易指四十卷。周易葬說二卷。太鶴山人詩集十三卷。文集四卷。

王士雄

王士雄。字孟英。號夢隱。海寧人。精醫學。年未冠。遊常山。卽以良醫聞。後車轍千里。活人無算。然視疾之外。足不出戶。手不釋卷。好學深思。人不能及其處方也。用藥極平淡。而治病多奇中。尤長於霍亂。觀其醫案自知。所著有雪

亂論一書。自敘云。霍亂急證也。霍亂而轉筋。則證之尤急者也。然內經發其論。先哲著其方矣。奈往往有惑於弔脚痧之名。而駭爲奇特之病。目眩心疑。妄施治療。抑何陋哉。夫弔脚痧。俗稱也。以其上吐下利之後。筋轉於腓而動掣。與呼乾霍亂爲絞腸痧同其比喻耳。有指鹿爲馬而好爲大言以欺人者。開口傷寒論。動手四逆湯。鹵莽滅裂。似是而非。更可歎矣。若傷寒論乃金科玉律之書。不得草草讀過者。觀其論霍亂。首以熱多寒多分治。是霍亂原有陰陽之殊也。但五苓散外。何竟無一言以及熱證之治。豈聖人垂訓。亦爾偏疏。蓋由書傳兵火之餘。難免遺亡之恨。因此識彼。在學者之自得焉。矧四逆湯係於既吐且利之下。緊接曰小便復利。重申曰下利清穀。是何如其叮嚀而瞻顧耶。苟不識此。而徑妄援其例以誤人者。不得藉口聖人。而自卸其罪也。且是證也。每發於夏秋之間。甚則流行似疫。闔境皆然。謂非暑濕熱三氣之所釀。抑何至於此極乎。其間亦有陰寒之證也。皆是安逸之人。有自取之道。不可因此而概彼也。故雄謂霍亂之屬熱者。主病之常也。衆之所同也。霍亂之屬寒者。他氣之逆也。人之所獨也。憫世人之惑於俗。誣於古。而未明夫常變之道也。因述其大略。參以管窺。而質之大方云爾。又纂溫熱經緯五卷。自敘云。內經云。天有四時五行。以生長收藏。以生寒暑燥濕風。夫此五氣。原以化生萬物。而人或感之爲病者。非天氣有偶偏。卽人氣有未和也。難經云。傷寒有五。有中風。有傷寒。有濕溫。有熱病。有溫病。此五氣感人。古人皆謂之傷寒。故仲聖著論。亦以傷寒統之。而條分中風傷寒濕病濕喝。五者之證治。與內經難經。淵源一轍。法雖未盡。名已備焉。陰符經云。天有五賊。見之者昌。後賢不見。遂至議論愈多。至理愈晦。或以傷寒爲溫熱。或以溫熱爲傷寒。或併疫於風溫。或併風溫於疫。或不知有何氣爲病。或不知有外感之溫。甚至併暑喝二字而不識。良可慨已。我曾王父隨筆中首爲剖論。茲雄不揣愚昧。以軒岐仲景之文爲經。葉薛諸家之辨爲緯。纂爲溫熱經緯五卷。其中注釋。擇昔賢之善者而從之。間附管窺。必加雄按二字以別之。俾讀者先將溫暑濕熱諸病名。了然於胸中。然後博覽羣書。庶不爲其所眩惑。而知所取舍矣。非敢妄逞意見。欲蓋前賢。用質通方。毋嗤荒陋。霍亂論與溫熱經緯合其祖父重慶堂隨筆三種。并醫案歸硯錄四科簡效方等共十四種行世外。尙有蓬窗錄驗方

聖濟方選。雞鳴錄三書。未見刊。

馮桂芬

馮桂芬，字林一，號景庭，江蘇吳縣人。道光二十年一甲二名進士，授翰林院編修。二十三年，充順天鄉試同考官。二十四年，充廣西鄉試正考官。桂芬性穎異，讀書目數行下，講求經濟，與陳慶鏞、姚瑩、趙振祚、曹懋堅、張穆等相切劘。文宗御極，詔中外大臣各舉賢才。大學士潘世恩以林則徐、姚瑩、邵懿辰與桂芬同薦，尋以憂歸。總督陸建瀛聘修鹽法志，咸豐三年，太平軍陷金陵，奉旨與程廷桂、韓崇、胡清綬同辦團練勸捐事。巡撫許乃鈞駐師金陵，羽檄日數至，商略裁復，皆桂芬主之。中書馬釗自乃鈞幕中來，言及蘇松空虛可慮，大營餘丁甚衆，募之爲留守策應之師，計甚便。桂芬即與廷桂定議，令招募，事甫集，而青浦上海諸敵竊發，連陷數縣，釗與主事劉存厚、龔劉青浦一鼓下之，乘勝復諸城。上海平，敍勞賞五品頂戴。六年，遷右春坊右中允。旣而蘇省陷於敵，漕益不支，吳人倡入皖乞援之議，推桂芬具草。桂芬爲陳危急情狀，并時局利鈍及用兵先後所宜，語甚辨。總督曾國藩得書感動，命李鴻章以水陸諸營東下，遂成平吳之功。國藩嘗言：東南大局，不出桂芬一紙書云。嘗著校邠廬抗議四十篇，於經國大計，指陳剴切。先是，吳中困重賦，有破家者。桂芬每謂之曰：汝他日有言責，此第一事也。桂芬讀書即留心漕務，民間苦累，纖悉周知。至是，力請於鴻章具疏入告，得旨蘇松太減三分之一，常鎮減十分之一，民困以甦。同治三年，詔求賢才，安徽巡撫喬松年復薦桂芬以病不果行。六年，以蘇松太三屬辦團及善後功，賞加四品卿銜。九年，鴻章奏桂芬平居講學著書，巋然爲東南耆宿，嗣與商擬江蘇減賦章程，期於實惠及民，謀設上海廣方言館，務求博通西學，卓識宏議，足裨軍國而垂久遠，請破格優獎，賞給三品銜，生平引掖後進，出於至誠，造就多知名士，說經宗漢儒，亦不廢宋精小學，以段玉裁說文解字注引用多誤，作段注考正十六卷，又善爲古文，探源左國，下及唐宋，四方巧傳志者，戶外屨常滿，於疇人家言，研究尤深，著有弧矢算術細草圖解，及西算新

法直解。校定李氏恆星圖。測定咸豐紀元中星表。嘗手製定向尺及反羅經。用以步田繪圖法爲捷合。適官中用部頒五尺弓。田多溢額。因備查會典及皇朝文獻通考戶工部則例。知乾隆年間議丈舊田。用舊行六尺步弓。惟新漲沙田。用新頒五尺步弓。乃援案呈請奏准。鄉里至今德之。廷臣議治黃河。欲輓使南流。一復道光時准徐故道。詔李鴻章妥議。桂芬上書痛陳南流之弊。鴻章用其說入告。事遂寢。桂芬登第後不十稔。卽引疾歸。每春秋佳日。喜作山水遊。尤喜鄧尉。自號鄧尉山人。嘗於光福得元人徐良夫耕漁軒遺址。湖光山色絕勝。於其地築屋數椽。供憑眺。十三年卒於家。年六十六。他著有兩淮鹽法志。蘇州府志。顯志堂集。

吳大觀禮

吳觀禮。字子儁。號圭庵。浙江仁和人。同治十年進士。改翰林院庶吉士。散館授編修。光緒元年大考二等。充四川鄉試副考官。觀禮潛心書史。內行甚篤。先由舉人捐輸獎員外郎。分刑部。巡撫左宗棠廓清全浙。聞其學行。調佐戎幕。入福建克漳州。入廣東克嘉應。及平漳泉龍巖。整飭吏事。悉資籌策。嗣隨左宗棠赴陝西。復自山西追擒匪於直隸山東。相與講求陣法。師行平原曠野。雖夜深天黑。哨隊不亂。觀禮短衣匹馬。軛身先之。時或並轡徐行。共商戰略。傳宜進止。左宗棠深賴之。以功薦保布政使銜。陝西候補道。檢平。左宗棠反。秦度隴軍駐平涼。念隴地寒。觀禮患目疾。令暫駐西安。督轉運。觀禮以從軍而避勞就逸。於義不可。乃註銷所保道員。應會試。遂入翰林。四年春。京師不雨。山西河南大旱。詔求直言。觀禮疏上九事。一尋繹祖訓以求政。一採錄諫書以資箴。一激勸臺諫以輓積習。一實求自強之本。節省海防經費。移濟賑需。一招募晉豫流民。分別安插。一整飭禁兵以嚴宿衛。一慎簡東三省將軍以固根本。一詳計西域善後以固邊防。一改粵海關海兩關歸疆臣督理。以廣贏餘。寬籌備。四月。復疏陳充善端四事。絕弊端三事。弭禍端三事。充善端者曰廣曠咨。曰徠忠讓。曰永儉德。曰大澄敘。絕弊端者一在部院。一在行省。一在營伍。弭禍端者一請專責宋慶清河南伏莽。一請敕陝甘督撫嚴禁漢回仇殺。一捕散

布各省之哥老會。重兩湖督撫之選。左宗棠疏稱觀禮虛心實行。懇摯而有條理。其局外論事。直抒所見。本於忠愛之忱。非建言要譽者比云。尋卒。著有讀鑑隨錄三十卷。圭盒文集六卷。詩集四卷。使蜀日記四卷。

丁取忠

丁取忠。字果臣。號雲梧。湖南長沙人。爲湘中老宿。撰著自娛。不求聞達。而象數一途。尤所深究。嘗自謂少喜步算。而苦無師承。每持等凝思。寢食俱廢。垂四十年。然後古今言算之書。稍稍採集。而心力已衰矣。咸豐改元。幕游昭陵。庚申。應胡文忠公聘。校書於鄂。因得觀乾隆輿圖。又取魏氏海國圖志。作爲密尺定分推算。撰輿地經緯度量表一卷。雖未盡精覈。然亦足備參證。晚年悉移胡文忠所贈修脯。廣刻諸算術。都二十一種。以公海內同好。顏曰白芙堂算學叢書。藏板於古荷池精舍。其所自撰。粟布演草二卷。卽發商生息爲題。或一例而演數題。或一題而演數式。或用真數。或用代數。其式或橫列。或直下。雜然并陳。尙慮覽者卒然無從入手。更撰演草補篇。專詳於文以附之。又爲數學拾遺一卷。則積年讀書之所解悟。友朋之所譚論。往來書牘之所傳述。凡於古今人算書有所發明者。悉哀錄焉。光緒初卒。年七十餘。

李善蘭

李善蘭。字叔。號秋紉。浙江海寧人。諸生。甫入學。偶受教官訓言。遂辭出。終身不就試。少從長洲陳奐受經。通辭章訓詁之學。而於算術。好之獨深。年十歲。竊九章閱之。以爲可不學而能。後得測圓海鏡句股割圓記。所造漸精。因思割圓法非自然。深思得其理。嘗謂道有一貫。藝亦有一貫。測圓海鏡每題皆有法。有草。法者。本題之法也。草者。用立天元一曲折以求本題之法。乃造法之法。法之源也。算術。大至躔離交食。細至米鹽瑣屑。其法至繁。以立天元一演之。莫不能得其法。故立天元一者。算學中之一貫也。並時明算如錢塘戴煦南匯張文虎烏程徐有壬

汪曰楨歸安張福儋皆友善。時相間難。咸豐初。客上海。識英吉利偉烈亞力艾約瑟韋廉臣三人。偉烈亞力精天算。通華言。善蘭以歐几里幾何原本十三卷續增二卷。共十五卷。明時祇譯六卷。因與偉烈亞力同譯後九卷。西士精通幾何者。馳名各國。俗本多。製去七八九十四卷。其第十卷。闡理幽元。非深思力索。不能驟解。故譌奪甚多。善蘭筆受時。輒以意匡補。譯成偉烈亞力言。西士他日欲得善本。當反求諸中國也。偉烈亞力又言。美國羅密士爲天算名家。取代數微分積分合爲一書。分款設題。較若列眉。復與善蘭同譯之。譯成。名曰代微積分拾級。共十八卷。代數變天元四元。別爲新法。微分積分二術。又借徑於代數。實中土未有之奇秘。善蘭隨題剖析。自言得力於海鏡爲多。又與艾約瑟譯重學二十卷。附曲綫說一卷。又與偉烈亞力譯談天十八卷。又譯物學八卷。太平軍陷吳越。從會國藩安慶軍中。相依數歲。同治七年。巡撫郭嵩燾以通算薦。徵入同文館。充算學總教習。總理衙門章京。積官至戶部郎中。晉三品卿銜。善蘭課同文館生以海鏡。而以代數演之。合中西爲一法。成就甚衆。光緒十年。卒於官。年垂七十矣。所著羣經算學考未成。燬於兵。有方圓闡幽一卷。弧矢啓秘三卷。對數探原二卷。塚積比類四卷。四元解二卷。麟德解三卷。橢圓正術解二卷。新術一卷。拾遺四卷。火器真訣一卷。對數尖錐變法釋一卷。級數回求一卷。天算或問一卷。附考數根法一卷。統名則古昔齋算學。善蘭聰彊絕人。蓋有天授。其於算。能執理之至簡。馭數之至繁。故術之無不可通之數。挾之即無不可窮之理。所譯各書。皆信筆直書。了無疑義。世謂梅文鼎悟借根之出天元。善蘭能變四元而爲代數。蓋梅氏以後一人云。

馬文植

馬文植。字培之。武進諸生。其先本蔣姓。祖省三。父伯開。俱業醫。世居孟河。爲馬氏。至文植幾十世。文植幼喪父母。家貧。依大父習醫。纔踰年。通其術。咸豐庚申。太平軍陷常州。文植避居泰興。族人多歸之者。旣而入盩口。涉潯陽。越衡湘而北。過澧浦。伎乃益精。遠近求者日衆。而家業益起。弟姪輩或不給。頗周瞻之。設郵塾會。以全苦節。秦邑

天心港。風波險惡。文植首捐千金。創立救生局。嗣更建蔣氏宗祠。修譜牒。俾族中子弟。讀書習醫。其中貧者給費。使經商。辦法與義莊等。而文植至是。亦既富有矣。文植爲人治疾。用劑不取貴重品。豪侈者心不慚。輒嘗爲果子藥。顯其效常如神。同治癸酉。余鑑病瘵。百醫罔治。一劑而起。俞越病瀉幾殆。以牛羹飲之。立愈。皆鑑官翰林院編修。樹主盟南土。並爲延譽。望以日隆。大江南北。幾於婦孺皆知矣。光緒庚辰初夏。慈禧皇太后疾。廷諭各省督撫進醫。蘇撫承旨。荐文直。隨某觀察入都。藥投而效見。兩宮大悅。寵遇度越他醫。嗣以寺人索賄急。不能厭其欲。遂託昏眩舊疾。疏乞歸。皇太后病既瘳。賜稱字金錢菓食鹿脯。而御醫之名震全國。癸卯四月卒於蘇。年八十四。門人輯其診脈遺稿。都爲一卷。名曰馬氏醫案。洞達本源。悉由心得。世傳爲孟河派。

魁齡

魁齡。瓜爾佳氏。滿洲正紅旗人。咸豐二年進士。以主事用。分工部。五年補官。七年陞員外郎。八年陞郎中。同治元年二月。京察一等記名。以道府用。十月。隨同襄辦文宗顯皇帝喪儀禮成。得旨專以道員用。並賞戴花翎。十二月。授廣東惠潮嘉道。二年二月。調直隸通永道。五月。奉旨開缺。以四品京堂候補。交定陵工程處差委。八月。補內閣侍讀學士。十二月。陞鴻臚寺卿。三年。轉大理寺少卿。四年二月。遷詹事府詹事。充日講起居注官。五月。陞內閣學士。兼禮部侍郎銜。九月。署鑲紅旗蒙古副都統。以文宗顯皇帝孝德顯皇后梓宮永遠奉安定陵禮成。賞加頭品頂帶。十二月。充文淵閣直閣事。五年五月。陞理藩院右侍郎。十二月。調工部右侍郎。兼管錢法堂事務。六年。授鑲黃旗蒙古副都統。轉左侍郎。尋以承辦香山櫻桃溝等處工程草率。下部議處。七年六月。調戶部左侍郎。兼管三庫事務。八月。署右翼前鋒統領。十一月。署熱河都統。八年十一月。兼署刑部左侍郎。充對引大臣。九年六月。以驗收江浙漕糧完竣。下部議敘。九月。兼署吏部左侍郎。十年。調吏部左侍郎。十一年四月。命稽察會同四譯館事務。六月。授總管內務府大臣。七月。以失察內務府銀庫司員於咨行戶部請領銀兩囊內。未經驗堂官商定。輒加入

欠撥銀兩字樣。下部察議。八月。充管理溝渠河道大臣。九月。穆宗毅皇帝大婚禮成。賞加三級。十二年二月。上恭謁東陵。以隨扈車輛不齊。下部議處。三月。隨醇親王辦理普陀峪萬年吉地工程。七月。承修景陵等處工程。十月。賜紫禁城騎馬。十三年三月。充會試副考官。七月。承修昭西陵等處工程。十一月。遷都察院左都御史。尋奉慈安端裕康慶皇太后慈禧端佑康頤皇太后懿旨。皇帝天花之喜。魁齡著賞戴雙眼花翎。旋承修裕陵工程。十二月。穆宗毅皇帝龍馭上賓。魁齡自請撤銷翎枝。允之。尋授鑲紅旗漢軍都統。光緒元年二月。命恭理孝哲毅皇后喪儀。復奉懿旨。派隨醇親王辦理惠陵工程。七月。充崇文門正監督。八月。兼署工部尚書。九月。授工部尚書。管理工部火藥局內務府造辦處。旋以穆宗毅皇帝孝哲毅皇后梓宮奉移山陵。饗殿禮成。賞加三級。二年正月。兼署吏部尚書。八月。充順天鄉試正考官。十一月。奉旨偕工部右侍郎宜振承修孝陵大牌樓工程。魁齡等以需費浩繁。請仿照萬年吉地暨惠陵工程。奏撥專款成案。酌減二成。按八成實銀給發。並請發款採買架木。均如所請。十二月。充經筵講官。三年正月。充文淵閣提舉閣事。調戶部尚書。充稽察內七倉大臣。歷充考驗軍政閱看馬步射考試漢軍中書。直隸鄉試覆試閱卷大臣。殿試讀卷官。拔貢優貢朝考閱卷大臣。管理內務府印鑰。中正殿武英殿精捷營御藥房御膳房太醫院武備院樂部各事務。四年五月。因病開缺。十一月卒。遺疏入。尋賜祭葬。予諡端恪。

詹天佑

詹天佑。字眷誠。廣東南海人。性沈毅。少有大志。每習一業。不底於成。不肯止。同治壬申。曾國藩。李鴻章。奏選通商各省聰穎子弟。肄業外國。時清廷與美敦好。遂派員監督赴美。天佑年十二。與第一批出洋學生之選。隨陳蘭彬容闈往。入威士哈芬小學。光緒戊寅。入耶路大學。習土木工程及鐵路專科。辛巳畢業回國。時路政尙未萌芽。派往福州船政局習駕駛。已派在揚威兵輪操練。及船政局教授。值張之洞督粵。識其才。聘教博學館。暨水陸師學堂。兼任繪海圖。凡七載。戊子。新會伍廷芳總辦津榆鐵路。始任爲工程司。由是津蘆榆關內外萍蓬新易潮汕諸

路。咸著偉績。英國工程研究會聞其名。推爲會員。當時鐵路多爲國有。非得官階莫能升用。天佑納粟。爲光祿寺署正。捐同知。繼以山海關辦路功。陟道員。乙巳五月。委任京張鐵路會辦兼總工程師。丁未四月。總辦陳昭常擢吉林巡撫。天佑始任總辦職。抱負大展。初京張鐵路建築議與。擬撥用京奉鐵路餘利。英人以京奉數路係英款。欲由己主持。然清廷與俄。已有長城迤北鐵路。不歸他國承辦之議。於是兩國相持不已。旋改爲自辦。申言不借材他國。爭議始息。顧京張數百里。崎嶇險峻。途經居庸五桂石佛寺八達嶺。須穴石峒四。而入達嶺三千五百餘尺之峒。適當長城下。開鑿尤艱。創議之初。聞者驚笑。英國報章。至以中國建築此路人才。尙未誕生相揶揄。天佑沉思凝想。測量地勢。始乘其斜度。定越山之計。直行不得達。迺曲折其徑。而以青龍橋岔道城爲角點。每四十尺或三十尺。斜上一尺。車逆而上。跨越居庸關。謂人曰。由此車得轉轍行其巔矣。閱四年。大功以集。全路三百五十餘里。遂得通行無阻。外人來觀者。咸相顧驚愕。歎爲偉業。笑人更侈然居功。自詡造材有成也。而天佑之名始大震。會清廷致察留學生回國成績。學部薦爲第一人。特授工科進士。並保郵傳部丞參。宣統庚戌。主試留學畢業生。一時新學進士。多出其門下。九月。委修京綏路工。任廣東粵漢鐵路總理。未幾。因爭川路。天下騷然。武漢軍興。民國成立。譚人鳳受命爲粵漢鐵路督辦。天佑爲會辦。秋。交通部收川漢鐵路爲國有。設漢粵川路總公所於漢口。黃興繼譚職。二年正月。岑春煊又繼黃。甫半載。更易馮元鼎。入閏月而易人四。至是。始興工築湘鄂線之武昌站。魚套站。天佑因念中國工程事業未精進。宜有學會。研究工程學術。遂聯合粵工程師會。路工同人會。爲中華工程師學會。被選爲會長。三年七月。元鼎去職。天佑繼其後。簡任交通部總監。時民國大借款未成立。而歐戰方始。估料價值倍增。工款不繼。爰就款計工。先築湘鄂線之武昌兩軌。三載而告成。一時稱便。五年冬。香港大學嘉其勞。特贈法學博士。翌年八月。中德宣戰。退漢宜線總工程師德人。借款存柏林德華銀行者。英金數十萬鎊。悉不能提用。復勉力圖竟前功。不稍止。湘亂既定。更接通長株路線。長二百八十英里。八年二月。諸協約國以俄亂未已。有共同管理俄國鐵路之議。會於海參崴哈爾濱。惟俄路多連中國境。國權所繫。必起與爭。

衡。天佑遂受任爲技術代表。長驅與會。時北地苦寒。冰雪載道。晝日蒞事。夜燭治文書。審議案。務一一求得要領。各國初以吾國易與。欲屏參預權。天佑據理力爭。獲中東路華工程師駐足地。卒以此遭忌。中毒病勢漸不支。謁假返。四月二十日。至漢口。入濟醫院。又四日。卒。年僅五十有九。中外咸痛惜之。天佑口訥。詘於言辭。嘗謂當衆演說。其難乃視最難之山峒大橋工程爲甚。對人談笑。一本於自然。不事矯飾。其持躬謙益。絕無驕矜之氣。所著有鐵路名詞表。京張鐵路工程紀略。暨圖制等。行於世。

第五編 藝術 文學

王鐸

王鐸，字覺斯，河南孟津人。明天啟二年進士。授編修。府陞少詹事。充經筵講官。崇禎十一年春，進講中庸。唯天下至聖章，旁及時事。有白骨如林語。莊烈帝切責其敷衍支吾，不能發揮精義。鐸惶懼，俯伏案前待罪。明年，大學士張至發奏東宮出閣時，設侍班四人，講讀六人，校書二人，皆以翰林及詹事坊局兼任。時廷議舉論德黃道周，至發屏之，而鐸爲侍班。尋乞假歸里。十七年三月，擢禮部尙書。未赴，流賊李自成陷京師。明福王朱由崧立於江寧。鐸與詹事姜曰廣並授東閣大學士。道遠未至。大學士馬士英入輔政。出史可法督師揚州。嗾其黨朱統纘劾曰：廣去之，鐸至，遂爲次輔。是年十二月，刑部尙書解學龍治從賊獄，仿唐制六等定罪。庶吉士周鍾會爲賊草勸進表，又上書勸賊早定江南，與率先從逆之光時亨僅列二等。擬緩決。士英傳旨令再議。學龍謀之，鐸欲緩周鍾光時亨死，伺士英注籍上之，且請停刑。鐸即擬俞旨，寢以詳慎平允。士英聞之大怒，削學龍籍，而置鐸不問。本朝順治二年五月，豫親王多鐸克揚州，將渡江，明福王走蕪湖，留鐸守江寧。鐸同禮部尙書錢謙益等文武數百員出城迎豫親王，奉表降。尋至京候用。三年正月，命以禮部尙書管宏文院學士。充明史副總裁。六月，賜朝服。四年，充殿試讀卷官。六年正月，授禮部左侍郎。充太宗文皇帝實錄副總裁。十月，遇恩詔加太子太保。八年，晉少保。是年三月，疏言帝王御世，莫不重道尊師。今上親政伊始，百度維新，請幸學釋奠，並令祭酒司業諸臣於彝倫堂進講。先期敕工部修葺聖廟，仍照例咨調衍聖公及四姓博士赴京陪祀，以襄盛典。得旨：釋奠大典允宜舉行，其令擇吉具儀以進。葺文廟，如所請行。五月，御史張煊疏劾吏部尙書陳名夏私庇南人，以鐸資深不得陞尙書，反陞資淺右侍郎陳之遴爲證。名夏謂之遴陞任，由尙書譚泰侍郎李率泰等徧詢九卿，莫有言鐸居官優

者。乃推陞之。得辨釋。九年三月。授鐸禮部尙書。而鐸先以二月間祭告西嶽江濱事竣。乞假歸里。卒於家。事聞。贈太保。賜祭葬如例。諡文安。鐸博學好古。工詩古文。有集行世。書法有擬山園石刻。諸體悉備。畫山水宗荆關。邱壑偉峻。皴擦不多。以墨染作氣。傳以淡色。沉沉豐蔚。意趣自別。

△金人瑞

金人瑞。長洲人。初名喟。字若采。一字聖嘆。生而穎異。個儻不羈。明亡後。終日兀坐。以讀書著述爲務。所爲詩文。騰踔奮發。熊熊有光。學使按臨蘇郡。愛其才氣拔置第一。常踞貫華堂上。講解經義。發聲嘹亮。顧盼自雄。凡一切經史子集。箋疏訓詁。與夫釋道內外諸典。以及稗官野史。九夷八蠻之所紀載。靡不供其齒頰。人咸以徐文長目之。最喜讀易。講乾坤兩卦。多至數十萬言。秘不示人。故所講易理不傳。僅於離騷序中。略及一二而已。人瑞爲文。怪誕不中程法。補博士弟子員。會歲試。以如此則動心否乎命題。其篇末有云。空山窮谷之中。黃金萬兩。露白霞蒼。而外有笑一人。試問夫子動心否乎。曰。動動動。連書三十九字。學使怪而詰之。人瑞曰。祇注重四十不三字耳。越歲再試。題爲孟子將朝王。人瑞不着一字。第於卷之四隅。書四吁字。曰。七篇中言孟子者。僅指難數。前乎此題者。已有四十孟子。是孟子二字。不必作也。至云朝王。則如見梁惠王。梁襄王。齊宣王。皆朝王耳。是朝王二字。亦不必作也。題五字中。祇有將字可作。宗師不見演劇者乎。王將視朝。先有內侍四。左右立而發吁聲。此實注重將字之微意也。以是每被黜。笑謂人曰。今日可還我自由身矣。客問自由身三字出何書。曰。酒邊多見自由身。張籍詩也。忙聞皆是自由身。司空圖詩也。世間難得自由身。羅隱詩也。無榮無辱自由身。寇準詩也。三山雖好在。惜取自由身。朱子詩也。客復問聖嘆二字何義。曰。予名喟。聖嘆。即喟然嘆之意。論語中有二喟然嘆。在顏淵則爲嘆聖。在曾點則爲聖嘆。春風沂水。予其爲點之流亞歟。年四十。眇勉剋述。丹黃不輟。貫華堂中。書如獼猴。心血耗竭。白髮星星矣。人有以朱子學術政事孰優爲問者。不答。固詰之。曰。不觀魯論乎。篇章次第。已明言之矣。問者仍不省。人瑞

曰。學而第一。爲政第二。至今論朱子者。卒無以易。又好評書。以莊子離騷史記杜詩水滸西廂爲六才子書。縱橫批評。明快如火。辛辣如老吏。筆躍句舞。一時見者。歎爲靈鬼轉世。其稱史記。謂史公發洩一腔宿怨。所以於游俠貨殖諸傳。特地着精神。其餘諸記傳。凡遇揮金殺人之事。便噴噴贊歎不置。一部史記。祇緩急人所時有六個字。是一生著書之本旨。水滸傳則不然。施耐菴本無宿怨可洩。第以飽暖無事。又值心閒。見史有宋江三十六人句。喜其足供揮洒。遂借題弄墨。寫出自家錦心繡口。故是非不謬於聖人。後人不知。強加忠義二字於上。比諸史公發憤著書之例。此大謬也。其批西廂。祇講文情。不講曲譜。明知後四齣爲關漢卿續。非王實甫本。亦略示軒輊。不加刪削。以奇特之識見。批文章之妙處。別作奇警之新熟字。以爲命名。如西廂有烘雲托月法。移堂就樹法。月渡迴廊法。羯鼓解穢法。那轆法。深淺恰好法。起倒變動法。水滸有倒插法。夾敘法。草蛇灰線法。大落墨法。綿針泥刺法。背面鋪敘法。弄引法。獺尾法。正犯法。略犯法。極省法。欲合故縱法。鸞膠續絃法。其駁博審辨如此。亥子之交。莊騷史水滸。批註旣竣。繼批杜詩。以爲能將詩聖之詩。句解明晰。則杜詩一日不滅。句解亦一日不滅也。宵深不寐。勤心從事。乃伏案三月。未終一卷。一夕。忽夢有人語之曰。諸詩皆可說。惟古詩十九首不可說。人瑞引以爲戒。後大醉。縱談青青河畔草一章。未幾。罹於禍。人瑞豪飲。喜讀離騷。嘗朗誦以下酒。醉則鬚眉戟張如蝟毛。或擲鐵燈檠於地。初明之亡也。吳下講學立社之風。猶盛。各立門戶。互相推排。人瑞以驚才絕艷。遨遊其間。尤善王斯山。藉其資給。遇貴人。輒嬉笑怒罵以爲快。以是大吏頗憾之。時吳令任維初。蒞任甫二月。比徵錢糧甚急。吳民大憤。會世祖崩。哀詔至。吳巡撫朱國治設幕哭臨。吳倪用賓等十八人議逐令。搶入進揭帖。繼至者千餘人。國治大駭。擒用賓等。以諸生於哀詔初臨之下。集衆千百。上驚先帝之靈。罪大惡極。奏入。命大臣莅江寧嚴訊。不分首從。凌遲處死。沒其財產。人瑞獄中寄書家中曰。殺頭至痛也。籍沒至慘也。而聖嘆以無意得之。不亦異乎。若朝廷有赦令。或可相見。不然。死矣。臨刑寄妻子書云。字付大兒看。醜菜與黃豆同吃。大有胡桃滋味。此法一傳。我無遺憾矣。官見之。笑曰。金聖嘆死猶侮人。時五月二十日也。同死者。倪用賓沈瑯。顧偉業。張韓。來獻琪。丁觀生。朱時若。朱章培。

周江、姚剛、徐玠、葉琪、薛爾張、丁子偉、王仲儒、唐堯治、馮郅。

侯方域

侯方域，字朝宗，河南商丘人。祖執蒲，明太常卿。父恂，戶部尙書。季父恪，祭酒。皆以東林忤閹黨。方域少間業於上虞倪元璐。元璐謂文必馳騁縱橫，務盡其才。而後軌於法。嘗游江左，寓金陵。司業山陰周鳳翔得其所撰策，立達訪之。談讌彌日。是時主復社者，太倉張溥，貽書推爲領袖。主幾社者，青浦陳子龍，贈詩曰：漢家宣室爲君開。其他海內清望，胥締附之。性豪邁，不羈。嘗與楊廷樞、夏允彝、薛登、金山、臨江、悲歌，指評當世人物。而料事尤多奇中。方恂之督師援汴也。方域進曰：大人受詔討賊，廟堂議論牽制，願破文法，以賜劍首，誅一甲科令守之。不應徵辦者，而晉帥許定國師噪，當斬以徇軍。事辦威立，疾馳渡河，收中原，土寨團結之衆，以合左良玉於襄陽。約陝督孫傳庭，犄角並進。則汴圍不救自解矣。恂叱曰：此跋扈也。小子多言，趣遣歸。道遇永城叛帥劉超。方域曰：君所坐不過殺一御史，奈何遽反。今畿輔有警，君帥所部疾走勤王，必可轉禍爲福。卽不然，亦瀟洗惡名。失此則身死名裂，超不能從。懷寧阮大鍼，故魏闈義兒也。屏居金陵，謀復用。諸名士共檄大鍼罪，作留都防亂揭，宜與陳貞慧及貴池吳應箕主之。大鍼愧且悲，然無可如何。知方域與二人者相善也。私念因方域以交於二人，事當已。乃屬其客來交權。方域覺之，謝客，弗與通。大鍼乃大怒，恨次骨。甲申，南都擁立，大鍼驟枋用，興大獄，將盡殺黨人。捕貞慧入獄。方域夜出走，渡揚子江。依鎮帥高傑得免。生平頗以經濟自詡，任俠使氣。然一語合，輒吐肝肺，譽之不容口。旣負才不試，以明經累舉於鄉，輒報罷。順治八年，中式副榜。初放意聲伎，已而悔之，發憤爲詩古文，倡韓歐學於舉世。不爲之日，嘗游吳下，將刻集。集中文未脫囊者，一夕補綴立就。人益奇之。順治十一年卒，年三十七。方域健於文，與寧都魏禧、長洲汪琬，並以古文擅名。禧策士之文，琬儒者之文，而方域則才人之文。蓋其天才英發，吐氣自華，善於規撫，絕去蹊徑，不戾於古，而亦不泥於今。當時論古文率推方域爲第一。遠近無異詞。所著有壯悔堂文集。

四憶堂詩集

尤侗

尤侗字展成。江蘇長洲人。少博聞強記。弱冠補諸生。才名籍甚。歷試於鄉不售。以貢謁選。除直隸永平府推官。吏治精敏。不畏強禦。怙勢梗法者。逮治無所縱。坐撻旗丁。鐫級歸。康熙十八年。召試博學鴻儒。授翰林院檢討。分修明史。撰志傳。多至三百篇。居三年告歸。先是侗所作詩文。流傳禁中。世祖以才子目之。後入翰林。聖祖稱爲老名士。天下羨其榮遇。比於唐李白云。三十八年。聖祖南巡至蘇州。侗獻平朔頌萬壽詩。上嘉焉。賜御書鶴樓堂扁額。四十二年。駕復幸吳。賜御書一幅。卽家授侍講。蓋異數也。侗性寬和。與物無忤。汲引後進。一才一藝。獎藉不容口。兄弟七人。友愛無間。白首如垂髫。四十三年卒。年八十七。其詩詞古文。才既富贍。復多新警之思。體物言情。精切流麗。每一篇出。傳誦徧人口。著述甚富。全集五十卷。餘集七十卷。鶴樓堂集十卷。

毛晉

毛晉原名鳳苞。字子九。後改名晉。字子晉。號潛存。江蘇常熟人。明諸生。以布衣自處。父清。以孝弟力田起家。楊漣宰常熟時。擇縣中有幹識者十人。每有大役。倚以集事。清其首也。晉奮起爲儒。好古博覽。構汲古閣。目耕樓藏書數萬卷。延名士校勘。刻十三經十七史。古今百家。及從未梓行之書。天下購善本書者。必望走隱湖毛氏。所用紙。歲從江西特造。厚者曰毛邊。薄者曰毛太。至今猶沿其名。晉爲人孝友恭謹。與人交有終始。好施予。遇歲歉。載米徧給貧家。水鄉橋梁。往往獨力成之。推官雷某贈詩曰。行野漁樵皆謝賑。入門僮僕盡鈔書。蓋紀實也。所著有和古今人詩。野外詩題跋。虞鄉雜記。隱湖小志。海虞古今文苑。毛詩名物考。宋詞選。明詩紀事。詞苑英華。僧宏秀集。隱秀集。汲古閣書目。共數百卷。其所藏秘籍。以宋本元本橢圓印別之。又以甲字印鈐於首。其餘藏印用姓名及

汲古字者以十數別有印曰子孫永寶曰子孫世昌曰在在處處有神物護持曰開卷一樂曰筆研精良人生一樂曰茲溪曰弦歌草堂曰仲雍故園人家曰汲古得修頌

毛際可

毛際可字會侯浙江遂安人順治十五年進士授河南彰德府推官政知城固縣調祥符康熙十八年舉博學鴻儒罷歸尋膺卓異行取賜袍服以事去官少負雋才淹雅博聞以文章名居官有異政爲推官翦逆豪猾歸德防將倚勢恠掠窮治之皆棄市然於疑獄多所平反盜犯房有才等十三人奏當大辟力白其冤釋之宰城固值歲旱禱涌泉洞之龍湫下山卽雨及官祥符巡撫聞其司刑有名委以通省欽部件戴星出入無虛日直大兵過有肆擾者立白其帥寘之法及歸益致力爲古文虛懷善下輒好人譏彈其文至於朋友往還必以無所規益相督勉尤樂汲引後進四方從遊恆屢滿戶外其學不及毛奇齡之博而亦不似奇齡之強悍堅僻二十二年浙撫修通志聘爲總裁康熙四十七年卒年七十六著有春秋五傳考異十二卷松皋文集十卷安序堂文鈔三十卷松皋詩選二卷拾餘詩藁四卷浣雪詞鈔二卷黔遊日記一卷

王士禛

王士禛字貽上號阮亭別號漁洋山人山東新城人順治十五年進士十六年授揚州府推官康熙三年總督耶廷佐巡撫張尙賢疏薦其品端才敏奉職最勤總河朱之錫亦以委盤河庫綜覈精詳協助隄工剷除蠹弊疏薦下部敘錄內陞禮部主事遷本部員外郎八年司權清江關遷遷戶部郎中十一年充四川鄉試正考官遷丁母憂十五年六月仍補戶部郎中十七年正月召對懋勤殿諭吏部曰王士禛詩文兼優以翰林用遂授侍講二月轉侍讀十月充順天武鄉試正考官十九年十二月遷國子監祭酒二十二年十月同司業劉芳喆疏言自漢高

帝時以太牢祀孔子。至唐宋元而隆。以王號。明化治間。尊以八佾十二籩豆。其改大祀而爲中祀。則嘉靖九年張璉之議。謂孔子生未得位。不當舞八佾。不知以位言之。非但不得舞八佾。併不得舞六佾。乃前代尊崇之。有加無已者。以道德不以位也。且禮祭從生者。以天子而祀其師。自當用天子禮樂。乞敕禮臣與廷臣詳議籩豆樂舞之制。又疏言。從祀諸賢諸儒。各號位次。尙宜釐正。如十哲之位。自明嘉靖間。職去封爵之後。稱冉子者凡三。未有辨別。兩廡諸賢諸儒。從祀者也。至有明一代。理學肇自霍州學正曹端。其學以誠敬爲主。禮部尙書章懋。由博返約。斂華就實。國子監祭酒蔡清所著蒙引。尤見窮理之功。禮部侍郎呂柟左春芳贊善羅洪先刑部侍郎呂坤操履篤實。咸有著書。發明聖道。此明儒之當從祀者也。有絳州貢生辛全。生值明末。力以正學爲己任。著書甚富。以時代稍近。未敢輕議。乞敕進遺書。或可仰裨聖學之萬一。又疏言。國子監所貯十三經注疏。二十一史版刊。自明初至崇禎十二年。修補後。迄今四十餘載。不免漫漶殘缺。宜及時鳩工修補。併敕江南督撫察訪前明南監經史版。如未散佚。即行令學臣收貯儒學。尋經閣中。以嘉惠來學。四疏並下部議。部臣以籩豆樂舞。各號位次。應俟頒發會典遵循。增祀諸儒及徵進遺書。均俟明史告成覈定。其經史南北版修補收貯事。如所請行。二十三年十月。遷少詹事。十一月。奉命祭告南海。二十四年。請假歸里。旋丁父憂。二十九年正月。補原官。三月。遷都察院左副都御史。尋充經筵講官。國史副總裁。十月。遷兵部督捕侍郎。三十年二月。充會試副考官。三十一年八月。調戶部右侍郎。三十三年六月。轉左。充淵鑿類函總裁。三十五年正月。奉命祭告西嶽。西鎮江瀆。三十七年七月。擢左都御史。三十八年六月。御史郭金城奏裁冗員。事下吏部同都察院酌定。應留御史員數。士禎言。御史二十四員。必不可減。從之。十一月。遷刑部尙書。坐贖循革職。四十九年十二月。詔加恩公事里。誤年。臻。毫。蓋。在籍諸臣。復士禎尙書銜。五十年五月卒於家。年七十有八。所著有帶經堂集。皇華紀聞。池北偶談。香祖筆記。居易錄。分甘餘話。粵行三志。秦蜀驛程。隨蜀餘聞。漁洋詩話。國朝諡法考諸書。兄士祿。順治十六年進士。官考功司員外郎。士祜。康熙九年進士。並能詩。士禎爲編錄成集。乾隆三十年四月。諭閣臣曰。原任刑部尙書王士禎。積學工詩詞。其幹濟風節。爲

本朝諸人最。從前未數易名之典。宜示褒榮。以爲稽古者勸。其察例議諡。賜諡文簡。其名久作士正。三十九年十一月諭曰。王士正之名。原因恭避廟諱而致。但所改正字與原名音太不相近。恐流傳日久。後世幾不復知爲何人。今改爲士禛。庶與其弟兄行派不致混淆。凡各館書籍記載俱一體照改。

王猷定

王猷定。字于一。江西南昌人。拔貢生。父時熙。明進士。官太僕寺卿。天啟中。名在東林。猷定工詩古文。爲人倜儻自。對客斷斷講論。每舉一事。輒原其本末。聽之醉心。少時馳騁聲伎狗馬。陸博神仙迂怪之事。無所不好。故產爲之傾。史可法聞其賢。徵爲記室。可法迎立福王。傳檄四方。情文動一時。皆猷定爲之謀也。袁繼咸奉命江楚。亦疏薦猷定可大用。猷定堅臥。復書累千言。道不樂仕進意。旣入國朝。遂絕意人世。日以詩文自娛。晚寓浙中西湖僧舍。大吏重其人。皆虛左事之。按察使宋琬。尤與相契。已而琬以事被逮。賓客散亡。猷定獨周旋患難中。所爲文多鬱勃。如殷雷未奮。又如崩崖壓樹。材槎盤礴。旁枝得隙。突然干霄。自明季公安竟陵之說盛行。文體日瑣碎。猷定能獨開風氣。名與方域相埒。論者謂其自出機杼。成一家言。然如義虎揚琵琶等傳。頗苦其誕而不經云。其行書楷法。亦自通神。所著曰四照堂集。

朱彝尊

朱彝尊。字錫鬯。浙江秀水人。明大學士國祚曾孫。康熙十八年。詔舉博學鴻儒科。以布衣試入選者。富平李因篤。吳江潘耒。無錫嚴繩孫及彝尊四人。皆除翰林院檢討。與所擢五十人同纂修明史。二十年。充日講起居注官。是年秋。充江南鄉試副考官。二十二年。入直南書房。命紫禁城騎馬。賜居禁垣東。數與內庭宴。被文綺時果之資。二十三年元日。南書房宴歸。聖祖以肴果賜其家人。彝尊皆恭記以詩。是時彝尊方輯瀛洲道古錄。私以小笥錄四

方經進書。爲學士牛鈕所劾。降一級。二十九年。補原官。尋乞假歸。帝南巡江浙。彝尊屢迎駕於無錫。召見行殿。進所著經義考。溫諭褒獎。賜御書研經博物扁額。彝尊自少時以詩古文辭見知於江左之耆儒遺老。又博通書籍。顧炎武聞若璩皆極稱之。年逾五十。以布衣入翰林。數被恩遇。主江南試時。作告江神文。貢院誓神文。以自勵。所撰經義考共三百卷。做鄱陽馬氏經籍考而推廣之。自周迄清。各疏其大略。分存佚闕。未見四門。於十四經外。附以逸經。茲緯。擬經家學承師宣講立學刊石書壁。鏤版著錄。而以通說終焉。乾隆四十二年。高宗親製詩篇。題識卷首。命浙江巡撫三寶刊行。世以爲榮。彝尊之在史館也。凡七上總裁書。論定凡例。訪遺書。請寬其期。毋如元史之迫於時日。多所乖謬。辨從亡致身錄之不足信。謂方孝孺之友宋中珩王孟暹鄭叔度林公輔諸人。咸不及於難。則文皇當日無并其弟子友朋爲一族戮之之事。其所謂九族者。本宗一族也。謂東林多君子而不皆君子。異乎東林者。亦不皆小人。作史者不可先存門戶之見。而以同異分邪正賢不肖。世皆以爲有識。彝尊又嘗慨明詩自萬曆後。作者散而無統。作明詩綜百卷。於公安竟陵之前。銓次稍詳。若啟禎死事諸臣。復社文章之事。亦力爲表揚之。其自序云。或因詩而存其人。或因人而存其詩。閒綴以詩話。述其本事。期不失作者之旨。彝尊詩不名一格。少時規櫟王孟。未盡所長。中年以後。學問愈博。風骨愈壯。長篇險韻。出奇無窮。益都趙執信論清代之詩。以彝尊及王士禛爲大家。謂王之才高而學足以副之。朱之學博而才足以運之。彝尊又好爲詞。其體近姜白石張玉田。加恢宏焉。所著詞綜三十四卷。日下舊聞四十二卷。曝書亭集八十卷。歐陽子五代史注。瀛州道古錄。則其所草創未成者。四十八年卒。年八十一。

汪琬

汪琬。字茗文。江蘇長洲人。順治十二年進士。授戶部主事。充大通橋監督。遷員外郎。改刑部郎中。以奏銷案降北城兵馬司指揮。再遷戶部主事。權江寧西新關。以疾假歸。結廬堯峯山。閉戶著書者九年。康熙十八年。以左都御

史宋德宜。翰林院掌院學士陳廷敬薦。召試博學鴻儒。列一等。授翰林院編修。纂修明史。在史館六十日。撰史囊百七十五篇。以病乞歸。康熙二十九年卒。年六十七。初聖祖嘗問廷敬。今世誰能爲古文者。廷敬舉琬以對。遂薦琬。應鴻博。及琬病歸。帝南巡。還次無錫。諭巡撫湯斌曰。汪琬久在翰林。文名甚著。近又聞其居鄉不與外事。是誠可嘉。特賜御書一軸。當時榮之。琬少孤。自奮於學。銳意爲古文辭。古文自明代膚濫於七子。纖佻於三袁。至啟禎而敝極。清初風氣還醇。一時學者始復唐宋以來之矩矱。琬學術既深。軌轍復正。其言大抵原本於六經。灑灑疏暢。頗近南宋諸家。廬陵南豐固未易言。接跡唐歸無媿色也。其敘事尤善。一時公卿誌銘表傳。必以琬爲重。詩則兼范成大。陸游元好問之勝。少年所擬六朝三唐諸體。則夷然棄之。嘗歎文章家好名寡實。鮮自重特立之士。故褒譏不少寬假。又性忤急。不能容人過。意所不可。輒面批折人。雖詩文小得失。不肯稍徇。以是人多嫉之。士友相傳。汪鈍翁喜嫚罵人。鈍翁琬號也。然坦率無城府。後進片語之佳。稱揚不容口。遇其服善處。不難俛首至地。常語人曰。學問不可無師承。議論不可無根據。出處不可無本末。其大指如此。其所歷京朝官。雖僚屬。皆有名蹟可紀。爲刑部郎。援經附律。務毋枉縱。爲兵馬司指揮。懲豪家奴以勢凌脅人者。見路死暴屍。親爲收瘞。任滿去。民送之者溢衢巷。再入戶部。盡心鉤校。議民輸糧。加漕贈外五米十銀。爲官收官兌法。而旗弁之橫惠。讓裁吳三桂兵餉以充國用。而強藩之勢沮。其端皆自琬發之。琬前自輯詩文爲類囊六十二卷。先刊板置之堯峯。皆山閣。歸田後十年。爲續囊三十卷。又取明史列傳囊。汪氏族譜及其父行略爲別集二十六卷刻之。後復取其愜意者爲堯峰詩文鈔。屬門人林佶繕之。惠周惕序之。世間多有其本。而類囊遂不顯。

汪士鋐

汪士鋐。字文升。號退谷。康熙三十六年一甲一名進士。授翰林院修撰。官至右中允。入直南書房。少受學於份。與份暨兄鈞弟倓。俱知名。時稱吳中四汪。士鋐善詩古文詞。尤工書法。與姜宸英齊名。號姜汪。其論書謂不學古隸。

不知波折往復之理。不習晉帖。不知回環牽結之妙。不玩唐碑。不知古人各自成家之法。去其短。集其長。毋矜奇。毋尚險。庶幾歸於正。而合於古。性廉介。嘗扈從太原。大吏餽翰林人各二百金。士鉉言於衆曰。彼厚斂於民。而以翰林爲口實。不可。立共卻之。又輪漕運事。謂自古善言理漕者。莫如唐之劉晏。晏爲江都轉運。治船運漕。數倍其值。人皆以爲浮費。晏獨不惜。船場旣興。人人充足。船亦數年不壞。後人反其術。工甫畢。人皆凍餒。船亦隨敗。以是知損上益下。謂之益。惟留其有餘。則事可久。而功易成。其言深中利弊。生平著述甚富。尤勤於考古。陳鵬年出壙。鶴銘於江。士鉉爲考一卷。時稱詳覈。他著又有長安宮殿考。全秦藝文志。三秦紀聞。玉堂掌故。華嶽志。元和郡縣志補闕。近光集。餘集。四六金樞。賦體麗則。秋泉居士集。

吳綺

吳綺。字蘭次。江蘇江都人。五歲能詩。長益淹貫。順治十一年拔貢生。以薦授祕書院中書舍人。奉詔譜楊繼盛樂府。遷兵部主事。游歷郎中。授浙江湖州府知府。多惠政。不畏疆禦。湖州人稱爲三風太守。謂多風力。尙風節。饒風雅也。未幾罷歸。貧無田宅。購廢圃以居。有求詩文者。以花木潤筆。因名其圃曰種字林。日讀書坐臥其中。簞瓢屢空。泊如也。性坦易。喜賓客。在湖州時。四方名流過從。賦詩遊燕無虛日。所作詩詞駢體合編爲林堂蕙集二十六卷。詩才華富豔。瓣香晚唐。詞最有名。兒童婦女皆能習之。以有把酒祝東風。種出雙紅豆之句。號曰紅豆詞人。又嘗著嶺南風物記。敘述簡雅。與宋范成大桂海虞衡志相伯仲。輯宋金元詩。永能刊除宋人生硬之病。與元人綴媚之失。選聲集。標舉平仄。足爲倚聲家程式。

吳兆騫弟兆宜 願貞觀

吳兆騫。字漢槎。江蘇吳江人。少有雋才。童時作瞻賦五千餘言。其師計名見之。詫曰。此子異時有盛名。然不免於

禍矣。及長。繼復社主盟。才名動一世。時有江左三鳳凰之目。謂華亭彭師度。宜興陳維崧。及兆騫也。順治丁酉。年。舉於鄉。以科場事逮繫。遣戍寧古塔。居塞上二十三年。侘傺不自聊。一發之於詩。嘗作長白山賦數千言。詞極瑰麗。聖祖遣侍臣祭長白山。歸獻之。上動容咨嗟。後其友顧貞觀。商於納蘭性德。徐乾學。爲納綬。康熙二十年。蒙恩赦還。踰三年卒。年五十四。著秋笈集三卷。西曹雜詩一卷。前集一卷。雜體詩一卷。後集一卷。雜著一卷。兆騫駢體文。驚才絕艷。詩風骨遒上。出塞後尤工。故當時以才人目之。弟兆宜。諸生。亦善屬文。嘗註徐庾二集。又註玉臺新詠。才調集。韓偓詩集。其箋釋詞藻。頗足備參考云。顧貞觀。字遠平。江蘇無錫人。康熙十一年舉人。官內閣中書。貞觀美風儀。才調清麗。文兼衆體。能詩。尤工樂府。少與吳兆騫齊名。年二十餘。遊京師。題詩寺壁。柏鄉魏裔介見之。卽日過訪。名遂大起。吳兆騫以事戍寧古塔。貞觀悉力爲之贖。得入關。嘗作金縷曲二闋。以寄兆騫。納蘭性德見之。曰。山陽思舊之作。都尉河梁之什。並此而三矣。爲人儁爽。敦古誼。聞塞外多暴骨。卽募僧斂金。徧歷戰場。收瘞無算。又遊蹤所至。贖去鄉黨身者數家。晚歲移疾歸。構積書巖。坐擁萬卷。臨歿時。自選詩一卷。授門人杜詔。不滿四十篇。其嗜古淡不自足如此。所作彈指詞。聲傳海外。與陳維崧。朱彝尊。稱詞家三絕云。他著有繡塘積書巖等集。

吳大偉業

吳偉業。字駿公。一字梅村。江南太倉人。明崇禎四年。一甲二名進士。授編修。十年。大學士溫體仁罷。張至發柄國。極頌體仁。孤執不欺。偉業疏言。體仁性陰險。學無經術。狎暱小人。繼之者正宜力反所爲。乃轉盛稱其美。勢必因私。踵陋。盡襲前人所爲。將公忠正直之風。何以復見。海宇禍患。何日得平。疏入。不報。尋充東宮講讀官。又遷南京國子監司業。轉左庶子。福王時。授少詹事。與太學士馬士英。尙書阮大鋮。不合。請假歸。清順治九年。兩江總督馬國柱。遵旨舉地方品行著聞及才學優長者。疏薦偉業來京。十年。吏部侍郎孫承澤。薦偉業。學問淵深。器宇凝宏。

東南人才無出其右。堪備顧問之選。十一年。大學士馮銓復薦其才品足資啓沃。俱下部知之。尋詔授秘書侍講。十二年。恭纂太祖太宗聖訓。以偉業充纂修官。十三年。遷國子監祭酒。尋丁母憂歸。康熙十年卒。博學工詩。名滿區宇。山水得董黃法。清疎韶秀。風神自足。可貴也。有梅村集。綬寇紀略。太倉十子詩選。

何焯

何焯。字岬瞻。江蘇長洲人。先世曾以義門旌。焯少讀書。數行並下。爲文才思橫溢。性耿介。廉於財。雖屢炊未具不計也。康熙四十一年冬。聖祖南巡駐涿州。召直隸巡撫李光地語詢草澤遺才。光地以焯薦。召直南書房。明年。賜舉人。試禮部下第。復賜進士。改翰林院庶吉士。仍直南書房。尋命侍讀皇八子府。兼武英殿纂修官。及散館。得旨再教習三年。尋丁內外艱。又十年。始復以光地薦授編修。焯初受知於尙書徐乾學。爲忌者所中失歡。翁叔元延致之。及叔元劾尙書湯斌。焯上書請削門生籍。天下快焉。授編修之明年。驚至熱河。有構飛語以聞者。上還京。卽命收繫。及所司盡籍其邸中書籍以進。上覽之曰。是固讀書種子也。而其中曾無失職缺望語。又見其草藁有辭吳縣令餽金。益異之。乃盡以其書還之。罪止解官。仍參書局。焯卽趨局。校書如故。是時。諸王皆右文。所聚冊府。多資焯校之。世宗在潛藩。亦以困學紀聞屬焯箋疏。焯蓄書數萬卷。凡經傳子史詩文集雜說小學。多參稽互證。以得指歸。其校定兩漢書三國志。乾隆五年。從侍郎方苞請。令寫其本付國子監。爲新刊本所取正。錢大昕嘗稱其考證漢書。最有功。凡有題識。論人必跡其世。徵其表裏。論事必通其首尾。盡其變。論經時大略。必本其國勢民俗。以悉其利病。其詳審絕倫如此。所見宋元舊槧本。一一記其異同。又工於楷法。蠅頭朱字。粲然盈帙。好事者。得其手校本。不惜重價購之。其真行書並入能品。吳人與汪士鋐並稱汪何。上嘗命書朱子四書章句集注。奏上嘉獎。命卽鈔板。焯與方苞論文不甚合。然苞有作必問其友曰。焯見之否。是能糾吾文之短者。晚歲。益有見於儒者之大原。常歎王伯厚雖魁宿。尙未脫詞科習氣。因欲然自附於不賢識小之徒。欲因文見道。以探本於儒術。今世所

傳義門讀書記舊彫本止六卷。同邑蔣維鈞嗜何氏學。博搜選訪。擴至十數種。康熙六十一年卒。年六十二。上曰。何焯修書勤。學問好。朕正欲用之。不意驟歿。深可憫惻。贈侍講學士。賜金給符傳歸喪。復命有司存恤其孤。門人著錄甚衆。吳江沈彤長洲陳景雲爲尤著。

宋琬

宋琬字玉叔。號荔裳。山東萊陽人。父應亨。明天啓中進士。官直隸清豐縣知縣。有惠政。罷歸。崇禎十六年。殉節萊陽。贈太僕寺卿。琬少負雋才。著聲譽。順治四年。進士。授戶部主事。七年。監督蕪湖鈔關。潔己卹商。稅額仍溢。累遷吏部郎中。十年。授陝西隴西道。十一年。道出清豐。縣民扶老攜幼。遮邀至所。建應亨祠下。追述往績。相持泣戀。琬益自刻勵。期不墜先緒。適秦州地震。加憲撫卹。生全者無算。十四年。遷直隸永平道。十七年。調浙江寧紹台道。十八年。擢按察使。時登州于七爲亂。琬同族子因宿憾思陷琬。遂以與聞逆謀告變。立逮下獄。闔門縲繫者三載。緣坐中有需外訊。下督撫治之。巡撫蔣國柱。鞫得誣狀上聞。頗與部讞牴牾。命覆質。得申雪。康熙三年冬。得旨免罪。放歸。流寓江南。寄學柳上。往來秦淮鍾阜。涉金焦。攬武林山水。以自適。十年。有詔起用。復來京師。琬始官吏曹。與給事中嚴沅部郎施閏章丁澎輩相唱和。有燕臺七子之目。既出任外臺。猝罹无妄。凡所遭豐瘁。一發之於詩。王士禛點定其安雅堂集爲三十卷。十一年。授四川按察使。十二年入覲。值吳三桂叛。成都陷。琬家屬皆在蜀。聞變驚惋。遂以疾卒。年六十。生平所爲詩。零落略盡。越二十餘年。其族孫邦憲僅綴輯爲拾遺六卷。琬詩格合聲諧。明觀溫潤。撫時觸緒。類多淒清激宕之調。而境事既極。亦復不戾於和平。王士禛嘗舉施閏章相況。目爲南施北宋云。

邵長蘅

邵長蘅，字子湘，江蘇武進人。性穎悟，讀書目數行下，十歲補諸生，旋因事除名。束髮能詩，既冠，則以古文辭名。客遊京師，會開博學鴻儒，海內之士，悉集鞏下。若施閻、章廷琬、陳維崧、朱彝尊、臧氏、咸與長蘅雅。故時時過從，于喁疊唱，旋入太學。再應順天鄉試，報罷歸，寄情山水，放遊浙西，攬湖柳之勝會，蘇撫宋犖，禮致幕中，講藝論文，教布衣之好，長蘅亦觥觥持古義，無所貶損。時論賢之。內惇篤，居親喪，力行古禮，常獨力創始，祖康節祠，族子被略，爲家奴，捐金贖之。性坦易，與人交，煦然以和，意所不可，即髻張面赤，不能煉炯。爲文不姑，撫倣，要以讀書養氣爲主。王士禛常稱爲荆川後一人。汪琬則以爲文章似柳子厚，人品似陸魯望，始爲詩，瀏灑頓挫，步武唐賢。晚乃變而之宋，格律在蘇、黃、范、陸間。常選有明何李、王、李四家詩，燭錢氏偏駁之論，而以程嘉燧詩爲繼，識者韙之。康熙四十三年卒，年六十有八。所著自康熙戊午以前爲青門麗臺，凡文十卷，詩六卷，己未迄辛未爲青門旅臺，文四卷，詩二卷，壬申以後爲贗臺，文五卷，詩三卷。長蘅始除諸生名，自署青門山人，因題其集。

林古度

林古度，字茂之，福建福清人。寓居江寧。工詩，少賦擗鼓行，爲東海屠隆所知，與曹學佺相友善，所爲詩清綺婉縹，亦復相似。後楚人鍾惺、譚元春游金陵，古度悅之，詩格一變。舊家華林園側，有亭樹池館之笑，明亡，胥化爲車庫馬廐。別卜居真珠橋南陋巷，密門，貧甚，暑無蚊幃，冬夜眠敗絮中，或遺之帷帳，則舉以易米。施閻章憐之，謂古度曰：暑無幃，病於寒無氈，君能守之，當爲計。古度笑謂：願守之以虎，客皆絕倒。乃製紵帳，書絕句其上。屬同志各題一詩以寄之，慮其不能守也。兒時一萬曆錢，終身佩之。嘗寓法水寺，詩人袁孟逸死，厝寄寺旁，古度弔之，取摺扇畫停棺敗室狀，題詩其上，以授僧。卒爲募葬。晚年與王士禛唱和於紅橋平山堂間，諸名流咸集。古度攜其詩藁，屬士禛曰：千秋之事，一以付子。士禛選其辛亥以前詩不入楚音者二卷，爲茂之詩選。又著有賦一卷，年八十七卒。

納蘭性德

性德原名成德。字容若。納蘭氏。滿洲正黃旗人。康熙十五年進士。授乾清門侍衛。少從姜宸英遊。喜爲古文辭。鄉試出徐乾學之門。遂授業焉。善詩。其詩飄忽要眇。絕句近韓偓。尤工於詞。所作飲水側帽詞。當時傳寫。遍於村校郵壁。人謂李璟後身云。生平淡於榮利。書史外無他好。愛才喜客。所與遊。皆一時名士。晚更篤意經史。屬友人秦松齡朱彝尊購求宋元諸家經解。後啓於乾學。得鈔本一百四十種。曉夜窮研。學益進。嘗延友人陸元輔合訂刪補大易集議萃言八十卷。陳氏禮記集說補正三十八卷。又刻通志堂九經解一千八百餘卷。皆有功後學。精鑒藏。書學褚河南。見稱於時。嘗奉使覘校龍諸完。三十四年卒。年三十一。歿後旬日。適諸完輪款。上時避暑關外。遣中使拊其几筵。哭而告之。以其嘗有勞於是役也。著有通志堂詩集五卷。詞四卷。文五卷。濼水亭雜識四卷。又有全唐詩選詞韻正略。有懋園文稿葦間詩集。

冒襄

冒襄字辟疆。自號巢民。江蘇如皋人。明副貢生。少遊董其昌門。其昌序其十四歲時詩。方之王勃。性至孝。時流寇縱橫。父起宗。以吏部郎出。歷官副使。犯權貴忌。抑陷襄陽監軍。置必死地。襄走京師。泣血上書。迺得調寶慶。於是孝子之名聞天下。所與游皆當時雄俊。與桐城方以智。宜興陳貞慧。歸德侯朝宗。矜名節。持正論。品覈執政。裁量公卿。時稱四公子。襄負盛氣。高才颯爽。尤能傾動人。嘗置酒桃葉渡。會東林六君子諸孤。酒酣。輒狂以悲。詞晉奄黨。因與諸孤結社金陵。相抗。馬阮當國。憾之。黨獄興。捕得。貞慧幾死。襄僅免。國變後。遂無意用世。性喜客。家故有水繪園。擅池沼亭館之勝。四方名士。招致無虛日。嘗恣遊大江南北。窮覽山水。每於歌樓酒壁。縱談前代名卿。黨逆門戶。排擊是非邪正之事。以及南都才人學士。名倡狎客。文酒游宴之歡。風流文采。映照一時。當事屢薦於朝。

皆不就。貞慧子維崧，少而才，邀至家，飲食教誨之，以成其名。好周三黨之急，嘗鬻產兩救凶荒，全活無算。家遂中落。晚年卻掃家居，構匿峯廬，以圖書自娛。年八十，猶作擘窠大書，體勢益媚，人爭寶之。康熙三十二年卒。著有水繪園詩文集、樸巢詩文集。又編其師友投贈詩文爲同人集十二卷。

計東

計東，字甫草，江蘇吳江人。寄籍浙江嘉興。工爲文。年十五，補諸生。聲譽日起。順治十四年，舉順天鄉試。十八年，以江南奏銷案被黜。大學士王熙器重東，屢欲薦之，未果。會詔舉博學鴻儒，而東已前一年卒。年五十二。東少負經世才，意氣勃發，嘗自比王猛馬周。始遭世變，著籌南五論，經畫明晰，持謁史可法，可法奇之。以時勢所值，弗能用也。伏匿里門，深自韜晦，既貧無以養，始出就舉。已而復黜，益放廢失志，縱遊四方。自京師北走宣雲，南歷漳洛邢魏，東之濟兗，覽山川之形勝，所至交其賢士大夫，相與投分贈言而去。外若不羈，內行修謹。事母至孝。嘗從睢州湯斌講學，寓書柏鄉魏裔介論聖學知統錄，歷指程朱見知聞知諸子之當補入者，又以統有正，必有闕，陸氏之徒，亦當擇其行誼及論說近正者存之，以大著其防。若舉而去之，其學終不可泯。宗之者反得藉爲口實。所論殊有確見。又從長洲汪琬受歐會義法，故作文具有本源，而一出以醇正和雅。初遊河南時，見商邱宋學輒引重，目爲嚴武。立德裕一流人。既舉巡撫江蘇，東歿已二十餘年，特序其遺文刊之，爲政亭集十六卷。又詩集六卷。

施閔章

施閔章，字尙白，號愚山，安徽宣城人。祖鴻猷，以儒學著。世紹其業。孝友雍睦。江南言家法者，推施氏。閔章少失怙恃，鞠於祖母。侍祖母孝，事叔父，譽如父。譽怒必跪解之。俟色霽乃起。里徵士沈壽民有聲當世，閔章從之遊。遂博綜羣籍，善詩古文辭。順治六年成進士，授刑部主事。歷員外郎，引經斷獄。期於平允，尋以試高等，充山東學政。取

士必先行而後文。崇雅黜華。有冰鑿之譽。秩滿遷江西參議。分守湖西道。所轄吉臨袁三府故殘破。歲凶瘠致盜。閩章徧歷巖谷間。拊循帖然。人呼爲施佛子。嘗作彈子嶺大阮歎竹源阮等篇。告諸長吏。讀者皆曰。今之元結也。俗多孀女。復作歌勸誘。捐資收養。全活無算。遇事爬梳薶樹。不以爲勞。尤崇獎風教。於袁重建昌黎書院於吉葦。白鷺書院。課諸生。屢會講青原山。從者至千百人。臨江城圯。築輒潰。閩章禱於神。越日城成。新淦峽江患虎。製文祝之。俄有虎自陸深塹。迄無害。歲旱。徒跣號編。兩大被。新淦人或鬪牆。適閩章講學其地。聞孝弟忠信禮讓之言。兄弟相持哭詣階下服罪。其誠感如此。康熙六年。以裁缺歸。民留之不得。咸驪金創龍岡書院。祝瓣香焉。初閩章駐臨江。江環城下。民過之每歎曰。是江如使君情。因改名使君江。及是去職。傾城送江上。會水漲。所乘舟爲御史贈。輕不能渡。民爭買石膏載之。已渡。乏食。乃鬻其舟。十八年。召試博學鴻儒。列二等四名。授翰林院侍講。纂修明史。覈同異。析是非。無所回枉。二十年。充河南鄉試正考官。二十二年。轉侍讀。尋病卒。年六十六。閩章之學。以體仁爲本。磨礱砥礪。歷寒暑靡間。每語所親曰。我輩既知學道。自無大戾名教。但終日不見己過。便絕聖賢之路。終日喜言人過。便傷天地之和。平生廉謹而解推不倦。廣置義田以贍宗戚。篤窮交好。扶掖後進。才士失志。多方爲之延達。死喪困危。振卹備至。天下士益歸其門。奉爲楷模。文章率原本道義。不欲馳騁張皇。意樸氣靜。守歐會矩度。詩與萊陽宋瑛齊名。號南施北宋。新城王士禛愛閩章五言詩。溫柔敦厚。得風人之旨。而清辭麗句。疊見層出。別爲摘句圖。士禛門人洪昇閩詩法於閩章。閩章曰。爾師如華嚴樓閣。彈指即見。余則不然。如作室者。瓴壁木石。一就平地築起。職者以爲確不可易。又謂山谷言。近世少年。不肯深治經史。徒取給於詩。故致遠則泥。此最爲鍼砭。詩如其人。不可不慎。觀其持論。即宗旨可見。著有學餘堂文集二十八卷。詩集五十卷。端谿硯品一卷。試院冰淵一卷。短齋雜記二卷。蠖集詩話二卷。擬明史七卷。青原志略補輯十二卷。閩章與同邑高詠友善。據東南詞壇者數十年。號曰宣城體。

姜宸英。字西溟。浙江慈谿人。明太常寺卿應麟曾孫。少工舉子業。兼善詩古文辭。屢躋於有司。而聲譽日起。聖祖仁皇帝檢閱之。與秀水朱彝尊無錫嚴繩孫並目爲三布衣。會開博學鴻儒科。翰林院侍讀學士葉方藹約侍講韓菼連名上。適方藹宣詔入禁中。浹月。菼乃獨牒吏部。已不及期。方藹旋總裁明史。薦之入館。充纂修官。食七品俸。分撰刑法志。宸英極言明三百年詔獄廷杖。立加東西廠衛之害。痛切淋漓。足爲殷鑒。尙書徐乾學罷官。卽家領一統志事。設局於洞庭東山。疏請宸英偕行。宸英在京時。大學士明珠長子性德。從宸英學。明珠有幸僕曰安三。頗竊權。宸英不少假借。性德嘗以爲請。宸英益大怒。擲杯起。絕弗與通。安三知之。憾甚。以故連蹇不得志。久之得舉順天鄉試。康熙三十六年。成進士。及廷對。進呈名稍殿。上識其手書。特拔置第三人。授翰林院編修。年已七十矣。三十八年。充順天鄉試副考官。比揭榜。御史鹿祐以物論紛紜劾奏。命勘問。並覆試舉子於內廷。上諭諸生俱各成卷。尙屬可矜。落第怨謗。勢所必有。焉能杜絕。黜數人。餘仍令會試。正考官李蟠遭戍。宸英坐蟠繫獄。事未白。病卒。年七十二。宸英孝友。與人交。悃悃無城府。然遇權貴。不少阿。常熟翁叔元任祭酒時。劾湯斌僞學。宸英與叔元舊識。遽移書責之。生平讀書以經爲根本。於注疏務窮精蘊。自二十一史及百家諸子之說。靡弗披閱。績學勤苦。至老猶篤。故其文閎博雅健。有北宋人意。魏禧嘗謂侯方域肆而不醇。汪琬醇而不肆。惟宸英在醇肆之間。論者以爲實錄。詩兀異滂葩。宗杜甫而參之蘇軾。以盡其變。書法鍾王。尤入神品。著有江防總論。海防總論各一卷。陔園集八卷。葦間集詩十卷。又劄記二卷。皆證經史之語。雖少有疏舛。而考論禮制精覈者居多。

陳維崧

陳維崧。字其年。江蘇宜興人。明左都御史于廷孫。父貞慧。以節概稱。著書自娛。往還多當世碩望。維崧資稟穎異。十歲代祖作楊忠烈像贊。比長。侍父側。聆諸名士議論。耳濡目染。學日進。或謀會。援筆爲記序。頃刻千言。瑰理無比。皆驚歎。折輩行與交。嗣偕王士禛。宋實穎。計東等倡和。名益大噪。時有江左三鳳凰之目。維崧其一也。補

諸生。久之不遇。因出遊。所在爭客之。性落拓。饋遺隨手盡。獨嗜書。無不漁獵。雖舟車危駭。啞語如故。嘗由河南入都。與秀水朱彝尊合刻一稿。名朱陳村詞。流傳至禁中。蒙賜問。人以爲榮。年過五十。會開博學鴻儒科。以大學士宋德宜薦。召試。列一等。授翰林院檢討。與修明史。在館四年。勤於纂輯。嘗懷江南山水。以史局需人。不果歸。疾篤。吟斷句云。山鳥山花是故人。猶振手作推敲勢。遂卒。年五十八。時康熙二十七年也。維崧清臞多鬚。海內稱爲陳髯。與字並行。生平無疾言遽色。於諸弟篤友愛。其遊公卿間。謹慎不泄。遇事匡正。以故人樂近之。而卒莫之狎。所著兩晉南北史集珍六卷。湖海樓詩八卷。迦陵文集十六卷。詞三十卷。集中文有散有駢。駢體自喜特甚。長洲汪琬謂唐以前不敢知。自開寶後七百年。無此等作矣。琬固少許可者。維崧與琬論六朝之文。鈞入深微。多出諸賢尋賞之外。所作散文。亞於駢體。詩始爲雄麗跌宕。一變而入杜甫沈鬱之調。橫絕一世。詞至千八百首。尤凌厲光怪。變化若神。前此未有也。清初以駢儷文擅長者。推維崧及吳綺。綺才地視維崧稍弱。維崧導源庾信。泛濫於初唐四傑。故氣脈雄厚。綺則追步李商隱。以秀逸勝。蓋異曲同工云。

董以寧

董以寧。字文友。江蘇武進人。諸生。少明敏。爲古文詩歌數十萬言。尤工填詞。以是聲譽蔚然。同里結國儷社。其啓札皆以寧爲之。與鄒祗謨齊名。時稱鄒董。又與陳維崧及祗謨有才子之目。今所傳國儷集。皆以寧少作也。性豪邁慷慨。不可一世。喜交游。重然諾。纏綿婉篤。比於膠漆。魏裔介未一識以寧。面而傾倒欲絕。以寧於曆象樂律方輿之指。多所發明。晚年棄詞章之學。專肆力於經。於易闡錯綜之妙。於春秋則欲參三傳別爲一書。執經弟子恆數百人。其學蓋與任元祥相埒云。著有正誼堂集。蓉渡詞。

趙執信

趙執信字伸符，山東益都人。福建按察使進美從孫。進美詩名甚著，有清止閣集。執信承其家學，少穎慧，工吟詠。康熙十八年進士，改翰林院庶吉士，散館授編修。是時方徵鴻博之士，續學雄文者，僊集輩下。執信往來其間，傾倒座人，尤爲朱彝尊、陳維崧、毛奇齡所引重。訂忘年交，性喜諧謔，士以詩文贊者，合則投分，不合則略視數行，揮手謝去。以是得狂名。二十三年，充山西鄉試正考官，尋擢右春坊右贊善。二十八年，以國恤中，在友人寓謙飲觀劇，爲給事中黃儀所劾，遂削籍。時年未三十也。既歸，放情詩酒，所居因園，依山構亭榭，各極天趣。性好遊，嘗踰嶺南，再涉嵩山，五過吳閩，維揚金陵間，所至冠蓋逢迎，乞詩文書者全至，徜徉五十餘年。年八十三卒。執信詩自寫性真，力去浮靡。生平服膺常熟班遺書，稱私淑弟子。娶王士禛甥女，初猶相重，以求作觀海集詩序。士禛屢失其期，遂詬厲。嘗問古詩聲調於士禛，士禛斬之。執信乃發唐人諸集，排比鈎稽，竟得其法，爲聲調譜一卷。又因士禛與門人論詩，謂如神龍見首不見尾，或雲中露一鱗一爪而已。遂著談龍錄，有云：詩以言志，詩之中須有人在。詩之外尙有事在。又云：文以意爲主，言語爲役，主強而役弱，則無令不從矣。雖意詆士禛，實通論也。大抵士禛詩以神韻縹緲爲宗，執信詩以思路剴刻爲主。士禛之規模闢於執信，而流弊傷於庸靡。執信之才力銳於士禛，而未派亦病於纖巧。論者謂兩家互救其短，乃益見所長云。執信手定因園集十三卷，後人又裒其所著爲鉛山文集六卷，詩餘一卷。

梁佩蘭

梁佩蘭字芝五，號藥亭，廣東南海人。順治十四年鄉試舉第一，屢上公車，不得志。日與其同志砥礪文學，金臺舉社事。推佩蘭與朱彝尊輩主壇坫，一時風雅稱盛。佩蘭每有所作，爭相鈔誦。康熙二十七年成進士，年六十矣。放榜日，佩蘭方坐論正平岑牟與摩詰鬻輪袍事，得捷音，色不爲動。第曰：老而成名，歸得肆力於邱索足矣。改翰林院庶吉士，不一年，遽乞假歸。途經齊魯吳越，與舊遊詩筒酒醪，放浪湖山。里居十五年，屬下詔敕守土官，促詞臣

久於外者。令赴館就職。佩蘭入都。散館以不能國書不入等放歸。尋卒。佩蘭爲人孝友。不事家人生產。輕金重義。屢空晏如。結社蘭湖。以詩酒爲樂。好誘掖後進。客以他事請者。引疾不聽。聞持詩文至。則披衣倒屣。指畫不少倦。與南海程可則。順德陳恭尹。番禺王邦畿。方殿元。暨殿元長子選。次子朝。同以詩鳴粵中。人稱爲嶺南七子。其詩從漢魏入。不借徑三唐。新城王士禛。秀水朱彝尊。吳江潘耒。尤推重之。四十七年卒。年七十七。著有六盤堂前後集十六卷。

劉體仁

劉體仁。字公誠。河南潁川衛人。順治十二年進士。有家難。棄官。從蘇門孫奇逢講學。後官吏部郎中。與長洲汪琬。新城王士禛。以詩文相倡和。體仁善鼓琴。嘗於慈仁寺彈御風操。士禛贈詩。有與君更作他年約。黃鶴山前訪戴行之句。京口黃鶴山戴容所居也。後五年。果相遇黃鶴山下。其友素嗜琴。歿數年。體仁一日過其墓。停車酌酒爲操一曲而去。其標致如此。詩有奇氣。刻削似孟東野。喜作畫。鑒識甚精。與孫承澤以博古相高。嘗做雲烟過眼錄。爲識小錄一冊。詩初名蒲庵集。後爲七頌堂文詩集。凡十四卷。七頌者。慕成連。陸賈。司馬微。桓伊。沈麟。士王續。草應物之爲人。人爲之頌。故以名堂也。

魏禧

魏禧。字冰叔。又字叔子。號裕齋。又號勺庭。江西寧都人。父兆鳳。明諸生。甲申之變。兆鳳號哭。竟日不食。匿迹山中。翦髮爲頭陀。隱居金精之翠微峯。是冬。筮離之乾。遂名其堂爲易堂。年四十卒。禧兒時不樂嬉戲。嗜古論史。斬斬見識。年十一。補縣學生。甲申後。日哭臨縣庭。與兄際瑞。弟禮。及南昌彭士望。林時益。同邑李騰蛟。邱維屏。彭任。曾燦等九人爲易堂學。皆躬耕自食。切劘讀書。而三魏之名遂徧海內。禧東身砥行。才學尤高。門前有池。顏其居

曰勺庭。學者稱勺庭先生。禧爲人形幹修頤。目光射人。少善病。參朮不去口。性秉仁厚。寬以接物。不記人之過。與人以誠。雖受欺怡如也。然多奇氣。論事每縱橫排募。倒注不窮。事會盤錯。指畫灼有經緯。思患豫防。見幾於蚤。懸策而後驗者。十常八九。方流賊之熾也。承平久。人不知兵。且謂寇遠猝難及。禧獨憂之。移家山中。山距城四十里。四面削起百餘丈。中徑坳。自山根至頂若斧劈然。緣坳鑿磴道梯而登。因置閘爲守望。士友稍稍依之。後數年。寧都被寇。翠微峯獨完。喜讀史。尤好左氏傳及蘇洵文。其爲文凌厲雄傑。遇忠孝節烈事。則益感激。暮畫淋漓。年四十。乃出遊。涉江踰淮。於蘇州交徐枋金俊明。杭州交汪鳳。乍浦交李天植。常熟交顧祖禹。常州交惲日初。楊瑀。方外交藥地稿木。皆遺民也。當是時。南豐謝文焄講學程山。星子宋之盛講學誓山。弟子著錄者皆數十百人。與易堂相應。和論者謂西江自歐陽鄒魏宗湯明講性學。陳艾依復社工帖括。其聲力氣節。皆足動一時。易堂獨以古人實學爲歸。而風氣之振。由禧爲之領袖。僧無可嘗至山中歎曰。易堂真氣。天下無兩矣。無可明檢討方以智也。友人亡。其孤不能自存。禧撫教安業之。凡戚友有難進之言。或處人骨肉間。禧批卻導。一語輒解其紛。或訝之。禧曰。吾每遇難言事。必積誠累時。待其精神與相貫注。夫然後言。康熙十七年。詔舉博學鴻儒。禧以疾辭。有司催就道。不得已。昇疾至南昌就醫。巡撫昇驗之。禧蒙被臥稱疾篤。乃放歸。後二年。赴揚州。卒於僕徵。年五十七。妻謝氏。絕食十三日以身殉。著有古文集二十二卷。日錄三卷。詩八卷。左傳經世十卷。

嚴虞惇

嚴虞惇。字寶成。江蘇常熟人。康熙三十六年一甲二名進士。授翰林院編修。虞惇生有異稟。九經三史。幼即成誦。嚴虞惇。字寶成。江蘇常熟人。康熙三十六年一甲二名進士。授翰林院編修。虞惇生有異稟。九經三史。幼即成誦。官翰林。館閣文字。多出其手。己卯科。場獄興。虞惇子姪連售。試官李蟠與姜宸英。皆其同年友。用是里吏讎。鏤級。閒居數年。聖祖南巡。闕河。虞惇迎駕毗陵。獻詩十章。溫旨召問。旋起補國子監監丞。轉大理寺寺副。寺副權輕。位下。守故事。行文書而已。虞惇毅然獨不輕其官。論讞奏當。必衷至是。雖略以利。怵以威。不能奪也。通倉盜米案。有

以私怨鍛入人罪者。虞惇持不可而止。俄有內務府殺人移獄事。虞惇先上書本寺少卿邵觀。歷指疑狀。又出不意。執其人訊之。吐實。讞始定。四十八年。充四川鄉試副考官。五十二年。充湖廣鄉試正考官。皆稱得人。累遷至太僕寺少卿。五十二年卒。年七十四。虞惇著述甚富。其讀書質疑三十一卷。意在玩味。研求於毛朱兩家。擇長棄短。不存門戶之心。並不涉調停之見。殊有功詩學。爲文鼓吹六籍。陶鑄羣言。與歐曾爲近。詩思沈力厚。不苟同於人。江蘇人士刻其集。以繼明歸有光。蓋本同郡。而有光官止太僕。名位又適相符也。議者頗謂不愧云。

查慎行弟嗣璉 族子昇

查慎行。字初白。又字悔餘。號查田。初名嗣璉。字夏重。後改今名。浙江海寧人。少受學黃宗羲。治經。邃於易。尤工詩。方爲諸生。遊覽牂牁夜郎。以及齊魯燕趙梁宋。過洞庭。涉彭蠡。登匡廬峯。訪武夷九曲之勝。所得一託於吟咏。故篇什最富。康熙三十二年。舉順天鄉試。其未通籍時。卽名聞禁中。四十一年。聖祖東巡。以大學士陳廷敬李光地張玉書先後奏薦。驛召至行在。賦詩。詔隨入都。直南書房。四十二年。特賜進士出身。改翰林院庶吉士。散館。授編修。時慎行族子昇。以諭德侍直內廷且久。宮監輒呼慎行爲老查。以別之。上幸海子。捕魚賜羣臣。命賦詩。慎行有云。笠簫蓑袂平生夢。臣本煙波一釣徒。俄宮監傳煙波釣徒查翰林。時以比春城寒食韓翃。傳爲佳話。會比歲西巡。凡幽岵之區。甌脫之境。爲從古詩人所未歷。慎行悉以五七言發之。每奏一篇。上未嘗不動色稱善。又常隨駕木蘭。袞衣禮服。行山谷間。上望而笑曰。行者必慎行也。其風度如此。尋充武英殿校勘官。在局二年竣事。仍入直。未幾。假歸。遭弟嗣璉案株繫。闔門就逮。罪且不測。世宗識其端謹。且曰。慎行詩。每飯不忘君。杜甫流也。特原之。放歸田里。雍正六年卒。年七十八。浙人稱詩者。首推朱彝尊。慎行湯右曾繼之。所著敬業堂集五十卷。合生平所歷各爲一集。多至五十三種。黃宗羲比之陸游。王士禛則謂奇創之才。慎行遜游。綿至之思。游遜慎行。所評良允。五七言古體尤近蘇軾。曾補注蘇詩五十二卷。其教人爲詩。謂詩之厚在意。不在詞。詩之雄在氣。不在貌。詩之靈在

空不在巧。詩之淡在脫。不在易。可謂通論。蓋自明人喜稱唐詩。至清初嫌其窠臼漸深。往往厭而學宋。麤直之病亦生焉。得宋人之長而不染其弊。固當於慎行屈一指云。他著又有周易玩辭集解十卷。陪獵筆記。黔中風土記。廬山遊記各一卷。嗣琛字德尹。慎行弟。康熙三十九年進士。改翰林院庶吉士。散館。授編修。洊升侍講。性警敏。數歲卽解切韻諧聲。隨伯兄慎行學爲詩。兄唱弟酬。斐然可觀。生平游迹徧天下。所至與賢豪長者往還。題咏無虛日。官翰林時。名與慎行相埒。亦以嗣庭罪遽。謫遼關西。雍正十二年卒於戍所。年八十二。著查浦詩鈔。查浦輯聞。南北史識小錄。音類通考。昇字聲山。慎行族子。康熙二十七年進士。改翰林院庶吉士。散館。授編修。入直南書房。推轂前進。無嫉忮心。由諭德庶子。陞少詹事。賜第西華門。題其堂曰淡遠。會疾。上以賜第不吉。改賜厚載門外。四十六年。以積勞卒於官。年五十八。昇詩筆清麗。尤工書。得董其昌神韻。聖祖屢稱賞之。著有淡遠堂集。

方苞

方苞。字靈臺。號望溪。江南桐城人。寄籍上元。康熙四十五年。由舉人會試中式。以母病未預殿試。五十年十月。副都御史趙申喬劾編修戴名世所著南山集子遺錄。有大逆語。下刑部擬名世凌遲。詞連苞從祖孝標。曾降吳三桂。所著漢黔紀聞。亦不法。應戮屍。子登嶧雲旅。孫世燠。緣坐苞爲名世作序論斬。從寬免治著入旗。是月苞隸旗籍。三月。上知苞文學。特命入直南書房。八月。直隸饒齋編校御製樂律算法諸書。六十一年六月。命爲武英殿修書總裁。十一月。世宗嗣位。頒恩詔。其一以族人犯罪牽連入旗者赦歸籍。時入旗合詔條者。惟戴名世案。而原讞例不得援赦。刑部特請上肆赦苞及其族人。九年特授中允。十年五月。遷侍講。七月。遷侍講學士。十一年四月。擢內閣學士。苞以足疾辭。命仍在修書處行走。不必辦理內閣事務。六月。教習庶吉士。八月。充一統志館總裁。十三年正月。充皇清文穎館副總裁。十一月。疏言。常平倉穀定例存七糶三。有司奉行失宜。必穀既貴始詳上司定價。示期開糶。未奉批不敢擅開。請嗣後各州縣遇穀偶貴。卽酌定官價。一面開糶。一面詳報。又穀之存倉。則有鼠耗。

盤量則有折減。移動則有腳價。糶糴守局則有人工食用。春糶價稍有餘。即留充諸費。庶中材可守。若廉能之吏。遇秋糶價賤。盈餘較多。聽據實詳明。別貯一倉。備歉歲發賑用。下部議行。乾隆元年三月。疏言。救荒之政。宜豫。周官保章氏。以星土之法。五雲之物。先期知水旱降豐荒之禳象。以修救政。雖其法無傳。然夏末秋初。則水旱豐歉情形。十得八九。舊例報荒。必待八九月後。災民朝不待夕。而奏請得旨。動經旬月。請嗣後各州縣水旱。五六月即據實奏報。臣又思古者。城必有池。故易曰。王公設險以守其國。周公立司險掌固二官。以通守政。所恃惟溝樹耳。凡國都暨近郊遠郊。必設溝樹三重。鄙邑三重。詩曰。築城伊臧。池與臧。即周官所謂溝也。本無城而創作。則起土而溝。形已具。本有城以築外垣。使附城民得保焉。即春秋所稱郭與郊保也。不獨通川之地。濬溝即可爲池。即地不通川。而溝深三丈。則行潦所匯。可納城市流澌。春秋戰國時。雖彈丸小邑。莫不有溝以爲限。有樹以爲蔽。秦漢以降。古法不講。故盜賊滋多。請將城堡溝樹之政。及時修舉。又吳楚蜀越嶺徼。皆賴川流塘堰。以灌秔稻。不專恃兩澤。請飭各省凡通川之地。可開支河及沮洳。可與大圩與大塘大堰。宜創作修復者。詳報核估。造冊具題。北五省塘堰圩隄可與者少。則查千家數百家之鎮集。宜開溝渠築築垣堡者。亦造冊具題。遇歉歲及時興作。以工代賑。至溝樹之地。不能無廢民田。而歉歲官給原價買之。民亦樂從。部議五六月報災。恐滋捏飾浮冒。所請不可行。至溝樹塘堰諸事。應令各督撫因時地熟籌而行。得旨如議。六月。上憐苞老病。命太醫時往診視。尋諭曰。國家以經義取士。將使士子沈潛於四子五經之書。含英咀華。發據文采。因以覘學力之淺深。與器識之淳薄。而風會所趨。即有關於氣運。誠以人心士習之端倪。呈露者甚微。而徵應甚鉅也。顧時文之風。尙屢變不一。苟非明示以準的。使海內士子。於從違去取之介。瞭然知所別擇。專意揣摩。則大比之期。主司無以操繩尺。而度羣才。士子豈能合矩矱以應搜羅乎。有明制舉之業。體備各種。如王唐歸胡金陳章黃諸大家。卓然可傳。本朝文運昌明。英才輩出。劉子壯熊伯龍以後。作者接踵。莫不根柢經史。各杼杼軸。此皆足爲後學之津梁。制藝之科則者。自坊選之禁。垂諸功令。而大家名作。不得通行。士子無由睹斯文之炳蔚。率多因陋就簡。剽竊陳言。襲取腐語。間或以此倖獲科

名。又輾轉流布。私相仿效。馴至先正名家之風味。杳乎難尋。所係非淺鮮也。今朕欲衷集有明及本朝諸大家時藝。精選數百篇。彙爲一集。頒布天下。以爲舉業指南。學士方苞。工於時文。著司選文之事務。將入選之文。逐一批抉。其精微奧窔之處。俾學者了然心目間。用以摹擬。嗣後並弛坊間刻文之禁。倘果有學問淹博。手眼明快者。不拘鄉會墨卷。房行試牘。准其照前選刻。但不得徇情濫薦。及狂言橫議。致釀惡俗。苞遵旨選錄有明制義四百八十六。國朝制義二百九十七。以清真雅正爲宗。呈欽定頒行天下。尋充三禮義疏館副總裁。命再入南書房。二年六月。擢禮部右侍郎。苞仍以足疾辭。詔免隨班行走。七月。教習庶吉士。九月。疏陳九卿會議二事。一。九卿中有異議者。宜並列上聞。以俟聖裁。一。詹事科道宜仍與九卿一體會議。所議不符。亦隨九卿議並奏。疏下總理事務王大臣等議駁。十二月。苞復以老病請解侍郎任。許之。仍帶原銜食俸。教習庶吉士。四年二月。命武英殿重刊十三經廿一史。苞疏言。庫貯書籍。並無監板經史。而現今監板更剝蝕。無憑校對。請敕內府及內閣藏書處。徧查舊本。諭在京諸王大臣。及有列於朝者。如家藏明泰昌以前舊本。奏明交館。並敕江南浙江江西湖廣福建五省督撫。購送舊板經史。彼此互證。再孔穎達賈公彥等所引十三經及傳註。並周秦間諸子多訛誤。請詳校開列。呈覽酌改。又前侍講學士何焯。曾博訪宋板。校正前後漢書三國志遺訛。應就其家索原書。照式改註別本。其原本仍行給還。從之。五月。諭曰。方苞在皇祖時。因南山集一案。身罹重罪。蒙恩曲加寬宥。令其入旗。在修書處行走效力。及皇考即位。特沛殊恩。准其出旗。仍還本籍。又漸次錄用。授職翰林。晉階內閣學士。朕嗣位之初。念其稍有文名。諭令侍直南書房。且陞授禮部侍郎之職。伊若具有良心。定當痛改前愆。矢慎矢公。力圖報效。乃伊在九卿班內。假公濟私。黨同伐異。其不安靜之錮疾。到老不改。衆所共知。適值伊以衰病請改侍郎職任。朕俞允之。仍帶原銜食俸。上年冬月。因伊條奏事件。偶爾召見一次。伊出外。即私告於人。曾在朕前薦魏廷珍。而參任蘭枝。以致外間人言藉藉。經朕訪聞。令大學士傳旨訓飭。伊奏對支吾。朕復加寬容。未曾深究。近訪聞得伊住魏廷珍之屋。魏廷珍未奉旨起用之先。伊即移居城外。將屋讓還。以示魏廷珍即日被召之意。又庶吉士散館屆期。伊已將人數

孫聞內閣定期考試矣。伊復於前一日將新到吳喬齡一名補請一體考試。朕心即疑之。今訪聞得伊所居之屋。卽吳喬齡之產。甚覺華煥。伊受託爲之代讀。似此數事。則其平日之營私。可以概見。方苞深負國恩。著將侍郎職銜。及一切行走之處。悉行革去。專在三禮館修書效力贖罪。苞以年近八旬。時患疾痛。懇回籍調理。大學士等代奏恩賞侍講銜。准其回籍。十六年卒。著有周官辨。周官集註。周官析疑。春秋通論。春秋直解。禮記析疑。喪禮或問。儀禮析疑。春秋比事目錄。左傳儀法舉要。刪定管子荀子史記註補正。離騷正義。

王太岳

王太岳。字基平。直隸定興人。乾隆七年進士。改翰林院庶吉士。散館授檢討。十五年充日講起居注官。十八年充江南鄉試副考官。十九年授侍講轉侍讀。充會試同考官。二十年補甘肅平慶道。二十三年調西安督糧道。三十三年擢湖南按察使。三十六年調雲南按察使。三十七年擢布政使。是年以審擬逃兵寬縱落職。四十二年命在四庫全書館爲總纂官。四十三年仍授檢討。四十七年擢國子監司業。後三年卒。年六十四。太岳生有至性。每言及古來忠義事。輒爲感慨流涕。卽觀劇亦如之。二十六歲喪父。事母色養。四十年如一日。宦轍所至。必與板輿俱。比居喪。年已六十一。哀毀一如少壯。性好朋友。與邵齊燾鄭虎文顧汝修諸人尤善。寓書往復。率以文章道義相勸切。每別必泣涕不自已。言經兼訓詁。論學兼取陸王。詩宗魏晉。下及唐人。純古淡泊。時稱高格。初好爲駢體文。見齊燾作。歎爲天授。遂輟不作而規史漢及韓柳。氣格高簡。卓然名家。尤有志於經世之務。所至必爬梳剔抉。據今考古。咨民之疾苦而考論之。在平慶及西安。皆有惠政。又留心水利。著涇渠志三卷。在雲南閱銅政之弊。於是旁搜博訊。指利害所由來。其言銅政之要。必寬給價。給價足。然後廠衆集。廠衆集。然後開採廣。廣採則銅多。銅多則用裕。又言雲南山高脈厚。出產礦砂。誠使加以人力穿峽成堂。則初開之礦。入必不深而工亦不費。兼地僻林萃。炭亦易得。輸尤切中。當時補救濫剔。厥功甚偉。滇人祀之七賢祠。著有清虛山房集。芥子先生集。凡二十四卷。

王樹

王樹，字鶴林，江蘇金壇人。康熙五十一年進士，改翰林院庶吉士，散館授編修，充三朝國史、治河方略、御纂春秋三館纂修官。五十七年，教習庶吉士。六十年，考選戶科給事中，命稽察錢局，以善書法，特命充五經篆文館總裁。六十二年，升戶科掌印給事中。雍正元年，上屢詔求言，召對內廷，蒙貂皮克什之賜。是年冬，奉旨六科胥隸都察院。樹疏言六部事有覲，都察院察之。都察院有諷，六科駁之。此祖宗設官意也。若隸臺丞，爲所管轄，給事覆覈科參自是，有將順而無匡救，所關匪細。語侵臺長，上怒，立召訊。人皆爲樹危。樹與同官從容奏對，上意解。給吏部員外郎。然自是科臣雖隸總憲，得封駁如故。四年，以乞假葬親歸。乾隆元年，被命起官，以疾不赴。四年卒。年七十二。樹經學宗宋儒傳註，言性理一本程朱，嘗著大學困學錄一卷、中庸困學錄一卷、發揮學問之功。其大學補傳第五章，辨陸王致知之誤，極爲分明。又著集程朱格物法一卷、集朱子讀書法一卷、排比聯絡、融會其意，以救陸王靜悟以讀書爲粗迹之弊。又著白鹿洞規條目二十卷，分類條析，證以經史百家之語。凡更六年，三易藁而後成。生平孝於親，居喪哀毀盡禮，與人交，無賢不肖久而彌篤，終始無異心。古今文雄深樸茂，而書法尤一時獨步。何焯汪士鋐率推先之，嘗著淳化秘閣考正十卷，取米芾黃伯思顧從義三家之說而研究之，以史傳正譌誤，以筆蹟辨依託，而行款標目，以及釋文之類，亦一一考覈，又別爲古今法帖考一卷、瀟閣帖之緣起及諸帖之沿流，又自以所得筆法爲一卷，并附於後。論者謂其書在米黃顧三家之上，其真書入率更之室，篆書法李斯，尤稱一代作手。告歸後，書益工，遠近士夫家以金幣請者無虛日。然不問家人生產，貧士丐其翰墨以舉火者，亦應之不倦。金壇良常山館最擅名，款署良常王樹。世遂稱王良常云。樹鑑別古碑刻尤精，所著竹雲題跋四卷，於源流同異，考證特詳。又著有禹貢譜二卷、大學本文一卷、大學古本文一卷、中庸本文一卷、虛舟題跋十卷、補原三卷。

王鳴韶

王鳴韶原名廷諤，字夔律，江蘇嘉定人。兄鳴盛，入儒林傳。鳴韶擅染家學，善詩，工書畫，治古文，以清簡爲上。鳴盛奇其才，責以制舉業。曰：兄愛我良厚，然人情各有所好，不可彊也。鳴盛入翰林，鳴韶獨侍二親，顏其堂曰逸野。旁闢一室，懸篋笥以見志。嘗搜集邑中文獻，考證異同，以補志乘之闕。與錢大昕姻婭相善，大昕視學廣東，數與俱往。遇名勝必往游，又走趙魏梁宋，徧覽瀟湘洞庭諸勝，所至紀以詩。著有逸野堂文集十卷，春秋三傳考，十三經異義，祖德述聞，竹窗瑣碎，詩宗眉山，劍南，鳴盛選江左十二子詩，次鳴韶其中，論者不以爲私。乾隆五十三年卒，年五十七。

朱仕玠

朱仕玠，字筠園，福建建寧人。乾隆十八年拔貢生，授德化教諭，調鳳山，以艱去。服闋，補尤溪陞河南內黃知縣，未之官卒。年二十二。幼敏慧，通經史百家，與弟仕琇相切劘。仕琇攻古文，仕玠遂專業詩。其論詩稱宋嚴氏，尤以溫柔敦厚爲本。游京師時，沈德潛見其存藁，許爲得選詩神理。黃叔琳方苞張鵬翀皆一見推許。叔琳嘗曰：王士禛沒後，不見此調久矣。仕玠方壯時，嘗涉黃河，游太學，以震發詩之意氣。歸後授徒谿西之草堂，谿水出建寧百丈嶺，至仕玠所，居曲如環，地多楊木，風雨至拉雜有聲。仕玠樂之，所詣益進。著有谿音十卷，音別四卷，仕琇稱其得於溪山之所助者蓋多。他著筠園詩藁三卷，刪藁三卷，和陶三卷，和紅蕉山房詩錄一卷，鴻雁集一卷，賦鈔一卷，又有小琉球漫志十卷，龍山漫錄二十卷。

朱仕琇

朱仕琇字梅崖。福建寧人。年十五補諸生。博通經傳諸子。從南豐汪世麟學。爲古文。嘗代人作書。求文於副都御史雷鉉。鉉歎爲近古大家。既而知出自仕琇。亟稱之。名遂著。乾隆十三年進士。改翰林院庶吉士。散館。以知縣用。遷山東夏津縣。緣足疾改福寧府教授。歸主龍峯講席者十年。四十五年卒。年六十六。仕琇治古文。自晚周以迄元明百餘家。究悉其利病。而一以荀況司馬遷韓愈爲大宗。嘗與人論文云。經濟其源。史覈其情。諸子通其指。文選辭賦博其趣。左氏太史動其體。孟荀揚韓正其義。柳歐以下諸子。參其同異。汎濫。元明近世以極其變。歸諸心得以保其真。要諸久遠以俟其化。又云。爲文在先高其志。使其心有以自置。則我心猶古人之心也。以觀古人之言。猶吾言也。然後辨其是非焉。察其盈虧焉。究其誠僞焉。定其高下焉。如黑白之判於前矣。於是順其節次焉。還其訓詁焉。沈潛其義蘊焉。調和其心氣焉。久則自然合之。又久則變化生之。於是文之高也。如參土之成臺。如鴻漸之在天。有莫知其所以然者。時治古文者。多尊桐城方苞。仕琇獨病其膚淺。故或謂其矯枉過正。鄰於艱澀。然彈古仲瞻。大興朱筠。特推其斬斬自成一家。著有梅崖文集三十卷。外集八卷。

李調元

李調元字羹堂。號兩邨。四川綿州人。乾隆二十八年進士。改翰林院庶吉士。散館。授吏部主事。三十九年。充廣東鄉試副考官。尋遷考功司員外郎。四十一年。以讞稿塗押爲舒阿填入浮躁。上詢其故。尙書程景伊以對上曰。司官有不安於心者。向例原准不畫押。如何便填大計。因詢居官何如。景伊以辦事勇往對。奉旨仍以員外用。即日。到任。旋奉命督學廣東。任滿回京。擢直隸通永道。以劾永平知府爲所訐罷官。遣發伊犁。尋以母老贖歸。少聰敏好學。父化相。官浙中。調元往省。徧游浙中山水。遇金石。即手自摹搨。購書萬卷而歸。由是益奮於學。自經史百家。以及稗官野乘。靡不博覽。羣經小學。皆有撰述。性愛奇嗜博。以蜀揚雄多識奇字。明楊慎亦有奇字韻之纂。乃博稽載籍。凡字之奇而名不經見者。依類錄之。爲奇字名十二卷。以王象之蜀碑記多闕略。著蜀碑記補十卷。又

以王士禛五代詩話遺佚頗多。因廣爲探輯。於姓氏下綴以小傳。著全五代詩一百卷。生平宦蹟所至。輒訪問山川風土人物。其有爲古人所未誌者。卽筆錄之。以爲談資。官通永道時。值四庫館開。每得善本。輒遺胥錄之。因輯自漢迄明蜀人著述罕傳。秘籍彙刊之。名曰函海。其表彰先哲。嘉惠來學。甚爲海內所稱。所爲詩文。天才橫逸。不假修飾。少以春蠶作繭。詩受知於錢陳羣。又嘗作南宋宮詞百首。論者謂不亞於厲鶚。朝鮮使臣徐浩修見其詩。以爲超脫沿襲之陋。而合於山谷放翁。極爲敬服。因作啓求其他著述而去。又愛才若渴。人有一聯片語之佳者。輒爲采錄。罷官後。家居二十餘年。益以著書自娛。蜀中撰述之富。費密而後。厥推詞元云。著有易古文二卷。尙書古字辨異一卷。鄭氏尙書古文證訛十一卷。詩音辨二卷。童山詩音說四卷。周禮摘箋五卷。儀禮古今考二卷。禮記補註四卷。月令氣候圖說一卷。夏小正箋一卷。春秋左傳會要四卷。左傳官名考二卷。春秋三傳比二卷。逸孟子一卷。十三經注疏錦字四卷。己齋瓊錄十二卷。通話二卷。剿說四卷。諸家藏書簿十卷。諸家藏畫簿十卷。賦話十卷。詩話二卷。詞話二卷。曲話二卷。六書分彙二卷。古音合三卷。談墨錄十六卷。制義科瓊記四卷。蔗尾叢談四卷。樂府侍兒小名錄二卷。唾餘新拾十卷。續十六卷。補十二卷。井蛙雜記十卷。南越筆記十六卷。然犀志二卷。出口程記一卷。方言藻一卷。粵風四卷。蜀雅二十卷。粵東皇華記四卷。童山詩集四十二卷。文集二十卷。蠶翁詞二卷。童山自記一卷。羅江縣志十卷。從弟鼎元驥元。俱有詩名。時稱錦州三李。

吳大定

吳定。字殿麟。安徽歙縣人。敦品勵學。事親謹。三年之喪如禮。自期功及師友喪。飲食起居必變於常。少與姚鼐同受古文法於劉大槐。尤相友善。定爲文嚴於法。雖鼐所爲文。亦常斷斷持不可也。家本貧。至老貧益甚。屢試不售。嘉慶初舉孝廉方正。人以爲不愧。晚年專力經學。歛學者自江永戴震輩皆主考據。定獨銳意深求義理。卒年六十六。著有周易集注十卷。紫石泉山房文集十二卷。詩集六卷。集中所論冠婚喪祭諸作。鼐皆以爲有益於人心。

風俗云。

沈德潛

沈德潛字確士號歸愚江南長洲人乾隆四年進士。致庶吉士。七年授編修。八年遷左中允。累遷侍讀。左庶子。侍講學士。充日講起居注官。九年充湖北鄉試正考官。遷少詹。十年晉詹事。充武會試副考官。十一年三月授內閣學士。八月請假歸葬。得旨不必開缺。御製詩以賜之。命給三代封典。十月諭曰。朕向留心詩賦。不過幾餘遺興。偶命屬和。其中才學充裕如沈德潛等。間或一加超擢。而躁進之徒。競思進獻。若借此可爲梯雲之捷徑。不知沈德潛優陞閣學。朕原因其爲人誠實謹厚。且憐其晚遇。是以稠疊加恩。以勵老成積學之士。初不因進詩優擢。雕章琢句。專事浮華。此風一熾。必有藉手捉刀。希圖僥倖者。傳諭知之。十二年四月。命在尙書房行走。六月。假滿赴職。尋擢禮部侍郎。十三年。充會試副考官。尋以原銜食俸。在尙書房行走。十四年。詔原品休致。有所著作。許寄京呈覽。尋進所著歸愚集。上南巡。諭在籍食俸。是冬。以祝皇太后六旬萬壽詣京。十月在籍進所撰西湖志慕。二十二年。上南巡。加禮部尙書銜。二十六年。詣京祝皇太后七旬萬壽。上命集在朝諸王文武及致仕大臣。年七十以上者爲九老。凡三班。並繪圖。德潛列致仕九老之首。二十七年。薦過常州。德潛偕錢陳羣迎駕。上賜詩贊揚之。三十年。上南巡。晉階太子太傅。賜其孫維熙爲舉人。賜詩曰。吳中今古老人科。比似徵明定若何。書畫雖輸詩勝彼。功名已過壽如他。遊山有興仍清健。處世無爭祇善和。明說九旬有三歲。那更年格尙嫌多。三十二年。賜入夔。明年亦如之。三十四年八月。諭兩江總督高晉浙江巡撫永德。前經降旨將錢謙益之初學集嚴行查禁。嗣據奏到陸續收繳銷毀。因思沈德潛錢陳羣二人平素工於聲韻。其收藏各家詩集必多。在錢陳羣於錢謙益詩文似非其性之所近。且久直內廷。尙屬經事。諒不至以應禁之書轉視爲可貴。若沈德潛向會以錢謙益詩選列國朝詩別裁集首。經朕於序文內申明大義。令其刪去。但既謬加獎許。必於其詩多所珍惜。或其門弟子徃於錮習。向欲奉

爲瓣香。妄以沈德潛齒宿德尊，謂可隱爲庇護。從惠存留，亦未可定。果爾，豈沈德潛不知恩重，不復望朕爲之慶百歲耶？沈德潛錢陳羣自退居林下以來，朕恩禮優渥，所以體恤而矜全之者，無所不至。伊二人寧不感戴殊榮，勉思仰副。若其家尙有錢謙益初學有學等集，未經呈繳者，即速遵旨繳出。與二人毫無干礙，斷不必慮及前次收藏之非。妄生疑畏，豈朕成全兩人至此而委曲令其繳出，轉從而加之罪責乎？高晉永德將此旨密諭沈德潛錢陳羣知之。九月，德潛病卒。高晉覆奏德潛家並無未繳錢謙益詩文集，諭曰：沈德潛積學工詩，耆儒晚遇，贈太子太師，入祀賢良祠，賜祭葬如例。諡文獻。德潛與錢陳羣並稱東南二老。有五朝詩別裁、古詩源、竹嘯軒詩鈔、歸愚詩、文鈔西湖志纂。四十三年，江南東臺縣已故舉人徐述夔著一柱樓集，詩詞悖逆，經縣民首告，集內載德潛爲述夔作傳，下大學士九卿職，上諭追奪德潛階銜祠諡，仆其墓碑。

邵齊燾

邵齊燾，字叔六，江蘇昭文人。幼異敏，甫受書，能曉大義。乾隆七年進士，改翰林院庶吉士，散館授編修。居詞館十年，纂修書局者再。九年十七年兩充順天鄉試同考官。嘗獻東巡頌，時稱爲班揚之亞。羣公爭欲致之門下。齊燾落落寡合。年三十六卽罷歸。自顏其室曰道山祿隱。三十年，高宗南巡，詔在籍詢臣試闕下。以母老辭。齊燾意度夷曠，章草入晉人室，善爲駢體文。意欲矯陳維崧吳綺章藻功三家之失，故所作以氣格排慕，色澤班駁爲宗。秀水鄭虎文云：今古駢散殊體詭製，道通爲一。本朝惟齊燾一人而已。然齊燾嗾自以爲不足，常用陳思王語，僕常好人譏彈其文八字，鑄爲小印，與王太岳書，自言根柢疏薄，智力凡弱，詞不副意，意不逮見，其虛心如此。主常州龍城書院。黃景仁洪亮吉皆從受學。卒年五十二。有玉芝堂詩文集九卷，同時爲駢體文者有武進劉星煒、錢塘袁枚、吳錫麒、陽湖洪亮吉、孫星衍、曲阜孔廣森、南城曾燠。其後全椒吳嘉合遷爲八家四大云。

胡天游

胡天游，字稚威，浙江山陰人。少有異才，於書無所不窺。雍正中，兩舉副榜貢生。乾隆元年，禮部尙書任蘭枝薦舉博學鴻詞。天游以持服未與試。二年服闋，補試。試日鼻衄大作，遂投卷出。方是時，四方文士雲集京師，每稱人廣坐。天游輒援筆數千言，落紙如飛，縱橫奧博，見者嗟服。於文工四六，得燕許之遺，所作若文種廟銘、靈濟廟碑、安顯先生碑。任御史趙總兵兩墓志。遜國名臣贊序、柯西石宕記。論者謂皆天下奇作。古文自言學韓愈。在儲大文方苞李紱之上。然灑險處乃似唐劉蛻。元元明善非其至也。詩亦雄健有氣，性耿介，未嘗一刺于公卿。一統志成，大學士鄂爾泰張廷玉屬表於檢討齊召南，召南推天游，鄂驚歎其文，欲招之。召南曰：天游奇士，豈可招耶。卒不至。十六年舉經明行修，復報罷。二十三年客遊山西，卒於蒲州。年六十三。著有石筍山房文集六卷。

商盤

商盤，字寶意，浙江會稽人。雍正八年進士。初以知縣用，特旨改翰林院庶吉士，習國書，散館授編修。尋以養親乞外補，授同知。累官至雲南元江府知府。以大兵進征緬甸，跋涉戎行，遂於乾隆三十二年病卒。年六十七。盤自幼工詩，初效樊南，既而出入元白蘇陸間。樂府歌行尤瑰麗縱恣，跌宕自喜。少讀書於土城山之質園，舊傳爲句踐教西施歌舞處。亭臺花竹，甲於一郡。盤東髮受書，即婆娑其下，因以名集。才情富贍，所爲篇什甚多。後經刪汰，尙存三千首，爲集三十二卷。尤精音律，工談笑，所至必傾倒名士。其風流儒雅，論者比之溫岐杜牧云。

陳兆崙

陳兆崙，字星齋，浙江錢塘人。幼聰慧，七歲就傳，日誦書百餘行。輒通曉大義。年十五，舉十三經，旁涉子史。以博聞強識稱於時。雍正八年成進士，以知縣分發福建。閩浙總督郝玉麟器之，延主龍峯講席。兼領通志局事。十三年入都，適內閣中書懸缺，例得入試，遂以第一名授中書。兼撰文，充軍機章京。乾隆元年，召試博學鴻詞，授翰林院

檢討。二年充世宗實錄館纂修。兼三朝實錄館校對。六年充湖北鄉試正考官。七年充日講起居注官。累充大清會典。明紀綱目。續文獻通考纂修官。十七年二月。上御經筵。以撰擬講義稱旨。擢左春坊左中允。六月大考。二名。擢翰林院侍讀學士。十八年。遷太僕寺卿。充續文獻通考總裁。十九年擢順天府府尹。值歲大水。所在告災。兆崙苦心規畫。撫綏安集。無不得所。畿輔役繁。民力疲敝。舊設官車。議簽富戶以代。兆崙奏罷之。時西路出師。徵發禁旅與索倫兵。兆崙經畫宿頓儲蓄。條理井井。軍民晏然。復冒雪送之居庸關外。時時下馬相勞苦。軍中見之。莫不嗟呼踴躍。二十一年。遷太常寺卿。二十三年。上謁陵迴鑾。以同官迎駕。失儀。降太常寺少卿。尋命入直上書房。遷通政使司副使。三十二年。復授太僕寺卿。前後呈所著詩文。屢拜御製御書書籍硯文綺豐貂之賜。三十三年乞假歸。三十五年假滿。仍直上書房。三十六年卒。年七十有二。兆崙精大書之學。尤長經義。於易書禮均有論述。不專主一家。其爲詩文。不以氣炫才。不以詞害志。醇古澹泊。清遠簡放。適如心所欲出。始成進士。觀政海疆。非其好也。每發爲詩歌。以自灑濯。暨尹京兆。而意致蕭散。有山澤間儀。京師士大夫奉爲文章宗匠。嘗自言吾書第一。文次之。梁同書亦謂我朝不以書名而書必傳者兆崙也。著有紫竹山房文集二十卷。詩集十二卷。

陸錫熊

陸錫熊。字健男。號耳山。江蘇上海人。乾隆二十六年進士。歸班銓選。二十七年。帝南巡。召試一等。授內閣中書。二十八年補缺。三十年充山西鄉試副考官。三十三年四月。京察一等。加一級。六月。充浙江鄉試副考官。十二月。擢宗人府主事。三十五年。充廣東鄉試正考官。三十六年三月。充會試同考官。五月。擢刑部員外郎。是年恭遇覃恩。加一級。三十七年三月。充會試同考官。十月。擢本部郎中。會開四庫全書館。命司總纂。三十八年八月諭曰。辦理四庫全書處。將永樂大典內檢出各書。陸續進呈。朕親加批閱。閒予題評。見其考訂分排。俱有條理。而撰述提要。粲然可觀。則成於陸錫熊紀昀之手。二人學問本優。校書亦極勤勉。紀昀曾任學士。陸錫熊見任郎中。均著授爲

翰林院侍讀。十二月補缺。四十年二月。擢右春坊右庶子。旋授翰林院侍讀學士。閏十月。充日講起居注官。四十一年。充文淵閣直閣事。是年恭遇覃恩加一級。四十二年四月。京察屆期。王大臣等驗看引見。奉旨准其一等。四十三年。議敘四庫館纂辦諸臣。奉旨陸錫熊等雖已加恩擢用。但纂辦各書。均爲出力。著賞給緞匹筆紙墨硯。以示獎勵。四十五年五月。京察屆期。王大臣等驗看引見。奉旨准其一等。諭以應升之缺題奏。六月。授光祿寺卿。八月。命稽察右翼覺羅學。是年恭遇覃恩加一級。四十六年四月。諭曰。四庫全書總目提要。見已告竣。呈覽。頗爲詳覈。所有總纂官紀昀陸錫熊。著交部從優議敘。部議加一級。紀錄三次。四十七年五月。轉大理寺卿。七月。撰四庫全書表文進呈。得旨獎賚。十月。因四庫館進呈原任檢討毛奇齡所撰詩說一書。內有字句違礙。總纂官未經簽改。得旨交部議處。部議降調。諭從寬留任。四十八年十二月。丁母憂。五十年。四庫全書告成。議敘加一級。紀錄二次。五十一年六月。服闋。補光祿寺卿。九月。提督福建學政。五十二年二月。遷都察院左副都御史。留學政任。三月。四庫全書處呈續繕三分。內有李清所撰諸史異同一書。語多妄誕。總纂官未經掣燬。命交部嚴加議處。部議革職。得旨改爲革職留任。八年無過。方准開復。六月。諭曰。前因熱河文津閣所貯四庫全書。朕偶加批閱。其中錯謬甚多。因派扈從之阿哥及軍機大臣等。復加詳閱。並令在京之阿哥及大學士九卿等。將文淵文源二閣所貯書籍。一體校閱。今據和珅等閱看各處謬舛。不一而足。此內閣若璩尙書古文疏證一書。有引李清錢謙益諸說。未經刪削。並黃庭堅詩集注。有連篇累葉空白未填者。實屬草率已極。著將承辦之總校分校官交部議處。見據紀昀奏請。將尙書古文疏證內各條遵照刪改。陸續賠寫。並請將文源閣所貯明季國初史部集部及子部之小說雜記諸書。自認通行校看。凡有違礙。卽行修改。仍知會文淵文津二閣詳校官畫一辦理。再行賠寫抽換。務期完善等語。從前辦理四庫全書。係總纂紀昀陸錫熊專司其事。朕因該員等纂輯訂正。著有微勞。不次超擢。數年之間。晉階卿貳。乃所辦書籍。竟如此荒謬舛錯。如果從前繕寫時。謄錄率意。脫落遺漏。自不難將已盡議敘。見任民社各員斥革治罪。但此等譌謬。該詹鑒錄等惟知照本繕寫。例不考訂改正。而纂校各員。則係有專司考訂之責。自

必未經寓目。該員所辦何事。其各實無可道。今紀昀自認通行覆閣明末各書。復請將看出應換篇葉。自行賠寫。交部議處。而陸錫熊則因見出學差。轉得置身局外。是使紀昀一人獨當其咎。轉令見在派出之大小各員。分任其勞。不足以昭平允。著將文淵文源文津三閣書籍所有應行換寫篇葉及裝訂完改各工價。均令紀昀陸錫熊二人一體分賠。五十三年二月。因上年福建甄別教職數目過少。下部議處。部議革任。得旨寬免。仍注冊。五十五年正月。任滿回京。奏請前往盛京詳校文溯閣書籍。九月。奏所有書籍業經分閱各員全數校畢。覆行覈簽。亦已竣事。其中錯落偏謬各書。隨時繕寫改正。此外漏寫錯寫。應行另繕之本。俱即自行賠寫完妥。報聞。是年恭遇覃恩。開復降革處分。五十六年二月。命稽察左翼宗學。十二月。奏全書卷帙繁富。屢校即屢有改正。文淵文源兩閣。經紀陶等覆校。中間缺落舛譌尙多。所有文溯閣全書。亦應一體覆加詳覈。俾得益增完善。一交新春。臣即起程赴盛京覈辦。報聞。五十七年抵奉天省城。旋卒。著有篁村詩鈔寶奎堂文集。補陳壽禮志炳燭偶鈔陵賜獻徵集。

程晉芳

程晉芳。字魚門。江蘇江都人。家山陽。業鹺於淮。乾隆初。兩淮殷富。程氏尤憂後。晉芳獨惜情好儒。罄其貲。購書五萬卷。招致方聞綴學之士。與共探討。束髮時。讀戴山劉宗周人譜。見其論守身事親大節。輒心慕之。故以戴園自號。又問經義於從叔廷祚。學古文於劉大櫟。與商盤袁枚唱和詩文。並擅其勝。江淮老宿。咸與上下其議論。南游金陵。愛栖霞牛首之勝。憑眺山川。考證今古。所至傾其坐人。乾隆七年。召試。授內閣中書。十七年。成進士。補吏部主事。遷員外郎。四庫館開。以薦爲纂修官。書成。擢翰林院編修。晚歲家貲盡。官京師。至無以舉火。四十九年。乞假遊西安。將謀諸畢沅。爲歸老計。抵關中。一月卒。年六十七。晉芳學無所不窺。經史子集。天星地志。蟲魚考據。俱能研究。晚與朱筠戴震游。乃治經。究心訓。故其卒也。京師爲之語曰。自竹君先生死。士無談處。魚門先生死。士無走處。謂朱筠及晉芳也。其聲華之盛如此。著有周易知旨編三十餘卷。尙書今文釋義四十卷。尙書古文解略六卷。

詩毛鄭異同考十卷。春秋左傳翼疏三十二卷。禮記集釋。諸經答問十二卷。羣書題跋六卷。勉行齋文十卷。藪園詩三十卷。

黃景仁

黃景仁，字漢鏞，一字仲則，江蘇武進人。四歲而孤。伯兄繼卒，家甚貧，母屠，督之讀。所業倍常童。常熟邵齊霖主講常州龍城書院，與同郡洪亮吉偕受業焉。邵卒，聞秀水鄭虎文賢，謁之於杭州。鄭愛異之，居月餘，愀然辭曰：景仁無兄弟，母老家貧，居無所賴，將遊四方，甕升斗爲養耳，乃爲浪遊，攬九華，涉匡廬，泛彭蠡，歷洞庭，登衡嶽，觀日出，過湘潭，酌酒招魂，弔屈原，賈誼，作浮湘賦，以寄意，悲慨傷懷。時湖南按察使定興王太岳，故名士負其才，及見心折，每有所作，必持質黃秀才，定可否。自湖南歸，詩益奇肆，大興朱筠，督學安徽，招入幕。三月上已，爲會於采石磯之太白樓，賦詩者十數人，景仁年最少，著白袷，立日影中，頃刻數百言，徧示座客，咸輟筆。時入府士子，以詞賦就試當塗，聞學使者高會，畢集樓下，至是咸從奚童，乞白袷少年詩，競寫，一日紙黃焉。生平於功名不甚置念，獨憾其詩無幽并豪士氣，嘗蓄意欲遊京師，乾隆四十一年，上東巡，召試名列二等，以武英殿書籤，例爲主簿。時陝西巡撫畢沅，見都門秋思詩，奇其才，速其西遊，厚貲之，乃由西安入都，入貴爲縣丞，寓京師法源寺，銓有日矣，爲債家所迫，抱病逾太行，出雁門，將復遊陝，次解州，病殆，卒於河東鹽運使沈業富署。年三十五，友人洪亮吉持其喪以歸，景仁體羸，長身伉爽，性高邁，好遊，盡觀江上諸山水，每獨遊名山，經日不出，值大風雨，或瞑坐崖樹下，牧者見之，以爲異人。詩宗法杜韓，後稍稍變其體，爲王李高岑，卒其所詣，與李白最近。乾隆間，論詩者推爲第一，曲阜桂馥以宋鑄山谷詩孫銅印贈之，駢體文絕似六朝，工書，擅山水，皆極古質，晚號鹿菲子，著兩當軒詩文集，竹垞詞，凡二十二卷，子乙生，通鄭氏禮，行不違其言，早卒。

彭端淑

彭端淑字儀一，四川丹稜人。生而穎異，十歲能文。與弟肇洙遵泗讀書紫雲山下，相爲師友。如是者六年。雍正十一年進士。授吏部主事。遷員外郎。乾隆十二年，充順天鄉試同考官。二十年出爲廣東肇羅道。肇羅爲三江要口，五州之屏藩，重地也。端淑至省，察政治，黜陟能否。每按部，屬從不過一二人。罷州縣送迎餽饋。吏民稱歌。又延名宿何夢瑤主講，端溪書院。暇復選開敏有才者，親自筋厲，成就甚衆。時州縣積案三千餘，端淑權情事輕重，依律斷理。旬月之間，積案爲清。大吏由是深相倚重。後運米粵西，歸道失足落水，援救得免。歎曰：人於宦途，不滿意輒以咎人，此誰擠之者？今不葬魚腹，天於我厚矣。復何望焉。遂請告歸。家居十餘年。主錦江書院講席。以實學課士。年八十一卒。端淑博洽，工詩文。詩學漢魏，文學左史，皆詣極精微。官京師時，與弟肇洙遵泗俱知名。一時有三彭之目。蜀詩自費密父子後，奉節傅作楫，銅梁王恕繼之，皆能步武唐賢。古文則罕問津者。惟端淑爲崛起云。著有白鶴堂文集、雪夜詩談、晚年詩藁。

劉大槐

劉大槐，字才甫，安徽桐城人。貌豐偉，而性直諒，嗜讀書，工爲文章。以布衣遊京師，時內閣學士同邑方苞，以古文辭負重名。大槐持所業謁苞，苞一見驚歎，告人曰：如苞何足算耶？邑子劉生乃國士爾。聞者始駭之。久乃益信。雍正七年十年兩舉副貢生。乾隆元年，苞舉應博學鴻詞科，爲大學士張廷玉所黜，既乃知爲大槐。深愧惜。十五年，廷玉特舉大槐經學，又報罷。出爲黟縣教諭。數年去官歸。四十四年卒。年八十二。大槐雖遊方苞之門，所爲文造詣各殊。苞擇取義理於經，所得於文者義法。大槐並古人神氣音節得之，兼集莊騷左史韓柳歐蘇之長，其氣肆其才雄。其波瀾壯闊，常著觀化篇，奇詭似莊子。其他言義理者，又極醇正。詩能包括前人，錄諸家爲一體。著有海

峯文集八卷。從遊者多以詩文鳴。而姚鼐吳定爲最著。

蔣士銓

蔣士銓。字心餘。江西鉛山人。家故貧。四歲。母鍾氏授書。斷竹蕙爲波磔。點畫攢簇。成字教之。父堅有奇節。十一歲。父縛之馬背。遊太行。讀鳳臺王氏藏書。既長。工爲文。喜吟咏。金德瑛督學江西。奇其才。以孤鳳皇稱之。拔冠弟子員。乾隆十九年。由舉人官內閣中書。二十二年成進士。政翰林院庶吉士。散館授編修。二十七年充順天鄉試同考官。旋以乞假養母歸。會喪曰修。以士銓及彭元瑞薦。高宗召見元瑞。問士銓何在。元瑞以母老對。上賜元瑞詩。有江右兩名士句。士銓感激恩眷。母服除。力疾入都補官。逾二年。記名以御史用。未幾仍以病乞休。四十九年卒。年六十一。士銓長身玉立。眉目朗然。志節凜凜。以古賢者自厲。趨人之急如恐不及。乞休後。主紹興戴山書院。時越中富家池三江開。日久堙廢。士銓力請於大府。借帑營治。曰事雖非山長賈。然食越人粟。則視越人如一家也。偶埽墓歸鉛山。則爲邑人建壩濬渠。以通水利。有駱生者。負鹽課客死。士銓漏夜作十三札飛遞嶺南。俾其孤孀扶六櫬歸。其所爲詩。氣體雄傑。得之天授。變化伸縮。能拔奇於古人之外。至敘述節烈。讀之使人感泣。少時與武定汪軻。南昌楊廬。南豐趙由儀。有四子之目。後與袁枚趙翼稱袁蔣趙三家。枚嘗以第一人自命。而以第二位置士銓。然論者謂袁詩多可驚可喜。蔣詩則多可味。不能軒輊。其詩古體勝近體。七言尤勝。高麗使臣嘗餉墨四笏。求其樂府以歸。古文亦雅正有法。詞尤獨絕。著有忠雅堂文集十二卷。詩集二十七卷。銅弦詞二卷。

魯九皋

魯九皋。原名仕驥。字絮非。江西新城人。乾隆三十六年進士。家居養親十餘年。乃出選山西夏縣知縣。有惠政。以積勞卒於官。九皋嘗至建寧。謁任琇。而受其爲古文之法。復與桐城姚鼐友善。鼐稱其文沖淡和易而有體。雖本

於仕秀。而自傳以己之所得。持論尤中正。其書蘇轍請罷青苗狀後云。論青苗法多矣。綜其要不出四害之說。嘗推言之。朱子社倉之法。行之不善。與青苗無異。蓋青苗所放者錢。小民當穀貴領錢買穀。穀賤又賣穀還錢。是徵數倍之息矣。若夫社倉所放者穀。穀貴時借穀。穀賤時仍以穀還。雖多取息。以錢計之。與無息等利一。荒年患無穀。有社倉蓄積之。民得借貸以食利二。春耕時。農視穀如珠。禾稼登場。或不免狼戾。有社倉以收儲。無耗散之虞利三。然自官行之。則抑配一害也。胥役橫索二害也。放時得賄而給借。斂時按籍而追還。民不能堪三害也。即自民行之而不善。亦不免於害。惟夫曲體人情。深悉民隱。當借而弗吝。不當借者靳而弗與。獎勵而警情。厲激勸於其中。及斂之也。又視歲入之豐凶。以陰行其寬嚴之意。則利與而害免矣。九皋里居時。授其學於子弟及鄉之雋者。又授於其甥陳用光。新城古文之學。其源始九皋。著有山木居士集。

鄭燮

鄭燮。字克柔。號板橋。江蘇興化人。乾隆元年進士。官山東范縣知縣。調濰縣。以請賑忤大吏。乞疾歸。少穎悟。讀書饒別解。家貧。性落拓不羈。喜與禪宗尊宿及期門子弟游。日放言高談。臧否人物。以是得狂名。及居官。則又曲盡情僞。屢塞眾望。官濰縣時。歲歉人相食。燮大興修築。招遠近飢民赴工就食。籍邑中大戶。令開廠煮粥。輸餉之。有積粟。責其平糶。活者無算。時有循吏之目。善詩。工書畫。人以鄭度三絕稱之。詩言情述事。惻惻動人。不拘體格。與至則成。頗近香山放翁。書畫有真趣。少工楷書。晚雜篆隸。閒以畫法。所繪蘭竹石亦精妙。人爭寶之。詞弔古據懷。尤擅勝場。或比之蔣士銓。內行醇謹。幼失怙恃。賴乳母教養。終身不敢忘。所爲家書。忠厚懇摯。有光祿庭誥。顏氏家訓遺意。晚年歸老躬耕。時往來郡城。詩酒唱和。嘗置一囊。儲銀及果食。遇故人子及鄉人之貧者。隨所取贈之。與袁枚未識面。或傳其死。頓首痛哭不已云。著有板橋詩鈔。

錢陳羣子伏誦

錢陳羣。字主敬。號香樹。浙江嘉興人。康熙二十年進士。改庶吉士。翰林院編修。雍正七年。充湖南鄉試正考官。九年。遷右贊善。十一年。轉左贊善。十二年三月。遷右庶子。四月。遷侍講學士。充日講起居注官。十三年正月。提督順天學政。閏四月。轉侍讀學士。七月。命南書房行走。九月。改右通政。仍留學政任。十一月疏言。各學舉報優劣。請照京察計典例。止於歲試。隨糊舉行。蓋歲試文武生畢集。至科試則武生不與。而文生應試者。亦止十之三四。不能面加獎戒。其歲科並行之地。必有朝報劣而夕褫革。欲自新而無路者。卽舉優亦易掩飾。請停科試舉報。下部議行。乾隆元年。丁母憂回籍。服闋。命提督順天學政。四年。補原官。陳羣母陳氏。知書工繪事。陳羣少時。母勸之學。爲夜紡授經圖。陳羣嘗奏及之。上賜題以詩。有嘉禾欲續賢媛傳。不愧當年畫荻人之句。五年。以疏請增順天鄉試南北皿中額。銷去加一級。六年六月。遷太僕寺卿。七月。遷詹事。八月。疏請直省學宮從祀先賢先儒神牌位次。悉遵太學。不得因陋就簡。以譌承譌。用昭慎重。部議從之。七年五月。擢內閣學士。六月。遷刑部右侍郎。七月。轉左。九年七月。充經筵講官。十年。充會試副考官。十二年二月。充大清會典館副總裁。六月。充江西鄉試正考官。十五年。復充江西鄉試正考官。十七年。患反敷疾。連疏乞解職回籍。許之。命其子編修汝誠侍行。且賜詩以寬其意。十八年。進途中所作詩。二十二年。上南巡。諭陳羣在籍食俸。二十五年。親爲喬梓圖寄賜。明年來京。祝皇太后七旬萬壽。命與香山九老會。諭曰。錢陳羣久歷卿貳。兼直內廷。年逾七旬。學問優裕。前以養病回籍。有旨在家食俸。用資頤養。今來京慶祝。召對之次。見其神明不衰。而居鄉素稱恪謹。著加恩賞給尙書銜。以昭優眷。二十七年。爲過常州。借沈德潛來迎。御製詩各書一通賜之。時陳羣年八十。命加太子太傅。賜其子汝器爲舉人。三十六年冬。來京祝皇太后八旬萬壽。令其子汝誠扶掖出入內廷。再與香山九老會。陳羣學問淵醇。尤深於詩。書法亦蒼老。家居後。每歲上錄寄詩百餘篇。命之和。陳羣旣和韻。必親繕冊以進。冊必有跋。體或兼行草。屢蒙獎贊。三十九年卒。晉贈太傅。入祀賢良祠。諡文端。四十四年。御製懷舊詩。刻陳羣於五詞臣中。長子汝誠。乾隆十三年進士。官至刑部侍郎。充四庫全書館三通館副總裁。

王昶

王昶字德甫。號述菴。一字蘭泉。又字琴德。江蘇青浦人。少穎異。博學善屬文。體貌修偉。及長遊吳下。蔣恭裴楊繩武見其詩文。謂宋文憲以後一人也。肄業紫陽書院。時從惠定宇游。潛心經術。講求聲音訓詁之學。是時沈尙書歸愚爲院長。選蘭泉及王鳳喈。吳企晉。錢曉徵。趙升之。曹來殷。黃芳亭。七人詩。稱爲吳中七子。流傳日本。大學頭默真迦見而心折。附番舶上書於沈尙書。又每人各寄相憶詩一首。一時傳爲藝林盛事。乾隆十九年進士。二十二年。上南巡。召試一等。欽賜內閣中書。二十三年。補內閣中書。二十四年八月。充順天鄉試同考官。十一月。在軍機司員上行走。二十五年八月。充順天鄉試同考官。二十六年三月。充會試同考官。二十七年八月。充順天鄉試同考官。二十八年三月。充會試同考官。二十九年三月。擢刑部山東司主事。辦理秋審事。三十一年遷浙江司員外郎。署郎中。三十二年五月。升江西司郎中。三十三年四月。京察一等記名。以道府用。七月。以漏洩查辦兩淮鹽引一案。奉旨革職。九月。雲貴總督阿桂請帶往雲南軍營效力。三十六年十月。上諭。王昶在滇效力誠懇。賞給主事。所有應得分例。准其支食。十一月。補吏部考功司主事。三十七年十二月。副將軍阿桂奏前經帶往辦事之主事王昶由雲南軍營效力。復帶赴四川軍營。一切奏摺文移。皆其承辦。頗爲出力。得旨。王昶著加恩。以吏部員外郎用。三十八年。補稽勳司員外郎。三十九年。以軍營奮勉。經大學士阿桂保奏。以本部郎中升用。四十年。補文選司郎中。四十一年五月。諭曰。吏部郎中王昶在軍機出力年久。頗著勤勞。著加恩升鴻臚寺卿。並賞戴花翎。仍在軍機處司員上行走。七月。授通政司副使。四十二年。遷大理寺卿。四十四年。擢都察院左副都御史。四十五年三月。授江西按察使。八月。丁母憂回籍。四十八年二月。服闋。補直隸按察使。三月。調陝西按察使。十月。奏稱向例重犯脫逃。州縣先於本境查拏。初參限滿不獲。始造具事由簿冊。分咨鄰省通緝。查命案初參以半年爲限。闕時既久。頑犢之徒。早已乘間遠竄。請嗣後遇有兇犯脫逃。一面在本地嚴拏。一面飛咨鄰省通緝。得旨。依議速行。十二

月。奏陝省囑員遼闊。東南與楚蜀接壤。最易藏奸。見飭各屬將舊有保甲。逐一清理。漢中興安一帶。流寓民人。取具相識保結。方准棲止。其無人認識蹤跡可疑者。遞回原籍。至往來過客於歇店給發印簿登記彙查。儻詢出命盜重犯曾在該店歇宿。照例治罪。再兇器必宜禁絕。除烏槍業已陸續收繳。其餘順刀礮刀。不惟不容佩帶。並不許製造。仍飭各屬嚴密稽查。毋任胥役藉端滋擾。得旨實力爲之。五十年。署陝西布政使。五十三年。調江西布政使。五十四年二月。授刑部右侍郎。五十五年七月。命赴湖南。鞫湘鄉糧糧書需索案。九月。赴湖北。鞫應城縣倉書淨收案。十月。鞫江陵縣書吏偷減土方案。十一月。鞫永明縣賄買武童案。十二月。鞫長沙縣勒買常平倉穀案。各得實以聞。五十七年七月。遷雲南布政使。八月。充順天鄉試副考官。五十八年乞歸修墓。冬還京。以病乞休。上鑒其老。允之。諭以歲暮寒。俟春融歸。明年歸。名其堂曰春融堂。嘉慶元年。以授受大典至京與千叟宴。四年。純皇帝升遐。復至京謁梓宮。蒙召見。勅建言。密封以進。不留草。夏。歸青浦。分賠漢銅。鬻田宅以入官。居於廟廡。朋舊贈遺。盡以刻書。嘉慶五年。年七十有七。重游泮宮。十一年。年八十有三。病甚。口授謝恩表。自定喪禮。囑阮元爲神道碑文。六月初七日。雞初鳴。曰。時至矣。遂卒。和之。扈駕巡山東江浙也。古帝王聖賢名臣陵墓祠廟嘗分遣致祭。己卯庚辰。壬午。順天鄉試。辛巳。癸未。會試。五爲同考官。王子。主順天鄉試。皆以經術取士。士之出門下。爲小門生及從游受業者二千餘人。又嘗主婁東敷文兩書院。欽定通鑑輯覽。同文志。大清一統志。續三通等書。奉敕與纂修事。又奉敕刪定三藏聖教經。編譯佛典。深於禪理者不及也。和弱冠時。即嗜金石之學。及宦游所至。無不訪求。自三代至遼金。積千五百通甄錄之。著金石萃編一百六十卷。凡其文漫漶見於他書者。則爲旁注以記其全。篆隸及見古文別體者。摹其點畫。加以訓詁。即題類陰兩側。亦必詳載碑製之長短寬博。取建初應儷尺度其分寸。并志其行字之數。諸家題跋見於金石諸書文集者。悉著於編。金石之書至此可謂集大成矣。在京師時。與朱笥河互主驪壇。有南王北朱之稱。所至朋舊文謙。提倡風雅。後進才學之士。執業請益。舟車錯互。屢滿戶外。歸田後。往來吳門。賓從益盛。與王西泚錢竹汀艤舟白公堤上。朋簪雜遝。詩酒飛騰。望之者若神仙焉。飛天黃過人。於學無

所不窺。尤鑿於易。詩宗杜少陵。玉谿生。而參以韓柳。古文則以韓柳之筆。發服鄭之蘊。著述甚富。除金石萃編外。有春融堂詩文集六十八卷。明詞綜十二卷。國朝詞綜四十八卷。湖海詩傳四十六卷。續修西湖志。青浦志。太倉志。陝西舊案成編。雲南銅政全書。漢行日錄三卷。征緬紀聞三卷。蜀徵紀聞四卷。屬車雜志二卷。豫章行程記一卷。商榷行程記一卷。重游滇詔紀程一卷。雪鴻再錄二卷。使楚叢談一卷。臺懷隨筆一卷。青浦詩傳三十六卷。天下書院志十卷。其未成書者。則羣經揭藥。五代史注。揭藥取周禮職金注。今時之書有所表識。謂之揭藥之意。蓋以漢學爲表識。而專攻毀漢學者。

王文治

王文治。字禹卿。江蘇丹徒人。乾隆二十五年一甲三名進士。授翰林院編修。二十七年充順天鄉試同考官。二十八年充會試同考官。大考一等第一名。擢侍讀。旋出爲雲南臨安府知府。以事免歸。文治天才豪縱。眉宇軒舉。少有國士之稱。爲文尙瑰麗。至老歸於平淡。詩雄傑宏亮。不愧唐音。時袁枚壯年引退。以詩鳴江浙間。文治繼其後。聲華相上下。書法尤秀逸。得董其昌神髓。梁同書自謂不如也。高宗南巡。覽文治所書錢塘僧寺碑。大賞愛之。嘗渡海至琉球。琉球人傳寶其翰墨。兼精音律。歸後。買僮教之度曲。行無遠近。必以自隨。或諫之不聽。然客去樂散。默然禪定。嘗自言其詩及書皆有禪理。嘉慶七年卒。年七十三。著有夢樓詩集。

王芑孫

王芑孫。字念豐。江蘇長洲人。乾隆五十三年。召試舉人。官華亭教諭。芑孫幼有異稟。年十二三能操觚爲文。客京師。館董誥梁詩正王杰劉墉彭元瑞家。爲諸人代削草。其後充教習。又出而與館閣之士遊。故雖未挂朝籍。而朝廷有大典禮文章之事。未嘗不操筆竊與其間。身短而瘠。負氣甚高。不屑從諛。一介不苟取。遇公卿若平輩。或病

其狂實猶也。久困場屋。益肆力於詩古文。其詩以五言古體爲最工。聞與法式善何道生張問陶楊芳燦輩。琴歌酒賦。故爲南北時望所推。嘗選宋元八家以廣唐宋八家。又謂元潘昂霄金石例王行墓銘舉例所載多未備。因撰碑版廣例十卷。書仿劉墉。具體而微。所自著有淵雅堂集。嘉慶二年卒。年六十三。

王友亮

王友亮。字景南。安徽婺源人。乾隆四十一年舉人。官內閣中書。軍機章京。五十六年。成進士。改刑部主事。遷員外郎。轉山東道監察御史。擢禮科兵科給事中。累遷通政司參議。太僕寺少卿。通政司副使。卒年五十六。友亮官刑部。決獄多平反。晚年巡視南漕。撫卹運丁。寬嚴有體。漕船之行。速於往日。少在金陵。有金陵雜詠。及巡視南漕。有視漕小草。以詩名海內者三十年。詩格與袁枚相近。其爲文議論正大。敘事有法。亦似程晉芳。著有雙佩齋集六卷。

伊秉綬

伊秉綬。字組似。福建寧化人。父朝棟。乾隆三十四年進士。官刑部主事。由御史五遷至光祿寺卿。少受業於雷鉉。通程朱之學。爲蔡世遠所稱。卒年七十九。著有南窗叢記八卷。賜硯齋詩鈔四卷。秉綬乾隆五十四年進士。改刑部主事。擢員外郎。嘉慶三年。充湖南鄉試副考官。出知廣東惠州府。以吏議去官。旋授江蘇揚州知府。丁憂歸。二十年。服除。再至揚州。疾作卒。年六十二。秉綬幼稟庭訓。又從陰承方遊。獲聞鄉先正李光地蔡世遠緒論。講求立心行己之學。工詩古文詞。受知於朱珪。紀昀亦甚器重之。延課其孫。初入刑曹。爲阿桂所賞。試任以綜覈秋臈。守惠州。懲治豪猾。滅海盜。勸從死罪。建豐湖書院。課諸生以小學近思錄。民爭頌之。嘗修朝雲墓於蘇文忠祠。沼中得德有鄰硯。人謂文忠以貺賢守者。博羅陳燦展四謀倡亂。秉綬知之。屢請於總督。乘其未發時以兵掩捕。提督

阻其行，亂遂作。秉綬懷志陳狀，觸總督怒，謫戍軍臺。惠人號訴乞還者千百，不能得。方在詔獄時，人皆爲之憂危。秉綬灑然若無事。東坡生日招宋湘諸名士設祀堂中，賦詩飲酒，極歡。時歎其無升沈得失之念，會總督自裁，新督倭什布以狀聞，上知其寃，免遣。在揚州時，值淮南大水，親歷高郵寶應諸縣，率屬賑貸，錙銖必覈，吏無所容其奸。復勸富商巨室捐輸六萬餘金，邑各置粥廠四，存活甚衆。北湖有湯家泮者，盜藪也，毒害商民，汛兵莫敢誰何。秉綬檄縣懸賞嚴捕，懲巨魁數人，餘黨駭散。其再至揚州也，寓黃氏園，與一時名流倡和人得其一詩一字，奉爲至寶。卒後，揚人感其德，附祀宋歐陽修蘇軾及王士禛三賢祠中。秉綬政事文學，皆卓有表見。尤服膺宋五子書性孝，營秋水園，供母游憩，未成母卒，改爲家塾，家居凡有利桑梓者，率力爲之。又捐義田二百石以贍族人，工分隸，與同時桂馥齊名。所著有留春草堂詩七卷，又有坊表錄，攻其集，修齊正論。

吳大錫麒

吳錫麒，字聖徵，浙江錢塘人。乾隆四十年進士，改翰林院庶吉士，散館，授編修。四十九年，五十五年，兩充會試同考官。擢右贊善，入直上書房，轉侍講侍讀。陞國子監祭酒，生平不趨權貴，然名著公卿間。在上書房時，與成邱尤莫逆，得一帖一畫，必共題跋，禮遇之盛，同於諸城劉墉，嗜飲，無下酒物，以書代之，自少至老，未嘗離筆硯。性至孝，以親老乞養歸里，至揚州，主講安定樂儉書院，所拔多績學，羈品之士。天姿超邁，吟詠至老不倦。浙中詩派，自朱彝尊查慎行後二十餘年，杭世駿厲騫起而振之，兩人相謝，嗣音者少。錫麒詩才超越，直繼朱查，杭厲之後。京師釣魚臺桃花，崇效極樂法源三寺海棠牡丹菊花，澄懷園淨業湖荷花，檀石桂花，皆稱極盛。錫麒喜遊，必有詩紀之。尤工駢體文，吳誦選四六與邵齊齋王太岳劉星煒袁枚洪亮吉孫星衍孔廣森稱八家。晚養疴江上，四方乞詩文者，屢戶外滿。著有有正味齋集七十三卷，藝林奉爲圭臬。高麗使至，出餅金購之，兼工詩餘，論者謂可與吳偉業厲騫抗衡云。嘉慶二十三年卒，年七十三。子精皋清鵬，能世其學。

姚鼐

姚鼐，字姬傳，安徽桐城人。乾隆二十八年進士，改翰林院庶吉士，散館，授兵部主事，轉禮部。三十三年，充山東鄉試副考官。三十五年，充湖南鄉試副考官。三十六年，充會試同考官。累遷至刑部郎中。記名御史。四庫館開，以大巨薦爲纂修。年餘，乞病歸。鼐少家貧，體羸多病而嗜學。時侍郎方苞以古文鳴當世，上接震川，同邑劉大櫟繼之。鼐世父範，與大櫟友善。範嘗問鼐志曰：「義理考證文章，闕一不可。範乃以經學授鼐，而命鼐受古文法於大櫟。然鼐本所聞於家庭師友間者，益以自得，不盡用大櫟法也。所爲文，高簡深古。尤近司馬遷韓愈。其論文根極於性命，而探原於經訓。至其淺深之際，有古人所未嘗言。鼐獨扶其微，而發其蘊。論者以爲辭適於方氏，而理深於劉氏焉。鼐爲學博集漢儒之長，而折衷於宋。嘗與人書云：「秦漢以來，諸儒說經者，合與離固非一途。程朱出，多得古人精深之旨，而其生平修己立德，又實足踐行其言。爲後世之所嚮慕。故元明皆以其學取士，自利祿之途開，爲其學者，以爲進趨富貴而已。其言有失，率而不敢稍違。其得亦不知所以爲得。斯固數百年來之陋習。今世學者，乃思一切矯之，專宗漢學，以攻駁程朱爲能。倡於一二專己好名之人，而相率而效者，遂大爲學術之害。夫漢人之爲言，非無有善於宋而當從者也。博聞強識，以助宋君子所遺可也。以將跨越宋君子，則不可也。又送錢坫序略云：「孔子沒而大道微。漢儒承秦滅學後，始立專門，各矜師受，久之通儒漸出，貫穿羣經，擇其長說，其敝也。雜以讖緯，亂以怪僻猥碎。魏晉之間，空虛之談興，以清言爲高，以章句爲塵垢。自是南北乖分，學術異尚。五百餘年，唐一天下，兼採衆長，定爲義疏，而所取或是或非，未有折衷。宋之時，真儒乃得聖人之旨，羣經略有定說。元明守之，著爲功令。明末至今，學者頗厭功令所載爲習聞，又惡陋儒不考古而蔽於近，於是專求古人名物制度訓詁書數，以博爲量，以闕陳攻難爲功。甚者，盡盪舍程朱而宗漢枝之獵而去其根，細之蒐而遺其鉅。夫豈非蔽與？又曰：「說經古今自有真是非，勿徇時人之好尚。如近年海內諸賢所持漢學，與明以來講章諸君，何以大相過哉。夫漢

儒之學。非不佳也。而今之爲漢學。乃不佳。偏徇而不論理之是非。瑣碎而不識事之大小。嘵嘵聒聒。道聽塗說。正使人厭惡耳。且讀書者。欲有益於身心也。程子以記史書爲玩物喪志。若今之爲漢學者。以搜殘舉碎人所少見者爲功。其爲玩物。不彌甚耶。同時袁枚。紀昀。頗詆宋儒。繇嘗直斥其非。翁方綱。向繇乞言。繇曰。諸君皆欲讀人閒未見書。繇則願讀人閒所常見書耳。生平虛懷善取。在揚州與吳定居最久。有所作以示定。定所不可。輒竄易至數四。必得當乃已。所編古文辭類纂。言文之體類十有三。而所以爲文者八。神理氣味。文之精也。格律聲色。文之粗也。學者於古人。必始過其粗。中遇其精。終則御其精而遺其粗。論者謂自明以來。言古文者。莫詳於繇。繇與方苞。劉大櫟。皆籍桐城。世稱之爲桐城派。詩從明七子入。而以融會唐宋之體爲宗旨。嘗做王士禛五七言古體詩。選爲今體詩選。人皆謂爲精當云。繇色怡而氣清。接人極和藹。無貴賤。皆樂與盡懽。而義所不可。則確乎不易其所守。世言品學兼備。推繇無異詞。自告歸後。主講江南紫陽鍾山各書院者。四十餘年。諄諄以誨迪後進爲事。嘉慶十五年。重赴鹿鳴宴。恩加四品銜。二十年卒。年八十五。所著有九經說十九卷。三傳補注三卷。老子章義一卷。莊子章義十卷。惜抱軒文集十六卷。詩集十卷。書錄四卷。法帖題跋一卷。筆記十卷。

孫原湘

孫原湘。字子瀟。江蘇昭文人。三四歲即知讀詩。口詠指畫。若能通曉。成童後。從其父鎬官奉天山西。所歷名山大川。風物奇險。皆以歌詠發之。年才弱冠。名噪都下。嘉慶十年進士。改翰林院庶吉士。充武英殿協修官。假歸。得怔忡疾。遂不出。歷主毓文紫琅。婁東。游文諸講席。多所成就。視鄉鄙疾苦。若痛在膚。有水旱賑卹事。必先爲經畫之。其論詩之旨。以爲一人有一人之性情。無性情不可言詩。無風韻不可言詩。若徒以格律體裁。規模唐宋。則失己之本來面目。而真性情亡矣。有真性情。然後涵泳於經史百家。以爲立言根柢。自然獨闢町畦。足爲一代之正聲。自古名家大家。何嘗不以學力勝。要必從性情中來也。其詩瀏灠麗逸。獨以風韻勝。沈鬱不及張問陶。而無其叫囂。

敏贍不及袁枚而無其遊戲。虞山詩人以才氣寫性靈，獨開生面者，原湘一人而已。著有天真閣集三十卷，續集及古文駢體三十二卷。

袁枚

袁枚，字子才，號簡齋，浙江錢塘人。幼有異稟，年十二，爲縣學生。省叔父於廣西巡撫幕，巡撫金鉉試以銅鼓賦，立對，甚異之。乾隆元年，開博學鴻詞科，銜舉枚應詔。時海內舉者二百餘人，枚年最少，及試報罷。旋舉三年順天鄉試，四年成進士，改翰林院庶吉士，掌院學士史貽直奇其才，命擬奏疏一通，曰：通達政體，賈生流也。散館。改知縣，分發江南，初試溧水，調江浦流陽，再調江寧。寧故巨邑，難治，總督尹繼善知枚才，枚亦盡其能，事無不舉。終日坐堂，任吏民白事，有小訟獄，立判違，無稽留者，多設耳目方略。集鄉保詢盜賊及諸惡少姓名，出所簿記相質證，使不能隱，則榜其姓名，許三年不犯，滿雪之。奸民皆斂迹。方山谿洞外兩垠爭地，無契卷，訟久莫能斷，枚至，檢案牘山積，笑曰：此左氏所云，宋鄭之問有隙地，玉暢頓邱是也。乃盡去舊牘，別給符卷，使各開墾，升科。聞者皆歎服。有賈人販布江行，舟觸戰船，溺一兵死，衆兵縛控舟子兼及客。枚心知過失，殺無罪，而累客必傾貲，乃令乘風張帆，作觸舟狀，縱之去。以埋葬錢發兵完案。侍郎尹會一督學試江寧，有兩騎衝其前塵，且嫚罵，稱某親王家奴。他縣尹不敢問，枚立擒治，則爲大將軍投書制府者也。搜其篋，得關節書十餘封，悉焚之。重杖遣去。十三年，江南災，銅井民運米至吳門，以被劫告。枚以荒政當弛刑，召其魁詢之，乃土人邊糶，非劫也。諭以情法，追米還主者。初，枚池溧水，迎養其父。父慮子年少，無吏才，試匿名訪諸野，皆曰：吾邑有少年袁知縣，乃大好官也。父喜，乃入官舍。在江寧，嘗朝治事，夜召士飲酒賦詩。市人以所判事，作歌曲刻行四方。旣而引疾家居，再起，發陝西，以知縣用。上總督黃廷桂書萬餘言，不省。尋丁父艱歸，遂謀請養母。卜築於江寧之小倉山，號隨園，聚書籍，爲詩古文。如是五十年，終不復仕。枚崇飾池館，疏泉架石，釐爲二十四景。遊人闐集，自皇華使者，下至淮南賈販，多聞名造請交歡。枚

鞅諧跌宕。無不各厭所欲以歸。年逾六十。猶獨遊名山。嘗至天台。雁宕。黃山。匡廬。羅浮。桂林。南岳。瀟湘。洞庭。武夷。丹霞。四明。雪竇。皆窮其勝。又篤於友誼。不以窮通生死易心。嘗爲亡友沈鳳司祭埽。三十年如一日。編修程晉芳死。負枚五千金。枚往弔。焚其券。且撫其孤。見人善。稱之不容口。後進詩文。一言之笑。枚必舉其詞。爲人樂道。所爲詩。天才橫逸。不可方物。以性靈爲主。一反漁洋神韻之說。然名盛而膽放。才多而手滑。亦其弊焉。神道碑墓志銘諸文。紀事亦多失實。駢體最工。抑揚跌宕。有六朝人體格。枚仕雖不顯。而備林泉之清福。享文章之盛名。百餘年來。無有及者。著有小倉山房詩文集七十餘卷。詩話尺牘說部之屬。凡三十餘種。嘉慶二年卒。年八十二。子通字蘭村。工填詞。

張問陶

張問陶。字仲冶。四川遂寧人。大學士鵬翮元孫。乾隆五十五年進士。改翰林院庶吉士。散館授檢討。詔選翰詹三十人。各書扇五柄。又選十二人。分書養心殿屏。問陶皆與焉。嘉慶五年六年兩充順天鄉試同考官。遷御史。有直聲。尋改吏部郎中。十四年充會試同考官。旋出爲山東萊州府知府。與上官牴牾。遂乞病遊吳越。往來大江南北。十九年卒於蘇州。年五十一。問陶幼有異稟。讀書過目成誦。所爲古文辭。奇傑廉勁。同時名輩皆斂手下之。而於詩尤工。嘗作寶雞題壁詩十八首。指陳軍事得老杜諸將之遺。一時傳誦焉。在都與洪亮吉羅聘相唱和無虛日。後往見袁枚。枚謂之曰。所以老而不死者。以未見君詩耳。其推重如此。書法險勁。畫近徐青藤。著有船山詩文集。論者謂有清二百年來。蜀中詩人以問陶爲最。兄問宏字亥曰。乾隆五十三年舉人。性孝友。擔於榮利。家居奉母。圖史自娛。詩才超逸。與問陶有二難之目。著有小瑯環詩集。

梁同書

梁同書字元穎浙江錢塘人父詩正官至大學士同書生而穎異性端重詩正命後其兄啓心啓心素嚴少不可意輒箠楚同書怡然順受無怨容乾隆十二年舉人十七年特賜進士改翰林院庶吉士散館授編修二十一年充順天鄉試同考官二十二年充會試同考官二十三年大考二等擢侍講尋充日講起居注官是年啓心卒同書嚴寒跣奔坐羊頭車失足落河岸幾殆服闋以足疾不復出及詩正卒於邸第同書復由里奔喪時子姪無侍側者邸中物多失亡或請治其事同書曰此何時乃念財物耶一無所問嘉慶十二年重宴鹿鳴恩加侍講學士銜二十年卒年九十三同書內行修飭家居不作佛事雖老祭祀必躬親子弟年少見長者不敢嬉情有事先白有教勿敢違杭人稱家法者皆曰梁氏性情約一冠一服終身不易不宴客不受餽遺畢沉自楚贈大硯不納強委之而去越數年仍附友還畢工書法少學顏柳中年用米法七十後愈臻變化純任自然爲當世獨絕與劉墉王文治並稱於時嘗奉詔與梁國治秦大士莊培因繕錄昭明文選日本國王有王子好書以其書介商船求評定琉球生徒自太學期滿歸求見不得乃言來時王命必一謁見乞書一紙以復命其名揚海外如此詩多雅音集杜句尤妙合自然文亦清峭拔俗論者稱其爲書名所掩云著有頻羅菴遺集凡詩三卷集杜二卷文四卷題跋四卷直語補證一卷日質齋塗說一卷筆史一卷

惲敬

惲敬字子居江蘇陽湖人乾隆四十八年舉人以教習官京師時同郡莊述祖莊獻可張惠言海鹽陳石麟桐城王灼先後集京師敬與之爲友商榷經義古文而尤所愛重者惠言也會教習期滿以知縣用遷授浙之富陽銳欲以能自效矯然不肯隨羣輩俯仰大吏憚其風節欲裁抑之令督解鈐餉敬曰王事也怡然就道返役遭父喪歸服闋遷授山東平陰縣知縣引見改授江西新喻新喻吏士素橫敬至懲創之人疑敬爲治過猛已乃進其士之秀異者與之講論文藝斷事不收聲必既其實士民懷德畏威翕然大變嗣調知瑞金縣瑞金在萬山中俗好

訟。素稱難治。敬張弛合宜。吏民咸就約束。瑞金諸生某。以富凌人。成巨案。願進千金求脫罪。敬峻拒之。後屢邀人關說。至以萬金相啗。敬曰。吾作令以來。苞苴未嘗至門。今乃有此。豈吾有遺行耶。卒論如律。敬廉名素著。至是人益信之。以卓異薦。擢南昌府同知。然敬爲人負氣。矜尚名節。所至輒與上官忤。上官以其才高。每優容之。而忌者或銜次骨。最後署吳城同知。爲姦民誣告。家人得贓。遂以失察被劾。士大夫之賢者。咸惋惜之。嘉慶二十六年卒。年六十一。敬少好爲齊梁駢儷之作。稍長棄去。治古文。四十後。益研精經訓。深求史傳。與袁治亂得失之故。旁覽縱橫名法兵農陰陽家言。較其醇駁而折衷於儒術。將以博其識而昌其詞。以期至於可用而無弊。會張惠言歿。敬聞之。慨然曰。古文自元明以來漸失其傳。吾向所以不多作古文者。有惠言在也。今惠言死。吾當併力爲之。先是惠言與仁和湯金釗同講宋儒之學。是時敬究心於黃宗羲明儒學案。有所見。輒筆記之。未暇與惠言辯論往復也。及歿。敬爲書與金釗。其略曰。濂洛關閩之說。至明而變。至國朝康熙間而復。其變也多歧。其復也多仍。多歧之說。足以眩惑天下之耳目。姚江諸儒是也。多仍之說。足以束縛天下之耳目。平湖諸儒是也。二者如揭竿於市。以奔走天下之人。故自乾隆以來。多愍置之。愍置之非也。揭竿於市亦非也。彼此之相習。前後之相搏。益非也。夫所謂濂洛關閩者。其是耶。其揆之聖人。猶有非是者耶。其變之仍之者。是非其孰多耶。知其是非矣。何以存其是。去其非。蓋敬嘗自言其學。非漢非宋。不主故常。故其說經能發前人所未發。宜與吳德旋謂以敬之才。而循乎先聖賢之規矩繩墨。則橫渠康節之流也。其文得力於韓非李斯。與蘇洵相上下。近法家言。敘事以班固陳壽。而敬自謂其文自司馬遷而下無北面。其論文曰。典曰自己出。曰審勢。曰不過乎物。論者謂清代文氣之奇推魏禧。文體之正推方苞。而介乎奇正之間者惟敬苞之文。學者尊爲桐城派。至敬出。學者乃別稱爲陽湖派云。所著有太雲山房文稿詩集。歷代冠服圖說。其始獄別有子居決事四卷。

舒位，字立人，順天大興人。十歲，下筆成章。十四，隨父翼官粵之永福，讀書署後鐵雲山，因以自號。安南入貢，位隨父迓使者，賦銅柱詩相贈答。傳誦外裔，弱冠，中乾隆五十三年舉人。王朝梧之黔，聘使偕行。值南籠狃苗不靖，威勦侯勒保統兵征之，朝梧在行間，位爲諭黃峇文檄，苗人識字者讀之，皆哭拜解散。勒保見而器之，恆與計軍事。賊中黃囊仙者，妖女也，旗鼓最盛，時檄調雲南土練有龍么妹者，年十八，美麗善戰，矛槍所及，槩一斃十。黃不能軍，擒歸本道營，位以笑言甘之降者，遂不叛。勒保欲爲么妹執柯歸位，位婉言卻之。狃苗平，巡撫議以軍府辦事賓僚列請議敘，位辭。時諭高之，勒保移督四川，與位約從遊，時翼已歿，以母老辭歸家吳中，以貧故，恆負米湘湖間。嘉慶二十六年，聞母喪，戴星而奔，不納勺飲者彌月，遂以毀卒。年五十一。位性情篤摯，好學不倦，於經史百家無不究，而一發之於詩，嘗謂人無根柢學問，必不能詩，無真性情，卽能詩亦不工，故其詩必出新意，不沿襲古法，而精力所到，他人百思不及，著有瓶水齋詩集十七卷，皋橋今雨集二卷，法式善以位與王曇孫原湘爲三君，作三君詠。

江中

汪中，字容甫，江蘇江都人。父一元，以孝子旌。中生七歲而孤，家酷貧，不能就外傳，母鄭，授以小學四子書，稍長，助書賈鬻書於市，因徧讀經史百家，過目成誦，遂爲通人。年二十，補諸生，然時人未之知也。編修杭世駿主講安定書院，論及孟子往送之門，以爲昏禮無明文，中引穀梁祭門闕門證之，世駿折服，遂大稱之。乾隆四十二年拔貢，提學謝塘，每試別置一榜，署名諸生前，嘗曰：余之先容甫，爵也。若以學當北面事之矣。以母老，竟不赴朝考，中嘗有志於用世，故於古今沿革，民生利病，皆博問而切究之。年三十，頗意經術，與高郵李惇、王念孫、寶應劉台拱爲友，共討論之。其治尙書，有尙書考異，治禮有儀禮校本，大戴禮記校本，治春秋，有春秋述義，治小學，有爾雅校本，及小學說文求端，同時治經諸人，如王念孫、阮元、郝懿行，時采其說，中嘗謂清代古學之興，顧炎武開其端，河洛

矯誣。至胡渭而絀。中西推步。至梅文鼎而精。力攻古文者。閻若璩也。專治漢易者。惠棟也。凡此皆千餘年不傳之絕學。及戴震出而集其大成。擬作大儒頌。未成。又嘗博考先秦古籍。三代以上學制廢興。使知古人以爲學者。爲述學一書。凡虞夏第一。周禮之制第二。周衰列國第三。孔門第四。七十子後學者第五。又列通論釋經舊聞典籍。數典世官目錄凡六。而自題其端曰。觀周禮太史云云。當時行一事則有一書。其後執書以行事。又其後則事廢而書存。至宋儒以後。則並其書之事而去之矣。又曰。有官府之典籍。有學士大夫之典籍。當時行一事則有一書。傳之後世。奉以爲成憲。此官府之典籍也。先王之禮樂政事。遭世之衰廢而不失。有司徒守其文。故老能言其事。好古之君子。閱其浸久而遂亡也。而書之簡畢。此學士大夫之典籍也。又曰。古之爲學士者。官師之長。但教之以其事。其所誦者詩書而已。其他典籍。則皆官府藏而世守之。民間無有也。苟非其官。官亦無有也。其所謂士者。非王侯公卿大夫之子。則一命之士。外此則鄉學小學而已。自辟雍之制無聞。太史之官失守。於是布衣有授業之徒。草野多載筆之士。教學之官。記載之職。不在上而在下。及其衰也。諸子各以其學鳴。而先王之道荒矣。然當諸侯去籍。秦政焚書。有司所掌。蕩然無存。猶賴學士相傳。存其一二。斯不幸中之幸也。又曰。孔子所言。則學士所能爲者。留爲世教。若其政教之大者。聖人無位。不復以教子弟。又曰。古人學在官府。人世其官。故官世其業。官既失守。故專門之學廢。其書稿草略具。亦未成。後乃即其考三代典禮。及文字訓詁名物象數。益以論撰之文。爲述學內外篇。凡六卷。其有功經義者。則有若周官徵文。左氏春秋釋疑。荀卿子通論。賈誼新書序。其他考證之文。亦有依據。中又熟於諸史地理。山川阨要。講畫瞭然。著有廣陵通典十卷。秦蠶食六國表。金陵地圖考。生平於詩文書翰。無所不工。所作廣陵對。黃鶴樓銘。漢上琴臺銘。皆見稱於時。他著有經義知新記一卷。大戴禮正誤一卷。遺詩一卷。五十九年卒。年五十一。中性質直不爲容止。疾當時所爲陰陽拘忌。釋老神怪之說。斥之不遺餘力。於時彥不輕許可。好變罵人。人目之曰狂生。然不沒人之實。有一文一詩之善者。亦贊不容口。事母以孝聞。貧無菽水。則賣文以

養。居喪哀戚過人。其於知友故舊。沒後衰落。相存問過於生前。蓋其性之篤厚然也。

趙翼

趙翼。字耘松。號甌北。江蘇陽湖人。生三歲。日能識字數十。十二歲爲文。一日成七篇。人皆奇之。以直隸商籍舉乾隆十五年鄉試。十九年。中明通榜。用內閣中書。入直軍機處。進奏文字。多出其手。每扈從出塞。戎帳中無几案。輒伏地起草。頃刻千百言。不加點。大學士傅恆汪由敦尤重之。二十六年。以一甲三名進士。授翰林院編修。任撰文。修通鑑輯覽。明年。京察記名。以道府用。二十七年。充順天鄉試同考官。二十八年。充會試同考官。三十一年。復充會試同考官。尋授廣西鎮安府知府。府境極邊。民安訟簡。而常平倉穀有出輕入重之弊。粵民償穀以竹筐。以權代概。有司因購馬濟滇軍。別製大筐斂穀。事罷遂以爲常。民苦之。翼開府倉。聽民用舊筐。自權以納穀。於是民持羨穀以去。懽聲溢闔。屬城有控橫斂者。則縛其監倉奴及書吏痛懲之。鎮安民由是感激。每出行。爭肩輿。過其邨。謂我公至矣。奉酒食爲恭敬。所至皆如之。先是。鎮民與安南民入雲南土富州爲奸。事發。捕獲百餘人。而其魁農付奉願逸去。前守以是解職。已而付奉死於安南。獲其子。並獲其尸。驗之。良是。總督李侍堯疑其爲前守道地。不之信。翼申辨。侍堯怒劾之。值緬甸用兵。命翼赴滇贊畫。侍堯乃追劾疏還。是時將軍明瑞征緬甸。失事殉難。及大學士傅恆來滇。經略兵事。議以大兵渡戛鳩江進剿。即大金沙江上流也。令提督以偏師五千。從普洱進。遜焉聲援。翼謂戛鳩普洱相去四千餘里。大兵旣渡戛鳩之西。則偏師宜由江東岸近地進取猛密。夾江而下。造船以通往來。庶兩軍可以互應。遂如翼言。入告。其後渡戛鳩之兵。觸瘴氣多疾病。而阿桂所統江東岸一軍獨完。又以此兵敗賊於蠻暮老官屯。卒以蕞事。時三十四年也。明年。調廣東廣州府。先是。侍堯固欲調翼。使他守諭意。翼不可。曰。鎮安天子所授。吾受上司恩。調善地。他日何能自行其志。至是人服其能自立。在廣州府決獄平。獲海盜百八人。按律皆死。翼詳讞分別。殺三十八人。餘遣戍。三十六年。擢貴西道。威寧水程兩鉛廠舊由糧道管轄。官吏恆

視爲利藪。及侵虧事覺。巡撫以下多罹重辟。迺改令貴西道經理。翼視事。凡短發工價運費諸弊。剷除略盡。大吏方以是爲翼功。旋因廣州獄獄舊案部議降級。奉旨送部引見。翼遂以母老乞歸。不復出。五十二年。臺灣民林爽文作亂。李侍堯赴閩治軍事。道出常州。邀翼偕往。時兵將雲集。咸謂不日蕩平。翼獨請侍堯密調粵兵爲備。旣而總兵郝壯猷敗遁。游擊鄭嵩死之。賊勢大振。而粵兵適至。人心始定。當是時。總兵柴大紀守臺城數月。以易子析敵入告。上得大紀奏。憐臺民死守。飛諭大紀以兵護遺民內渡。命侍堯拆閱仍封發。侍堯以詢翼。翼曰。明公尙欲封發耶。柴總兵久欲內渡。畏國法故不敢。一棄城則鹿耳門爲賊所有。全臺休矣。且以快艇追敗兵。澎湖其可守乎。大兵至。無路可入。則東南後此不可問。宜封還此旨。翼已代繕摺矣。侍堯悟。從之。翌午。接追還前旨之諭。及批摺回。李膺殊賞。而大將軍福康安續至。遂得由鹿耳門進兵破賊。皆翼策也。事平。欲奏起。翼以母老堅辭。晚歲以著述自娛。主講安定書院。日與朋游故舊。賦詩爲樂。兩江總督費淳漕運總督蔣兆奎皆翼門下。每過存咨詢風土。言不及私。兩人益欽重之。同時。袁枚蔣士銓與翼齊名。而翼高才博物。旣歷精要。通達朝章國典。尤邃於史學。家居數十年。手不釋卷。所撰廿二史劄記三十六卷。鉤稽同異。屬詞比事。其於前代弊政。一篇之中。三致意焉。又撰陔餘叢考四十三卷。甌北詩集五十三卷。皇朝武功紀盛四卷。檐曝雜記六卷。唐宋十家詩話十二卷。其詩與袁枚蔣士銓齊名。枚稱其忽奇忽正。忽莊忽佻。稗史方言。皆可闖入。士銓則謂其奇恣雄麗。不可偏視。人以爲知言。嘉慶十五年。重宴鹿鳴。賜三品銜。十九年卒。年八十六。

吳嵩梁

吳嵩梁。字蘭雪。江西東鄉人。嘉慶五年舉人。由內閣中書官貴州黔西州知州。詩才與黃景仁埒。弱冠入都。王昶翁方綱法式善盛相推重。自是徧交海內名士。未有或先之者。袁枚自負其盛。亦心折其詩。江西自明以來稱詩者衆。而無卓然傑出號大家者。自蔣士銓後。二十餘年。嵩梁繼之。體沿六朝。而規格則似唐之溫李。其清婉處。又

與長慶爲近，而下匹吳儂業。日本賈人賈其詩扇，首得四金。高麗使臣得其所著詩，稱爲詩佛。因築一龕供之，傍種梅花萬樹。其見重如此。道光十四年卒。年六十九。著有香蘇山館詩鈔。

彭兆蓀

彭兆蓀，字湘涵，又字甘亭。江蘇鎮洋人。貢生。道光元年薦舉孝廉方正。未就卒。年五十四。兆蓀少隨父禮官山西。年十五，應順天鄉試。即聲滿名場。然竟十餘年無所遇。禮後由知縣改官潁州府教授。既歿，家貧累甚。讎將析產以償。人曰：得彭君一言，毋問舊事。兆蓀卒，獨破產盡償所負，而自鞠幼弟。隻身客遊，以爲養。諸六吏多資其才，傾身納交。兆蓀願未嘗私請，義所不可，疑如也。胡克家爲江蘇布政使時，總督以國用不足，議加賦。兆蓀方在幕中，力贊克家，曰：大吏，寢其事。又與長州顧廣圻同爲克家校刊元本通鑑。尤工藥文選。獨成文選考異十卷。鈎稽探索，頗具要領。南城會煥轉運兩淮，愛禮才士。兆蓀往依之，煥爲點定其集。陽城張敦仁時官揚州府知府，亦敬禮之。兆蓀少爲閱覽博物之學，覃精訓詁，曾輯有經歧應案。後以爲多前人所已言，乃芟雜之，爲播瀾筆記二卷。晚讀其鄉先生黃陶庵日記，憬然有省。深悔其於聖賢大道茫乎未之有得，遂作懺摩錄。然亦時雜禪學。婁縣姚椿微輒之，隴然不以屑意也。所爲文鴻博沈麗，力追六朝三唐。見者以爲金玉淵海。御雪齋藏，尤長於詩。始務琦瑰，晚乃益慕澹淡孤寡，深得古人意。著有小謨觴館詩集八卷，詩續集二卷，文集四卷，文續集二卷，詩餘共二卷。

龔自珍

龔自珍，字璣人，號定盦，更名璣祚。浙江仁和人。道光九年進士，授內閣中書。陞宗人府主事。十七年改禮部，尋告歸。遂不復出。父麗正爲金壇段玉裁壻，能傳其學。嘉慶元年進士。官至江蘇蘇州太道。著有國語韋昭注疏。自珍八歲得舊登科錄讀之，即有志爲科名掌故之學。十二歲段玉裁授以說文部目，即有志爲以經說字，以字說經。

之學。十四歲考古今官制。即有志爲官制損益之學。十六歲讀四庫提要。即有志爲目錄之學。十七歲見石鼓。即有志爲金石之學。生平著作等身。出入於九經七緯。諸子百家。自成一言。道光十二年夏大旱。詔求直言。大學士雷俊訪之自珍。自珍陳當世急務八條。爲內閣中書時。上書大學士乞到閣看本。充史館校對。上書總裁。論西北塞外部源流山川形勢。訂一統志之疏漏。凡二千言。官禮部時。上書論四司政體。宜沿革者三千言。其官宗人府主事也。充玉牒館纂修官。則爲之草擬其章程。當是時以奇才名天下者。一爲魏源。一爲自珍。嘗著西域置行省議。東南罷番船議。時建其言。尤精西北輿地之學。程同文修會典。以理藩院一門及青海西藏各圖屬爲校理。自珍因擬撰蒙古圖志。以同文殿。不果。成蒙古字類表。冊降表。氏族表。所爲文。獨造深峻。論者謂桐城之文如泰山主峯。不可褻視。自珍文如徂徠新甫。相與揖讓。俛仰於百里之間。不自屈抑。蓋一代文字之雄云。著有尙書序大義一卷。麥誓答問一卷。尙書馬氏家法一卷。左氏春秋服杜補義一卷。左氏決疣一卷。春秋決事比一卷。西漢君臣備春秋之義一卷。典客道古錄一卷。奉常道古錄一卷。羽琇山金石墨本記五卷。羽琇山典寶記二卷。鏡苑一卷。瓦韻一卷。漢官拾遺一卷。泉文記一卷。布衣傳一卷。文集三卷。續集四卷。文集補二卷。補編四卷。道光二十二年卒。年五十。

方東樹

方東樹。字植之。安徽桐城人。諸生。父績。博學工文詞。著有經史劄記十二卷。屈子正音三卷。詩文鈔七卷。東樹幼承家範。年十一。效范雲慎火樹詩。驚其長老。年二十餘。用功心性之學。又學古文於同里姚鼐。四十後。不欲以詩文名世。研極義理。於經史百家浮屠老子之說。罔不窮究。而最契朱子之言。嘗言立身爲學。固以修德立行內全天理爲極。而於人世事理。亦必講明通貫以待用。惟當知本末先後之次。不可以玩物喪志勞心。失其遠者大者耳。時海內競尙考證。號曰漢學。鼐嘗爲文辨之。東樹因著漢學商兌三卷。自序謂近世漢學。闢宋儒。攻朱子。以言

心言性言理爲厲禁。觀其所著書。不出訓詁小學。名物制度。棄本貴末。於聖人躬行求仁修齊治平之教。一切抹殺。名爲治經。實足亂經。又曰。經者良苗也。漢儒者。農夫之勤畝畝者也。耕而耘之。以植其禾稼。宋儒者。穫而春之。蒸而食之。以資其性命。養其軀體。益其精神也。非漢儒耕之。則宋儒不得食。宋儒不春而食。則禾稼蔽斂。棄於無用。而羣生無以資其性命。今之爲漢學者。則取其遺粟滯穗而復殖之。因以笑春食者之非。日夜不息。曰。吾將以助農夫之耕耘也。卒其所植。不能用。以置五升之飲。先生不得飽。弟子長飢。以此教人。導之爲愚。以此自力。固不獲益。其求在外。使人狂。使人昏。蕩天下之心。而不得其本。其去經也遠矣。同時陽湖陸繼輅元和沈欽韓皆重其書。武進李兆洛言。曩時讀書。甚不喜康成。於朱子亦時時腹誅。讀先生書。敬嘗力改其失。其推服如此。東樹又著辨道論。跋黃宗羲南雷文定以破姚江山陰之失。少有用世志。遊粵東。值大臣請禁洋煙。著匡民正俗對。陳所以禁之道。英人擊燹。著病榻罪言。論所以禦之之策。時皆不用。客遊五十年。晚歲家居。益窮性道之旨。自言所學。無時不有新益。咸豐元年卒。年八十。古文簡潔涵蓄不及。能自開大以成一格。然桐城自東樹後。學者多務理學云。他著有書林揚輝。一得拳膺錄。思適居鈴語。半字集。考槃集。山天衣閣考正。待定錄。進修譜。未能錄。大意每聞。最後微言。老子章義。陰符經解。昭昧詹言。文集。詩集共百餘卷。

包世臣

包世臣。字慎伯。安徽涇縣人。嘉慶十三年舉人。大挑一等。以知縣分發江西。權新喻縣。因劾去官。少工詞章。繼而喜兵家言。善經濟之學。朱珪巡撫安徽。手書召至署。垂詢練鄉兵安江賊事宜。明亮爲川楚左參贊。使治戎事。發奇謀。不見用。遂歸。世臣短小精悍。口如懸河。居金陵。布衣儉然。江省督撫。遇大兵。大荒。河漕鹽諸鉅政。無不屈節咨詢。世臣亦慷慨言之。雖有用有不用。而其言皆足傳於後。蔡牽犯上海。鎮道迎世臣。閱沿海島嶼。見北洋商船千艘。停泊黃浦。遂建海運可救漕弊之議。著策河四略。一救弊。二守成。三籌款。四積儲。皆詳具籌河芻言。又以漕

爲天下急務。而浮收勒折。幫丁需索。州縣虧空。實由於此。善治漕者。先清屯田。實成衛頭。督課耕耘。量其所入。以半備公需。停委重空。實成本幫。裁派總運。實成糧道。盡撤催糧委員。實成沿途文武。裁汰漕夫。實成開官。看守關板繳關。每一幫船抵開。聽其通力合作。提溜更速。水次則嚴禁賭博。及隨幫收債者。盤糧則實成漕臣。而使督臣稽察之。通州。實成倉臣督同坐糧廳。革去經紀之積蠹。則幫丁之辦公從容。無須州縣津貼。州縣無所藉口。誅求。則奸民不能激衆凌辱其長吏。藏富於民。培氣脈。尊體統。否則浮收勒折。日增一日。竭民力以積衆怒。東南大患。終必在此。是時鹽法以兩淮爲大。說者謂私梟充斥。阻壞官引。遂以緝私爲治鹽之要。世臣擬裁撤大小管鹽官役。唯留運司主錢糧場。大使管鹽戶。不立商垣。不分畛域。通覈現行鹽課。每斤定數若干。仿現行鐵硝之例。聽商販領本地州縣印照。赴場官掛號繳課買鹽。州縣發照後。具詳運司查覈。則場官不能乾沒正課。而運司與場官均有平餘。州縣亦藉鹽照紙硃之費。津貼辦公。大江大河轉輸迅速。鹽價必減於今之五六。私鹽皆輸官課。課入必倍。撥出現行課額以歸正供。酌提盈餘增輸詹科道部院司員之廉俸。使京職不爲債累。衆美畢具。千年府海之陋。可以一朝盡革。其語西北水利曰。冀幽水利。始於宋何承矩。而元虞集明徐貞明爲說尤詳。然其功莫舉。今國家南漕四百萬石。中歲腴田二百萬畝所產也。有田四百萬畝。歲入與佃半之。遂當全漕先減運什之一。以其米價及運資。於近水之所。置官屯。書畧。召耕以習農。而善心計者主之。置農器。安廬舍。給牛種。歲以爲常。東南之運漸減。西北之田漸增。十年爲率。則漕可罷。賦可寬。以其盈餘量加俸餉。而官可廉。兵可練。民見官屯之利。亦不令而爭趨矣。咸豐五年卒。年八十一。著有中衢一勺七卷。藝舟雙楫六卷。附錄三卷。管情三義八卷。齊民四術十二卷。世臣爲文本。苟卿韓非呂覽。詩則導源陸謝。別編倦遊閣集三十卷未刊。其書法。備得古人執筆運鋒。結體分勢之奇。推爲書家正宗焉。

姚椿

姚椿字春木一字子壽江蘇婁縣人父令儀官四川布政使椿自幼從宦滇蜀資稟絕人十歲即通聲律喜博覽遇未見書必手自鈔錄以國子生應順天鄉試才名噪京師既而連試不售夷然不爲意日與洪亮吉楊芳燦張問陶極論詞賦氣甚凌厲賢士大夫多道其賢令儀屢參諸大帥幕椿奔馳南北所至必周覽其山川交其賢豪長者乃更求爲有用之學凡河渠農桑漕務邊防以及閭閻疾苦無不反覆熟籌稽之史傳證以游歷思將大用於世既又從學於桐城姚鼐退而發濂洛關閩之書讀之爽然如有所失自此屏棄風習壹意求道泊如也嘗得寶應朱澤澤遺書讀之數日作而言曰此真宗守程朱之道而不欲以文著者於是悉訪朱氏未行之書及其門人所述極力表章之又親詣其墓拜謁申私淑之禮道光元年詔舉孝廉方正松江府知府欲以椿與彭兆蓀同薦固辭不就先後主講河南夷山湖北荆南松江景賢書院以實學勵諸生惟成就人材是急咸豐二年卒年七十七椿好學不倦其解經主兼通漢宋儒曰替之釋氏有宗有教不可偏廢論文必舉桐城所稱曰好學深思心知其意又自言曰文之爲用不外四者曰明道曰記事曰考古有得曰言詞之美故其選清代人文皆本此旨論詩以韻論爲主以音節爲輔以獨造爲境以自然爲宗每曰元裕之以後無大家於明初推劉伯溫謂在夏季迪上所自爲詩得陸放翁詩外有事之旨慘澹經營不遺餘力有杜白新樂府之風著有通藝閣詩錄八卷和陶詩三卷晚學齋文錄十二卷又選國朝文錄八十二卷

梅曾亮

梅曾亮字伯言江蘇上元人道光三年進士用知縣援例改戶部郎中少時文喜駢儷既游姚鼐門與管同友善同輒規之始頗持所業相抗已乃一變爲古文辭義法一本桐城稍參以歸震川居京師二十餘年篤老嗜學與宗稷辰朱琦龍啓瑞王拯輩遊處咸嘖嘖稱賞其才一時碑版記敘率其手筆嘗著民論曰天下有亂民有姦民尋官吏迫飢寒挺刃而卒起索黨與隨和以自救此亂民之常態也若夫無所激發而倡爲狂悖之說以招誘惑

誓而名之曰教。是爲姦民。姦民者古無是也。且夫教之名。民所不易受於長上者也。而匹夫能得之於鄉里。非民之所願爲也。勢也。今夫民之生也。耕而食。織而衣。貿貿然相往來。不知有士大夫聲名文物之樂。又非如富厚有力者。有鳴鐘連騎采色視聽之娛。若此者。枯槁寂滅之士。或能堪之。而民固不能樂乎此也。聖人憂之。於是有飲射之典。有蠅蜡之禮。有月吉讀法之令。奔走之。馳驟之。而不憚其勞拙。其意以爲吾法之可知者。在乎角才能。習教訓。而消息平時氣。而法之不可知者。在使民回易耳目。震盪血氣。陽遂其鼓舞之情。而陰輯其靜而思騁之意。其教如是而已。當漢之盛時。凡鄉射大雩。都肆鄉會。皆太守與縣令親之。猶古法也。法之廢。其東漢之衰乎。嗟夫。此黃巾米賊之禍所以起而不可禁也。夫民所樂趨之事。而不爲利導之。草野之間必有因民之欲。竊吾意以售其姦者。其始特出於私立名字。斂財帛賽會徵逐而已。而其後遂爲有國者之憂。至於爲有國者之憂。蓋非獨從而和者不樂也。而亦豈倡之者之始意及此哉。然而勢必至乎此者何也。吾爲之說以導之。吾聚之。吾能散之。故其權在上。民自爲聚者非法之所許也。民知意不出於上而恐法及己也。鯁鯁然有與上相持之心。其勢遂聚而不可復散。故曰非民之所能爲也。昔子貢觀於蜡。以爲一國之人皆若狂夫。至於一國若狂。雖後世游民聚衆之盛。無過於此。而聖王行之。孔子曰。張而不弛。文武弗能也。夫文武所不能者而後人能之。必其民皆標枝野鹿。如上古之不相往來者而後可也。而豈有是理哉。嗟乎。權出於上而黨錮清流之禍成。權出於民而左道亂政之禍烈。然則以王者之權而謂教化不易興者則妄矣。曾亮見川楚教匪之亂。及嘉慶十九年林清之變。故其言如此。其上汪志伊書。亦諄諄言羣民易治。姦民難知。知之者獨州縣。而今爲州縣者。皆苦無權。是時天下方全盛。亂端未兆。其後太平軍陷江南。卒如其言。又著刑論。頗中刑部說帖駁案之弊。既以文名聲。有官監謬聯文雅士。傾動朝列。慕曾亮名。就門請謁。曾亮笑曰。吾豈學康對山哉。卒謝之。有後進來謁。曾亮戒以長安居大不易。惟擇交遊。端言行。勤讀書三言而已。其人本誠篤。用是益兢兢無纖芥過。回里猶尋味其言不置云。詩亦天機超妙。爲同所推。官戶部二十餘年。冲淡自得。以資久將遷。聞弟病。遽乞歸。主講揚州書院。金陵亂後。依河道總督楊以增。以

增爲刊所著柏槐山房文集十六卷。詩十二卷。駢文二卷。柏槐宣城山名。曾亮祖居也。咸豐六年卒。年七十一。

黃爵滋

黃爵滋。字德成。號樹齋。江西宜黃人。道光三年進士。翰林院庶吉士。散館授編修。八年充江南鄉試副考官。十二年十五年兩充會試同考官。十七年充山東鄉試正考官。十九年充江南鄉試正考官。歷官工科給事中。鴻臚寺卿。通政使。洊陞禮部刑部侍郎。遭父喪歸。未幾。戶部銀庫虧絀。事覺。坐失察落職。服闋賠繳。得旨以員外郎用。尋卒。宣宗廣開言路。先後擢臺臣。敢言者置列。以爵滋爲之首。爵滋陳六事。察天道。廣賢路。豫備將材。控制匪民。整飭京營。堆撥申嚴外夷防禁。略言中國與外夷互市。原有地界。近夷人錄述中國情事。磨繪山川形勢。我示之弱則彼強。我示之強則彼弱。威服之道。不在臨時張皇。在平時振作。奉旨飭堆撥肅夷禁。如所請行。又上塞漏卮疏。謂鴉片流於中國。爲害日深。耗銀之多。由於販煙之盛。吸煙之衆。得旨下各督撫將軍嚴禁。自明季迄今。閩數百年。至是始知以有用財填無窮壑。實爵滋發之。及英吉利內犯。復上籌辦海防疏。大旨言水師廢弛。兵額多缺。戰艦不備。宜廣招募。助攻守。集艇船。資駕馭。嘗著海防圖二卷。表一卷。工詩。氣韻高雅。力追漢唐。其論詩謂儕俗之作有數非。或聲調便利。靡而不振。或意旨蹇澀。枯而不澤。若是者非體。或馳騁揮霍。剽而不留。或堆垛襲積。滯而鮮通。若是者非氣。或貌似神離。虛而不實。或以文飾俗。雜而不清。若是者非理。或苦心束縛。自謂親切。或任情泛濫。自謂周至。若是者非法。去茲數非。求其一是。然後可以語山水之助。發智仁之妙。而其道之靡靡。業之不倦。則又貴有畢生之閱歷。同志之觀摩焉。於近今作詩之弊。指摘殆盡。王昶謂其輔翼詩教之功。非淺鮮云。當時士大夫。日以風雅文章自見。爵滋揖讓其閒。爲名流所推重。所著有仙屏書屋詩錄初集十六卷。後錄二卷。文錄十六卷。戊申楚游草一卷。

陳奐

陳奐字頌甫。號師竹。晚號南園老人。江蘇長洲人。諸生。咸豐元年。舉孝廉方正。奐始從吳縣江沅治古學。金壇段玉裁寓吳。與沅祖聲善。嘗曰。我作六書音韻表。惟江氏祖孫知之。餘鮮有知者。奐盡一晝夜。探其梗概。沅嘗假玉裁經韻樓集。奐竊視之。加朱墨。後玉裁見之。稱其學識出孔賈上。由是奐遂受學。玉裁刻說文解字注。校訂之力。奐居多。游京師。高郵王念孫暨子引之樓。澠郝懿行。績侯胡培聲。涇胡承珙。臨海金鶚。咸與奐締交。引之著經義述聞。每一卷成。必出相質。承珙撰毛詩後箋。自魯頌泮水以下。奐爲補編。郝氏爾雅義疏。胡氏儀禮正義。金氏求古錄。皆爲校刊以行。奐嘗言大毛公詁訓傳。言簡意該。漢儒不遵行。錮蔽久矣。遂殫精竭慮。專攻毛傳。以毛傳一切禮數名物。自漢以來。無人稱引。韜晦不彰。乃博徵古書。發明其義。大抵用西漢以前舊說。而與東漢人說詩者不苟同。又以毛氏之學。源出荀子。而善承毛氏者。惟鄭仲師許叔重兩家。故於周禮注說文解字。多所取說。著詩毛氏傳疏三十卷。敘曰。鄭康成初學韓詩。後見毛詩義精好爲作箋。亦復閒雜魯詩。併參己意。故作箋之旨。實不盡同毛義。近代說詩。兼習毛鄭。不分時代。不尙專修。不審鄭氏作箋之旨。而又苦毛義之簡深。猝不得其涯際。漏辭偏解。迄無鉅觀。竊以毛詩多記古文。倍詳前典。或引伸。或假借。或互訓。或通釋。或文生上下。而無害。或辭用順逆。而不違。要明乎世次得失之迹。而吟詠情性。有以合乎詩人之本志。故讀詩不讀序。無本之教也。讀詩與序而不讀傳。失守之學也。漢書藝文志。毛詩二十九卷。毛詩故訓傳三十卷。古經傳本。各自爲書。自傳與箋合併。而久失原書之舊。今置箋而疏傳者。宗毛詩義也。是書剖析同異。訂證闕訛。有功毛氏不淺。如葛覃傳。父母在以下九字。爲箋語。竄入。引泉水箋。爲證。與我行其野。篇宣王之末以下十九字。爲傳。入箋者。皆確不可易。毛於言告言歸下。既云婦人謂嫁曰歸。於此則第訓寧爲安。蓋歸寧。卽序之歸安父母。謂已嫁而可以安其父母之心。卽所謂無父母遺懼也。潛夫論斷駁篇云。不枉行以遺憂。故美歸寧之志。一許不攷。蓋所以長真潔而寧父母也。此正足

以發明序傳之義。又如以煩攔解生民之謀。黍里旅證公劉之廬旅。皆確有依據。而以爾雅之不適不贖不徹爲一句。以釋日月沔水十月之交三詩。尤爲精絕。又以疏中稱引博廣難明。更舉條例。立表示圖。爲毛詩說一卷。準以古音。依四始爲毛詩音四卷。做爾雅例。編毛傳爲義類十九篇一卷。以鄭多本三家詩。與毛異。爲鄭氏箋考徵一卷。又有詩語助義三十卷。公羊儀禮考徵一卷。師友淵源記一卷。稀郊或問。宋本集韻校勘記。其論尙書大傳。與毛傳同條共貫。論春秋之學。從公羊以知例。治穀梁以明禮。穀梁文句極簡。必得治禮數十年而後可明其要義。論釋名與毛傳說文多不合。然可以討漢末說經家之沿流。論丁度集韻云。集韻總字。具見類篇。先以類篇校集韻。再參之釋文說文玉篇廣韻博雅。則校讐之功過半矣。又云。陸氏釋文宋本。當於集韻求之。今尙書釋文經。開寶中陳諤等刪改之本。集韻則未經刪改者也。皆爲後學開塗徑。於子書中尤好管子。嘗命其弟子元和丁士涵爲管子案四卷。家居授徒。從游者數十人。同郡管慶祺馬劍費寶鐸。浙西戴望蔣仁榮。其尤著也。同治二年卒。年七十有八。

莫友芝

莫友芝。字子猷。自號邵亭。晚又稱暉叟。貴州獨山人。父庶吉士與傳。官遵義府學教授。友芝默然湛深。好治許鄭之學。當其時。鄭珍亦從教授遊。同志相友善。歷五六年。業益進。士林言學者。必曰鄭莫焉。家貧嗜古。喜聚珍本書。讀書徹旦暮不息。寢食並廢。通蒼雅故訓。大經名物制度。旁及金石目錄家言。率究及其奧蹟。疏導源流。辨析正僞。鮮銖寸差失。復工詩書。求者沓至。居常好游覽。喜談論。遇人無貴賤賢愚。一接以和。自道光辛卯舉於鄉。其後連歲走京師。朝貴爭欲致之。會試報罷。籤取知縣。且遷官。意不所樂。輒棄去。往從胡文忠於太湖。校刻讀史兵略。既又從曾文正安慶金陵。凡客文正所者踰十年。江南底定。寓妻子於白下。徧走江淮吳越間。盡識其魁儒碩彥。同治四年。蘇撫李鴻章請州縣吏於朝。有詔徵用。卒不出。十年。以往求文宗文匯兩閣書。赴揚州抵興化。病卒。

年六十一。友芝志存文獻。思爲黔志一書。潤色邊裔。道光中。偕鄭珍同撰遵義府志。博采漢唐以來圖書地志。荒經野史。援證精確。體例謹嚴。成書四十八卷。時論以配水經注華陽國志。又輯明代黔人詩歌。因事存人。因人考事。爲黔詩紀略三十二卷。由是貴州文獻始爛然可述。居金陵時。得唐寫本說文木部殘卷。自謂此吾西州漆書也。以摹正段廩二家校注。撰箋異一卷。至句容山中。蒐討梁碑。躬自監拓。惟恐一字見遺。撰梁石記一卷。其餘有聲韻攷略四卷。過庭碎錄十二卷。宋元舊本書經眼錄三卷。附錄一卷。樗蒱譜注一卷。邱亭詩鈔六卷。邱亭遺文八卷。遺詩八卷。編訂未竟者。則邱亭經說。書典經眼錄。舊本未見書經眼錄。影山詞。各若干卷。

王韜

王韜。初名暉。字紫詮。吳縣諸生。少避亂。居粵東。性佻達。願通西學。有識略。壯歲返里。會太平軍下蘇松常太。州郡殘破。上海以各國通商所在。未遽圍擾。勢危甚。蘇松太道吳煦。頗諳洋人性。先是美利堅人華爾。爲清將。旋以罪廢。是時來上海。國人皆欲殺之。前蘇松糧道楊坊。愛其勇。匿之家。介之吳煦。煦爲言於美領事。獲免。華爾以此德吳。咸豐十年夏五月。太平軍陷松江。卽令華爾募西勇數十人爲前行。我兵數百人。半衣西服。半中服。繼之。旣雇印度人實伍。又欲招呂宋人爲兵。韜乃獻策曰。招募洋兵。人少餉費。不如募壯勇充數。而雇洋人領隊。平日教以洋法。演習火器。務令精練。西官率之以進。則膽壯力奮。似亦可收效於行間。從之。遂設洋鎗隊。號爲常勝軍。以華爾管帶之。適英水師提督何伯。法水師提督卜羅德。並率船礮列守禦。備攻剿。卒以洋兵力。克嘉定青浦。盡平敵壘。上海解嚴。韜之計也。華爾與卜羅德。皆以奮攻。中鎗殞命。功大酬薄。白齊文竟生缺望。投太平軍。爲謀主。勸志王李秀成。盡棄江浙兩省地。斬伐茶桑。焚燬廬舍。然後收合大隊。轉戰趨北方。據齊豫秦晉。以控東南。其地洋人力所不及。乃可以逞志。秀成戀故土。策不能用。越歲內鬩。太平軍悉解體。惟秀成屯兵蘇州。連營七堡壘。藉以自固。秀成富韜略。能優禮士夫。韜旣陷敵中。上書陳攻取上海之策。其略曰。洋人曩者遣使至金陵。以各國貿易所

在。請無攻滬。而大酋不許。洋人遂助清廷城守。大爲失策。此時宜亟許其不攻。而要令不得再以軍裝火藥資清國。更遣舟師渡江。分擾通泰裏下河完善之區。并於海道劫掠華商。使不能載運貨物。貿易不通。釐捐斷絕。官軍乏餉。洋人坐困。則上海聚百萬避難之人。無所求食。必且生變。而洋人生理既絕。亦必俛首來求修好。然後裔之使獻上海。策之上也。若一時不能與洋人和。而欲先得上海。亦不必調集大兵也。蓋洋人嗜利。近以蘇浙二省避難人。僑至滬地。遂於洋場廣造房屋。重收租息。初不問其來歷若何。此時宜亟乘其隙。遣精兵數千。僞作難民。賃洋屋以居。蓋地係洋場。中國官吏。無從稽察。中夜一呼。應者四起。縱火焚燒。遇人研殺。洋人計惟登舟逃逸。而上海唾手得矣。上海既得。然後招回洋人而厚待之。不擾其怒。而仍可使爲我用。策之次也。時秀成勢日蹙。不遑他計。置書床下。同治元年二月。上海中外諸軍。攻下七堡壘。獲船書。蘇撫薛煥閱之大驚。疏聞於朝。四月。李鴻章督師滬上。以上海爲關中。戰勝攻取。遂告廓清。乃下令索船。船遜迹南洋。辦星洲報館。詩酒自放。年寢以老矣。自號曰天南逐叟。久之回滬。任格致書院山長。評定文字。持論閎通。選拔多一時才俊。尋主申報館筆政。爲報界開其先河。又工古今體詩。及駢體文。卒年七十有八。所著有普法戰紀。崧隱漫錄。遜窟謾言。甕牖餘譚等。

李慈銘 方琦 譚廷獻 李復勳

李慈銘。字愛伯。會稽人。諸生入貲爲戶部郎中。至都。即以詩文名於時。大學士周祖培尙書潘祖蔭引爲上客。光緒六年。成進士。歸本班。改御史。時朝政日非。慈銘遇事建言。請臨雍。請整頓臺綱。大臣則糾孫毓汶孫楫。疆臣則糾德馨沈秉成裕寬。數上疏。均不報。慈銘鬱鬱而卒。年六十六。慈銘爲文。沈博絕麗。詩尤工。自成一家。性狷介。又口多雌黃。服其學者好之。憎其口者惡之。日有課記。每讀一書。必求其所蓄之深淺。致力之先後。而評臬之。務得其富。後進翕然大服。著有越縵堂文十卷。白華絳趺閣詩十卷。詞二卷。又日記數十冊。弟子著錄數百人。同邑陶方琦爲最。方琦。字子珍。光緒二年進士。選庶吉士。授編修。督學湖南。年四十。卒於京邸。方琦學有本末。汲汲於古。

述遼無間歲時。治易鄭注詩魯故爾雅漢注。又習大戴禮記。其治淮南王書。方以推究經訓。蒐采許注。拾補高誘。再三屬草。乾乾十年。實事求是。有淮南許注異同話。許君年表。漢亭室文鈔。駢文詩詞。譚廷獻。字仲脩。仁和人。同治六年舉人。少負志節。通知時事。國家政制典禮。能講求其義。治經必求西漢諸儒微言大義。不屑屑章句。讀書日有程課。其所爲文。導源漢魏。詩優柔善入。惻然動人。又工詞。與慈銘友善。相唱和。官安徽知歙全椒合肥宿松諸縣。晚告歸。貧甚。張之洞延主經心書院。年餘謝歸。卒於家。李稷勳。字姚琴。秀山人。光緒二十四年。二甲一名進士。改庶吉士。授編修。充會試同考官。精衡鑒。重實學。頗得知名士。累官郵傳部參議。總川漢路事。博學善古文。嘗受詩法於王闓運。而不囿師說。專步趨唐賢。意致深婉。得風人之遺。慈銘嘗稱賞之。有覽齋詩錄四卷。

吳汝綸

吳汝綸。字藝父。桐城人。少貧力學。嘗得鷄卵一。易松脂以照讀。好文出天性。早著文名。同治四年進士。用內閣中書。會國藩奇其文。留佐幕府。久乃益奇之。嘗以漢稱衡相擬。旋調直隸。參李鴻章幕。時中外大政常決於國藩。鴻章二人。其奏疏多出汝綸手。尋出補深州。丁外內艱。服除補冀州。其治以教育爲先。不憚貴勢。籍深州。諸村已廢。麥民至交通。御史以壞村學劾奏。還其田。及莅冀州。仍銳意興學。深冀二州。文教斐然。冠畿輔。又開冀衡六十里之渠。洩積水於滄。以既田畝。便商旅。時時求其士之賢有文者。禮先之。得十許人。月一會書院。議所施爲。興革於民便不便。率不依常格。稱疾乞休。鴻章素重其人。延主蓮池講席。其爲教一主平文。以爲文者。天地之至精。至粹。吾國所獨優。語其實用。則歐美新學尙焉。博物格致機械之用。必取資於彼。得其長。乃能共競。舊法完且好。吾猶將革新之。况其靡敗。不可復用。其勤勤導誘後生。常以是爲說。嘗樂與西士遊。而日本之幕文章者。亦踵海來請業。會朝旨開大學堂於京師。管學大臣張百熙奏薦汝綸。加五品卿銜。總教務。辭不獲。則請赴日本考學制。既至

其國。上自君相及教育名家。婦孺學子。皆備禮接款。求請題詠。更番踵至。旋返國。先乞假省墓。興辦本邑小學堂。規制粗立。遽以疾卒。年六十四。汝綸爲學。由訓詁以通文辭。無古今無中外。唯是之求。自羣經子史周秦故籍以下。逮近世方姚諸文集。無不博求慎取。窮其原而竟其委。於經則易書詩禮左氏穀梁四子書。旁及小學音韻。各有詮釋。於史則史記漢書三國志新五代史資治通鑑國語國策。皆有點校。尤蘊於史記。盡發太史公立言微旨。於子則老莊荀韓管墨呂覽淮南法言太玄。各有評隲。而最取其精者。於集則楚辭文選漢魏以來各大家詩文。皆有點勘之本。凡所啓發。皆能得其深微。整齊百代。別白高下。而一以貫之。盡取古人不傳之蘊。昭然揭示。俾學者易於研求。且以識夫作文之軌範。雖萬變不窮。而千載如出一轍。其論文嘗謂千秋蓋世之勳業。皆尋常耳。獨文章之事。緯地經天。代不數人。人不數篇。唯此爲難。又謂中國之文。非徒習其字形而已。綴字爲文。而氣行乎其間。寄聲音神采於文外。雖古之聖賢豪傑。去吾世邈矣。一涉其書。而其人之精神意氣。若儼立乎吾目中。務欲因聲求氣。凡所爲抗隊詘折。斷續斂侈。緩急長短。申縮抑揚。頓挫之節。一循平機勢之自然。以漸於精微奧窔之域。乃有以化裁而致於用。悉舉學問與事業合而爲一。而尤以滄民智自強。亟時病爲兢兢云。著有易說二卷。寫定尙書一卷。尙書故三卷。夏小正私箋一卷。文集四卷。詩集一卷。深州風土記二十二卷。及點勘諸書。皆行於世。汝綸門下最著者爲黃濬。而同時有蕭穆。亦以通考據名。

張裕釗

張裕釗。字廉卿。湖北武昌人。少時塾師。授以制舉業。意不樂。家獨有南豐集。時時竊讀之。咸豐元年舉人。考授內閣中書。會國藩閱卷。賞其文。既來見曰。子豈嘗習子固文耶。裕釗私自喜。已而國藩益告以文事利病。及唐宋以來家法。學乃大進。司馬遷班固相如揚雄之書。無一日不誦習。又精八法。由魏晉六朝以上。窺漢隸。臨池之勤。亦未嘗一日輟。國藩既成大功。出其門者。多通顯。裕釗相從數十年。獨以治文爲事。國藩爲文義法取桐城。益閱以

漢賦之氣體。尤善裕釗之文。嘗言吾門人可期有成者。惟張裕釗吳汝綸兩生耳。裕釗文字淵懿。歷主江寧湖北直隸陝西各書院。成就後學甚衆。嘗言文以意爲主。而辭欲能副其意。氣欲能舉其辭。譬之車然。意爲之御。辭爲之載。而氣則所以行也。欲學古人之文。其始在因聲以求氣。得其氣。則意與辭往往因之而益顯。而法不外是矣。世以爲知言。著嫌亭文集。裕釗門下最知名者有范當世朱銘盤。當世字肯堂。江蘇通州諸生。能詩。汝綸嘗歎其奇橫不可敵。著范伯子詩文集。銘盤字曼君。泰興舉人。敘知州。其學長於史。兼工詩古文。著晉會要一百卷。朝鮮長編四十卷。及桂之華軒詩文集。與裕釗同時者。有楊守敬。字惺吾。宜都人。爲文不足躋裕釗。而其學遠博。精輿地。用力於水經。尤勤通訓詁。考證金石文字。能書摹鐘鼎至精。工儷體。爲箴銘之屬。古奧聳拔。文如其人。以舉人官黃岡教諭。加中書銜。嘗遊日本。搜古籍多得唐宋善本。辛苦積資。藏書數十萬卷。爲鄂學靈光者。垂二十年卒。年七十有七。著有水經注圖。水經注要刪。隋書地理志考證。日本訪書志。晦明軒稿。鄰蘇老人題跋。望堂金石集等。

黎庶昌

黎庶昌。字莼齋。貴州遵義人。少習家學。從莫子偲鄭子尹游。稽經攷道。學以大進。同治紀元。下詔求言。庶昌方二十餘歲。年少志銳。隻身行萬里至京師。以廩貢生應詔。上書論時事萬餘言。其大要歸於進賢退不肯。正人心。厚風俗。不憚反復敷陳。直言無隱。忠愛之忱。溢於言表。是時河內李文清公棠階。以名儒入政府。建議宜擢用。風示天下。會曾文正公駐軍安慶。上命以知縣發往安慶大營差遣。文正優禮之。嘗謂莼齋生長邊隅。意氣邁往。行文堅確。錄而不舍。可成一家言。文正幕中皆當世賢豪。庶昌與武昌張廉卿桐城吳摯甫無錫薛叔耘徽浦向伯常交尤篤。文正歿。浮沈州縣近十年。充出使英法德日四國參贊。五六年。未盡所用。鬱鬱不樂。已而驟用爲出使日本大臣。任將滿。遽丁內艱。服闋。復起用。前後凡奉使六年。熟通彼此之情。因機適變。剛柔互濟。鄰邦歎異。折服之。

暇至東京書肆。搜羅宋元舊籍。與宜都楊守敬商榷。刻成古逸叢書凡二百卷。二十六種。皆中土希見之本。任滿僑居上海。朋舊歡讌。蕭然物外。合肥李文忠追論前勞。遂復有川東兵備道之命。蒞官二年。規畫興革。秩然政觀。已而靜覘世變。不欲久任事。遂乞病引去。歸里未久。即卒。庶昌讀書。守曾文正家法。嘗識十一書。應立學官曰。昔周衰。孔子自衛返魯。憂道不行。退而贊易。敍書。刪詩。定禮樂。修春秋。垂範百王。是爲六經。樂經遺秦而闕。僅存其五。然而孔子沒。門弟子各闡師說。曾子述孝經。游夏之徒譎論語。左邱明公羊穀梁傳春秋。至戰國而有孟子。爾雅禮記。浸尤晚出。自是而七經九經十一經之名以立。及至孟蜀刻石成都。十三經遂著爲令。其於孔子所刪定。固已增益其七八矣。唐雖以經升老子。而不久即廢。南宋時。朱子作集注。始於戴記中摘出大學中庸。以配論語孟子。題曰四書。詔學者讀書當自四書始。淳熙以降。翕然宗之。元皇慶中。定制以四書試士。明代迄今。樂其易簡。因仍不革。發題考試。先四書而後五經。廢注疏而遵朱說。道術因之一變。然而私家誦讀。往往溢出令甲。於羣經外。頗有視爲不刊之典者。當周末時。莊子著書多寓言。然其指事類情。在諸子中最爲瑰放特出。陸德明釋文。已列爲經。而作之音義。太史公稱國風好色而不淫。小雅怨誹而不亂。離騷兼之。王逸注楚辭。尊離騷曰經。朱子從而不得。後世騷學選舉。相因爲用。欲祛文章流別之僞。文選其最要矣。司馬遷史記。究天人之際。通古今之變。其闕識孤懷。蓋未易幾也。班孟堅紀述漢事。斷代爲書。文字之淵源。經世之大法。粲然畢備。許叔重說文解字。博奧精嚴。六藝遺文。賴以不墜。實軼爾雅一經之上。本朝駢成絕學。儀禮十七篇。士禮雖存。頗闕王朝邦國舊典。欲觀後世帝王因襲之迹。惟杜氏通典。馬氏通攷。博而有要。通鑑上續左氏。事始三家分晉。體大思精。言馴而不雜。則亦優視聖作矣。杜子美冠絕古今詩人。韓愈文章。粹然一出於正。其道自比孟子。使孔門用詩文。二子者入室矣。校此數家之書。其傳之遠者。一二十歲。少亦七八百年。非有名爵利祿之資。然而歷世相承。誦習不絕。人心衆好之同。如飢渴飲食不可一日離。其視爲經。固已久矣。往者。嘗與曾文正公討論羣籍。公獨以謂子若莊子。辭若離騷。集若文選。史若兩司馬氏。班氏。小學若許氏。典章若杜氏。馬氏。詩文若子美。杜氏。昌黎韓氏。所謂曠代命世大

才也。躋其書以配經典。誰曰不宜。今以功令之所頒若彼。學士大夫之所誦習若此。記曰。入其國。其教可知也。又曰。民之所好好之。竊謂莊子以下十一書。宜因私家肄習。特爲崇異。立入學官。使列十三經後。以莊子次孟子。楚辭文選杜詩韓文次毛詩。史記漢書次尙書。通鑑次左氏。通典文獻通考次三禮。說文次爾雅。各降一等。命曰亞經。於以廣術興微。翼贊聖業。非復謾聞曲學之私。將樂與海內知言君子。一平其議也。又輯續古文辭類纂。文四百五篇。總二十八卷。分上中下三編。皆以補姚氏姬傳古文辭類纂所未備。曰文章之道。莫大乎與天下爲公。而非可用一人一家之私議。自劉向父子總七略。梁昭明太子集文選。而後先古文章。始有所歸。宋歐陽氏表章韓愈。明茅廌甫錄八家。而後斯文之傳。若有所屬。姚先生興於千載之後。獨持灼見。總括羣言。一一衡量其高下。銖黍之得。毫釐之失。皆辨析之。醇駁較然。由是古今之文章。謬悠殺亂。莫能折衷一是者。得姚先生而悉歸輪定。即其所自造述。亦浸淫近復於古。然百餘年來。流風相師。傳嬗廣續。沿流而莫之止。遂有文敝道喪之患。至湘鄉曾文正公出。擴姚氏而大之。並功德言爲一涂。挈攬衆長。轅歸掩方。跨越百氏。將遂席兩漢而遷之三代。使司馬遷班固韓愈歐陽修之文。絕而復續。豈非所謂豪傑之士。大雅不羣者哉。蓋自歐陽氏以來。一人而已。今所論纂。其品藻次第。一以昔聞諸曾氏者。述而錄之。曾氏之學。蓋出於桐城。固知其與姚先生之旨合。而非廣己於不可畔岸也。循姚氏之說。屏棄六朝駢儷之習。以求所謂神理氣味格律聲色者。法愈嚴而體愈尊。循曾氏之說。將盡取儒者之多識格物。博辨訓詁。一內諸雄奇萬變之中。以矯桐城末流虛車之飾。其道相資。無可偏廢。故旣敘述略例。亦明夫不敢封己抱殘守一先生家言。暖曖姝姝。而私自悅以足也。然遂欲執涂之人而強同。則是又大惑已。所著有拙魯園叢稿六卷。輯古逸叢書二百卷。續古文辭類纂二十八卷。

釋敬安

釋敬安。字寄禪。姓黃氏。湘潭人也。其先世爲山谷苗裔。宋時由江西遷茶陵。明季乃徙湘潭之石潭。世業農。父宣

杏母胡氏。嘗禱白衣大士。麥蘭而生。數歲時。好聞仙佛事。常終日嘯嘯。若有所吟誦。七歲失母。諸姊皆嫁。父或他適。則以安兄弟寄食鄰家。日昃不返。即號號蹤迹之。里人爲之惻然。年十一。始就塾師授論語。未終篇。父又沒。零丁孤苦。極厥慘傷。其弟以幼依族父。安獨無所得食。嘗爲人牧牛。輒攜書於牛背讀之。一日。與羣兒避雨村中。聞讀唐詩。至少孤爲客。早句。憮然淚下。塾師周雲帆。駭問其由。以父沒不能讀對。雲帆甚憐之。曰。爾爲我炊爨。洒掃可乎。卽下拜。雲帆喜甚。每語人曰。此兒耐苦讀。後必有所樹立。余老不及見耳。無何。雲帆病沒。安遂散去。然猶不廢業。聞里中豪家欲覓一童伴兒讀。卽欣然往。就至則使供驅役。自讀輒遭訶叱。因悲歎。以爲屈身爲讀書計。既違所願。豈可爲區區衣食爲人奴乎。卽辭去。習工藝。鞭撻尤甚。絕而復甦者數。一日見籬間白桃花。忽爲風雨摧敗。不覺失聲大哭。因慨然動出塵想。遂投湘陰法華寺出家。禮東林長老爲師。時同治七年也。冬初。復詣南嶽祝聖寺。從賢楷律師受具。首參恆志於岐山。專司苦行諸職。暇則隨衆坐禪。越五年。頗有省。時精一首座。爲維那。閉以詩自娛。安輒之曰。出家人不就本分上事。乃學世諦文字耶。因笑曰。汝誓齡精進。他日成佛未可量。至文字般若三昧。恐今生未能證得。後省舅氏至巴陵。登岳陽樓。友人分韻賦詩。安獨澄神趺坐。下視湖光。一碧萬頃。忽得洞庭波送一僧來句。歸述於郭菊蓀。謂有神助。且言其有宿根。力勸之學。授唐詩三百篇。一目成誦。後精一見安所作。大奇之。精一名思參。長沙張氏子。天資聰穎。幼從塾課。便解文義。淡於科第。而好佛書。見庭中桃花。因風飄落。悟世無常。乃從剃度。具足。復還長沙。置慈雲精舍於城南。迎母養之。與人論說。詞簡易明。引導後學。當機立判。故於安前激後勸。卒玉其成。然安自以爲讀書少。用力尤苦。一字未愜。如負重累。至忘寢食。有一詩至數年始成者。念生死事切。時以禪定爲正業。一日靜坐。參父母未生前語。冥然入定。內忘身心。外遺世界。坐一日如彈指頃。猝聞溪聲有悟。嗣後徧游吳越。凡海市秋潮。見未曾有。遇嶽谷幽巖。輒獻詠其中。飢渴時。飲泉和柏葉下之。喜以楞嚴圓覺雜莊騷以歌。人目爲狂。嘗冒雪登天台華頂峯。雲海盪胸。振衣長嘯。睡虎驚立。咆哮攫前。以慈心視之。虎威亦解。又曾於深山遇一巨蟒。御風行。頭大如斗。舌電尺餘。因念佛。亦無怖。旋養疴皋亭山中。中夜聞剝啄聲。

甚急。啓關。月明如晝。四顧無人。如是者數數。次夕。伺叩門聲急。開戶見一黑嘗若圓球。滾滾而去。安喚羣犬逐之。窮追至山腰。厲聲曰。擾我何爲。我豈怖汝。苟有所求。當爲汝度之。遂號佛達旦。怪尋滅。病亦尋癒。其住四明最久。窺天童雪竇。窮攬霞嶼。月湖之勝。郡中文學。呂文舟。徐訖仙。胡奮。封馬文齋。沈問梅。皆相與酬唱。生平好善。疾惡觸境而生。嘗渡曹娥江。謁孝女廟。叩頭流血。同行者曰。奈何。以比丘禮女鬼。安曰。汝不聞波羅提木叉。孝順父母。諸佛聖人。皆從孝始。吾觀此女。與佛身等。禮拜亦何過焉。甲申八月。返權長沙。年三十有四。行腳已闋十霜。明年還石潭。省先塋。宿莽縱橫。不可復識。望窮山。慟哭。村老聞之。爲指其葬處。始復憶識。蓋去鄉里已二十餘年。積思幽潛。故悲不自勝也。自是往來湘衡。時有著述。同縣王相綺爲當代詩人。見安所作。未嘗不稱善。有陳伯嚴羅順循皆擅詞翰。曾綜其詩十卷刻之。湘綺爲之序。

嚴復

嚴復。原名宗光。字又陵。一字幾道。福建侯官人也。早歲師事同里黃宗彝。旣聞宋元明諸儒學行。同治間。同縣沈葆楨。以巡撫居憂在里。奉詔創船政局。招試才傑爲海軍儲才。得復文。奇之。且用拔冠其曹。時年十四也。旣卒業。從軍艦練習。周歷南洋黃海。日本臺灣間。葆楨奉命籌邊。復挈以東渡。勘量各海口。光緒二年。派赴英國海軍學校。肄戰術及礮臺建築諸學。是時日本亦始遣人留學西洋。伊藤博文大隈重新之倫。皆其選也。復得最上第。湘陰郭嵩燾。以侍郎使英。時引與論析中西學術同異。學成歸。葆楨已薨。無用之者。於是發憤治八比。冀以科第顯。納粟爲監生。應南北鄉試者再。合肥李鴻章方總督直隸。領北洋大臣。辟爲北洋水師學堂教授。見其時朝野玩愒。而日本同學歸者。皆用事。圖富強。翦我琉球以去。則大戚。法越事起。鴻章爲德璀琳輩所給。皇遽定約。復憤而自疏。及鴻章治海軍。乃以復總辦學堂。不預機要。甲午之戰。海軍燬焉。德宗大恨。銳欲變法。特詔遴選人才。復被薦。以二十四年戊戌秋。召對稱旨。退草萬言書上之。略曰。中國積弱。於今爲極。此其所以然之故。由於內治者

十之七。由於外患者十之三耳。而天下洵洵。若專以外患爲急者。此所謂爲目論者也。今日各國之勢。與古之戰國異。古之戰國務兼并。而今之各國謹平權。此所以宋衛中山不存於七雄之世。而荷蘭瑞士丹麥尙瓦全於英法德俄之間。且百年以降。船械日新。軍與日費。量長較短。其各謀於攻守之術也。亦日精。兩軍交綏。雖至強之國。無萬全之算也。勝負或異。死喪皆多。且難端既構。累世相仇。是以各國重之。使中國一旦自強。與各國有以比權量力。則彼將隱銷其侮奪覬覦之心。而所求於我者。不過通商之利而已。不必利我之土地人民也。惟中國之終於不振。而無以自立。則以此五洲上腴之壤。無論何國得之。皆可以鞭笞天下。而平權相制之局壞矣。慮此之故。其勢不能不爭。其爭不能不力。然則必中國自主之權失。而後全球殺機動也。雖然。彼各國豈樂於是哉。爭存自保之道。勢不得不不然也。今夫外患之乘中國。古有之矣。然彼皆利中國之弱。而後可以得志。而今之各國。大約而言之。其用心初不若是。是故徒以外患而論。則今之爲治。尙易於古叔季之時。夫易爲而不能爲。則其故由於內治之不修。積重而難反。而外患雖急。尙非吾國病本之所在也。其在內治云何。法既敝而不知變也。今日吾國之富強。民之智勇。無一事及外洋者。其所以然之故。所從來也遠。大抵建國立羣之道。一統無外之世。則以久安長治爲要圖。分民分土。地醜德齊之時。則以富國疆兵爲切計。此不易之理也。願富強之盛。必待民之智勇。而後可幾。而民之智勇。又必待有所爭競磨礱。而後日進。此又不易之理也。歐洲國土。當我殷周之間。希臘最盛。文物政治皆彬彬矣。希臘中衰。乃有羅馬。羅馬者。漢之所謂大秦者也。庶幾一統矣。繼而政理放紛。民俗抵冒。上下征利。背公營私。當此之時。峨特日爾曼諸種起而乘之。蓋自是歐洲散爲十餘國焉。各立君長。種族相矜。互相砥礪。以勝爲榮。以負爲辱。蓋其所爭。不僅軍旅疆場之間而止。自農工商賈。至於文詞學問。一名一藝之微。莫不如此。此所以始於相忌。終以相成。日就月將。至於近今百年。其富強之效。遂有非餘州所可及者。雖曰人事。抑亦其地勢之乖離破碎使之然也。至我中國。則北起龍庭天山。西緣蔥嶺輪臺之限。而東南界海。中間數萬里之地。帶山礪河。渾整綿互。其地勢利爲合。而不利爲分。故當先恭觀晉六朝。五代之秋。雖暫爲據亂。而其治終歸於一統。統既

一矣。於此之時。有王者起。爲之內修綱維而齊以法制。外收藩屬而優以羈縻。則所以禦四夷而撫百姓。求所謂長治久安者。事已具矣。夫聖人之治理不同。而其措措天下於至安而不復危者。心一而已。聖人之意。以謂天下已治已安矣。吾爲之彌綸至纖悉焉。俾後世子孫。謹守吾法。而有以相安養。相保持。永永樂利。不可復亂。則治道至於如是。是亦足矣。吾安所用富彊爲哉。是故其垂謨著誠。則尙率由而重改作。貴述古而薄謀新。其言理財也。則重本而抑末。務節流而不急開原。戒進取。教止足。要在在使民無凍餒。而有以制豐歉。供租稅而已。其言武備也。則取詰奸宄。備非常。示安不忘危之義。外之無與無絮長度大之勁敵。則無事於日講攻守之方。使之益精益求精也。內之與民休息。去養兵轉餉之煩苛。則無由蓄大支之勁旅也。且聖人非不知智勇之民之可貴也。然以爲無益於治安而或害吾治。由是凡其作民厲學之政。大抵皆去異尙同。而旌其純良謹愷。所謂豪俠健果。重然諾。與立節概之風。則皆懲其末流而黜之矣。夫如是。數傳之後。天下靡靡馴伏。易安而難危。亂民無由起。而聖人求所以措置天下之方。於是乎大得。此其意非必欲愚黔首。利天下。私子孫也。以爲安民長久之道。莫若此耳。蓋使天下常爲一統而無外。則由其道而上下相維。君子親賢。小人樂利。長久無極。不復亂危。此其爲甚休可願之事。固遠過於富強也。不幸爲治之事。弊常伏於久安之中。而謀國之難。患常起於所防之外。此自前世而已然矣。而今日乃有西國者。天假以舟車之利。闐然而破中國數千年一統之局。且挾其千有餘年所爭競磨礱而得之智勇富強。以與吾相角。於是吾所謂長治久安者。有儻然不終日之勢矣。今使中國之民。一如西國。則見國勢傾危若此。方且相率自爲。不必驚擾倉皇。而次第設施。自將有以救正。而數稔之間。吾國固已富已強矣。顧中國之民。有所不能者。數千年道國明民之事。其處勢操術。與西人絕異故也。夫民既不克自爲。則其事非倡之於上。固不可矣。然所以成其如是者。率皆經數千載自然之勢流衍而來。對待相生。牢不可破。故今日審勢相時。而思有所變革。則一行變甲。當先變乙。及思變乙。又宜變丙。由是以往。翼萬紛紜。設但支節爲之。則不特徒勞無功。且所變不能久立。又况興作多端。動靡財力。使其爲而寡效。則積久必至不支。此亦事之至可慮者也。爲大臣所嫉。格不

得達。既而政局大變。德宗被幽。後二年。拳匪禍作。自是避地居上海者七年。復既擯不用。殫心著述。以匡時拂俗爲務。舉中外治術學理。抉其得失。治以名學。而推本於求誠。以爲誠者非他。真實無妄之知是已。名學者。求誠之學也。顧所重尤在求。據已知以推未知。席既然以明未然。其已知既然。爲公例可也。爲散著可也。各學所辨論。非所信者也。在據所徵以爲信。蓋信一理一言者。必不徒信也。必有其所以信者。此所以信者。正名學所精考徵驗而不敢苟者也。顧吾國所謂學。告吾以所以信者則如何。自晚周秦漢以來。大經不離言詞文字而已。求其仰觀俯察。近取諸身。遠取諸物。如西人所謂學於自然者。不多覈也。夫言詞文字者。古人之言詞文字也。乃專以是爲學。故極其弊爲支離。爲逐末。既拘於墟而束於教矣。而課其所得。或求諸吾心而不必安。或放諸四海而不必準。如是者。轉不若屏除耳目之用。收視反聽。歸而求諸方寸之中。輒恍然而有遇。此遠摩所以有廓然無聖之言。朱子晚年所以恨盲廢之不早。而王陽明居夷之後。亦專以先立乎其大者教人也。惟善爲學者不然。學於言辭文字。以收前人之所以得者矣。乃學於自然。自然者何。內之身心。外之事變。精察徵驗。而所得或超於向者言辭文字外也。則思想日精。而人羣相爲生養之樂利。乃由吾之新知而益備焉。此天演之所以進化。而世所以無退轉之文明也。知者。人心之所同具也。理者。必物對待而后形焉者也。吾心之所覺。必證諸物之見象。而後得其符也。王陽明謂吾心即理。使六合曠然無一物以接於吾心。當此之時。心且不可見。安得所謂理者哉。此中國言明心見性。而不本之格物致知者之所以爲修辭不立其誠也。然執是遂謂中國言詞文字之所著者。一切無當於學。則亦不可也。古書難讀。中國爲甚。英國名學家穆勒約翰有言。欲考一國之文字語言而能見其理極。非諳曉數國之言語文字者不能也。豈徒言語文字之散著者而已。即至大義微言。古之人殫畢生之精力以從事於一學。當其有得。藏之一心。則爲理。動之口舌。著之簡策。則爲詞。固皆有其所以得此理之由。亦有其所以載焉以傳之。故自後人之讀古人之書。而未嘗爲古人之學。則於古人所得以爲理者。已有切膚精樞之異矣。又況歷時久遠。簡牘沿譌。聲音代變。則通假難明。風俗殊尚。則事意參差。夫如是。則雖有故訓疏義之勤。而於古人詔示來學之

旨。瘡益晦矣。故曰讀古書難。雖然。彼所以託焉而傳之理。固自若也。使其理誠精其事誠信。則年代國俗無以隔之。其故不傳於茲。或見於彼。事不相謀而各有合。考道之士。以其所得於彼者。反以證諸吾古人之所得。乃澄湛精瑩。如寐初覺。其親切有味。較之佔畢爲學者。萬萬有加。而生今日者。乃轉於西學得識古之用焉。此可與知者。邇難與不知者言也。夫以西學識古。以實驗治學。後來胡適倡新漢學者之所持。以爲揭幟。而實導之於復。復常以爲中西二學。兼涂並進。或者藉自它之耀。祛舊知之蔽。譯有英哲赫胥黎天演論斯密亞丹原富。耶方斯名學。淺說。穆勒約翰名學。羣己權界論。斯賓塞爾羣學。辯言。甄克思社會通詮。法人孟德斯鳩法意諸書。凡譯一書。與他書有異同者。輒旁考博證。列入後案。張皇幽眇。以補漏義。尤能以古文辭達奧旨。而不斷斷於字比句次之間。國人之言。以古詩體譯西詩者。自蘇玄瑛。言以古文辭譯小說者。自林紆。而言以古文辭譯歐西政治經濟哲學諸科。蓋自復啓其機鑄焉。自以生平師事服膺者。厥惟桐城吳汝綸。每譯一書。必以質正。汝綸高文碩望。常以晚周以來諸子各自名家。其大要有集錄之書。有自著之言。集錄者。篇各爲義。不相統貫。原於詩書者也。自著者。建立一幹。枝葉扶疏。原於易春秋者也。漢之士。爭以撰著相高。其尤者。太史公書。繼春秋而作。楊子太玄。擬易而爲之。是皆所謂一幹而枝葉扶疏者也。及唐中葉。而韓退之氏出。原本詩書。一變而爲集錄之體。宋以來因之。是故漢氏多撰著之編。唐宋多集錄之文。其大略也。集錄既多。而向之所謂撰著之體。不復多見。間一見之。其文采不足以自發。知言者擯焉勿列也。獨近世所傳西人書。率皆一幹而衆枝。有合於漢氏之撰著。又惜吾國之譯言。大抵侷陋不文。不足傳載其義。獨推復博涉兼能。文章學問。奄有東西數萬里之長。揚子雲筆札之功。趙充國四夷之學。美具難并。鍾於一手。求之往古。殆魏焉罕儔。復常虛心請益。而汝綸不通西文。每以爲不及焉。復書最先出者。赫胥黎天演論。汝綸讀而歎曰。自中土譯西書以來。無此鴻製。匪直天演之學。在中國爲初鑿鴻濛。亦緣自來譯手。無似此高文雄筆也。顧蒙意尙有不能盡無私疑者。以謂執事若自爲一書。則可縱意馳騁。若以譯赫氏之書爲名。則篇中所引古書古事。皆宜以原書所稱西方者爲當。似不必改用中國人語。以中事中人。固非赫氏

所及知。法宜如晉宋名流所譯佛書。與中儒著述。顯分體製。似爲入式。願復自以志在達旨。不盡從也。定爲譯例三事。一譯事三難。信達雅。求其信。已大難矣。願信矣不達。雖譯猶不譯也。則達尙焉。海通以來。象寄之才。隨地多有。而任取一書。實其能與於斯二者。則已寡矣。其故在淺嘗。一也。偏至。二也。辨之者少。三也。今是書所言。本五十年來西人新得之學。又爲晚出之書。譯文取明深義。故詞句之間。時有所顛倒附益。不斤斤於字比句次。而意義則不倍本文。題曰達情。不云筆譯。取便發揮。實非正法。什法師有云。學我者病。來者方多。幸勿以是書爲口實也。一西文句中。名物字多。隨舉隨釋。如中文之旁支。後乃遙接前文。足意成句。故西文句法。少者二三字。多者數十百言。假令仿此爲譯。則恐必不可通。而刪削取徑。又恐意義有漏。此在譯者將全文神理融會於心。則下筆揮詞。自然互備。至原文詞理本深。難於共喻。則當前後引繩以顯其意。凡此經營。皆以爲達。卽所以爲信也。一易曰。修辭立誠。子曰。辭達而已。又曰。言之無文。行之不遠。三者乃文章正軌。亦卽爲譯事楷模。故信達而外。求其爾雅。此不僅期以行遠已耳。實則精理微言。用漢以前字法句法。則爲達易。用近世利俗文字。則求達難。往往抑義就詞。毫釐千里。審擇於斯二者之間。夫固有所不得已也。豈釣奇哉。不佞此譯。頗貽艱深文陋之譏。實則刻意求顯。不過如是。又原書論說。多本名數格致及一切嗜人之學。儻於之數者。向未問津。雖作者同國之人。言語相通。仍多未喻。矧夫出以重譯也耶。它所譯大率似此。學者稱之曰。侯官嚴先生。復以海軍積勞。敘副將。既而棄去。入賞爲同知。特授道員。宣統元年。海軍部立。特授協統。尋賜文科進士出身。充學部名詞館編纂。旋以碩學通儒。徵爲資政院議員。三年。授海軍部一等參謀官。袁世凱與復雅故。督直隸。時招之不至。旣罷政。詆者纒起。獨復盛稱其才。世凱旣爲臨時大總統。聘復長京師大學堂。充公府顧問。參政院參政。及憲法起草委員。復恆昌言。國人識度不適用於共和。又言。自由平等者。法律之所據以爲施。而非云民質之本如此也。夫言自由而日趨於放恣。言平等而在於反於事實之發生。此真無益。而智者之所不事也。大抵治權之施。見諸事實。故明者著論。必以歷史之所發見者爲之本基。其間稽取公例。則必用內籀歸納之術。而後可存。若夫鄉壁虛造。用前有假如之術。立爲原則。演

澤之。及其終事。罔不生心害政。盧梭之民約論出。以自由平等爲天下號。適會時世。民樂畔古。而盧梭文辭。又偏悍發揚。語辨而意澤。能使聽者入其玄而不自知。顧所謂民居之而常自由常平等者。盧梭亦自言其爲歷史之所無矣。夫指一社會。考諸前而無有。求諸後而不能。則安用此華胥烏託邦之政論而毒天下乎。況今吾國人之所急者。非自由也。而在人人減損自由。而以利國善羣爲職志。至於平等。本法律而言之。誠爲平國要素。而見於出占投票之時。然須知國有疑問。以多數定其從違。要亦出於法之不得已。福利與否。必視公民之程度爲何如。往往一衆之專橫。其危險壓制。更甚於獨夫。而亦未必遂爲專者之利。是以其書名爲救世。於窮簷編戶。嫗照燠咻。而其實則慘刻少恩。恣睢暴戾。乃著民約平議一文。其說本之英哲家赫胥黎。而戴袁世凱者。利其有言。欲資之以稱帝。適憲法顧問美博士古德諾氏有共和與君主論之發表。楊度諸人倡籌安會。列復名。復實不知也。亦不亟辨。由是謗議日滋。杜門不復出。民國十年卒。年六十九。

王鵬運

王鵬運。號幼霞。自號半塘老人。晚號鷺翁。臨桂人。同治九年。本省鄉試舉人。十三年。以內閣中書分發到閣行走。旋補授內閣中書。久之。陞內閣侍讀。先後直實錄館。辦大婚慶典。敘勞加三品銜。賞戴花翎。光緒十九年七月。授江西道監察御史。奉命巡視中城。轉掌江西道監察御史。陞禮科給事中。轉禮科掌印給事中。二十二年春。上奉皇太后駐蹕頤和園。鵬運上疏曰。竊自今年入春以來。皇上恭奉皇太后駐蹕頤和園。誠以聽政之暇。皇上得以朝夕承歡。而事機之來。皇太后便於隨時訓迪。聖慈聖孝。信兩得也。況御園駐蹕。祖宗本有成憲。如臣構味。尙復何言。然翹翹之忱。以爲皇太后園廷駐蹕。順時頤養。以迓祥和。誠天下臣民所至願。若皇上六飛臨駐。揣時度勢。有不得不稍從緩圖者。謹爲我皇上敬陳之。自和議既成之後。財匱民離。敵驕國辱。久在聖明洞鑒之中。無俟微涇贅述。恭讀去年四月殊翰。我君臣當堅苦一心。力圖自強之策。至哉王言。今日非力持堅苦之操。難策富強之

效。聖言及此，真天下之福也。昔齊頃公敗於鞏，歸而弔死，問疾，七年不飲酒食肉，而便陽之田以歸。夫飲酒食肉，何礙於政。史臣特舉人所至近易忽之處，以狀其日不暇給之忱。是以風聲所樹，不必戰勝攻取，鄰國畏沮之心，自生。實效先聲，理固相因而至。夫人情不遠，援古可以知今，而環伺蕃嚴，返觀能無滋懼。臣非不知我皇上宵衣旰食，在宮在園，同此勵精圖治，然宸衷之艱苦，左右知之，海內臣民不能盡悉也。在廷知之，異域旅人不能盡見也。恐或以溫清之晨昏，爲宸游之逸豫，其何以作四方觀聽之新。杜外人覬覦之漸哉。臣又聞皇上前次還宮，乙夜始入禁門，不獨披星戴月，聖躬無乃過勞，而出警入蹕之謂何，亦非慎重乘輿之道。又今之頤和園，與圓明園情形迥異，其時承平百年，各署入直之慮，百官待漏之所，規模大備，相習忘勞，今則蕪廢已逾三十年，一切辦公處所，悉皆草創，俱未繕完，大臣雖僅有憩息之區，小臣之踟躕宮門，露立待旦者，不知凡幾，而綴衣趣馬，先後奔走於風露泥淖之中，更無論矣。體羣臣爲九經之一，亦願皇上垂鑒及之也。又近讀邱鈔，立山奉命管理圓明園，皇上兩次還宮，皆至園少坐，外間訛傳，遂疑有修復之舉，臣愚以爲值此時艱，斷不至以有限之金錢，興無益之土木，且借貸業已不貲，更何從得此鉅款。此不足爲聖明慮，然臣因之竊有進者，當同始改元之始，御園甫經兵燹，與葺匪難，乃竟聽其蕪廢，豈憚勞惜費哉。蓋欲使深宮不自暇逸之心，昭示於薄海內外，是以數年之內，海宇救平，武功克蕪，前事具在，聖謨孔彰，伏願皇上念時局之艱難，體垂簾之德意，頤和園駐蹕，請暫緩數年，俟富強有基，經營就緒，然後長承色笑，侍養湖山，蓋能先天下之憂而憂，自能後天下之樂而樂，其所以天下養者，不且比隆虞帝哉。疏入，上欲加嚴譴，王大臣陳論至再，意稍解，徐曰：朕亦何意督過言官，重聖慈或不憚耳。樞臣於鵬運摺內夾片附奏，略謂鵬運雖冒昧瀆奏，亦忠愛微忱，臣等公同閱看，尙無悖謬字樣，可否籲恩免究。意在聲敘寬典之邀，出自臣下乞請也。疏留中。即日車駕恭詣請安，面奉懿旨：御史職司言事，余何責焉。王大臣奉諭旨，此後如再有人妄奏嘗試，即將王鵬運一併治罪。著卽傳諭知悉。鵬運直諫垣十年，疏數十上，大都關係政要，此尤聲學大者。二十八年，得請南歸，寓揚州。時艱日亟，憤懣益甚。三十年春，以省墓道蘇州病卒。年五十六。鵬運內

性惇篤。接物和易。能爲晉人清談。閒涉東方滑稽。往往一言篤永。令人三日思不能置。甫通朝籍。卽不諧時論。致身言路。致於抨擊權彊。風不慊於津要。慕之者復百計中傷之。卒坎壈於仕途。才識閎通。不獲竟其用。官內閣侍讀。兩屆京察一等。不記名。給事中試俸期滿。援例截取。奉旨以簡缺道員用。如直省道府簡缺。歸部銓。或外補。故事。京曹截取。皆以繁缺用。以簡缺用者。自鵬運始。鵬運徵尙蕭遠。書卷而外。嗜金石書畫。亦不爲意。必唯精罕詞。學生平悃款抑塞。一寄託乎是。其四印齋所刻詞。自南唐迄元如千家。著有半塘定稿。袖墨蟲秋味梨蠟知等集。

王祖畬

王祖畬。字歲三。號漱山。又號紫翔。江蘇鎮洋人。湛深經術。尤精宋儒理學。祖曾茂。道光壬午舉人。父敬瑛。諸生。母張氏。博極羣書。兼擅詩古文辭。著有三省屢牘稿。祖畬生而穎異。有神童之目。六歲辨四聲。十一通四子五經。暨周官儀禮。初學制義。卽規撫先正。不誦時人墨卷。喜古詩。嘗作九歌。有人生百年誰不死。不朽終爲奇男子句。長老咸奇之。年十九。補學官弟子。值太平軍之難。轉徙海門。授徒通州呂四場彭氏。課餘誦讀不輟。手鈔前後漢書。昭明文選。徐廣全集。全唐詩之精要者。三年。盈廿餘冊。研摩大朝文字。古今體詩一。時有江南才子之目。同治丑乙返里。專治張武承王學。質疑陳定齋明辨錄。李二曲四書反身錄。旋得陸清獻三魚堂集。昕夕讀之。翻然有悟。始留心濂洛關閩之學。翌年。釐於庠。癸酉。中第二名舉人。光緒癸未會試。成進士。殿試三甲。朝考一等。改庶吉士。主講宿遷海門崇明各書院。親炙者日益衆。時道喪文敝。祖畬慨然以振衰自任。錄明初至清先正文千三百篇。輯爲制義正宗。而作文要論。尤以揣摩風氣爲切戒。曰。揣摩者。迎合之謂也。士人進身之始。而已希圖迎合。後更何所不至。風俗人心。大有關係。有志者當力破之。其論四子曰。四子六經之階梯。漢唐註疏。導其先路也。宋五子。深入堂奧者也。未有通經而不本註疏。與通註疏而可舍宋五子者。其論周禮曰。周禮周公定天下之制。周之君子。取百職司所有之典。職集而載之。非一時一人之所成也。論周官曰。周官一書。謂不盡出之周公。則可。謂非周

公之書則不可。其論春秋曰：春秋正人心而已。無過求於人之心也。以後世斷律之心。爲聖人作經之心。於是論春秋也。刻而視聖人也。卑。聖人不惡而嚴。褒貶自在。詞氣之間。使後人微悟得之。卽弒君篡國。罪大惡極。而舊史之文。亦不輕爲改易。以爲據史而書。雖未必盡得其實。然猶有所據。若舍史而求諸傳聞。一有謬誤。誣己以欺萬世矣。又曰：聖人之道。見於論語一書。門弟子傳道者。莫如曾子。子曰：吾之於人也。誰毀誰譽。曾子告門人曰：夫子之道。忠恕而已矣。本是以釋經。而春秋之旨顯。其有亂臣賊子。與夫蠻夷猾夏。爲世大患者。不稍恕也。非爲一時爲萬世也。外此據事直書。而是非自見。褒貶之義。固不在一字一句之間。其論良知曰：孟子之所謂良知者。本愛敬以立言。所重者。行吾心之愛敬。故由其發見之微。以至於不可勝用。陽明之所謂良知者。離愛敬以爲言。所重者。致吾心之良知。故徒恃此知覺之靈。而終於無可持循。適足以成其好高自是。而開自私自利之途。不惟無益於一時之人心。實大壞乎萬世之學術矣。或問朱子怪漢晉諸儒分析易春秋之與經合者。附於儀禮下。其意何居。曰：讀易春秋與讀禮異。易爲開天明道之書。而春秋之旨尤微。非聖人不能作。亦非聖人不知分析。以附各文各年之下。苟存拘泥。則背大道一貫之意。若禮則大而冠昏喪祭。細至名物儀器。皆確有依據。非空空然可以理測者。況禮本漢儒掇拾而成。非他經所比。附於儀義經下。可使讀者開卷了然。蓋禮下學之事也。易春秋。上達之事也。二者不可一例論。學者下學而上達。故必習禮而後可以言春秋也。其持論之精闢。類如此。祖舍少乘母訓。學以居敬窮理爲本。說經貫通漢宋。無門戶之見。尤堪深春秋。以左氏浮夸。多不合聖人之旨。且其書晚出。多後人竄入之文。於是糾謬發僞。條列辨論。爲讀左質疑。存左氏之真。而莽散之竄入者。遂黑白昭然。不稍混淆。王辰散館。授山東嶧縣知縣。以親老。政選河南湯陰縣。多善政。湯邑東鄉大水。廬舍成澤國。哀民嗷嗷。祖舍自捐柴火。設粥廠。全活萬數千口。有傳馮二姓爭田。聚衆械鬥。死傷至十數。各送人犯五人。直認鬥殺不諱。祖舍異之。嗣知皆係頂冒。遂嚴緝正兇。釋二人去。暮客或止之。則洒然曰：願以一官救二命也。甲午。充河南癸巳恩科鄉試同考官。乙未。調署中牟縣事。未至。丁父憂。回里。遂不仕。以講學自娛。祖舍家故貧。爲諸生時。恆借書讀。既應江蘇書局

襄校聘，始稍稍致書籍。每讀一卷，輒丹黃評點，細書眉端。手校本凡三千餘卷。嘗曰：「一日不讀書，則七情六慾之足爲吾害。與凡境遇之足累吾心者，憧憧焉交戰於中，惟讀書則自然融化於無形，以故壯歲卽無書不覽，無學不窺。爲古文，不宗一家，不務富麗，而根柢經術，理法兼到。幾越夔川望溪，登韓柳之堂。詩從文選入手，長於古風。先後兩修州縣志。光緒初，分纂人物傳，末年重修，以總纂一手成稿。每類連綴爲文，略仿八書十志例。爲志乘之創格。民國戊午五月二十二日卒。年七十七。及門私諡曰文貞。己未正月，祀祀邑之陸陳江盛四先生祠。所著有儀禮經註校證四卷。禮記經註校證二卷。春秋經傳考釋三十卷。讀左質疑五卷。四書章句集註校語一卷。史記校證十二卷。漢書校正八卷。州志餘論一卷。自訂年譜一卷。所輯制義正宗四十卷。經籍舉要三卷。太倉州志稿十七卷。鎮洋縣志稿四卷。又讀孟隨筆、讀書雜記、通鑑校刊記、及文稿詩稿等。惟志稿年譜讀左質疑，已刊行於世。

林紆

林紆，字琴南，號畏廬，閩縣人。光緒八年舉人。少孤，事母至孝。幼嗜讀，家貧不能藏書，嘗得史漢殘本，窮日夕讀之。因悟文法，後遂以文名。壯渡海，遊臺灣，歸客杭州。主東城講舍，入京就五城學堂聘。復主國學。禮部侍郎郭曾焘以經濟特科薦，辭不應。生平任俠尚氣節，嫉惡嚴見。聞有不平，輒憤起。忠懇之誠，發於至性。念德宗以英主被扼，每述及，常不勝哀痛。十謁崇陵，匍伏流淚。逢歲祭，雖風雪勿爲阻。嘗蒙賜御書，真不絕俗類。感幸無極。誓死必表於墓。曰：「清處士，憂時傷事，一發之於詩文。爲文宗韓柳，少時務博覽。中年後，案頭唯有詩禮二疏。左史南華，及韓歐之文。此外則說文廣雅，無他書矣。其由博反約也如此。其論文主意，境識度氣勢神韻，而忌率襲庸怪。文必己出。嘗曰：「古文唯其理之獲，與道無悖者，則味之彌臻於無窮。若分畫秦漢唐宋，加以統系派別，爲此爲彼，使讀者炫惑莫知所從，則已格其途而左其趣。經生之文，往往流入於枯淡。史家之文，則又驟突恣肆，無復規檢。二者

均不足以明道。唯積理養氣。偶成一篇。類若不得已者。必意在言先。修其辭而峻其防。外質而中膏。聲希而趣永。則庶乎其近矣。紆所作務抑遏掩蔽。能伏其光氣。而其真終不可自闕。尤善敘悲音。吐悽梗。令人不忍卒讀。論者謂以血性爲文章。不關學問也。所傳譯歐西說部至百數十種。然紆故不習歐文。皆待人口達而筆述之。任氣好辨。自新文學興。有倡非孝之說者。奮筆與爭。雖脅以威。累歲不爲屈。尤善畫山水。渾厚冷南北於一爐。時皆寶之。紆講學不分門戶。嘗謂清代學術之盛。超越今古。義理考據。合而爲一。而精博過之。實於漢學宋學以外。別創清學一派。時有請立清學會者。紆撫掌稱善。力贊其成。甲子秋卒。年七十有三。門人私謚貞文先生。有畏廬文集。詩集。論文。論畫等。

辜鴻銘

辜鴻銘。字鴻銘。福建同安人。幼學於英國。爲博士。遍遊德法意奧諸邦。通其政藝。年三十始返。而求中國學術。窮四子五經之奧。兼涉羣籍。爽然曰。道在是矣。乃譯四子書。述春秋大義。及禮制諸書。西人見之。始歎中國學理之精。爭起傳譯。庚子拳亂。聯軍北犯。湯生以英文草草王篇。申大義。列強知中華以禮教立國。終不可侮。和議乃就。張子洞周禮皆奇其才。歷委辦釀約濬浦等事。旋爲外務部員外郎。晉郎中。擢左丞。湯生論學。以正體明道爲歸。嘗謂歐美主強權。務其外者也。中國主禮教。修其內者也。又謂近人欲以歐美政學變中國。是亂中國也。異日世界之爭。必烈。微中國禮教。不能弭此禍也。湯生好辨善罵世。國變後。悲憤尤甚。窮無所之。日人聘講東方文化。留東數年歸。卒年七十有二。

黃媛介

黃媛介。字皆令。楊世功妻也。先世有顯者。介性淑警。聞兄鼎讀書聲。欣然請學。多通文史。既許字世功。後有大力

者。黜其才。將奪之。介曰。食貧。吾命也。卒歸楊。惟誓親井。曰。閒作詩畫。臨小楷書法。筆意蕭遠。無兒女子態。世功讀書不成。遂勸之偕隱。國初隨世功避兵。播遷所至。有知者。時相餉遺。卜處士妻吳巖子。以詩名假館。留數月。爲文字交。嘗棲山陰梅市。與諸大家名姝靜女唱酬。有越遊詩。還家湖上。好事者傳其筆墨。一時士大夫錢尙書牧齋。吳祭酒梅村。皆稱異之。名日起。世功用是以布衣游公卿間。持書畫片紙。或易米數石。介既垂老。傷世功無家人產。以游爲生。詎勉同勞苦。歎曰。妾聞婦人之道。出必蔽面。言不出梱。得稍給饘粥。完穉弱婚嫁。吾守數椽沒齒矣。會石吏部有女知書。自京邸遺書幣。強致爲女師。舟抵天津。一子德麟溺死。明年。女本善。又夭。介遂無子。憑甚南歸。過仁寧。值修夫人賢而文。留養疴於僻園。半歲卒。遺詩千餘篇。嘗募人劖劂。自敘其家中落。生薑長茶。餓不食。邪滿之菜。倦不息。曲木之陰。夫既儉。我乾靈。不甘頑質。藉此班管。用寫幽懷。倘付諸蠹鼠。與腐草流電。一瞬消沈。殊爲恨恨。詞旨酸妍。讀者悲之。

歸莊

歸莊。字玄恭。號恆軒。崑山人。震川先生之曾孫也。少通五經。工法書。善墨竹。爲人嗜酒。豪放不羈。每試。必攜酒以入。一日。文成。雜正草隸篆書之。學使以爲怪。黜之。既而惜其才。復焉。乙酉六月。邑人殺署令。閉城拒守。莊豫其謀。俄城破。亡命。髮銚銚。而僧帽衲衣。往來湖海間。必負其先世遺像。遇諱日。令節。束芻以祭。後益縱酒狂歌。長篇短詠。揮灑淋漓。用以寄託無聊。而銷其飛揚碑吼之氣。得者奉爲拱璧。晚年。餓居僧舍。飯不足。則嚼糜。雜以菜蔬。謂人曰。齋鹽清麥稷。而今而後。不復問人世酸鹹矣。有恆軒集。山游詩。類皆激楚之音。其落花詩。自序略曰。落花之詠。昔解二家。自明以來。詩人倡和。動數十篇。然諸公皆處順境。推激風雅。鼓吹休明。雖遇衰殘之景。多作穠麗之詞。卽有感歎。不過風塵之況。憔悴之色而已。我生不辰。遭值多故。客非荆土。常動華實蔽野之思。身在江南。仍有大樹飄零之感。以至風木痛絕。花萼悲深。階下芝蘭。亦無遺種。一片初飛。有時踐履。千林如掃。無限傷懷。是以葦

寫風情。刻畫容態。雖前人詣極。嗣響爲難。至于情感所寄。亦非諸公所有云。蓋自傷其身世如此。

陳薛紹徽

薛紹徽。字男勳。號秀玉。福建人。孝廉陳壽彭妻也。生而穎異。五歲。隨兄姊讀。十歲。從母學詩。又喜畫事。既而父母相繼歿。寄居方姨家。時閩中盛行詩鐘。壽彭誦其句。喜而請委焉。光緒庚辰。歸壽彭。癸未。壽彭遊學日本。乙酉。遊英法。越四載而歸。中己丑副車。願自視所爲古文。弗逮紹徽遠甚。發書誦習。日夜不輟。而紹徽苦攻亦益力。故終莫能及也。未幾。遭家難。壽彭走四方。紹徽課兒治內。遠且不寐。卒以勞瘁得咯血症。丁酉。隨夫居滬。時侯官林訪西。南通范當世。見其文。輒謂敬畏不易及。而名乃益高。戊戌。壽彭入甬。主講西學。滬上士夫。欲聘紹徽講女學。辭不就。作德言容工四頌。並外國列女傳八卷。以見志焉。壬寅。試士。壽彭艱於資。不成行。乃自譯書。而紹徽賣畫。并合譯格致正軌十卷。八十日遊記四卷。刊行之。購者輻輳。得數川貲。舉於鄉。亡何。壽彭遊汴洛。紹徽歸閩。作課兒訓女詩三十首。復校正其嫂楚娟歷代宮闈詞綜。並選清代閨秀詞綜十卷以補之。甲辰秋。張謇求漁業海圖。舉壽彭至滬。海軍處監造。嗣奉周制軍覆檄。入粵。丁未。郵傳部復調入都。紹徽以萊婦官祿銖鉞之言諫。而壽彭適病痢。勢甚危。紹徽日禱神。願以身代。既而疾作。入冬喘益甚。閏六月卒。紹徽性端重。不苟言笑。於書無所不讀。工駢體文。精音律。善洞簫玉笛。詩則由晚唐上溯陰何沈謝。詞以清真爲主。又喜作畫。花草翎毛。初學南唐文徽。既自出新意。嘗變畫法爲刺繡。又變繡法爲繪畫。人不能辨焉。有潔癖。日必浴。房闈無纖塵。弗近婢婦童僕。事必躬親。布衣饘粥。蔬不兼味。病間。閱憚輯正始集。歎其闕然不備。欲作清代女文苑小傳。未及成而病歿。所著有黛韻樓文集二卷。詩集四卷。詞集四卷。及女文苑小傳百餘篇。隨筆雜記詩話等若干卷。

易順鼎

易順鼎。字仲碩。一字實父。湖北龍陽人。眉伽。哭庵。皆其別號也。父佩紳。累官江蘇布政使。順鼎生而奇慧。有神童之目。自謂張夢晉後身。又謂張船山張春水後身。年十五補諸生。作詩詞各一卷。刻之。曰眉心悔存稿。一時傳誦。人稱才子。十六。隨父貴東。道古州任所。中光緒丁丑舉人。應禮部試北上。取道江南。跨一衛。大雪入城。訪六朝前明遺蹟。一日中成金陵雜感七律二十首。嘗問業於王闈運。與湘鄉曾廣鈞並稱。會中日戰起。我軍敗績。順鼎慷慨上書輸事。又間關航海。走臺灣。欲賀劉永福軍。為海外扶餘。既至。見事已不可為。乃脫身歸國。年三十。以同知候補河南。終不得志。旋入廬山。築琴志樓三峽閣上。若將終身焉。而幽憂侘傺。中喪其母。乃作哭尸傳。以見意。曰。哭尸者。不知何許人也。其家世姓名。人人知之。故不述。哭尸幼奇惠。五歲陷賊中。賊自陝獨趨鄭襄。以黃衣繡葆縛之。馬背馳數千里。遇蒙古蕃王大軍。為騎將所獲。獻俘於王。哭尸操南音。王不能辨。乃自以右手第二指濡口沫。書王掌。王大喜曰。奇兒也。抱之坐膝上。趣召某縣令。使送歸。十五歲。為諸生。有名。十七歲。舉於鄉。所為詩歌文詞。天下見之。解曰才子。已而治經。為訓詁考據家言。治史。為文獻掌故家言。窮而思反於身心。又為理學語錄家言。然性好聲色。不得所欲。則移其好於山水方外。所治皆不能竟其業。年未三十而仕。官不卑。不二年棄去。築室萬山中。居之。又棄去。綜其生平二十餘年內。初為神童。為才子。繼為酒人。為游俠少年。為名士。為經生。為學人。為貴官。為隱士。忽東忽西。忽出忽處。其師與友。輒之稱為神龍。其操行亡定。若儒若墨。若夷若憲。莫能以一節稱之。為文章亦然。或古或今。或朴或華。莫能以一語繩之。要其輕天下。齊萬物。非堯舜湯武之心。則未嘗一日易也。哭尸平時謂天下無不可哭。然未嘗哭。雖其妻與子死不哭。及母歿而父在。不得渠殉。則以為天下皆無可哭。而獨不見其母為可哭。於是無一日不哭。誓以哭終其身。死而後已。自號曰哭尸。時張之洞總督兩湖。愛其才。招入幕。又昇以兩湖書院分教。亦不自得。二十五年冬。以大臣薦召見。順鼎意氣發舒。賦紀恩詩。出為廣西右江道。但卒無所展布。為兩廣總督岑春萱劾罷。由是益肆力於詩。所作近萬首。與樊增祥稱兩雄。惟增祥不喜用眼前習見故實。而順鼎則必用人人所知者。增祥詩境。到老不變。而順鼎則變動不居。學大小謝。學杜。學元白。學皮陸。

李賀盧仝。無所不學。無所不似。以學晚唐溫李者爲最佳。眉心室悔存稿以後。有丁戊行卷。摩圍閣詩。及出都吳蓬。樊山。沌水。蜀船。巴山。錦里。峨眉。青城。林屋。游梁。廬山。宣南。嶺南。甬東。諸詩錄之刻。蓋足迹所至。十數行省。每行省爲一集。以四魂集最所自意。號於人曰。余所刻四魂集。譽之者滿天下。毀之者亦滿天下。湘綺樊山皆極口毀之者也。然文章千古事。得失寸心知。余自信此集爲空前絕後。少二寡雙之作。蓋殿余者皆以好用巧對爲病。即張文襄亦屢言。不知以對屬爲工。乃詩之正宗。凡開國盛時之詩。無不講對屬者。如唐之初盛。宋之西崑。明之高劉。皆然。自作詩者不講對屬。而詩衰。詩衰而其世亦衰矣。杜詩亦講巧對。如子雲清自守。今日起爲官。及大司馬總戎貂之類。况余詩對仗皆用成語。且不專用僻典。而所用皆人人所知之典。又皆寓慷慨悲歌嬉笑怒罵於工巧渾成之中。自有詩家以來。要自余始獨開此派矣。然唐言真實。又不檢於行。頗工逢迎。有類飢鷹。飽即颺去。中年以往。日以詩詞寫其牢騷。民國更元。歲逢癸丑。新會梁啓超邀都人士於三月三日。仿蘭亭故事。修禊京師之萬生園。諸名士會而賦詩。順鼎長歌當哭。極詭譎之致。讀者哀其遇而奇其才也。及袁氏稱帝。以順鼎代理印鑄局長。志滿意得。作詩自寫其幸。帝制事敗。乃浮泊京師。以民國九年卒。年五十有九。

樊增祥

樊增祥。字嘉父。號雲門。別號樊山。湖北恩施人。父燮。官湖南永州協副將。增祥聰穎美姿容。以文章遊京師。會稽李慈銘亟稱其才。中光緒丁丑進士。出補陝西渭南縣知縣。累官陝西江寧布政使。詩尤有名。歡娛能工。不爲愁苦之詞。豔體之作。自謂可方駕冬郎。疑兩集不足道也。賦前後彩雲曲并序最工。其辭曰。傳彩雲者。蘇州名妓也。年十三。依姊居滬上。豔名噪一時。某學士銜恤歸。一見悅之。以重金置爲簾室。待年於外。祥琴始調。金屋斯啓。攜至都下。寵爲專房。學士持節使英。萬里鯨天。駕鸞並載。至英。六伽象服。儼然敵體。英故女主。年垂八十。雄長歐洲。尊無與並。彩出入椒庭。獨與抗禮。嘗偕英皇並坐照像。時輪榮之。學士代歸。從居京邸。與小奴阿福叢生一女。

學士逐福留彩。寢與疏隔。俄而文園消渴。竟促天年。彩故與他僕私。至是遂爲夫婦。居無何。蓄路盡。所歡亦殂。仍返滬爲賣笑計。改名曰賽金花。蘇人公檄逐之。轉至津門。雖年逾三十。而豔名不減曩昔。己亥長夏。與客談此事。因記以詩。先是學士未第時。爲人司書記。居煙臺。與妓愛珠有嚙臂盟。比再至。已魁天下。遽與珠絕。珠冤痛累日。竟不知所終。今學士已矣。若教鬼餒。燕子樓空。唱金縷者。出節度之家。過市門者。指狀元之第。得非霍小玉冥報。李十郎乎。余爲此曲。亦如元相所云。甚願知之者不爲。而爲之者不惑耳。姑蘇男子多美人。姑蘇女子如瓊英。水上桃花如性格。湖中秋藕比聰明。自從西子湖船住。女貞盡化垂楊樹。可憐宰相尙吳棉。何論紅紅兼素素。山塘女伴訪春申。名字偷來五色雲。樓上玉人吹玉管。波頭桃葉倚桃根。約略鴉鬢十三四。未遺金刀破瓜字。歌舞常先菊部頭。釵梳早入妝樓記。北門學士素衣人。蹙踏毬場訪玉真。直爲麗華輕故劍。况兼蘇小是鄉親。海棠聘後寒梅喜。侍中居外明詩禮。兩見龍岡墓草青。鴛鴦絃上春風起。畫鷁東乘海上潮。鳳凰城裏并吹簫。安排銀鹿娛遲暮。打疊金貂護早朝。深宮欲得皇華使。才地容齋最清異。夢入天驕帳殿遊。關氏含笑聽和議。博望仙槎萬里通。霓旌難得彩鸞同。詞賦環球知繡虎。釵鈿橫海照驚鴻。女君維亞喬松壽。夫人城闕花如繡。河上蛟龍盡外孫。虜中鸚鵡稱天后。使節西持婁奉章。錦車馮嫫亦傾城。晁旒七綉瞻繁露。盤敦雙龍贈寶星。雙成雅得君王意。出入椒庭整瓊佩。妃主青禽時往來。初三下九同遊戲。裝束潛將西俗嬌。語言總愛吳娃媚。侍食偏能饜海鮮。投書亦解繙英字。鳳紙縮來鏡殿寒。玻璃取影御床寬。誰知坤媪山河貌。祇與楊枝一例看。三年海外雙飛俊。還朝未幾相如病。香息常教韓壽聞。花枝每與秦官並。春光瀟灑柳條輕。郎主空嗔梁玉清。祇許丈夫驅便了。不教琴客別宜城。從此羅帳怨離索。雲藍小袖知誰託。紅閨何日放金雞。玉貌一春鎖銅雀。雲雨巫山枉見猜。楚襄無意近陽臺。擁衾總怨金龜婿。連臂猶歌赤鳳來。玉棺畫下新宮啓。轉壘玉郎長已矣。春風肯墜綠珠樓。香徑還思翠結水。一點奴星照玉壺。樵青婉孌漁漁笑。繡帷猶挂鬱金堂。飛去瓊梁雙燕子。那知薄命不猶人。御叔子南先後死。蓬巷難栽北里花。明珠忍換長安米。身是輕雲再出山。瓊枝又落平康里。綺羅叢裏脫青衣。翡翠巢邊夢朱邸。章

臺依舊柳琴琴操彈心未許參。杏子衫痕學宮樣。枇杷門榜換冰銜。吁嗟乎。情天從古多綠業。舊事煙臺那可說。微時管劇得恩憐。貴後萱芳都棄擲。怨曲爭傳紫玉釵。春遊未遇黃衫客。君既負人人負君。散灰局戶知何益。歌曲休歌金縷衣。買花休買馬塍枝。彩雲易散玻璃脆。此是香山悟道詩。所云某學士。爲吳縣洪鈞。光緒間。出使英俄德奧諸國。故增祥以洪容齋影之。後彩雲以庚子入京。會八國聯軍至。統師德國瓦德西。則彩雲隨鈞出使時私暱也。至是重續陸歡。侍瓦酋居儀鸞殿。止其淫掠。爲人所稱道。彩雲一日謂瓦曰。中國蒐羅人材。用入股試帖。將相於是出焉。瓦用其言。乃於金臺書院集諸生而試之。文題以不教民戰。詩題飛旆入秦中。瓦爲評定甲乙。懸榜如制。自此事出。人或大訐。以彩雲爲喪心辱國也。增祥乃著後彩雲曲以敘其事。其辭曰。納蘭昔御儀鸞殿。會以宰官三召見。畫棟珠簾鬻御香。金床玉几開宮扇。明年西幸萬人哀。桂觀蜚廉委劫灰。虜騎亂穿驛道走。漢宮重見柏梁災。白頭官監逢人說。庚子災年秋七月。六龍一去萬馬來。柏林舊帥稱魁傑。紅巾蟻附端郡王。撞殺德使董福祥。憤兵入城肆淫掠。董逃不獲池魚殃。瓦酋入據儀鸞座。鳳城十家九家破。武夫好色勝貪財。桂殿秋清少眠臥。闖道平康有麗人。能操德語工德文。狀元紫誥會相假。英后殊施并寫真。柏靈當日人爭看。依稀記得芙蓉面。隔越蓬山十二年。瓊華島畔邀相見。隔水疑通雲漢槎。催妝還用天山箭。彩雲此際泥秋箋。雲雨巫山何處尋。忽報將軍親折簡。自來花下問青禽。徐娘雖老猶風致。巧換西裝稱人意。百環螺髻滿簪花。全匹鮫綃長拂地。雅娘催下七香車。豹尾銀槍兩行侍。鈿車遙遵葦路來。鞞羅果踏金蓮至。歷亂宮帷飛野雞。荒唐御座擁狐狸。將軍攜手瑤階下。未上迷樓意已迷。罵賊還嗤毛惜惜。入宮自詡李師師。言和言戰紛紜久。亂殺平人及雜狗。彩雲一點菩提心。操縱夷獠在纖手。肘篋休探赤仄錢。操刀莫逼紅顏婦。始信傾城哲婦言。強於辯士儀秦口。後來虐婢如螻虺。此日能言賽鸚鵡。較量功罪相折除。僥倖他年免纒首。將軍七十虬髯白。四十秋娘盛釵澤。普法戰罷又今年。枕席行師老無力。女閭中有女登徒。笑捋虎鬚親虎額。不隨槃瓠臥花單。那得馴狐集金闕。誰知九廟神靈怒。夜半瑤台生紫霧。火馬飛馳過鳳樓。金蛇駭醮燔雞樹。此時錦帳雙鴛鴦。皓軀驚起無稱袴。小家女記入

抱時。夜度娘尋鑿壞處。撞破煙樓閃電窗。釜魚籠鳥求生路。一霎素灰楚炬空。依然別館離宮住。朝雲暮雨秋復春。坐見珠槃和譏成。一聞紅海班師詔。可有青樓惜別情。從此茫茫隔雲海。將軍頗有連波悔。君王神武不可欺。遙識軍中婦人在。有罪無功損國威。金符鐵券越銷燬。太息聯邦虎將才。終爲舊院蛾眉累。蛾眉終落教坊司。已是琵琶彈破時。白門淪落歸鄉里。綠草依稀具獄詞。世人有情多不義。明明禍水襄裳涉。玉堂鸚鵡銜羽儀。碧海鯨魚喪鱗甲。何限人間將相家。牆茨不掃傷門閥。樂府休歌楊柳枝。星家最忌桃花煞。今者株林一老婦。青裙來往春申浦。北門學士最關渠。西幸戴鞍亦及汝。古人詩貴遠事情。事有關遺須拾補。不然落網還紅花。白髮靡登何足數。嘉興沈會檀讀之。以爲的是香山。不祇梅村也。增祥詩思迅疾。案頭常積竹紙百餘頁。每有省記。下筆數行。不數月又易本矣。論詩以清新博麗爲主。工於隸事。巧於裁對。見人用眼前習見故實。曰此乳臭小兒耳。作詩萬首。而七律居其八九。次韻疊韻之作尤多。文綺麗稱其詩。入民國。爲退官詩人。寓都下。文酒過從。與周樹模少樸。左紹佐笏脚號楚中三老。每語人曰。向來詩家率墨守一先生之集。如學韓杜者必輕長慶。學黃陳者即屏西崑。講性靈者。則明以前之事不知。每選體者。則唐以後之書不讀。不知詩至能傳。無輪何家。必皆有獨到之處。少陵所謂轉益多師是我師也。人所處之境。有臺閣。有山林。有愉樂。有幽憤。古人千百家之作。濃淡平奇。供織華樸。莊諧斂肆。夷險巧拙。一一兼收並蓄。以待天地人物形形色色之相需相感。吾即因以付之。此即所謂八面受敵。人不足而我有餘也。所蓄既富。加以虛衷求益。旬煨季煉。而又行路多。更事多。見名人長德多。經歷世變多。合千百古人之詩。以成吾一家之詩。此則樊山詩法也。初取選於中晚唐。晚年亦爲宋詩。民國二十年三月十四日。卒於北平。年八十六。

王闈運

王闈運。字壬秋。又字壬父。湘潭人也。幼不慧。讀書日誦不及百言。又不能盡解。同塾者皆嗤之。師曰。學而囋於人。

是可羞也。嗟於人而不奮。無寧已。闍運聞而泣。由是益刻勵。所習者。不成誦不食。夕所誦者。不得解不寢。年十五。明訓故。十九補諸生。與武岡鄧輔輪鄧壽等結蘭陵詞社。號湘中五子。二十通章句。二十四而言禮。作儀禮演十二篇。二十八通春秋。其學蓋由禮始。考三代之制度。詳品物之體用。然後通春秋微言。張公羊。申何休。所謂今文家之學也。其時學者。承乾嘉餘緒。爲訓詁章句之學。文章法鄭玄。孔穎達。有解釋。無紀述。重考證。略輪辨。讀者未竟十行。輒隱几臥。闍運慨然曰。文者。聖之所託。禮之所寄。史賴之以信後世。人賴之以爲語言。詞不修。則意不達。意不達。則藝文廢。俗且反乎混沌。况乎章句所積。皆仰觀俯察之所得。字曰文。言其若在天之星象。在地之鳥獸蹏跡。必其煥著者也。今若此文之道。或幾乎息矣。故其爲文。悉本之詩。禮春秋。而朔莊列。探賈董。浮枝既削。古監自生。蕭散似魏晉間人。平湖張金鑪方督學湖南。科試錄遺才。得闍運卷。驚曰。此奇才也。他日必以文雄天下。急延見。稱勉之。且曰。湖嶽英靈。鬱久必發。其在子乎。中減豐癸丑舉人。應禮部試。入都。時肅順柄政。待以上賓。爲草封事上之。文宗歎賞焉。文宗崩。孝欽皇后驟用事。而闍運方客山東。得肅順書召。將入都。聞肅順誅。臨河而止。後數十年。老矣。爲人說肅順故事。淚涔涔下。曰。人詆逆臣。我自府主。走京師。陰以賈文所獲數千金。卹其家云。旋參兩江總督曾國藩軍。國藩闍運通家也。其初簡屏儀從。延納士人。重法以繩吏胥。嚴刑以殛奸宄。皆納闍運讖。與論文謂國藩之文。欲從韓愈以追西漢。逆而難。若自諸葛忠武曹武王以入東漢。則順而易。是時。天下大亂。將帥各開幕府。招致才俊。曾國藩尤稱好士。賤人或起家爲布政。闍運獨爲客。不受事。嘗往來軍中。後國藩益貴。賓客皆折節稱弟子。闍運仍爲客。嘗至江寧謁國藩。國藩未報。遣使招飲。闍運笑曰。相國以我爲餽。啜來乎。即攜裝乘小舟去。國藩追謝之。則已歸矣。撰湘軍志。文辭高健。爲唐後良史第一。驕將往往憚其筆伐。造作蜚語。謂得暮夜金。所纂乖故實。購毀其板。且欲得而甘心焉。更治羣經。出所學以開教授。謂文章之道。詞不追古。則意必循今。率意以言。違經益遠。是以文飾者。胥尙虛浮。馳騁者。奮其私知。故知文隨德異。寧獨政與聲通。欲驗流風。尤資總集。但蕭樓略選。僅存梗概。梅紀旁搜。未區門目。自餘摭摭。莫識津涯。蔽所稀聞。咻於衆楚。因輯八代文粹。廣甄往

籍類分仍夫蕭選。正副略仿李鈔。要以截斷衆流。歸之淳雅。并爲述其本由。使必應於經義。四川總督丁寶楨欽其學。延爲成都尊經書院院長。至之日。進諸生而告之曰。治經要道。於易。必先知易字含數義。不當虛衍卦名。於書。必先斷句讀於詩。必先知男女贈答之詞。不足以預學官。傳後世。一洗三陋。乃可言禮。禮明。然後治春秋。又曰。說經以識字爲貴。而非說文解字之爲貴。又曰。文不取裁於古。則亡法。文而畢摹乎古。則亡意。然欲取裁於古。當先漸漬乎古。先作論事理短篇。務使成章。取古文成作。處處臨摹。如仿書然。一字一句。必求其似。如此者。家信賧記。皆可摹古。然後稍記事。先取今事與古事類者。比而作之。再取今事與古事遠者。比而附之。終取今事爲古所無者。攻而文之。如是者。非十餘年不成也。人病欲速。乃教諸生讀十三經註疏。二十四史。及文選之法。諸生日有記。月有課。暇則習禮。若鄉飲投壺之類。三年皆彬彬進乎禮樂矣。厥後廖平治公羊穀梁春秋小戴記。戴光治書。胡從簡治禮。劉子雄岳森通諸經。皆有師法。能不爲阮氏經解所囿。號曰蜀學。既還。主長沙校經書院。移衡州船山書院。江西大學堂。弟子數千人。稱爲湘綺先生。湘綺者。閩運自署所居之樓也。初實未有樓。後於長沙定王故臺之旁。得三楹而居。樓甚廣。開窗卽見湘水接天。山巒起伏。蒼波無際。悠然景物。悉納戶牖。於是大樂。欣得其所也。曰。此真湘綺樓矣。夫人蔡氏名馭生。亦知書。能誦楚辭。先是。閩運之少也。謁於蔡氏。有女貞不字。閩簾見其丰裁獨秀。其父問語之曰。湘潭王生有文才。惜太貧耳。久之。女應曰。貧何害。故閩運得委禽焉。詩尤卓犖。一世各體皆高絕。七言雅健雄深。頗似大樞。顧集中所存。無七言近體。蓋晚年手訂全稿時刪去者。五言古。宗尙庾鮑。上窺建安。華藻麗密。詞氣蒼勁。自詫不作唐以後詩。蓋其沈酣於漢魏六朝者至深。性詭誕。牢落不偶。嘗以諧謔出之。至京師。恭王奕訢慕其名。造問政。閩運曰。國之治也。有人存焉。今少荃之洋務。佩衡之政事。人才可觀矣。何治之足圖哉。少荃者。直隸總督李鴻章。佩衡者。大學士寶鋆。一世所推偉人長德也。而閩運讓之。奕訢曰。是虞士之徒。爲大言者。宣統間。岑春煊撫湘。以閩運老儒。上所著書。賜翰林院檢討。鄉試重達。晉侍讀。革除後。袁世凱徵爲國史館館長。甫發。凡起劄而卒。年八十五。所著有周易說。尙書箋。尙書大傳補注。詩經補箋。禮經箋。小戴記箋。周官

等。春秋公羊箋。春秋例表。論語訓。湘軍志。注墨子莊子列子。正諸史藝文。纂春秋遺傳。門弟子輯其詩文箋啓爲湘綺樓集。凡若干卷。

朱祖謀

朱祖謀。原名孝臧。字古微。號滙尹。世居浙江歸安之埭溪。埭上疆山麓。自號上疆邨民。因題其集曰疆邨詞。少時隨宦河南。遇王鵬運。交甚得。鵬運之詞。取誼於周濟。取律於萬樹。然常語人曰。萬氏持律太嚴。弊失之拘。然使來者之有人。綜羣言於至當。俾倚聲一道。不致流爲句讀不緝之詩。則筆路開基。萬氏實爲初祖。祖謀分銖博究。上去陰陽。矢口平亭。不假檢本。鵬運憚焉。謂之律博士。祖謀以光緒九年二甲第一名進士。累官禮部侍郎。二十二年赴京師。鵬運官御史。舉詞社。邀祖謀。時時語以源流正變之故。使從南宋入手。明以後詞。不須寓目。如是三年。可以視今人詞矣。會義和團變起。八國聯軍入京。都人駭走。祖謀偕修撰劉福姚就鵬運以居。三人者。痛世運之凌夷。發憤叫呼。相對太息。既困守窮城。乃約爲詞課。拈題刻燭。囑于唱酬。一闋成。賞吝攻瑕。該諧間作。若忘其在顛沛兀艱中者。即所傳庚子秋詞也。鵬運投劾。之上海。講學於南洋公學。而祖謀亦以視學廣東南下。遇於上海。鵬運出示所爲詞九集。將都爲半塘定稿。祖謀詞。初學吳文英。晚又肆力蘇軾。辛棄疾二家。民國六年校刻唐五代宋金元詞總集四種。別集一百六十八家。名曰彊村叢書。蓋詞起晚唐。越三百餘年。而有南宋之刻百家詞。又四百餘年。爲明未造。而有常熟毛晉汲古閣之刻。又且三百年。而後有祖謀之校刻也。詞苑於是爲第三結集矣。況周頤見之。嘗語人曰。能循途守轍於三百首之中。必能取精用宏於三百首之外。益神明變化於詞外求之。則夫體格神致間。尙有無形之新合。自然之妙造。卽更進於渾成。要亦未爲止境。無止境之學。必有以端其始。莫如宋詞三百首。蓋甚推其書也。及所自爲。融諸家之長。聲情益臻樸茂。清剛雋上。並世詞家推領袖焉。詩亦入能品。旋卒於家。

藝術 金石書畫

釋道濟

釋道濟。失其族名。廣西梧州人。明靖藩裔也。性耿介。不肯俯仰入時。而嚶嚶然。磊磊落落。高視一切。時而岸岸然。踽踽涼涼。不屑不潔。拒人千里外。若將浼之者。弱冠。即工書法。善畫。工詩。南越人得其片紙尺幅。寶若照乘。然不輕以與人。有道之士。勿求可致。龔範兒雖賄百鎰。閉目掉頭。求其睨而一視不可得。以故君子則相愛。小人多惡之者。雖謗言盈耳。勿顧也。國亡。即薙染爲比丘。又名元濟。字石濤。號苦瓜。自號曰清湘老人。清湘陳人。清湘遺人大滌子。瞎尊者。或問曰。師雙眸炯炯。何自稱瞎。答曰。吾目自異。遇阿堵則盲然。不若世人了了。非瞎而何。乃徧游字內山川。瀟湘洞庭。匡廬鍾阜。天都太行。五岳四嶺。無不到。而畫益進。書益工。嘗曰。董北苑以江南真山水爲稿本。固知大塊自有其面目在。若書法之叙漏腳痕。不信然乎。其詩益豪。嘗與友人夜飲詩曰。憶昔相逢在黃檗。座中有爾談天舌。卽今頭白兩成翁。四顧無人冷似鐵。攜手大笑菊花叢。縱觀書畫江海空。燈光晷夜如白晝。酒氣直透兜率宮。主人本是再來人。每於醉裏見天真。客亦三千堂上客。莫風疎颯多精神。拈秃筆。向君笑。勿起舞。發大叫。大叫一聲。天宇寬。團團明月空中小。又爲友人寫春江圖。題曰。書畫非小道。世人形似耳。出筆混沌開。入拙聰明死。理盡法無盡。法盡理生矣。理法本無傳。古人不得已。吾寫此紙時。心入春江水。江花隨我開。江月隨我起。把卷坐江樓。高呼曰。子笑。一嘯水雲低。圖開幻神髓。早得記荊然。不喜搖塵尾。挖榔栗。呼喝人天。作善知識行徑云。

朱育

朱牟。自號八大山人。故明宗室。爲諸生。世居南昌。弱冠遭變。棄家遁奉新山中。薙髮爲僧。不數年。豎拂稱宗師。住山二十年。從學者嘗百餘人。臨川令聞其名。延之官舍。年餘。意忽忽不自得。遂發狂疾。忽大笑。忽痛哭。竟日一夕。裂其浮屠服焚之。走還會城。獨身徧伴市肆間。常戴布帽。曳長領袍。履穿踵決。拂袖翩跹行。市中兒隨觀譁笑。人莫識也。其姪某識之。留止其家久之。疾良已。山人工書法。行楷學大令魯公。能自成家。狂草頗怪偉。亦喜畫水墨芭蕉。怪石花竹。及蘆雁汀鷺。儵然無畫家町畦。人得之。爭藏弄以爲重。飲酒不能盡二升。然喜飲。貧士或市人屠沽。邀山人飲。輒往。往飲輒醉。醉後墨瀋淋漓。亦不甚愛惜。數往來城外僧舍。雜僧爭勸之索畫。至牽袂捩衿。山人不拒也。士友或餽遺之。亦不辭。然貴顯人欲以數金易一石不可得。或持綾絹至。直受之曰。吾以作糞材。以故貴顯人求山人書畫。乃反從貧士山僧屠沽兒購之。一日。忽大書啞字署其門。自是對人不交一言。然善笑。而喜飲益甚。或招之飲。則縮項撫掌。笑聲啞啞然。又喜爲藏鉤拇陣之戲。賭酒勝。則笑啞啞。數負則拳勝者背。笑愈啞啞。不可止。醉則往往欬歔泣下。山人題畫及他題跋。皆古雅閒。雜以幽澀語。不盡可解。山人面微禿。鬢下而少髭。初爲僧。號雪箇。後更號曰人屋。曰驢屋驢。曰書年。曰驢漢。最後號八大山人云。

傅山

傅山。初字青竹。尋改字青主。或別署曰公之它。亦曰石道人。又字喬廬。陽曲人。家世以學行師表晉中。六歲。啖黃精。不樂穀食。強之乃復飯。少讀書。上口數過。卽成誦。願任俠。見天下且喪亂。諸號爲薦紳先生者。多腐惡不足道。憤之。乃堅苦持氣節。不肯少與時婣要。提學袁繼威爲巡按張孫振所誣。孫振故奄黨也。山約其同學曹良直等。詣匭使三上書訟之。不得達。乃伏闕陳情。時撫軍吳姓亦直袁。竟得雪。孫振怒。大索山。山敝衣糧糶。走匿山谷間。以是名聞天下。馬世奇爲作傳。以爲裴瑜魏劭復出。已而曹任在兵科。貽之書曰。諫官當言天下第一等事。以不負故人之期。曹瞿然。卽疏劾首輔宣與及賂錦衣養性。直聲大振。山少長晉中。得其山川雄深之氣。思以濟世自

見而不屑爲空言。於是蔡忠襄撫晉時，寇已亟，講學於三立書院，亦及軍政軍器之屬。山往聽之，曰：迂哉蔡公之言，非可以起而行者也。甲申，夢天帝賜之黃冠，乃衣朱衣，居土穴以養母。次年，袁繼咸自九江羈於燕邸，以難中詩貽山曰：晉士惟門下知我最深，蓋棺不遠，斷不敢負知己。使異日羞稱友生也。山得書慟哭曰：公平，我亦安敢負公哉。甲午，以連染遭刑戮，抗詞不屈，絕粒九日，幾死。門人有以奇計救之者，得免。然山深自咤恨，以爲不如速死之爲愈。而其仰視天，俛畫地者，竝未嘗一日止。凡如是者二十年。天下大定，自是始以黃冠自放，稍稍出土穴與客接。然聞有問學者，則告之曰：老夫學莊列者也。於此間諸仁義事實，蓋道之，即強言之，亦不工。又雅不喜歐公以後之文，曰：是所謂江南之文也。平定張際者，亦遺民也，以不謹得疾死。山撫其尸哭之曰：今世之醇酒婦人，以求必死者，有幾人哉。嗚呼張生，是與沙場之痛等也。又自歎曰：變強躍駭之骨，而以估畢朽之，是時埋吾血千年而碧不可滅者矣。或強以宋諸儒之學問，則曰：必不得已。吾取同甫工書，自大小篆隸以下無不精，兼工畫。嘗自論其書曰：弱冠學唐晉人楷法，皆不能肖，及得松雪香山墨蹟，愛其真轉流麗，稍臨之，則遂亂真矣。已而乃媿之曰：是如學正人君子者，每覺其觚稜難近，降與匪人遊，不覺其日親者。松雪曷嘗不學右軍，而結果淺俗。至類駒王之無骨，心術壞而手隨之也。於是復學顏太師，因語人學書之法，寧拙無巧，寧醜毋媚，寧支離毋輕滑，寧真率毋安排。既絕世事，家傳故有禁方，遂精其術，而不拘拘於叔和丹溪之言。踵門求醫者，戶常滿。貴賤一以視之。其子曰眉，字壽髦，能養志，每日樵於山中，置書擔上，休擔則取書讀之。中州有吏部郎者，故名士，訪山，既見，問曰：郎君安往。山答曰：少需之，且至矣。俄而有負薪而歸者，呼曰：孺子來前，肅客。吏部頗驚，抵暮，令伴客寢，則與絃中州之文獻，滔滔不置。吏部或不能盡答也。詰朝，謝山曰：吾甚慚於郎君。山故喜苦酒，自稱老藥禪，眉乃自稱曰小藥禪。或出遊，眉與子共輓車，暮宿逆旅，仍篝燈課讀經史，騷選諸書，詰旦必成誦始行。否則予杖。故其家學，大河以北，莫能窺其藩者。嘗批歐公集古錄曰：吾今乃知此老真不讀書也。戊午，有大科之命，給事中李宗孔劉沛先以山薦。時山年七十有四，而眉以病先卒。固辭，有司不可。山稱疾，有司乃令役夫舁其牀以行。二孫侍，既至京

師三十里以死拒不入城。於是公卿畢至。山臥牀不具迎送禮。乃以其老病上聞。詔免試。許放還山。時徵士中報罷。而年老者恩賜以官。特加中書舍人以寵之。或輒以強入一謝。山不可。遂稱疾篤。乃使人舁以入。望見午門。淚涔涔下。強掖之使謝。則仆於地。次日遽歸。大學士以下皆出城送之。山歎曰。自今以還。其脫然無累哉。既而又曰。使後世或妄以劉因輩竄我。且死不瞑目矣。聞者咋舌。及卒。以朱衣黃冠殮。著述之僅傳者。曰霜紅龜集十二卷。眉之詩亦附焉。山嘗走平定山中。爲人視疾。失足墮崩崖。僕夫驚哭曰。死矣。山旁皇四顧。見有風峪甚深。中通天光。一百二十六石柱林立。則高齋所書佛經也。摩挲視之。終日而出。欣然忘食。蓋其嗜奇如此。顧亭林嘗稱之曰。蕭然物外。自得天機。

僧漸江

漸江。俗姓江。名韜。字六奇。歛之寒江村人。晚年定名弘仁。爲前明諸生。少孤貧。性獯僻。以鉛槧養母。一日負米行三十里。不逮期。欲赴練江死。母歿後。不婚不宦。游幔亭。依飯報親。甲申以來。遇古航禪師。遂祝髮爲僧。自言近溯淨溪。始知二十四源孕奇於此。沿口以進。寥廓無量。兩山轄雲。礪穿其腹。老梅萬樹。倒影橫崖。糾結石罅。寒漱潭脫。根將化石。當春夏氣交。人間花事已盡。至此則香雪盈壑。沁入肺腑。流蕚巾幘。羅浮仇池。並爲天地。因念單道開辟穀羅浮。曉起淮掬泉注鉢。吞白石子數枚。淡無所爲。心嚮慕之。荒壇斷碣之隙。將鬪香茆。老是鄉而解蛻焉。後返新安。數游黃山。往來雲谷。慈光閣。嘗嘆武夷之勝。勝在方舟派游。而黃山之奇。海市蜃樓。幻於陸地。殆反過之。居十餘年。挂瓢曳杖。憩無恆榻。每尋幽勝。則挾湯口。髯叟負硯以行。或長日靜坐空潭。或月夜孤嘯危岫。倦歸則鍵關畫衲。欹枕苦吟。或數日不出山。衲蹤跡其處。環乞書畫。多攢眉不應。頃忽滌硯吮筆。淋漓漫與。可數十紙。不厭也。蓋谷僧嘗爲其祖益師讀書塢銘。師爲踞石運思。筆致適逸。得晉魏風味。傳之藝林。以爲海嶽書龍井方圓庵記。今再見也。臨文搢義。灑汗填典。滄倬嚴氣。雅自矜懷。不輕示人。唯盡禪一門。稍匿研討。遂爾稱尊作祖。江

表土流。獲其一縑一篋。重於球璧。磅礪之餘。閒有吟弄。小詩極妍風味。皆隨乞散佚。不經意聚。又嘗遍徵好事。沿幘索題。旋轉手抄得若干首。目曰畫偈。邑子許芳城楚序之。謂爲畫公七賦。未窺全豹。秘演弘編。止啖一櫛。於以緬想風流。挹茲襟抱。亦前哲高蹤。墨池筆冢之雪泥鴻爪也。若僅爲蔬事家現身說法。爭俎豆於騷壇畫史間。非漸師意矣。然所作畫。層巒陡壑。偉峻沈厚。以北宋風骨。蔚元人氣韻。清逸蕭散。意在方壺子華之閒。王阮亭稱新安畫家。宗尙倪黃。以漸師開其先路。斯言良信。歲壬寅冬。至自郡。將游廬山。友人王雄右自芝山移書。爲襄鶴羅。余子敬給健力。爲負鉉鉢經卷。吳聖卿爲贈筇竹一枝。以馭奇險。復解羊裘。爲溫破衲。於是飽飮星霜。遍參尊宿。少文游足。振錫言歸。滅景林舉。證尋初地。舊侶雅贈。已臻十供。故其清玩有宋槩漢書。雲林書畫卷。黃鶴山樵挂幅。傳化祖欄帖。古玩斂硯。梅花瓊瓢。牛角竹杖。擊子銅爐。古瓷磬洗。定州麗根瓶。陽發匏壺諸品。貴既異夫珠璣。業自歸於泉石。是誠對揚古德。足企前修者已。既而還自廬山。道過豐溪。吳不炎兄弟留憩旬日。泊同其叔氏驚遽。偕與放筏西干。攜先世所藏右軍遼汝帖真感。及宋元逸品書畫凡數十種。其猶子允凝。呼舟黃酒。就蔭石淙。淪茗焚香。縱觀移日。程蝕庵守亦從南岸鼓棹而至。評賞之餘。佐以雄飲。不炎命小史度曲。允凝索長笛和之。一時谿山翰墨。輻輳勝緣。絲竹清音。咸臻妙麗。少焉夕陽告往。黃嶽弄雲。光怪陸離。搖曳萬狀。師解衣繫礪。捉紙布圖。允凝就其皋坂。暢厥煙嶽。虛中流一舟以待。芳城寫巒洞野泛之致。豈非極嘉會之尙羊。罄友徒之同趣耶。居未數月。師將省墓界口。並詣鳩茲。別湯燕生。然後入山研究性命之學。皆不獲如願。以無疾終。易簧之夕。尋囊時游匡廬。脫破芒鞋。若將有遠行者。乃擲帽大呼我佛如來觀世音。竟示寂於五明禪院。院在郡西披雲峯前。十寺一峪。唯五明寺孤踞巖阿。下瞰羣壑。有泉出其左。昔題石淙二字摩崖。卽西干路也。初普門和尚自五臺來新安。未入黃山。卽休憩此寺。師旣歸道山。仙源湯巖夫燕生諫師松下。會同郡縑素之交契者。相與躬負鑿錘。疏林剝柯。漉泥薙草。藏厥蛻於五明之西巖。累峯石而塔之。前祠部王蘆人泰徵爲銘。蝕庵書之於塋門。許芳城撰漸師歸塋文。蔣梅花數十本。以大招之。從師志也。故世稱爲梅花古衲云。

方大猷

方大猷字歐虞號瞻藍浙江烏程人明崇禎十年進士官直隸井陘道福王時以大猷會降附流賊李自成定入從賊案本朝順治元年五月投誠授監軍副使隨侍郎王鼐永招撫山東七月擢山東巡撫疏請頒詔崇祀孔子定闕里儀章典制得旨先師爲萬世道統之宗禮當崇祀昭朝廷重道尊師至意下部詳議舉行大猷復請以無業荒地分給流民及守兵屯種三年後起科開墾長清諸處鑄錢充餉行保甲以弭盜減鹽課以卹商皆議行又疏薦明庶吉士張端主事李森先等得旨錄用時充沂間土賊嘯聚大猷遣兵剿撫屢奏績二年二月給事中韓源劾奏山東吏治弊壞擒獲盜輒賄脫大猷擅逐長山知縣張廷鈺不入告輒以州判梁起積代縱其貪婪詔大猷回奏大猷言土賊就撫法有寬宥非關賄脫梁起積貪婪無據張廷鈺由巡撫朱朗鑠議罷不入告咎在朗鑠於是韓源復劾其欺飾朗鑠亦劾大猷擅逐廷鈺有牒可據所奏誣罔事下登萊巡撫陳錦巡按李之奇查核大猷坐謬罔部議革職得旨從寬降調六月授密雲兵備道初長清土賊李明尹三清就撫既而二人械鬪訟縣大猷時爲巡撫令斬之以既降復叛入奏上覽奏未有叛據且不應先斬後奏命陳錦覆勘得實大猷已之道任奉諭嚴責回奏大猷謂李明等不殺終叛急誅之以除後患其時尚未定重辟奏請上裁之例故遽行擒斬乞賜原宥上大猷既經降調免議九月以總漕楊方與薦調河南管河道時汴梁決口未塞小宋口曹家寨流通集諸處先後衝決大猷初仕明嘗爲管河道方與謂其練習河務故薦之七年八月河決荆龍口大猷議以來春鳩工於上流築長隄緩遏其勢乃築小長隄於決口請帑十萬兩有奇期以半年蒞事八年二月部推江南按察使方與奏留之命以按察使銜仍管河務尋以荆龍決口逾期未塞劾留任十年河決大王廟給事中周體觀林起龍等交章劾大猷耗帑誤工狀方與爲剖辯得免議十三年總督李蔭祖疏劾大猷曰決河以殃民者河伯也治河以奠民者河道也今百姓不怨河伯而怨河道由大猷奇貪極狡廢削之術既工錙銖之利必盡慾壑難填民

膏已竭。因臚列其科斂婪取數十款。得旨鞠治。詔革職。下撫按逮訊。得實。計贓論絞。越四年。死於獄。大猷工畫。其山水多濕筆。嘗畫河灘小景。題曰十二戴河干。尤工書善詩。河南考城最多其蹟。

陳洪綬

陳洪綬。字章侯。號老蓮。浙江諸暨人。工詩善畫。與萊陽崔子忠齊名。號南陳北崔。年四歲。就塾婦翁家。畫漢前將軍關侯像於壁上。長十尺餘。翁見之。大驚下拜。既長。師事劉宗周。講性命之學。崇禎末。入貲爲國子生。尋歸里。既遭亂。混迹浮屠。縱酒自放。醉後慟哭不已。有求畫者。靳不與。及酒間召妓。卽自索筆墨。小夫穉子無弗應也。嘗與友期飲西湖。遇他舟。徑登其席。主人知爲洪綬。亟稱其畫。大駭竟去。其繪事本天縱。畫人物。軀幹偉岸。衣紋清圓細勁。兼有公麟子昂之妙。其力量氣局。超拔磊落。在仇唐之上。詩有逸致。爲畫所掩。朱彝尊王士禛皆賞之。嘗與毛奇齡約某時蕭山相訪。以年暮畏死。先期至。晚亦稱老遲。又稱悔遲。又稱弗遲。著有寶綸堂集。

鄧石如

鄧石如。本名琰。避帝諱。遂以字行。而更字曰頑伯。安徽懷寧集賢關人也。集賢關當皖公山下。故又號完白山人。少產僻鄉。屢所聞見。獨好刻石。仿漢人印篆甚工。弱冠。孤露。卽以刻石遊士大夫間。性廉介。落落無所合。七八年。轉至壽州。時巴東知縣梁燾主講壽春書院。巴東以工李邕書名天下。石如爲院中諸生刻印。又以小篆書諸生簞。巴東見之。曰。筆勢渾鷲。余所不能。惜未諳古法耳。因爲石如治裝。致之江寧。舉人梅鏐。鏐爲文穆公季子。文穆雖貧宦。然梅氏自北宋爲江左甲族。聞人十數。事藏至富。文穆又受聖祖殊遇。得祕府異珍尤多。蓋秦漢以來金石善本備在焉。石如旣至。舉人以巴東故。爲石如盡出所藏。復爲具衣食楮墨之費。石如旣得縱觀。益推索其意。迺好石鼓文。李斯嶧山碑。太山刻石。漢開母石闕。燉煌太守碑。蘇建國山及皇象天發神識碑。李陽冰城隍廟碑。

三墳記。臨摹各百本。又苦篆體不備。手寫說文解字二十本。復旁搜三代鐘鼎。及秦漢瓦當碑額。以縱其勢。博其趣。日味爽起。研墨盈盤。至夜分盡墨。乃就寢。寒暑不輟。五年篆書成。乃學漢分。臨史晨前後碑。華山碑。白石神君張遷潘校官孔羨受禪大饗各五十本。三年分書成。故其篆法以二李爲宗。而縱橫闢闢之妙。則得之史籀。稍參隸意。殺鋒。以取勁折。字體微方。與秦漢當額文爲近。其分書。則道麗淳質。變化不可方物。結體極嚴整。而渾融無迹。蓋約嶧山國山之法而爲之。石如自謂篆未及陽冰。而分不減梁鵠云。又移篆分以作今隸。與瘞鶴銘梁侍中石闕同法。草書雖縱逸不入晉人。而筆致蘊藉。其作書懸腕雙鉤。管隨指轉。與時法大殊。客梅氏八年。學大成。乃草履擔簦。徧遊各山水。以書刻自給。遊黃山至歙。鬻篆於賈肆。適武進張惠言教授金榜家。見石如書詩語榜曰。今日得見上蔡真跡矣。驚問語以故。遂冒雨偕詣石如於市側荒寺。即備禮客石如。金氏家廟甚莊麗。楹皆貞石刻。聯及懸額。皆榜寫作。百易而後定。自謂莫能加於此也。及見石如書。卽鳩匠斲其額。而石楹旣豎。不便磨治。架屋而臥楹。請石如書之。刻成。乃重建。其傾服至此。榜遂從石如受篆法。一年。稱之於曹文敏公。文敏請石如作四體千文橫卷。字大徑寸。一日而成。文敏嘆絕。具白金五百爲石如壽。乾隆庚戌秋。高宗八旬壽節。文敏以六月入都。強石如同行。石如獨戴草笠。鞞芒鞋。策驢。後文敏三日行。文敏輿從。以山東發水轉後。與石如相值於開山。時巡撫以下命吏。郊迎文敏。石如策驢過轅門。門者呵止之。文敏坐堂上。遙見之。趨出延入。讓上座。徧贊諸公曰。此江南高士鄧先生也。其四體書。皆第一。諸公乃大驚。爲具車從。文敏曰。吾屈先生甚。乃肯來都。卒不肯同行。願諸公共成先生之志。遂率諸公送石如至轅門。上驢去。乃入就坐。時都中工書者。推相國劉文清公。而鑒別則推左副都御史陸錫熊。石如至都。見其書大驚。踵門求識面。皆曰。千數百年無此作矣。石如遂留都中。未幾。文清左遷。而副憲以憂暴卒。都中作篆分者。皆宗內閣學士翁方綱。閣學以石如不至其門。力詆石如。耳食者共和其說。石如頓蹟出都。文敏爲治裝。致之於兵部尚書兩湖總督畢沅。畢沅尙書以鑒賞名家。然於此事實疎。不能知石如。而深服其高致。時吳中知名士多集節署。裘馬都麗。石如獨布衣徒步。居三年辭歸。尙書留之不可。乃爲石如置

田宅爲終老計。而觴石如之行。曰石如吾幕府一服清涼散也。今行矣。甚爲減色。四坐歎沮。後文敏病篤。語其長子曰。吾即逝。鄧君必有輓聯至。汝即以勒吾墓華表。及專祠前極足矣。石如年四十六。乃娶于某。不數年沒。繼娶于某。然石如遊興不衰。常往來江淮間。鬻書以給旅費。九年歸里。不復出。十年十月卒於家。年六十有三。時包慎伯錢十蘭錢伯垌李申耆皆負重名。無不推石如書爲神品云。

張照

張照。字得天。號涇南。江蘇婁縣人。康熙四十八年進士。改庶吉士。五十一年散館。授檢討。五十四年入直南書房。雍正元年五月。遷贊善。六月。遷侍講。七月。轉侍讀。九月。遷右庶子。十月。充福建鄉試副考官。二年。轉左庶子。三年二月。遷侍講學士。四月。充日講起居注官。疏言聖諭廣訓一書。請令學政轉頒各州縣學。俾童蒙誦讀。府縣考覆試時。背錄一條。方准錄取。奉旨允行。四年四月。充雲南鄉試正考官。八年二月。遷少詹事。九年七月。擢內閣學士。十年七月。奏言。臣祖俱曾以田千畝爲義田贍族。未經奏明立案。既爲公產。轉恐爭競。請官爲存案。載入縣誌。不得擅賣擅買。違者雖臣子孫亦以盜賣官田論。疏入。上允所請。立冊存案。並敕部旌獎。以彰義舉。尋議贈淇如其子原任吏部侍郎等官。十二月。擢刑部左侍郎。仍兼內閣學士。尋署順天府府尹。十一年四月。授左都御史。暫署刑部尙書。兼管順天府府尹。七月。奏請更定律例。一夫毆妻至死。審無故殺別情。如無承祀之人。准留承祀。柳賈完結。一竊盜三犯。通計贓五十兩以下。罪止滿杖者。從重擬遣。五十兩以上。罪止徒者。擬絞監候。一承審官重刑疊夾。致斃笞杖人犯二命以上。徒流人犯四命以上者。以故勘論。擬斬監候。一斬絞人犯在獄。如強橫不法。及犯賭博等事。照原擬即行正法。提牢官議處。禁卒責懲。一支囚糧每石刷價銀五分。以贓罰銀給發。後戶部查核。一刑部現審左右二司郎中員外主事缺出。揀選調補。遺缺歸銓。下部議行。十二月。授刑部尙書。以預修大清會典。書成。議敘加一級。十三年正月。充皇清文穎館副總裁。五月。貴州九股生苗不法。揚威將軍哈元生。副將軍董芳

分劃。上命照爲撫定苗疆大臣。照抵黔倡分地分兵之議。因施秉爲適中地。遂以其上爲上游。用滇黔兵。專屬哈元生。以其下爲下游。用楚粵兵。專屬董芳。於是進剿之兵。紛紜撤換。哈元生董芳。欲將村莊道路。盡劃上下界。文移辯論。日久無功。八月。高宗卽位。尋命來京。以湖廣總督張廣泗往代。諭曰。張照辦理苗疆事務。本係自請前往。乃到黔以來。挾詐懷私。擾亂軍務。罪過多端。伊到京時。著總理事務王大臣會同刑部審擬具奏。張廣泗劾照立意阻撓。與元生互相攻訐。置應辦之事不理。致大兵雲集數月。毫無成功。命革職拿問。乾隆元年九月。廷議依律擬斬。上諭從寬免死。尋命在武英殿修書處行走。二年二月。授內閣學士。入直南書房。十二月。充經筵講官。五年五月。授刑部右侍郎。十月轉左。十二月奏言。律例刊校頒行。尙須一年。各省未發新書。擬罪必遵舊例。請於舊例輕而新改重者。仍待奉到日遵行。不必駁改。舊重新輕者。刑部卽引新書改正。使一年之內。薄海內外。早被恩光。特旨允行。六年十一月。上以朝會樂章句讀。與樂音不相比合。敕莊親王同照查明律呂正義源委。又壇廟樂章。恐不合律。併查奏。尋合疏言。律呂正義一書。編摩未備。請重修律呂正義後編。與前書並垂萬世。壇廟朝廷樂章。應遵聖訓。將新舊所定。並宋朱子六經圖及明朱載堉樂書式。考定宮商字譜。備載於篇。使律呂克諧。尋考易曉。其民間俗樂。亦宜一體釐正。下部議行。七年二月。疏言軍流遣犯。例應僉妻如子孫願隨往者聽。並不在應遣之列。向來旗人由旗咨部文內。註明隨往字樣。至民人刑部據文轉咨。多不註明。至配一例羈管。本犯身故。隨往子孫。不得援奉恩例。請嗣後該管衙門僉遣時。卽於文內註明隨往字樣。以免濫行羈管。本犯身故。妻子願歸。給照回旗回籍。仍報部存案。又遣犯在配。本身既不許他往。子孫又一例羈管。因頓飢寒。情殊可憫。請嗣後遣犯在配所生子孫。該犯在日。如有附近謀生者。准呈明給限前往。逾限不追查究。在配所生子女。或許嫁他處。或寄養於人。悉聽自便。又各邊鎮賞旗爲奴人犯。在籍子孫。本非例應僉遣。如往遣所省視。情殷依戀。或窮途艱苦。不能卽歸旗主。藉其力作。歲月寢久。並沒爲奴。甚屬冤抑。請嗣後到配省視者。赴該管衙門報名存案。回籍日。卽給印票放行。如旗主刁留計陷。照律治罪。部議從之。四月。擢刑部尙書。五月。管理樂部。先是。雍正五年。八旗佐領等有措

扣兵丁錢糧印子錢者。世宗諭禁。定枷責。追利入官之條。雍正十三年。都統李禧。請旗民一體嚴禁。借債人自負。免罪並免償。放債人治罪。仍追利入官。民間爭首告冀免。至是照疏言。八旗佐領等官。盤剝該管兵丁。放印子錢者。仍遵例擬追外。如止重利放債。悉依違禁取利本律治罪。禧所奏自首免償例。已經律例館刪除。不准引用。部議從之。十月中。允于振請釐定文廟樂章。上命照撰擬進呈。頒發曲阜及各省學宮。八年十月諭曰。朕登極詔內。四品以上官。例得恩廕。刑部尚書張照。因彼時緣事未與。今特加恩補行。給與恩廕。十年正月。照奔喪。行至江南。徐州卒。漕運總督顧琮。以聞。詔加太子太保吏部尚書。諡曰文敏。照才品優長。兼諳法律。學問充裕。詞藻清新。尤工書法。得米之雄健。有董之峻整。極爲高宗所重。四十四年。御製懷舊詩。列於五詞臣中。

董邦達

董邦達。號東山。浙江富陽人。雍正元年拔貢。經刑部尚書勵廷儀保舉。命在戶部七品小京官上行。七年。鄉試中式。十一年進士。改庶吉士。散館。授編修。乾隆三年六月。充陝西鄉試正考官。九月。奏言。陝西官卷額中六名。今科卷數少。祇遴中四名。餘二名於民卷補中。不敢濫取。官生足額。疏入報聞。九年六月。充日講起居注官。尋授右中允。十二月。遷侍講。十年。遷侍讀學士。十一年。以與修明史綱目告成。議敘紀錄三次。十二年正月。命南書房行走。七月。擢內閣學士。九月。皇清文穎告成。議敘紀錄三次。十月。丁母憂。明年諭曰。內閣學士董邦達。丁憂回籍。將逾一年。著照從前尚書梁詩正之例。來京在內廷行走。給與俸祿。服闋時。遇缺補用。十五年。補原官。十六年三月。充會試副考官。十二月。遷戶部右侍郎。十八年六月。充江西鄉試正考官。九月。調工部右侍郎。十九年九月。充武會試正考官。十二月。以失察寶源局匠役竊銅。奉旨降三級。從寬留任。二十二年九月。調吏部右侍郎。十月。充經筵講官。二十五年。充武會試正考官。二十六年。遣祭中嶽嵩山及太昊伏羲氏諸陵。二十七年。遷都察院左都御史。十二月。晉工部尚書。二十九年。調禮部尚書。三十一年正月。復調工部尚書。三十二年。仍調禮部尚書。三十三

年。因工部任內。誤准浙江製造步兵鳥槍。降一級留任。三十四年五月。以老病奏請解任。得旨。董邦達年逾七旬。衰病乞休。自合引年之例。但伊挈家久居京師。既不能遽回本籍。且禮部事務。本不甚繁。准其給假數月。俾得安心調攝。不必解任。七月卒。諡文恪。邦達工繪事。取法元人。善用枯筆。饒有逸致。所作山水。尤磅礴盤鬱。特開生面。御製詩題詠甚多。嘉慶十二年。以子誥纂高宗純皇帝實錄告成。推恩入祀賢良祠。

鄒一桂

鄒一桂。字原襄。號小山。江南無錫人。雍正五年進士。改庶吉士。散館。授編修。十九年。充廣西鄉試副考官。尋授雲南道監察御史。十二月疏言。民間嫁娶及契買奴婢。不用官媒。惟戶婚詞訟。或入官發賣之人始用之。然亦止令書名畫押。近不法之徒。私養婦女。覓主局姦吞騙。無所不爲。請敕步軍統領順天府五城各衙門。訪拏嚴禁。並定地方官失察處分。下部議行。十三年。提督貴州學政。乾隆三年。奉旨留任。四年疏言。黔省模苗錯處。雍正三年。前學臣王奕仁奏准歲科兩考。於定額外。加進苗童一名。卷面填寫新童字樣。查歸化已經百年之苗。俗尙文風。與漢無二。請准入漢童內應試。其歸化未久者。照例歸入新童。六年疏言。歲科考一二等生員。例得幫增補廩。黔省歲案幫補。以行文科考日爲止。與各省同。科案幫補。則於鄉試前科冊解部日即停。是歲案得缺倍多。科案得缺至少。請改於下屆行文科考日停止。以昭平允。部議均從之。七年疏言。刑部向例秋審結案者。歸北監。現審未結者。歸南所。司獄禁卒。例不更換。益以結案之犯。恩旨於每月初二十六兩日。許家屬入視。家人在監者。每日准出入買辦。而未結之犯。案情未定。概不許人出入。以杜傳信。今臣查視南所北監。已未結雜收。不無滋弊。請敕部分禁。於收禁時。立權開明。已結未結人犯字樣。庶易稽查。得旨。照所請行。是年遷禮科給事中。八年七月疏言。近見奉旨發議之事。科道於部議未上之先。撓越瀆陳。徒滋繁擾。應請申飭。諭曰。科道職司言路。凡有見聞。自應陳奏。但如鄒一桂所奏。撓越瀆陳。則大不可。嗣後遇有交部議事件。如科道不待部覆。參差具奏者。該部於議覆

本內將伊等意見參差之處。聲明請旨。九月疏言。樂舞生向來多弊。是以定例。令州縣官會同教官選補。文童取隣族結冊。送學政查核。現經禮部覆准。河南學政林枝春條奏。改由學臣錄取。此法一行。恐不肖學臣。藉以網利。請照舊例補送。下部議行。十年四月。遷太常寺少卿。九月疏言。監獄重犯。雖防範不得不嚴。然律載獄具全圖。鐵索鈕鍊。俱有定式。獄官果遵式。慎選禁卒。不時查點。安有越獄之虞。從前禁卒人等。因需索故。以防範為辭。或用極牀。以束其身。鐵簾以直其項。觀音圈以擊其手足。種種非刑。經部議嚴禁。載入則例。乃日久另創新制。囚徒無分多寡。概令排頭。臥於腳鍊手鍊之中。橫穿長木。鎖逼兩端。壓其手足。不能屈伸轉側。搔抑痛癢。實與極牀無異。獄囚多緣斃命。該管上司。以脫監處分最嚴。並不嚴禁。以穿木束。因為通例。直省類然。晉豫尤甚。請敕督撫。臬司諸臣嚴禁。部議從之。十一年。遷大理寺少卿。十二年。授僉都御史。十三年。遷大理寺卿。一桂工繪事。山水法宋人。花鳥分枝布葉條暢。自然饒有生趣。所進圖畫。多邀御題。十五年。遷內閣學士。十七年八月。充會試副考官。十二月。擢禮部右侍郎。十八年轉左。十九年同部侍郎張泰開保舉一桂子志伊。為國子監學政。詔下部議。泰開以瞻徇革職。一桂降三級留任。二十一年。上一桂年老。不勝侍郎之任。調補內閣學士。二十三年十二月。疏請致仕。允之。陛辭御製詩二章賜之。其一曰。懷鄉念切。老年索弗許。翻嫌不近情。一晌陛辭雙淚下。原猶戀闕可憐生。其二曰。簪纓歸里榮依舊。花鳥怡情樂正賒。吳下詩人應好在。白頭相聚話烟霞。時沈德潛致仕家居。上憶及之。故云。二十六年來京。祝皇太后萬壽。命預九老會。賜游香山。二十七年。上南巡。一桂兩迎駕。賜畫禪頂壽額。三十六年復來祝萬壽。預會賜遊如前。命加禮部侍郎銜。在籍食俸。三十七年歸里。道卒。

厲鶚

厲鶚。字太鴻。浙江錢塘人。康熙五十九年舉人。少貧。性孤峭不苟合。始學為詩。即有佳句。於書無所不窺。所得皆用之於詩。故時多異聞軼事。內閣學士李紱典浙江。試闈中得鶚卷。閱其謝表曰。此必詩人也。亟錄之。計偕至京。

尤以詩見賞於侍郎湯右曾。試禮部報罷。右曾欲止而授之館。比遣迎之。則已襍被出都矣。十餘年間。再上公車。乾隆元年。浙江總督程元章薦應博學鴻詞科。試日誤寫論在詩前。又報罷。而年亦且老。值部銓期近。思得薄祿養親。復入京。行次天津。舊友查爲仁留之水西莊。同撰摺。盡絕妙好詞箋。遂不就選而歸。十八年卒。年六十二。鸞搜奇嗜博。館於揚州馬曰瑄小玲瓏山館者數年。肆意探討。所見宋人集最多。而又求之詩話說部山經地志。爲宋詩紀事一百卷。南宋院畫錄八卷。又著遼史拾遺。採撫羣書至三百餘種。常自比裴松之三國志注。又著秋林琴雅。東城雜記。湖船錄諸書。皆博洽詳勝。先世本慈谿。徙居錢塘。故仍以四明山樊榭名其居。所著樊榭山房集二十卷。幽新雋妙。刻琢研鍊。尤工五言。取法陶謝及王孟韋柳。而別有自得之趣。同時以博學鴻詞徵者。有胡天游。全祖望。論者謂鸞之詩。天游之文。祖望之考證。求之近代。罕有其比。其詩餘尤擅南宋諸家之勝。鸞無子。歿後粟主委櫟莽中。何琪見之。取送黃山谷祠。洒掃一室供之。侍郎王昶屬同人於忌日薦酒脯焉。

蔣溥

蔣溥。字質甫。號恆軒。江蘇常熟人。大學士廷錫子。雍正八年進士。改庶吉士。直南書房。尋特賜廷錫一等輕車都尉世職。命溥承襲。十年。丁父憂回籍。既葬。諭即來京供職。十一年。授編修。十二年。遷侍講。十三年。遷左庶子。充日講起居注官。乾隆元年。遷侍講學士。四年。擢內閣學士。五年。授吏部右侍郎。尋轉左。六年正月。上慮各省督撫尙有積習未除者。命大學士九卿留心訪奏。溥密陳所聞各條。一督撫各立門戶。引用私人。公事從此推諉。又或外託和衷營私。瞻徇姑容。不職屬員貽害地方。一督撫新任。必極言前任廢弛。地方凋弊。以爲日後卸過地。並見己振作。或前任陞遷者。則曲爲彌縫。擯棄者。更吹索其疵。一參劾屬員定例。督參撫審。撫參督審。而承審各員。惟論聲勢。如原審者已失勢。則巧爲開脫。若現任或要津。必附會鍛鍊。督撫亦瞻顧不問。一督撫意旨。易爲屬員窺伺逢迎。如昔年河南墾荒。陝西開井。祇以迎合上司。奉行不善。閭閻滋累。疏入。上多採納。敕各省督撫。毋蹈前轍。二

月兼署刑部左侍郎。六月充浙江鄉試正考官。試竣疏言直隸場規內簾設監試二。凡薦卷必由察核以昭慎重。內簾每日供給亦由票取驗發。今浙省內監試一。惟在闈旁觀不與薦閱事供應。恐主考票取分撥不能專心閱文。請照京省場規辦理。下部議通行。七年二月充經筵講官。六月疏言凡條奏發九卿會議。有主稿衙門酌定。或駁或准。會議日書吏誦稿一遍。以待公商。但其中原委曲折一時難悉。請於定議前兩日將議稿傳鈔俾各詳勘至當。然後可剖晰暢言。至會議命盜案刑部向不先定稿。惟俟議時平反。至不關人命之案亦宜與各衙門一體先令主稿傳知庶為審慎。下部議如所請行。八年閏四月命署湖南巡撫事。御製詩賜之曰。簡異羅英俊。咨時切治安。江湖襟帶地。風俗易移難。數賤簷農苦。棉輕慮歲寒。承流敷渥澤。應共洞庭寬。十月實授湖南巡撫。九年三月疏言永順一府及辰州屬之永綏乾州鳳凰三廳苗民貪暴之習未除。至寶慶府之城步靖州之綏寧苗峒狡惡者尤多。適年臣宣布天恩嚴禁兵役擾累仍整飭武備不得懈弛。苗民漸知守法。諭曰。御苗之道首以不擾為要。次則使知兵威之不敢犯。此奏頗得之。四月奏劾按察使明德於巴陵縣生員方宣點被盜一案不細加研鞠。意存諱飾。下部議革明德職。六月劾驛鹽道謝濟世老病不能率屬。救濟世勒休回籍。八月疏言向例道府州縣政績聽自造冊申送。不免鋪張失實。應將州縣自註之冊令本管府州核加考語。呈本道核轉知府直隸州事實。本道轉造道員事實。兩司轉造。俱呈督撫查覈。佐雜政績。向不造報。或有任意縱肆者。請令該管州縣造冊送府。州轉送司道查察。呈督撫存案。不致有名無實。九月疏言苗峒舊設義學。令內地生員訓導。恐不肖者混入滋事。地方官同教職慎選充當。具結通報查考。俱下部議從之。十月疏奏同學巨甄別教職衰頹荒疏者十三員。各部罷斥。上以辦理甚是。各省督撫多姑息。將原奏鈔出寄付閱看。先是給事中胡定奏請湖南濱湖荒土。勸民修築開墾。部議令該撫查奏。至是傳疏言。近年湖濱淤地築墾殆遍。奔湍東為細流。州堵遍加堵截。常有湖水衝決之患。現在沅江之萬子湖湘陰之文洲圍。士民請築墾。臣親勘文洲圍倚山面江。四圍俱有舊隄。今若就臨江東西二港建壩設閘。使水不入。則圍內可墾田萬畝。計費不過數百金。士民自願興工。已議舉行。至萬子湖四面受水。

廣袤八十餘里。費大難築。並於上下游水利有礙。臣以湖地壅築已多。當防湖患。不可有意勸墾。上是之。十年。授吏部右侍郎。軍機處行走。十一年。兼理戶部侍郎事。十二年。充會典館副總裁。十三年三月。充會試副總裁。四月。擢戶部尚書。十五年。晉太子少保。十六年。兼管三庫。十七年。充文獻通考館正總裁。十八年。協辦大學士。兼署禮部尚書。掌翰林院事。十九年。命偕汪由敦董邦達修盤山新志。盤山在蘇州。向訛爲唐韓愈送李愿歸之盤谷。而不知彼實在濟源。溥等承輯新志。亦二三其說。而未歸一是。上特爲考證。以正其誤。溥工花卉。得其家法。隨意布置。自多生趣。每進呈。多蒙御題。有師承家法間圖出。右相丹青有後生之句。二十年。兼署吏部尚書。二十三年。因秋審錯擬原任湖南布政使楊灝緩決一案。奉旨嚴議。銷去加一級。仍降一級留任。二十四年。授東閣大學士。兼管戶部尚書。二十五年。充會試正總裁。先是。溥弟洲在山西布政使任內。以罪誅。其無著帑項。溥奏懇分年代交。至是特旨寬免。二十六年卒。從無少懈。上諭加贈太子太保。入祀賢良祠。尋賜祭葬。諡文恪。

江聲

江聲。本字鱣。後改叔溧。江蘇元和人。七歲。就傅讀書。問讀書何爲。師以取科第爲言。聲求所以進於是者。稍長。與兄篤共學。年二十九。遭父疾。晨夕侍牀褥。不解衣帶。至自滌械。視穢以驗疾進退。及居憂。哀毀骨立。逾三年。容戚然如新喪者。侍母疾居喪。亦如父歿時。少讀尙書。怪古今文不類。又疑孔傳非安國所爲。年三十五。師事同郡惠棟。得讀所著古文尙書考及閻若璩古文疏證。年四十一。以棟既作周易述。搜討古學。乃撰尙書集注音疏。存今文二十九篇。以別梅氏所上二十八篇之僞造。取書傳所引湯征泰誓諸篇逸文。按書序錄入。又取說文經子所引書古文本字。更正秦人隸書。及唐開元改易古字之謬。輯鄭康成殘注。及漢儒逸說。附以己見。而爲之疏。以明其說之有本。以篆寫經。復三代文字之舊。凡四身稿。積十餘年而後成。共十二卷。說一卷。泰誓後得。馬融頗以爲疑。聲辨之曰。融意以泰誓非伏生所傳。故疑之爾。然泰誓維四月太子發上祭於粵云云。尙書大傳既引其

文。所以不傳者。生年老容有遺忘。大傳能引九共帶告片語。而不傳其全文。是其明驗也。漢書藝文志云。尚書古文經五十七篇。計伏生書二十八篇。三分盤庚爲三十。加孔氏多出二十四篇。才五十四。加泰誓三篇。適五十七。若無泰誓。不符其數。融疑所稱八百諸侯不期而會。然書敬說高祖嘗言之。又疑火流爲雕。以穀俱來爲神性。然孔子繫易稱河出圖。洛出書。論語亦曰。鳳鳥不至。河不出圖。吾已矣。夫符瑞之徵。聖人且覲幸之。謂爲子所不語。豈通論乎。詩思文貽我來牟。卽此以穀俱來之謂。融亦將斥爲誕乎。融又以書傳所引泰誓甚多。而疑此泰誓皆無有。案湯誓傳自伏生。今古文皆有。而墨子兩引。湯誓中亦無之。泰誓亦猶是耳。大傳引盤庚曰。若德明哉。湯任父言。卑應言引無逸曰。厥兆天子爵。今經反遺其語。然則伏生既傳之後。歐陽夏侯遞有師承。猶不能無闕逸。況泰誓經灰燼之餘。百年而出耶。其論爲閻惠諸人所未及。聲又病後世深求考老轉注之義。至以篆迹求之。因爲六書說。謂建類一首。卽始一終亥。五百四十部之首。同意相受。卽凡某之屬。皆從某也。陽湖孫星衍亦推其說。以爲爾雅肇祖元胎之屬始也。始亦建類一首。肇祖元胎皆爲始。亦同意相受。說文此類亦甚多。推考老之訓。如口部之咽。隘也。啞。咽也。走部之走。趨也。趨。走也。猶之考轉注老。老轉注考矣。其同在口部走部。卽建類一首也。聲亦以爲然。而戴震以爲黃全部則義太廣。聲折之曰。若止考老爲轉注。不已隘乎。且諧聲一義。不黃全部乎。聲與震以學問相推重。其不相附和如此。聲嘗爲說文解字考證。及見金壇段玉裁所著。遂舉稿本付之。又嘗爲畢沅校刊釋名。爲之疏證。皆以篆書。生平不爲行楷。與人筆札。皆作古篆。俗儒往往非笑之。而聲不顧也。其高尙書灑水字彙字。不在說文。據淮南作塵。據爾雅義作孟人。始或恠之。後服其非臆說。顧其書終以時俗不便識讀。不甚行於時。又嘗舉經子古書。俱繩以說文字例。去其俗字。命曰經史子字準繩。又著論語瑛質三卷。六書淺說一卷。恆星說一卷。良庭小慧一卷。良庭者。晚年因性不諧俗。取周易良背之義自號也。聲性耿介。不慕榮利。交游如王鳴盛。王昶。畢沅。皆重其品藻。而聲未嘗以私事干之。嘉慶元年。詔開孝廉方正科。江蘇巡撫黃輝首舉聲。賜六品頂戴。四年卒。年七十九。

翁方綱

翁方綱字正三號覃溪順天大興人乾隆十七年進士改翰林院庶吉士散館授編修二十四年充江西鄉試副考官二十七年充湖北鄉試副考官二十九年督學廣東凡三任四十四年充江南鄉試副考官四十六年擢國子監司業尋遷洗馬四十八年充順天鄉試副考官四十九年遷詹事府少詹事五十一年督學江西五十五年擢內閣學士五十六年督學山東嘉慶元年賜千叟宴及御製詩珍物四年左遷鴻臚寺卿十二年重預鹿鳴宴賜三品銜十九年重預恩榮宴賜二品銜二十三年卒年八十六方綱弱冠入翰林散館日上至方綱晚所取卷閱之論曰牙拉賽音漢語甚好也既而屢司文柄英才碩彥識拔無遺與同里朱珪獻縣紀昀俱以宏獎風流爲己任寶應劉台拱海州凌廷堪曲阜孔廣森南城王聘珍欽州馮敏昌東鄉吳嵩梁等皆從之遊生平精研經術嘗謂考訂之學以衷於義理爲主其嗜博嗜瑣嗜異矜己者非也又曰考訂之學蓋出於不得已事有歧出而後考訂之說有五難而後考訂之義有隱僻而後考訂之論語曰多聞曰闕疑曰慎言三者備而考訂之道盡於是矣時秀水錢載斥休寧載震爲破碎大道以此相詆方綱與歙縣程晉芳言謂詁訓名物豈可目爲破碎考訂詁訓然後能講義理也錢戴之爭究以戴說爲正然戴謂聖人之道必由典制名物得之此卻不盡然其論最爲持平方綱讀羣經有書禮論語孟子附記官鳩臚脚時青浦王昶見其方考禹貢顧命兩篇諸儒同異相與辨論斷竟日晚居馬蘭峪猶溫肆三禮三傳其精勤如此嘗與歸安丁杰及王聘珍校正朱彝尊經義考凡千八十八條爲經義考補正十二卷又著禮經目次春秋分年系傳表十三經注疏姓氏通志堂經解目錄各一卷於金石之學尤精嘗取熹平石經一十二段殘字勒於南昌學宮所著兩漢金石記二十二卷王昶謂其剖析毫芒以說文正義幾欲駕洪文惠而上之他著有粵東金石略十二卷蘇米齋蘭亭考八卷小石帆亭著錄六卷米海岳元遺山年譜二卷蘇詩補注八卷石州詩話八卷所爲詩多至六千餘篇自諸經注疏以及史傳之考訂金石

文字之爬梳，皆貫徹洋溢於其中。蓋以學爲詩者，有復初齋詩集七十卷，文集三十五卷。

張廷濟

張廷濟，字叔未，浙江嘉興人。少受學海鹽吳懋政，領嘉慶戊午省解，屢躋禮闈，遂結廬高隱。以圖書金石自娛，建清儀閣，古香溢翰墨間，鑒賞精密。每一器一碑入手，即能知其真僞，別其源流，所拓商周秦漢古彝鼎銘文千種，翁方綱嘗與之往復考論，多所辨析。所儲石刻，自石鼓文以下，至宋金元亦千種，并多數百年舊搨，而其名今已全佚者，藏器中鐘鼎彝彝六十餘事。其周女方爵，秦始皇時度，則寰宇中稱僅見焉。藏石有唐天寶七載修子產廟碑，顏魯公玄靜先生殘石，蘇文忠馬券碑，賈刻宣示表，宋覆刻淳化殘帖，金元刻蘭亭諸石，率出近刻之上。餘如漢晉古甑，秦漢古瓦，漢魏至宋元古官私印，周秦以來錢幣，亦均不讓古收藏家。里居近竹林，於蓄書畫網羅尤備。書法米南宮，草隸獨出冠時。詩樸勁典核，著有叔未金石文字。清儀閣題跋，金石奇緣，墨林清話，桂馨堂集各若干卷。晚年眉長徑寸，與阮文達合摹眉壽圖泐石，藝林傳爲盛事云。

黃易

黃易，字小松，浙江錢塘人。官山東運河同知，父樹穀，孝子也。工隸書，博通金石，易幼承家學，苦貧，游幕於外，雖簿書送進，不廢風雅。精究河防事宜，凡隄埝大工，開口蓄洩，每伏汛秋汛，晝夜殫力捍禦，兌漕運諸務，籌畫備至。尤嗜金石，寢食依之。在濟寧升起鄭季宣全碑於曲阜，得熹平二年殘碑於嘉祥之紫雲山，得武班碑，武梁祠堂石室畫像，卽其地築室，砌石榜曰武氏祠堂，立石以記之。又出家藏宋搨石經殘字，及成陽靈臺魏元丕朱龜謙敏王稚子范式諸刻雙鉤，而錢諸木，凡四方嗜古之士，所得古文古刻，無不就正於易者。以是所蓄金石，甲於一時。工填詞，精於摹印，畫兼仿倪黃，而實自成一格。翁方綱嘗曰：黃伯思米芾而後，世久無此人矣。著有小蓬萊閣

金石文字小蓬萊閣詩。

劉墉

劉墉字崇如號石庵山東諸城人祖棻四川布政父統勳東閣大學士墉乾隆十六年進士改翰林院庶吉士十七年十月散館授編修二十年四月遷右春坊右中允五月擢翰林院侍講是年九月以統勳任陝甘總督查勘巴里坤哈密駐兵事宜附和將軍永常辦理失宜奉旨劉墉亦著革職鞫交刑部十月恩旨釋放賞給編修二十一年五月充廣西鄉試正考官九月提督安徽學政二十四年四月奏言捐納貢監向例責成教官約束但貢監人數衆多既不歲考又無月課教官勢難綜覈請嗣後凡貢監遇有小過扑責示懲者州縣仍會同教官覈辦其舉報優劣止責成州縣辦理部議准行九月調江蘇學政三歲試竣奏江蘇士習官方情形略言生監中滋事妄爲者府州縣官多所瞻顧不加創艾既畏刁民又畏生監兼畏胥役以致遇事遲疑皂白不分科罪之後應責革者並不責革實屬闕冗怠玩訟棍蠹吏因得互售其姦上嘉其留心政體二十七年授山西太原府知府三十年擢冀寧道三十一年以知府任內所屬陽曲縣令段成功侵蝕庫項事覺墉坐不能先事舉劾部議照扶同容隱律擬罪上加恩免死發軍臺效力贖罪三十二年恩旨釋還任在修書處行走三十三年諭曰大學士劉統勳年屆七旬止此一子仍加恩以知府用三十四年授江蘇江寧府知府三十五年遷江西鹽驛道三十七年擢陝西按察使三十八年丁父憂命馳驛來京治喪三十九年上頒賜各大臣古今圖書集成以統勳先卒未預恩賞念劉墉克承世業特賜墉全部俾世守無替四十一年二月服闋赴京上追念統勳宣力年久且察墉器識可用詔授內閣學士即在南書房行走時初設文淵閣官七月充直閣事九月充四庫全書館副總裁並派辦西域圖志及日下舊聞考四十二年六月充江南鄉試正考官八月提督江蘇學政四十三年八月奏泰州舉人徐述夔所著一柱樓詩詞悖逆經軍機大臣鞫訊得實按律懲辦十月奏請將御製新樂府及御製全韻詩自行刊刻宣示從

之。十一月擢戶部右侍郎。四十四年調吏部右侍郎。四十五年授湖南巡撫。所屬新化縣令有諱匿命盜案件。據實劾參。在任年餘。盤查倉庫。勤修城垣。革除坐省家人陋習。撫卹武岡等州縣災民。至籌辦倉穀。開採峒硝。俱察例奏請。奉旨允行。四十六年遷都察院左都御史。四十七年二月。仍直南書房。賜紫禁城騎馬。三月充三通館總裁。四月御史錢灃劾山東撫臣國泰貪縱營私。所屬多虧空。命偕尚書和珅往按。既抵省。即盤查歷城縣庫無缺額。而銀色多攙雜。知有僞。訊係國泰聞信後。那稜彌補以圖掩飾。並廉得國泰婪索姦狀。及藩司于易簡知府呂爾昌馮珽先後在濟南府任內。扶同執法。擬罪如律。讞定回京。命署吏部尚書。兼管國子監事務。尋授工部尚書。仍兼署吏部。十一月奉旨在上書房總師傅上行走。四十八年總辦辟雍圖式及督辦內廷宮殿易瓦等工。五月命署直隸總督。七月調吏部尚書。八月充順天鄉試正考官。十一月充經筵講官。四十九年兼署兵部尚書。五十年二月。以辟雍告成。議敘。四月復兼理國子監事務。五月授協辦大學士。五十一年充玉牒館副總裁。五十三年三月。命總辦萬壽慶典事宜。九月御史祝德麟劾司業黃壽齡受賂一摺。內稱國子監考試惟劉墉鄒炳泰二人清介素著。諸生不敢向其饋送營求。五十四年三月。以上書房阿哥師傅等久不到書房。劉墉身為總師傅。不予糾正。上諭降為侍御銜。仍在總師傅上行走。不必復兼南書房。四月補內閣學士兼禮部侍郎銜。八月提督順天學政。九月遷禮部左侍郎。五十六年正月。遷都察院左都御史。旋擢禮部尚書。四月復兼管國子監事務。是月署吏部尚書。五十七年充順天鄉試正考官。調吏部尚書。五十八年充會試正考官。嘉慶二年三月。授禮仁閣大學士。四月。命偕尚書慶桂按訊山東控案。事竣。馳勘曹汛漫工。奏言漫口須至秋汛後堵築。而下游一帶。間有淤墊。必一律挑濬寬深。大溜歸入正河。方能暢達下注。如所議行。四年二月。加太子少保銜。十二月。奏漕糧起運收米行船。為旗丁之專責。而州縣食派旗丁。或將殷實之丁。索錢賣放。強派貧者。貧丁若懦弱無能。或致自盡。以免累妻子。納詞狀於懷中。詎冤苦於身後。此猶一人一家之事耳。其貧丁之無賴者。不以為苦。挈家上船。居然溫飽。自水次以至通州。盜賣官糧。無復畏忌。所賣既多。或繫船沈水。以匿其迹。或稱漕糧交兌。本不足數。抵通弊混。同歸

於無可考據。卸桅折柁。無所不賣。及至回空。僅存船底。於是新漕起運之時。船已不可復用。此亦州縣府道不職。而督撫兩司不能察吏之一端也。請赦下有漕省分督撫兩司。嚴查州縣。務餘殷實丁戶。或一人力薄。數家幫貼。則賣糧拆船之弊可免。上從之。六年。充會典館正總裁。七年。駕幸熱河。命留京辦事。九年十二月卒。晉贈太子太保。入祀賢良祠。予諡文清。塘善書。結體法香光。而變清逸。爲厚重。垂裝端拱。亦自有廊廟氣。聲名藉甚。文章政事。反爲掩矣。

何紹基

何紹基。字子真。晚自號蠹叟。道州人。父戶部尚書。諡文安。幼慧靜。濡染家學。試輒冠其偶。道光辛卯。以優行貢成均。乙未。舉鄉試第一。聯捷成進士。改庶常。散館。授編修。充武英殿國史館協修。纂修國史館提調。己亥。癸卯。丁未大考。俱賜文綺。歷典福建貴州廣東鄉試。得士稱盛。紹基於學。經史說文考訂尤研審。旁及金石圖刻律算。實事求是。識解精超。文宗先正義法。書根篆分會通。詹公北海自成一體。性坦率與人無町畦。見不善。必面斥之。人咸親其和而憚其峻焉。咸豐壬子。以侍郎。張文毅公保舉。特旨放四川學政。顯皇帝召對。詢家世外。備及學業時務。抵蜀任。士心翕感。文教蔚興。按部至南江縣。鄭懷江冤獄。河東土司安安氏安平康母子爭襲各案。皆據聞見入告。欽使至。均如所議。平反。讞結。又奉殊諭。訪察地方一切情形具奏。紹基皆直言無隱。權貴側目。謗箴織騰。卒以條陳時事。墨譴鑄秩。遂絕意仕進。角巾筇杖。縱探峨嵋瓦屋諸峯。飲酒賦詩。匝月忘返。旋去蜀。主山左澗源長沙城南書院有年。薄游吳越。諸當事聘主揚州書局。校定十三經注疏。兼主孝廉堂講席。士以得游其門。相誇耀。遇佳山水。徜徉自適。同治十三年秋。寓蘇州。履疾。遂不起。實七月二十日。享壽七十有五。生平誠厚端飭。深識古今成敗得失。慷慨敢爲。充提調時。擬遵純廟諭旨。纂辦三品以下各臣列傳。條例已具。政府執不允所請。識者惜焉。所撰有東洲草堂詩集古文雜著書翰者。所至絹素山積。東西洋諸屬國。珍彙字若拱璧焉。官學政時。迭捐

軍德賞六品頂戴。隨帶加六級。以編修誥授中憲大夫。後以季弟紹京候選道。賜封資政大夫。配陶夫人。先卒。一子慶頤。舉人刑部郎中。

戴熙

戴熙字鹿牀。號醇士。浙江錢塘人。道光十二年進士。改翰林院庶吉士。十三年四月散館。授編修。七月大考二等。陞右春坊右贊善。十四年轉左春坊左贊善。十五年三月充會試同考官。五月丁母憂。十七年服闋。十八年閏四月補原官。六月遷右春坊右中允。命在南書房行走。七月充日講起居注官。提督廣東學政。十一月陞翰林院侍講。十九年六月遷右春坊右庶子。俱留學政任。十月御史焦友麟奏陳廣敷教化。整飭風俗。照借兩廣總督鄧廷楨等。選議奏覆。略言雍正七年乾隆元年議定各省州縣設立講約。選舉約正。每月朔望宣講聖諭廣訓。地方官並教官。仍不時巡行宣講。加意化導。成憲詳明。歷久遵奉。茲該御史請督令教官按期宣講聖諭廣訓。直解自應申明定例。責成實力奉行。至所稱查有習教等事。准教官會縣宰究。其扶同隱匿者。生員連坐。查教官專資訓課。若兼責以地方之事。恐宰究未能得力。而訓迪轉致分心。且恐藉此干預地方。亦不可不防其漸。生員則讀書明理。容有任事之才。然恐稍涉迂謹者。雖知秉正嫉邪。而實未諳事務。其向來好事者。甚至捕風捉影。或更涉於糾紛。且繩以連坐之法。更恐倒顛是非。畏罪妄指。其流弊不可勝言。應請毋庸置議。見當嚴察鴉片之際。儻膠庠未盡肅清。則草野曷由觀感。是查禁生員吸食鴉片。實先務之爲急。亦因地而制宜。應飭各教官於該管生員。留心訪察。如有沾染惡習。即據實舉報。儻失於覺察。甚或知而不舉。一經發覺。立予參處。惟見行新例。並無教官處分專條。擬請敕部明定處分。以示警惕。至教官賢否不一。儻其身自吸食。何以能範諸生。宜飭藩司慎選於平時。州縣訪察於就地。有犯即行嚴參。如此層遞稽查。示之標準。庶師道立而善人多。士習端而民風厚矣。如所議行。二十三年三月陞翰林院侍講學士。仍留學政任。十月差竣奏請回籍省親。二十一年回京。二十二年三月以父老請

開缺終養。允之。六月。丁父憂。二十四年。服闋。二十五年正月。來京候補。三月。充會試同考官。五月。復提督廣東學政。六月。補原官。十二月。充光祿寺卿。二十六年二月。陞內閣學士。兼禮部侍郎銜。俱留學政任。十二月。差竣回京。二十七年四月。以學政任內失察。年老武生入場。革職留任。五月。稽察中書科事務。二十八年。擢兵部右侍郎。自終養起復。並兩資差。旋至擢侍郎。均得旨。仍直南書房。二十九年閏四月。罷南書房行走。七月。以本籍水災。捐資備賑。下部議敘。旋因病陳請開缺。詔以三品頂戴休致。三十年。文宗立。禮部尙書孫瑞珍。遵旨保舉人才。以熙奏入。召來京聽候簡用。熙以病不果。至咸豐三年。太平軍轉戰湖廣安徽等省。據有江蘇江寧府。遣兵四出。浙江戒嚴。熙偕官紳勸諭捐輸。舉行團練。五年。浙江巡撫何桂清。以熙勸辦出力奏聞。下部優敘。七年。巡撫晏端書以熙設局省城。募勇操防。協助官軍奏聞。九年。以督辦團練有功。賞二品頂帶。十年二月。敵犯杭州。熙偕杭州將軍瑞昌等。激勵兵民。壘城固守。城陷。熙死之。五月。瑞昌疏聞。追贈尙書銜。予諡文節。並於錢塘縣本籍建立專祠。弟副貢生戴煦。媳金氏。甥候選訓導王朝榮。同時殉難。均著交部分別旌卹。並准其一體附祀。熙嘗畫山水。爲世推重。與湯貽汾齊名。著有畫壑尊雅集。

吳大澂

吳大澂。字清卿。江蘇吳縣人。起家翰林。博通訓詁辭章。尤嗜金石。有所見。輒手摹之。或圖其形。存篋笥。積久得百數十器。編恆軒吉金錄若干卷。及視學西陲。鋒車所蒞。地不愛寶。鼎卣尊簋之屬。廉石歸裝。往往載之兼兩。以此文采風流。照耀京國。且數上封章論時事。潘祖蔭翁同龢交稱其賢。屢遷至副都御史。光緒庚辰。以伊犁議約。治軍吉林。甲申。法越構釁。會辦北洋軍務。駐天津。已而簡任湖南巡撫。所收蓄益富。甲午。日寇朝鮮。自請督師赴前敵。德宗壯之。授幫辦前部。甫交綏。即奔潰。尋自劾。部議革職。得旨改爲留任。命還湘。言官交章糾彈。始開缺。未幾。慈禧皇太后惡其黨同。將追論失律罪。賴袁世凱營救。予罷斥。永不敘用。卒於家。大澂擅長文學。負才氣。好爲

大言。而軍旅實非所習。所著恆軒吉金錄外。又盡取潘氏暨濰縣陳氏。福山王氏諸家合己所舊藏拓本。攷而釋之。都十四卷。僞宋歐陽公例。名曰憲齋集古錄。其言曰。說文之字。皆周末相沿。非孔子六經舊簡。故求之說文而不可通者。往往於經典釋文得之。如徐之古文邨。周禮雍氏注征徐戎。釋文劉本作邨。舉沈兒鐘魯公伐邨鼎爲證。又如來作逌。輶通鬯。釋文所存異字多與古器銘密合。人初不信。後見燉煌唐寫本。釋文虞書雖止十一葉。以校通志。抱經兩刻。增字不啻倍蓰。說文所無。迨難枚舉。而今則古字亡矣。然後知初唐舊本陸氏所存古字實有溢出許書之外。其所言信信而有徵也。復稟鐘鼎異文。撰說文古籀補十四卷。附錄一卷。就古金文以探製字之源。撰字說一卷。後亦多創獲。書法遒麗。有家文論語并說文部首。

廿田夔

苗夔。字仙籊。直隸肅寧人。幼即嗜六書形聲之學。讀許氏說文。若有夙悟。已又得顧炎武音學五書。慕之彌篤。曰。吾守此終身矣。舉道光十一年優貢生。高郵王念孫父子聞夔之說。禮先於夔。與暢論音學源流。由是譽望日隆。夔以爲許叔重遺書多有爲後人妄刪或附益者。乃訂正說文。凡六朝五代以來。聲傳訛者八百餘字。爲說文聲訂二卷。顧氏音學所立古音表十卷。宏綱已具。然猶病其太密。而戈麻既雜西音。不應別立一部。於是併耕清音。蒸登於東多。併戈麻於支齊。定以七部。彙括羣經之韻。字以聲從。韻以部分。爲說文聲讀表七卷。宋濂篆韻集鈔。謂說文建首五百四十字。卽倉頡讀。大朝五代人無能得其句讀者。皆以俗韻失之也。夔以毛詩韻部。定其音紐。爲建首字讀一卷。詩自毛傳鄭箋而後。主義理者多。主聲韻者少。雖有陸元朗詩經音義。亦不能專主古音。然古音時有未盡改者。夔治毛詩尤精於諧聲之學。嘗以齊魯韓三家證毛。而又以說文之聲讀參錯其間。采太平咸氏之漢學諧聲。詩經正讀。無錫安氏之均徵。爲毛詩韻訂十卷。書出。識者歎其精審。他著有說文聲讀考集韻經存韻補正經韻鈎沈四種。咸豐七年五月卒。年七十五。生平苦思專一。雖處困約。有以自怡。將歿。戒其子彞衆書。

叢中子玉璞乃擇書之尤嗜者。納棺中殉焉。

趙之謙

趙之謙，字橋叔，一字益甫，別號冷君。先世自岷縣遷郡城大坊口，遂爲會稽人。七世祖萬全，當清之初，芒屨尋親，閱七年，經行十省，終獲骸骨。時有二金蝶入懷之異，旌表孝子。之謙天稟瓌異，自二歲即能把筆作書，讀書過目不忘。又好湛深之思，故凡經史百家，名物之蹟，性道之微，無不博覽旁通，得其統要，弱冠補博士弟子。家貧，不能自給，會溧陽繆梓權守越，諮以箋奏之事，與同門績溪胡培系、胡樹、溧陽王晉玉、餘姚周暨相善焉。歲辛酉，太平軍入浙，紹興陷，繆梓權死難，時忌者撫浮言上聞，詔奪梓權卹典，人莫敢訟言。之謙伏闕上書，卒邀恩卹。咸豐己未恩科，以第三人舉於鄉，試春官。京中大僚，爭相賓禮，求文章書畫者，日接於戶。試屢報罷，以國史館謄錄議敘知縣，分發江西，甫至省，巡撫劉坤一檄修江西通志，單心鉤考，援摭精確，書成，委署都陽縣事。又署奉新、南城、鉛強、抑臺、興廢、舉墜，所至翕然。莅都陽，值大水陡發，廬舍田畝，多成丘墟，之謙殫力振撫，民免流亡。鄱民屬訟，鉤距推鞠，得其主名，奸不敢逞，而訟以希趙姓爭宗，各以譜牒爲据，閱百餘年，前後令數十易，莫能決。之謙考宋史宗室世系表及紹興寶祐兩登科錄，定其宗派之是非，與譜牒所載進士之真僞，判牘千餘言，訟者驚服。願各息爭，在奉新，勸捐葺文廟，復舊制。在南城，懲蠹胥，緝訟棍，風骨嚴峻，庶事畢舉。服官逾勤，體力漸衰，再喪厥俱，益自悲悼。於時天下騷動，援閩各軍，絡繹過境，供辦不濟，時有齟齬，公私之累，哀鬱中傷，未幾病卒。年五十六。時光緒十年甲申十月初一日也。之謙性孝友，族黨姻親，不吝周卹，遇孤窮危難，必竭致其誠，勿計勞怨。居恒俯仰時事，慨積弱之弊，謂必當除文法之密，收胥吏之權，破格以進天下之才，平生學術治術，皆以空言爲戒。論學主金壇段氏、高郵王氏，及武進莊氏、劉氏，漸進於西漢巨儒，微言大義之詣。既治許氏說文解字，又博求商周吉金，漢後隋前諸樂石，以窮六經之支流正變。同時吳縣潘祖蔭尙書、順德李文田學士，大興劉銓、福州胡樹戶部，仁

和魏錫曾、嚴尹，皆相推重。古文奧衍，與周雙庚以奇古相尚。晚與江都汪中、仁和龔自珍、邵陽魏源爲近。駢文尤偉麗。有六朝人風度。書初學顏平原，後習北碑，縱爲草法，體勢側媚，光彩動人。古未有也。畫如其書。隨筆渲染，饒有逸趣。至其篆刻，則使刀如筆，視石若紙，而結體新奇，古艶映發。並代諸子，皆莫能及。著《國朝漢學師承續記》，未成。其成者，六朝別字記一卷，悲庵居士詩牘一卷，悲庵居士文存一卷，四書文一卷，又補寰宇訪碑錄四卷。同治初刻於京師，尋以所採未備棄之。校刻之本，則有新化鄒氏漢勳數藝齋遺書如千卷，內勇廬閒話、英吉利廣東入城始末、張忠烈公年譜三種。

蒲華

蒲華，字作英，秀水人。性簡易，無所不可。善畫，及草書，尤喜畫竹。諱老不蓄鬚，問其年，常以五十對。寓滬上。鄰伎館，妓多從學者。教誨諄諄如嚴師，少爲諸生，無資，貢成均。遇歲試，一題作二篇，不耐楷錄，願代者分與之。其書自謂效呂洞賓白玉蟾，野草如龍蛇，縱逸不拘常格，而奇趣盎然。真仙筆也。願時人少知重之。游食四方，不繼饘粥。往往寄食寺廟。性好吟詠，其悲天憫人，牢落不平之感可見也。獨與吳倉石秋農及何照伯、徐星洲、哈少季交最密。常風雪蕭寥，過從談藝，或暮然兩燭作畫，華解衣盤礴，頃刻盡數十紙。晚歲稍稍有名士大夫間矣。華素無疾，一聲幾隕，旋健如初。一夕醉歸，寢不起，羣走視，鑲牙脫入喉，氣閉絕矣。蓋年老齒豁，用泰西法補之，羣稱便者也。而君竟以此死。與久交者，言其壽殆八十餘云。初有妻化去，無子女。

第六編 革命

楊秀清

楊秀清，初名嗣龍，原籍廣東嘉應州，徙居廣西桂平縣之平隘山。世以種山燒炭爲業。秀清獨無賴遊蕩，爲隸爲傭，皆不稱意，去而結夥，護送洋貨，積殖以自封。以故盡識兩廣間之不逞者，洪秀全來桂平，曾玉珩引與相見。秀全瞿然曰：此奇才也。因說秀清入其教，約爲兄弟，隱圖發難。秀全每託言神示，蕭朝貴石達開皆信之。獨秀清知其詐，遂自言通天語。秀全爲天兄，天父特命降世爲真主。秀全喜，由是信者益衆。秀清更託言天父降其身，謂天兄有過，令秀全跪而受杖以制之。己有過，亦令人杖不少貸。謂人陰私，摘發多奇中。秀全雖不堪，無如何也。道光三十年，反狀漸著。桂吏捕韋昌輝急，秀清謂之曰：十年之謀，必求一逞，逃不免也。不如舉事。昌輝遂拒捕，糾衆放火，殺巡檢張鏞。秀清以民圍據金田。石達開秦日綱皆起兵會之。秀清曰：軍起倉卒，不可無主。洪秀全天兄宜爲王。衆皆呼萬歲。秀清大喜，遂遣人至胡以泲家迎之。秀全招貴縣林鳳祥，揭縣羅大綱入夥。有衆萬人。任秀清爲正軍師。凡行軍號令，皆自秀清出。明年八月，敗清將向榮烏蘭泰兵，破永安，建號曰太平天國。封秀清爲東王。十一月，清命賽尙阿會向榮烏蘭泰，合兵數十營圍永安。太平軍輒大敗，孤城無援，勢窮蹙，有散意。天王患之，秀清託言天父附體，號於衆曰：太平軍合有厄運百日，過此乃免。軍士信之，得不潰。秀清乃命人遍張檄告，其文曰：嗟爾有衆，明聽予言。予惟天下者，上帝之天下，非胡虜之天下。衣食爲上帝之衣食，非胡虜之衣食。子女人民，爲上帝之子女人民，非胡虜之子女人民。慨自滿州肆毒，混亂中國，以六合之大，九州之衆，一任其胡行，恬不爲怪。中國尙爲有人乎？妖胡虐燔燬蒼穹，淫毒穢宸極，腥風播四海，妖氣慘五湖。而中國反低首下心，甘爲婢僕，甚矣中國之無人也。夫中國，首也。胡虜，足也。中國，神州也。胡虜，妖人也。名中國爲神州者何？天父皇上帝真人也。天地山

海是所造成。故從前以神州名中國。目胡虜為妖人者何。蛇虜。邪鬼也。惟韃靼妖胡。實敬拜之。故當今以妖人目胡虜也。奈何足反加首。妖人反盜神州。驅我中國。悉變妖魔也。罄南山之竹簡。難書滿地之怪污。決東海之波濤。難洗彌天之罪孽。予謹略言其彰著者。夫中國有中國之形像。今滿洲悉削髮為禽獸。中國有中國之衣冠。今滿洲別頂戴胡衣猴冠。而壞我先代之服冕。是使中國之人忘其本也。中國有中國之人倫。前僞妖康熙。暗使韃子一人。管理十家。淫亂中國之女子。是使中國之人。盡為胡種也。中國有中國之配偶。今滿洲妖魔。悉收中國之美姬為奴為妾。三千粉黛。皆為錮狗所污。百萬紅顏。竟與鬻狐同寢。言之痛心。談之污舌。是盡中國之女子而污辱之也。中國有中國之制度。今滿洲造為妖魔之條律。使我中國之人。不能脫其網羅。手足無所措。是盡中國之男兒而脅制之也。中國有中國之語言。今滿洲造為京腔。更中國之音。是以胡言胡語惑中國也。凡有水旱。毫不憐恤。坐視餓殍。流離暴露。有如草芥。是欲我中國之人稀少也。滿洲又縱貪官污吏。布滿天下。剝民脂膏。士女皆哭泣於道路。是欲我中國之人貧窮也。官以賄得。刑以錢免。富兒當權。豪傑絕望。是使我中國之英俊。抑鬱而死也。凡有英雄。代天報仇。動輒誣以謀反大逆。夷其九族。是欲絕我中國英雄之志也。滿洲之所以愚弄中國。侮辱中國者。無所不用其極。巧哉。昔姚弋仲。胡種也。猶戒其子襄。使歸義中國。符融。胡種也。每勸其兄堅。勿攻中國。今滿洲乃忘其根源之醜賤。乘吳三桂之招引。霸佔中國。極惡窮凶。予細查滿韃子之始末。其祖宗乃白狐與赤狗媾精。遂產妖人。種類日滋。自相配合。並無人倫之風化。乘中國無人。盜據中夏。妖坐之設。野狐升據。蛇窩之內。沐猴而冠。我中國不能擎其窟而鋤其穴。反中其詭謀。受其凌辱。聽其嚇詐。甚至庸惡陋劣。貪圖蠅頭。拜跪於狐羣狗黨之中。今夫三尺童子。至無知也。指犬豕而使之拜。則然然。胡虜猶犬豕也。何以讀書知古之民族。胡服跪拜。爭媚異種而毫不知羞耶。昔文天祥。謝枋得。誓死不事元。史可法。瞿式耜。誓死不事胡。此皆我漢族人民之所熱聞也。予總計滿洲之衆。不過十數萬。而我中國之衆。不下五千餘萬。以五千餘萬之衆。受制十萬。亦孔之醜矣。今幸天道好還。中國有永興之兆。人心思治。胡虜有必滅之徵。三七之妖運告終。九五之真人已出。胡罪貫盈。皇天

震怒。命我聖主。肅示天威。爰建義旗。掃除妖孽。又安中國。恭行天罰。言遠言邁。孰無左袒之心。爲官爲民。應急揚徽之志。甲冑干戈。載戰聲以生色。夫婦男女。據公憤以前驅。誓屠八旗。以安九有。特召四方之英傑。速拜上帝。以獎天衷。執守緒於蔡州。擒子嬰於軹上。收還久淪之境土。振起上帝之綱常。有擒狗彘子。咸豐來獻者。或能斬其首級來投者。又或能擒斬一切滿洲胡人之頭目者。奏封大官。決不食言。蓋上帝當初六日造成之天下。今既蒙皇上帝開大恩。命我主天王治之。豈胡虜之所得久亂乎。公等世居中國。孰非上帝之子。尙能奉天誅妖。執螯弧以先登。戒防風之後至。在世則英雄無比。在天則榮耀無疆。若或執迷不悟。從僞拒真。將生爲胡人。死爲胡鬼矣。順逆有大體。夏夷有定名。各宜順天應人。公等苦滿洲之禍久矣。至今猶不知變計。同心戮力。掃盪胡塵。何以對上帝也。予興義兵。上爲上帝報瞞天之讎。下爲天國解下民之苦。務肅清胡氛。同享太平之樂。順天有厚福。逆天有顯戮。布告天下。咸使聞知。復使間諜。以重賂賄向榮幕僚。說榮曰。兵法圍城。當缺一面。不然。因獸猶鬥。殺傷實多。無益也。榮深信之。太平元年二月。太平軍遂自缺隅突圍出。入湖南境。圍長沙。不克。渡湘西趨。掠民船數千。出洞庭。破岳州。入湖北。克漢陽武昌。有衆五十萬。船數萬艘。軍聲大振。天王召羣臣議所向。秀清曰。金陵天府。饒財富。宜踞爲根本。徐圖進取。遂棄武昌。悉衆東下。太平二年正月。克安慶。二月。克金陵。羣臣復議定都。秀清欲自留金陵守。復說天王曰。河南居天下之中。古東京也。進可以窺幽燕。退可以據武昌。入滇蜀。立都便。天王將自將道淮安北伐。有舟子年老矣。叩天王諫曰。河南水少而無糧。敵困不能救。不如金陵民富食足。城高池深。而有長江之險也。天王聽之。遂定金陵爲天京。秀清先據藩署。後徙清鹽運使何其興宅。盛營宮室。起東王府。凡設官制。立法條。一切政事。皆由秀清主之。天王深居簡出。秀清每數日一朝。稱臣弟。立而不跪。羣臣白軍事者。不得逕達天王。必先具稟秀清。謂之稟奏。俟秀清裁處可否。然後轉奏。以取諭旨。諸將雖同起草澤。事之惟謹。北王韋昌輝嘗遣其承宣張子朋乘船援湖北。子朋凶橫。因爭船隻。責打水師營官。衆心齊叛。欲盡解維上駛投清軍。秀清聞警。立如水師統將唐正才營。召昌輝子朋至。杖責昌輝數百。子朋千餘。重賜正才金帛。加丞相銜。溫語慰之。水

營得不變。天王嘉之。昌輝亦不敢怨也。八月。秀清以武漢爲天京上游。不宜委棄。自將征湖北。任石祥貞爲前鋒。清同知勞光泰率礮船扼守田家鎮。道員徐豐玉等編巨筏橫江。遏太平舟師。秀清命踞半壁山。清將江忠源自江西馳至。望太平營壘。歎曰。此天險也。軍情地利兩得之。我何能戰。謀以次日營牛角山爲對峙計。秀清偵知。卽遣水師乘風上駛。清軍倉卒拒戰。半壁山以礮下擊。斃徐玉豐。清防軍先敗。勞光泰所部潮勇亦潰走。太平軍水陸大進。克黃州。太平三年正月庚戌。黃州等兵張燈高會。清湖廣總督吳文鎔出不意襲之。苦戰累日。殺傷頗衆。會大雪。戰士多凍死。乃罷戰。越數日。秀清分兵繞文鎔後。設伏山崗。命部將率城軍撲清壘。文鎔拒戰。伏起火發。十三營皆破。清兵棄大帥走。文鎔死亂軍中。又敗清水軍。殺其統將唐樹義。遂乘勝克漢陽。秀清命石祥貞率步兵越武昌而上。破岳州。而以漢陽兵攻武昌。五月。石祥貞自岳州還。會攻省城。城中守兵饑疲。巡撫青瑩文弱不能守。六月。太平軍縋城而登。遂克武昌。秀清雖在軍次。天京之事。仍一決於秀清。驛騎絡繹。多稽時日。而清向榮軍營孝陵衛。稱江南勁旅。數出窺天京。秀清尤憂之。既克武昌。遂馳還天京。命石達開赴上游代督武漢軍。閏七月壬午。秀清自將兵出城奪清壘。戰不利。三路皆潰。退入城。謂昌輝等曰。江南大營不走。天京無安枕日矣。現其勢方銳。不可與敵。營乘其罷。徐圖之。十月。向軍盡陷雨花臺諸壘。偪南門而營。城中糧不繼。天王召秀清計事。秀清曰。糧盡固可慮。臣弟已命上游諸守將採辦。不日當可至。兵敗無傷也。太平四年。向軍陷蕪湖。圍瓜州。部下羣請秀清出大兵援之。秀清不許。曰。將欲取之。必故與之。我正欲其驕也。太平五年。清軍圍鎮江。天京遣騎兵出句容援之。大敗清軍。殺江蘇巡撫吉爾杭阿。向榮聞警。遣張國樑馳救。秀清詔知向軍頻年攻戰。所募益多。餽餉乖時。軍士多缺望。遂請於天王曰。向妖可擒矣。乃悉調援師返天京。國樑亦返大營。秀清遂密約吳如孝率鎮江兵趨天京。掩向軍之背。更命溧水金柱關等處之兵。橫截旁山。秀清自率勁旅。出通濟門。撲大營。先命悍將奪七甕橋以挑之。向榮悉出大營兵。赴前敵。併力截殺。太平軍忽敗退。向榮國樑狂常勝殊輕敵。躡之至城下。離大營益遠。鎮江兵突至。襲營。營中空虛。縱火焚之。守兵驚散。前敵清軍。望見大營火起。退無所據。倉卒亦潰。太平軍前後

左右攻之。清軍死者數萬人。向榮張國樑遁丹陽。向榮旋以憤懣卒。天京既解圍。羣臣皆置酒相賀。爭頌秀清功德。秀清益自負。陰有自立意。會朝賀。侍御皆呼萬歲。秀清慕之。歸謂部下曰。以吾之功業。寧不值呼萬歲。而必新之邪。侯謙芳諭其旨。倡言東王功業與天王埒。宜加徽號。呼萬歲。東黨皆曰諾。秀清遂邀天王過其宅。令其下以萬歲呼之。天王不能堪。讓秀清曰。弟亦萬歲。將置兄於何地乎。秀清冷然對曰。天王獨不可萬歲耶。諸將中羅瓊樹賴漢英大憤。賴漢英者。天后賴氏之弟也。密陳於天王曰。東楊有開國之勳。故優以位號。而情等諸手足。不可謂不至矣。今跋扈肆欲。樹不逞之黨。絕君臣之禮。恐亦天父所不許也。若不早圖。悔無及矣。因說天王召北翼二王返京圖之。天王從其言。韋昌輝至自皖江。惟石達開不至。初。秀清私於天王之妹洪宣嬌。宣嬌後適蕭朝貴。長沙之圍。朝貴死於礮。宣嬌遂居寡。金陵既奠。秀清託言治病。請宣嬌入。天王許之。不以爲嫌。無何。傅善祥入東府。宣嬌寵衰。因起齟齬。宣嬌泣訴於兄。謂彼竟薄手足。而信妖女。當衆侮辱。予不能堪。天王勸慰之。召秀清從容諷以手足舊誼。不宜以疏間親。秀清默然。越日。借天父降身。暴宣嬌之隱。斥使長跪自責。天王懇之而後釋焉。由是宣嬌怨秀清。指揮魯恭敬者。秀清遣往韋營中。已而私返天京。密傳軍情於天王。秀清不之知也。恭敬有妾色美。私於童。恭敬歸而敗露。拔劍追童。童遁入東王府。秀清愛其姣好。惑之。童因告發。且曰。彼自云奉天王密旨。雖東府。無如我何也。秀清乾笑。命部下掩恭敬宅。得之。且獲北韋密奏。秀清匿之。聲言恭敬受命私返。視軍事如兒戲。處以極刑。燕王秦日綱與恭敬善。救之不及。天王因使日綱詰秀清。秀清語不遜。日綱怒。亦怨秀清。秀清有心腹侯謙芳者。先曾入金陵爲間諜。悅秦淮妓紅鸞。既克金陵。紅鸞爲北王韋昌輝所得。謙芳大恚。矯東楊命。往索之。昌輝不與。謙芳因繩紅鸞之美於秀清。秀清信之。使謂昌輝曰。得吾一見。當完璧致汝。昌輝復疑謙芳之矯命也。答之曰。此禁嚮。豈可示人。設易地以觀。侯姬亦可來吾府中。一供衆覽耶。侯姬者。秀清所寵。謙芳之妹也。使者歸報。秀清欲以兵往攻之。昌輝懼。自詣秀清負荆。以紅鸞歸女館。秀清怒未息。借天王命。出昌輝於外。由是昌輝與秀清積不相能。至是。昌輝歸。秀清復以其敗於江西也。詎厲備至。昌輝益不能堪。因合宣嬌秦日綱賴漢

英羅瓊樹及諸怨秀清者圖東府。使宣嬌說秀清曰。北王新至自軍。先至東府稱賀而後入朝。禮之至也。不可不示以恩意。秀清曰。我將擇日宴北王。傅善祥私諫曰。宣嬌言甘而慝媚。異乎平日。且聞與北韋頗相過從。此有所圖也。不可以不備。秀清性剛。不欲人窺其怯。且疑善祥欲挾軍事以自重也。傲然曰。彼幼弟耳。吾羽翼彼。敢圖我乎。善祥泣而退。屆日。秀清欲示富於北韋。闕府中正殿。命典禮官親主庖事。賴漢英先伏勇士萬人於東府後。羅瓊樹衷甲備接應。昌輝飾死士爲嬰童。戒備以往。秦日綱從。酒酣。昌輝起白事。遽抽刀貫秀清胸。刃出於背。階下死士舉信號。漢英自後掩入。甲士斷前門。府中遂劇戰。自日中至夜半。戰方息。遂火東府。盡殺秀清家屬及其黨萬人。日綱亦死於亂軍中。昌輝醢秀清屍以爲羹。盡啜諸怨秀清者。秀清年四十餘。貌中人。黃瘦微鬚。以姬衆多。服溫藥。損一目。而機警有權略。善將將。才在北韋上。既被殺。諸王水火。羣下解體。太平朝遂不復振矣。

蕭朝貴

蕭朝貴。武宣盧陸峒農民。道光季年。兩廣涪饑。農者無所得食。朝貴性桀黠。糾合流民之勇悍者。結夥入山中。以護送商旅博厚酬。因讎楊秀清。約爲兄弟。洪秀全至桂平。秀清歸之。並招朝貴。朝貴亦受洗禮於秀全。日馳馬縱獵。酗酒罵座。不與機事。馮雲山報之。朝貴曰。運籌帷幄。非吾所知。若攻城掠地。斬將擐旗。我能爲也。朝貴貌凶惡。不喜聲色。對人多暴氣。獨遇秀全妹宣嬌。禮之甚恭。宣嬌騎。則執鞭以從。嘗語人曰。人謂洪先生能成大事。吾謂其怯。不如其女弟。秀全聞之。遂以宣嬌歸朝貴。道光三十年。金田起事。清將伊克坦布。素以善戰名。率三千人攻之。士衆初未經戰。皆疑懼。固守。朝貴曰。金田無險可扼。無城可憑。且起兵矣。旣不能戰。又安能守。遂率五百人首陷陣。清軍亂。手斬伊克坦布以歸。秀全遂以朝貴爲前鋒。由大黃江進攻永安。克之。天王旣建國號。封朝貴爲西王。位於秀清。明年二月。太平軍自永安突圍出。北趨陽朔。清都統烏蘭泰設伏山崗。擊。天德王洪大全被執。朝貴大忿。返隊撲清軍。烏蘭泰與向榮合兵禦之。會大雨。山徑犖确。朝貴部固多山民。攀陟如猿。輒據優勢。遂大

敗清軍。殺總兵長瑞。長壽。董光甲。鄒鶴齡。向榮。先引所部遁桂林。烏蘭泰收殘衆。驍大兵後。至六塘墟。距桂林僅六十里。秀清召朝貴謂曰。烏蘭泰雖殘破。而勇悍善戰。後顧堪虞。弟亟以所部殲之。朝貴遂設伏六塘墟。清軍至。以礮轟之。烏蘭泰中彈死。朝貴從數騎馳入清軍。逼索大全不得。大號曰。天德王已矣。三月。太平軍圍桂林。林月不克。解圍北趨靈川。克興安全州。入湖南境。清將江忠源設伏於養衣渡。太平軍大挫。舟師殲焉。遂登陸東趨。克道州桂陽。頌兵不進。朝貴不耐。夜叩秀清營告曰。頌得謀報。長沙方坵治城垣無備。可襲而取也。願以所部往。天王秀清皆不許。朝貴不聽。逕率死士數千繞山道東北行。破安仁攸縣。由醴陵趨長沙。先是長沙得忠源審官紳聚議。料太平軍當從耒衡來。嗣得邏卒報。謂已過醴陵。省吏以醴陵令無警報。疑不確。朝貴至石馬鋪。大敗清軍。殺守將福誠尹培立。敗軍遁走省城。清將羅繞典方巡城。疑爲太平軍。不納。朝貴尾至。城已閉。以兵單不能合圍。遂踞南門小西門。築壘於妙高峯。黎山廟。示持久。時城中守軍八千餘。皆老弱。不任戰。初見太平旗幟。合城皆大譁。提督鮑起豹昇城隍神大像。置南城樓。謂得神助。諭居民無恐。朝貴猝攻之。城軍併力守南城。不能克。未幾。清總兵和春及江忠源倍道赴援。抵長沙。忠源察省城形勢。以城南天心閣城勢高。與城外蔡公墳犄角。可以屏蔽。東北二面。與太平軍相持。即馳踞蔡公墳。朝貴率衆爭之。不能得。時清守軍援軍。衆盜太平軍數倍。朝貴知不能得志。疏請大營趨長沙。天王欲拔隊。秀清曰。西王剛復。不稍挫之。後不聽命。俟其自歸可也。天王曰。設有不測。奈何。秀清曰。西王勇悍。縱有小挫。清妖不敢逼。必能自脫。宣嬌懼。乃說天王召朝貴。朝貴得詔。大怒曰。其欲挫辱予耶。誓將士曰。今日之事。有進無退。有死無生。遂出全軍攻城。死者枕藉。卒不退。朝貴親督陣。往來指揮。自日出至日中。垂登矣。有走卒從城上指告。礮軍曰。彼衣黃揮刃。往來馳驅者。豈即所謂西王耶。遂發礮轟之。遂被殪。部下收其屍。慟哭而還。年祇三十餘。無子。朝貴性殘忍。而信教甚篤。太平軍自永安入湖南時。朝貴父於途中招其妻同宿。朝貴知之。以謂犯太平天條。即公訟。斬其父母。以警衆。揚揚語人曰。父母違犯天條。不足爲父母也。嗣聞宣嬌與秀清通。欲殺秀清。秀清憚之。假天父令曰。秀清宣嬌。皆出自天父。同胞兄妹也。雖同起。無所嫌。朝貴復信

之。置不問。其愚如此。

馮雲山

馮雲山。廣東花縣人。後徙居廣西桂平之思旺墟。讀書明大義。旁及星卜醫藥。無所不通。少與洪秀全同學。嘗謂秀全多異相。輻達大度。有王者風。因歷舉古今成敗事。說秀全。教以起事。以故二人深相結。道光中年。聞朱九疇倡上帝會。歸者甚衆。雲山說秀全同往師之。未幾九疇死。秀全爲教主。粵東官吏購之急。雲山復偕秀全至香港。受洗禮於耶教。秀全遁跡於廣西之鵬化山。雲山獨出宣教。往來於桂平武宣一帶。以故得識曾玉珩楊秀昌胡以泐韋昌輝石達開秦日綱等。秀全嘗暴死。七日復甦。語多神怪。雲山又從而衍之。謂人心機詐。大難將至。不拜上帝。則蛇虎螫人。並立教規。不強取。不多求。姦盜者有罰。所至信之。有張秀才者。首訐雲山。斂錢惑衆。桂平令捕之下獄。擬凌遲。黃玉崑就秀清謀。就徒黨斂錢爲賂。求緩獄。相識者咸以燒炭爲業。因按炭取資。謂之科炭。旋得釋。遞解回花縣原籍。不久又改裝西行。抵貴縣。遇縣差。識之。索賄不得。欲械送縣獄。鄉人咸庇雲山。毆差。差稟諸縣。移兵圍鄉。鄉人懼。雲山曰。縣兵圍鄉。爲雲山耳。縛雲山付縣吏。圍當解。鄉人皆不許。遂削竹與官兵戰。不勝。雲山部署其衆。掩護老弱婦女。潰圍奔桂平。會桂平令捕昌輝急。昌輝秀清等舉兵反。雲山即以衆合之。同據金田村。清咸豐元年閏八月甲申。太平軍進克永安。謀建國號。雲山倡議曰。秀全天兄。且胡政亂華。漢民望治久矣。可建國號曰太平天國。天王建之。遂封爲南王。授副軍師。太平元年四月。雲山攻全州。敗清都司武朝顯。克之。遂入湖南境。清將江忠源設伏於葦衣渡。天王欲乘湘水漲。刦民船東趨長沙。雲山諫曰。葦衣渡水湍而狹。兩岸多山林。一軍扼之。足以致吾儕之死命。不如先以陸軍循兩岸行。而以舟師載輜重繼之。天王曰。陸行遲。需時日。長沙知有備矣。欲率舟師先行。雲山曰。此絕地也。設有不測。後事何堪。臣弟請以身先之。遂趨舟師而東。忠源伐林木爲堰。張旗幟爲疑兵。太平軍見之。遽退。水湍急。操楫者不能自進退。忠源縱伏兵要擊。雲山併力拒之。鏖戰兩晝

夜遙望太平後隊，旗幟已見。忠源軍將遁矣。忽礮彈墮雲山舟，雲山被炸死。軍遂亂。盡棄輜重登陸。前隊舟師遂爲清軍燼焉。天王聞之，慟哭累日。雲山爲人堅忍多奇計。太平軍作難，醞釀十餘載，實皆雲山一人主之。天王倚之尤重。雲山死，政權遂入楊秀清手矣。

李開芳

李開芳，廣西人。從洪秀全起兵，以避翼王石達開諱。文書稟報，皆改曰來芳。身魁偉，面黑顴高，勇悍而嗜殺。與林鳳祥齊名。初授戍一監軍。太平元年七月，掠柳州。擢金一總制，帶右一軍，攻破桂陽嘉禾藍山攸縣等處。九月，從征至長沙。擢金一正將軍。十一月，克岳州。升殿右二指揮，旋率勁旅，首攻漢陽。下之。擢殿右二檢點。十二月，克武昌。升地官正丞相。太平二年正月，大軍下江南。圍金陵。開芳進攻聚寶門。二月，克之。及金陵定都，以取鎮江揚州功，封定湖侯。三月，復命開芳鳳祥合軍進窺中原。四月，克鳳陽，破臨淮關，入河南。下永城，破歸德。進攻開封，不克。乃解圍破中牟鄭州汜水鞏縣，渡河圍懷慶。與清將勝保戰，敗績。乃長趨而西，破曲沃。據平陽府。勝保圍之。開芳求援於天京。楊秀清命朱錫珉往援，未至。勝保攻之急。開芳謂鳳祥曰：糧餉將盡，而援兵不至，坐以待困，非計也。不如突圍以求食。乃棄平陽，入直隸。與錫珉援軍遇，有衆四萬。進薄天津。累戰皆不利。敗走靜海獨流鎮。清命僧格林沁會勝保軍圍之。復突圍至連鎮。開芳曰：連鎮無險可守，須取高唐州爲犄角。遂率輕騎襲而踞之。於是與鳳祥各自爲守，而兵力分矣。太平四年正月，連鎮陷。鳳祥被執。僧格林沁移兵攻高唐。先是勝保圍高唐。開芳於緣城複立木柵，悉用土壘。週挖濠溝陷坑。又挖地窟。兵皆潛居窟中。礮火不能及。并有地道通城外。每黑夜，輒出數百人，劫營。清軍死者約數千人。勝保鑄大礮樹雲梯攻城，皆無功。清廷故撤勝保，而以僧格林沁代之。僧格林沁圍高唐。故撤南門圍軍，誘太平軍出城。開芳以糧且盡，棄馬突圍出。駐軍馮官屯。距高唐四十五里。在平十八里。脅民夫徧掘陷坑，樹木椿，排列槍礮守禦極嚴。屯內本多富戶，居屋外匝甌牆，形勢甚固。清軍追至屯外圍之。

開芳自持旗登樓眺望。見敵近。卽放槍礮。清軍率受重創。僧格林沁審度形勢。欲引運河之水以灌之。先於屯外週築圍牆。牆外掘濠溝甚寬廣。掘得之土。卽以之壅牆成堤。遂挖挑運河。自東昌三孔橋起。至馮官屯止。共一百二十三里。寬一丈餘。深七八尺。歷一月而成。乃引水入壕。雇民夫數千人。車水灌入牆內。牆外築墩。兵勇護灌。閱三日。屯內水深四五尺。糧草火藥盡濕。開芳遺心腹百餘人。雜難民中。泅水出降。欲藉爲內應。使得突圍出。清軍不分軍民皆殺之。四月十六日。水深逾丈。太平軍皆棲居。清軍復以礮轟樓。岌岌欲墮。開芳不得已。繳軍械。遣使約降。僧格林沁許之。盡調馬步軍數萬人。張左右翼以待。日將午。太平軍百餘人。高張紅傘。擁開芳前抵營。僧格林沁遽命擒之。囚其部將八人。傳開芳進見。開芳戴黃綢繡花帽。穿月白綢短襖。紅綢褲。紅鞋。年約三十二三。攜兩童。均服大紅繡花衣褲。年各十四五。美好如女子。左右揮扇。隨開芳入帳中。見僧格林沁領首示禮意。不答。卽盤足坐於地。兩童東西侍立。帳內總兵以下。皆持刀環侍。怒目視之。開芳仰天大笑。聲振屋瓦。一帳皆失色。久之。僧格林沁始詢之曰。定湖侯何笑也。開芳曰。吾天朝待臣民。敵國皆以信。今背約囚降。以要功。是滿廷之王。其信不及吾左右之童子。安得不笑。僧格林沁曰。吾卽受汝降。汝能招金陵湖北諸酋共降乎。開芳復笑曰。一之爲甚。其可再乎。吾頭固在。王無多言。因請飲食。遂開懷大嚼。旁若無人。僧格林沁疑懼。遂送開芳及其部將於燕京殺之。

秦日綱

秦日綱。廣西貴縣人。少從賣技者游。精拳棒。二十歸鄉里。入防營爲伍長。性憨猛。嘗酌酒滋事。營弁扶之。日綱不能堪。殺營弁。亡命至粵東。變易姓名爲傭。以自給。每輟耕歎息。同耕者詰之。慨然曰。方今天下將亂。男兒豈能鬱鬱因畝畝間哉。其居停固信上帝會者。聞而異之。謂日綱曰。亦知花縣有洪先生乎。子既有志。盍往歸之。爲介于秀全。先是秀全與馮雲山傳教兩廣。鄉民駭疑。每毆辱之。二人勢弱。輒狼狽走。至是得日綱。身材魁偉。勇悍之氣。

攝人肩睫，人皆不敢犯。以故秀全所至，日綱輒隨之。秀全至桂平，糾合楊秀清、韋昌輝，創立保良攻匪會。日綱爲教師，教會民習技擊。清道光三十年，秀全起兵于金田，其明年克永安，建國號，封日綱天官正丞相。太平元年，克武昌，加封頂天侯。二年，克金陵，建都爲天京，復以日綱所部爲禁衛，拱護天王府。十月，秀清奏請以日綱代石達開守安慶。日綱至皖，與清軍戰于集賢關，大捷。殺清將廣音、太伍、登庸，進攻桐城。邑人馬俊三率鄉勇迎戰，復大敗之。克桐城。時清團練大臣呂賢基、舒城、聞相城破，誓死守。日綱圍之，猝不能拔。乃選軍中趨捷者十餘人，夜緣壁入城縱火。城中亂，賢基自殺。遂克舒城。乃收軍入安慶。太平三年，天王召日綱回天京，封燕王。被命北伐。日綱不願行，稟奏秀清，謂北路清妖甚多，兵單不堪往。命仍往安慶撫民。率所部游弋于鳳廬安池之間。累月。八月，清會國藩攻武昌，漢陽復被命援湖北。日綱行抵九江，聞清兵已陷武漢。黃再興、石鳳魁敗退至田家鎮。下誠諭，責再興、鳳魁失機，命以殘衆駐田家鎮，候調度。會得旨，命解再興、鳳魁至天京。而以田鎮軍事委日綱相機辦理。并遣徐鎮興、侯裕寬幫辦軍務。日綱不悅，曰：此必衷王意也。信則任之，疑則遠之，何必遣人。且鎮興、裕寬乏戰略，亦不能殺賊，徒掣肘耳。不敗何待。乃造營半壁山，據山作五壘，引湖溝之北，自田鎮至蕪四十里，沿岸築城，以鐵索四道纜江。自半壁山屬之田鎮，以遏清廷舟師。半壁山者，孤峯拔起，俯瞰大江，一夫守之，百人聽命。所謂天險也。清將羅澤南、李續賓攻之，士恆懼不敢進。續賓手刃逃勇三人，衆稍定。澤南率湘勇梁升拔木椿竹籤，踰溝入。守軍皆再興、鳳魁舊部，以主將被逮，皆疑貳，紛趨下山。墜崖死者無算。清將塔齊布復揮大軍繼進。北岸太平軍亦奪舟逃。舟中相擁擠，水手股栗，輒覆沒。日綱自率所部援之，格于亂軍，不得前。半壁山遂陷。日綱乃作大筏，覆以木簾，編列槍礮，傍岸以固鐵纜。江中橫大筏三，盡鈎小船，節節相連，一節斷，旋復合。清軍乃分水師爲四隊，第一隊以洪爐、大斧、鎔鑿鐵鎖，第二隊專以礮攻護頭隊，第三隊俟鐵鎖開後，駛至下游乘風縱火，第四隊守營。十月，鐵鎖開，巨筏浮游江面，不能自主。清軍縱火焚之，以數大隊掩擊，鎗礮齊發，煙蔽蔽天。太平水師萬餘舟燼焉。日綱棄田鎮，退守廣濟，約陳玉成、羅大綱分守各要隘。清軍以巨礮攻之，諸軍皆不能禦。廣濟陷，日綱復退守黃

梅。黃梅爲湖北江西安徽三省總匯之區。日綱併力拒守。塔齊布羅澤南率兵數萬圍之。以巨礮轟城。城崩五六丈。清軍登者潮湧。日綱自當缺口拒之。遇塔齊布。大怒曰。汝卽清妖塔齊布耶。挺矛赴之。清軍掩護不得前。乃以石擲之。中塔齊布額。暈焉。清軍護之而退。城得復完。越數日。清軍攻之益急。礮彈墮城中。民居多毀。日綱謂其部下曰。城終不可守。多死健兒何益。乃夜縱化龍門遁九江。稟奏秀清。請處分。秀清以鎮與裕寬同軍事。置不問。太平五年正月。日綱會陳玉成羅大綱於蕪州。合兵攻漢陽。克之。二月。克武昌。太平五年三月。清將羅澤南攻武昌。會大霧。日綱遣兵出焚小龜山民廬。澤南陳大東門。伺太平軍歸。要擊之。邏者報日綱。日綱開三門。出城軍萬人。攻澤南。鎗擊澤南中額。斃之。澤南名將也。清軍皆氣奪。不敢逼城者累月。四月。詔日綱還京。會秀清攻江南大營。大營潰。向榮敗死。秀清陰自負。擬篡立。命其下呼萬歲。天王召昌輝圖之。密命日綱賴漢英等爲助。會秀清宴昌輝。并招日綱。二人以死士飾饜童。衷甲以往。昌輝卽席刺秀清。洞胸。秀清大呼。東府死黨羣起。昌輝跳入所飾死士中。日綱自恃拳勇。獨與格鬪。東黨疑日綱殺秀清。皆致死。槍中日綱腕。刀落。遂被殺。漢英率兵入。縱火焚東王府。及火熄。始求日綱。階前死者數百人。皆焦糜不可辨。天王傷之。爲之輟朝祈禱焉。日綱之軍。盡嫻技擊。一可當十百。自粵西至金陵。皆屬於秀清。每戰輒匿其軍於陣後。伺礮火旣衰。兩軍短兵相接。始出其軍臨前敵。當者披靡。以故每戰皆捷。迨自將援湖北。清軍悉其勇。輒以鎗礮遙擊之。喪亡多。軍遂不振云。

章昌輝

章昌輝。原名正。廣西桂平人。家設質庫。饒田產。富甲一邑。道光季年。廣西羣盜毛起。富室一空。獨昌輝以慷慨喜施予。縣人羣護之。盜不敢犯。時洪秀全客桂平。與楊秀清等相要結。圖舉事。聞昌輝名。使石達開秦日綱說之。昌輝慨然曰。吾數聞洪先生賢。今承枉召。是我志也。秀全悉召徒黨。宰牛置酒以迎之。遂假昌輝名。創立保良攻匪會。昌輝復出費充軍餉。購器械。旬日之間。得衆千餘人。潯州吏瞰昌輝富。以反狀白州守。檄桂平令捕之。達開欲

起兵劫獄。秀全曰：此誕其富耳。且聚怒未深。姑待之。乃以巨金賂州縣胥吏。果得釋。副將李殿元者。賄不及。獨怒。令自率兵追昌輝。及韋家祠。復執之。咎責昌輝。縣人圍殿元而噪者數千人。殿元懼。出昌輝。昌輝欲亡去。秀清曰：其如初志何。昌輝憤悟。遂以所部攻殿元。殺巡檢張鏞。殿元逃而免。於是秀清達開日綱皆起兵。應昌輝。會於金田。迎秀全立爲王。咸豐元年閏八月。天王建國號於永安。封昌輝爲北王。昌輝謀略下秀清。而勇悍復不及朝貴。達開。太平軍自粵西至湖北。初不預戰事。迨西王南王戰死湖南。始命昌輝典糧餉。襄朝政。秀清頗嫉之。太平二年。天王定都金陵。命將援湖北。昌輝遣其承宣張子朋同往。子朋兇橫。因爭船激怒水師。羣相鼓噪。秀清召昌輝至水師營。數其罪。杖責數百。昌輝不能與。昇而歸。部下皆憤。有裨將揚言於衆曰：東王北王。同起草澤。與共患難。今天京甫奠。即奴馭而杖辱之。後將何堪。昌輝聞之怒。斥裨將曰：東王替天行道。罪責無不公。汝敢有怨言乎。因殺之以謝秀清。袁黨謂其懦。益易之。曾釗揚私謂何震川曰：北王陰忍而殘刻。今扶之而不怒。其心叵測。蕭牆之禍。正恐未遠。震川亦以爲憂。先是金陵有名妓曰紅鸞。秀清倖臣侯謙芳暱之。迨克金陵。紅鸞轉入北韋府。謙芳因繩紅鸞之美於秀清。秀清索之不得。怒。矯天王命。傳紅鸞入女館。謙芳猶未慊。說秀清曰：紅鸞爲北韋禁嬖。今自口而攫之。怨毒深矣。既垂之而不早圖之。後將噬臍。秀清曰：彼弱弟耳。何能爲。遂請于天王。命昌輝如湖北。復囑羣下稟奏挽留。以窺其意。昌輝欣然請行。期。秀清謂謙芳曰：吾言其無他。今果然。乃改遣石積祥黃再興。而自將援湖北。太平三年夏。復克武昌。東黨有言昌輝廣植徒黨。要挾天王。將不利于己者。秀清怒。馳歸天京。撻辱之。昌輝不敢較。昌輝有嬖人曰黃啓芳。與東黨侯裕寬交惡。裕寬者。謙芳之弟也。啓芳不勝。求助于天王之妹洪宣嬌。宣嬌以傅善祥侯謙芳故。銜秀清。因使啓芳偵東府。會太平軍敗于曹縣。指揮官羅大封執其統將降清軍。既而逃歸天京。變姓名曰黃昌漢。輦金入東府。賫緣裕寬。得封爲天侯。啓芳聞之。大喜。告昌輝。昌輝使人覘之。信。因宣嬌以奏於天王。天王命昌輝捕大封。鞫訊吐實。並得裕寬得賄狀。秀清大驚。不得已殺裕寬。由是益怒昌輝。太平五年。秀清遂遣昌輝援江西。屢戰皆不利。昌輝自臨江入瑞州。時秀清自出擊江南大營。大營潰。清統帥向榮

敗死。天京解圍。秀清因有自立意。令其下呼萬歲。天王密召昌輝。達開圖之。昌輝奉詔。兼程馳歸。先入東王府稱賀。秀清詭厲其江西之敗。昌輝出。指其門誓曰。我見伯有之門生莠也。越日。秀清招昌輝宴。昌輝與宣嬌賴漢英謀。使衷甲圍東府。自以勇士飾嬰童。戒備以往。酒數巡。昌輝起爲壽。遽抽刃搥秀清胸。刃出于背。秀清號。昌輝曰。吾奉天父天兄命。誅叛臣楊秀清耳。于是階下死士盡起。呼聲聞數里。圍者自外破扉入。悉搜秀清親屬及其黨。殲焉。死者數萬人。昌輝復醢秀清爲羹而餒之曰。聊以報吾怨也。遂代楊氏秉朝政。達開自湖北聞變。亟歸。遇昌輝于朝堂。責之曰。東楊跋扈。不得已誅之可也。奈何食肉以爲快。且其家屬何罪。而盡殺之也。昌輝勃然曰。子亦黨楊氏耶。悻悻然歸。陰召其黨曰。不去石氏。吾患未已。達開聞之。連夜亡去。偵者以告。昌輝頓足曰。我即不仇石氏。石氏仇我。怨不可解矣。遂以兵圍翼王府。殺達開母妻十餘人。天王救之不及。跋扈之狀。有甚於楊。于是東楊西蕭翼石之黨。皆甘心焉。達開至寧國。聞母妻被戮。欲悉合皖贛之兵。清君側。天京震恐。天王復密令漢英大綱攻北草。昌輝以怨己者衆。知不敵。率死士數十人。絕城夜遁。將渡江入六合。與捻合。會有東楊舊部屯于浦口。遇昌輝。要擊之。遂被擒。械送天京。時天王已收其家屬下獄。乃命與昌輝駢誅之。夷其族。距東楊之敗。才月餘耳。昌輝頗知書。少時兩應縣試不售。因棄而爲商。工心計。雖貴爲列王。嘗販運貨物以營利。

石達開

石達開。廣西桂平人。舉孝廉。喜言兵。道咸間。兩廣羣盜蠭起。洪秀全楊秀清。集教民創設保良攻匪會。隱圖舉事。達開聞之。投袂起曰。此正英雄得志時也。走謁秀全。悉毀其家以助餉。與秀全等結爲四十兄弟。道光三十年。秀全起事。金田屯大黃江。進趨大黎。達開舉室以從。迨克永安。建國號。敘功。授達開左軍主將。封翼王。達開身材長大。面黑高顴。善戰多奇計。太平軍自永安趨湖南。攻長沙。破岳州。漢陽武昌。經安徽下金陵。與清軍大小數百戰。獨達開所部未嘗挫。清軍稱之曰石敢當。所至爭避之。太平二年春。天王定都金陵。命攻上江。考柵爲翼王府。侍

從儀制視北王。先是天王破安慶。棄之不守。逵趨金陵。定都後。復命胡以洸攻安慶。四月辛卯克之。皖省民情頑悍。以太平宗教法制之不相習也。多抗命。八月。天王命逵開赴安慶一帶安民。逵開既至安慶。以誠意相要結。擇村里之有聲望者爲鄉官。緝盜賊。嚴軍旅。使各安其業。更督民造糧冊。按畝輸錢米。於鄉里之豪暴者抑制之。無告者賑恤之。立權關於星橋。以鐵鎖巨筏橫截江面。阻行舟。徵其稅。軍用裕而百姓安之。頌聲大起。逵開亦以之自負。東王楊秀清忌之。十一月。以燕王秦日綱代逵開。命還京。襄理朝政。太平三年八月。清軍水陸自岳州下窺武漢。復命逵開督師援之。至蕪湖。聞武漢已陷。逵開退守安慶。遣軍分屯孔壠驛小池口。以援九江。十二月。清會國藩攻九江。命部將羅澤南攻梅花洲。逵開自至九江禦之。大破國藩。殺清參將董添雲。甲辰。復大敗羅澤南於梅花洲。國藩命蕭捷三水師越湖口。攻姑塘。逵開以小舟燒其坐營。捷三陷於鄱湖不能返。己未。逵開復以小艇夜襲營。奪國藩坐船。國藩惶急自投於水。左右救之。掉小舟遁入澤南營。太平四年正月。清軍圍潯州。逵開擊却之。十月。克新昌。瑞州。臨江。安福。分宜。萬載。袁州。吉安。進攻南昌。清將周鳳山解九江圍。率勁旅數萬人援之。時逵開兵才數千人。餘兵盡分赴旁邑。諸將皆言當棄南昌避之。逵開曰。彼知我虛而迫我。正可以疑兵擊走之。何患也。乃張燈火於山谷間。爲疑兵。率敢死士乘夜襲之於樟樹。清軍素長遠開名。又不意其衆也。不戰而潰。逵開以數十騎逐之。大奔不能止。鳳山走南昌。國藩亦遁歸省城。於是江西八府五十餘縣皆下。百姓皆獻糧冊輸錢米。納款於軍前。不下者。惟南昌。廣信。饒州。贛州。南安五郡。天王嘉之。益以皖贛諸事付逵開。金陵上游。遂恃之爲長城矣。太平五年五月。清向榮軍潰於金陵。天京無圍師。東王楊秀清陰有自立意。北王韋昌輝以計殺秀清。醢而烹之。夷其族。逵開自洪江聞變。趨歸。責昌輝曰。吾儕以救世起義。八載於茲。方期兄弟同心。討滅妖逆。底定天下。楊氏驕悍。中道毀盟。不得已而除之。方宜哀矜勿喜。奈何多殺以逞。食肉爲快乎。昌輝不悅。斥之曰。子亦黨楊逆乎。陰召其黨。欲併圖逵開。逵開馳歸。告其親屬曰。吾不可留矣。星夜縋城奔寧國。昌輝聞逵開遁。頓足曰。我雖不仇石。石必仇我。怨不可解矣。遂圖翼王府。殺逵開母妻子女。并其黨數十人。逵開大憤。欲悉收皖贛之兵圍天京。

天王懼。復與東翼二府餘黨謀殺昌輝。夷其族。傳首寧國。以謝達開。甘言召達開回。達開既至。使如秀清故事。輔朝政。而楊韋餘黨跋扈。終疏達開。達開危懼不自安。遂還安徽。思自皖而鄂以入川。爲自全計。太平六年十一月。達開由撫鏡趨吉安。衆號數十萬。清會國荃拒之於吉水。七年正月。達開軍於河口鎮。命部將率兵二萬窺浙江。清將福興遁守廣豐。二月。達開破廣豐以入浙。略江山。圍衢州。西克常山開化。南克遂昌松陽。三月。克處州。與温州一江隔。烽火相望。民團復處處助之。全浙大震。清廷命李續賓攻九江。會國藩李元度援浙。達開圍衢州三閱月。掘地道五。不克。會糧盡。解圍入福建。清將周天受晏瑞書等躡之。而浙江郡縣復陷。十月。達開聞九江撫州吉安失守。遽師入江西。南破信豐。北略景德。遂自信豐攻南安。窺贛州。會國藩遣蕭啓江張運蘭等分兵援之。太平八年正月。達開自江西入湖南。清總兵劉培元彭定泰拒之。敗績。二月。達開克宜章興寧郴州桂陽。人馬行六晝夜不絕。時湖南兵餉皆竭於遠征。腹地空虛。省城大震。清撫駱秉章听夕草檄告州郡。一月內援師集者四萬人。三月。達開趨新田寧遠。圍永州。不克。六月。圍寶慶。連營百餘里。清援軍大至。達開不欲戰。謀解圍入黔蜀。會其軍多廣西人。思歸鄉里。遂由新寧城縣山徑。閉關趨廣西。偏桂林。清將劉長佑蕭啓江躡之。至興安。達開已西過義寧。侵黔邊。聞追軍至。列陣大榕江過之。達開連戰不得志。乃破慶遠。走湖南。九年正月。達開自湖南藍山桂陽入廣東。掠樂昌仁化南雄。克清遠。入英德陽山。四月。達開軍慶遠。命部將朱洪新余忠扶分率後旗。自廣西西隆渡紅江入黔。掠興義貞豐歸化。破廣順永寧修文。復掠安順安平。所至苗人響應之。黔省殘破殆半。清廷命田興恕援之。會忠扶專橫。爲其部下所殺。其軍遂破獨山。掠平浪。走廣西融縣入湖南。已潰散不復成軍矣。先是達開兵分前後左右中五旗。左後兩旗。衆各四五萬。尤稱勁旅。至是後旗遽敗。達開復命張志功率左旗出靈川。攻桂林。清廷以巨金誘志功。志功遽降清。全旗復噪潰。達開憤甚。自率數萬人破武緣。略遷江南寧。走忻城。由興業。破北流太平。清將劉坤一率楚軍躡之。九月。略賓州上林宣化。破綏寧城縣。復入湖南。清將劉長佑督全州軍數萬。扼之於武岡新寧間。達開走東安道州零陵。入廣西潯州。十年五月。蔣益禮攻潯州。達開部將余明管率萬人以

降。而朱洪新復戰歿于桐梓。全軍覆焉。於是達開軍不復振矣。達開自憤懣出京。率其部衆。馳驅湖廣閩浙。行踪飄忽。聲勢震盪。援軍之躡之者。常數十萬人。迨左後二旗敗。所得郡縣。相繼復失。益銳意入黔蜀。時會國荃圍安慶。太平軍戰不利。天王以達開深得皖民心。召之還京。達開報書而已。十一年閏八月。達開自碭江大舉入黔。分三旗。旗各四萬人。與部將賴裕新李復猷分率之。出桐梓邊義。清兵追躡。達開由普安入滇中。十月。復道鎮雄入四川。破筠連宜賓高縣。清駱秉章屯兵于敘州之橫江。過之。達開與之戰。敗績。復還入滇。十二年二月。達開命部將率輕騎入滇中。破興安。秉章分兵援之。達開復自滇入川。先命賴裕新率中旗出寧遠。李復猷率右旗趨黔境。自率前旗四五萬衆。由米糧壩渡金沙江。會裕新戰歿於寧遠。中旗被圍。三月。達開自出寧遠援之。自恃生長嶺嶠。善涉奇險。躡幽徑。聞寧遠亂山中。有間道。久塞榛蕪。由之北行。出山。即成都南門外。可襲而取也。乃率其衆趨之。誤入印部土司。與後輜重相失。復偵得越嶲大路。有漢夷兵。仍由小道至柴打地。將過大渡河。前隊結筏已濟矣。日垂暮。達開懼清軍來襲。復令濟者返西岸。期明日畢渡。是夜暴雨。大渡水溢數丈。而東岸清軍忽至。列戍河岸。達開糧罄路窮。乃射書於對岸清軍。約讓路。啗以重利。復使使說土司嶺承恩。乞緩兵。皆不得。乃殺嚮道二百人。憤怒出營。命亂流而渡。水湍急。登筏者輒溺。乃止。達開久處絕地。益困憊。無所得食。日殺馬煮桑葉爲糧。四月。嶺承恩偵知太平軍氣衰。無鬪志。率漢夷兵蹙之。達開部黨潰散。乃奔老鴉旋。衆猶七八千。夷兵前阻。軍械多失。妻妾五人。抱幼子環達開而泣。達開曰。散耳。我家已破於天京。諸子年長者。皆駢首就戮。此呱呱者。更何所戀哉。揮之各使去。五人者。皆相率抱幼子自沈於河。裨將之從者百餘人。達開飲泣不能仰。慨然謂部衆曰。戰必死。降亦必死。均一死也。不如其戰矣。遂率死士數十人。突土司營。殺夷兵千餘人。力屈被縛。嶺承恩檻送成都。駱秉章劉蓉訊之。達開箕坐。侃侃而談。自稱年四十三。於當時清將之負名者。皆加貶辭。惟謂曾國藩雖不以善戰名。而能識拔賢將。規畫精嚴。自是健者。又於獄中述其生平事跡。及天王起事以來。與清軍相持。始終勝敗得失之由。爲日記四冊。語頗竅要。秉章乃上其事於清廷。得旨戮於成都市。達開於太平朝初起諸王中。號爲愛人。所至

有仁義名。附者頗衆。又工文辭。喜吟詠。在江西與曾國藩相持連年。每窘國藩。國藩雅重之。嘗以書招達開。達開報以詩云。曾摘芹香入泮宮。更探桂蕊趁西風。少年落拓雲中鶴。陳跡飄零雪裏鴻。聲價敢云空冀北。文章今已遍江東。儒林異代應知我。祇合名山一卷終。不策天人在廟堂。生慚名位掩文章。清時將相無專例。未造乾坤有主張。况復仕途多幻境。幾何苦海少權場。那如著作千秋業。宇宙長流一瓣香。揚鞭慷慨泣中原。不爲仇讎不爲恩。祇覺蒼天方憤憤。莫憑赤手拯元元。三年攬轡悲羸馬。萬衆梯山似病猿。吾志未酬人已苦。東南到處有啼痕。若個將材同衛霍。幾人佐命等蕭曹。男兒欲畫麒麟閣。半夜當爛虎豹韜。滿眼山河增歷數。到頭功業屬英豪。每看一代風雲會。濟濟從龍畢竟高。大帝勳華多頌笑。皇王家世盡洪濛。買人居貨移神鼎。亭長遺鄉唱大風。起自匹夫方見異。遇非天子不爲隆。醴泉芝草無根脈。劉裕當年田舍翁。國藩覽之。爲之贊歎不置。

洪秀全

洪秀全。廣東花縣人。身材適中。美秀而文。兩目斜上。嚴重有威。生於清嘉慶十七年七月。父國游早死。幼穎悟。七歲讀書。目數行下。尤好史學。於古帝王之成敗興亡。論斷歷歷不爽。嘗應童子試赴郡。遇一星者。就而問之。星者曰。子非於青紫中人。然貴不可言。願自愛。秀全笑謝之。試畢。不第。時朱九疇倡上帝會。以恢復明室爲志。秀全與同邑馮雲山往師之。九疇死。秀全被推爲教主。官捕之。急。闖入耶教。可藉其力以抗官。乃往香港。受教于英牧師郭笠士門。以傳教游廣西。居鵬化山。桂平。曾玉珩。相延爲塾師。遂與楊秀清相結識。武定蕭朝貴。秀全妹婿也。與貴縣石達開。秦日綱。皆客桂平。咸師事之。於時廣西游饑。羣盜蜂起。慶遠則有張家福。鍾亞春。柳州則有陳亞漢。武定則有劉官方。梁亞九。象州則有區振組。潯州則有謝江殿。大股數千人。小股亦數百。四出擾民。焚掠甚慘。秀全乘之。與馮雲山。楊秀清。創立保良攻匪會。練兵籌餉。而揭竿之勢以成。先是秀全忽暴死。胸腹尚溫。七日復甦。謂衆云。上帝召我。當有大劫。拜天則免。遂造真言寶誥。謂天曰。耶火華。耶穌爲長子。秀全次之。嗣是輒偃臥一室。

禁人窺伺。不進飲食。歷數日而後出。出則謂與上帝議事。衆盡駭異。謂秀全果天生之肖子也。迨創保夏攻匪會。歸附者益衆。清桂平令麟而擒之。搜獲入教名冊十九本。白狀大府。時桂撫鄭祖琛。吳興雙林鎮人。性慈祥。有佛子之稱。但曰。秀全耳目甚衆。視其罪可殺則殺之。不可。不如釋之。久繫獄。萬一變生。我輩性命不足惜。如百姓何。躊躇久之。復曰。窮治株連。人命至重。卽釋之耳。令歎曰。購捕經年。釋之頃刻。此所謂縱虎入山也。秀全既出獄。以時值丁未之後。適應洪傘之讖。反志益決。道光三十年六月。清廷命鄭祖琛出省督師。移駐平樂府。秀全始起事于金田村。金田村者。桂平縣地。西則武定桂縣。客民風與土民雜處相仇。村人韋昌輝。饒于資。與秀全結。號曰十兄弟。反狀漸著。有訴昌輝等罪狀于郡者。檄桂平令緝治。下昌輝獄。已而釋之。副將李殿元謂令受金。率兵追昌輝。及于韋家祠。答責昌輝。其夜。昌曰。糾衆放火。殿元逃而免。刺殺巡檢張鏞。於是楊秀清。石達開。秦日綱。皆起兵。會金田。僉曰。洪秀全天兄。宜爲王。遣人至花洲山迎之。遂踞金田以起事。分赴旁邑。招納諸亡命拜上帝會者。貴縣林鳳祥。揭陽羅大綱。衡山洪大全等。率黨從之。有衆萬人。兵皆蓄髮。易服制。清廷罷鄭祖琛職。命向榮爲廣西提督。副都統烏蘭泰幫辦軍務。移兵進剿。十一月丁巳。與戰于金田。大敗。副將伊克坦布被殺。明年。清文宗立。是爲咸豐元年。秀全復破向軍。進屯大黃江。分掠桂平。武宣。貴。平南等縣。前鋒及象州。八月。秀全率大軍分水陸趨大黎。窺永安。向榮烏蘭泰分兵追之。烏軍阻山內。秀全反擊向軍。乘兩薄之。向軍大敗。閏八月甲申。克永安。始建號曰太平天國。秀全自立爲天王。妻賴氏爲后。封楊秀清爲東王。蕭朝貴西王。馮雲山南王。韋昌輝北王。石達開翼王。洪大全天德王。秦日綱胡以洗等。稱丞相軍師。清廷大震。命欽差大臣賽尚阿。合軍數十營圍永安。向榮統北路。烏蘭泰統南路。有爲太平軍說向榮者曰。兵法圍城。當缺一隅。榮信之。太平元年二月戊戌。太平軍自永安潰圍。北趨陽朔。清軍邀擊于山岡。天德王洪大全被擒。會大雨。清軍乏食。天王復合隊與戰。清軍敗績。殺其總兵長瑞。長壽。董光甲。鄒鶴齡。逕趨桂林。烏蘭泰率死士躡之。至六塘墟。距桂林僅六十里。太平軍用兵夾攻。奮力反擊。清軍復大敗。烏蘭泰中礮死。三月。天王圍桂林。踰月不克。解圍北趨靈川。克興安全州。入湖南境。清將江忠源。

慮太平軍乘湘水漲，刼船東趨長沙，急扼蓑衣渡，渡狹，夾岸多林木，伐木爲堰，張旗幟爲疑兵，太平舟師果蔽江下，忠源扼擊之，鏖戰兩晝夜，大敗，南王馮雲山中礮死，天王棄輜重登陸，奔永州，阻水而東，克道州，衡州，桂陽，郴州，軍聲復振，八月，西王蕭朝貴以輕騎襲長沙，不克，死之，時天王屯兵郴州，聞朝貴死，悉衆攻長沙，以郴桂礦夫穴地攻城，九月丙子，南城魁星橋地雷發，城裂四丈，清軍死力拒戰，呼城丁掘街石塞缺口，城復完，十月己卯，金雞橋地雷再發，甲午，魁星橋地雷又發，城崩八丈，皆不克，時以圍攻久，地道屢無功，軍中有攜貳者，天王欲還軍，會得王靈，衆皆呼萬歲，遂于乙未夜半，悉衆從浮橋渡湘西走，道龍回潭，趨寧鄉，故分小股南行，明日日中，城軍瞭望壘空，動色相告，將帥愕視，不知所往，戊戌，太平軍克益陽，掠民船數千，出洞庭，窺岳州，清提督郡守皆先數日棄城走，十一月己酉，克之，時湖南爲防江計，塞土星港，拒太平軍，數月間，所遮留估舟，約五千餘，至是，太平軍盡刼之而東，燦燿萬艘，帆幟蔽江，所過城鎮，望風披靡，乙卯，薄漢陽，戊午，克之，遂燒漢口，延綿十五里，火聲隆隆，五晝夜不絕，漢陽與武昌隔一江，面廣闊，值北風起，則斷渡，冬令水涸，江中漲巨洲，太平軍自漢陽以鐵索繫船，爲浮橋，絡繹達武昌，往來渡兵，風濤竟不作，兩軍皆驚爲神助，乃傍省城四圍築壘，日夜環攻之，時清援軍萬人，駐洪山，號勁旅，隔太平軍壘不能進，遣諜約城內夾擊，鄂撫常大淳慮城啓，恐有失，不許，太平軍瞰文昌門濱江，穴地丈餘，置地雷，己卯，地雷發，省城崩，城內外援守軍皆匿走旁邑，太平軍遂登城，天王既克武昌，有衆五十萬，船數萬艘，與楊秀清等議所向，或言據武昌爲都城，遣兵道襄樊，北伐中原，或言金陵天府，饒財富，宜踞爲根本，徐圖進取，楊秀清主之，遂決意東下，太平二年正月丁未，天王棄武昌，悉衆東下，帆檣蔽江，陸軍夾兩岸行，壬戌，克安慶，清江南總督陸建瀛悉出舟師，分屯東西梁山扼之，比太平軍至，水師輒委船而去，建瀛遁歸金陵，辛未，太平軍圍金陵，環城築壘二十四，其船自新洲大勝關，迤邐至七里洲，水陸號百萬，晝夜攻城，二月乙酉，儀鳳門地雷發，城崩，太平軍驟登，而穴內尙埋地雷二，須臾又發，登者皆斃，清軍爭割耳獻功，而太平軍他股，已由三山門越城入，殺建瀛，及將軍祥厚，提督福珠洪阿，羣臣議定都東，王楊秀清曰，河南居天下之中，古東京也，立都便。

天王以爲然。讒留黨守金陵。自將由淮安北伐。有老年舟人呼曰。河南水少而無糧。敵困不能救。金陵有長江之險。城高池深。民富食足。尚不立都。而往河南何也。天王悟。遂攻金陵爲天京。毀總督署爲王宮。立法條十。號曰天條。凡拜邪神有禁。殺人害人有禁。不孝父母有禁。讀妖書有禁。奸盜有禁。欺詐有禁。匪財不報有禁。夫婦同宿有禁。私逃者斬。兵入民房者斬。所至設高座說天條。謂之講道理。遣丞相林鳳祥羅大綱李開芳立昌等徇鎮江揚州。皆下之。先是太平軍棄武昌。清提督向榮復陷之。率所部躡之而東。迨抵金陵。陷已旬日。乃率部將張國樑繞道至孝陵衛軍焉。是謂江南大營。同時清都統琦善亦以欽差大臣。帥直隸陝西黑龍江馬步諸軍。由河南進至揚州。軍于城外。號江北營。五月。江北軍造樓船攻揚州。太平軍拒之。殺清總兵雙來。十一月。江南軍圍鎮江。天王移皖南軍救之。丁卯。清軍陷揚州。會立昌走瓜州。太平三年二月。江北軍圍瓜州。太平軍大破之。殺清總兵瞿騰龍。遂克太平。自瓜州結壘屬於江。以達金陵。舟師往來如織。閏七月辛巳。清軍陷太平。壬午。楊秀清出兵奪清壘。不利。三路皆潰。十月。清江北軍犯浦口。江南軍復分兵渡江。由金湯門外。五路並進。太平舟師飛槳迎戰。連戰皆敗。於是太平軍自金陵迤東而南。兩花臺諸壘盡下。清軍偪南門而營。時天京久困。圍師糧不繼。命男婦之老弱者。出城外刈麥。既出而閉之。以減軍食。太平四年三月庚寅。清將吳全美等率紅單船攻三山。陸師助之。太平舟師敗績。三山者。濱大江。據金陵上游。太平以重兵扼守。以阻清水師之西下者也。七月。清江南軍陷蕪湖。十一月。清軍圍瓜州。天王遣兵援之。太平五年三月戊午。克揚州。庚午。清軍復陷揚州。時清江蘇巡撫吉爾杭阿圍鎮江。令知府劉存厚進高資。築三壘於煙墩山。以絕城糧。天王患之。遣輕騎數萬出句容。約鎮江軍趨高資。圍劉存厚營。吉爾杭阿兵才數千。清將皆閉壁自保。不相救。或勸其棄高資。吉爾杭阿不聽。遂馳騎入存厚營。太平軍攻之。吉爾杭阿中礮死。向榮聞警。遣張國樑馳救。太平軍連戰不利。遂解存厚圍。返天京。當時向榮張國樑。在清軍中。雖負重望。稱江南勁旅。聲威遠。出北軍上。然頻年攻戰。餽餉乖時。軍士忍飢赴敵。頗缺望。楊秀清知可乘。請于天王。夾攻江南大營。密約吳如孝率鎮江兵自西而東。趨天京。拊清軍之背。天京大軍自西而東。與相應。更命

陳水金柱關等處之兵。橫截旁山。秀清自率勁旅。出通濟門。先命賴漢英率紫金山兵奪七甕橋以挑之。向榮張國樑狂常勝。併力截殺。漢英忽稍却。向榮益促大營兵赴前敵。吳如孝以鎮江兵突薄之。大營空虛。守兵驚散。前敵清軍見大營火起。退無所據。倉卒亦潰。太平軍數路乘之。清軍死傷遍地。遺械無算。國樑獨以身翼榮突圍出。稍收散卒。退保丹陽。太平軍復躡之。環城外築壘幾遍。榮憤懣成疾。七月。榮疾大漸。或勸退保蘇常。榮喟然曰。吾病不能進。更何顏南走。乃以軍事付國樑而卒。天王之起兵于金田也。自桂林而長沙。而武昌。所至榮皆躡之。迨定都金陵。榮復頓兵堅城。日夜與太平軍鏖戰者四年。至是天京將士。皆額手相慶。天王益日居深宮。臣下罕得見。軍事皆決於楊秀清。文報先白東王府。刑賞黜陟由之出。諸王如韋昌輝。石達開。雖同起草澤。比于偏裨。常令遠攻江西湖北。江南大營既潰。天京無圍師。秀清自以爲功莫與京。陰欲自立。脅天王過其宅。令其下呼之。萬歲。天王不能堪。曰。弟稱萬歲。何以處兄。因召昌輝密圖之。昌輝新自江西敗歸。秀清責其無功。詬厲頗甚。昌輝恚。亦欲殺秀清。一日秀清招飲。昌輝戒備以往。即席刺之洞胸。齧而食之。乃令于衆曰。東王謀反。吾陰受天王命誅之。衆恟懼。昌輝令閉城。搜東王黨藏焉。於時石達開在湖北洪山。黃玉昆在江西臨江。聞亂趣歸。達開頗誚讓昌輝。昌輝怒。將併圖之。達開鎚城走寧國。昌輝悉殺其母妻子女。天王乃大恐。使使隱約秀清餘黨于城外。共攻北王府。昌輝潛逸渡江。爲邏者所獲。縛送天京。磔之。夷其族。傳首寧國。甘言召達開回。既至。羣議如秀清故事。輔朝政。天王已誅楊韋。益疏忌達開。達開危懼不自安。還走安徽。不復歸。於是始起諸王路盡。乃封陳玉成爲英王。李秀成忠王。李世賢侍王。黃文金堵王。楊輔清輔王。其餘踵起封王者。至九十餘人之多。兵事專于忠王。而內政則天王兄弟安王洪仁發。福王洪仁達柄之。二人貪婪險刻。狼狽爲奸。刑賞黜陟之事。遂不復如東王時之嚴飭矣。太平六年閏五月。清張國樑陷句容。十一月己丑。國樑復陷鎮江。吳如孝遁歸天京。同日清將德興阿陷瓜州。太平七年二月庚申。清軍陷秣陵。張國樑進攻七甕橋。天王開西南門出大隊迎戰。不利。清軍始逼天京而軍。和春張國樑定計作長壕困之。度地勢險夷。溝而垣之。鑿山越水。周城百餘里。諸營大小相維。而以舢舨聯爲水營。絕應

援。天王患之，誠各門嚴守備。潛結壘於壽德州。悉銳出突長圍。不克。死者枕籍。是時清廷圍師八萬人。和春雖爲帥。戰事皆倚張國樑。國樑之名著甚。八月。九洲太平軍越江浦攻浦口。連戰皆勝。國樑分河南兵渡江救之。太平軍分兵禦清軍。益力撲浦口。壬戌。江北大營潰。清統帥德興阿乘艇船遁揚州。于是江浦天長儀徵皆克。九月乙亥。英王陳玉成攻揚州。克之。丁亥。清將張國樑復陷揚州。己丑。太平軍克六合。太平八年三月。張國樑犯九洲。天王遣兵拒之。敗績。附州諸壘皆被燬。十月。清將李若珠犯六合。太平軍出紅山窺截其後。圍之數重。併力擊之。若珠僅以身免。太平軍遂乘勝圍浦口。克之。殺清將周天培。太平九年正月。清將張國樑大舉犯浦口。遂進攻九洲。乙亥。陷之。直逼天京。其軍銳甚。旋與和春議。招降太平軍。於是太平壽德州守將秦禮國。七里洲守將謝茂廷。相繼納款於清軍。約內應。二月戊戌。清軍進攻七里洲。秦禮國應之。上關下關皆陷。江南大營復振。天京岌岌。不可終日。李秀成命李世賢取道廣德安吉。進克杭州。和春命張玉良分兵援之。三日丁卯。杭州復陷。李世賢還攻東壩。克建平溧陽。圍金陵。窺常州。是時大營清兵。四出赴援。援浙兵之不能遽返。天王覘大營兵薄。促浙皖江北之軍。十道並進。奮集天京。初。清軍自長圍成。自謂天京指日可下。將士頗驕。和春復念饋餉之艱難也。議月餉三分而減一。其一俟功竣補給。而存營銀尙數十萬兩。士卒憤怨。傳單相煽惑。張國樑憂之。而不能爲謀。議月遣諜偵得其實。先以重兵屯句容。以斷清軍之後。而日夜出兵撲圍師。國樑拒戰八晝夜。勢不能支。餉又不濟。軍心益涣散。戊申。太平軍前後夾攻。天忽酷寒。至夜。雷電以風。大雪厚數尺。清軍殫凍。居守者譟集翼長王俊帳下。索餉不得。遂肆掠通衢。拒戰者亦遽退。太平軍乘勝薄之。清營各處忽火起。軍士紛竄。國樑殺數人不能止。遂全軍潰散。和春退奔丹陽。國樑方欲如前年故事。收集潰卒一萬二千人。亦退丹陽。圍再舉。李秀成率數萬騎。由溧陽宜興步步躡之。張開南門迎戰。望見秀成旗幟。軍復潰。國樑憤甚。揮親軍奮馳塞戰。潰卒塞途。墜蔽不得前。秀成遣勇士濶入潰卒中狙擊。創甚。國樑躍馬丹陽河而死。遂克丹陽。和春退保常州。太平軍復躡之。和春收潰卒迎戰。受重創。退至耕墅。嘔血而死。四月。李秀成克常州。蘇州。清廷大震。詔曾國藩爲兩江總督。欽差大臣。命規

取天京。左右皆勸國藩直逼金陵。規復蘇常。國藩不從。堅持力攻安慶。取建甌之勢。自是天京無圍師者二年。太平十年八月。清會國荃陷安慶。十一年三月壬寅。會國荃陷巢縣。甲辰。進襲和州。復陷之。四月壬申。國荃陷太平。甲戌。復陷蕪湖。五月。國荃進犯秣陵關。太平守將舉關降。於是諸要隘相繼盡失。清軍水陸直逼天京。營於雨花臺。是爲湘軍圍攻天京之始。天王數使使趣李秀成。自蘇常赴援。而數出勁卒攻雨花臺。輒不利。五月。太平軍與清軍戰於六郎。復大敗。天王益不安。促李秀成還天京。時清左宗棠攻衢州。李鴻章圍松滬。秀成奔命未遑。乃先遣其國宗引兵數萬。自蘇州西援。六月。與清軍屢戰於雨花臺。互有勝負。天王收其軍入城。八月。江南大疫。清軍互相傳染。死者山積。而李秀成引兵三十萬。自蘇常奔至。東起方山。西訖板橋鎮。連營數百。圍清廷圍師數匝。水陸阻隔。不相聞。會國藩在安慶。憂之廢寢食。飛檄令國荃撤圍。國荃數突圍。不得出。乃分其軍爲三。以其二防城。中夾攻。自將其一當秀成。一夕。築小壘無數。留戍卒守棚。選健者日夜拒戰。更代眠食。軍士傷亡頗衆。己酉。部將倪桂節中礮殞。國荃左頰亦受鎗傷。裹創以巡營。李世賢復自浙江引軍與秀成軍合。鑿地埋火藥。辛酉。兩穴同發。土石飛躍如雨。清營牆垣。國荃督軍士露立牆外。環擲火球。併力拒之。牆缺復完。國荃乃令各軍掘內壕。秣厲以守。會糧盡。清將皆謂非出一死戰。不足以圖存。國荃乃命李臣典等出東路。會貞幹出西路。彭毓楠蕭孚泗等出南路。甲申。臣典燒東路四壘。火光燭天。太平軍之在西南者。倉卒驚潰。三汊河太平軍。復爲會貞幹所敗。蕭孚泗彭毓楠乘勝逐之。東路西南路諸太平軍。皆不戰而靡。於是蘇浙數十萬之援師皆解體。蓋自金田起兵以來。未有如此之敗。厥也。太平十二年四月癸卯夜。清會國荃陷雨花臺土城。進襲九洲洲。令陸師伏叢莽中。從隄埂缺。斃水而進。而以水師夾洲上下。庚申。昧爽。兩岸戰旗並舉。突出襲之。守兵伏洋鎗隊於洲。三面伺閒出擊。清軍精銳多傷亡。至夜欲退。清將彭玉璽令曰。洲破乃還師。時月色冥濛。西南風大作。清軍移船。以火箭射太平舟師。風烈火猛。延及洲上卡棚。守兵亂。清軍呼噪而登。九洲洲遂陷。州兵萬餘人。爭赴火蹈水。無一肯降清者。於是印子山。上方橋。江東橋。中和橋。雙橋門。七鬚橋。秣陵關。博望鎮。諸壘盡陷。十一月。清軍於神策門掘地道成。戊申。火

發。城崩數丈。清軍肉薄爭登。太平軍扼守月城橫洞。清軍不能進。死傷三百餘人。李秀成聞警。自蘇州領兵數萬。分布丹陽句容間。自率百騎入太平門。勸天王棄城同走。不聽。會國荃益募新軍。增圍師。太平十三年正月戊申。李世賢黃文金克績溪。入江西。秀成益說天王出就食。天王流涕不肯去。秀成不得已留天京城守。會國荃度城中糧將匱。命水師巡江。見民間運米入城者。輒奪之。命陸師繞鍾山後。斷陸路運道。更命梁美材屯洪山。朱南桂屯北固山。塞神策門。傍元武湖阻水爲圍。天京之圍始合。而糧絕矣。四月。秀成日放婦孺出城節食。終不給。乃以無米告。力勸天王。就食江西。天王命衆曰。闔城食甜露。可以養生。甜露者。草也。旋命衆於城內毀民房種麥。以救飢。復緩不濟急。人心益解。天王自知大勢已去。益託病不理朝事。一夕。密召仁發。仁達至宮中。謂之曰。朕自誅殺楊韋後。常忽忽不樂。近日偏處圍城。益復無聊。秀成日聒朕就食四方。朕一教民。賴天父之力。自金田起事。而躋大位。已十餘年矣。今兵敗勢蹙。翼胞復被害於西蜀。股肱盡矣。雖出行將何之。朕已請於天父。與此城相生死矣。仁發對曰。天王是天下萬國真主。凡事自有天父天兄作主。何懼之有。天王唏噓泣下。復曰。我前疑秀成質其母。寔滅其兵力。今知其心無他。朕甚悔之。遂揮二人出。時清兵薄城益急。天王一夕數起。至二十七日。慨然謂左右曰。自古有帝王而爲俘囚者乎。遂仰藥而崩。年五十二歲。時孤城已垂危。懼將士瓦解。仁達仁發與秀成謀。秘不發喪。延至五月戊申。始立后主福瑱爲天王。

洪大全

洪大全。其初姓氏不可考。或謂卽焦大也。湖南衡州府衡山縣人。身幹碩偉。性情豪俠。應童子試。屢以文詞不合。被黜。父母相繼卒。復無兄弟妻子。好爲人搆訟。平反冤獄。所得資多。擇捕揮霍。不事生產。於是削髮爲僧。留心古代兵書及戰陣之法。最崇佩諸葛亮。嘗思一朝得志。取以爲法。游方至廣東。與洪秀全馮雲山相結識。返湘還俗。再應試。不第。因更讀兵略。冀圖大事。性喜酒。醉則詆評時政。譏刺官吏。嘗謂承平日久。文恬武嬉。法令不行。百事

廢墮。且財政匱乏。所謂理財諸說。皆屬末節。今可以救時敝者。惟復人丁賦稅一法。而諸臣工。顧惜身名。不肯冒不韙以圖補救。今以爲恤民。逮至勢不可支。則將來所行苛政。必百倍於此。明季加賦斂餉諸事。行重見於今日。况疆宇遼闊。處處爲守。處處皆不足守。若有豪傑揭竿而起。一潰將不可收拾。耆老聞其言。以爲狂悖。公首拘訊。以無左證得釋。自此遂亡命江湖。至粵西。洪秀全、楊秀清、馮雲山、蕭朝貴、韋昌輝等。已集會黨。聲勢漸盛。即攻天地會爲上帝會。與秀全結爲兄弟。和同起事。受封爲天德浸師。創營制。整軍律。定進退攻守之策。清咸豐元年閏八月。秀全克永安。建號太平天國。又爲之定官制。分王以下勳爵爲若干等。乃晉封大全爲天德王。各名與秀全埒。事無鉅細。必決而後行。大全復教秀全行仁義。所過之處。擄七留三。所陷官紳。概予世襲。密付鐵券。使代守疆土。不變衣冠。祇取其歸心助力。以成大業。人心旣附。但得一省。則天下可傳檄定也。時永安被圍急。所言皆未得行。楊秀清復忌其才。嘗抑制之。時大軍聚永安。不堪清軍之敲擊。乃議潰圍出。咸豐二年二月十六日。太平天國二年三月初一日。分三隊突圍。是日夜大雨。二更時。北王韋昌輝領二千人先行。三更時。東王楊秀清、南王馮雲山等。領五六千人擁護天王洪秀全及其婦女等次行。五更時。西王蕭朝貴及大全率餘衆一千餘人殿後。前後相距十餘里。預計由古東經昭平梧州。竄往廣東。自出永安。大全僞爲囚者。被絳服。懸鐵索。坐竹兜。由小路潛行。爲烏蘭泰所追及。總兵金玉貴擒獲之。次晨大雨稍止。太平軍即大隊奮力反攻。冀奪回大全。惟清軍已先有備。將大全解送大營矣。時訛傳謂被擒者。非洪秀全即楊秀清也。迨解至欽差大臣賽尙阿營。訊之。大全自稱爲天德王。楊秀清乃其臣。清吏欣然擊掌曰。是即洪秀全矣。大全曰。吾非洪秀全。秀全乃吾弟也。遂於次晨即派步軍統領衙門郎中聯芳。及軍機章京丁守存。帶同將弁兵丁解送京師。兼程北進。七日抵全州。守存以大全衡山人。經其地。恐爲所劫。乃佯傳牌驛站。預備護送。實則政由水程潛出祁永。八日抵長沙。初。大全登舟。閉置內艙。惟知船行甚速。每問曰。到衡州須起早。兵役僞應之。及抵長沙。給之曰。已到衡州矣。大全出艙四望曰。此長沙也。不料汝等能以我至此。吾其休矣。抵天津。時已至四五月之交。天熱索求巾扇。守存以紙扇予之。舉酒痛飲。因感慨

悲憤。題詞二首於扇。其一云。寄身虎口運籌工。恨賊獨不識英雄。漫將金鎖鎗飛鴻。幾時生羽翼。萬里馭長風。一事無成人漸老。壯懷要問天公。六韜三略總成空。哥哥行不得。淚灑杜鵑紅。寫後諷誦再三。擲筆碎杯。泣數行下。曰。吾不復御此矣。既至京師。下刑部獄。部吏訊太平天國事。輒不語。言及天下大事。則滔滔不絕。旋磔於市。年甫三十。

陳玉成

陳玉成。廣西貴縣人。幼從塾師讀。羣兒中有與洪氏爲姻親者。數言洪氏言論舉動。心羨之。年十四。出應童子試。被斥。大憤。遂絕意進取。聞洪仁玕新自倫敦傳教歸。往謁之。受洗爲信徒。時天王已起兵金田。兩廣官吏。仇教民甚。捕仁玕母妻下廣州獄。玉成徒步至廣州。賂獄吏。見仁玕母。仁玕有兄女少孤。笑而莊靜。同繫于獄。玉成憐之。與約期越獄。己爲外應。事洩。玉成亦被逮。擬凌遲。刑有日矣。時歲饑。暴民起而搶米。滿城鼎沸。官吏疑太平軍至。皆倉卒走匿民間。玉成遂脅諸囚反獄。出仁玕家屬。護之至香港。廣州官吏。行文香港。購玉成益急。玉成有諸父。曰承璋者。從天王起兵。轉戰湖廣間。迨克武昌。以功授侍衛。玉成乃喬裝爲貨藥。就承璋于軍中。諸王皆器之。時年方十八。太平二年。以承璋請授左四軍正。典聖糧。職同監軍。玉成雅不欲請赴前敵。隨營立功。三年。楊秀清命玉成隨韋志俊略湘潭。復不欲。請自率五百人。助攻武漢。秀清許之。將啓行。玉成私謂承璋曰。我以稚子。無尺寸功。而諸王獎許備至。授以偏師。此行我必不爲叔父辱也。承璋欣然曰。汝能爲此語。我無慮矣。五月。玉成軍抵武昌。率十餘騎偵視武漢形勢。馬被彈擊者再。從容游觀。竟得還營。謂石積祥曰。城中糧盡。守者皆饑疲無人色。援軍壁城外者。復自動而神離。腰纏纍纍。爲逃計矣。必克之。積祥曰。茲事卽以屬汝何如。玉成笑曰。試爲之。遂率所部入梁子湖。繞至省城東面。六月乙亥夜。分三百人爲疑兵攻城。自率二百人于隱僻處縋城而上。大呼曰。天兵登矣。清軍數千人。聞之大惶懼。斬關奪門而奔。遂克武昌。楊秀清聞之喜曰。我固知玉成健者也。乃益其兵五千。

升殿右十八指揮。七月，玉成掠黃陂孝感，克蕪州，復破廣濟黃梅田家鎮，升殿右三十檢點。八月，曾國藩復陷武昌，玉成自興國入大冶，以逼清軍，與清將羅澤南塔齊布戰，不利，退入黃梅。塔齊布躡之，肉薄登城，玉成自率精銳于城上拒之，槍傷塔齊布面，清軍戰益力，黃梅遂陷。玉成率所部退屯孔壠驛，清軍薄之，先後七戰，互有殺傷。會羅大綱水師爲清軍所焚，玉成無援，遂棄孔壠驛入九江，助林啓容爲守，自請處分。天王慰之，加封勳號曰成天豫。太平五年，天京內亂，東北二王相繼伏誅，石達開出走，乃召玉成返天京，封英王，命與李秀成共掌兵事。玉成性喜剽掠，不耐讒居，乃請于天王，復率所部入安徽。太平七年，清將和春張國樑圍天京，玉成兵新敗于麻田，率衆循江北而東，將援天京。八月，敗清將鞠殿華于浦口，軍復振，和春分兵六千拒之，玉成血戰，以一當十，沿河百餘壘，望風齊潰，殺其知府宣維祺，副將陳昇均，遂克江浦。天長九月，圍揚州，敗清將富明阿詹起綸于西門，乙亥，克之，遂進攻六合。先是玉成入安徽，長江重城望風歸附，六合居金陵北岸，縣令溫紹原募勇抗拒，血戰六年，南北大營迭潰，獨六合以彈丸地，屹然若重鎮。至是，玉成誓破之，晝夜攻城，紹原剽衫袖，嚙指草血書，乞援勝保張玉良，未至。玉成先穴地轟城，庚寅，城陷，紹原赴水死，遂克六合。會李秀成援桐城，被困于全椒，而揚州復陷于張國樑。玉成遂率所部會秀成于樅陽，泣涕誓師，訂約會戰，列營於金牛鎮白石山，與李世賢之軍相連屬，烽火互數十里，清兵皆畏懼。清李續賓獨毅然曰：「軍事有進無退，戰死吾分也。」遂合戰，會天霧，玉成以奇計誘清軍自相攻，迨霧霽，太平軍大呼乘之，清軍潰敗不可止，殺李續賓及其他大將劉神山等十餘人，乘勝破廬州，殺其布政使李孟羣，遂出店鋪，攻梁固定，陷之。由界牌關下滁洲，與秀成軍會，時勝保之軍轉戰皖贛間，其勢銳甚，聞李續賓戰歿，約德興阿率馬步軍五萬，自水口至，與玉成軍會於烏衣，玉成謂秀成曰：「清軍之銳在勝保，勝保之銳在馬軍，請率萬衆攻德軍，我以精銳先敗其馬軍，破之必矣。」次日，遂會戰，玉成募刀牌手入敵陣，削馬足，馬縱橫臥道上，後者不能進，玉成秀成遂趨軍夾攻之，清軍大敗，勝保僅以身免。太平九年，玉成破金壇，殺其將周天孚，進圍壽州，不克，時曾國藩圍安慶，十月，移圍師援之，戰不利，退駐廬江。太平十年，玉成率衆十萬攻霍山，破清

將余際昌。取黃州蘄州。分兵數萬人。北入孝感雲夢。取德安隨州。南入江西。出義寧。掠崇通。東入浙江。掠衢州處州。欲多方牽制。以解安慶之圍。而國荃不爲動。三月。玉成自率精銳回安慶。敗多隆阿於太湖。兼程並進。丙午。入集賢關。約捻黨十餘萬渡淮。會攻國荃。先於菱湖北岸築壘十三。南岸築壘五。城軍更番出覲。南北岸紛起應之。清軍倣擾不安。國荃欲於東路湖邊。亦築壘拒之。玉成謂其部下曰。清妖若於東路築壘。可制我死命也。因出死士力爭之。清軍且築且拒戰。一晝夜壘成。同時林紹洪仁軒黃文金之援師。復爲多隆阿敗。玉成氣大沮。還屯集賢關。四月。國荃設伏於關外。自率輕騎至關下偵地勢。以邀敵。玉成望國荃所率不滿二百人。遽出大軍躡之。國荃大奔十餘里。忽據險列陣。疑有伏。愕而止。左右伏兵遽起。國荃縱騎還擊。玉成大敗。率百餘騎踏石甕水夜遁。多隆阿遣軍尾之。己巳。玉成合林紹章黃文金暨捻黨孫葵心馬步三萬衆。回迎多隆阿。多隆阿分軍設伏。自率勁旅迎戰。戰酣。伏起。太平後軍忽亂。玉成憤怒。手長刀遮敗者回戰。而伏軍已破壘縱火。潰敗不可止。玉成乃退奔桐城。清軍圍之。玉成復約楊輔清率十萬衆自無爲趨英山。繞宿松。徑襲太湖。分軍出高樓嶺援桐城。而悉衆趨安慶。復爲國荃偵知。先率精兵伏要路。輔清軍不能進。玉成不得已。退屯石牌。仍分兵援安慶。時城外諸壘破壞殆盡。惟北門餘石三壘尙堅守。皆玉成死士。國荃激厲驍將程學啓曰。必克三壘。學啓率勇士千人。緣礮穴而入。戰於壘中。清軍自外乘之。三壘亦不守。玉成既屢敗。復收餘衆。增約捻黨。進屯集賢關。分列四十餘壘。七月丙午。攻國荃營。復不利。戊申。復以死士渡濠。突圍戰。血戰良久。清軍稍却。國荃懼。親督軍築新壘。玉成約城中兵盡出。由鹽河至十里鎮。東撲新壘。玉成自城外應之。親援檣鼓督陣。殺不前者。國荃揮衆禦拒。而版築如故。自夜達旦。新壘成而兩方死者。尸骸積田壠。城軍復入城守。八月丁巳。地穴轟發。北城圯。安慶遂陷。玉成望城慟哭曰。安慶陷。我死無日矣。遂率殘衆西奔。將趨湖北德安。招其舊部。部下皆不從。乃由六安走廬州。衆漸攜貳。天王復下詔切責之。玉成懼。屯廬州城東。遂不復他去。太平十二年四月。多隆阿圍廬州。遣部將雷正綰攻東南門。石清吉攻西門。別約皖軍設伏北門。誘玉成。玉成恃驍勇。率三千人抄清軍。正綰迎擊。玉成不利。退據城北浮橋。城中方

開北門出大軍。謀合擊清軍。見玉成退。驚爲大敗。爭入城。玉成遽斷浮橋。逼城軍。使阻水反攻。城軍益驚。自相蹂躪。清兵遂梯西南城以登。廬州陷。玉成走壽州。先是捻首苗沛霖藉玉成汲引。受封號於太平朝。玉成之屢蹶屢興。沛霖皆贊助之。至是玉成詣沛霖乞援。沛霖懼於清軍之盛。又慮襲奪己衆。陽稱疾。遣苗景開迎謁中津渡。於城具三千人食。玉成餘衆猶二千。旣入館。衆皆走城外。玉成登壁。見桔槔。知被給。遂大罵。沛霖縛而囚之。及從者二十餘人。將獻穎州勝保營。捻黨張洛行謂知。糾衆至江口。集謀劫奪。沛霖擊散之。至潁州。玉成見勝保。勝保高坐。諍貽曰。成天豫何不跪也。玉成曰。吾英王。非成天豫。奚跪焉。爾本我敗將。何向我作態。勝保曰。然則曷爲我擒。玉成曰。我自不識人。豈爾之力。吾今日死。苗賊明日亡耳。爾猶記在烏衣時。爾騎兵二萬。與吾戰。後有一存者乎。勝保默然。予酒食。勸之降。玉成曰。丈夫死則死耳。何饒舌也。乃檻送玉成至京。及延津。詔命卽於其地殺之。年二十六。玉成貌極秀美。長不逾中人。二目下皆有黑點。清軍畏之。稱曰四眼狗。驍勇富謀略。十九當大敵。二十四封王。初爲檢點。湖南北驚其善戰。有三十檢點回馬槍之號。其軍強冠諸鎮。與曾國藩相持數年。國藩深畏之。在軍中與李秀成獨相得。洪仁玕傾軋秀成。玉成每調解之。玉成死。秀成聞之。歎曰。吾無助矣。被執時。滿人裕朗西在勝幕中。往見玉成。吐屬風雅。熟讀歷代兵史。侃侃而談。旁若無人。裕驚疑曰。此卽所謂四眼狗耶。乃舉太平朝諸將以繩之。則曰。皆非將才。惟馮雲山石達開李秀成叁可耳。我死。朝廷不振矣。玉成初名丕成。二次克武昌。天王嘉其功。改名曰玉成云。

李秀成

李秀成。初名以文。後封忠王。天王改其名曰秀成。廣西藤縣新旺村人。幼沈默寡言笑。事親孝。母舅陸武雲奇之。使從學。秀成年十歲。以貧故。輟學治農事。道光季年。兩廣稔饑。羣盜蠭起。時洪秀全以傳天主爲世所信。父世高歸之。秀成因亦爲教徒。道光三十年。秀全起兵金田。徵教民入伍。焚其居室。令挈家以從。世高年老不能任事。執

炊而已。秀成年二十八，發前敵爲走卒，迨永安下，建國號曰太平，敘功爲兩司馬。秀成性好書，每有所得，輒枕戈
諷誦之。時軍中目經史爲妖書，有禁令，罪或至死。怨者舉發，縛付行刑。將擬大辟，會清兵夜襲，全軍潰退。清兵見
秀成，疑爲被虜者，釋之。秀成間關三日夜，追及本營，以見父。其軍帥喜曰：子脫死而仍來歸，忠信人也。因奏免其
罪，擢爲卒長。時其父死已二日，秀成聞之大慟，遂偕母弟從征至金陵，積功至師帥。太平二年四月，從春官丞相
胡以洗克安慶，清院司大臣遁守廬州，即議建廬州爲省治。江忠源爲巡撫，忠源善治兵著者也。十一月，胡以洗
率衆十萬圍廬州，忠源自率親軍駐水西門，使廬民萬人登陴環守。穴地道，遺毒之，皆不克。而清援師大至，總兵
玉山率餘兵數萬，駐拱宸門，陝甘總督舒興阿率二萬五千人，駐岡子集。總兵音德布率漢兵駐棗林。江忠濬、劉
長佑率湘軍駐西平門五里墩，圍師反被圍。以洗欲解圍去，秀成持不可。以洗曰：然則銳力攻城乎？秀成曰：忠源
善守，廬州城堅，死傷必多，援師乘我後，我軍殆矣。不如分兵先破援師，援師雖衆，皆客軍，不相統屬，可一擊走也。
以洗曰：汝亦言軍事耶？今益汝新兄弟萬衆，即責汝破援師，不克，我不復見汝矣。秀成慨然任之，率衆薄滁兵營，
新軍畏脅不敢進，乃自率所部入敵陣，全軍感動，大呼從之。滁兵潰，死者萬餘人。舒興阿音德布救之，皆敗挫。長
佑忠濬亦相率遁去。秀成親斬玉山以歸。十二月丙戌夜，遂克廬州。江忠源投水死，以洗遂入城，置酒會諸將，親
酌勞秀成曰：今而後我知弟矣。因上其功於朝，授殿前二十指揮。太平三年，東王楊秀清知其賢，俾自率一軍與
陳玉成轉戰江西湖北間，所向有功。秀成用兵，剽悍不及玉成，而持重勝算，有古大將風。戒妄殺擄掠，每克城，諸
將多所獲，以獻東府。秀成獨無，諸將復忌之。坎軻數載，不獲超擢。太平五年，天京內亂，東北二王相繼誅死，翼王
他去，而燕王復死於二王之難，軍心渙散。天王始拔秀成爲地官副丞相，命與陳玉成共治軍事。時江南大營雖
潰，而張國樞之軍復振，圍鎮江，分兵逼桐城，自廬郡三河舒城六安廬江巢縣無爲連營百餘里。秀成率步騎二
萬援之，戰輒不利。聞三河尖捻酋張洛行襲得樹有反情，乃作書使部將李昭書招之，洛行得樹皆受撫，得衆
數十萬。於是鎮江桐城之圍皆解，詔命回京，封合天侯，留京用事。時安福二王柄國，政以賄成。秀成因上書，請足

制度嚴法令。肅朝綱。明賞罰。輕賦稅。求賢人而待以誠信。黜除奸佞。起用翼王十餘事。書上。以忤權臣旨革爵。陳玉成揚輔清上書訟之。乃得復。出秀成鎮浦口。而留其母妻在京以爲質。先是李昭壽以招降張行翼得樹。自伐其功。迨秀成出守浦口。讖紘不及。大失望。遂投清。以書約秀成反。會天王命侍衛七人來勘營。書落侍衛手。洪仁發盡封中關船隻。斷秀成兵。使不得回京。地官丞桂林紹章夜叩宮門諫曰。天京所恃以爲長城者。秀成耳。今斷其後路。秀成敗亡無日矣。臣願以合家十餘口保秀成不反。天王悟。罷二王。用黃綬親書萬古忠義四字。使紹章如秀成營賜之。并封爲忠王。專朝政如秀清故事。太平七年。清和春張國樑破株陵關。進薄天京。湘軍統領李續賓復破九江太湖潛山桐城。移兵舒城三河。三河距廬州五十里。屯聚糧械以濟廬州。天京者也。秀成聞之大震。欲自出京攻桐城。援舒城三河。京中皆恃秀成。諸大臣陰尼之。秀成乃入朝堂。鳴鐘鼓。集羣司切陳利害。天王鑒其忠。許之。乃讓朝政於蒙得恩林紹章李春發。自率數十騎。一日夜馳抵蕪湖。時清軍壁城下數十萬。勢甚壯。秀成與世賢謀。使世賢擋南岸。自以精兵五千餘渡江。約部將陳坤書陳炳文譚紹洸曾含山。未盡至。清軍陷和州。秀成不得已率所部破昭關。殲二十餘營。復和州。乘勝取全椒。滁州來安。以兵單不能前進。清援師復斷和州之路。秀成退守全椒。得密旨。云張國樑已陷九洲。天京垂危。命還京。秀成不得歸。日夜涕泣。寢食俱廢。譚紹洸曰。張洛行降衆十餘萬。可一戰也。秀成曰。洛行烏合之衆。有節制之師數千人。即足以破之。我正恃其衆以威敵。一用而敗。我輩皆成擒矣。乃命譚紹洸陳坤書選所部。得精銳五千。秀成率之。由全椒下大劉村。欲先清兩浦夾江。以安京內人心。清勝保遣四千騎遏之。秀成敗。死傷二千餘。秀成乃從數騎回全椒。由全椒入樅陽。行文各鎮守將。期議於樅陽。時陳玉成由麻田敗歸。秀成見之泣涕。約與會戰。玉成之兵。由潛山過舒城。攻廬郡。吳汝孝將翼得樹之兵。攻定遠。李世賢將蕪湖兵。出金牛鎮。抄清軍之後。援三河。秀成自率所部由樅陽回全椒。進兵滁州。期與玉成會。至烏衣。與德興阿勝保之軍戰。大敗之。次日至小店。張國樑率援軍至。秀成復敗之。乘勢追至浦口。適玉成破廬郡。亦率軍至。乃約玉成攻其前。秀成斷其後。清軍大潰。死者數萬人。李續賓敗死。勝保德興阿僅以

身免。李世賢復桐城。秀成復克江浦。天長。六合。儀徵。揚州。復九嶽洲。天京隔江之路乃通。太平九年正月。張國樑復陷浦口。九嶽洲。壽德州。太平守將秦禮國。七里洲守將謝廷茂。皆納款於國樑。約內應。二月。國樑攻破七里洲。秦禮國從壽德州內擊。劉季三應之。上關亦破。國樑與欽差大臣和春謀築堅壘長壕。以困天京。城內不得食。天王檄各鎮兵解來援。時秀成在皖南。與其部下謀曰。清軍精銳集城下。長壕已成。張國樑又囑哨善戰。攻之難得志。若乘此時以輕兵疾驅杭州。杭州危。蘇州必震動。清軍大營懼我絕其餉源。必分師以救之。我圖其虛。還軍急擊。則大營躡破。則蘇杭皆我有也。乃自率精銳千餘。襲破涇縣防軍。遂克旌德。二月。下廣德。四安。遂由安吉武康進攻杭州。王戍杭州下。清廷命和春兼督浙江軍務。分大營兵勇五分之二。命提督張玉良率之。以援浙江。至則省城已破。秀成謂知大營兵力單薄。委杭州不守。急率所部西馳。陳玉成。李世賢。楊輔清亦各率所部。會於東壩。己酉。攻建平及東壩。拔之。遂克溧陽。圍金壇。先是清廷大營新舊軍十萬人。月支餉百萬兩。皆取給於蘇浙。及太平軍入浙。浙省不遑自顧。餉扣不發。時天京垂危。清兵驕佚。酣嬉無度。月支餉不足用。驟聞減削。皆無鬪志。秀成謂得其情。即率所部。若向蘇常進者。清援軍皆調至常州堵截。辛丑。而秀成已悉眾詣天京城外矣。矚大營空虛。立攻之。張國樑拒戰七晝夜。戊申。大雪積地厚尺餘。寒甚。清兵大譟。至王浚帳下。索餉不得。肆掠通衢。將吏不敢詰。己酉夜。太平軍攻入大營。各營火起。王浚軍先遁。和春部下繼之。全軍遂潰。和春狼狽走丹陽。國樑頓足歎曰。八年心力。不圖敗於李秀成之手。招集潰卒。得一萬三千人。退守丹陽。癸亥。秀成率衆十萬。步步爲營。逼丹陽城下。國樑開南門出戰。望見秀成幟。其軍復大潰。國樑大憤。自率親軍奮馳。秀成營潰。塞途。蔽隔不得前。秀成命力士瀾潰卒中。狙擊國樑。國樑創甚。大呼躍馬入尹公橋下而死。秀成入丹陽。命收其屍。以禮葬之。秀成既破大營。仁遠仁發。忌其功。請天王下嚴詔。秀成限以一月取蘇常。部下多有怨者。秀成涕泣諭止之。四月戊辰。秀成克常州。敗張玉良之師於高橋。玉良奔杭州。秀成進克無錫。趨蘇郡。城外民居。擔酒肉以迎。丁丑。守將李文炳等以蘇城降。秀成入城。收其部衆五六萬。吏民皆安撫之。時鄰地匪民相結。搶劫無已。部下說秀成勦之。秀成曰。

是我信之未孚也。親至鄉招諭之。鄉民圍秀成數十匝。以矛指秀成頸。隨往文武皆失色。秀成夷然曰。我忠王李秀成也。今隻身來撫若衆。豈畏死邪。願撫棄械。不者殺我。民皆棄械。秀成乃結以恩信。七日之間。元和吳縣長洲以及松江太倉等處。以次就撫。天王遂以蘇常軍事付秀成。秀成安撫招聚。數月大定。時清湘軍圍安慶。六月。天王召秀成還。秀成奏天王。請自王侯以下。有一命於朝者。各量力出家財。廣購米穀。儲天倉。設官督理之。俟困乏。平價出糶。如均輸故事。事下樞府。仁發等相謂曰。此亦一利也。可用鹽引牙帖之法。分上中下三等。上帖可販米數若干石。中下以次遞減。即充樞府諸王祿秩。大半可入私囊也。因令商販非執帖者。不得販米入天京。上帖貴至數千金。其驗帖官又皆其鷹犬。任意勒索。必取盈而後已。商販裹足。米糧反絕。秀成奏陳其弊。請廢洪氏帖。天王以詰仁發。仁發以奸商每藉販米與妖管傳遞消息。設非此帖不能辨。其邪正天王信其言。置秀成奏不問。秀成憤。出返蘇州。八月。太平軍克寧國徽州。秀成奏調陳坤書鄧雲官鎮蘇州。自率所部出牟棧嶺攻祁門。與清左宗棠鮑超軍相持數月。十二月。秀成入江西。太平十年。秀成命李世賢入浙江。而自率兵會之。數月之間。浙中郡縣相繼盡下。惟衢州湖州海寧僅存。杭州益孤危。清巡撫王有齡奏調左宗棠張玉良援浙。宗棠軍阻不得達。秀成率童容海已薄杭州。圍十門。自海潮寺至鳳凰山。盡樹木城以隔援師。十月甲戌。張玉良犯圍師。中飛礮死。其軍潰亂。城中益恐。石米至百金。民皆煮皮籠草根爲食。癸未。太平軍梯城以登。守軍已數日不食。皆散走。遂克杭州。巡撫王有齡自縊死。先是有齡頗得軍心。急攻不能下。秀成爲諭。箭射入城。謂降者俱免死。滿將軍瑞昌。具書秀成。請赦滿軍回國。秀成飛騎奏天王。仁發輩尼之。閱二十日。旨未下。迨外城破。瑞昌疑不免。殊死守。以火器轟太平軍。斃三千餘。秀成遽許如約。瑞昌終不信。閱四日。內城乃下。秀成急出示勸滿人無死。願歸北廷者。准給船隻。送至鎮江。資財亦許帶去。并戒軍士不得殺害。而男女老幼。因疑懼自裁者。枕相藉。瑞昌亦自焚死。乃禮殮王有齡。學政張錫庚。總兵文瑞。發舟十五隻。路資三千兩。命親兵五百人。各護其喪回鄉里。布政使滿人麟趾方至省。未接任。與原任林福祥俱被執。均以待禮館之署內。夜半就福祥敘談。福祥言老年只一子。破城時失散。頗思

念次日。秀成卽命軍士覓得福祥子遺之麟趾先逃。福祥亦不願處杭州。秀成乃資給備舟送之。至上海。福祥感之終身。秀成復於嘉興紹興辦米萬石。錢二十萬來杭。以施貧者。杭民乃安。太平十一年正月。秀成自浙率衆十餘萬下松滙。時清藩司吳煦僑寓上海。募勇壯數千人。聘美利堅人華爾領之。練習西洋操。號曰常勝軍。以拒秀成。秀成軍械不利。輒不敵。清江蘇巡撫李鴻章復率悍將程學啓自安慶至。營上海。英法軍復助之。秀成命譚紹洵鄧雲官攻之。互有勝負。殺法提督卜羅德。英法軍還租界。而上海終不克。秀成還蘇州。見人民流離。房屋毀壞。蘇民來轅哭訴者萬餘人。皆言陳坤書縱兵虐民狀。秀成乃出私財購米數十餘萬石。發給貧民。盡除坤書諸虛政。坤書懼。逃至常州。韋金入京。要結洪氏諸王。得封爲護王。諸王復使其獨立。以分秀成之勢。五月。清曾國荃圍天京。天王數使使趣秀成進援。而左宗棠攻浙江。李鴻章陷松江。秀成方救援未遑。乃上書言清軍之銳。湘軍爲最。今乘勝下安慶。破蕪湖。而圍天京。其勢正盛。不可與戰。堅守以待其罷。可一鼓破也。天王怒。責之曰。三詔趣援京城。而不啓隊。爾意欲何爲。將不奉詔。是逆命也。國法俱在。爾其誌之。秀成嘆曰。京中五王十將。有衆二十萬。不能自衛。而必調疲於奔命之師以解圍。是自殺也。復何言哉。乃遣其國宗引兵數萬援天京。六月。與湘軍戰。不勝。天王乃收其軍入城。八月。江南大疫。湘軍皆病。死者枕藉。天王復召秀成乘機破圍師。秀成不得已。約十三王率衆數十萬。還天京。圍湘軍數匝。國荃震懼。而于王洪仁玕忌秀成。借防疫名。閉京城不與通消息。時餘疫未已。援軍染者頗多。將士皆憤。莫有鬪志。獨秀成所部。無間晝夜。環攻敵壘。國荃露立營外。鼓勵將士。併死拒之。嘗受鎗傷。血沾襟袖。以此相持四十日。終不克。會清軍糧盡。士皆骨立。遂於十月癸未夜。誓死分數路突圍。太平諸軍。狂於向和之勝。初不設備。清軍突之。陳坤書所部先潰。餘軍繼潰。遂不能止。秀成向城號哭。率所部退浦口。謀入安徽江西。以牽制天京圍師。太平十二年。西略六合。將入湖北。聞李鴻章程學啓陷常熟崑山。圍蘇州。乃引兵還救。美人白齋文率外國武士二百。輪舟二艘。來投秀成。秀成使練新兵。以敵常勝軍。時婁門葑門已被圍。程學啓與洋將戈登方攻寶帶橋。秀成親率精銳禦之。殺清將范遇春。秀成乘輪船由齊門至西白蕩漕莊口。清水師要擊。

船不得出。改道由虎邱望亭進攻。白齊文以輪船助之。發西洋三十二磅炸礮擊清軍。所觸皆廢。死者枕藉。清軍募死士膝行伏河干。燒白齊文輪船。火熾延及長龍礮艇。清援軍復至。遂大敗。輪船礮艇燼焉。秀成遂以部衆五六萬營后宅麻塘橋。李世賢營惠山高橋。南及坊前梅村。列隊數十里。清將李鶴章郭松林分數路來犯。坊前梅村營壘皆陷。獨秀成軍無恙。十月。清軍陷澣墅關。於是十里亭虎邱楓橋諸守軍皆遁。清軍躡之至閶門。秀成以城危。棄后宅營壘。間道入城。助譚紹洸爲守。李鴻章度外援已絕。益促學啓戈登攻城。婁門葑門盤門諸壘皆不守。城中絕糧。衆益洶懼。癸巳。敵軍大進。常勝軍已因薄登城。秀成紹洸親上城揮刃格之。殺數十人。乃退。紹洸素勇悍。爲秀成愛將。雖處危城。洋洋如平日。而鄧雲官等有貳心。密款於清將鄭國魁。約會於泮澄湖。學啓命斬秀成。紹洸以獻。許給雲官以二品武職。雲官不忍殺秀成。許圖紹洸。學啓與爲誓。戈登證之。甲午。秀成微覺之。涕泣握紹洸手爲別。乘夜出胥門。奔無錫。旣至。聞雲官已殺紹洸。舉城降。大勳時會國荃掘地道攻天京。勢危甚。秀成乃以敗衆分駐丹陽句容間。十一月。自率數百騎抵天京。入太平門。先是金陵患糧。秀成建議遷都武漢江西。以爲進可揚燕京。退可入川黔粵西。而糧道復便。天王下諸王侯議之。衆皆唯唯否否。仁玕獨非之。於是天王罷其議。至是秀成復勸天王棄城同走。亦不聽。秀成爭曰。圍城糧絕。衆心解體。此而不走。一網盡矣。天王視一城與天下蒼生孰重。天王斥之曰。朕奉天父天兄命。朕下凡作九州萬國獨一真主。何懼之有。爾不扶我。我自有人扶助也。秀成感歎。乃貽書溧陽。約李世賢就食江西。城中諸將。泣涕挽之。不得已仍留守天京城。太平十三年。曾國荃合圍。各門皆塞。秀成日於城上。綰婦孺出城節食。終不濟。乃以糧絕告。力勸天王突圍。天王啼噓執秀成手曰。朕懲於東楊。惑於四王。能任汝而不能信汝。以至於此。今無及矣。出亦何益。朕誓殉此城矣。秀成亦泣。乃下詔令闔家食甜露。甜露者。草也。于是京內之地皆赤。四月二十七日。攻城益急。天王暴崩。秀成懼軍心亂。與仁達仁發謀。秘不發喪。延至五月戊申。始立后主。稱瑤爲天王。己巳。清軍奪天堡山。架礮其上。晝夜轟擊。城堞皆壞。秀成率死士露立遺孽。毀其礮壘。清軍乃於朝陽門一帶。掘地道數十處。篝火而入。秀成察地上土色。輒能辨之。以故清軍

每穿一穴。死者常千餘人。而地道終不成。國荃乃令軍士持濕柴草擲城下。僞若由此登城者。守軍防之。卽於城下穿地道入城。實以火藥。六月乙酉。火發。城崩。清軍爭由穴口衝入。天京遂陷。秀成母與妻宋氏皆自殺。秀成號泣。破宮門。奉后主趨西門。后主馬蹶墜地。秀成以己所乘馬讓后主。后主不受。秀成曰。此馬日行六百里。必能脫主千難。秀成老矣。死安足恤。扶后主上馬鞭之行。后主遂偕仁玕仁政雜亂軍中。疾馳衝城而出。秀成以馬劣不能及。挾一童。皇遽迷路。因至方頂山小憩。遇樵者八人來。有識秀成者。問曰。爾非忠王乎。秀成曰。然。若能導我至湖州。當以三萬金爲壽。八人者皆流涕叩首應之。相與下山。歸澗西村。勸使雜髮。秀成曰。我洪氏大臣。國破主亡。被擒。自無全理。若幸而得脫。又何以對我士卒。竟不雜髮。八人中有陶姓者。頗狡黠。欲執秀成以獻。又慮七人者不肯從。有族某在李臣典營中。特往商之。道經鍾山。飢渴甚。因至蕭孚泗營。尋其素識之火夫求漿。語及之。火夫以語親兵。遂爲孚泗所聞。卽率百餘騎之村。執秀成以歸。會國藩在皖。聞獲秀成。星夜馳至。與國荃會鞠之。會聽王陳得風等亦至。見秀成。長跪請安。無敢仰視。國荃慮有變。欲加械下秀成於獄。國藩曰。是活我朝之官吏矣。毋使彼齒冷也。乃禁之署內。逐日排宴。待以客禮。秀成日書起事本末爲供辭。積十餘日。可數萬言。七月六日。國藩宴秀成。酒罷。對之太息曰。是誌別也。秀成曰。敢不惟命。退入別室。自刎死。國藩割其鬚髮。以磔聞。城中居民。設祭而哭者。數萬戶。爲之罷市。初。蕭孚泗既執秀成。欲殺陶姓以滅口。火夫陰告陶。贈以良馬一。使乘夜遁去。其七人者大憤。先殺陶。復以計誘孚泗親兵及火夫至村中。寸磔之。詣秀成靈祭告焉。國藩聞其事。拘七人者至。詰之。皆慨然自述無隱。國藩感歎。予白金七百兩縱之。皆掉頭委金而去。

李世賢

李世賢。秀成族弟。勇敢有戰略。初爲太平軍裨將。累歲不得遷。殊邑邑。及陳玉成掌軍事。拔爲總制。使將一軍。隸秀成。太平七年。清將李續賓陷桐城。太平軍棄舒城退走三河。續賓分軍三路攻之。世賢以三河爲太平屯糧地。

糾合張洛行陳玉成軍。自廬郡至金牛鎮。連營數十里。抄清軍後路。會大霧。迷不見人。世賢曰。續賓善戰。今大霧。天助我也。不及約玉成。遽以所部薄之。清軍左路先潰。中右兩路復被襲。將士死者大半。霧霽。玉成復以軍斷其歸路。益潰敗不可止。續賓嘆曰。今敗矣。於月夜率數百騎突圍。爲所殺。續賓。湘軍名將。大小六百餘戰。無不勝。太平軍憚之。至是敗死。世賢之名大著。天王獎其功。封侍王。太平九年。天京被圍急。李秀成與世賢謀。欲攻浙江。以牽掣圍師。遂合兵破涇縣。旌德。太平寧國。廣德。入浙江。復破長興。安吉。武康。進薄杭州。二月。克之。清命張玉良分圍師馳援。秀成。世賢。案杭州不守。馳歸。攻圍師。清軍潰。統將和春。張國樞皆敗死。遂解天京之圍。八月。世賢率衆四萬出廣德。攻徽州。清會國藩欲自將守徽。部下朱品隆力持不可。乃命李元度援之。元度至徽。士民結連寧國。太平軍掠城外。而旌德。太平軍復繞績溪。入黟山關。元度乞援。國藩命張運蘭率軍赴之。至城下。與世賢軍遇。不戰而潰。世賢遂急攻之。守軍譁變。元度縋城遁。開化。遂克徽州。太平十年二月。世賢由婺源進窺樂平。敗左宗棠於甲路。進克景德。殺其將陳大富。三月。世賢留軍守景德。自將趨樂平。樂平城久圯廢。宗棠於傍城東南。掘外壕十餘里。引水塞堰。以陷太平騎軍。并設伏以待。世賢至。中伏。軍大敗。易裝遁。廣信。糾合各鎮兵入浙江。破常山。分兵攻處州。世賢自率大軍拂嚴州而過。破龍游。進圍金華。克之。七月。秀成入浙。約世賢夾攻衢州。不克。八月。世賢克嚴州。由臨浦進窺蕭山。諸暨。皆下之。十一月。秀成克杭州。命世賢盡起金華。龍游之兵。再攻衢州。太平十一年二月。宗棠自將救之。世賢戰不利。退屯江山。破清軍營於峽口。宗棠復移援江山。偵世賢駐花園。自督軍前進。會世賢方率輕騎至小清湖。宗棠要擊之。世賢敗。遁歸花園。宗棠命劉典。劉璈。楊昌濬等分三路攻花園。軍士披籬攀壘。登世賢命穴牆發礮。清軍死者千人。勿敢進。宗棠自督軍攻花園。以火箭燒營棚。世賢驚駭祈禱。忽大雨傾注。火盡滅。乃令軍士遍呼於營中曰。天助我太平成功。士皆鼓舞。爭出壘拒之。宗棠大敗。其部將黃三春傷三劍。乃率殘軍退去。對王洪春元聞花園急。自衢州率衆數萬至雙橋。會糧盡。世賢回金華。六月。遣兵攻遂安。不克。會清將曾國荃圍金陵。天王飛召秀成。世賢合蘇浙兵西援。世賢慮宗棠逼杭州。遣使報天王。俟擊退衢州軍。乃往。

乃集勁旅入金華。繕城濬壕。嚴守具。以爲出援之地。會壽昌嚴州續倭湯漢相繼陷。世賢軍且困。乃棄金華龍游。由安徽還援天京。太平十二年。清將李鴻章攻蘇州。世賢屯兵惠山高橋。援之。累戰皆敗。十二月。天京垂陷。秀成力勸天王如江西。陰命世賢持數十日糧。道長興廣德寧國入江西。先據旌區待秀成。於是世賢率軍而西。行甚剽疾。連破沃邑以待。而天王不至。太平十三年正月。世賢還軍援溧陽。與清將郭松林戰於張堵。大敗。退入溧陽。守將吳人杰不納。世賢走湖州。旋率所部游弋江廣邊。衆尙數萬。六月。天京陷。后主奔湖州。復由湖州入江西。世賢欲以兵迎之。會后主被虜。世賢慟哭。長趨入閩。殺清提督林文察。據漳州。清同治四年正月。世賢破漳浦。四月。由漳北趨安溪。與清軍戰。不利。退入漳州。清軍合數路攻漳州。黃少春攻中路。王德榜攻烏頭門右。高連陞攻烏頭門左。郭松林等助之。世賢出死士力拒。殺傷相當。會東風大作。清軍發洋槍。營壘皆被火。世賢退入城中。清軍奪烏頭門而入。世賢巷戰逾時。力殺數十人。清兵來者益衆。皆欲得世賢。乃開西門遁永安。先十日。漳州被圍。世賢致書汪海洋。思合力走龍巖漳平。海洋不報。迨至永安。清軍迫之。部衆潰散。世賢自永定河斃水夜渡。從者多溺死。世賢割鬚髮。潛匿山中。時軍中皆傳世賢已走死。海洋因假求世賢。不得。歸咎于國宗李元茂。殺之以立威。元茂。世賢死黨也。七月。世賢自山中晝伏宵行。至鎮平。使人告海洋。海洋大驚。不得已郊迎入城。其舊部泣訴海洋。猜恨狀。世賢以元茂之死。意殊不平。部下多有戴世賢意。海洋不自安。乘其臥。刺殺之。并殺其黨五人。自太平朝興。拒會國藩者。有石達開。拒李鴻章者。有李秀成。拒左宗棠者。則爲世賢。率皆以猜忌自殘致敗。惜哉。

洪仁玕

洪仁玕。秀全同祖弟。幼聰慧。有大志。秀全愛之。遇諸兄。道光三十年。金田起事。仁玕募壯士五十人。自廣東赴之。至則大軍已啓行。追躡不及。所部皆潰散。爲邏者所獲。下獄。一夕。大雨。獄室圯。仁玕約同囚者六人。去縲絏。逃逸山中。晝伏夜行。不得食者數十日。乃達香港。受洗禮於英教師。爲教徒。太平元年。大軍突永安圍趨陽朔。天德王

洪大奎被執。秀全訪仁玕。至軍。欲授以重職。與楊秀清不相能。仁玕乃請於天王曰。天朝以耶教爲國教。其旨不盡合於歐西。非制也。今歐西強盛。清廷昧於大勢。猶以夷狄目之。此西洋各國所深惡者。天朝若以同教故。與之敦邦交。聯情誼。得益當非淺鮮。請出使考察。而連絡之。天王以咨秀清。秀清曰。仁玕機警。可使也。爲具裝遣之。仁玕至倫敦。不禮於英政府。退而爲牧師者數年。倫敦教會公報嘗評之曰。洪仁玕爲會中所信任。敬服其文藝優長。性情和藹。宗教知識既富。信道尤虔篤云。太平四年。仁玕至北美。復由美至日本。歸香港。渡海入粵。粵吏偵得捕之。僞爲乞者逃免。間關越贛省渡江。因得至天京。時楊韋新敗。仁發仁達方用事。爲羣臣所詬病。天王得仁玕大喜。封爲干王。位在安福二王上。仁玕爲人。好使酒。矜意氣。惡貪婪。而忌賢。殊甚。仁發仁達因媚之。以間李秀成。太平十二年。天京被圍急。秀成勸天王遷都江西。以便糧道。下其事於四王。仁發仁達仁政皆唯唯否否不能決。仁玕獨曰。金陵帝王根本地。明高皇帝以此建二百年基業。天命有在。此豈不足以爲政耶。議遷都者。蓋有所希冀。欲攬權謀不軌耳。由是四王協力。恆掣秀成肘。秀成得人心。都中將士。見其抑屈。頗有怨懟語。仁玕慮將解體。乃請天王設講道會。鳴鐘鼓。陰指秀成有貳心。出之江蘇。秀成將行。歎息曰。英王死。吾無以自解於干王矣。先是秀成攻蘇州。城垂克。仁玕忌其功。爲天王作書諭秀成。略謂長江者。古號長蛇。湖北爲頭。安徽爲脊。而江南爲尾。今湖北得而復失。倘安徽復不保。則蛇折其中。雖生不久。促令移師攻湖北。援安慶。秀成皇遽。陳玉成自安徽馳警止之。秀成始得克江蘇。仁玕嘗以外交家自命。以旁行書招白齊文。欲任以軍事。白齊文索金十萬。仁玕爲請於天王。天王許之。秀成謂白齊文浮滑不可恃。實無戰才。仁玕怒。斥秀成通敵。阻大計。欲誅之。玉成爲之解。因得免。玉成。仁玕妹婿也。有德於仁玕。仁玕信之。故秀成云然。六月乙酉。天京陷。仁玕仁政護后主雜亂軍中。衝門以出。由廣德奔湖州。七月。湖州陷。仁玕與堵王黃金。奉后主走寧國。出昌化。與清軍戰。文金負創死。仁玕走江西。入亂山中。失道。將席寶田躡之。及之石城。遂被執。與后主齎戮於南昌市。

鄒容，字威丹，四川巴人也。少慧敏，年十二，誦九經史記漢書皆上口。父以科甲期之，容弗欲。時憲彫刻，父怒，輒榜笞至流血，終勿改。稍長，從成都呂翼文學，好議論，非堯舜，薄周孔，侃侃無所避忌。翼文懼擯之，父令就日本學。時年十七矣。與同學鈕永建、規毅、中國協會，未就學。二歲，陸軍學生監督姚甲有姦私事，容偕五人排闥入其邸中，榜頰數十，持剪刀斷其辮髮而出。事覺，潛歸上海，與章炳麟見於愛國學社。是時，社生多習英吉利語，容謂之曰：「諸君堪爲異人耳。」社生怒，欲毆之。廣州大魁馮鏡如故入英吉利籍，方設國民議政廳於上海，招容。容詰鏡如曰：「若英吉利人，此云國民，中國民耶？英吉利國民耶？」鏡如慙，遂寢。容既明習國史，學于翼文，復通曉說文部居，疾異族如仇讎。乃草革命軍以擯滿州，章炳麟爲之序而刻之。會江蘇候補道俞明震來檢察革命黨事，將逮愛國學社教習吳朧，朧直詣明震自歸，且以革命軍進，明震緩朧，朧逸。遂名捕容、炳麟，容在獄，日就炳麟說經，亦時講佛典，炳麟以因明入正理論授之，曰：「學此可以解三年之憂矣。」明年，獄決，容、炳麟皆罰作西人，遇囚無狀，容不平，又啗麥飯不飽，益憤激，內熱溲膏，次年病溫，四十日，二月二十九日夜半卒于獄中。年二十一。

唐才常

唐才常，字伯平，號佛塵，河南瀏陽人也。深沈好學，尤邃於佛學。曾主蘆蕩殘幕，行篋纍纍，皆卷帙也。少與譚嗣同善，嗣同嘗曰：「二十年勿頸交，惟唐佛塵一人而已。」甲午中日之役，兵挫地削，國勢益危，才常發憤講學，倡變法圖強。於長沙創湘學報，時務學堂，南學會，推譚嗣同梁啟超之主，海內靡然從風。一時英俊如林，圭李炳寰、蔡鍾浩、田邦璿、秦力山、蔡鐸、范源濂等，皆出其門。戊戌，德宗親政，銳意革新，譚梁皆與機要，特旨徵才常，未發，會政變作，乃廣結豪傑以自助。先是，洪楊敗後，廣東會黨與長江諸會，積不相能，才常聚其渠魁，曉以大義，莫不感服。於是東走日本，南至香港，南洋羣島，集貲購軍械，圖大舉。邱菽垣偉其行，資以三萬金，遂結日本志士平山周，謀北上，狙擊西太后，會平山病，不果行，事遂寢。乃立自立會，創富有票，益結死士。設東又譯社於上海，陰爲之樞，聲息所

通。東至蘇浙。北至河陝西。南至巴蜀兩粵。黨人鄭弼之史堅如先後起事廣州。機洩及難。才常嘗謂粵東僻處嶺嶠。得之不足以動全局。宜首事湖北。或有患其險固者。曰。武昌扼大江之喉吭。控南北之樞紐。用武之地也。而商務日盛。當道者狃於形勝。防禦不密。可襲而取也。舉此則中原不足定矣。遂設機關於漢口英租界。庚子拳禍作。聯軍陷北京。帝后西竄。海內震動。南方隱有獨立之議。才常遂集衆約漢口蒲圻新堤。於閏八月。同時舉兵。據湖北。分兵五路。北路陳陶癡翼超朱菱溪駐黃柏山。出河南。結陝中張雲山之衆。入長安。劫帝。東路蔡力山。駐大通。略蘇常。取財賦。沈蓋領左路。才常弟才中副之。駐新堤岳州。蔡鍾浩領右路。何來保副之。駐常德。中路扼武昌。爲各路根本。林圭主之。李炳寰田邦璿王天曙蔡承煜傅良弼等副之。才常則總其成。又走說諸疆吏。張之洞劉坤一皆隱悉其事。七月初。才常在滬。漢上電逮之。往。黨人狄葆賢歸自漢。沮其行。且曰。漢上諸子。烈而不慎。事且旦暮破。往必不利。才常曰。脫己而陷人。非夫也。且余實倡之。弗聽。至漢。黨衆目聚海上。運餉不至。則大售富有粟。事益洩。乃密約各地。易期七月末。屬秦力山舉事大通。先期敗。邏者愈急。唐才中率黨衆自相赴約。所乘舟名昌和者。未至新堤。擱淺。漢上援絕。餉阻。勢且坐困。惟寄寓租界。清吏無捕人權。時拳禍方熾。民仇教及商。乃執是迫英領事得諾。二十六日夜。張之洞使吏帥師圍其寓。及門。門者曰。寇至矣。黨人皆起。引槍將死之。才常不可。曰。無益也。從容聚黨中名冊文函火之。須臾盡燬。是獄也。大吏欲窮鞠以自進。卒以不得黨冊而止。才常既就捕。餘黨大焚漢口。欲牽清師。以間出才常於獄。之洞堅不救。計遂不行。初。才常嘗肄業兩湖書院。每試未嘗後人。之洞雅重之。且固聞是謀。初得讎報。故還不發。陰縱令脫。見齋於巡撫于蔭霖夏口廳。馮啓鈞力贊之。至是猶欲爲才常免。方鞠問時。顧左右曰。唐才常儒者。寧出此。且吾固識之。斯人不類。得毋捕者誤耶。才常厲色曰。事之不成。有死而已。唐才常豈苟脫者。二十八日晨。遂與林圭李炳寰田邦璿傅良弼蔡承煜王天曙黎科壘河清等。同及於難。才常爲人淵默寡言笑。謀革命數年。雖家人前未嘗道其一字。所著書有覺顛冥齋內言。種族改。自署曰泮泮子。皆爲官所禁。有弟三。才中才質才昇。子三。泮林泮。歿時年三十四。

趙聲

趙聲字伯先，丹徒大港人。魁梧多力，又激於意氣，踞弛不羈，被酒大言，無所避就。年十九，爲秀才，文名噪甚。顧抑塞不能自安，浪遊江淮間，復無所遇，嘗僦居南京僧寺，寺近陸師學堂，伯先偶代某生執筆，爲堂長所詰，得實，則亟延致伯先，特要入校。既完業，渡日本，考詞軍政，歸入兩江師範學堂，爲學員，非其好也。時排滿之論起於江湖，伯先嘗秘草七字唱本，激勸士卒，號保國歌。又詞牘至，讀者莫不感泣。一時長江上下游之兵若匪，人手一紙，習其詞若流，而不察爲伯先手筆也。癸卯秋，俄事亟，南京學生咸集會演說，聲勢甚盛，顧伯先少之，以爲徒招吏忌，無裨于實也。果爲吏所蒸，發牒名檢，伯先亦坐是不安於校，則走長沙，爲實業學堂監督，未幾又北行，入觀禁城，潛然出隄，更出滄關，放歌無侶，適保定有秋操事，伯先投某鎮充隊官，冀有所圖，亦無大驗。久之返寧，任江寧督練公所參謀官，旋教練江陰新軍，時道員郭人漳好與革命黨往還，黨人亦欲倚以集事，伯先則隨人漳入甞年餘，而志不逞。適本省擬行徵兵制，伯先趨歸成之，以功管帶三十三標第二營，旋升標統，恆爲兵士陰述種族大義，滿人端方再爲江督，甚伯先甚，伯先部兵習聞湘鄉曾氏扶清滅太平不道狀，因火後湖神廟，燬會遺像，一軍盡譴，訐者指伯先爲亂，端方將假是與大獄，統制徐紹楨隱右伯先，得以身免，往就粵督張人駿廣州，任督練公所提調，旋統帶新軍第二標，時郭人漳爲防軍統領，勢張甚，廉州土人劉恩裕以抗稅起兵，志士有從之者，人駿檄伯先率步兵一營，殲兵一隊，勤之，伯先以其機可用，大喜，則密遣人與恩裕計事，而約人漳爲應，人漳告密說，復傳于外，伯先審事壞，而恩裕亦下材，不足言大計，乃馳告同志，使散去，並于陣中單騎往，諷恩裕他竄，恩裕卒不省，遮伯先擊之，伯先不得已，揮兵進，廉事一戰而定，伯先設宴，廉之南郊海角亭，與將士痛飲，席間賦詩，有八百健兒齊踴躍，自慚不是岳家軍之句，顧伯先隱痛益深，而人漳媚嫉益甚，因訐伯先于人駿，所適端方亦有電來，稱趙聲才大而志不測，不可用人，駿惑焉，伯先不自安，棄職歸，而終不能忘情于粵也。復走香港，爲倪映典密

籌攻粵策事敗。映典殉。伯先仍往順德。謀再起。卒以會黨志異。省中又名捕急。因返港躬耕。以寄其意。時從者數十人。易散難集。又貧無所得食。留戍至艱。略師漢趙充國遺意。相約租田而耕。伯先朝執鋤。夕執筆。自食其力。並以食同人。若曠然有遺世獨立之思也。揚州熊成基者。伯先江南所部卒也。會西太后母子死。成基驟起兵安慶。事敗。走海外。復謀刺載溥于哈爾濱。事洩。死之。伯先固不以國土期成基。至是乃太息曰。昔在南京。俊士如雲。若成基者。殊碌碌。今所成已如是。吾輩何面目見天下士。聞者泣下。番禺汪兆銘刺載灃京師未中。下獄。伯先益憤勵。起往南洋羣島。稍備軍實。還香港。設同袍會。伯先被推為總部部長。議以廣東為發難地。分東西兩軍。取道北伐。西軍經廣西入湖南。會師武漢。黃興主之。東軍貫江西。出湖口。直下江南。則伯先為帥也。頃之。伯先所養士鄧明德密布機關。陷於粵。捕死焉。風計不得不變。則謀以一隊劫殺水師提督李準。一隊攻取督署。一隊堵塞滿營。一隊占火藥庫軍械局。一隊接應各路。一隊逕攻兵工廠。隊員皆同人自充之。新軍一二兩標。屆時策應。亦各部。定期以辛亥四月一日。一舉而取廣州。黃為總司令。先時率同人入粵。伯先與胡漢民留守香港。至期會合。於是吳楚閩粵滇桂洛蜀皖贛越十一省之才士。樂赴國難。無所圖利者。相繼來集。臨發前一夕。置酒高會。仰天而歌。羣有死之心焉。革命黨人於斯極盛。會粵人溫生才自南洋袖彈歸。擊將軍李琦斃之。粵垣大索。十一省之士皆大抵不習廣州方言。又歸自東京。服態殊異。易為遷者所得。三月二十八日。均奉與暫退令。紛紛旋陸。伯先大驚。擬次日自行入粵規畫。夜接與電。謂事尙可為。促軍更進。則又大喜。明日全部以早晚輪渡。分赴戰地。伯先取晚輪。以晦日晨達廣州。而軍事已前敗。七十二烈士俱殉。世所傳黃花崗之役者也。伯先鄉人宗建侯石經武華逐電阮德山徐勝西封冠卿等六人均死之。伯先痛甚。扶病赴順德。謀再舉。不就。擊槍自殺。遇阻未遂。乃奄奄經澳門歸港寓。而伯先大病矣。四月二十日。以盲腸炎逝。年三十有二。初葬于香港茄菲公園附近山巔。碑曰天香閣主人之墓。民國元年移葬鎮江南郊竹林寺。

彭家珍，號席儒，四川金堂縣人，畢業四川陸軍武備學堂，充六十六標一營左隊排長，升隊官，調雲南陸軍十九鎮隨營學堂管帶，兼教練官，升本堂提調，調奉天講武學堂兵營隊官兼教習，宣統三年九月，東督趙爾巽委任天津兵站司令部副官，家珍幼慷慨有大志，意氣發舒，常以光復漢族爲己任，嘗是時，武昌起義，瑞澂逃而免，湘撫余誠格相繼遁，大河長淮以南諸行省，次第反正，北方且夕響應，而清室善耆、良弼輩，方岌岌謀所以自保，家珍到津，值黨人汪精衛等甫出獄，相聚謀大舉，因悉索司令部軍餉，盜以入黨，自赴滬製炸彈，江蘇都督程德全委爲東方招討使，還津而趙爾巽以盜竊案購之亟，乃變姓名爲朋嘉楨，號錫三，黨人推爲軍事部長，家珍以部專委呂漢羣、劉應福等，獨以暗殺自任，往來京津間，謂同志曰：吾欲得要人集合地，一舉而殲之，乃覓得親貴旁聽券，時時挾炸彈往資政院，欲相機而發，會黨人炸袁世凱於丁字街不中，兵警大索刺客，都中不可居，蹙避地往津，十二月朔，聞資政院以是日閉會，清王公咸集，急以早車入都，至則院已閉會矣，乃復與同志訣曰：吾聞清室健者獨良弼，此獠不死，吾族求光復不可得也，吾請獨嘗之，得遂吾志，雖與同死無所恨，衆阻之，不聽，初七日，聞清廷將以臘八賞喇嘛恩粥，集良弼等密議討南軍，家珍以事急，定翌日必炸良弼，夜開門作絕命書，訣父母，以所餘資斧行李交僕運天津，從容處分畢，翌日著上級軍官服，引長刀自佩，出寓邸，赴車站，先是，家珍在奉與講武堂監督滿人崇恭習，知崇恭與良弼交最親，已預令其徒劉升之到奉，僞爲崇恭電良弼，謂將入都與商大計，至是，遂復由車站入金臺旅館，視以崇恭名刺，謂自京奉車來逆旅，啓十三號室居之，立命駕馬車入前門，先到軍諮府覓良弼，未得，復到西城紅羅廠良弼新寓，亦未歸，闖者引家珍坐客座，久待不至，家珍欲別覓之，乃出甫及街，遙望良弼驅車自外來，乃引回下車，立門左以待，僕進崇恭刺，良弼亦下車，甫出，右足及地，瞥見客非崇恭，方詫愕，欲相詰，而炸彈已發，轟然作巨聲如霹靂，階石悉碎裂，騰半空，復片片四散飛墜，助炸彈襲人而擊，良弼左足骨立斷，僅筋數莖屬焉，遍體焦爛無完膚，昏然撲地如已絕，而家珍則已傷其頭，先死，良弼絕而復蘇，越三日乃死，未死時，謂其記室康譚瞿曰：炸吾者英雄也，知吾在則清室不亡，乃以身殉我，雖死我固知己也，家

珍卒時年二十五歲。無子。未婚妻王清如。以家珍死國。爲守節不嫁。民國元年改家於北京萬生園。與炸袁世凱之張先培楊禹昌費之萌三烈士合冢焉。

徐錫麟

徐錫麟。字伯蓀。浙江山陰人。幼讀書。剛毅沈潛。不能爲人屈。父以是奇之。少有大志。慕項羽勾踐之爲人。欲教練越子弟以覆隋室。既而走海上。結四方豪士。未幾。東渡日本。與俠客壯士偕。適年歸國。任紹興府學堂副監督。兼數學教授。復集資設熱誠學校。己任體操。乙巳秋。創大通師範學堂。並設體操專修科。羅致諸少年英俊。整飭紀律。勤以軍法。儼然有軍國民教育之精神焉。諸生有怠者。丁寧訓誨。激以義理。至於位下。家貧者。代給學膳。有疾病。喁喁慰問。藥鐘粥盃。躒躒趨走。不以煩苦爲嫌。學生咸感奮。雖執袴子弟亦盡爲健士矣。錫麟大喜。學生陳伯平。素文弱。入校後。立志自強。尤忍飢耐凍。練習武技。不稍悔。與馬宗漢同爲錫麟所器重。時錫麟躊躇四顧。兩浙非用武地。且不入官。莫由操兵柄。遂納貲爲道員。指分安徽。巡撫恩銘。初甚疑之。喜其論兵事。侃侃若懸河。任爲陸軍小學堂會辦。旋改巡警學堂會辦。錫麟得所職。氣益雄。伯平宗漢。次第赴皖。謀就巡警。學生畢業會操。乘機發難。先期暗結日本留學生。南洋革命黨。及內地寧皖黨人。部署悉定。定五月二十八日。請恩銘閱操。恩銘微有所聞。即於二十五晚。改明晨蒞場校閱。錫麟不及措施。大驚惶。及恩銘至。遽舉槍擊殺之。自率伯平宗漢。據軍械所。城兵轟聚環而攻。救者不至。伯平宗漢。先後戰死。錫麟易服。匿方氏屋後。旋被獲。時光緒丁未五月二十六日也。錫麟初至皖。極意聯合軍隊。顧操鄉音。不能達意。故事發。而皖軍無一應者。錫麟既就擒。藩司馮煦以下。會讞堂上。錫麟直認排滿不諱。馮責以食毛踐土義。厲聲曰。誰食誰之毛。誰踐誰之土。書供狀凡千餘言。越日被殺。摘其心。以祭恩銘。

秋瑾

秋瑾，浙江山陰人，字璿卿，自號鑑湖女俠。幼承家學，甫笄，通經史，喜爲歌詩。年十九，嬪湖南王延鈞，生一子一女。隨夫居京師，庚子拳變，瑾大憤慨，益勵於學，洞究中外強弱之故，慷慨於女學之不可不興，乃脫簪珥爲學貲，別其夫，寄子女於外家，子身渡日本。京師女友咸置酒陶然事，以壯其行。瑾旣之東，見留學生腐敗情狀，則又大憤，發其言於中國女報。又曰：吾欲結二萬萬人團體於一致，通全國女界聲息於朝夕，使我女子生機活潑，精神奮迅，以速進於大光明界，爲醒獅之前驅，爲文明之導線，萬不當依託男子求生活也。讀者壯之，瑾性豪縱，有口辯，遇不達時務者，輒面折之，不稍假借，以故不爲人所容。光緒三十二年，回國，夙與桐城吳芝瑛善，芝瑛，汝綸猶女，錫山廉泉妻也，善詩古文詞，常居西湖小萬柳堂，瑾過其所，述留學艱苦狀，旣出，偃刀相示，並自著寶刀歌劍歌等篇，曰：吾以弱女子隻身走萬里，所賴以自衛者，惟此耳。且出前攝之舞劍小影，顧盼自豪，冷氣襲人衣袖，芝瑛曰：留學風潮且大起，倘遇關吏詰問，得毋疑爲女革命黨乎？瑾笑曰：革命終當自己革命始，所謂男女平權是也。酒旣罷，拔刀起舞，唱日本歌數章，左右和以風琴，激越悲壯，聲動座，旋應紹興明道女學之聘，任教職。逾年五月二十六日，錫麟擊斃，安徵巡撫恩銘，獄連瑾，紹興太守黃福，滿人也。六月四日，遽入署，嚴鞠之，不承，榜掠備至，血濺衣履，令自畫供，瑾提筆書一秋字，復呵之，續成秋兩秋風愁殺人七字，卒無一言，貴福亟赴省，謁大吏，會湯壽潛主辦浙省鐵路局，迎合當道意，不直瑾所爲，獄遂定。瑾故工詩，其黃海舟中感懷曰：片帆破浪涉滄溟，回首兩山一髮青，四壁波瀾旋大地，一天星斗拱黃庭，千秋劫燼灰全死，十載淘餘水尙腥，海外神仙渺何處，天涯涕淚一身零，聞道當年鏖戰地，至今猶帶血痕留，馳驅戎馬中原夢，破碎河山故國羞，領海無權悲索莫，磨刀有日快恩讎，天風吹面冷然過，十萬雲烟眼底收，其抱負可見矣。越日，竟殺於軒亭口，年三十一，葬西泠橋畔，薤露悲歌，震動遐邇，浙撫張曾敷，賄招其兄領柩回紹，其子復稜，母柩至湘，石門徐寄塵爲建亭於其地，題曰風雨亭云。

楊深秀

楊深秀，字儀村，本名毓秀，山西聞喜人。少穎敏，諳中西算術。同治初，以舉人入貲，爲刑部員外郎。假歸，值晉大饑，閻敬銘銜命籌賑，深秀條上改革差徭法，因少蘇。光緒十五年，成進士，就本官，遷郎中，轉御史，嘗言時勢危迫，不革舊無以圖新，不變法無以圖存。二十四年，俄人脅割旅順大連灣，深秀力請聯英日拒之，詞甚切直。時朝廷銳意行新政，而大臣恆多異議，深秀迺與徐致靖先後疏請定國是，又以取土之法未善，請參酌宋元明舊制釐正文體，下禮部議。尙書許應駱心非之，未奏也。會議經濟特科務減額，於是深秀合宋伯魯彈其阻撓，上令應駱自陳，奏上劾康有爲，實緣要津，請罷斥，詞連深秀，上不之詰也。御史文悌劾深秀傳布有爲，所立保國會並暴有爲交通內外狀，德宗實以代人報復，反獲咎。深秀益感奮，連上書，請設譯書局，派王公游歷各國，並定游學日本章程，皆報可。又請試庶官日番二十人，料簡真實，而汰其庸愚，罷老不諳時務者，繇是廷臣益側目。湖南巡撫陳寶箴圖治甚急，中蜚語，深秀爲剖辨之，上以特旨褒寶箴，寶箴迺得行其志。八月政變，舉朝惴惴，懼大誅至，獨深秀抗疏，請太后歸政，方疏未上時，其子黻田苦口諫止，深秀厲聲叱之退，俄被逮，論棄市，深秀性鯁直，嘗面折人過，以此叢忌，官臺諫十閱月，封事二十餘上，稿不具存。惟獄中詩三章流傳於世，著有虛聲堂稿，聞喜縣新志。

楊銳

楊銳，字叔嶠，四川綿竹人。少篤慧，督學張之洞奇其才，招入幕，肄業尊經書院，年最少，嘗冠其曹，優貢朝考，得知縣之洞督兩廣，從赴粵，光緒十一年，舉順天鄉試，考取內閣中書，二十四年，之洞薦應經濟特科，又以陳寶箴薦，與劉光第譚嗣同林旭並加四品卿，充軍機章京，參新政，召見，銳面陳興學練兵爲救亡策，稱旨。七月，禮部主事王照上封事，尙書許應駱等格不奏，上聞震怒，盡褫尙書，侍郎六人革職，朝臣皆不自安，上手詔密諭銳云：「近日朕仰觀聖母意旨，不欲退此老耄庸庸大臣，而進英勇通達之人，亦不欲將法盡變，朕豈不知中國積弱不振，非力行新政不可，然此時不惟朕權力所不及，若強行之，朕位且不能保，爾與劉光第譚嗣同林旭等詳悉籌議，必

如何而後能進用英達。使新政及時舉行。又不致少拂聖意。即具奏。候朕審擇。不勝焦慮之至。銳復奏言。太后親挈大位。授之皇上。皇上宜以孝先天下。遇事將順。變法宜有次第。進退大臣。不宜太驟。上是之。已而太后再訓政。諸言新政者皆予重誅。銳既下獄。自揣實無罪。輒即訊不難白。次日。遽詔與光第等同棄市。宣統政元。銳子慶烈。繳手詔於都察院。請代奏。始傳於世。

譚嗣同

譚嗣同。字復生。又號壯飛。湖南瀏陽縣人。少好任俠。偶儻有大志。淹通羣籍。能文章。父繼洵。湖北巡撫。幼喪母。爲父妾所虐。備極孤苦。故其操心危。慮患深。而德慧術智。日增長焉。弱冠從軍新疆。遊巡撫劉錦堂幕。劉奇其才。將薦于朝。會去官不果。自是十年。來往直隸新疆甘肅陝西河南湖南湖北江蘇安徽浙江臺灣間。所至察其風土物色豪傑。然終以巡撫君拘謹約束。未能盡其志。甲午東事起。益發憤。首在瀏陽設學會。集同志講求磨礪。實爲湖南全省講新學之始。時南海康有爲方倡強學會。天下志士。走集應和。嗣同自湖南溯江下上海。遊京師。將以謁有爲。有爲適歸廣東。不獲見。見其徒梁啟超。語以講學之宗旨。經世之條理。嗣同大感動喜躍。自是學日益進。時和議初定。人懷國恥。士氣稍稍振起。嗣同尤激昂慷慨。大聲疾呼。海內皆以觀其丰采。聞其言論爲幸也。既而以父命就官。爲候補知府。需次金陵者一年。日惟閉戶讀書。冥探孔佛之精奧。會通羣哲之心法。成仁學一書。又時時至上海。與同志商量學術。討論天下事。未嘗與俗吏一相接。常自謂作吏一年。無異入山。時陳寶箴爲湖南巡撫。其子三立輔之。慨然以開通民智爲己任。丁酉六月。黃遵憲適有湖南按察使之命。八月。徐仁鑄又來湖南督學。與地方二三紳士。蹈厲奮發。提倡新學。志士亦漸集于湘楚。并力經營。爲諸省倡。聘梁啟超等爲學堂教習。嗣同亦棄官歸。與辦新政。於時湖南倡辦之事。若內河小輪船商辦礦務湘粵鐵路。時務學堂。武備學堂。保衛局。南學會。皆其所倡論摩畫者。而以南學會最爲盛業。設會之意。將合南部諸省志士。相與講愛國之理。求改亡之

法。而先從湖南一省辦起。蓋實兼學會與地方議會之規模焉。地方有事。公議而行。議會之意也。每七日大集衆而講學。演說萬國大勢。及政學原理。學會之意也。於時嗣同實爲學長。任演說之事。每會集者千數百人。慷慨論天下事。聞者無不感動。既而定國是之詔下。以學士徐致靖薦被徵。奏對稱旨。德宗超擢四品卿銜。軍機章京。與楊銳林旭劉光第同參預新政。時號爲軍機四卿。參預新政者。猶唐宋之參知政事。實宰相職也。德宗欲大用康有爲。而畏西后。不敢行其志。每有所詢。則令總理衙門傳旨。嗣同有所陳奏。則著之於所進呈書中而已。自西鄉入軍機。然後意得稍盡。而西后忌之益甚。未及十日而變起矣。初帝召見楊銳。賜衣帶詔。有朕位幾不保。命康有爲與四卿及同志。速設法籌救之語。嗣同捧詔慟哭。慮皇上手無寸柄。無所爲計。諸將之中。惟袁世凱久使朝鮮。講中外之故。力主變法。因密奏請。結以恩遇。冀緩急或可助。詞極激切。帝乃召見袁世凱。特賞侍郎。一日夜。嗣同徑造法華寺。詰世凱曰。君謂皇上何如人也。袁曰。曠代之聖主也。嗣同曰。天津關兵之陰謀。君知之乎。袁曰。然。固有所聞。即出密詔示之曰。今日可以救我聖主者。惟在足下。足下欲救則救之。又以手自撫其頸曰。苟不欲救。請至頤和園首僕而殺僕。可以得富貴也。袁厲聲曰。君以袁某何如人哉。聖主乃吾輩所共事者。僕與足下同受非常之遇。救護之責。非獨足下。若有所教。僕固願聞也。嗣同曰。榮祿密謀。全在天津關兵之舉。足下及董聶三軍。皆受榮所節制。將挾兵力以行大事。雖然。董聶不足道也。天下健者。惟有足下。若變起。足下以一軍敵彼二軍。保護聖主。復大權。清君側。肅宮庭。指揮若定。不世之業也。袁曰。若皇上于關兵時疾馳入僕營。傳號令。以誅奸賊。則僕必竭死力以輔救。嗣同曰。榮祿遇足下厚。足下何以待之。袁笑而不言。因曰。榮祿固操莽之才。絕世之雄。待之恐不易易。袁怒目視曰。若皇上在僕營。則誅榮祿如殺一狗耳。因相與言救上之條理甚詳。袁曰。今營中槍彈火藥。皆在榮祿手中。而營哨各官。亦多榮祿舊人。事急矣。既定策。僕當歸營。更選將官。備貯彈藥。乃丁寧而去。時夜漏三下矣。越三日。變遂發。乃從容語梁啓超曰。昔欲救皇上。既無可救。今欲救君。亦無可救。吾惟待死期耳。竟日不出。以待捕者。捕者不至。則檢所著書及詩文辭稿本數冊。家書一篋。以付梁啓超曰。不有行者。無以圖將來。不有

死者。無以酬聖主。遂相與一抱而別。一日。日本志士數輩勸其東遊。嗣同不聽。再三強之。曰。變法。無不從流血而成。中國未聞有因變法而流血者。此國之所以不昌也。有之。請自嗣同始。卒不去。竟及於難。既繫獄。題一詩于獄壁。曰。望門投宿思張儉。忍死須臾待杜根。我自橫刀向天笑。去留肝膽兩崑崙。以八月十三日斬于市。春秋三十有四。嗣同資性絕特。於學無所不窺。而以日新爲宗旨。故無所沾滯。善能舍己從人。故其學日進。每十日不相見。則議論學識。必有增長。少年曾爲考据箋注。金石刻鏤。詩古文辭之學。亦好談中國古兵法。三十歲以後。悉棄去。究心泰西天文算術格致政治歷史之學。皆有心得。又究心宗教。其初乃推崇耶氏兼愛之教。而不知有佛。不知有孔子。既而聞康有爲所發明易春秋之義。窮大同太平之條理。體乾元統天之精意。則大服。又聞華嚴性海之說。而悟世界無量。現身無量。種種差別。與圓性無礙之理。能匯萬法爲一。能衍一法爲萬。而任事之勇猛亦益加。作官金陵之一年。日夜冥搜孔佛之書。金陵有居士楊文會者。博覽教乘。熟于佛故。以流通經典爲己任。嗣同與遊。因得徧窺三藏。所得日益精深。其學術宗旨。大端見于仁學一書。又散見于與友人論學書中。所著書。仁學之外。尙有寥天一閣文二卷。莽蒼蒼齋詩二卷。遠遺堂集外文一卷。劄記一卷。與算學議一卷。已刻。思緯吉凶靈短書一卷。壯飛樓治事十篇。秋兩年華館叢書四卷。劍經衍葛一卷。印錄一卷。

康有爲

康有爲。原名祖詒。字廣廈。號長素。廣東南海人。祖贊修。治程朱之學。官連州教諭。父達初。早卒。有爲受教於大父。七歲能屬文。年十八。始遊朱次琦之門。次琦。湛深經術。以經世致用爲主。爲山西襄陵令。出則徒步。入則盡鹽。朝饔夕殮。皆三十錢。終身布袍。樸學高行。學者宗之。有爲敢大言。好稱西漢今文。微言大義。能爲深沈瑰偉之思。其文章。雜糅經子史。旁及外國佛語。耶教語。以至聲光化電諸科學語。而治以一爐。然生平言學。必推次琦。早歲酷好周禮。著政學通義。後見廖平所著書。乃盡棄其說。廖平者。王闈運弟子。闈今文家法。開蜀學。嘗以其間遊南海。

廣雅書院。有爲之通公羊。蓋聞之平也。其初所著書曰新學僞經考。僞經者。謂周禮逸禮左傳及詩之毛傳。劉歆爭立博士者。新學謂新莽之學。時清儒補法許鄭者。自號漢學。有爲指爲新代之學。新學僞經考之作。最其要旨。一曰。西漢經學。並無所謂古文者。凡古文皆劉歆僞作。二曰。秦焚書。並未厄及六經。漢十四年博士所傳。皆孔門足本。並無殘缺。三曰。孔子時所用字。即秦漢間篆書。即以文論。亦絕無今古之目。四曰。劉歆欲彌縫其作僞之迹。故校中秘書時。於一切古書。多所屬亂。五曰。劉歆所以作僞經之故。因欲佐莽篡漢。先謀誣亂孔子之微言大義。而微言大義之所寄。則在於春秋公羊。其治公羊。不斷斷於其書法義例。如何休所謂非常異義可怪之論者。定春秋爲孔子改制創作之書。謂文字不過其符號。如電報之密碼。如樂譜之音符。非口授不能明。又不惟春秋而已。凡六經皆孔子所作。昔人言孔子述而不作者。誤也。孔子蓋自立一宗旨。而憑之以進退古人。去取古籍。孔子改制。恆託於古。堯舜。孔子所託也。其人有無不可知。即有亦至尋常。經典中堯舜之盛德大業。皆孔子理想所構成也。又不惟孔子而已。周秦諸子。罔不改制。罔不託古。老子之託黃帝。墨子之託大禹。許行之託神農。是也。近人徂述何休以治公羊者。若劉逢祿。龔自珍。陳立輩。皆言改制。而有爲與之異。喜言通三統。張三世。三統者。謂夏商周三代不同。當隨時因革也。三世者。謂據亂世升平世太平世。愈改而愈進也。又謂歐洲之尊景教。爲治強之本。故恆欲儗孔子於基督。乃雜引讖緯之言以實之。具見所著孔子改制考。教人讀古書。不當求諸章句訓詁名物制度之末。當求其義理。所謂義理。乃在古人創法立制之精意也。有爲言孔子託古改制。而所以學孔子者。亦必出託古改制。孔子之託古改制。見其義於春秋。而有爲之託古改制。則託其說於禮運。以春秋三世之義說禮運。謂升平世爲小康。太平世爲大同。衍其條理爲大同書。次琦卒。屏居於南海之西樵山者四年。迺北走山海關。南游江漢。東謁孔林。浪跡於燕齊楚吳荆襄之間。所至察其風土。交其士大夫。西泝江峽。如桂林。既而之京師。上書尙書翁同龢。時同龢以毓慶宮師傅爲戶部尙書。兼筦國子監事。清德雅望。重於朝廷。有爲又因國子監祭酒盛昱以通於同龢。具封事。極陳時局艱危。請變法圖自強。乞代奏。同龢曰。無裨時局。徒長亂耳。格不達。獨戶部侍郎

會紀澤頗變法之議。而有爲獻讀。闢朝鮮爲萬國公地。紀澤尤賞歎之云。然卒無術以進。有爲既無所發舒。迺遊心藝事。於廠肆間。得漢魏六朝唐宋碑版數百本。從容玩索。學爲書。其執筆本得法於朱次琦。主虛拳實指。平腕豎鋒。其用墨澆淫於南北朝。而知氣韻胎格。迺廣涇縣包世臣所著廣藝舟雙楫。論篆隸變化之由。派別分合之故。世代遞流之異焉。有爲既上書言變法。被放歸西樵山。新會梁啓超南海陳千秋獨好奇。相與謁之。一見大服。遂執業爲弟子。共請有爲開館講學。而以光緒十七年歲之辛卯。於長興里設費舍曰萬木草堂。其學綱曰志於道。據於德。依於仁。游於藝。其學目曰義理之學。考據之學。經世之學。文章之學。其課外作業曰演說。曰劄記。行之校內者也。曰體操。曰游歷。行之校外者也。甲午。入京師。以新學僑經考獻同。欲以感其意。同。蘇驚詫不已。方是時。我敗於日。海軍殲焉。迺率其徒從禮部試。公車入都者凡數千人。上書申變法之議。明年乙未。成進士。出侍郎李文田之門。抑置三甲。遂授職工部主事。不得翰林。有爲大恨。竟削門生之籍。自是四年之間。凡七上書。有爲又工掉闔。論議縱橫。波瀾極壯。既通籍。住上斜街。仍顏其室曰萬木草堂。僕從十許人。夾陞侍立。如王公貴人。賓客車馬填咽。爭以望見顏色爲幸。乃立強學會於京師。設分會於上海。復開保國會。聲生勢張。朝論漸變。時翁同龢以忠誠結主知。有爲晉謁。高睨大談。其要歸於變法。所具封事曰立制度。新政局。練民兵。開鐵路。借外債數大端。同龢無以難也。乃上之德宗。德宗誦之。感憤。以有爲前後摺并俄皇彼得變政記呈太后閱覽。德宗既激發。以光緒二十四年戊戌四月二十四日下詔改革舊制。詔草出同龢手。顧二十七日。卽下詔斥同龢攬權狂悖。開缺回籍。同龢則聞駕出。亟趨赴宮門。伏道旁碰頭。帝回顧無言。於是文武一品官及滿漢侍郎補缺者。咸具摺謝太后。蓋太后已有疑於帝矣。二十八日。復召見有爲。悉進所著書。曰日本明治變法考。曰俄大彼得得變政致強考。曰突厥守舊削弱記。曰波蘭分滅記。曰法國革命記。曰孔子改制考。曰新學僑經考。曰董子春秋學。德宗讀波蘭分滅記。淚承於睫。曰吾中國幾何不爲波蘭之續也。又以有爲言。擢內閣候補侍讀楊銳。刑部候補主事劉光第。內閣候補中書林旭。江蘇候補知府譚嗣同四人。均著賞四品卿銜。在軍機章京上行走。參預新政事宜。所謂四新

參者是也。於是廢八股。開學堂。汰冗員。廣言路。內外耳目一新。榮祿等不自安。日夜謀所以結太后傾德宗及臨朝訓政。急逮楊深秀。譚嗣同。林旭。楊銳。劉光第。與有爲弟廣仁。駢戮焉。有爲亡命海外。作汗漫遊者十六年。隨從奴子皆頂戴如戈什。僑民見。輸款伏左。日盈於門。有爲糾合內外同志。設保皇會。足跡所之。遍十三國。間發爲詩。辭意非常。有詩家所不敢吟。不能吟者。以狂蕩豪逸之氣。運倔強奧衍之筆。如黃河九曲。渾灑流轉。崖激波飛。跳跟嘯怒。詩外常若有人也。自負先知爲文章。譽己不容口。喜以孔子學說。衡量歐美。宗教道德政治風俗。雖不免過當。而要期於輔世長民。拂俗匡時。足以資論證。備考鏡。

附編 外人

帛黎

帛黎。法國人。同治年充福州船政學堂教習。賞五品銜。調充江海關稅務幫辦。歷鎮江甌海粵海諸關。晉三品銜。調北京。遷稅務司。光緒二十三年。議行郵政。以赫德兼領其事。帛黎實參治之。凡都會省城通商口岸。漸次置局。命曰大清郵政。二十七年。遷郵政總辦。晉二品銜。自是內地城鄉徧設郵。先後成郵政六百餘局。代辦四千二百餘所。時尚未入萬國郵會。即已與日本及英屬印度香港聯約試行。宣統三年。改隸郵傳部。設總局。遂命爲總辦。郵局置官自此始。旋乞病歸卒。

日意格德克碑

日意格。法國人。初爲其國參將。駐上海。同治年攻調稅務司。徙寧波復郡城。與有功。助官軍攻慈谿。直搗上虞。被創。殊死戰。克奉化。駕小輪船攻安吉。燬賊壘。浙平。左宗棠令與德克碑做造小輪船試行。宗棠勅福州船政局。充正監督。度地募工。殫心所事。加提督銜。賞花翎。復以船政教導勞。給銀幣。光緒年卒。德克碑。法參將。初助攻奉化。有功。旋受代。將歸國。謁左宗棠。宗棠撫諭之。德克碑感服。願易服受節度。檄從蔣益澧攻杭州。燬鳳山門。城遂復。攻安吉。克賊壘。事竣。調充船政局副監督。馬尾設船廠。督役興工。賞花翎。宗棠平回亂。檄調甘肅。隸麾下。錄經始船政勞。膺獎賞。旋卒。

蕭安臣

附編 外人 帛黎 日意格 蕭安臣 赫德

蒲安臣。美國人。初爲美國公使。久駐中國。遇事能持正。中外交涉。總理各國事務衙門頗倚任之。同治六年。既謝美使事。仍留北京。說中國圖自強。謂列國交侵數十年。將不能國。並爲代籌交涉。時各國遣公使領事等先後來。而我未報聘。於是總署請特派蒲安臣。充辦理中外交涉事務使臣。以英人柏卓法。人安德善爲左右協理。志剛沈家毅同往會辦。先與蒲安臣議定條款。又以中外儀節不同。呈遞國書。須存國體。並告以中國體制。使各國明解。爲將來議設使領計。蒲安臣等遂歷聘歐美各國。既至美。與議定續增約于華盛頓。計八款。初會國藩等鑒於前訂條約多失利。建議遣使遊說諸國。至是始訂此約。於領海則申明公法。於租界則爭管理權。於出洋華工。則謀保護。且預防干涉內政。自來與各國所訂約章。均不及此公允。蒲安臣之力也。嗣在俄病卒。特予一品銜。給卹銀。

赫德

赫德。字鷺賓。英國人。初充寧波領事。署繙譯官。調香港督署書記官。咸豐末。改任粵海關副稅司。赴長江新設各口岸。置新關。同治初。總稅務司李泰國去職。以赫德代之。徙駐上海。三年。置臺灣南北新關。還駐北京。加按察使銜。八年。晉布政使銜。沿海各地度置燈樓塔表。光緒二年。佐定烟臺條約。十年。參與法使議越南案。會巡船在臺灣洋爲法虜。乃遣駐英稅務司赴巴黎申理。乘機與議停戰草約。未幾。其國授爲清韓駐使。不就。踰歲。賞花翎。十二年。置關九龍拱北。十三年。葡使來華。與訂澳門草約。十五年。藏兵寇哲孟雄。英兵闖入。赫德遣其弟稅務司赫政往會駐藏大臣。與議畫界諸事。十九年。賞三代一品封典。二十五年。與德使籌置膠海新關。二十六年。各國聯軍入京。贊襄和議。加太子少保。二十八年。召入覲。賞福字。尋與日使議置大連灣新關。三十三年。東三省度地置關。踰年。謝病歸。詔加尙書銜。赫德官中國垂五十年。時與士大夫往還。教其子習制藝文。擬應試。未許。總署嘗擬請授總海防司。道員薛福成以其陰鷲專利。常內西人而外中國。上書力爭。讖始寢。辛亥後病卒。賜優卹。

清代七百名名傳補編

陸軍

蕭陞高

蕭陞高，字榮階，長沙湘潭人。曾祖世光，以儒術顯。祖任南。父廷昌，明恕好施。陞高兄弟五人，次居三，狀特魁偉。讀書日千言，通大誼。會太平天國之難，乃棄書習騎射，能于馬上奪矛槊，舉百鈞行及奔馬。年十五，投身王珍營中。即後所謂老湘營者也。初入門，更以其年少，不遽通。陞高且晉且奮，珍出見而奇之，延入上坐，與語大說。遂拔百長，從討富川，斃敵二千餘，敘功獎五品。餘敵遁還，恭城復陷，東安、珍會諸軍夾擊，寇勢不支，突圍出，竄四明山。山介邵邵間，勢崎嶇，諸將莫敢深入。陞高毅然請往，厝火叢莽中，因風爇之，敵驚走。一鼓悉禽，自是珍任陞高益重。廣東敵陷郴桂江華，湖南上游各州縣，均岌岌不自保。巡撫駱秉章檄珍軍赴援。陞高別募新軍，會師衡州，冒雪力戰，諸城以次克復。時咸豐五年也。事聞，保千總，並賞藍翎。其後敵攻長沙，趨武昌，沿江皆敵壘。陞高從珍軍出境征勦，復通城，保守備。進勦吉安，敵據水東爲壘，援衆數萬，勢張甚。陞高力戰，大破之，擢都司。珍病卒，左宗棠檄陞高入浙，一見敬禮，曰：璞山之言不誣也。璞山者，珍字。四明山之役，珍嘗語以戰績，至此故云然耳。遂督楚軍隨宗棠迭戰蘭溪、龍游，克復壽昌，保游擊。同治二年，左軍援江西，克復樂安、宜崇。三年，入閩境，追剿漳州龍岩敵。陞高功皆最，詔以參將即補，賞花翎。五年，攻藍田、黃岳，克之。保副將，賜紫玉翎管。七年，兼統甌江水師，節制樂標。時溫屬土匪倚山爲巢穴，焚掠居民，出沒無常。有司莫敢誰何。陞高曰：不入虎穴，焉得虎子。募壯士三百人，伏山下。躬帥數人，陽誘之出，伏發，禽首匪潘茂等五人，誅之。餘各鳥獸散。地方賴以安堵。旋因事乞歸。丁父喪，服除。宗棠招赴陝甘，至即奏統剛毅軍，兼辦軍儲。時回匪已陷巴燕戎格河州，蔓延關內外。湘軍士卒苦戰久，思休息。陞高慨然誓師，激以忠義，士氣百倍。諸將中如劉錦棠、劉松山、郭松林等，亦因之感奮。遂分道出師，卒成大功。宗棠班

師。以陞高功最入奏。詔擢總兵。加提督銜。給勇號。予三代一品封典。賞穿黃馬褂。賜綉料班指。光緒五年三月。得旨署河州鎮總兵。屢任甫九月。以母老引去。然治軍有紀。河州士民德之。于其行。爲立石述其績。八年。宗棠移督兩江。強起之。委辦善後機器火藥工程各局。不兩月。復乞歸。宗棠疑其不樂小就。擬奏請巡視長江水師。終不願。竟歸。歸二十年。以疾卒于里第。年六十有一。其治軍大抵寬猛相濟。故士皆用命。所至有功。性孝友。父嘗患瘍。劇甚。輒口吮。呼天乞代。未幾。創合。人咸謂爲孝感所致云。生平廉俸。皆以分致昆弟。亡私財。又常勸修族牒。立育嬰保節諸堂。故湘州父老子弟。無不知蕭提督者。

樸學

王尙槩

王尙槩。字季平。秦州人。自束髮受書。即欲闡聖賢之精微。發經傳之蘊奧。每有疑義。輒廢寢食。長更研經汲古。攬集漢唐說經之書。持論舐舐。以自抒其所見。爲文亦質實無華。道光丁酉鄉試。首場三藝。皆以五經詰題。同考官陳世鏞極賞之。以爲首薦。榜發。僅中副車第一。己亥。錄遺對策。駁刪詩之說。謂東周廢採詩官。風雅散軼。聖人蒐羅之惟恐後。但爲次其年世。正其殘謫。無所謂刪也。學使者駭其言。竟不送科。自是遂絕意進取。專心著述。標新領異。一衷於正。有大易貫解。春秋貫解。孝經儀禮輯解。四書節解。詩書禮輯解。讀十三經管見草諸編。光緒三十年卒。所居爲古成紀之三陽川。有伏義畫卦臺。學者稱穀川先生。

葉德輝

葉德輝。字奐份。號直山。一號耶園。長沙湘潭人。先世居吳縣洞庭西山。宋元以來。名卿聞出。考諱浚蘭。候選直隸州知州。二品封典。飭躬勵行。以豐其家。生子四人。德輝居長。自少岸異。幼學不假師資。及冠。補府學生員。光緒乙酉舉於鄉。壬辰成進士。以主事用。觀政吏部。年裁三十。謁歸里居。奉親讀書。遺置榮利。戊戌政變將作。與王葵園祭酒訟言孔子改制之誣。幾蹈不測。自是廟堂水火。舉國譁然。醞釀十餘年。遂有辛亥之變。德輝與葵園。皆於先

一年以民變案牽連削籍矣。王子以後，不常厥居。北覽燕雲，東遊吳會，藏書既富，著述滋多，雖在流離，卷不去手。嘗慨湖湘在時學者，因沿明人習氣，好著議論，不究本源，雖擅淹通，益形固陋。故其爲學博大汪洋，靡測涯際，而考訂精審，從不輕下己意。一時言古學者，翕然宗之。海內外無異辭焉。所著及校刻書凡數十百種。丁卯三月初十日加申遇難卒。距其生同治三年甲子歲正月十四日，春秋六十有四。

文學

戴名世

戴名世，字田有，一字褐夫，號藥身。又自號憂庵。身後鄉先輩及四方學者，皆稱之曰宋潛虛先生。以宋爲戴族所自出也。先世洪武初，自徽州之婺源徙居桐城。家世孝弟力田。至南居府君，族始大。尤多隱德。所居地曰南灣，因以爲號。繼乃遷於縣治之城東。嘗使其長子面峯至南灣，佃夫有掘地得白金二甌，其上皆金玉寶器，不敢匿。以告主人，面峯歸請命，將取之。南居大怒曰：有毋望之福者，必有毋望之禍。女欲取非義以長其驕，吾家焉用此不才子。乃杖之。佃夫喜，與妻子潛捆載去之。鄰邑買田宅爲富人，居數年，獄吏黜之，誣爲盜。家竟破，罹禍而死。聞者皆服南居之識。面峯之幼子曰默齋，爲廬州經歷時，太守有羸疾，知其長者，事皆屬之。治吏懼服不敢欺謾。一府中皆稱其能。歷署篆，每去，士民追送百里。時鄰邑俗悍難治，上官調其往，事輒平。以故常兼攝兩縣事。居鄉，好賑恤貧乏。鄉老大夫莫不加敬。屢舉鄉飲大賓。生四子，長曰孟庵，卽名世曾祖也。弱冠爲諸生，有聲。後國變，痛哭雜髮，服僧衣。入眠龍山中不出。祖古山先生，宦江西回，待養山中。後因家焉。父碩，字孔萬，邑博士弟子。爲人醇謹，忠厚。與人語，輒以爲善相勸勉。無賢愚皆服其長者。尤喜詩辭，多悲楚。凡百餘卷。名世幼聰穎，六歲從塾師受學。中閒以疾，未能專讀。凡五年，而四書五經畢。自是窺探經史百家，卽善爲古文辭。年二十，授徒養親。師事里中潘蜀藻先生。且多借其藏書觀之。是時長洲韓文懿公薨，以雄駿古雅之文登高第，爲天下宗仰。名世年少，好爲妙遠不測之文，頗爲鄉里姍笑。惟縣司教王先生我建及潘先生奇之。且以宗伯韓公相擬。大父古山先生，亦勉勿

怠。不以窮困爲嫌。康熙庚申年二十八。入縣學爲諸生。是冬。父霜巖先生卒。明年。乃編訂其遺詩。及自訂古文初集。周易文稿。又四年乙丑。以廩生得選拔貢生。督學使者爲諸城劉公木齋吉水李公振玉。咸以國士相目。丙寅冬。入京師。明年以選貢生考取。補正藍旗教習。考授知縣。應京兆試。被放。戊辰己巳之閒。應山東學使某公之聘。自燕踰海。游於渤海之濱。徧歷齊魯之境。己巳夏。自河濟入京師。居三年。授經於李太常愚庵家。壬申冬十月。祖古山先生卒。明年元配李孺人卒。是年乃客福建。明年遊淮上。又明年入京師。居二年。丁丑之春。自京師反金陵。明年秋九月。母方孺人卒。庚辰之春。操房書選政。夏五月。應浙江學使保德姜公之聘。姜公詩文教令。多出其手。冬十二月。仍回金陵。明年。再赴姜公之約。往浙江。且遊覽爛柯雁蕩大龍湫赤城天台諸勝。次第爲文記之。而金陵門人尤雲鸞。以平日所藏名世古文百餘首。雕刻行世。名曰南山集偶鈔。是時已買宅里中之南山。將歸隱。故取以名其集。志歸隱之地也。壬午之冬。乃自江寧歸里。居南山所謂硯莊者。又二年甲申。復客遊姑蘇。明年乙酉。應順天鄉試。中式舉人。又明年。會試被黜。乃自京師復客吳門。操房書之選。又明年秋。乃客江都。並淮上。又客南陵。嘗編訂四書朱子大全。是年冬。告成。明年過淮上。入京師。錢塘友人程逢儀鳳來爲錢板。以廣其傳。名世序之。略曰。四書歷漢及唐。至宋諸儒出。而其義乃大明。蓋有二程子始發孔孟之秘。於千載廢墜之餘。至朱子出。而其學尤爲純粹以精。其闡明四書之義者。尤爲詳密而完備。自朱子沒。諸儒競起。人各爲書。或不能盡得朱子之本旨。其陽奉而陰違者。亦往往有之。明永樂中。詔諸臣編纂四書大全。一時諸巨。皆不知聖人之道。竊取倪氏吳氏兩家。龐雜割裂之書。以應詔。是非互陳。邪正並列。自是學者眩瞶莫辨。雖顯背於朱子之旨者。亦與朱子並奉以爲不刊。蓋四書之義。既大顯明於朱子之手。而復混淆於諸儒者。歷二三百年矣。近日平湖陸氏長洲汪氏。爲之扶摘其疵謬。以告於世。於是大全之雲霧漸掃。而余以謂古人罷黜百家。獨尊孔氏。今之尊朱子。即所以尊孔氏也。故余是書。一以朱子爲主。其於朱子之書。一以集註章句爲主。至於朱子他書。與集註章句互相發明者。采其精要。集而次之。而務一其旨歸。其於諸儒之說。概弗參載焉。夫諸儒之說。其龐雜割裂而疵謬者。汰而去之宜也。

然其中不無可采之論。至當之言。而亦莫之入何也。夫其可采之論。至當之言。原不能出乎朱子函蓋之內也。今夫一堂之上。衆論喧呶。紛紜攻訐。苟非窮理之深。析義之精。聽之焉能無誤哉。惟得一明允之吏。片言立剖。而紛紜之辨自息。是故學者。但明於朱子一家之言。而諸儒之說。是非邪正。自了然於胸中。而不爲其所亂。此則區區爲是書之意也。明年己丑會試。中式第一名貢士。殿試欽點一甲二名進士。授職翰林院編修。時春秋已五十有七矣。又二年。以南山集獲罪。獄辭具於辛卯之冬。又二年論死。蓋名世少即以明史自任。嘗徧訪遺書。網羅故老傳聞。欲以成一家之言。時鄉前輩方學士孝標。故翰林。失職遊滇中。陷而歸。著有純齋文集。滇黔紀聞等書。各世日記中頗采其語。姓而不名。且與余生書曰。前者淨屠犂支。自言永曆中宦者。爲足下道滇黔閒事。余聞之。載筆往問焉。余至而犂支已去。因教足下爲我書其語來。去年冬。乃得讀之。稍稍識其大略。而吾鄉方學士有滇黔紀聞一篇。余六七年前嘗見之。及是而余購得此書。取犂支所言。考之以證其同異。蓋兩人之言。各有詳有略。而亦不無大相懸殊者。傳聞之閒。必有訛焉。然而學士考據。頗爲確核。而犂支又得於耳目之所親記。二者將何所取信哉。昔者。宋之亡也。區區海島一隅。僅如彈丸黑子。不踰時而又已滅亡。而史猶得以備書其事。今以弘光之帝。南京。隆武之帝。閩越。永曆之帝。兩粵。帝滇黔。地方數千里。首尾十七八年。揆以春秋之義。豈遽不如昭烈之在蜀。帝曷之在崖州。而其事漸以滅沒。近日方寬文字之禁。而天下所以避忌諱者萬端。其或孤蘆山澤之閒。有蘆蘆誌其梗概。所謂存什一於千百。而其書未出。又無好事者爲之掇拾流傳。不久而已蕩爲清風。化爲冷灰。至於老將退卒。故家舊臣。遺民父老。相繼漸盡。而文獻無徵。凋殘零落。使一時成敗得失。與夫孤忠效死。亂賊誤國。流離播遷之情狀。無以示於後世。豈不可歎也哉。終明之世。三百年無史。金匱石室之藏。恐終淪散。而世所流布諸書。缺略不詳。毀譽失實。嗟乎。世無子長孟堅。不可聊且命筆。鄙人無狀。竊有志焉。而善籍無廣購。又困於饑寒衣食。日不暇給。懼此事終已廢棄。是則有明全盛之書。且不得見其成。而又何況於夜郎筇峩。昆明洱海。奔竄流亡。區區之軼事乎。前日翰林院購遺書於各州郡。書稍稍集。但自神宗晚節。事涉邊疆者。民間伏去不以上。而史官

所指名以購者。其外頗更有潛德幽光。裨官碑誌紀載。出於史館之所不及知者。皆不得以上。則亦無以成一代之全史。甚矣其難也。余夙昔之志。於明史有深痛焉。輒好問當世事。而身所與士大夫接甚少。士大夫亦無有以此爲念者。又足迹未嘗至四方。以故見聞頗寡。然而此志未嘗不時存也。足下知犂支所在。能召之來。與余面論其事。則不勝幸甚。至康熙辛卯冬。武進趙都諫申喬。據南山集題參。而同時又多忌其名者。力擠之。相國安溪李公。雅重其人。欲疏救於萬死一生之地。卒不可得。桐城經學文章之端緒。開自錢先生田聞。其後望溪方侍郎。昌而大之。名世亦自幼殫精經史。得禍後。多所未究其緒論。惟見之於遺文。嘗曰。易之道大矣。夫子以爲可以寡過。往時讀其言而不知自省也。既學易。而後知生平動靜。無時不在過中。而無有一當。輒不禁涕淚之橫集也。欲攜周易一卷。隱居深山。朝夕占玩。考校諸家。而勒爲一書。或可借以稍寡其過。亦足以樂而終身也。又曰。九師興而易道微。三傳作而春秋散。善哉。文中子之論也。易之爲書。廣大悉備。而其變動不居。不可爲典要。自聖人已言之。是故淺學曲士。一切瓊屑紛紜術數之說。皆得託之於易。雖皆不可謂非易之所有。然徒執區區以言易。則已非易矣。易之理至程傳而明。至本義而益大明。然而言湮世遠。師傳歇絕。自晚周至宋。凡千餘年。伊川考亭。鑽研反覆。得其不傳之意。而著之爲書。其書出於草創之際。豈無十之二三。與文王周公孔子之本旨。不相比附者。世苟有通經學古之士。潛心冥會。融釋貫通。其於程朱繼志述事。能補其所未及。是亦程朱之功也。若乃騁其私見。小慧支離蔓衍。顯無忌憚。而務求勝於古人。是乃所謂叛臣者也。其或讀古人之書。而阿諛以曲從。不敢有毫髮之別異。是乃所謂佞臣者也。佞之爲古人之害也。與叛等。其於經持論平允。多類此。而生平最精者。尤在史學。嘗著論曰。昔者聖人何爲而作史乎。夫史者。所以紀政治典章。因革損益之故。夫事之成敗得失。人之邪正。用以彰善殫惡。而爲法戒於萬世。是故聖人之經綸天下。而不患其或敝者。特有史以維之也。史之所繫如此其重。然而史之難作久矣。作史之難其人。抑又久矣。今夫一家之中。多不過數十人。少或十餘人。吾目見其人。吾耳聞其言。然而婦子之詬誶。其覺之所由生。或不得其情也。王伯亞旅之勤惰。或未悉其狀也。推而至於一邑一國之

大其人又重矣。其事愈分雜而不可詰矣。雖有明允之吏。聽斷審讞。猶或有眩於辭。牽於衆。而窮於不及照者。況以數十百年之後。追論前人之遺迹。其事非出於吾之所親爲觀記。譬如聽訟。而兩造未列。只就行道之人。旁觀之口。參差不齊之言。愛憎紛紜之論。而據之以定其是非曲直。豈能有當乎。夫與吾並時而生者。吾譽之而失其實。必有據其實而正之者。吾毀之而失其實。其人必與吾爭辨而不吾聽也。若乃從數十百年之後。追論前人之遺迹。毀之惟吾。譽之惟吾。其人不能起九原而自明也。孟子曰。盡信書。則不如無書。吾於諸家之史亦云。然則作史豈遂無其道乎哉。夫史之所藉以作者有二。曰國史也。曰野史也。國史者。出於載筆之臣。或錦張太過。或隱諱不詳。其於羣臣之功罪賢否。始終本末。頗多有所不盡。勢不得不博徵之於野史。而野史者。或多徇其好惡。逞其私見。卽或其中無他。而往往有傷於辭之不達。聽之不聰。傳之不審。一事而記載不同。一人而褒貶各別。嗚呼。所見異辭。所聞異辭。所傳聞異辭。吾將安所取正哉。書曰。三人占。則從二人之言。吾以爲二人而正也。則吾從二人之言。二人而不正也。則吾仍從一人之言。卽其人皆正也。而其言亦或可盡從。夫亦惟論其世而已矣。一事也。必有一事之終始。一人也。必有一人之本末。綜其始終。核其本末。旁證互參。而固可以得其十八九矣。子曰。衆好之。必察焉。察之而有可好。亦未必遂無可惡者。察之而有可惡。亦未必遂無可好者。衆不可矯也。亦不可徇也。設其身以處其地。揣其情以度其變。此論世之說也。吾旣論其人之世。又論諸作野史者之世。彼其人何人乎。賢乎否乎。其論是乎非乎。其爲局中者乎。其爲局外者乎。其爲得之親見者乎。其爲得之遜聽者乎。其爲有所爲而爲之者乎。其無所爲而爲之者乎。觀其所論列之意。察其所予所奪之故。證之他書。參之國史。虛其心以求之。平其情而論之。而其中有可從有不可從。又已得其十八九矣。嗚呼。史之難作如此。而自古至來諸家之史。不能皆得而無失。此吾所以謂作史之難其人也。曾鞏氏曰。古之所謂良史者。其明必足以周萬事之理。其道必足以適天下之用。其智必足以通難知之意。其文必足以發難顯之情。然後其任可得而稱也。又曰。史者所以明夫治天下之道也。由此觀之。作史之人。豈不難哉。自古稱良史。莫過於班馬二家。然以司馬氏之雄傑。覆冒百代。而不無是非。

顛倒。采摭謬亂。是其智雖足以通難知之意。其文雖足以發難顯之情。而明固不足以周萬事之理。道固不足以適天下之用矣。至於班氏之文。較之於司馬氏。又尙有不逮焉。夫班馬二家。豈非天下之才乎。而猶有所憾若是。而況於魏晉以後。區區之破析其體。藻繪其辭。而義類盡失者哉。此吾所謂作史之難其人也。且夫作史者。必取一代之政治典章。因革損益之故。與夫事之成敗。人之得失。一一了然洞然於胸中。而後執筆操簡。發凡起例。定爲一書。乃能使後之讀之者。如生於其時。如卽乎其人。而可以爲戒。譬如大匠之爲巨室也。必先定其規模。向背之已得其宜。左右之已審其勢。堂廡之已正其基。於是入山林之中。縱觀熟視。某木可材也。某木可柱也。某木可棟也。榱也。某石可礎也。階也。乃集諸工人。斧斤互施。繩墨並用。一指揮顧盼之間。而已成千門萬戶之鉅觀。良將之用衆也。紀律必嚴。賞罰必信。號令必一。進止必齊。首尾必應。運用之妙。存乎一心。變化之機。莫可窺測。乃可以將百萬之衆。而條理不紊。臂指可使。兵雖多而愈整。法雖奇而實正。而吾竊怪夫後世之爲史者。規制之不立。法律之茫然。舉步促縮。觸事艱險。是亦猶之尋丈之木。尺寸之石。而不知所位置。五人十人之聚。而駕馭乖方。喧嘩擾亂。而不可禁止。又安望其爲巨室。而用大衆乎哉。此吾所以謂作史之難其人也。且夫爲巨室者。募工雜進。而職其體要。惟度材是任者。大匠一人而已。用兵者。卒徒雖多。偏裨雖武猛。而司三軍之命者。大將一人而已。爲史者。雖徵文考獻。方策雜陳。而執筆操簡。發凡起例者。亦不過良史一人而已。而吾又竊怪夫後世之爲史者。素不聞有博通三史之學也。素未知有筆削之法也。分編共纂。人人而可以爲之。一人去。又一人來。往往一書未成。而已經數十百人之手。曠日踰時。而卒底於無成。衆拙工而治一器。衆懦夫而治一軍。器安得不廢。而軍安得不敗哉。是故以司馬氏班氏歐陽氏爲之大匠良將。而史記。而漢書。而五代史。可成也。新唐書。非歐陽氏一手之所定。遂不能與五代史齊觀。則夫史氏非專家之學。不可以稱其任。此亦可以見矣。夫所謂專家之學者。天下之才也。如曾鞏氏之所謂。而後可以爲良史也。或謂史之難作如此。作史之又難其人如此。願安所得如司馬氏班氏歐陽氏者。出而任之。此亦視乎上之所重而已矣。上之所重在經學。則天下之通經者出。上之所重在史學。則天下

之良史者出。而又何患於史之難作。與作史之難其人哉。名世於文。幼有天授。才氣汪洋浩漣。縱橫飄逸。雄渾悲壯。深得左史莊騷神髓。嘗以其所得。暢發之於書曰。蓋余嘗讀道家之書矣。凡養生之徒。從事神仙之術。滅慮絕欲。吐納以爲生。咀嚼以爲養。蓋其說有三。曰精。曰神。曰氣。曰神。此三者。鍊之凝之。而渾於一。於是外形骸。凌雲氣。入水不濡。入火不熱。飄飄乎御風而行。遺世而遠舉。余嘗欲學其術而不知所從。乃竊以其術而用之於文章。嗚呼。其無以加於此矣。古之作者。未有不得是術者也。太史公纂五帝本紀。擇其言尤雅者。此精之說也。蔡邕曰。鍊余心兮。浸太清。夫惟雅且清。則精。精則糟粕煨燼。塵垢渣滓。與凡邪僞剽賊。皆刊削而靡存。夫如是之爲精也。而有物焉。陰驅而潛率之。出入於浩渺之區。跌宕於杳靄之際。動如風雨。靜如山岳。無窮如天地。不竭如江河。是物也。傑然有以充塞乎兩閒。而蓋冒乎萬有。嗚呼。此爲氣之大過人者。豈非然哉。今夫言語文字。文也。而非所以文也。行墨蹊徑。文也。而非所以文也。文之爲文。必有出乎語言文字之外。而居乎行墨蹊徑之先。蓋昔有千里馬。牝而黃。伯樂使九方皋視之。九方皋曰。牡而驪。伯樂曰。此真知馬者矣。夫非有聲色臭味。足以娛悅人之耳目口鼻。而其致悠然以深。油然以感。尋之無端。而出之無迹者。吾不得而言之也。夫惟不可得而言。此其所以爲神也。今夫神仙之事。荒忽誕漫不可信。得其術而用之於文章。亦足以脫塵埃而游乎物外矣。又曰。文章之爲道。雖變化不同。而其旨非有他也。在率其自然。而行其所無事。即至篇終語止。而混茫相接。不得其端。此自左莊馬班以來。諸家之旨。未之有異也。蓋文之爲道。未有不讀書而能工者也。然而吾所讀之書。而吾舉而棄之。而吾之書固已讀。而吾之文固已工矣。夫是以一心注其思。萬慮屏其雜。直以置其身於埃壙之表。用其想於空曠之閒。游其神於文字之外。如是而後。能不爲世人之言。不爲世人之言。斯無以取世人之好。故文章者。莫貴於獨知。彼衆人者。耳剽目竊。徒以雕飾爲工。觀其菁華爛漫之章。與夫考據排纒之際。出其有惟恐不盡焉。此其所以枵然無有者也。君子之文。淡焉泊焉。略其町畦。去其鉛華。無所有。乃其所以無所不有者也。聞嘗入乎深林叢薄之中。荆榛罥吾之足。土石封吾之目。雖咫尺莫能進焉。余且惴惴懼跬步之或有失也。及登覽乎高山之巔。舉目千里。雲煙在下。

蒼然茫然。與天無窮。頃者游於渤海之濱。見夫天水渾淪。波濤洶湧。愴怛四顧。不復有人間。嗚呼。此文之自然者也。又嘗論曰。質者。天下之至文者也。平者。天下之至奇者也。莫質於素。而本然之潔。纖塵不染。而采色無不受焉。莫平於水。而一川泓然。淵涵滄蓄。及夫風起水涌。魚龍出沒。觀者眩駭。是故於文求文者。非文也。於奇求奇者。非奇也。今夫浮華濃豔。刊落之無遺。而後真實者以存。潦水既盡。寒潭以清。此其所以造於質且平也。假使世俗爲之。則其所爲質且平者。枯槁頑鈍。而無一有。安在其文。亦安在其奇邪。其論文如此。名世生於昌隆之際。人才極盛之秋。所與交遊。砥礪學業。四方豪俊英偉。莫不傾倒。尤留心先朝文獻。蒐求討論。自以爲此古今大事。不敢聊且爲之。欲入名山中。滌洗心神。餐吸沆瀣。息慮屏氣。久之乃敢發凡起例。次第命筆。而不幸死喪相繼。家益落。衣食於奔走。又以奇禍。困躓顛倒。含恨而歿。千秋大業。卒未能顯於世。徒以區區文字爲世所稱道。夫豈其本志哉。平生堅苦力學。晚益深造自得。不肯一刻離書。在獄中約計二載餘。以昔所編訂四書朱子大全。鐫板行世。尙以爲未盡也。復取原書。增損條記簡端。硃墨淋漓。蓋此書羽翼經傳。爲程朱功臣。故慙慙爲後學計。尤切。其史學可見者。則子遺錄一卷。及集中紀略。并忠義諸傳而已。往者。戴存莊孝廉鈞嘗搜輯其散軼之文。合偶鈔本編。爲潛虛先生全集。成十四卷。茲又搜求得紀略四首。又他雜文百餘首。詩三十首。各世生於順治十年癸巳三月十八日。年六十有一。

梅曾亮

梅曾亮。字伯言。上元人。父冲。世所稱抱邨先生者也。曾亮成道光壬午進士。以知縣用。援例改戶部郎中。少時文喜駢儷。既游姚郎中門。與管同友善。同輒規之。始頗持所業相亢。已乃悟。伴優所爲。無真面目。乃一變爲古文詞。其文洗伐最深。故饒姿韻。官京師久。以文自贍。一時碑版記敘。率其手筆。時論盛稱之。嘗著民論。言亂民姦民之別。而推極於五斗米張角之所由來。其上汪稼門書。亦諄諄言憂民易治。姦民難治。治之者獨州縣。而今爲州縣者。皆苦無權。夫州縣豈無權哉。民事利病修廢之宜。方竭其聰明才力以求之。猶未必盡舉。然事之萬全無害者。

幾何。而倡議行之。文書之上簿者。上官六七級。此合彼悟。返往曠日。迫切成過誤。功未收而罪已集矣。夫足以有爲之才。值萬不得已之事。而逆阻於文報階級之繁擾。以聽其破壞於冥冥中者。什蓋八九。故曰無權也。曾亮見川楚教匪之亂。及嘉慶十九年林清之變。故其詞如此。又著刑論。頗中近日刑部說帖駁案之弊。其詞謂法貴易知而難犯。決一人之死。而可使千萬人之不敢入於死。此法之整齊簡易者也。古之人。非不知情事有萬不齊。然一切之法。不足悉其變。不若從其略者。乃天下之公失也。大抵曾亮駢文爲上。詩次之。散文循桐城家法。平易無情實。於史記師其論贊姚佚。而置其八書之典博。同時諸公。倒屣禮待。極令聞廣譽施身之致。有後進謁於京邸者。戒以長安居大不易。惟擇交游。端言行。勤讀書三言而已。其人本誠篤。用是益兢兢無纖芥過。回里。猶尋味其言不置云。江寧老宿。能以德望服人。而人服之無退詞者。惟聞管同與曾亮。既以文名輦轂。邑人許宗衡謁之。與論文至千百言。其他靜默而已。晚歲罷官。滄經學逆之亂。浮沈江淮閒。其同年生楊以增總督南河。招之。且爲刊所著柏枧山房文集十六卷。及詩十二卷。駢文二卷行於世。咸豐六年正月。卒年七十一。

蔣超伯

蔣超伯。字叔起。幼穎異。九歲詠蘆花。卽有蘆中人不見。秋雪滿江飛之句。未冠。補諸生。學使祁文端公憲藻亟稱許之。道光十九年。舉於鄉。二十五年。會試第一。總裁大學士穆彰阿。稱其文有瞿鄧宗風。釋褐。改刑部主事。咸豐五年。補陝西司主事。次年。充軍機章京。尋擢安徽司員外郎。轉江西司郎中。十年。授江西道監察御史。時高郵靈筋決口。災黎盈野。當軸者不籌堵禦。超伯抗疏極言之。文宗特命副都御史晏端書漕運總督王夔齡。督修隄工。尅期蒞事。民賴以安。統兵大員有視師不力。避寇潛逃者。超伯皆具疏糾劾。十一年。簡授廣西南寧知府。同治二年。調補廣東高州知府。信宜劇寇陳金缸。囑負僭號南興王。旁擾郡縣。超伯命所屬各邑。行堅壁清野法。克復信宜縣城。金缸遂就擒。又以肅清高涼羅定各郡。敘戰守功。賞戴花翎。並加鹽運使銜。後知潮州府事。又以防禦巨寇汪海洋功。加按察使銜。五年。攝廣州知府。清釐積案。囹圄幾空。後以道員需次省垣。大吏檄署按察使。十年。乞

休歸里。超伯性耽吟誦。居恆手不釋卷。所著有爽鳩要錄。南濱桔語。蘆漢舊錄。南行紀程。窺約集。通齋詩文集若干卷。卒年五十五。

黃遵憲

黃遵憲。世爲嘉應州人。曾祖學詩。祖際昇。父鴻藻。官廣西知府。遵憲以拔貢生中式。光緒二年。順天鄉試舉人。旋隨使日本。歷官四十年。有大小久暫之不同。而皆舉其職。當爲日本使館參贊也。日本方縣我琉球。且覬及朝鮮。遵憲告使者。乘彼謀未定。先發制之。具牘數千言。陳利害甚悉。東人至今誦之。而當事不省。不二十年。二屬遂相繼不保。又爲英之新嘉坡。美之舊金山總領事矣。笑人嫉吾民之僑彼境者。蓄志擯之。遵憲旣以先事禦之之謀。告其上而不用。乃盡其力所能及。以爲捍衛。美政府嘗藉口衛生。係吾民數千。遵憲數語捍圍而脫之。且責償焉。居外國久。於其上下情形。內外形勢。洞幽察隱。故凡有所應付。莫不迎刃而解。而大吏亦稍稍知其能外交。故每以事相屬。江鄂四省教案。積數十起。連十數年。文牘盈尺。莫能斷結。遵憲受委。浹月而決之。教士擡舌而不敢爭。異時沿江沿海劃地爲市。租借外旅。命曰租界。始事者昧於國際法。於界內昇以治外法權。喪威失權。悔不可追。間嘗憫之。值甲午之役。約以蘇州杭州兩處爲租界。適主其事。乃曰。蘇杭腹地。非江海口岸比。因議自營市政。凡所以便外旅者。纖悉備至。而獨於治外法權則靳焉。日本主者。莫能難也。殆畫諾矣。適有以蜚語相中者。謂其受外賂。爲它人計便安。約遂廢。而日本亦撤其使歸。兩國同以此事譴其使。而天下萬國。則謂日本之舉。爲計獨得也。遵憲雖以外交知名當世。然兩受使命。皆中沮。光緒二十一年。奉旨入覲。以道員帶御銜。授出使大臣。駐德國。時德人方圖膠州。憚其來。折其機牙。迺設詞以撼我政府。卒尼其行。光緒二十四年。復以三品京堂候補充出使日本大臣。時方解湖南按察使任。養疾上海。淹留未行。而黨禍卒起。緹騎繞室者兩日。幾受羅織。事雖得白。使事亦解。遂歸田里。光緒三十一年二月二十三日。以疾卒於家。遵憲讀書有精識。遠見。不囿於古。不徇於今。嘗思成一家言。曰漢孔篇。未成。而所成之日本國志四十卷。當吾國二十年以前。羣未知日本之可畏。而此書則已言曰。

本維新之效。成則且霸。而首先受其衝者爲吾中國。及後而其言盡驗。以是人尤服其先見。爲文章。務取暢達。不苟爲夸飾。至其爲詩。則精思渺處。盤礴而莫測其際。自其少年稽古學道。以及中年閱歷世事。暨國內外各山水。與其風俗政治形勢土物。至於放廢。而後憂時感事。悲憤伊鬱之情。悉託之於詩。故其陽開陰闡。千變萬化。不可端倪。平生所作逾千首。自哀集得六百餘首。曰人境廬詩草。

丁惠康

丁惠康。字叔雅。自號惺庵。廣東豐順人。父日昌。以諸生起家。官至福建巡撫。所至有聲。惠康少豪宕不羈。然習聞庭訓。學問皆粗知門徑。忽豁然有悟。痛刮磨舊習。發篋陳書讀之。時巡撫公已卒。家有園林。富圖籍。相傳同治初元。上海郁氏宜稼堂之書散出。巡撫公適官蘇松太道。其舊槧名校精鈔。大半爲所得。若宋刊世綵堂韓文。程大昌禹貢論。九朝編年。毛詩要義。儀禮要義。金刊地理新書等。或云十種。或云五十餘種。均歸持靜齋。其最著者矣。惠康於經史百家九流訓詁詞章金石之學。皆汎其涯落。筆爲文。有魏晉閒人風格。人亦如其文。雖爲邑諸生。不屑求科舉。雖爲部郎。未嘗分部學習也。嘗北遊。欲讀書南學。長抄張百熙領學事。置之第一。旋舍去。遊日本。歸而參學務於廣州。又舍去。庚子之亂。大學士粵督李鴻章議和至上海。惠康大集南北志士。銳欲有爲。謁鴻章陳政策。鴻章不能用。百熙旋薦舉經濟特科。不應。自是往來京師上海。居京師數年。一室無塵。舊本圖史。插架張壁。數亡琴直千金數百金。瓶爐盆盃杯盤之屬。多古瓷。下者猶舊青花。然日用常無以自給。友人或貲助之。與曾習經陳衍姚梓芳吳保初羅惇愚數人交最密。或告以貌酷似王介甫。則陰喜自負。時以語人。則知其未忘世也。嘗以獨山黃友芝所輯持靜齋書目。尙少綱領之提。欲爲有清經籍志。汝賓宇訪學錄諸書未成。以宣統元年四月晦日卒於京師。有子女各一。遺詩百十首。

賀濤

賀濤。字松坡。先世山西洪洞人。明永樂閒。遷直隸之武強。居段家莊。爲武強人。三世祖諱成家。隆慶閒移居北代。

至濤父以訓導久官故城不去。復移居鄭家口。賀氏望族。其藏書名甲畿南。高會以來。仍世有文。至濤益厲時獨出。崢然躋宋明作者。而上凌駕漢唐。直與古之遺文接聲歎。年十六。補博士弟子員。縣院試皆第一。同治庚午。舉於鄉。弟沅與濤同榜鄉舉。及光緒丙戌會試。又兄弟同榜成進士。學者傳以爲榮。初爲反離騷。桐城吳先生一見奇之。登諸門牆。授以歷代所傳斯文之緒。及武昌張先生北來。都講保定蓮池書院。復引而運之。張先生得之。喜爲至寶也。時吳先生方爲冀州。言之上官。自大名教諭調署冀州學正。都講信都書院。乃益以研稽文藝爲事。進則證所得於兩先生。逮者書問。近者面質。退則與諸生講說。反復辨駁。孜孜不已。雜以笑謔。大暢厥旨。至張先生南歸。吳先生接都蓮池。每有所作。猶寄書與爲是正。濤語言妙天下。雅趣不爲滑稽濫說。聞者解頤。而事理的破。尤妙於說書。善爲形容。正言不喻。而偏宕言之。聞以譬況。俾古人之聲音笑貌。凌厲紙上。汲引學者心目。由百世之下。等百世之上。若親與古人晤對。唯諾一室之中。又愛西儒學說。說理宏深。病吾譯者。蹇於辭。不能達其誼。思整齊要刪。成一家言。復游京師保定。送主長沙陳伯平中丞。天津徐鞠仁太保。項城袁公督直隸時。於保定立文學館。延濤主其事。先是已有存古學堂之議。鄉曲老儒。額手稱慶。濤獨以謂中學以文章爲主。學文與他學不同。或窮年佔畢。不見其進。而一旦驟長。或執卷研索。不得其解。而觸物旁通。若拘於學堂定例。限之歲月。而責以員程。則所謂古者。名存而實先亡矣。至是袁公手書屬盡除去學堂科目。一任濤所爲。又致書毛實君方伯。代通殷勤。且曰。若賀君不至。則此館無庸虛設。濤乃起而任事。高縣其格。厚與之餼。人無定額。業有專攻。凡所招致。皆一時知名之士。南皮張宗瑛。深州武錫珏。首至。冀縣趙衡。陳嘉謨。深縣侯際辰。棗強齊文煥。武邑吳之沅。王汝楫。亦絡繹具來。未幾袁公去直隸。而濤亦辭館歸。自是倦游不復出矣。濤於學無所不究。悉以文馭之。故所得獨精。雖專門其學者不能逮。嘗爲天文之學。馭以繞日新說。而月行星軌道之膠葛。悉除。又刺得割圓曲線之要。向所謂視蒙氣差。測之悉準。嘗爲輿地之學。馭以今行省州縣。依所畫疆界。犬牙鉤錯。翦裁之。分爲無數小圖。而合之爲一。其界畫纖細。僅如牛毛。比每與學者說古人之文。輒取所爲圖。布列几上。視數千百年以前戰爭割裂。

之壤地。杈枒鉤棘。瞭如掌文。蓋文爲諸學之機緘。不能文而泛言攻證。皆糟魄也。不能文而侈談事功。皆瓦礫也。不能文而高語性命。皆朽腐也。顧諸學以文爲機緘。而爲文要自有道。自孔子次春秋以制誼法。法卽易之所謂言有敘。誼卽易之所謂言有物也。古人之渾言其理。而於命意遺辭。何以爲有物。安章宅句。何以爲有敘。固未之詳也。濼嘗自言其於文事粗有所知。悉得力自評點。評點之學。創自明歸熙甫氏。至方望溪劉海峰姚姬傳氏。下逮張吳兩先生。承用其說。爲之益多。用以發古人不傳之秘。而爲後之學文者別啓一涂轍。譬若新學之有儀器標本。於無可指示之端。能爲之圖形指示。俾學者一目了然。用至便。法至善也。內行純篤。於昆弟始終無違言。事父母尤能得其歡心。視世事漠無足介其意者。有文二百篇。寫定在紙。年六十有四卒。實惟中華民國元年五月一日也。

陳慶年

陳慶年。字善餘。江蘇丹徒縣人。爲學大旨不分漢宋門戶。尤精三禮春秋。兼復旁搜遠紹。補漏匡幽。蚤歲所著有古香研經室筆記。爾雅漢注輯述。祀竈書述故。中年肄業江陰南菁書院。著有知忘錄。司馬法校注輯。司馬法逸文。漢律佚文疏證。補三國志儒林傳。厥後淹貫史乘掌故。又著有宗聖志。潤故述。西石城風俗志。石城鄉人叢記。橫山鄉人叢鈔。京口掌故叢編。風俗史料。近代史料。通鑑紀事本末要略。五代史略。明史詳節。遼史講義。陶隱居蘇魏公沈夢谿楊文襄諸年譜。淳蓄演迤。騰蹕百家。閒作單辭短簡。亦務合於大誼。江南北諸名宿。斂手推股。長沙王益吾學使定海黃元同先生。皆驚賞曰。吾門得一汪容甫矣。慶年嘗謂士不通經。不足致用。然非致用。亦不可謂通經。故於食貨財用兵陳策略。與夫山川阨塞諸要端。靡不殫精竭思。究其源流。嘗主修兩淮鹽法志。別爲撰要。其關於農事商政者。有丹徒農事述。物價研究史料。關於地利者。有法顯行程圖。玄奘旅行圖。元代疆域圖。輿地新資料。關於兵事者。有京口兵事通紀。兵法史證。兵法史料口義。柏舉戰史。吳越戰史。萬曆屬徵征播史。兵事叢鈔等。張文襄勘查京山唐心口堤工。以慶年精地學。若行。他人方飲酒賦詩。而慶年獨步荒郊。挈測器。實地

勘驗。並訪野老。詳詢疾苦狀。文襄深倚之。又著外交史料。列國政要。與鄂省諸學子講明中外形勢。瞭如指掌。蓋是時慶年方佐張文襄幕府。筦攝兩湖學務云。其初辦江南圖書館也。江督端忠敏。實委任之。先購杭州丁氏藏書數十萬卷。又采取他省局書二十萬卷。嘗一拒日人島田彥楨。再拒木村恆雄等購書之請。蓋非此則江南之書。勢將不脛而走。又佐忠敏與日商西澤華回東沙島。蓋援雍正閒陳倫炯海國聞見錄沿海形勢圖以爲據。海內搢紳。交口稱頌。慶年孝行純篤。事親視於無形。聽於無聲。赴江陰時。父送至江干。於岸上燈光中望見須髮蒼然。不覺淚盈於睫。過焦山。淒然西望。猶感泣不已。母病。侍奉數十晝夜。及歿。號哭不絕聲。父疾革。伏其側。謂之曰。汝盍重呼我。我將載汝聲以去也。慶年肝腸寸斷。幾不知己之有生矣。慶年光緒戊子科優貢生。嘗選授江浦縣教諭。徵辟經濟特科。皆辭不就。癸卯。鄂撫端忠敏奏保內閣中書銜。其平生著書校籍。都凡千餘卷。至不可勝記。今著錄者十之四五而已。以同治元年十二月十五日生。民國十八年六月三日卒。壽六十有八。

鄭文焯

鄭文焯。字俊臣。號小坡。又號叔問。晚年自署大鶴山人。先世居漢北海郡高密縣通德里。爲鄭康成之裔。九世祖國安。於清初鎮守關東海島。從入關有功。編入正黃旗漢軍籍。至文焯。應光緒丙子會試。請冠本姓。遂姓鄭氏。曾祖鶴年。祖普安。本生祖普明。考瑛榮。官至河南巡撫。兼署河南山東河道總督。世稱蘭坡先生。先生久宦秦晉豫數省。惠政及民。以餘事爲詩書畫。神趣天然。均極筆墨之妙。有鄭虔三絕之稱。文焯濡染家學。天質卓絕。幼卽個儻見志節。爲文有奇氣。課餘喜作繪事。蘭坡先生嘗收藏大歲時見壁懸畫軸。卽知臨摹舞勺之年。輒以指作畫。凡花鳥山水人物。著手立就。光緒乙亥。應順天鄉試。中式舉人。出崇文貞毛文達諸公之門。房考則陳毅庵先生也。會試屢薦不售。遂絕意進取。愛吳中山水幽勝。客居三十餘年。歷爲撫吳使者上客。事必諮而後行。光宣之交。陳伯平中丞啓泰尤相推重。每有酬唱。傾倒彌日。嘗與張次珊侍御仲忻言曰。叔問所爲詞。雄厚之氣。直逼清真。時流無與抗手。此由詣力心思。都高人一等也。中丞在蘇創建存古學堂。按月校藝。延爲都講。第其高下。碩

彥通材。咸來捧手受業。文焯亦循循善誘。樂與有成。辛亥國變。年五十有六。愴懷身世。自比淵明。孤憤滿腔。悉於詞發之。因以荜雅名其集。藉寓不如無生之感。朱古微侍郎孝臧嘗爲刊荜雅餘集。且作弁言。語極沈痛。其辭曰。君以獨行之志。胥疏江湖。固墨墨以詞自晦者。至是而僅僅以詞顯歟。惟其名益高。其志益苦。其詣益進。而其遇益窮。豈詞果不祥之音。而於窮者尤驗耶。抑昔人所謂昌其身。不若昌其文耶。夫士生晚近。負閎識絕學。久孤於世。無所放其意。則託諸微言。儼然事物之所惑觸。於是繾綣惻怛以喻其致。幽噎淒戾以形於聲。橫歌哭而變風謠。作者誠不自知其何心。至乃天字崩析。彝教淪胥。窳羸行之軀。被佯狂之髮。茫茫慘黯。哀斷無生。向所爲長言嗟嘆之不足者。曾不得一詠搖焉。然則斯文之將墜於天。其以詞爲人籟。而天者動於幾之先歟。文焯生於咸豐六年丙辰七月二十八日。卒於民國七年戊午夏正二月二十六日。年六十有三。夫人張氏。字眉君。熱河正總管毓泰長女。才茂德懿。工繪事。善鼓琴。靜好相莊。終身無閒。文焯於國變後。以越人術及鬻畫自給。清史館聘爲纂修。北京大學校校長某君聘爲金石學教授主任。均忍飢不就。辭謝牋啓。傳誦藝林。有云。故國野遺。蒿目世變。久甘頹放。何意舉比業醫賣畫。老而食貧。固其素也。所著書甚富。自寫定書目凡三十九種。生前已刊者有大鶴山房全集凡九種。曰揚雄說故一卷。曰高麗永樂好太王碑釋文纂考一卷。曰醫故二卷。曰詞原校律二卷。曰冷紅詞四卷。曰樵風樂府九卷。曰比竹餘音四卷。曰荜雅餘集一卷。曰絕妙好詞校釋一卷。至詩稿若干卷。則易篋後。戴君正誠檢其遺篋校定付刊者也。戴君尙欲蒐輯軼稿盡刻之。又爲編次年譜若干卷。

編者附註

一、正編文學類之錢謙益誤入政事類。龔鼎孳洪亮吉吳觀禮誤入藝事類。容再版更正。

二、有清一代人物僞盛。傳記彬駢。頗難網羅。如有碑傳行述或記敘一行一節之文字見惠。卽當酌量編入續集。然擬輯民國以來人物志。有以傳狀等相示。亦所歡迎。倘以稿本借鈔。仍當挂號寄還也。

附錄一 清代大事年表

世祖順治

元年

四月

吳三桂乞師入山海關。大破李自成。自成西遁。封三桂爲平西王。明兵部尙書史可法等奉福王由崧監國南京。

五月

攝政睿親王多爾袞入京師。明福王由崧卽皇帝位於南京。以史可法督師江北。召馬士英入閣。明分淮陽鳳廬爲四鎮。以黃得功劉良佐劉澤清高傑領之。明進封左良玉爲寧南侯。

六月

明追上崇禎帝后諡號。明主召阮大鍼陸見。明吏部尙書張慎言罷。明總兵劉澤清入朝於南京。吏部侍郎呂大器罷。明馬士英乞罷。慰留之。

七月

清軍追擊李自成於山西。大破之。自成遁歸西安。清兵克山東。又克山西。明遣兵部侍郎左懋第等行成於清。

八月

張獻忠陷成都。明蜀王玉樹。及巡撫都御史龍文光。巡按御史劉之毅等死之。明以前大學士王應熊爲兵部尙書。督師討蜀寇。起前寧夏巡撫樊一蘅爲兵部侍郎。總督川陝軍務。明以阮大鍼爲兵部侍郎。巡閱江防。明封鄭芝龍爲南安伯。明總兵黃得功趨揚州。高傑以兵襲儀真不克。明史可法遣諸將分守要地。高傑移駐徐州。明大學士姜曰廣罷。明左都

御史劉宗周罷。明逮前浙江

巡按御史左光先下獄。明吏

部尙書徐石麟罷。

十月

乙卯朔帝至自盛京。即皇帝位。

定都北京。詔文臣衣冠暫從

明制。建堂于玉河橋東。加

封多爾袞爲叔父攝政王。明

大學士高弘圖罷。明以前兵

部尙書張縉彥總督北直山西

河南軍務。明以張捷爲吏部

尙書。楊維垣爲通政使。清兵

西討李自成。分兵南下。

張獻忠僭號於成都。明史可

法率師北伐。進次清江浦。清

兵下宿遷。明逮治前昌平巡

撫何謙等。明桂王常瀛卒於

梧州。

十二月

清兵走河南府。殺明內監楊

玉等十五人。明重頌三朝要

二年

正月

典。命追卹逆案諸臣。

明以南京宮殿成。推恩諸臣有

差。明總兵許定國殺高傑於

睢州。明以衛允文爲兵部侍

郎。總督開歸防剿軍務。

二月

明以阮大鍼爲兵部尙書。清

兵下西安。李自成走襄陽。陝西

平。明定北都從賊諸臣罪。削

刑部尙書解學龍籍。

清兵定河南。明左良玉舉兵

三月

反。

明庶吉士周鍾給事中光時亨

伏誅。遂殺前吏部郎中周鏞。山

東按察司僉事雷寅祚。明徵

劉良佐等將兵入援。明左良

玉死于九江。清兵下泗州。

清兵下揚州。明督師兵部尙書

兼大學士史可法等死之。

五月

清兵渡江克鎮江。明主出奔

太平。清兵定南京。清兵至蕪湖。明總兵田雄劫其主以降。靖國公黃得功死之。江南平。清兵克杭州。明潞王常務降。唐王聿鍵奔福建。明兵部尙書

張國維等奉魯王以海於紹興。稱監國。下雜髮令。陝西胡守龍等作亂。總督孟喬芳討平之。

閏六月

命大學士洪承疇等招撫江南各省。明吏部尙書黃道周等奉唐王聿鍵稱帝於福州。明以黃道周爲武英殿大學士參贊機務。餘授官有差。

七月

清兵定江西。明主遣大學士黃道周以兵出江西。

八月

清兵克松江。明以黃景昉呂大器路張飛朱繼祚曾櫻爲大學士。明靖江王亨嘉自稱監國。明主執而殺之。明魯王以

海遣兵攻杭州。不克。詔收無主田地。給旗人耕種。清兵入湖廣。流賊李自成伏誅。餘衆盡降於明。湖廣總督何騰蛟收撫之。

十月

清兵下徽州。定國大將軍豫親王多鐸班師還京。明主遣使於魯王以海。以海不受。

十二月

明主自福州移駐建寧。明督師大學士黃道周進兵婺源。戰敗死之。

三年

二月

明主移駐延平。

三月

清兵克吉安。遂圍贛州。

六月

清兵下紹興。明魯王以海遁入海。

七月

清兵下衢州。清兵下建寧。遂進兵入閩。明主奔汀州。清兵遂克延平。

八月

清兵克贛州。

十一月

明兵部尚書丁魁楚。兵部侍郎瞿式耜等奉桂王由榔稱帝於肇慶。明大學士蘇觀生等奉唐王聿錡稱帝於廣州。明主由榔遣兵攻廣州不克。

十二月

清兵克廣州。執明唐王聿錡。廣東平。明主由榔奔梧州。清兵至順慶。流賊張獻忠伏誅。其黨孫可望李定國白文選等潰走川南。興國州寨寇柯抱仲作亂。湖廣總兵柯永盛討平之。寨寇悉平。

四年

正月

清兵克肇慶。明主由榔奔桂林。清兵克平樂。明主由榔奔全州。以大學士瞿式耜留守桂林。

三月

清兵攻桂林不克。四川賊孫可望李定國等率衆入雲南。清兵克長沙。

四月

明主由榔爲其將劉承允劫遷於武岡州。明兵科給事中陳邦彥攻廣州。敗走。

五月

清兵克衡州。明監國魯王以海遣兵攻崇明。

六月

明主由榔召其督師大學士何騰蛟入武岡。尋遣還。

七月

明兵遣平樂梧州諸郡。明監國魯王以海遣兵攻福州。敗走。

八月

清兵克武岡。明主由榔奔柳州。明東閣大學士陳子莊以兵攻廣州。敗死。清兵克永州。

九月

明主由榔奔象州。

十月

明監國魯王以海遣兵取福寧州。清兵克黎平。

十一月

清兵克沅州。清兵攻全州不克。清兵克梧州。

十二月

明主由榔遷桂林。清兵克全州。

五年

正月

總兵金聲桓叛。以江西附於明主由榔。明朱容藩稱監國於夔州。尋敗死。

二月

清兵至靈川。明主由榔奔南寧。

三月

清兵克興化。復明監國魯王以海所取諸州縣。革鄭親王濟爾哈朗爵。逮肅親王豪格幽繫之。命都統譚泰為征南大將軍。率兵討江西。

四月

提督李成棟叛。以廣東附于明。

五月

明主由榔遣兵復全州。

六月

明主由榔至潯州。

八月

明主由榔至肇慶。

九月

纂修明史。

十月

殺明降將劉澤清。

十一月

大同總兵姜瓖叛。

六年

正月

朝鮮遣使入貢。清兵入湘潭。明督師大學士定與侯何騰蛟死之。明主由榔罷其大學士。

七年

二月

朱天麟等官。清兵克南昌。金聲桓敗死。明故大學士姜曰廣死之。

三月

清兵至信豐。李成棟敗死。攝政王多爾袞率師征大同。輔政德豫親王多鐸卒。

四月

清兵克衡州。清兵克福安。明大學士劉中藻死之。

五月

招民勸墾荒田。孫可望遣使求封於明主由榔。

六月

清兵定湖南。

七月

明監國魯王以海遁入舟山。

八月

孔有德耿仲明尙可喜。兩廣仲明行至江西。自盡。

九月

清兵克南雄。

十月

清兵克韶州。明主由榔奔梧州。

十一月

明主由榔下其給事中金堡等獄。清兵圍廣州。清兵克全州。

十二月

清兵克南雄。

正月

清兵克韶州。明主由榔奔梧州。

二月

明主由榔下其給事中金堡等獄。清兵圍廣州。清兵克全州。

六月 明主由榔罷其大學士嚴起垣官。尋召還。

十月 攝政王不豫。

十一月 平西王尚可喜攻克廣州。定

南王孔有德攻拔桂林。明留守

大學士臨桂伯瞿式耜等死之。

明主由榔奔南寧。孫可望殺其

大學士嚴起恆等。

十二月 攝政睿親王多爾袞卒。

八年 正月 帝始親政。詔停織造差催。

二月 宣示攝政睿親王多爾袞罪狀。

更定錢制。詔遷各處圈占民

地。詔裁權關官員。詔查參

驛遞差官。

三月 詔參用諸王於各部院。

七月 定職官遽間例。以陳名夏為

內翰林。宏文院大學士。吏部尚

書譚泰伏誅。

八月 立博爾濟濟錦氏為皇后。詔罷

九年

二月 孫可望劫遷明主由榔於安隆

所。

三月 會試主考學士胡統虞等有罪

免。

五月 定京察例。清兵襲明總督尚

書揭重熙於廣信殺之。

六月 清兵克高雷廉瓊諸府。明南陽

伯李元允與弟建捷。右僉都御

史張孝起死之。

七月 李定國陷桂林。定南王孔有德

自經死。湖南廣西相繼俱失。命

和碩敬謹親王尼堪為定遠大

將軍。進征楚粵。

十一月 敗李定國于衡州。敬謹親王尼

堪殺于陣。

十年 正月 詔求直言。二月 革少詹事李呈祥職。徙盛京。

三月 賜湯若望號通元教師。

四月 冊封達賴喇嘛為西天大善自在佛，領天下釋教。李定國進兵

攻廣東，陷高州。雷州廉州諸府

定各直省錢糧，仍用二條鞭法。

六月 裁內務府，設十三衙門。嚴禁寺

人干政。

七月 鑄一錢二分五釐錢。

八月 廢皇后博爾濟錦氏為靜妃。改

居側宮。

十二月 敕賜鄭成功靖海將軍海澄公

印，不受。

十二年 二月 孫可望遣人劫明主由榔，殺其

大學士吳貞毓等。

三月 殺大學士陳名夏。

五月 四川巡按御史郝裕流徙盛京。

八月 殺明故安樂王朱謙湖。

十一月 詔編造各省地丁冊。

十二月 鄭成功攻陷漳泉諸州，以世子

十二年

五月 和碩鄭親王濟爾哈朗卒。

六月 鑄立內十三衙門鐵牌，嚴禁中

官干政。

七月 詔求各省輿圖。

十一月 鄭成功陷舟山。

十二月 李定國走安隆。以明主由榔奔

雲南。明主由榔以馬吉祥入

閣辦事。

十月 嚴禁踵行邪教。

二月 攻題孔子木主為至聖先師孔

子神位。

三月 大赦。

四月 流徙鄭芝龍等於寧古塔，並籍

其家。

九月 孫可望以兵攻明主由榔於雲

南敗績，可望走隆清。

十月 詔編賦役全書。頒示天下。

十二月 命平西王吳三桂等分兵取貴

州。

十五年

正月 帝親覆試丁酉科順天舉人。

五月 清兵三路入滇。貴州平。

七月 設殿閣大學士。除去內三院秘書弘文國史名稱。

十一月 定女官及宮女名數品級。

十二月 清兵入雲南。李定國敗走。明主

由榔奔永昌。復奔騰雲。雲南平。

十六年

二月 清兵克永州。明主由榔奔緬甸。

三月 以平西王吳三桂鎮雲南。平南

王尙可喜鎮廣東。靖南王耿繼

茂鎮四川。

六月 鄭成功率師取鎮江。進圍南京。

七月 清總兵梁化鳳大破鄭成功於

江寧。禽其部將甘輝殺之。

八月 清兵入成都。四川平。

十一月 清兵克沅江。

十七年

正月 嚴禁結社訂盟。

五月 鄂羅斯國察罕汗遣使奉表獻

貢。

十二月 復開各省鎮鼓鑄。增置雲南省

局。

十八年

正月 帝崩。皇太子玄燁即位。以明

年為康熙元年。以內大臣鰲

拜、索尼、遏必隆、蘇克薩哈、為輔

政大臣。

二月 罷十三衙門。復設內務府。

三月 殺江蘇秀才倪用賓、金聖歎等

十八人。

五月 封安南國都統使莫敬耀為歸

化將軍。李定國白文選會兵

攻緬甸。不克。甸人盡殺明主由

榔從官。

八月 鑄康熙錢。

十一月 詔定十六歲成丁制。僧道無度

牒者。悉令為農。

聖祖康熙

十二月 吳三桂率兵至緬甸。緬人執明

主白榔。獻之軍前。

元年 三月 帝御太和殿受賀。詔赦天下。

四月 平西王吳三桂。弑明主白榔於

雲南。明始不祀。

五月 明延平王鄭成功卒於臺灣。

二年 三月 荷蘭遣使入貢。

五月 殺浙江人莊廷鉞。戮其兄廷鑑

屍。株連死者七十餘人。

十二月 靖南王耿繼茂會荷蘭兵攻鄭

經于廈門。克之。復浯嶼。金門二

島。

三年 正月 耿繼茂奏請遣歸其子允之。

三月 輔政大臣鰲拜殺內大臣費揚

古及其子尼侃薩哈連。

七月 明督師張煌言被執。不屈死。

四年 正月 復舉京察大計。

二月 吳三桂征水西平之。

三月 欽天監監正湯若望有罪免。以

江南官生楊光先為欽天監監

正。詔鄉會試復行三場舊制。

大學士洪承疇卒。

六月 雲南土酋王耀祖等作亂。平西

王吳三桂討平之。

五年 正月 雲南土酋祿昌賢作亂。平西王

吳三桂討平之。福建總督李

率泰卒。

十二月 輔政大臣鰲拜殺大學士戶部

尚書蘇炳海及直隸總督朱昌

祚巡撫王登聯。

六年 二月 平西王吳三桂征烏撒平之。

六月 輔政大臣一等公索尼卒。

七月 帝始親政。

七年 二月 詔求精通天文占候者。

四月 郁之章有罪流徙。特旨赦宥。

七月 詔鄉會試復以八股文取士。

八年 二月 欽天監監正楊光先革職。以比

五月 利時人南懷仁為欽天監監副。輔政大臣繫拜有罪褫職。禁錮終身。

六月 復蘇克薩哈及白爾黑圖等原官。詔止旗人圈占民地。

九年 正月 以宋儒程氏後裔程宗昌延祀龔五經博士職。

二月 以金光祖為兩廣總督。馬雄鎮為廣西巡撫。定服制。

閏二月 內國史院大學士金之俊卒。

三月 定滿漢官員品級。

十一月 定總督巡撫支俸例。

五月 靖南王耿繼茂卒。以其子和碩額駙耿精忠襲爵。

十月 召見寧古塔將軍巴海。

十一月 募夫大挑淮揚裏河。

十二月 罷民養馬禁。

厄魯特噶爾丹台吉請遣使入貢。允之。

十六年 六月 頒布訓諭十六條。

八月 詔停故義王孫可望襲爵。

十二月 裕親王福全等奏辭議政。許之。

正月 大學士馮銓卒。

二月 平南王尙可喜請撤藩歸遼。許之。以貴陽等七府錢糧冬歸附郭知縣管理。

四月 詔以滿漢文集譯成書。詔封暹羅國森列拍臘照古龍拍臘馬噶陸坤司由提呀菩埃為暹羅國王。

六月 詔禁八旗奴殉主葬。

七月 平西王吳三桂靖南王耿精忠疏請撤藩。許之。

十一月 平西王吳三桂反。殺雲南巡撫朱國治。雲貴總督甘文焜死之。

十二月 楊起隆謀起兵復明。事洩。捕其黨數百人殺之。

十三年 正月 吳三桂犯川湘。陷沅州。常德。岳

州、衡陽諸府。

二月

廣西將軍孫延齡反。殺都統王永年。戴良臣執巡撫馬雄鎮幽之。

三月

靖南王耿繼忠反。執閩浙總督范承謨幽之。襄陽總兵官楊來嘉以穀城叛附吳三桂。

四月

殺吳三桂子應熊及其孫世霖。吳三桂以大隊扼湖南。分兵北伐。

九月

廣西提督馬雄、總兵郭義各以所部叛降吳三桂。

十二月

陝西提督王輔臣反。經略莫洛死之。

十四年

正月

進封尙可喜為平南親王。

二月

戶部尙書米斯翰卒。

三月

蒙古察哈爾親王布爾尼叛。以多羅信郡王鄂扎為撫遠大將軍。大學士圖海為副將軍。率師

討平之。

十一月

鄭經陷漳州。海澄公黃芳度死之。

十二月

立允礽為皇太子。

十五年

正月

寧夏兵變。詔以西寧總兵王進寶為陝西提督。駐兵秦州。

二月

廣東討寇將軍尙之信反。幽其父平南王尙可喜。總督金光祖巡撫佟養鉅俱叛應之。

五月

撫遠大將軍圖海擊敗王輔臣於平涼。

六月

輔臣乞降。關陝平。

十月

詔止八旗子弟考試生員舉人進士。奉命大將軍康親王傑書率師至福州。耿精忠降。福建平。

十二月

吳三桂使人至廣西。執孫延齡殺之。尙之信遣使乞降。詔赦其罪。

十六年

正月 更定誘賣人口律。

二月 將軍喇哈達兵至漳州。復海澄等十縣。闔地悉平。

三月 簡親王喇布至吉安。江西平。

六月 將軍莽依圖兵至韶州。尙之信降。廣東平。

八月 廣西巡撫傅宏烈克復梧州。

十七年

正月 詔舉博學鴻儒。

三月 吳三桂稱帝。徙都衡州。改元昭武。

五月 貝子傅喇塔卒於軍。

七月 鄭經復陷海澄。長泰等縣。進攻泉州。

八月 吳三桂死。其孫世璠立。

十一月 簡親王喇布克復郴州。

正月 復岳州。長沙。常德諸府。

二月 簡親王喇布遣兵復衡州。

三月 親試博學鴻儒於體仁閣。

七月 淮陽瞿家壩成。

十八年

九月 吳世璠走貴陽。

十月 敕各路將軍。招撫吳三桂諸將。

十一月 平涼提督王進寶入雞頭關。王屏藩走廣元。遂復漢中府。

十九年

正月 陝西提督趙良棟復成都府。四川平。

三月 馬承蔭復叛。執廣西巡撫傅宏烈送貴陽。宏烈不屈死。

五月 簡親王喇布將軍莽依圖。總督金光祖合討馬承蔭。平之。

八月 殺平南王尙之信。

九月 降人譚宏叛。夔州民變。

九月 延平王鄭經卒。次子克塽襲位。

三月 吳世璠走雲南。

九月 四川提督趙良棟會師合攻雲南。克之。吳世璠自殺。雲南平。

十二月 大學士圖海卒。

正月 殺靖南王耿精忠。

二月 殺楚人朱方旦。

二十一年

二十二年

四月 封琉球國世子尙貞為琉球國王。

正月 封安南國王嗣黎維正為安南國王。

國王。

八月 水師提督施琅入台灣。鄭克塽降。

二十三年

正月 命整肅朝會筵宴禮儀。

五月 詔纂修大清會典。

六月 琉球國中山王請遣陪臣子弟入監讀書。許之。

九月 帝南巡。

二十四年

正月 命都統彭春率師駐黑龍江。規復雅克薩城。

復雅克薩城。

二月 詔修賦役全書。

三月 以御書萬世師表四字勒石。頒布天下學宮。

布天下學宮。

五月 考試漢軍官員於太和門。命大學士勒德洪、王熙等修政治典訓。

典訓。

二十五年

六月 帝巡幸塞外。

二月 朝鮮國王李焯有罪罰銀。

四月 詔訪求遺書。

五月 詔直省嚴禁淫祠濫祀。保和殿大學士魏裔介。保和

殿大學士魏裔介。保和

七月 賜荷蘭國敕諭並文綺白金等物。

九月 俄羅斯遣使請成。許之。

正月 喀爾喀土謝圖汗車臣汗札薩克圖汗及七旗濟農台吉等合

奏請上尊號。不許。

奏請上尊號。不許。

四月 加直隸巡撫于成龍太子少保銜。

七月 大學士宋德宜卒。諡文恪。

七月 大學士明珠職。

正月 褫大學士明珠職。

三月 河道總督靳輔有罪免。

六月 武昌兵變。巡撫柯永昇布政使葉映榴死之。

正月 帝南巡。

二十八年

九月 與俄使訂立尼布楚條約。立石

黑龍江。畫定中俄國界。

十月 刑部尚書徐乾學罷。

二十九年 四月 大清會典成。

六月 以張玉書爲文華殿大學士。

準噶爾部酋噶爾丹入寇。下詔親征。

八月 與噶爾丹戰於烏蘭布通。大破

之。噶爾丹具疏謝罪。乃班師。

三十年 正月 詔備噶爾丹。

四月 帝巡邊。

五月 帝至多淪泊。受喀爾喀諸部之

朝。外蒙古平。

三十一年 二月 文華殿大學士馮溥卒。

十二月 河道總督靳輔卒。

三十二年 五月 命侍衛大臣伯費揚古爲安北

將軍。總管歸化城官兵。

八月 帝巡塞外。

十月 俄羅斯遣使進貢。

三十三年

正月 河道總督于成龍革職留任。

五月 帝巡幸畿甸。閱視河堤。兵部

侍郎提督順天學政李光地解

任在京守制。

六月 兩江總督傅拉塔卒。

三十四年 十二月 閩浙總督朱宏祚罷。

四月 達賴喇嘛及第巴遣使奏請撤

回西海等處所置戍兵。不准。

五月 帝巡視新河及海口運道。

八月 帝巡幸塞外。命都統蘇努阿席

坦護巴等分統大軍備噶爾丹。

九月 帝回京師。

十月 噶爾丹入寇。

十一月 以費揚古爲撫遠大將軍。率兵

討之。

二月 帝親征噶爾丹。命皇太子留守

京師。

五月 大將軍費揚古大破噶爾丹於

昭莫多。

三十五年

三十六年

七月 命修平定朔漢方略。
 九月 帝巡幸塞外。
 二月 帝復親征噶爾丹。
 四月 噶爾丹自殺。準部平。
 七月 帝巡幸塞外。
 九月 帝還京師。
 十月 免山西通省三十七年地丁米銀。

三十七年

正月 帝西巡。
 四月 命減廣東海關稅額。
 七月 永定河成。帝奉皇太后東巡。詣盛京。謁諸陵。

三十八年

二月 帝奉皇太后南巡。
 六月 以郭琇為湖廣總督。
 七月 帝巡幸塞外。

三十九年

正月 帝巡視永定河。
 四月 河道總督于成龍卒。
 六月 詔改攔黃壩為大通口。
 八月 詔停宗室考試。

四十年

十月 詔有關係民生者許科道官以風聞入奏。
 十一月 帝巡幸邊外。
 二月 帝巡幸畿甸。閱視永定河。
 三月 命郎中馬爾漢往喀爾喀。
 八月 帝巡幸塞外。
 九月 領侍衛內大臣一等公費揚古卒。

四十一年

十二月 連州獠人作亂。以都統嵩祝為廣東將軍。率兵進討。
 二月 廣東將軍嵩祝討連州獠人。降之。連州平。
 六月 貴州葛彝築苗人作亂。討平之。
 七月 帝幸熱河。
 八月 帝還京師。
 九月 諭治黃河仿永定河法。
 十月 詔制錢改鑄大式。停止鼓鑄舊式小錢。
 十一月 詔雲南、貴州、四川、廣西四省四

四十二年

十三年錢糧悉行蠲免。

正月

帝南巡。

五月

帝巡幸塞外。

九月

湖南紅苗叛。巡撫趙申喬討平之。

十月

帝西巡。

四十三年

三月

帝幸南苑行圍。

四月

帝巡幸塞外。

九月

帝還京師。侍衛拉錫探河源還。

四十四年

二月

帝南巡。視河。渡江至杭州。

閏四月

帝還京師。

六月

帝北巡。駐蹕熱河。

九月

帝還京師。以李光地為文淵閣大學士。

十一月

命查康熙元年以來蠲免錢糧總數。

四十五年

二月

特詔江寧知府陳鵬年來京。

三月

賜施雲錦等二百八十九人進

四十六年

五月

士及第有差。以金世榮為兵部尚書。梁鼎為閩浙總督。

九月

雲南李天極等謀亂。伏誅。

十二月

海洋盜蔡曾就禽伏誅。詔罪囚緩決減等。

正月

帝南巡。

六月

帝巡幸塞外。

十月

以蕭永藻為兵部尚書。

十二月

以溫達為文華殿大學士。

四十七年

二月

帝巡幸畿甸。

三月

帝還京師。

四月

內大臣明珠卒。

五月

帝巡幸塞外。

六月

帝駐蹕熱河。殺明宗室朱三太子父子。

九月

皇太子允礽有罪。宣詔廢之。幽禁咸安宮。

十一月

革直郡王允禩王爵。鎖拿皇八

四十八年

正月

子允禩。交議政處審理。尋釋之。
穉大學士馬齊職。交部拘禁。

三月

復立允禊為皇太子。

四月

蒙古喇嘛巴漢格隆伏誅。帝

巡幸塞外。

九月

帝還京師。以年羹堯為四川

巡撫。

十月

冊封諸皇子。

十二月

詔釋馬齊。命管理俄羅斯貿易

事。

四十九年

三月

冊封波克塔塔胡必爾汗為六世

達賴喇嘛。

五月

帝巡幸塞外。

八月

帝駐熱河。革福建陸路提督

藍理職。

九月

帝還京師。

十月

頒蠲免各直省康熙五十年錢

糧詔。

五十年

五月

文華殿大學士張玉書卒。帝

五十一年

九月

奉皇太后巡幸塞外。
帝還京師。

十月

殺翰林院編修戴名世。

二月

以宋儒朱熹配享孔廟。詔定

滋生人丁永不加賦。

四月

致仕文淵閣大學士陳廷敬卒。

以嵩祝為文華殿大學士。王掇

為文淵閣大學士。帝奉皇太

后巡幸塞外。

六月

湖廣總督鄂海招撫鎮筵邊外

紅苗。

九月

帝還京師。

十月

復廢皇太子允禊。兩江總督

噶禮有罪伏辜。以赫泰為兩江

總督。

十一月

福建提督監理有罪。赦不誅。

二月

左都御史趙申喬奏請冊立太

子不許。

四月

以額倫特為湖廣總督。

五十三年

五月 詔除各地貧民開礦禁令。
三月 戶部尙書王鴻緒進呈明史列傳。

四月 帝奉皇太后巡幸塞外。

九月 帝還京。

十二月 詔土司楊如松管轄歸城之生番喇子等十九族。

五十四年

二月 革江蘇巡撫張伯行職。

四月 準酋策妄阿拉布坦寇哈密。命吏部尙書富寧安馳驛救之。

徵外藩兵集歸化城。以右衛將軍費揚古總理軍務。吏部尙書徐潮卒。

遣傅爾丹屯田哈密等處。

十月 戶部尙書趙申喬以其子獲罪請賜罷斥。不許。

十一月 以宋儒范仲淹從祀孔廟。

五十五年

二月 準酋策妄阿拉布坦遣兵擾西藏。

五十六年

四月 帝奉皇太后巡幸塞外。
九月 帝還京師。
四月 廣東總兵陳昂請禁天主教。從之。帝奉皇太后巡幸塞外。

十月 帝還京師。

十一月 擒獲白蓮教徒李興邦。

十二月 皇太后崩。

五十七年

正月 殺翰林院檢討朱天保。

七月 詔編省方盛典。

九月 西安將軍額倫特與準酋策妄阿拉布坦戰于哈喇馬蘇河。敗績。死之。

十月 以皇十四子固山貝子允禩爲撫遠大將軍。視師青海。以年羹堯爲四川總督。率兵援藏。

十一月 福建巡撫陳瓚卒。

五十八年

正月 帝幸湯泉。旋還京。駐暢春園。

二月 安南國王黎維正卒。封嗣子黎維禔爲安南國王。領侍衛內

大臣公舅勇佐國維卒。

三月 封青海貝勒察汗丹津為多羅郡王。

四月 帝巡幸塞外。

十月 帝還京師。

十二月 命截留湖廣漕糧十萬石分貯所在府州縣備荒。

正月 詔停止慶賀典禮。

二月 加封新達賴噶爾藏堅錯為宏法覺衆第六世達賴喇嘛。派滿漢官兵及蒙古青海兵護送入藏。

五十九年

八月 平逆將軍延信四川提督岳鍾琪分兵進藏。大破準噶爾兵策零北遁。西藏悉平。

二月 遣官祭告天地太廟社稷。山東王美公作亂。

三月 詔平逆將軍延信都統武格副都統吳納哈帥師駐西藏。

六十年

六十年

五月 詔大將軍允禩駐兵甘州。臺灣民朱一貴作亂。水師提督施世驤總兵藍廷珍討平之。

六月 帝不豫。甲午帝崩。皇四子允禩即位。以明年為雍正元年。

十一月 命貝勒允禩。十三阿哥允祥。大學士馬齊。尚書隆科多。總理事務。召大將軍十四阿哥允禔。及前鋒統領弘曙來京。以平逆將軍延信赴甘州。管理大將軍印務。封貝勒允禩為和碩廉親王。十三阿哥允祥為和碩怡親王。貝子允禩多羅履郡親王。二阿哥子弘哲為多羅理郡王。以富寧安為武英殿大學士兼吏部尚書。白璜以文華殿大學士兼兵部尚書。

六十一年

五月 詔大將軍允禩駐兵甘州。臺灣民朱一貴作亂。水師提督施世驤總兵藍廷珍討平之。

六月 帝不豫。甲午帝崩。皇四子允禩即位。以明年為雍正元年。

十一月 命貝勒允禩。十三阿哥允祥。大學士馬齊。尚書隆科多。總理事務。召大將軍十四阿哥允禔。及前鋒統領弘曙來京。以平逆將軍延信赴甘州。管理大將軍印務。封貝勒允禩為和碩廉親王。十三阿哥允祥為和碩怡親王。貝子允禩多羅履郡親王。二阿哥子弘哲為多羅理郡王。以富寧安為武英殿大學士兼吏部尚書。白璜以文華殿大學士兼兵部尚書。

世宗雍正

元年

正月

詔訓百官。大學士王拔乞致仕。許之。

二月

以張鵬翮為文華殿大學士。兼吏部尚書。河道總督陳鵬年卒。定起科之制。

三月

撤西藏駐防官軍及西寧八旗兵。設戍於察木多。封川陝總督年羹堯為三等公。定直省督撫兼銜例。

四月

復日講起居注官。丁卯帝初御乾清宮聽政。

七月

以隆科多王瑱齡為明史監修官。徐元夢、張廷玉、朱軾、覺羅逢泰為總裁官。

八月

密封建儲錦匣於乾清宮正大光明扁額後。

九月

詔京尹行卿飲酒禮。青海會羅卜藏丹津寇西寧。筆帖式多爾濟死之。

二年

十月

命川陝總督年羹堯為撫遠大將軍。率兵進討。四川提督岳鍾琪為奮威將軍。參贊軍務。

十二月

革十二阿哥允禔爵。命地方官沿途照看西洋人。

二月

刊刻聖諭廣訓。頒布天下。

三月

年羹堯、岳鍾琪襲擊青海。平之。

四月

詔續纂大清會典。

五月

莊浪番人作亂。年羹堯、岳鍾琪討平之。革郡王十阿哥允祿爵。永遠拘禁。

六月

戶部侍郎塞德奏請設立井田。從之。

七月

命郡王十四阿哥允禩往守京陵。

八月

升從祀孔廟三十一人。

十一月

詔禁出殯演戲。

十二月

故太子允礽卒。封朝鮮國王世弟李昫為朝鮮國王。

三年

四月

詔免撫遠大將軍年羹堯職。補授浙江杭州將軍。以提督岳鍾琪署理川陝總督印務。

七月

詔除隆科多太保職銜。

八月

革貝子九阿哥允禔爵。

十二月

降郡王允禩爵為固山貝子。

殺前撫遠大將軍年羹堯及其子年富。殺浙人汪景祺。怡親王允祥疏舉直隸水利營田事。詔從之。

四年

正月

詔改入王允禩名為阿其那。九王允禩名為塞思黑。俱屏之宗籍之外。

三月

革侍講錢名世職銜。並賜名教罪人匾額。命樹前大學士揆敘尙書阿靈阿墓碑。

五月

命禁錮允禵于壽皇殿。

七月

革多羅郡王訥爾素爵。在家園禁。

八月

革署理大學士戶部尙書徐元夢職。

九月

下禮部侍郎查嗣庭獄。殺之。

十月

詔停止浙江省鄉會試。以光祿寺卿印國棟為浙江觀風整俗使。

十二月

貴州紳苗作亂。雲貴總督鄂爾泰討平之。鄂爾泰奏請平定苗疆當行改土歸流策。許之。

五年

二月

太常寺卿鄒汝魯革職治罪。俄羅斯遣使來京。

三月

開閩省海禁。

四月

申禁鑄黃銅器皿。詔除江南徽寧等處伴當世僕名色。

八月

額駙策凌與俄使薩瓦訂立恰克圖條約。並議定邊疆。立石定界。

十月

隆科多下獄。永遠禁錮。詔減嘉興湖州兩府額徵銀十分之

一。

十一月 雲貴總督鄂爾泰更定苗民姓氏。

六年

正月 以鉛廠山下地四十里賜安南國王。

四月 准從前因公註誤人員來京候用。

五月 以河南巡撫田文鏡為河東總督。管理河南山東二省事務。

七月 命浙江巡撫李衛管理江蘇七府五州盜案。

八月 准浙江士子得照舊鄉會考試。

七年

十月 四川喇汝窩番作亂。川陝總督岳鍾琪剿平之。

二月 詔定錢價。

三月 准會噶爾丹策零入寇。以領侍衛內大臣傅爾丹為靖邊大將軍。川陝總督岳鍾琪為寧遠大將軍。分兩路出征。

五月 下湖南會靜獄。劉已故浙江呂留夏尸。盡誅其族。

七月 詔殺已革御史謝世濟。尋釋之。

八月 刊刻大義覺迷錄。頒行天下。

三月 兩江總督范時繹罷。以史貽直署兩江總督。

四月 詔改大學士尙書品級。

五月 命侍郎杭奕祿衆佛保往諭準噶爾降。詔除蘇州府常熟。昭文二縣丐戶籍。列為編氓。怡親王允祥卒。革誠親王允祉爵。

九月 河南道士賈士芳伏誅。

十月 殺庶吉士徐駿。

二月 殺四川總督。

六月 大將軍傅爾丹與噶爾丹策零戰於和通泊爾。敗績。詔降傅爾丹為振武將軍。以順承郡王錫保代之。

十月 郡王額駙策凌。大破準噶爾兵。

於鄂登楚勒河。蒙古三音諾顏部遂自立。

十二月 嚴禁鐵器出洋。

十年 正月 苗疆平定。召鄂爾泰回京。以為保和殿大學士。兼兵部尚書。

額駙策凌追擊準噶爾於額爾

八月 德尼昭。大破之。

草大將軍岳鍾琪職。交部拘禁。

十一月 賜湖南生員譙衿匾額。開探肅州硫磺山礦。

肅州硫磺山礦。

十二月 大將軍馬爾賽有罪。伏誅。

十一月 命各直省設立書院。命大學士鄂爾泰往北路軍營。經略軍務。

十一年 正月

三月 詔撤回西藏及又本多防守之兵。

四月 以方苞為內閣學士。禁民間刊刻書籍。改避胡虜夷狄等字。

五月 大清會典成。

十二年

六月 命直隸總督李衛往古北等處閱兵。

閏兵。

三月 河南學政俞鴻圖有罪。伏誅。

四月 禁廣東編製象牙席。

六月 湖南忠峒十五土司呈請改流。許之。

許之。

八月 詔罷征準噶爾兵。

四月 停旌表烈婦例。

五月 貴州台拱苗叛。以貴州總督哈元生為揚威將軍。統四省兵討之。

之。

六月 以湖廣提督董芳為副將軍。命率師會剿台拱苗。

率師會剿台拱苗。

七月 以張照為撫苗大臣。免大學士鄂爾泰職。

鄂爾泰職。

八月 丁亥帝不豫。己丑帝崩。皇太子弘曆即位。詔以明年為乾隆元年。詔復大學士鄂爾泰職。

召撫苗大臣張照回京。以張廣

泗總理苗疆事務。逐道士張太虛、王定乾世籍。

十月 詔釋圈禁宗室。

十一月 召河南總督王士俊來京。以富

德為河南巡撫。

十二月 詔纂八旗氏族通譜。詔除契

紙契根法。殺曾靜、張熙。纂

修明史成。

高宗乾隆

元年

正月

準噶爾噶爾丹策零遣使入覲。並貢方物。

二月

封密理親王允祜之子弘曠、孫永璈為輔國公。

起用楊名時為禮部尚書。兼國

監祭酒。

三月

頒十三經二十一史於各省會及府州縣學。經略張廣泗圍攻貴州牛皮箐苗寨。大破之。苗亂平。

七月 立皇太子。逮四川巡撫王士俊下獄。親試博學鴻詞一百七十二人於保和殿。

九月 大學士朱軾卒。

二年 二月 安南國王黎維祐卒。封其嗣子

黎維禕為安南國王。

四月 釋傅爾丹、陳泰、岳鍾琪於獄。

十一月 以大學士鄂爾泰、張廷玉、尚書

訥親、海望、侍郎納延泰、班第為軍機大臣。

三年

正月

封朝鮮國王李吟子愷為世子。五月 貴州定番州苗滋事。總督張廣泗討平之。

十月 直隸總督李衛有病免。以吏部

尚書孫嘉淦為直隸總督。

四年

正月

大學士嵇曾筠卒。

三月 予告大學士馬齊卒。

五月 額駙策凌奏喀爾喀準噶爾以

五年

額駙策凌奏喀爾喀準噶爾以

鄂爾海分界從之。

七月 以徐士林為江蘇巡撫。

十二月 楚粵苗亂平。

六年 三月 賜鄂善死。擢仲永檀為倉都御史。

六月 大學士趙國麟罷。

七月 始舉秋獮。

九月 原任江蘇巡撫徐士林卒。

十一月 尙書徐元夢卒。

十二月 大學士張廷玉請解部務。不許。

四月 命莊親王允祿尙書三泰張照

七年 管理樂部。

十二月 大學士鄂爾泰有罪免。

八年 正月 詔安插準噶爾降人于寧古塔。

二月 御史杭世駿對策忤旨革職。

十月 定大臣乞休舉賢自代例。

九年 正月 以史貽直為文淵閣大學士兼吏部尙書。

十年 正月 刑部尙書張照卒。

四月 大學士鄂爾泰卒。

五月 以訥親為保和殿大學士兼吏部尙書。

十一月 定駐藏官兵三年換班例。

準噶爾丹策零卒。次子那木札勒嗣之。

十一月 詔普免各省錢糧一次。

正月 瞻對土酋班滾作亂。命大學士

十一月 三月 川陝總督慶復帥師討之。夏六月。瞻對平。

七月 帝奉太后巡幸五臺山。

十二月 準噶爾台吉策妄多爾那木札勒遣使入京。

十二年 三月 金川土司莎羅奔作亂。命雲貴

總督張廣泗為川陝總督。率師討之。

四月 孫嘉淦以老病乞休。許之。

十三年 正月 封十四皇叔允禩為郡王。

二月 帝奉皇太后及皇后東巡至德

州。 皇后崩。

四月 以大學士訥親為經略大臣。赴四川督軍。

五月 起復故將軍岳鍾琪為四川提督。馳赴大金川營。

七月 詔罷張廣泗職。逮京治罪。以大學士傅恆代督其軍。

十二月 殺川陝總督張廣泗。賜大學士訥親死。更設內閣大學士制。

十四年 正月 經略傅恆提督岳鍾琪舉兵入金川。莎羅奔降。金川平。

九月 賜大學士慶復自盡。

十一月 以尙書汪由敦協辦大學士。大學士張廷玉罷。

以張允隨為東閣大學士。兼禮部尙書。

十五年 正月 帝奉皇太后西巡。幸五臺山。

二月 帝還京師。定邊左副將軍固倫額駙超勇親王策凌卒。

八月 冊立貴妃那拉氏為皇后。

十月 帝奉太后南巡。

十一月 西藏珠爾默特作亂。駐藏都統傅清。左都御史拉布敦被戕。四川總督策楞。提督岳鍾琪討平之。

十六年 正月 以班第為駐藏副都統。帝奉皇太后南巡。渡錢塘江。祭禹陵。

五月 帝還京師。

六月 以吳鼎梁錫瓌為國子監司業。兩廣總督陳大受卒。

十七年 七月 協辦大學士吏部尙書梁詩正乞終養。許之。以孫嘉淦為吏部尙書。協辦大學士。雜谷土司蒼旺叛。四川總督策楞。提督岳鍾琪討平之。

召尹繼善來京。以莊有恭署兩江總督。

九月 殺江西撫州衛千總盧奮生。並

十八年 二月

十二月 其子盧齡、盧錫榮、南昌衛守備劉時達、協辦大學士吏部尙書孫嘉煥卒。

十九年

三月 四川提督岳鍾琪卒於軍。

七月 準噶爾內亂。輝特台吉阿睦撒納來降。

十一月 封阿睦撒納為親王。班珠爾納默庫為郡王。

二十年

二月 以尙書班第為定北將軍。陝甘總督永常為定西將軍。分兩路出師征準噶爾。

三月 殺湖南學政胡中藻。賜廣西巡撫鄂昌死。

四月 致仕大學士張廷玉卒。

五月 定北將軍班第大破準噶爾瓦齊於格登山。傳送京師。準噶爾平。

九月 封噶勒藏多爾濟為綽羅斯汗。

車凌為杜爾伯特汗。沙克多爾曼濟為和碩特汗。巴雅爾為輝特汗。

二十一年

五月 阿睦撒納反。將軍班第、尙書鄂容安死之。

八月 額將軍策楞、參贊玉保職。以達爾黨阿及哈達哈代之。

和托輝特郡王青滾雜卜叛。詔以成衮扎布為定邊左將軍。率師討之。

二十二年

十二月 青滾雜卜被擒伏誅。

正月 帝奉皇太后南巡。

二月 綽羅斯特輝特等部復叛。右副將軍兆惠率師討之。

四月 命左副將軍成衮扎布、右副將軍兆惠出征準噶爾。阿睦撒納走死。準噶爾平。

七月 殺前浙江布政使彭家屏及夏邑附生段昌緒。

九月 帝還京師。賜雲貴總督恆文自

盡。

十月 成衮扎布班師。以兆惠留鎮伊

犁。

二十三年

正月 回部和卓木叛。詔以雅爾哈善

為靖逆將軍。率師討之。

七月 雅爾哈善和卓木戰於庫車。和

卓木遁去。詔視雅爾哈善職。以

兆惠為定邊將軍。移師討之。

二十四年

正月 定邊將軍兆惠追擊兩和卓木。

被圍于黑水營。副將軍富德率

師援之。至三月圍始解。

七月 兆惠富德拔喀什噶爾及葉爾

羌城。兩和卓木遁。

十月 巴達克山汗擒兩和卓木。斬之。

函其首來獻。回部平。

二十五年

正月 巴達克山汗素勒坦沙等遣使

入覲。將軍兆惠獻俘京師。帝御

午門樓受獻。

八月 以阿桂為都統。總理伊犁事務。

行屯田事。

二十六年

正月 紫光閣成。

二月 帝奉皇太后西巡。幸五臺山。

二十七年

三月 帝還京師。

正月 帝奉皇太后南巡。

三月 帝至杭州。

五月 帝還京師。

十月 以明瑞為伊犁將軍。分烏梁

海為三部。設官治理之。

二十八年

正月 命尙書阿桂在軍機處行走。

四月 大學士史貽直卒。

二十九年

九月 體仁閣大學士楊廷璋罷。以楊

應琚為東閣大學士。仍留陝甘

總督任。

十一月 協辦大學士戶部尙書兆惠卒。

三十年

正月 帝奉皇太后南巡。

閏二月 帝至杭州。烏什回人作亂。

九月 將軍明瑞擊平烏什回人之亂。

三十一年

三月

緬甸入寇九龍江。雲貴總督劉藻率師禦之。敗績。自刎死。詔以大學士楊應琚代之。

七月 皇后那拉氏崩。詔以妃禮葬之。

十二月 大清會典成。

三十二年

三月

遠大學士雲貴總督楊應琚入京。以伊犁將軍明瑞補授雲貴總督。

十二月 殺浙江入齊周華。並奪原任禮部侍郎齊召南職。將軍明瑞

率師征緬甸。大破之。御批歷代通鑑輯覽成。

三十三年

正月

將軍明瑞陷敵死。詔以大學士傅恆為經略。阿里袞阿桂為副將軍。代領其軍。

九月 嚴禁偷翦髮辮。

十二月 臺灣民黃教作亂。

三十四年

六月

毀錢謙益所著書。

十一月 協辦大學士尚書果毅公阿里

袞卒于軍。

十二月 與緬人訂和約罷兵。

七月 大學士忠勇公傅恆卒。

八月 前大學士陳宏謀卒。

三十六年

二月 帝奉皇太后東巡。土爾扈特

部率眾來歸。

四月 大學士尹繼善卒。

十月 金川復叛。視四川總督阿爾泰

職。以侍郎桂林代之。命大學士

三十七年

二月 以阿桂豐伸額為四川軍營參

贊大臣。

五月 四川總督桂林攻小金川敗績。

詔褫其職。以參贊阿桂代之。

二月 開四庫全書館。以紀昀為總纂

官。

六月 木果木兵變。大學士溫福死之。

八月 詔授阿桂為定西將軍。豐伸額

明亮副之。

十月 小金川平。

十一月 大學士劉統勳卒。

三十九年 五月 命選宗室王子入宗學肄業。著為令。

七月 內監高雲從伏誅。

九月 兗州民王倫作亂。大學士舒赫

德討平之。

四十年 八月 定西將軍阿桂進攻大金川破

之。索諾木遁。

四十一年 二月 金川噶爾崖破。索諾木隨莎羅

奔出降。金川平。

四月 金川曾索諾木莎羅奔伏誅。

十二月 詔國史館編列貳臣傳。

四十二年 正月 皇太后崩。

四月 大學士舒赫德卒。

五月 以阿桂為武英殿大學士兼吏

部尚書。英廉為協辦大學士。

十月 戶部尚書豐伸額卒。

十一月 殺新昌舉人王錫侯。

十二月 河州教匪王伏林作亂。伏誅。

正月 復睿親王封號。

七月 帝東巡。至盛京。殺錦縣生員金

從善。

九月 帝還京師。

十月 戮已故浙江舉人徐述夔屍。並

奪前禮部尚書沈德潛職銜。尋

戮其屍。

四十四年 正月 以三寶為東閣大學士兼禮部

尚書。

六月 定盜殺一家數命律。

八月 命和珅在御前大臣上學習行

走。

十二月 大學士于敏中卒。以程景伊為

文淵閣大學士。嵇璜為吏部尚

書協辦大學士。

四十五年 正月 帝南巡。

二月 帝幸焦山。

三月 帝幸海寧觀潮。

五月 帝還京師。賜和珅子名豐紳

殷德。指為十公主額駙。

七月 班禪額爾德尼自後藏入朝。

八月 大學士程景伊卒。

九月 以嵇璜為東閣大學士。兼兵部

尙書。

四十六年 正月 帝西巡。幸五臺山。

三月 帝至保定。還京師。殺大理寺卿

尹嘉銓。蘭州回教徒蘇四十

三作亂。陷河州。命大學士阿桂

討之。

四月 魏陝甘總督勒爾謹職。

六月 回教徒蘇四十三伏誅。蘭州平。

七月 暹羅王鄭昭請入貢。許之。

九月 詔以武職官員虛額名糧。歸入

養廉。

四十七年 四月 山東巡撫國泰有罪殺之。

七月 四庫全書成。命續繕三分。分藏

揚州。鎮江。杭州等處。

十月 魏浙閩總督陳輝祖職。尋賜死。

十月 詔輯古今儲貳金鑑。

四十八年 正月 帝南巡。至杭州。

四月 帝還京師。甘肅新教回人田

五作亂。陝甘總督李侍堯。提

督剛塔。率兵討之。

五月 以大學士阿桂為將軍。尙書福

康安領侍衛內大臣。海蘭察為

參贊大臣。率師討甘回。

七月 回衆平。

正月 賜千叟宴。

五月 大學士蔡新罷。以梁國治為東

閣大學士。劉墉協辦大學士。

十月 釋李侍堯於獄。

十二月 詔免呈鐘表洋貨等物。

五十一年 三月 帝西巡。幸五臺山。至正定。閱兵。

還京師。

五月 御史曹錫寶以疏劾和珅家人

不法狀革職留任。

閏七月

以和珅為文華殿大學士兼吏部尚書。福康安為吏部尚書協辦大學士。仍留陝甘總督任。

九月

封鄭華為暹羅國王。

十月

臺灣彰化民林爽文作亂。鳳山莊大田起兵應之。陷彰化諸羅淡水等地。知府孫景燧死之。

十二月

大學士梁國治卒。以王杰為東閣大學士兼禮部尚書。

正月

林爽文莊大田分兵犯臺灣府。總兵柴大紀禦之。爽文敗績。

二月

復彰化鳳山諸羅諸縣地。命閩浙總督常青為將軍。至臺灣督師。以李侍堯署閩浙總督。

四月

鳳山復陷。遠提督黃仕簡任承恩。郝壯猷等入京。壯猷尋伏誅。

八月

以福康安為將軍。海蘭察為參贊大臣。馳赴臺灣。代常青督辦。

軍務。

十一月

詔改諸羅為嘉義縣。封柴大紀為一等義勇伯。世襲罔替。

二月

林爽文就擒。臺灣平。殺太子少保參贊大臣一等義勇伯柴大紀。

七月

緬甸遣使奉表入覲。詔遣羅罷兵。

九月

安南內亂。其遺臣阮輝宿率王族來奔。帝命兩廣總督孫士毅出兵討之。

十月

孫士毅復安南。詔封梨維祁為安南國王。

十一月

阮文惠襲安南。孫士毅敗走。提督許世亨死之。

正月

阮光平奉表乞降。許之。

二月

詔封光平為安南國王。

六月

封皇諸子為親王。

五十五年

正月

以八旬萬壽。普免天下錢糧。

二月 帝東巡。登太山。至曲阜。謁孔林。
四月 帝還京師。

六月 緬甸遣使入覲。詔封孟雲為緬甸國王。

七月 安南國王阮光平入覲。
八月 暹羅國王鄭華遣使入覲。

五十六年

二月 下內閣學士尹壯圖獄。
十月 俄羅斯請續開恰克圖市場。許之。

十一月

廓爾喀入寇後藏。詔以福康安為將軍。海蘭察、奎林為參贊大臣。率師討之。

五十七年

六月 福康安收復後藏。進征廓爾喀。大敗之。奪鐵索橋。

八月 廓爾喀降。

十月 御製十全記成。定呼畢爾罕

嗣續製鐵例。

五十八年

正月 安南國王阮光平卒。封阮光燾為安南國王。

二月 賜浙江巡撫福崧死。

三月 內大臣海蘭察卒。

八月 英吉利使臣馬戛爾尼入覲。

十一月 詔永停捐納例。

五十九年

六月 大學士嵇璜卒。
八月 詔普免天下漕糧一次。

六十年

正月 貴州苗石柳鄧叛。陷湖南永綏廳。詔雲貴總督福康安、四川總督和琳率師討之。

十月 閩浙總督伍拉納。巡撫浦霖。按察使錢受椿有罪伏誅。

十一月 苗裔吳八月就擒。

十二月 詔明年歸政。

仁宗嘉慶

元年

正月 帝受禪即位。尊高宗為太上皇帝。立嫡妃喜塔臘氏為皇后。舉千叟宴。湖北白蓮教作亂。命湖廣總督畢沅。巡撫惠齡率師討之。

二月 帝御乾清門聽政。

四川陝西白蓮教繼起。以孫士毅署四川總督率師討之。

五月 大學士閩浙總督福康安卒於軍。

七月 大學士署四川總督三等男孫士毅卒於軍。

八月 四川總督一等伯和琳卒於軍。
十一月 以傅恆、兆惠、福康安、和琳配享太廟。

十二月 湖南苗酋石柳鄧父子被擒伏誅。詔封明亮為襄勇伯。額勒登保為威勇侯。其餘諸將爵賞有差。

二年 二月 皇后崩。以劉墉為體仁閣大學士。沈初為吏部尚書。朱琳為兵部尚書。

閏六月 西隆州亞稱苗亂平。加吉慶太子太保。彭承堯太子少保。均賞

戴雙眼花翎。

七月 湖廣總督畢沅卒於軍。

八月 大學士公阿桂卒。

九月 以勒保為湖廣總督。鄂輝為雲貴總督。

三年

三月 明亮、德楞泰大破教匪於鄭西。齊王氏姚之富隕崖死。

四月 雲貴總督三等男鄂輝卒。以富綱為雲貴總督。

七月 四川總督勒保奏擒教首王三槐。詔封勒保一等威勒伯。

四年

十一月 額勒登保、德楞泰合擊四川教匪羅其清於大鵬山。大破之。

正月 太上皇帝崩。詔除副封。大學士和珅有罪賜死。籍其家。

二月 帝始御西廠。引見官員。三月 以慶桂為文淵閣大學士。額勒登保擊破教首冷天祿於

岳池。擒斬之。

七月 魏勒保職。以明亮為經略大臣。魁倫為四川總督。

八月 明亮罷。以額勒登保為經略大臣。奪翰林院編修洪亮吉職。

十月 德楞泰奏擒教首高均德。檻送京師。

十二月 額勒登保擊教首王登廷於巴州。追獲之。

五年 正月 以阮元為浙江巡撫。六月 海盜入寇台州。定海總兵李長庚擊走之。

七月 教主劉之協被擒伏誅。湖南平。

九月 封朝鮮世子琮為朝鮮國王。四月 貴州石峴苗叛。知府傅鼐討平之。

六年 十月 德楞泰擊斬教首龍紹周於平利。晉封二等繼勇伯。

七年 五月 額勒登保奏擒教首張天倫。伍懷志。

九月 額勒登保擒辛斗及冉添璜等。晉封三等伯。

十二月 額勒登保奏報川楚陝教匪肅清。論功行賞有差。

八年 正月 海盜蔡牽作亂。浙江提督李長庚襲擊於定海。大破之。

九月 工部尚書彭元瑞卒。十月 雲貴總督環珩討獮匪平之。

九年 六月 陝甘總督惠齡卒。八月 李長庚大破蔡牽朱濆于定海北漁山。

九月 額勒登保、德楞泰合擊白蓮餘匪苟文潤等斬之。川陝悉平。

十年 十二月 體仁閣大學士劉墉卒。正月 予告大學士王杰卒。以朱珪

為體仁閣大學士管工部事。紀陶協辦大學士。

二月 協辦大學士禮部尚書紀昀卒。四月 禁西洋人刻書傳教。

八月 御前大臣都統公額勒登保卒。

十月 那彥成有罪免。以吳熊光為兩廣總督。

十一月 百齡有罪免。以全保為湖廣總督。

十一年 正月 蔡牽寇臺灣。

二月 李長庚擊牽於鹿耳門。大破之。牽走閩海。

五月 玉德免。以阿林保為閩浙總督。

七月 寧陝新兵譁變。

九月 陝西提督楊遇春。總兵楊芳討平寧陝新兵之譁變。

十月 魏德榜奏職。仍留西安將軍任。貶陝甘總督倭什布等有差。

十二月 大學士朱珪卒。綏定新兵作亂。四川總督勒保討平之。

十二年 正月 西鄉營新兵作亂。西安將軍德榜奏討平之。

四月 申禁地方官擅造非刑。

七月 以故琉球國中山王尚溫阿瀨襲封為琉球國王。遣使往封。

十二月 浙江提督李長庚。追擊蔡牽於粵海。中敵死。牽走安南。

十三年 二月 辰沅永靖道傅籛入覲。

七月 帝秋獮木蘭。

九月 帝還京師。

十一月 吳熊光免。以永保為兩廣總督。

十四年 三月 西安將軍德榜奏卒。

六月 山陽知縣王仲漢有罪。伏誅。

八月 王得祿。邱得功。各擊蔡牽於嶺山外洋。牽自沈死。閩海平。

十五年 正月 以劉權之為協辦大學士。勒保為武英殿大學士。

三月 粵海巨盜張保降。海疆平。

十六年 四月 大學士戴衢亨卒。

五月 以劉權之為體仁閣大學士。吏部尚書鄒炳泰協辦大學士。

六月 湖南按察使傅鼐卒。

十七年

二月

試翰林詹事等官

八月

河道總督陳鳳翔有罪死。

十二月

以鐵保為禮部尚書。祖之望為刑部尚書。潘世恩為工部尚書。

十八年

六月

申禁宗室覺羅與漢人結婚。賞給生員鮑廷博舉人。

九月

天理教徒李文成作亂。陷滑縣。知縣張克捷死之。林清襲京師。事敗伏誅。

十一月

陝西總督楊遇春。總兵楊芳。率兵至河南。李文成走死。滑縣平。

十二月

陝西箱賊萬五為亂。總兵祝廷彪討平之。

十九年

正月

復開捐例。

閏二月

江西胡秉輝為亂。以阮元為江西巡撫。率師討平之。

四月

賜龍汝言等二百二十六人進士及第有差。

十一月

河南捻子匪起。

二十年

八月

兩江總督百齡。奏獲奸民方榮升等斬之。

九月

湖南巡撫巴哈布。逮捕西洋人蘭月旺殺之。

十二月

詔查拿欒州白蓮教遺孽。禁內監呈遞諸王奏章。

二十一年

正月

江蘇巡撫張師誠有罪免。以胡克家為江蘇巡撫。

四月

直隸總督那彥成有罪免。以方受疇為直隸總督。

六月

擬尚書蘇楞額和世泰穆克登額等職。斥逐英使回國。

七月

兩江總督百齡卒。以孫立庭為兩江總督。阮元為湖廣總督。

二十二年

二月

閩浙總督汪志伊免。以董教增為閩浙總督。

三月

雲南夷民高羅衣作亂。總督伯麟討平之。

二十三年

二月

大學士董誥乞致仕。許之。

二十四年

七月 予告大學士劉權之卒。
正月 詔天下單恩有差。

四月 賜陳沅等二百二十四人進士及第出身有差。

二十五年

八月 予告大學士威勒伯勒保卒。

二月 大學士章煦以疾乞致仕。許之。以戴均之為文淵閣大學士。吳敬為吏部尚書協辦大學士。

賜陳繼昌等二百四十六人進士及第出身有差。

四月 賜陳繼昌等二百四十六人進士及第出身有差。

七月 帝崩。

八月 皇太子旻寧即位。以明年為道光元年。

光元年。

九月 回人張格爾作亂。詔穉參贊大臣斌靜職。逮京治罪。以永芹代之。

十月 上大行皇帝尊諡。

宣宗道光

元年

正月 以文孚為吏部尚書。

二月 雲南永北廳夷匪為亂。總督慶保討平之。

九月 詔停福建貢花果。

十月 帝御乾清門聽政。

二年 閏三月 賜戴蘭芬等進士及第出身有差。

五月 河北野番為亂。陝甘總督長齡討平之。

七月 予告大學士明亮卒。

八月 閩浙總督董教增卒。以趙慎軫為閩浙總督。

十二月 申諭海口各關津。嚴拏夾帶鴉片煙。

三年 正月 帝幸圓明園。以林則徐為江蘇按察使。

七月 詔毀蘇州五通祠。

八月 命林則徐籌濬江浙水道。

五月 以琦善為兩江總督。

六月 詔嚴禁糧船水手。設教斂錢。

五年

五年

六年

三月 初試行海運。

五月 雲貴總督趙慎軫卒。以阮元為雲貴總督。

八月 張格爾寇喀什噶爾城。伊犁將軍慶祥死之。西四城皆陷。

三月 將軍長齡。總督楊遇春。復喀什噶爾三城。

五月 提督楊芳。復和闐城。張格爾遁。陸以莊免。以王引之為工部尚書。蔣攸銛為兩江總督。

七年

七月 協辦大學士禮部尚書汪廷珍卒。

禮部尚書姚文田卒。

張格爾就擒。

五月 逮張格爾至京師磔殺之。

十月 禁用外國銅幣。

禁回人不得兼職。

四月 賜李振鈞二百二十一人進士及第出身有差。

八年

正月 張格爾就擒。

五月 逮張格爾至京師磔殺之。

九年

四月 賜李振鈞二百二十一人進士及第出身有差。

十年

八月 回疆復亂。詔絕浩罕通商命長齡。楊遇春等率師討之。

九月 前兩江總督蔣攸銛卒。

三月 廣東黎匪為亂。兩廣總督李鴻賓討之。

四月 黎匪平。

五月 以潘世恩為吏部尚書。朱士彥為工部尚書。詔各直省督撫委籌杜絕鴉片來源。

十月 與浩罕締和。復許其通商。

十二月 行票鹽法。

正月 定教首遇赦不赦例。

二月 猺人趙金龍作亂。湖南提督海陵阿死之。

四月 湖廣總督盧坤。提督羅思舉。擊趙金龍破斬之。

八月 廣東連州八排猺叛。逮總督李鴻賓入京治罪。以盧坤為兩廣總督。率師討平之。

十三年

正月

福建提督馬濟勝擒陳辦斬之。臺灣亂平。

二月

四川邊夷為亂，總督那彥寶提督桂涵討平之。前直隸總督那彥成卒。

十四年

四月

以潘世恩為體仁閣大學士。

二月

申禁坊肆售賣淫書小說。

八月

英艦入廣東，總督盧坤拒却之。

十五年

十一月

工部尚書王引之卒。以何凌漢代。

大學士曹振鏞卒。以阮元為體仁閣大學士。兼管刑部。以戶部尚書王鼎協辦大學士。兩廣總督盧坤奏增定防範洋商章程八條。詔從之。

山西超城教匪曹順作亂。知縣楊廷亮死之。

三月

山西超城教匪曹順作亂。知縣楊廷亮死之。

十六年

五月

致仕大學士工部侍郎松筠卒。

八月

兩廣總督盧坤卒。以鄧廷楨為兩廣總督。

十七年

二月

湖南武岡獠作亂。詔訥爾經額剿平之。

三月

兩江總督陶澍降四級留任。以林則徐為湖廣總督。

六月

予告陝甘總督一等侯楊遇春卒。四川馬邊廳夷人滋事。總督鄂山討平之。

十八年

二月

以琦善為文淵閣大學士。署直隸總督任。

閏四月

鴻臚寺卿黃爵滋奏請嚴禁鴉片。

十月

以廣東總督林則徐為欽差大臣。馳赴廣東。查辦鴉片事務。

十九年

四月

林則徐焚燬鴉片二萬箱於廣東虎門口外。

二十年

六月 太子少保前兩江總督陶澍卒。
十月 詔停止英吉利貿易。
十一月 以林則徐為兩廣總督。
十二月 兩江總督陳鑾卒。以伊里布為兩江總督。

二十二年

七月 奕山為解其圍。
八月 英軍北犯陷廈門。
錫朋死之。英兵陷鎮海寧波。
欽差大臣裕謙死之。

三月 湖北提督羅思舉卒。
五月 英兵入犯廣州。

四月 英兵陷乍浦。
五月 英兵陷寶山。上海。江南提督陳化成死之。

六月 英艦北犯陷定海。

六月 英兵陷鎮江。進逼江寧。

七月 英艦至天津。要求大條款。

七月 以耆英、伊里布、牛鑑為全權大臣。赴英艦議和。訂南京條約。許五口通商。

八月 以琦善為欽差大臣。馳赴廣東。

九月 魏兩廣總督林則徐職。以琦善代之。

二十一年

正月 英兵犯廣州。陷沙角大角兩礮臺。詔遠琦管入京。以祁墳代之。

二月 英兵攻陷虎門礮臺。水師提督關天培死之。

閏三月 奕山謀襲英軍敗績。英軍陷四方砲臺。進薄廣州。

四月 廣東平英團起。圍攻義律。將軍

二十三年

十二月 浙江提督余步雲伏誅。

三月 奕山謀襲英軍敗績。英軍陷四方砲臺。進薄廣州。

三月 以琦善為熱河都統。文蔚為古城領隊大臣。奕經為葉爾羌幫辦大臣。尋復罷之。

三月 奕山謀襲英軍敗績。英軍陷四方砲臺。進薄廣州。

三月 臺灣供協作亂。旋討平之。

三月 奕山謀襲英軍敗績。英軍陷四方砲臺。進薄廣州。

二十四年

三月 臺灣供協作亂。旋討平之。

四月 詔許雲南設廠開礦。

五月 與美人訂立通商條約。

九月 與法人訂立通商條約。

二十五年 六月 許比利時人通商。

十一月 陝甘總督惠吉卒。起林則徐署

陝甘總督。

二十六年

三月 陝西巡撫鄧延楨卒。以林則徐

為陝西巡撫。布彥泰為陝甘總

督。

八月 緬寧回賊作亂。雲貴總督李星

沅討平之。

五月 前湖南巡撫楊芳卒。

十二月 陝西回民作亂。渭南知縣余炳

嘉討平之。

二十七年

三月 以林則徐為雲貴總督。李星沅

為兩江總督。

四月 廣東民驅逐在廣英人。

八月 七和卓木入寇喀什噶爾城。詔

授布彥泰為定西將軍。奕山為

參贊大臣。馳往剿援。

十一月 討平喀什噶爾之寇。

十二月 召耆英入京。以徐廣縉為兩廣

總督。葉名琛為廣東巡撫。

二十八年

正月 湖南乾州苗亂平。

八月 俄羅斯商船請在上海貿易。不

許。

十一月 以耆英為文淵閣大學士。琦善

協辦大學士。仍留任四川總督

任。

二十九年

四月 李星沅有病免。以陸建瀛為兩

江總督。徐廣縉與英人更訂

廣東通商條約。嚴禁英人入城。

詔封廣縉一等子爵。葉名琛一

等男爵。

十一月 予告大學士阮元卒。

十二月 湖南李沅寶滋事。總督裕祿討

平之。

三十年

正月 帝崩。皇太子奕訢即位。詔以明

年爲咸豐元年。

六月 廣西洪秀全舉兵反。

九月 魏廣西巡撫鄭祖琛職。以林則徐爲欽差大臣。兼署廣西巡撫。

馳擊洪秀全。

十一月 欽差大臣林則徐與疾擊洪秀全。途卒於潮州。

文宗咸豐

元年 正月 詔天下廣求賢才。

三月 以大學士賽尚阿爲欽差大臣。馳赴廣西接辦軍務。

四月 帝御乾清門聽政。

閏八月 洪秀全破永安。建號太平天國。自稱天王。大封同黨。

二年 四月 洪秀全棄永安。破全州。乘勝入湖南。

五月 洪秀全下道州。

七月 洪秀全下桂陽州、柳州。進攻長沙。

十二月 詔起侍郎曾國藩治團練於長沙。

三年 正月 洪秀全沿江東下。奪蕪黃。破九江。取安慶。下太平、蕪湖。進薄江寧。

二月 南京失守。將軍祥厚、兩江總督陸建瀛死之。洪秀全定都江寧。改稱天京。

三月 太平將林鳳祥、李開芳、吉文元率師渡江北伐。下揚州。欽差大臣向榮率師圍南京。

四月 欽差大臣琦善率師圍揚州。太平將林鳳祥入河南。取歸德府。攻開封。不克。

五月 鑄當五當十大錢。太平將林鳳祥等圍懷慶。知府余炳燾。知縣裘寶鏞固守不下。內閣學士勝保赴援。大破之。殪吉文元。

太平將胡以晁、賴漢英率師北

伐。入安徽。破集賢關。再下安慶。

六月 入江西。取九江湖口。進圍南昌。

七月 曾國藩遣湘軍馳援江西。

八月 太平將林鳳祥至山西。下平陽府。遂入直隸。陷深州。進逼天津。

九月 太平將胡以冕至湖北。下黃州。漢陽二府。

十一月 行官票寶鈔。

十二月 太平軍破廬州。安徽巡撫江忠源死之。

四年

正月 湖廣總督吳文鎔擊太平軍於黃州。兵敗死之。

六月 太平軍攻武昌。布政使岳興阿按察使曹懋堅死之。

八月 侍郎曾國藩會師破太平軍。復武昌。漢陽。並復黃州。

十月 曾國藩大破太平英王陳玉成於田家鎮。進兵圍九江。

正月 江蘇巡撫吉爾杭阿復上海。

五年

六年

六年

科爾沁郡王僧格林沁大破太平軍於連鎮。擒林鳳祥斬之。

二月 僧格林沁復高唐州。尋破太平軍於焉官屯。擒李開芳斬之。河北平。

三月 武昌復失。巡撫陶恩培死之。以胡林翼為湖北巡撫。率兵往援。

七月 擒首張洛行。據雒河集為亂。

十月 安徽巡撫福濟。提督和春。復廬州府。

三月 布政使羅澤南破太平軍於武昌。中礮死之。

五月 江南大營失。

七月 欽差大臣向榮卒於軍。

八月 太平天王殺東王楊秀清。及北王韋昌輝。翼王石達開奔安慶。

十一月 大學士文慶卒。湖廣總督官文。湖北巡撫胡林翼。復武昌。漢陽。

七年

正月

晉封懿妃葉赫那拉氏為懿貴妃。

六月

雲貴總督恆春自殺。以吳振棻為雲貴總督。王慶雲為四川總督。

十月

擒匪入河南。陷南陽府。知縣施作霖死之。

十一月

提督張國樑大破太平軍。復鎮江瓜洲。

十二月

英法同盟軍陷廣州。

八年

二月

欽差大臣和春。提督張國樑。進圍金陵。大破太平軍。恢復江南大營。

四月

布政使李續賓。總兵彭玉麟。復九江府城。起復侍郎曾國藩。辦理浙江軍務。與俄羅斯訂愛璉條約。劉黑龍江北岸地與俄。英法同盟軍至天津。陷大沽礮臺。

五月

天津條約成。同盟軍退。與俄羅斯另訂天津條約。

九月

太平英王陳玉成。復陷揚州府。浙江布政使李續賓與太平英

十月

王陳玉成戰於三河集。死之。殺前大學士柏蔭。安徽巡撫

九年

二月

李孟羣與太平英王陳玉成戰於廬州。死之。太平翼王石達開攻寶慶。知府李續直。總兵劉長佑擊破之。巡撫胡林翼與太平英王陳玉成戰於小池驛。大破之。

九月

太平翼王石達開攻桂林。不克。遂陷慶遠府。進兵廣東。

十一月

侍郎曾國藩會師鄂州。命欽差大臣勝保督辦河南剿

十年

正月

擒事宜。以袁甲三為欽差大

二月

臣。代勝保討擒。復鳳陽。臨淮。擒賊陷清江浦。太平忠王李

秀成下杭州。巡撫羅遵殿布政使王友端等死之。

閏三月

江南大營復失。提督張國棟戰死。欽差大臣和春卒於軍。

四月

太平軍破常州。兩江總督何桂清遁。遂下蘇州。巡撫徐有壬死之。以曾國藩為兩江總督兼欽差大臣。督辦江南軍務。

五月

曾國藩圍攻安慶。太平英王陳玉成馳援。敗績。

七月

英法同盟軍陷天津。

八月

英法同盟軍陷通州。帝走熱河。英兵薄京師。燬圓明園。

九月

與英法同盟軍重訂和約成。

十二月

設立總理各國通商事務衙門。與俄人訂立北京條約。

二月

太平英王陳玉成下黃州、蕪州。德安諸郡縣。武昌戒嚴。

四月

命左宗棠幫辦曾國藩軍務。安

徽團練長苗帥霖復叛。攻壽州陷之。

七月

帝崩於熱河。尊皇后鈕祜祿氏及其生母皇貴妃那拉氏為皇太后。以駱秉章為四川總督。督辦軍務。

八月

曾國荃克復安慶。湖北巡撫胡林翼卒。

十月

皇太子奉兩宮太后還京師。以恭親王奕訢為議政王。在軍機處行走。殺怡親王載垣。鄭親王

端華協辦大學士戶部尚書肅順。革軍機大臣景泰、穆蔭、匡源、杜翰、焦祐瀛等職。太平軍克杭州。巡撫王有齡、將軍瑞昌死之。命曾國藩統轄江蘇、安徽、江西三省並浙江全省軍務。皇太子載淳即位。以明年為同治元年。

穆宗同治

元年 正月

十一月 兩宮太后御養心殿。垂簾聽政。
十二月 以沈葆楨為江西巡撫。以左宗棠辦浙江軍務。

命兵部尚書麟魁。兩江總督曾國藩均協辦大學士。革前安徽巡撫翁同書職。逮京治罪。
浙江巡撫左宗棠破楊輔清於開化。太平軍攻上海常勝軍華爾擊敗之。

二月

以李鴻章為江蘇巡撫。馳援上海。大破太平軍。曾國藩遣將擊太平軍。曾國荃破太平軍於和州。復梁山關。

四月

曾國荃復蕪湖。進攻秣陵關。克之。遂圍江寧。荊州將軍多隆阿復廬州府。太平英王陳玉成走壽州。苗帥霖誘擒玉成。送京師殺之。

五月

太平軍下湖州。稱建布政使趙景賢被執。不屈死之。太平軍克嘉定。遂圍松江。程學啓力戰破之。松江圍解。

六月

提督鮑超復寧國府。太平保王洪客海降。

七月

袁甲三以病免。以安徽巡撫李續直為欽差大臣。督辦軍務。以吳棠署漕運總督。命欽差大臣勝保赴陝西。督辦軍務。命欽差大臣親王僧格林沁統轄山東河南全省軍務。並調度直隸山西兩省防兵。

八月

多隆阿復紫荊關。常勝軍援浙。攻慈谿克之。華爾中槍死。

九月

英提督何伯復嘉定。太平忠王李秀成。侍王李世賢率師援江寧。曾國荃擊走之。

十月

欽差大臣勝保有罪遽問。詔以

多隆阿為欽差大臣。督辦陝西軍務。前兩江總督何桂清有罪伏誅。

二年

正月

提督鮑超與太平輔王楊輔清戰於高阻山。大破之。左宗棠復金華府。

二月

科爾沁郡王僧格林沁。大破捻衆於雒河集。擒捻首張洛行斬之。雲南回民叛。總督潘鐸被執死之。

四月

鮑超復建平。進克金壇。曾國荃攻雨花臺。拔九壘。太平翼王石達開攻四川。川督駱秉章擒斬之。

五月

彭玉麟楊載福復九洲。劉銘傳郭松林大破太平忠王李秀成於江陰。李鴻章復江陰。太平廣王李愷順自縊死。

八月

三年

九月

江蘇巡撫李鴻章復蘇州。殺太平降將卞雲官等八人。

十月

李鴻章復無錫。擒太平潮王黃子澄。

十一月

僧格林沁大破捻衆於蒙城。擒捻首苗沛霖斬之。臺灣亂平。

正月

郭松林復宜興荆溪。

二月

程學啓攻嘉興府克之。卒於軍。閩浙總督左宗棠復杭州。

三月

多隆阿帥兵擊回民於藍屋。受傷卒。以副統穆圖善代領多隆阿軍。

四月

李鴻章復常州。

五月

太平天王洪秀全自殺。太子福瑨即位。以忠王李秀成輔國。

六月

大學士曾國藩督諸將克復江寧。太平幼主洪福瑨走江西。忠王李秀成死之。江寧平。行告祭禮。頒封爵功臣。

八月 洪福瑱走廣信。江西軍席寶田

擒斬之。太平天國亡。新疆回

首阿輝委明反。都統平瑞死之。

十月 革伊犁將軍常清職。以明緒代

之。

四年 三月 恭親王奕訢罷。以淳親王奕譞

總理海陸軍事務。詔設長江

水師。

四月 科爾沁郡王僧格林沁追擊擒

匪至山東曹州。歿於軍。詔以

曾國藩為欽差大臣。馳赴山東。

督辦直隸、河南、山東三省軍務。

以李鴻章署兩江總督。

六月 提督劉銘傳大破捻衆於雒河

集。

九月 提督雷正綰所部譚燾

十一月 禮部尚書李棠階卒。

十二月 奉天馬賊作亂。擬將軍恩合職

以都與阿代之。浙江提督鮑

五年

正月 始派官生赴歐洲各國遊歷。

東嘉應州。餘衆悉平。

六月 始設廠於福建。試造火輪船。

八月 楊岳斌免。以左宗棠為陝甘總

督。吳棠為閩浙總督。瑞麟為兩

廣總督。

九月 予告大學士祁雋藻卒。奉天

馬賊馬傻子窮蹙請降。誅之。

大破捻衆於河南。捻衆潰為兩

股。詔曾國藩回兩江總督任。

以李鴻章為欽差大臣。專辦剿

捻事宜。湖廣總督官文有罪

免。以譚廷襄署湖廣總督。

六年 正月 捻衆入陝西。以左宗棠為欽差

大臣。督辦陝甘軍務。提督鮑

超。大破東捻于安陸。堤督劉

五月 松山。大破西捻于西安。

以曾國藩為大學士。駱秉章協

辦大學士均仍留總督任。以

沈葆楨為船政大臣。

七月 雲南布政使岑毓英。攻拔豬拱

箐。進平海馬姑諸壘。邊回肅清。

十月 劉銘傳大敗東捻於贛榆縣。捻

將潘貴升殺任植以降。

十二月 賴汶光走揚州。被執。東捻平。

協辦大學士四川總督駱秉章

卒。以吳棠為四川總督。馬新貽

為閩浙總督。

七年

正月 西捻張總愚北竄。京師戒嚴。

六月 張總愚敗走荏平。赴水死。西捻

平。

七月 以曾國藩為直隸總督。馬新貽

為兩江總督。英桂為閩浙總督。

詔前兵部侍郎彭玉麟赴江皖。

會籌長江水師事宜。

十二月

陝回董福祥犯綏德。提督劉松

山擊走之。復鎮靖堡。陝回肅清。

八年

正月 陝西提督高連陞。劉松山所部

變亂。連陞被戕。

五月 岑毓英大破省東回壘。並克楊

林團山等處。

七月 太監安得海過山東。巡撫丁葆

楨擒誅之。陝甘總督左宗棠

大破回衆於靈州。

九年

正月 提督劉松山圍攻金積堡。殞於

軍。

五月 天津人民焚毀教堂。毆死法國

領事豐大業。

七月 張文祥殺兩江總督馬新貽。

十月 裁撤三口通商大臣。增設津海

關道。

十一月 劉錦棠大破回衆於金積堡。執

馬化隆父子斬之。

十年

正月 大學士官文卒。

四月 大學士倭仁卒。

五月 以李鴻章為全權大臣。與日本

十一年

俄羅
議訂修好條約於天津。
斯兵入據伊犁。

二月

大學士兩江總督曾國藩卒。

五月

以李鴻章為大學士。仍留直隸

總督任。

九月

帝行大婚禮。冊立阿魯特氏為

皇后。富察氏為慧妃。

十二月

雲貴總督岑毓英收復大理。

杜文秀自殺。滇回亂平。

十二年

正月

帝始親政。以李宗羲為兩江總

督並充辦理通商事務大臣。

四月

以李鴻章為換約大臣。與日本

互換條規。

六月

各國駐京使臣。始於紫光閣前

瞻覲。並呈遞國書。

九月

左宗棠收復肅州。關隴回亂平。

十一月

御史吳可讀。以言事降調。

十三年

三月

日本寇臺灣。爭琉球主權。

四月

以沈葆楨為欽差大臣。辦理臺

德宗光緒

元年

二月

嘉順皇后崩。以左宗棠為欽

差大臣。督辦新疆軍務。

四月

以沈葆楨為兩江總督。兼辦理

通商事務大臣。

六月

大東溝匪為亂。官軍討平之。

八月

英翰罷。以劉坤一為兩廣總督。

九月

越南黃崇英為亂。官軍討平之。

二年

以李鴻章為全權大臣。與英使

威妥瑪商訂煙臺條約。

七月

日本與朝鮮訂立盟約。

安事務

七月 詔停圓明園工程。酌修三海。

十月

帝不豫。

十二月

帝崩。兩宮太后命立醇親王奕

讓子載灃為嗣皇帝。入承大統。

嗣皇帝即位。以明年為光緒元

年。兩宮太后垂簾聽政。封穆

宗后為嘉順皇后。

八月 左宗棠克復烏魯木齊。天山北路平。

九月 收回英商所築滬甌鐵路。燬之。

三年 三月 左宗棠進兵天山南路。阿古柏自殺。

九月 左宗棠復新疆南路東四城。

十月 大學士沈桂芬與日斯巴尼亞

使臣伊巴里訂立古巴華工條約。

四年 二月 左宗棠克復新疆南路西四城。

新疆平。

十月 安集延酋入寇。劉錦棠擊破之。

五年 三月 前御史吳可讀自殺。詔錄其遺疏存毓慶宮。

閏三月 日本滅琉球。夷為冲繩縣。

四月 改辦四川鹽務為官運商銷。

七月 許朝鮮與各國訂立通商條約。

十月 李揚才擾越邊。提督馮子材討

平之。

十一月 兩江總督沈葆楨卒。以劉坤一

為兩江總督。張樹聲為兩廣總

督。

十二月 詔擬出使俄國大臣侍郎崇厚

職。交刑部治罪。

六年 正月 以曾紀澤為出使俄國大臣。議

改收還伊犁條約。

二月 沈桂芬景廉與德使巴蘭德續

訂通商條約六款。善後章程九款。

七月 召左宗棠進京。以劉錦棠為欽

差大臣。督理新疆軍務。命曾

國荃督辦山海關防務事宜。

允設陸路電線。

八月 大學士寶鋆尚書李鴻藻與美

使安吉立續修條約四款。又續

補條約四款。出使俄國大臣曾

紀澤與俄政府修改伊犁條約

於聖彼得堡。

七年

三月 皇太后鈕祜祿氏崩。

八月 李鴻章與巴西使臣喀拉多訂

立條約十七款。

十一月 以張之洞為山西巡撫。

八年

三月 李鴻章罷。以張樹聲署直隸總督。李鴻章罷。以徐宗瀛為湖廣

總督。

四月 朝鮮與美訂約。以道員馬建忠、

提督丁汝昌往滬盟。

七月 朝鮮內亂。大院君李昱應被執

歸。安置保定。

十月 與俄定喀什噶爾東北界約四

條。

十一月 王文韶罷。命翁同龢在軍機大

臣上行走。

九年

六月 以李鴻章署直隸總督。

七月 安南與法蘭西訂立法越新約。

八月 命彭玉麟往廣東會辦海防。

九月 伊犁參贊大臣升泰與俄國分

十年

正月 左宗棠因病乞罷。以曾國荃署

兩江總督。

三月 德軍陷北寧山西。詔褫廣西巡

撫徐延旭。雲南巡撫唐炯職。命

雲貴總督岑毓英出關督師。

軍機大臣奕訢、寶鋆、李鴻藻、景

廉翁同龢均罷。

五月 李鴻章與法國水師總兵福祿

諾訂立天津議和條約。

閏五月 以曾國荃為全權大臣。與法使

巴德諾會議詳細條約。

七月 下詔與法宣戰。法軍寇臺灣。臺

防督辦劉銘傳擊走之。以左宗

棠為欽差大臣。督辦福建軍務。

穆圖美、楊昌濬幫辦軍務。

九月 以劉銘傳為福建巡撫。仍駐紮

臺灣。督辦防務。

十月 以劉錦棠為新疆甘肅巡撫。仍以欽差大臣督辦新疆事宜。

十一月 朝鮮新黨作亂。命駐韓通商委員袁世凱討平之。

十二月 魏張佩綸。何如璋職。發往軍臺效力。法兵寇鎮海。守礮臺兵擊卻之。

十一年 正月 諒山陷。提督楊玉科死之。法兵進寇鎮南關。

二月 以李鴻章為全權大臣。與日使伊藤博文議朝鮮事。遂訂中日

天津條約三款。廣西提督馮子材大破法軍於文淵州。克復

諒山。

三月 以李鴻章為全權大臣與法使議和。

四月 李鴻章與法使巴德諾訂立法越天津條約十款。

五月 曾紀澤與英外部續訂煙臺條

約專款十條。

八月 以李鴻章為滇越邊界通商議約全權大臣。大學士左宗棠卒於軍。以醇親王奕譞總理海

軍事務。奕劻、李鴻章會同辦理。以穆圖善為欽差大臣。會同東

三省將軍辦理練兵事宜。英人滅我緬甸。

十二年 三月 李鴻章與法使戈可當會議越南邊界通商章程十九款。

五月 四川總督丁寶楨卒。奕劻、孫毓汶與英使歐格納會議緬甸條約五款。

八月 前湖廣總督鮑超卒。瓊州客黎作亂。詔提督馮子材剿除之。

正月 詔築大沽天津鐵路。

四月 定出洋遊歷人員章程。

五月 奕劻、孫毓汶與法使續議界務專約五款。商務專約十款。

六月 雲貴總督劉長佑卒。

七月 兩廣總督張之洞奏設南洋各島領事。

黃河盜。

八月 奕劻、孫毓汶與葡使羅河議訂中葡條約及專款。

十月 兩廣總督張之洞奏請與葡萄牙議訂澳門租界條約。

牙議訂澳門租界條約。

十二月 英兵謀入藏。詔撤駐藏大臣文碩。以長庚代之。

正月 頤和園成。詔奉皇太后臨幸。

十四年

二月 定海軍經制。李鴻章奏接九南電線。

三月 皇太后宣旨明年二月歸政。

七月 以吳大澂署河東河道總督。李鶴年、成學均發軍臺。李鴻藻及河南巡撫倪文蔚革職留任。

英領英兵侵藏。藏兵敗績。

八月 北洋海軍成。寧波礮臺成。

十一月 南洋海軍成。寧波礮臺成。

十二月 鄭州河工告成。

十五年 正月 以張之萬為大學士。徐桐協辦大學士。行大婚禮。冊立葉赫那拉氏為皇后。

帝親政。以蔭福成充出使英法義比四國大臣。

二月 以崔因出使美日秘國大臣。奉皇太后幸頤和園。閱視神機營水陸操。

三月 湖廣總督張之洞奏請興辦蘆漢鐵路。詔從之。

四月 翰林院編修奏請續修四庫全書。

五月 雲貴總督岑毓英卒。

六月 飭禁各省州縣差徭諸弊。

十一月 駐藏大臣升泰與英國總理印度大臣蘭士丹議訂藏印條約八款。

三月 戶部右侍郎曾紀澤卒。臺灣

巡撫劉銘傳奏平南澳番社。

四月 前兵部尚書彭玉麟卒。

八月 前陝甘總督楊岳斌卒。

十月 兩江總督曾國荃卒。以劉坤一為兩江總督。

十一月 定各國使臣覲見禮。醇親王奕譞卒。薛福成奏請增設南洋九島領事。

召見各國使臣於紫光閣。

十七年

四月 直隸總督李鴻章出洋會閱海軍。詔各省督撫迅辦教案善後事宜。

六月 詔各省嚴拿哥老會匪。

七月 山東巡撫張曜卒。

十月 熱河教匪滋事。

十一月 俄侵帕米爾。英侵哪格爾及坎巨提。

十二月 教案匪首李國珍滋事。

十二月 雲南猓夷滋事。

十八年

三月 前大學士閻敬銘卒。

五月 廣東三合會匪滋事。兩廣總督李鴻章剿平之。

七月 定竊毀電桿電線治罪專條。

九月 李鴻章奏請獎資黑龍江漠河金廠出力文武員弁。

十一月 總理衙門奏請勘分帕米爾界務。

十九年

五月 普安會匪劉燕飛滋事。官軍剿平之。

七月 薛福成奏陳滇緬分界情形。

十月 與英議定藏印通商交涉遊牧條約。李鴻章奏請重整上海織布局。英法共謀暹羅廢止入貢。

十二月 與法使會勘廣西邊界。繪圖立石。

晉封妃嬪及宗室外藩王公。並加恩中外文武大臣有差。命

二十年

正月

正月

正月

許振禕會同李鴻章籌辦永定河工。

二月 駐美使臣楊儒與美外部續定華工條約六款。

四月 李鴻章校閱海陸軍。

五月 朝鮮東學黨作亂。命直隸提督葉志超馳赴助剿。

六月 日本兵入朝鮮王宮。幽禁朝王。改革朝鮮內政。日兵襲擊我運兵艦於豐島沖。我軍敗績。

日兵襲擊我陸軍於牙山。提督葉志超遁。

七月 宣布與日本開戰。前甘肅新疆巡撫劉錦棠卒。以葉志超總統平壤諸軍。

八月 與日軍戰於平壤。我師敗績。總兵左寶貴死之。與日海軍戰於大東溝外。我師敗績。管帶鄧世昌死之。

二十一年

九月 日軍寇遼東。陷九連安東等城。貶李鴻章職。褫去黃馬褂。

十月 日本兵陷鳳凰城。復陷旅順。

十一月 日兵陷海城。

十二月 日兵陷蓋平。日兵寇山東。陷榮城及威海衛。

正月 日兵陷劉公島。海軍全隊被擄。命李鴻章為頭等全權大臣與日本議和。

二月 日兵陷牛莊營口。定邊軍收復寬甸長甸。日兵陷澎湖羣島。日人鎗傷李鴻章於馬關。

三月 李鴻章與日本全權大臣伊藤博文訂立馬關和約十一款。另約三款。宣示與日本定約。

割讓臺灣與日本。俄法德三國勸告日本以遼東半島退還我國。

四月 甘肅回民作亂。提督董福祥討

五月

我國

甘肅回民作亂。提督董福祥討

五月

平之。

閏五月 順天府尹胡燏棻陳請變法自

強。

六月 派員赴南洋各島招徠僑商。

七月 召李鴻章入閣辦事。以王文韶

為直隸總督。崧藩為雲貴總督。

八月 擬前四川總督劉秉璋職。永不

敘用。

九月 孫文始謀起事於廣州。湖北

鍊鐵廠成。

十一月 兩江總督張之洞奏設江南自

強新軍。

十二月 張之洞奏設陸軍及鐵路學堂

特派李鴻章為出使大臣。往賀

俄皇加冕。

二十二年 正月 始設官書局。以孫家鼐為管理

大臣。

二月 前臺灣巡撫一等男爵劉銘傳

卒。始設郵政局。江西道監

察御史陳其璋奏請與各國同

列萬國公法。

四月 出使大臣李鴻章與俄訂立中

俄密約於莫斯科。

五月 山東刀匪滋事。

七月 工部尙書孫家鼐奏請開辦京

師大學堂。

八月 出使俄國大臣許景澄與華俄

道勝銀行訂立東省鐵路公司

合同十二條。

九月 督辦軍機處與俄使喀希尼簽

訂中俄新約十二條。始設鐵

路總公司。以盛宣懷為督辦。

盛宣懷奏請國設銀行立達成

館。

二十三年 正月 與英訂緬甸條約十八款。

二月 以張蔭桓為出使英國大臣。往

賀英皇六十慶典。

三月 以呂海寰為出使德國大臣。

五月 前大學士張之萬卒。湖廣總

督張之洞奏設武備學堂。

七月 協辦大學士李鴻藻卒。監察

御史陳其璋奏請添鑄銅元。

十月 山東天主堂德國教士被戕。德

軍入佔膠州灣。

十一月 魏山東巡撫李秉衡職。工部

主事康有爲上書請變法。

十二月 詔陝西提督董福祥添練甘軍。

正月 詔設經濟特科。始設京師大

學堂。

二月 與德國訂立膠澳租借條約。

三月 俄人租借旅順大連灣。

四月 英人租借威海衛。恭親王奕

訥卒。詔改各省書院爲學校。

詔定國是。召見工部主事康

有爲。命在總理各國事務衙門

行走。命二品以上大臣陸見

時。並詣皇太后前謝恩。協辦

大學士翁同龢罷。

五月 詔廢入股文。科舉改試策論。

命舉人梁啓超辦理書局事務。

御史文悌罷。命神機等營

改練軍操。詔各省廳州縣設

立學校。

六月 命康有爲督辦上海官報。

七月 詔設農工商總局於天津。以端

方、徐建寅、吳懋鼎爲督理。詔

裁汰京內外各官。罷禮部尙

書懷塔布、許應駉、侍郎堃、徐

會澄、傅頤、曾廣漢職。諭於九

月中奉皇太后至天津閱兵。

命內閣候補侍讀楊銳、刑部候

補主事劉光第、內閣候補中書

林旭、江蘇候補知府譚嗣同、均

賞加四品卿銜。著在軍機章京

上行走。李鴻章罷。

八月 命直隸按察使袁世凱、以侍郎

候補。專辦練兵事務。命康有為
迅往上海督辦官報。直隸總

督榮祿至京師。皇太后復垂簾
訓政。以帝有疾。宣告中外。詔各

省督撫速捕康有為。皇太后幽
帝於南海之瀛臺。捕侍郎張蔭

桓。徐致靖。御史楊深秀。京卿楊
銳。林旭。譚嗣同。劉光第均下獄。

詔求天下名醫診治帝疾。殺
楊深秀。楊銳。林旭。譚嗣同。劉光

第。梁廣仁六人。詔謫戍張蔭桓
於新疆。徐致靖。永遠監禁。詔

復一切舊制。停止九月至天
津閱兵。詔各軍均歸榮祿節制。

十月 奪前協辦大學士翁同龢職。交
地方官嚴加管束。

十二月 革湖北巡撫曾鈺職。
二月 以毓賢為山東巡撫。

四 命剛毅往江南查辦事件。光

二十五年

二十六年

祿寺卿袁昶奏陳整頓釐金辦
法六條。

五月 端王戴漪訓練神虎營有效。議
敘有差。

六月 詔直省整頓關稅釐金鹽課等
項。酌提歸公。

十月 法兵艦侵入廣州灣。據之。遂與
訂立廣州灣租借條約。

十二月 立端郡王戴漪子溥儀為大阿
哥。繼承穆宗毅皇帝為嗣。

正月 懸賞購拿康有為。梁啟超。
二月 各國公使夫人。覲見皇太后於
儀鑾殿。

三月 拳匪竄擾近畿。

五月 命剛毅。趙舒翹出京。招撫拳匪。
命載漪管理總理各國事務衙
門。啟秀。溥興。那桐均在總理各

國事務衙門大臣上行走。董
福祥軍殺日本使館書記生杉

山彬。武衛軍殺德公使克林德。詔與各國宣戰。召巡閱長江水師大臣李秉衡來京。英俄日法德美奧意八國聯軍入寇。陷大礮臺。詔各省招集義和團助戰。以莊親王載勳爲步軍統領。督兵助戰。劉坤一張之洞與各國駐上海領事訂立東南保護條約。

六月

聯軍陷天津。直隸提督聶士成游擊宋占樞死之。

七月

殺吏部左侍郎許景澄。太常寺卿袁昶。聯軍寇楊村。直隸總督福祿走死。殺尙書徐用儀。立山。內閣學士聯元。聯軍至通州。李秉衡死之。聯軍陷京師。太后挈帝出奔宣化。下詔罪己。求直言。唐才常謀起兵湖北。事洩被誅。秦鼎彝起兵大

通。沈蕙起兵新堤。皆兵敗死之。聯軍至保定。太后挈后至太原。

八月

九月西幸西安。俄人入寇齊齊哈爾。黑龍江將軍壽山死之。東三省全陷。詔以奕劻、李鴻章爲全權大臣。與聯軍議和。

十一月

奕劻、李鴻章電奏和議大綱十二條。詔皆允之。鄭弼臣起兵惠州。兵敗走死。史堅如謀炸兩廣總督德壽。被執死之。

十二月

下詔變法。詔禁仇視外國官民。

二十七年

正月

詔加重懲治肇禍諸臣。詔開教地方停止文武考試五年。

三月

設立會議政務處。命醇親王、戴溎爲頭等專使大臣。往德謝罪。

四月

五月

以那桐爲專使大臣。往日謝罪。六月

改總理各國事務衙門爲外務

部。

七月 奕劻、李鴻章與各國聯軍訂立

辛丑和約十二款。詔復廢八

股文。科舉改試策論。太后挈

帝自西安回京。

八月 詔各省書院改設學堂。

九月 全權大臣直隸總督李鴻章卒。

以王文韶署理全權大臣。袁世

凱署理直隸總督。

十月 車駕至開封。詔撤消燹備大阿

哥名號。聯軍撤兵出京。

十一月 車駕還京師。

十二月 詔許滿漢通婚。

正月 以吳汝綸為大學堂總教習。

四川總督宋慶卒。

二月 詔編纂中西律例。

三月 奕劻、王文韶與俄公使雷薩爾

議訂交還滿洲條約。

四月 派沈家本、伍廷芳修訂法律。

五月 實授袁世凱為直隸總督。兩廣

總督陶模因病乞休。以德壽署

理兩廣總督。

六月 以胡維德為出使俄國大臣。孫

寶琦為出使德國大臣。聯軍

交還天津。

八月 呂海寰、盛宣懷與英使馬凱續

議通商行船條約十六款。奕

劻、王文韶與俄使雷薩爾訂交

還山海關鐵路條款。

九月 兩江總督劉坤一卒。以張之洞

署兩江總督。端方署湖廣總督。

以袁世凱為督辦商務大臣。與

張之洞會同辦理。

十月 以汪大燮為日本留學生總監。

收回電報局為官辦。

十一月 大學士榮祿卒。詔訂商律。

三月 與葡萄牙增改條約九款。雲

南周呈祥滋事。按察使劉春霖

二十九年

討平之。

五月

命侍郎鐵良會同袁世凱辦理京旗練兵事宜。

閏五月

廣西匪亂起。詔革巡撫王之春提督蘇元春職。

七月

命鄭孝胥以四品京堂督辦廣西邊務。設立商部。

八月

與美國續議通商行船條約十七款。

十一月

設立練兵處。頒布學堂章程。

十二月

日本與俄羅斯宣戰。宣告各省嚴守局外中立。

三十年

正月

詔舉行皇太后七旬萬壽慶典。

十月

黃興謀起兵於長沙。事洩走日本。孫文、黃興合組革命同盟會於日本。謀建中華民國。

三十一年

三月

裁撤江淮巡撫。改准揚鎮總兵為江北提督。

七月

日本與俄羅斯議和於美國之

三十二年

八月

朴子茅斯。詔停科舉。命載澤、戴鴻慈、徐世昌、端方、紹英為出洋考察政治大臣。至正陽門車站。為黨人吳樾所炸。不果行。收回粵漢鐵路合同。南洋華僑電請廢除美禁華工條約。

以袁世凱、鐵良為秋操閱兵大臣。廣西柳州兵變。兩廣總督岑春煊討平之。命尙其亨、李盛鐸為出洋考察政治大臣。

以陸徵祥為出使和蘭大臣。兼理海牙和平會事。詔各省嚴

禁革命黨。

設立學部。奕劻、瞿鴻禨、袁世

十月

凱與日使小村壽太郎訂立滿洲協約。

宣示教育宗旨。

十一月

江西教民作亂。派侍郎梁敦彥

前往查辦。議約全權大臣唐

二月

三月

前

紹儀與英使薩道訂立中英藏

條約六款。

七月 宣示預備立憲。

八月 詔禁鴉片。

九月 詔釐定官制。

十月 頒行禁烟章程十條。江西萍

鄉革命軍起事。江、贛、湘、鄂四省

兵擊敗之。袁世凱請罷兼差。

十二月 以鳳山總統新訓練軍。

正月 以岑春煊為四川總督。錫良為

雲貴總督。

二月 張百熙卒。

三月 詔改盛京將軍為東三省總督。

兼管三省將軍事務。奉、吉、黑各

設巡撫。以徐世昌為東三省

總督。唐紹儀為奉天巡撫。朱家

寶為吉林巡撫。段芝崑為黑龍

江巡撫。

四月 御史趙啓霖革職。廣東潮州

革命軍起事。旋被擊敗。

五月 大學士瞿鴻禨罷。大學士王

文韶因病乞休。允之。以張之洞

協辦大學士。詔改各省官制。

徐錫麟鎗斃。安徽巡撫恩銘被

逮。與其黨陳伯平、馬宗漢死之。

六月 浙江巡撫張曾歎。逮紹興大通

女學校校長秋瑾殺之。

七月 廣東欽州革命黨起事。攻陷防

城。旋被擊敗。岑春煊罷。以張

人駿為兩廣總督。設憲政編

查館。歸併會議政務處於內閣。

以張之洞、袁世凱為軍機大臣。

趙爾巽為湖廣總督。陳夔龍為

四川總督。楊士驥為直隸總督。

八月 命汪大燮、于式枚、達壽分赴英、

德、日考察憲政。詔設資政院。

以溥倫、孫家鼐為總裁。詔各

省設立諮議局。與英人商訂

蘇杭再借款造路章程。

十一月

孫文黃興合攻廣西鎮南關克之。旋敗退。諭禁學生干預政治及開會演說。

及開會演說。

十二月

命提督姜桂題帥兵馳赴浙江。廣東緝獲日本輪船私運軍火。尋命釋之。

三十四年

正月

派傅偉、鹿傳霖、景星、丁振鐸為禁烟大臣。並設立禁烟所。

三月

綏遠城將軍貽穀有罪逮問。

四月

孫文、黃興遣其黨攻雲南河口。克之。旋敗退。

派唐紹儀為赴美專使。

六月

查禁政聞社。

七月

詔定實行預備立憲年限。以九年為期。召集國會。奕劻奏進憲法大綱。馬玉崑卒。以姜桂題接充武衛左軍總統。以蔭昌端方為閩兵大臣。

憲法大綱。馬玉崑卒。以姜桂題接充武衛左軍總統。以蔭昌端方為閩兵大臣。

題接充武衛左軍總統。以蔭昌端方為閩兵大臣。

昌端方為閩兵大臣。

宣統

元年

九月

西藏達賴喇嘛來朝。詔封為誠順贊化西天大善自在佛。

十月

帝崩。遺詔傅儀入承大統。為嗣皇帝。以醇親王載灃為攝政王監國。尊皇太后為太皇太后。兼祧母后為皇太后。太皇太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

太后葉赫那拉氏崩。安慶礮營隊官熊成基起事。旋敗死。

甘總督。直隸總督楊士驥卒。以端方調充之。以張人駿為兩江總督。袁樹勛為兩廣總督。

設軍諮處。以毓朗為管理大臣。

六月 督辦津浦鐵路大臣呂海寰免。

七月 命南洋大臣兩江總督張人駿為南洋勸業會會長。命戴鴻慈鎮冰巡視沿江沿海各省武備。與日本訂立東三省交涉五案條款。

八月 大學士張之洞卒。

九月 以鹿傳霖為大學士。陸潤庠辦大學士。

十月 直隸總督端方有罪免。以陳夔龍為直隸總督。瑞澂為湖廣總督。大學士孫家鼐卒。以陸潤庠為大學士。戴鴻慈協辦大學士。李殿林為吏部尚書。

賞給遊學專門詹天佑。嚴復等

十二月

二年

正月

進士舉人有差。各省咨議局議員代表至京。上速開國會請願書。

廣東新軍謀起事。水師提督李準擊平之。詔革西藏達賴喇嘛封號。外蒙古庫倫攜貳。日本併滅朝鮮。汪兆銘謀炸攝政王。事洩被捕下獄。

長沙饑民暴動。焚毀巡撫衙門。詔革巡撫岑春煊職。

三月 頒行現行刑律。頒行幣制則例。

四月 山東海陽縣民抗稅暴動。官兵剿平之。

五月 革前江西提學使浙路總理湯壽潛職。大學士鹿傳霖卒。以徐世昌為大學士。李殿林協辦大學士。

八月 以鐵良為江寧將軍。廕昌兼充

訓練近畿各鎮大臣。

九月 資政院開院。

十月 詔籌備立憲縮九年爲五年。並

令解散請願代表。以傅倫載

澤充纂擬憲法大臣。以程允

和爲長江水師提督。張勳接統

駐紮江南浦口各營。

十一月 改設海軍部。以載洵爲海軍大

臣。譚學衡爲副大臣。命步軍

統領衙門將東三省請願代表

送回原籍。奕劻奏請開去軍

機大臣等職。不許。

十二月 郵傳部尙書唐紹儀因病乞休。

詔以盛宣懷爲郵傳部尙書。

頒佈新刑律暨暫行章程。頒

布宣統三年預算案。

三年 正月 英兵侵據片馬。詔駐英公使與

英政府交涉。申諭各府停止

刑訊。

二月 以劉若曾充修訂法律大臣

郵傳部尙書盛宣懷奏借日本

銀行款一千萬圓。溫生才鎔

斃廣州將軍孚琦。

三月 度支部尙書載澤奏借英、美、德、

法四國銀行款一千萬鎊。黃

興謀取廣州。燬總督署。不能克。

林時壘等七十二人死之。

四月 江蘇諮議局員全體辭職。設

立內閣。以奕劻爲總督大臣。設

立弼德院。以陸潤庠爲院長。樂

慶爲副院長。設立軍諮處。以

載瀾毓朗爲軍諮大臣。宣示

鐵路國有政策。以端方充督

辦粵漢川漢鐵路大臣。吉林

大火。

五月 湘民力爭收路。湖南巡撫楊文

昇奏請懲治。詔格殺勿論。川

民力爭收路。四川總督王人文

奏請卹民。奉旨嚴斥。御史趙熙、耿家廉奏劾盛宣懷借債實路二十餘款不報。頒布內閣屬官制。暨內閣法制院官制。

閏六月 各省諮議局呈請另組責任內閣不許。派陸潤庠、陳寶璣授讀。

閏六月 漢陽大火。東南大水。譚鳳山為廣州將軍。壽耆為荊州將軍。廣東水師提督李準被刺未死。

七月 王文韶以趙爾豐為四川提督。趙爾豐拘捕保路會代表。槍斃川民四十餘人。命端方督兵入四川。命岑春煊往四川辦理剿撫事宜。趙爾豐以亂軍救平入報。

八月 端方、瑞澂合奏川漢粵漢兩路已實行收歸國有。武昌民軍

起。推黎元洪為鄂軍都督。湖廣總督瑞澂遁。武昌省城遂為民軍佔領。民軍佔領漢陽及漢口。魏瑞徵張彪職。以袁世凱為湖廣總督。岑春煊為四川總督。

九月

湖南長沙民軍起。推焦昱為都督。陳作新為副都督。防營統領黃思浩死之。江西民軍起。推吳介璋為贛軍都督。巡撫馬如騃死之。江蘇民軍起。推巡撫程德全為都督。安徽民軍起。推巡撫朱家寶為都督。廣州將軍鳳山被炸死。山西民軍起。推閻錫山為都督。巡撫陸鍾琦死之。山東民軍起。推巡撫孫寶琦為都督。革郵傳部大臣盛宣懷職。以唐紹儀代之。詔授袁世凱為欽差大臣。節制

海陸各軍與民軍開戰。下詔罪己。詔開除黨禁。詔取銷皇族內閣。奕劻罷。以袁世凱為內閣總理大臣。頒布憲法信條。以張紹曾為宣撫大臣。釋汪兆銘、黃復生、羅世勛於獄。浙江民軍起。推湯壽潛為都督。福建民軍起。推孫道仁為都督。總督松壽、將軍樸壽死之。雲南民軍起。推蔡鍔為都督。統制鍾麟同布政使世增死之。貴州民軍起。推楊盡誠為都督。廣東民軍起。推胡漢民為都督。廣西民軍起。推陸榮廷為都督。四川民軍起。殺前四川總督趙爾豐。推尹昌衡為都督。新疆民軍起。推廣福為都督。伊犁將軍志銳死之。甘肅民軍起。執總督長庚。外蒙

十月

古庫倫宣布獨立。逐辦事大臣三多。河南民軍起。尋敗退。直隸民軍起。推王懷慶為都督。東三省民軍起。推藍天蔚為關東大都督。海軍各艦隊歸附民軍。袁世凱入京組閣。以段祺瑞署理湖廣總督。遣使宣慰各省。以憲政信條宣誓太廟。山東取消獨立。長沙兵變。殺其都督焦昱。陳作新。推譚延闓為都督。清軍收復漢陽。賞馮國璋二等男爵。民軍光復南京。總督張人駿、將軍鐵良、江防統領張勳俱遁去。推程德全為江蘇都督。移駐南京。詔南北停戰。命袁世凱與民軍議和。各省代表聯合會選舉孫文為臨時大總統。組織臨時政府。

十一月

中華民國臨時大總統孫文就職於南京。改用陽曆。以是日爲民國元年元日。袁世凱撤消唐紹儀議和代表。自與民軍直接電商。袁世凱被炸。未死。山西巡撫吳祿貞被刺。卒於軍。

十二月

錫封袁世凱一等侯爵。固辭不受。軍咨使夏綱被刺死。署湖廣總督段祺瑞電請速定共和國體。清隆裕太后率宣統帝退位。

附錄二 清代各朝名人分配表

人物	地域	類屬	人物	地域	類屬
清初			孔有德	滿洲	軍事邊務
朱 奎	江西	藝術書畫	石廷柱	同	軍事陸軍
呂留良	浙江	學術理學	代 善	同	同
傅 山	山西	藝術書畫	多爾袞	同	同
僧漸紅	安徽	同	多 鐸	同	同
釋道濟	廣西	同	李猶龍	陝西	同
太祖天命			金人瑞	江蘇	同
額亦都	滿洲	軍事陸軍	阿濟格	滿洲	藝術文學
費庚東	同	同	岳 樂	同	軍事陸軍
太宗天聰			姜 瓖	陝西	同
薩哈麟	同	同	侯方域	河南	同
阿巴泰	同	同	孫可望	陝西	同
額爾德尼	同	學術藝術	祖大壽	滿洲	同
世祖順治			耿仲明	同	同
王 鐸	河南	藝術文學	陳名夏	江蘇	同
方大猷	浙江	同	博 樂	滿洲	同
		書畫	喻 昌	江西	同
					學術軍事
			寧完我	滿洲	政治政事
			豪 格	滿洲	軍事陸軍
			鄭芝龍	福建	同
			濟爾哈朗	滿洲	同
			錢謙益	江蘇	同
			聖祖康熙		
			于成龍	山西	同
			于成龍	滿洲	實業水利
			允 侗	江蘇	同
			毛 晉	同	同
			毛際可	浙江	同
			毛奇齡	同	同
			王夫之	湖南	學術文學
			王士禎	山東	學術理學
			王 猷	江西	同
			王宏撰	陝西	學術理學
			王錫闡	江蘇	同

附錄二 清代各朝名人分配表

呂宮	同	政治政事
朱約	同	同
朱克簡	同	同
朱彝尊	浙江	藝術文學
朱用純	江蘇	學術理學
宋駿業	同	藝術文學
仲永檀	山東	政治政事
汪昂	安徽	學術醫學
汪琬	江蘇	藝術文學
汪士鋐	同	同
吳綺	同	同
吳兆騫	同	同
吳三桂	滿洲	軍事邊務
吳六奇	廣東	同 陸軍
吳偉業	江蘇	藝術文學
何焯	同	同
沈煦	浙江	學術理學
宋德宜	江蘇	政治政事
宋琬	山東	藝術文學

宋學	河南	政治財務
李芝芳	山東	軍事陸軍
李率泰	滿洲	同
李顯	陝西	學術理學
李柏	同	同
李因篤	同	同
李光地	福建	政治政事
邵長衡	江蘇	藝術文學
邵大業	直隸	政治政事
林起龍	同	同
林古度	福建	藝術文學
周楊俊	江蘇	學術醫學
周夢顏	江蘇	學術理學
金之俊	江蘇	政治政事
金光祖	滿洲	軍事陸軍
明珠	同	政治政事
尚之信	同	軍事邊務
尚可喜	同	同
納蘭性德	同	藝術文學

周亮工	河南	政治政事
冒襄	江蘇	藝術文學
計東	同	同
郎坦	滿洲	軍事陸軍
郎廷佐	同	同
洪承疇	福建	同
施琅	同	同 水師
施潤章	安徽	藝術文學
姜辰英	浙江	同
查昇	同	同
胡渭	浙江	學術理學
姚啟聖	同	軍事水師
徐文元	江蘇	政治政事
徐乾學	同	學術理學
高士奇	浙江	同
唐甄	四川	同
孫蕙	山東	政治政事
孫博雅	直隸	學術理學
孫奇逢	同	同

孫承澤	孫思克	耿精忠	耿繼茂	范文程	陳瑚	陳維崧	陳汝咸	陳廷敬	陳瑛	陳世綬	陳厚耀	陸世儀	陸隴其	張履祥	張璐	張志聰	張爾岐	張玉書
直隸	滿洲	同	同	同	江蘇	同	滿洲	山西	廣東	浙江	浙江	江蘇	同	浙江	江蘇	浙江	山東	江蘇
政治政事	軍事邊務	同	同	政治政事	學術理學	藝術文學	政治政事	同	同	藝術書畫	學術藝事	同	同	同	同	同	同	實業水利
曹溶	郭琇	郭世隆	康基淵	梁化鳳	梁佩蘭	傑書	喀喀穆	黃宗羲	黃機	黃貞麟	萬世大	彭士望	彭鵬	湯右曾	湯斌	傅以漸	葉桂	薛雪
滿洲	山東	滿洲	山西	陝西	廣東	滿洲	同	浙江	同	山東	浙江	江西	福建	浙江	河南	山東	江蘇	同
政治政事	同	同	同	軍事陸軍	藝術文學	軍事陸軍	同	學術理學	政治政事	同	學術理學	同	政治政事	政治政事	同	同	學術藝事	同
董以寧	靳輔	趙廷臣	趙吉士	趙執信	熊賜履	潘耒	蔣伊	蔣國柱	劉之源	劉體仁	劉獻定	蔡毓榮	錢澄之	應樞謙	魏禧	魏裔介	魏象樞	閻若璩
江蘇	滿洲	同	安徽	山東	湖北	江蘇	江蘇	滿洲	同	河南	直隸	滿洲	安徽	浙江	江西	直隸	山西	同
藝術文學	實業水利	軍事陸軍	政治政事	藝術文學	政治政事	學術理學	政治政事	同	軍事陸軍	藝術文學	學術理學	政治政事	學術理學	同	藝術文學	政治政事	政治政事	學術理學

附錄二 清代各朝名人分配表

世宗雍正

顏元	直隸	學術理學
嚴虞惇	江蘇	藝術文學
薩布素	滿洲	軍事陸軍
顧炎武	江蘇	學術樸學
顧祖禹	同	學術樸學
龔鼎孳	安徽	政治政事
鼇拜	滿洲	軍事陸軍
王鴻緒	江蘇	學術樸學
朱軾	江西	政治政事
余甸	福建	同 同
李焄	直隸	學術理學
年羹堯	滿洲	軍事邊務
岳鍾琪	四川	同 同
查慎行	浙江	藝術文學
查嗣璣	同	同 同
徐元夔	滿洲	政治政事
陳元龍	浙江	同 同
陳世倌	浙江	政治政事

陳鵬年	湖南	實業水利
張鵬翮	四川	同 同
張廷玉	安徽	政治政事
張廷璐	同	同 同
張伯行	河南	同 同
齊蘇勒	滿洲	實業水利
蔣廷錫	江蘇	政治政事
魏廷珍	直隸	同 同
藍鼎元	福建	同 同
釋通理	直隸	學術理學
顧人代	滿洲	軍事陸軍
高宗乾隆		
王太岳	直隸	藝術文學
王樹	江蘇	同 同
王鳴韻	同	同 同
王貞儀	安徽	學術藝事
孔廣森	山東	學術樸學
方苞	安徽	同 文學
方觀承	同	實業水利

尹會一	直隸	政治政事
尹繼善	滿洲	同 同
史貽直	江蘇	同 同
任大椿	江蘇	學術樸學
朱筠	直隸	同 同
朱士玠	福建	藝術文學
朱士瑋	同	同 文學
全祖望	浙江	學術理學
江永	安徽	同 樸學
兆惠	滿洲	軍事陸軍
李侍堯	同	同 同
李衛	江蘇	政治政事
李發枝	浙江	同 同
李紱	江西	同 同
李調元	四川	藝術文學
汪縉	江蘇	學術理學
汪由敦	浙江	政治政事
吳瑭	江蘇	學術藝事
吳儀洛	浙江	同 同

吳定	安徽	藝術文學	班弟	蒙古	軍事陸軍	程晉芳	江蘇	藝術文學
沈德潛	江蘇	同	柴大紀	浙江	同	黃景仁	同	同
沈起元	同	政治政事	范家相	同	學術樸學	黃丕烈	同	學術樸學
沈彤	同	學術樸學	秦蕙田	江蘇	同	曹錫寶	同	政治政事
邵齊燾	同	藝術文學	孫嘉淦	山西	同	惠士奇	同	學術樸學
杭世駿	浙江	學術樸學	商盤	浙江	政治政事	惠棟	同	同
金鏞	直隸	政治政事	梁國治	同	藝術文學	萬斯同	浙江	同
阿里袞	滿洲	軍事陸軍	陳兆崙	同	政治政事	彭端淑	四川	藝術文學
明瑞	同	同	陳宏謀	廣西	藝術文學	鄂爾泰	滿洲	軍事陸軍
周永年	山東	學術樸學	莊有恭	廣東	政治政事	傅恆	滿洲	軍事陸軍
胡寶瑑	江蘇	實業水利	莊存與	江蘇	同	嵇曾筠	江蘇	實業水利
胡天游	浙江	藝術文學	張照	同	學術樸學	舒赫德	滿洲	軍事陸軍
查郎阿	滿洲	軍事陸軍	張廣泗	滿洲	藝術書畫	楊應琚	滿洲	軍事陸軍
高其倬	同	政治政事	張廷琰	安徽	軍事邊務	楊名時	江蘇	政治政事
高斌	同	實業水利	張若靄	同	政治政事	董邦達	浙江	藝術書畫
納親	同	軍事陸軍	陸錫熊	江蘇	同	鄭一桂	江蘇	同
徐大椿	江蘇	學術樸學	傅清	滿洲	藝術文學	裘曰修	江西	實業水利
桂林	滿洲	軍事邊務	常青	同	軍事陸軍	葉新	浙江	政治政事
海蘭察	同	同	嵇璜	江蘇	同	厲鶚	同	藝術文學

閻堯熙	額勒登額	戴履	邁柱	盧文昭	錢澧	錢汝誠	錢陳羣	錢維城	稻康安	德保	德沛	鄭夔	魯九皋	蔣士銓	蔣樽	劉統勳	劉大櫓	齊召南
河南	滿洲	安徽	滿洲	浙江	雲南	同	浙江	江蘇	同	同	滿洲	江蘇	同	江西	江蘇	山東	安徽	浙江
政治政事	軍事陸軍	學術樸學	政治政事	學術樸學	同	政治政事	藝術文學	政治政事	軍事邊務	同	政治政事	同	同	文學	藝術書畫	實業水利	藝術文學	學術樸學

仁宗嘉慶

李長庚	朱珪	百齡	伊秉綬	江聲	王鳴盛	王友亮	王芑孫	王文治	王昶	王杰	方維甸	丁杰	顧棟高	顧光旭	寶光燾	釋際暉	羅有高
福建	直隸	滿洲	福建	同	江蘇	安徽	同	同	江蘇	陝西	安徽	浙江	同	江蘇	山東	江蘇	江西
軍事水師	政治政事	軍事邊務	同	藝術書畫	學術樸學	同	同	同	藝術文學	同	政治財務	學術樸學	學術理學	同	政治政事	學術理學	學術理學

桂馥	凌廷堪	袁枚	孫士毅	孫原湘	孫星衍	洪亮吉	段玉裁	紀昀	姚鼐	宜縣	阿桂	邵晉涵	金榜	汪中	汪輝祖	吳梯	吳錫麒	吳熊光
山東	安徽	同	浙江	同	同	同	江蘇	直隸	安徽	同	滿洲	浙江	安徽	江蘇	浙江	廣東	浙江	江蘇
同	學術理學	藝術文學	軍事邊務	藝術文學	同	同	同	學術樸學	藝術文學	同	軍事邊務	同	同	學術文學	同	政治政事	藝術文學	軍事陸軍

舒位	黃易	惲敬	焦循	彭元瑞	陳鳳翔	勒保	崔述	莊述祖	畢沅	梁同書	許宗彥	章煦	章學誠	張問陶	張廷濟	張惠言	翁方綱	書麟
直隸	浙江	江蘇	同	同	江西	滿洲	直隸	同	江蘇	同	浙江	同	浙江	同	浙江	江蘇	直隸	滿洲
同文學	同書畫	藝術文學	學術模學	學術模學	實業水利	軍事陸軍	同同	同同	學術模學	藝術文學	學術模學	政治政事	學術模學	同文學	藝術書畫	學術模學	藝術書畫	軍事陸軍
冀景瀚	額勒登保	戴衢亨	謝振定	錢大昕	慶桂	德楞泰	鄧夔琴	劉墉	劉衡	劉台拱	劉台斗	臧庸	趙翼	董誥	袁行簡	鐵寶	程瑤田	鄂輝
福建	滿洲	江西	湖南	江蘇	滿洲	蒙古	江西	山東	江西	同	江蘇	同	江蘇	浙江	江西	滿洲	安徽	滿洲
政治政事	軍事陸軍	同同	政治政事	學術模學	政治政事	軍事陸軍	政治政事	藝術書畫	政治政事	學術模學	實業水利	學術模學	藝術文學	同同	同同	政治政事	學術理學	軍事邊務
顏檢	松筠	和珅	明亮	林則徐	吳嵩梁	李兆洛	阮元	邢彥成	何紹基	江藩	托津	朱士彥	史秉直	玉麟	王錫朋	王念孫	王引之	宣宗道光
廣東	蒙古	同	滿洲	福建	江西	同	江蘇	滿洲	湖南	江蘇	滿洲	同	同	滿洲	直隸	同	江蘇	宣宗道光
同同	同同	政治政事	同同	軍事邊務	藝術文學	同同	學術模學	軍事邊務	藝術書畫	學術模學	同同	同同	政治政事	同邊務	軍事陸軍	同同	學術模學	宣宗道光

溫承惠	程祖洛	曾煥	華蘅芳	張琦	陳壽祺	陳化成	陶澍	曹振墟	梁章鉅	高杞	孫玉庭	郝懿行	俞正燮	胡培聲	胡承珙	俞樾	姚文田	初彭齡
山西	安徽	江西	同	江蘇	同	福建	湖南	安徽	福建	滿洲	同	山東	同	同	安徽	同	浙江	山東
同	同	同	同	同	同	同	同	同	同	同	同	同	同	同	同	同	同	同
同	同	同	同	同	同	同	同	同	同	同	同	同	同	同	同	同	同	同
	政事	政治財務	同	藝術軍事	學術軍事	軍事水師	政治財務	同	同	政治政事	實業水利	同	同	同	同	學術模學	政治政事	同

龔自珍	鄭國燭	嚴如煜	嚴可均	關天培	賽仲阿	龍啟瑞	錢儀吉	蔣攸銜	劉清	劉逢祿	端木國瑚	賈毓英	楊遇春	葛雲飛	彭兆霖	裕謙	鄂山	賀長齡
浙江	同	湖南	浙江	江蘇	滿洲	廣西	浙江	滿洲	貴州	江蘇	浙江	山西	四川	浙江	江蘇	同	滿洲	湖南
藝術文學	軍事陸軍	政治政事	學術模學	同	軍事陸軍	同	學術模學	實業水利	軍事陸軍	同	學術模學	實業水利	同	軍事陸軍	藝術文學	同	軍事陸軍	政治政事

文宗咸豐

姚元之	卓秉恬	卓櫟	周天爵	宋翔鳳	李開芳	李星沅	李續賓	江忠源	花鈔納	朱駸聲	朱次琦	向榮	包世臣	王士雄	王筠	牛鑑	方東樹
安徽	同	四川	山東	江蘇	廣西	同	同	湖南	蒙古	江蘇	廣東	甘肅	安徽	安徽	山東	甘肅	安徽
同	同	同	政治政事	學術模學	革命黨	政治政事	同	軍事陸軍	政治財務	學術模學	學術理學	軍事陸軍	藝術文學	同	學術模學	政治政事	藝術文學

姚椿	江蘇	藝術文學	馮桂芬	江蘇	學術藝事
胡林翼	湖南	軍事陸軍	楊秀清	廣東	革命黨
桂超萬	安徽	政治政事	鄒鳴鶴	同	軍事陸軍
徐廣縉	河南	同	塔齊布	滿洲	同
訥爾經額	滿洲	同	僧格林沁	蒙古	同
耆英	同	軍事邊務	葉名琛	湖北	政治政事
烏爾泰	同	軍事陸軍	潘世恩	江蘇	同
秦日綱	廣西	革命黨	劉寶楠	同	學術藝事
韋昌輝	同	同	穆彰阿	滿洲	政治政事
徐有壬	直隸	軍事陸軍	錢德承	浙江	同
常大厚	湖南	同	蕭朝貴	廣西	革命黨
張國樑	廣東	同	戴熙	浙江	藝術書畫
都隆阿	滿洲	同	魏源	湖南	學術藝事
陸建瀛	湖北	實業水利	羅澤南	同	軍事陸軍
黃爵滋	江西	藝術文學	饒廷選	福建	同
琦善	滿洲	軍事陸軍	穆宗同治		
舒輿阿	同	同	王慶雲	同	政治財務
湯金釗	浙江	政治政事	石達開	廣西	革命黨
馮雲山	廣東	革命黨	多隆阿	滿洲	軍事陸軍
			托明阿	滿洲	軍事陸軍
			駱秉章	廣東	同
			李文田	同	政治政事
			李秀成	廣西	革命黨
			李世賢	同	同
			沈兆霖	浙江	政治政事
			吳觀禮	同	學術藝事
			金福曾	浙江	政治政事
			官文	滿洲	軍事陸軍
			祁寯藻	山西	學術藝事
			何秋濤	福建	同
			洪秀全	廣東	革命黨
			洪大全	湖南	革命黨
			洪仁玕	廣東	革命黨
			翁同書	江蘇	軍事陸軍
			翁心存	同	政治政事
			馬新貽	山東	同
			陳玉成	廣西	革命黨
			陸心源	浙江	學術藝事

劉秉琳	趙光	瑞麟	程學啟	勞崇光	曾國藩	勝保	黃式三	彭蘊章	莫友芝	陳奐	陳喬樞	張亮基	許乃普	徐台英	袁寶慶	袁甲三	倭仁	桂良
湖北	雲南	滿洲	安徽	同	湖南	滿洲	浙江	江蘇	貴州	江蘇	福建	江蘇	浙江	廣東	河南	河南	蒙古	滿洲
同	政治政事	同	同	同	同	軍事陸軍	學術橫學	政治財務	同	藝術文學	學術橫學	軍事陸軍	同	政治政事	軍事陸軍	軍事陸軍	政治政事	政治政事

德宗光緒

日意格	毛昶熙	王德榜	王韜	王文韶	王仁堪	丁汝昌	丁壽昌	丁寶楨	丁取忠	羅惇衍	譚廷襄	鄭珍	肅順	蔣益澧	劉蓉	劉松山	劉熙載
法國	湖南	湖南	江蘇	浙江	福建	同	安徽	貴州	湖南	廣東	浙江	貴州	滿洲	湖南	同	湖南	江蘇
同	政治政事	軍事陸軍	藝術文學	同	政治政事	軍事水師	同	政治政事	學術藝事	政治政事	政治外交	學術橫學	政治政事	軍事陸軍	同	軍事陸軍	學術橫學

吳長慶	李朝斌	李宗羲	李元度	李世忠	李瀚章	李鴻章	李鴻藻	李慈銘	李善蘭	朱一新	朱靖旬	江長貴	布彥泰	左寶貴	左宗棠	立山	尹耕雲	文祥
安徽	湖南	四川	湖南	湖北	同	安徽	直隸	同	同	浙江	河南	四川	滿洲	山東	湖南	蒙古	江蘇	滿洲
同	軍事陸軍	政治政事	政治政事	軍事陸軍	同	同	政治政事	藝術文學	同	學術橫學	政治政事	同	軍事邊務	同	軍事邊務	同	同	政治政事

吳棠	安徽	政治政事	奕訢	滿洲	軍事陸軍	崇綺	滿洲	政治政事
吳汝綸	同	藝術文學	奕山	同	政治外交	崇實	同	同
吳大澂	江蘇	同 書畫	徐桐	同	同 政事	許庚身	浙江	同
沈桂芬	直隸	政治政事	恩銘	同	同	許景澄	同	同
沈葆楨	福建	同	剛毅	同	同	許振禕	江西	同 政事
余聯沅	湖北	同	孫詒經	浙江	同	張之萬	直隸	同
岑毓英	廣西	軍事陸軍	孫開華	湖南	軍事陸軍	張曜	同	軍事陸軍
何璟	廣東	軍事邊務	袁昶	浙江	政治政事	張樹聲	安徽	政治政事
廷杰	滿洲	同	唐才常	湖南	革命黨	張仁黼	河南	同
宋慶	山東	同 陸軍	徐用儀	浙江	政治外交	張百熙	湖南	同 教育
武訓	同	政治教育	徐錫麟	同	革命黨	張裕釗	湖北	藝術文學
周德潤	廣西	同 外交	翁同龢	江蘇	政治政事	郭松林	湖南	軍事陸軍
邵友謙	浙江	同	倪文蔚	安徽	同	陸寶忠	江蘇	政治教育
金國琛	江蘇	同 政事	馬玉崑	同	軍事陸軍	陳啓泰	湖南	同 政事
胡家玉	江西	同	馬文植	江蘇	學術藝事	陳崇砥	福建	同
胡光墉	浙江	軍事陸軍	馬如龍	雲南	軍事陸軍	陳國瑞	湖北	軍事陸軍
秋瑾	同	革命黨	郝長慶	湖南	同	陳澧	廣東	學術文學
洪鈞	江蘇	政治外交	袁保恆	河南	同	黃以周	浙江	同
奕譞	滿洲	政治政事	都興阿	滿洲	同	黃翼升	湖南	軍事陸軍

附錄二 清代各朝名人分配表

趙景賢	趙舒翹	魁齡	雷以誠	雷正綰	鄒容	楊銳	楊斯盛	楊深秀	楊昌濬	楊岳斌	楊文會	裕祿	陶模	馮子材	彭玉麟	曾國荃	曾紀澤	曾紀鳳
浙江	陝西	滿洲	湖北	同	四川	四川	江蘇	山西	同	湖南	安徽	滿洲	浙江	廣東	同	同	同	湖南
軍事陸軍	政治政事	學術藝事	同	軍事陸軍	革命黨	革命黨	政治教育	革命黨	同	軍事陸軍	學術理學	同	同	同	同	軍事陸軍	同	政治政事
潘祖蔭	德克碑	劉永福	劉恩溥	劉坤一	劉錦棠	劉典	劉長佑	劉秉璋	劉銘傳	鄭國魁	赫德	壽山	榮祿	錦宜	廖壽恆	葉成忠	蒲安臣	趙之謙
江蘇	法國	廣西	直隸	同	同	同	湖南	同	同	安徽	英國	同	滿洲	滿洲	江蘇	浙江	美國	浙江
學術樸學	同	軍事陸軍	政治政事	政治政事	同	同	同	同	同	同	同	同	軍事陸軍	同	同	政治外交	政治外交	學術藝事
懷塔布	邊寶泉	譚鍾麟	譚嗣同	蕭孚泗	嚴樹森	聶士成	閻敬銘	載漪	聯元	薛煥	薛福成	賽尙阿	錢江	錫良	鮑超	黎庶昌	歐陽利見	鄧承修
滿洲	滿洲	同	同	湖南	四川	安徽	陝西	滿洲	蒙古	四川	江蘇	蒙古	浙江	蒙古	四川	貴州	湖南	廣東
同	同	政治政事	革命黨	同	同	軍事陸軍	同	同	同	政治政事	政治外交	軍事陸軍	政治財務	同	軍事陸軍	藝術文學	軍事陸軍	政治外交

端錦	端方	馮煦	張之洞	曹鴻勳	彭家珍	陸潤庠	陸鍾琦	陸元鼎	孫詒讓	徐光熙	徐光弼	奕劻	帛黎	夏弼	江春霖	王先謙	宣統	靈桂	滿洲	政治財務
同	滿洲	江蘇	直隸	山東	四川	江蘇	直隸	同	浙江	直隸	直隸	滿洲	法國	滿洲	福建	湖南				
同	實業交通	同	同	政治政事	革命黨	同	同	政治政事	學術樸學	同	政治政事	政治外交	實業交通	軍事陸軍	政治政事	學術樸學				
康有為	張謇	張勳	宏闓	夏瑞芳	易順鼎	林紓	沈曾植	朱柏謀	王闓運	王祖畬	王鵬運	嚴復	釋敬安	戴鴻慈	繆荃孫	劉師培	趙爾豐	趙聲	江蘇	革命黨
廣東	江蘇	江西	廣東	江蘇	湖北	安徽	同	浙江	湖南	江蘇	廣西	福建	湖南	廣東	江蘇	江蘇	滿洲	江蘇	江蘇	江蘇
革命黨	政治同	軍事陸軍	同	政治教育	同	藝術文學	政治政事	同	同	同	藝術文學	同	藝術文學	政治政事	同	學術樸學	軍事陸軍	革命黨	江蘇	革命黨
								夏震武	嚴復初	歸莊	樊增祥	詹天佑	蒲華	勞乃宣	黃綏介	辜鴻銘	陳薛紹徵	盛宣懷	江蘇	實業交通
								浙江	福建	江蘇	湖北	廣東	同	同	浙江	同	福建	江蘇	江蘇	江蘇
								同	學術理學	同	藝術文學	學術書畫	藝術書畫	政治政事	同	同	藝術文學	藝術文學	藝術文學	藝術文學

附錄三 清代名人地域分配表

地域 人物 論

江蘇	尹耕雲	史貽直	文靖	吳兆騫	邵齊壽
王祖奮	文貞	朱用純	吳瑭	邵長衡	
王韜	文定	朱士彥	吳大澂	周揚俊	
王鴻緒	朱駿聲	朱克簡	吳熊光	周夢顏	
王昶	朱約	呂宮	吳偉業	胡寶瑛	恪靖
王引之	文簡	阮元	吳綺	洪亮吉	
王錫闡	文達	江聲	周夢顏	洪鈞	
王鳴盛		任大椿	沈彤	冒襄	
王念孫		江藩	沈起元	計東	
王樹		汪縉	李衛	段玉裁	
王鳴韶		汪琬	李兆洛	姚椿	
王文治		汪中	何焯	馬文植	
王芑孫		汪士鋐	沈德潛	夏瑞芳	
尤侗		宋翔鳳	宋駿業	秦蕙田	文恭
毛晉		宋德宜	金人瑞	徐大椿	
史秉直	文恪		金之俊	徐文元	
			文通	徐乾學	

附錄三 清代名人地域分配表

孫厚湘
孫星衍
翁心存
翁同書
翁同龢
莊存與
莊述祖
陳 免
陳 珮
陳名夏
陳維崧
陳厚耀
陸寶忠
陸錫熊
陸世儀
陸潤庠
盛宣懷
畢 沅
曹錫寶

文端
文端
文勤

華蘅芳
張 琦
張 璐
張 照
張 睿
張玉書
張亮基
張惠言
彭兆孫
彭蘊章
黃丕烈
黃景仁
馮 煦
馮桂芬
惠 棟
惠士奇
程晉芳
惲 敬
嵇 璜

文敬
文敬
文真
文真

嵇曾筠
焦 循
鄒一桂
鄒鳴鶴
楊名時
楊斯盛
葉 桂
董以寧
廖壽恆
趙 翼
臧 庸
鄭 燮
蔣 伊
蔣 溥
蔣廷錫
潘世恩
潘祖蔭
潘 耒
劉台斗

文敏
文敏
壯節
文定
文恪
文肅
文恭
文勤

劉台拱
劉師培
劉熙載
劉寶楠
劉逢祿
劉大昕
錢維城
錢謙益
繆荃孫
蔣福成
薛 雪
關天培
歸 莊
嚴 虞
釋際醒
顧炎武
顧光旭
顧祖禹
顧棟高

文敏
文敏

浙江

丁杰
 王士桂
 王文韶
 方大猷
 毛奇齡
 毛際可
 朱一新
 朱柏謀
 朱彝尊
 全祖望
 呂留良
 李善蘭
 李發枝
 李慈銘
 吳錫麒
 吳恪儀
 吳觀禮
 沈 陶
 沈曾植

文勤

沈兆霖
 汪由敦
 汪輝祖
 商 盤
 杭世駿
 金福曾
 邵友濂
 邵晉涵
 姜辰英
 查 昇
 查慎行
 查嗣琛
 姚文田
 姚啓聖
 胡 渭
 胡天游
 胡光墉
 俞 樹
 秋 瑾

文忠
 文端

袁 枚
 袁 昶
 孫詒經
 孫詒讓
 孫士毅
 夏震武
 徐用儀
 徐錫麟
 范家相
 高士奇
 柴大紀
 許宗彥
 許景澄
 許乃普
 許庚身
 陶 樸
 陸心源
 陸元鼎
 陸隴其

忠節
 文靖
 忠愍
 文恪
 文肅
 文恪
 恭慎
 勤肅

章 煦
 章學誠
 陳兆崙
 陳洪綬
 陳元龍
 陳世倌
 陳汝咸
 梁國治
 曹 溶
 黃式三
 黃緩介
 黃以周
 黃宗羲
 黃 易
 黃 機
 張志聰
 張廷濟
 張履祥
 湯右曾

文簡
 文簡
 文勤
 文定

湯金釗 文端
 勞乃宜
 董誥 文恭
 萬斯大
 萬斯同 貞文
 董邦達 文恪
 葛雲龍 壯節
 齊召南
 蒲華
 端木國瑚
 葉成忠
 葉新
 厲驥
 趙之謙
 盧文昭
 錢汝誠
 錢陳羣 文端
 錢德承
 錢儀吉

安徽

錢江
 應擢謙
 戴望
 戴熙 文節
 嚴可均
 譚廷襄 端恪
 龔自珍
 丁壽昌
 丁汝昌
 王士雄
 王友亮
 王貞儀
 方苞
 方東樹
 方觀承 恪敏
 方維甸 勤襄
 包世臣
 江永
 吳定

吳棠 勤襄
 吳汝綸
 吳長慶 壯武
 汪昂
 李鴻章 文忠
 李瀚章 勤恪
 金榜
 姚際恆
 姚元之
 姚鼐
 施潤章
 俞正燮
 胡承珙
 胡培聲
 倪文蔚
 馬玉崑 忠武
 凌廷堪
 桂超方
 梅文鼎

曹振鏞 文正
 張廷玉 文和
 張廷璐
 張廷琰
 張若靄
 張樹聲 靖達
 程祖洛 簡敬
 程學啟 忠烈
 程瑤田
 楊文會
 僧漸江
 趙吉生
 鄭國魁
 劉大櫟
 劉秉璋
 劉銘傳 壯肅
 錢澄之
 戴震
 聶士成 忠節

江西

龔鼎孳 端毅

王猷定

朱軾 文端

朱聶

李紱

吳嵩梁

胡家玉

陳鳳翔

許振禕

彭元瑞 文勤

彭士望

曾燠

黃爵滋

張勳 忠武

喻昌

裘曰修 文達

裘行簡 恭勤

魯九皋

蔣士銓

湖南

鄧夢琴

劉銜

戴衢亨 文端

魏禧

羅有高

丁取忠

王闓運

王夫之

王先謙

王德榜

左宗棠 文襄

江忠源

何紹基

李朝斌

李元度

李星沅 文恭

李續賓

李世忠

胡林翼 文忠

洪大全

孫開華 壯武

郝長慶

唐才常

陶樹 文毅

常大淳

郭松林 武壯

陳啟泰

陳鵬年

賀長齡

黃翼升 武靖

張百熙

勞宗光 文毅

彭玉麟

曾國藩 文正

曾國荃 忠襄

曾紀澤 惠敏

曾紀鳳

楊昌濬

楊岳斌 勇毅

歐陽利見

鄭國鴻

蔣益澧 果敏

劉沅

劉典 果敏

劉松山

劉長佑 忠莊 武慎

劉坤一

劉錦棠 襄勤

魏源

謝振定

譚鍾麟 文勤

譚嗣同

嚴如煜

釋敬安

羅澤南 忠節

蕭孚泗 壯肅

余聯沅

四川

易順鼎
陸建瀛
陳國瑞
張裕釗
雷以誠
熊賜履
葉名琛
樊增祥
劉秉琳
江長貴
李調元
李宗羲
岳鍾琪
卓 檉
卓秉恬
唐 甄
張鵬翮
張問陶
彭家珍

文端
文端
文端
襄勤
文端

廣西
貴州
雲南

彭端淑
鄒 容
楊遇春
楊 銳
雷正綰
鮑 超
薛 煥
嚴樹森
馬如龍
趙 光
錢 澧
丁寶楨
莫友之
劉 濟
黎庶昌
鄭 珍
王鵬運
石達開
岑毓英

忠武
忠莊
文恪
文誠

李開芳
李秀成
李世賢
周德潤
韋昌輝
秦日綱
陳宏謀
劉永福
龍啓瑞
莊有恭
徐台英
馮子材
張國樑
詹天佑
鄧承修
駱秉章
戴鴻慈
蕭朝貴
顏 檢

忠武
忠武
忠武
文恭

廣東 二〇

羅惲衍
釋道濟
朱次琦
何 璟
李文田
吳 棣
吳大奇
容 闕
陳 瑛
陳 澧
梁佩蘭
康有為
王仁堪
王慶雲
朱仕珩
朱仕琇
伊秉綬
江春霖
李光地

文恪
文恪
清端
順恪
文勤

文貞

李長庚 忠毅
 沈葆楨 文肅
 何秋濤
 余 甸
 林則徐 文忠
 林古度
 林 紓 貞文
 施 琅 襄壯
 洪承疇 文襄
 梁章鉅
 陳化成 忠愍
 陳壽祺
 陳喬樞
 陳崇砥
 陳薛紹徵
 辜湯生
 彭 鵬
 鄭芝龍
 藍鼎元

河南

嚴 復
 嚴復初
 饒廷選 壯果
 龔景瀚
 王 鐸 文安
 毛昶熙 文達
 朱靖旬
 宋 學
 周亮工
 袁甲三 端敏
 袁保恆 文誠
 袁寶慶
 侯方域
 徐廣縉
 湯 斌
 張伯行 清恪
 張仁黼
 劉體仁
 閻光熙

山東

王 筠
 王士禛 文簡
 孔廣森
 左寶貴 忠壯
 仲永檀
 李芝芳 文襄
 宋 慶 忠勤
 宋 琬
 初彭齡
 周天爵 文忠
 周永年
 武 訓
 孫玉庭
 孫 蕙
 桂 馥
 郝懿行
 馬新貽 端敏
 郭 琇
 曹鴻勳

直隸

傅以漸
 張爾岐
 黃貞麟
 趙執信
 劉 墉 文清
 劉統勳 文正
 寶光霽
 王太岳
 王錫鵬 剛節
 尹會一
 朱 珪 文正
 朱 筠
 李 燾
 李鴻藻 文正
 沈桂芬 文定
 林起龍
 金 鎔
 邵大業
 紀 昀 文達

山西

翁方綱
徐光弼
徐光熙
徐有壬 莊駁
孫承澤
孫奇逢
孫博雅
崔述
陸鍾琦
張曜 勤果
張之萬 文遠
張之洞 文襄
舒位

甘肅

陝西

于成龍 清端
祁甯藻 文端
孫嘉檢 文定
栗毓笑 恭勤
梁化鳳 敏壯
康基淵
陳廷敬 文貞
溫承惠
楊深秀
趙舒翹
魏象樞 敏果
閻若璩
閻敬銘
牛鑑
向榮 忠武
王杰 文端
王宏撰
李顥
李柏

蒙古

滿洲

李因篤
李猶龍
姜瓖
孫可望 恪順
立山 忠貞
衣沙納 文定
松筠 文清
班弟 義烈
倭仁 文端
裕謙 靖節
僧格林沁 忠
德楞泰 壯果
賽尚阿
聯元 文正
錫良 文誠
于成龍 襄勤
孔有德
文祥 文忠
尹繼善 文端

石廷柱 忠勇
玉麟 文恭
代善 烈
布彥泰
年羹堯
托明阿
托津 文定
兆惠 文襄
多鐸 通
多爾袞 忠
多隆阿 忠勇
百齡 文敏
廷杰
夏綱
吳三桂
那彥成 文毅
李率泰 忠襄
李侍堯 恭毅
尚可喜

附錄三 清代名人增城分配表

奕訢	奕山	查耶阿	耶坦	耶廷佐	阿濟格	阿里袞	阿巴泰	阿桂	官文	和珅	宜縣	納蘭性德	金光祖	岳樂	明珠	明瑞	明亮	尙之信
忠	莊簡					襄莊	敏	文成	文恭							果烈	文襄	

桂林	桂良	書麟	剛毅	恩銘	耆英	徐元夔	徐桐	高斌	高杞	高其倬	孫恩克	范文程	耿繼茂	耿精忠	耿仲明	租大壽	奕讓	奕劻
壯敏	文端	文勤		忠愍		文定		文定	文良	襄武	文肅	忠敏					賢	密

舒赫德	舒興阿	鄂輝	鄂爾泰	鄂山	張廣泗	訥爾經額	裕祿	勝保	海蘭察	常青	納親	勒保	都隆阿	都興阿	崇綺	崇實	郭世隆	烏蘭泰
文襄		恪靖						武莊		恭簡		文襄	清愨	文節	文勤		武壯	

端錦	端方	榮祿	綿宜	壽山	鐵寶	楊應琚	費英東	福康安	塔齊布	魁齡	瑞麟	靳輔	喀喀穆	傑書	博洛	傅清	傅恆	琦善
忠衷	忠敏	文忠						文襄	忠武	端恪	文莊	文襄		良	定	襄烈	文忠	文勤

清代七百人傳

豪格 武

齊蘇勤 勤恪

寧完我 文毅

趙廷臣 清獻

趙爾豐

劉之源

蔣攸銛

蔣國柱

肅順

慶桂 文恪

德沛 儀

德保 文莊

蔡毓榮

穆彰阿

邁柱 文恭

賽冲阿 襄勤

濟爾哈朗 莊

額勒登保

額勒登額

額爾德尼文成

額亦都

薩哈璘 毅

薩布素

載漪

邊寶泉

懷塔布 恪勤

顧八代 文端

鼉拜 文恭

靈桂

蒲安臣

赫德

日意格

帛黎

德克碑

美國
英國
法國

附錄四 清代名人分類統計表

總計	革命黨	藝術	學術	實業	軍事	政治	類區	
							屬	域
144	1	42	56	7	5	33	蘇	江
102	2	26	34		7	33	江	浙
51		9	16	1	8	17	徽	安
23		7	4	2		10	西	江
51	3	3	4	1	28	12	南	湖
9		3		1	1	4	北	湖
18	3	3	1	1	6	4	川	四
3					1	2	南	雲
5		2	1		1	1	州	貴
30		8	4		7	11	建	福
24	5	1	2		5	11	東	廣
15	8	2	1		2	2	西	廣
30		3	9		3	15	隸	直
15				3	3	9	南	河
26		4	6	2	4	10	東	山
10	1		2	1		6	西	山
12		1	4		4	3	西	陝
2					1	1	肅	甘
128		1	2	7	83	35	洲	滿
11					6	5	古	蒙
5				1	3	1	人	國外
714	23	115	146	27	178	225	計	總

附錄五 清代名人異名諡法檢查表

一筆至二筆

一之	謝振定	才甫	山史	小舫	陳庭敬	子居	惲敬	文
一官	鄭芝龍	于一	于庭	于馨	王猷	子美	何紹基	文升
一瓢老人	薛雪	于庭	于馨	于屏	王猷	子晉	毛晉	文正
八大山人	朱耷	于馨	于屏	于培	傅以漸	子屏	孫貽經	文正
二曲	李願	允倩	允倩	子培	朱駿聲	子培	江藩	文正
二雲	邵晉涵	大可	大可	子儼	毛奇齡	子儼	沈曾植	文正
二銘	翁心存	大宗	大宗	子高	杭世駿	子高	莫友芝	文正
又玠	李衛	大紳	大紳	子湘	汪縉	子湘	戴望	文正
又陵	嚴復	大業	大業	子湘	徐大椿	子湘	邵長蘅	文成
号父	盧文昭	子九	子九	子儁	毛晉	子儁	李星沅	文成
小丘	鄒一桂	子才	子才	子壽	袁枚	子壽	吳觀禮	文安
小午	袁保恆	子方	子方	子霖	陶模	子霖	姚椿	文忠
小疋	丁杰	子尹	子尹	子瀟	鄭珍	子瀟	陶樹	文忠
小宋	何璟	子田	子田	子德	伊大椿	子德	孫原湘	文忠
小松	黃易	子青	子青	子德	張萬萬	子德	李因篤	文忠

四筆

李秀成 汪士鉉 董以寧 朱珪 會國藩 李鴻藻 聯元 曹振鏞 劉統勳 阿桂 額爾德尼 王鐸 文祥 林則徐 周天爵 沈兆霖 李鴻章

文端 文端 文端 文端 文端 文端 文端 文端 文端 文誠 文誠 文誠 文誠 文誠 文誠 文傳 文傳 文毅 文毅 文毅 文毅

錢陳羣 朱軾 桂良 張鵬翮 卓秉恬 顧八代 王杰 湯金釗 丁寶楨 戴鴻慈 錫良 袁保恆 姚文田 黃機 勞崇光 邢彥成 魏裔介 寧完我 陶樹

沈德潛 沈葆楨 范文程 蔣廷錫 洪承疇 明亮 兆惠 李芝芳 左宗棠 張之洞 勒保 福康安 舒赫德 靳輔 王引之 王士禎 魏廷珍 章煦 陳元龍

天一 天士 天生 天牧 天同一生 方忠 方之 方耕 仁山 仁菴 元同 元孚 元長 元亮 元撫 元調 元穎 中孚 孔伯

劉清 葉桂 李因篤 惠士奇 王錫闡 陶模 程學啓 莊存與 楊文會 蔡毓榮 黃以周 尹會一 尹繼善 周亮工 林則徐 寶光彝 梁同書 李顥 湯斌

僧漸江 閻敬銘 王闓運 王闓運 李善蘭 張勳 李鴻章 林則徐 戴鴻慈 劉體仁 徐元文 錢儀吉 蔣士銓 傅山 端方 袁甲三 丁杰 栗毓美 黃宗羲

大鵬

厲鶚

玉可

張琦

石道人

傅山

仲因

關天培

五筆

正

韋昌輝

玉叔

宋瑰

玄恭

歸莊

仲治

張問陶

正三

翁方綱

冰叔

勞乃宣

甘亭

彭兆蓀

仲夏

劉秉璋

立人

舒位

申甫

陸鍾琦

巨來

李紱

仲岳

羅澤南

立方

陸建瀛

申受

劉師培

生白

薛雪

仲宣

吳棠

立齋

姚際恆

申著

李兆洛

古愚

朱祖謀

仲約

李文田

幼丹

徐元文

世恩

張仁黼

仕驥

魯九皋

仲容

孫詒讓

幼安

沈葆楨

可亭

朱軾

左南

范家相

仲華

榮保

幼亭

錢維城

石生

魏裔介

左海

陳壽琪

仲碩

易順鼎

幼霞

聶士成

石君

朱珪

主敬

錢陳羣

仲孺

惠士奇

幼植

任大椿

石東

楊昌濬

未谷

桂馥

竹汀

錢大昕

召弓

王鵬運

石卿

張亮基

仙麓

苗夔

竹村

胡培聲

北江

盧文弨

石樞

李星沅

半塘老人

王鵬運

竹君

朱筠

北海

洪亮吉

石庵

紀昀

劉墉

王鵬運

竹厓

譚廷襄

北溪

孫承澤

石靈

張璐

仲子

凌廷堪

次仲

許景澄

北漢

于成龍

石頑

王念孫

仲山

廖壽恆

次辰

黃機

六筆

大鵬

厲鶚

玉可

張琦

石道人

傅山

仲因

關天培

次風 次耕 吉甫 而農 西成 西京 西陂 西址 西谷 西庄 西溪 西昌老人
 在中 百史 百詩 江村 匡國 充宗

齊召南 潘耒 徐用儀 王夫之 臧庸 董誥 宋犖 王鳴盛 蔣廷錫 湯右曾 王鳴盛 姜宸英 喻昌 邵大業 陳名夏 閻若璩 高士奇 岑毓英 萬斯大
 休承 安士 圭庵 耳山 耳北 曲園 肥瞻 成德 老蓮 長齋 存齋 亨九 岐山 省三 考夫 伯元 伯申

七筆

朱士彥 周夢顏 吳觀禮 陸錫熊 孫承澤 俞樾 何焯 納蘭性德 陳洪綬 倭仁 陸心源 洪承疇 梁化鳳 劉銘傳 張履祥 阮元 王引之
 伯平 伯先 伯言 伯定 伯昂 伯涵 伯賈 伯雄 伯蓀 冷君 阮甫 杏村 夏 君青 君直 君鄰 男嫻 壯果 壯武

唐才常 趙聲 梅會亮 夏燮武 姚元之 曾國藩 潘祖蔭 舒赫德 徐錫麟 趙之謙 曾國荃 江春霖 傑書 徐有壬 洪亮吉 趙廷臣 陳薛紹徽 饒廷選 吳長慶
 壯武 壯飛 壯敏 壯節 壯節 壯肅 壯肅 壯肅 冶秋 冶亭 作英 芍庭 言夏 甫草 阮亭 里堂 伸符 甸華 希庵 廷譚

孫開華 譚嗣同 桂林 葛雲龍 鄒鳴鶴 蕭孚泗 劉銘傳 張百熙 鐵保 蒲華 魏禧 陳瑚 計東 王士禎 焦循 趙執信 沈煦 李纘賓 王鳴韶

松友	松友	尙安鄂濟氏	尙佐	尙白	昌岐	昌伯	林一	芍農	杏蓀	辛楣	辛階	孝減	孝遠	孝先	克惠	延清
----	----	-------	----	----	----	----	----	----	----	----	----	----	----	----	----	----

人筆

鄒鳴鶴	嵇曾筠	宜縣	嵇瓚	施潤章	黃翼升	郭世隆	馮桂芬	李文田	盛宣懷	錢大昕	勞崇光	朱祖謀	張之洞	張伯行	李續賓	劉統勳
定	味經	金門	長素	長音	長白	武靖	武莊	武承	武壯	武七	武	芸眉	竹培	竹香	松齋	松厓

博絡	秦釐田	呂宮	康有為	呂宮	吳三桂	黃翼升	海蘭察	劉長佑	崔述	烏蘭泰	郭松林	武訓	豪格	彭元瑞	朱彝尊	陳鳳翔	劉清	惠棟
忠勇	忠勇	忠武	忠武	忠武	忠武	忠武	忠武	忠壯	忠	忠	忠	青岳	青竹	青主	芙沼	定盒	定圃	定宇

石廷柱	多隆阿	張勳	馬玉崑	張國樑	楊遇春	塔齊布	向榮	左寶貴	僧格林沁	奕訢	多爾袞	龍賜履	傅山	傅山	高其倬	龔自珍	德保	惠棟
孟英	忠襄	忠襄	忠毅	忠愍	忠愍	忠愍	忠勤	忠節	忠節	忠節	忠節	忠惠	忠敏	忠敏	忠壯	忠壯	忠烈	忠貞

王士雄	曾國荃	李華泰	李長庚	恩銘	陳化成	徐用儀	宋慶	袁昶	羅澤南	關天培	聶士成	端錦	端方	耿繼茂	鮑超	劉松山	程學啓	立山
-----	-----	-----	-----	----	-----	-----	----	----	-----	-----	-----	----	----	-----	----	-----	-----	----

南沙	秋嶽	秋農	秋紉	秋帆	皆令	衍石	查田	衍石	春鷗	春圃	春和	春帆	春江	春木	茗文	威丹	思仁	貞庵
蔣廷錫	曹溶	姚文田	李善蘭	畢沅	黃媛介	錢儀吉	查慎行	錢儀吉	鮑超	祁濟藻	傅恆	紀昀	陸元鼎	姚椿	汪琬	鄒容	周夢顏	魏裔介
郎亭	彥卿	邵亭	涸溪	厚盒	厚庵	明渠	首源	拙明	星巖	星齋	星齋	星叔	笑叔	展成	南園老人	南耦	南園	南崖

沈兆霖	岑毓英	莫友芝	徐大椿	楊岳斌	李光地	劉清	姚際恆	胡渭	傅以漸	陳兆崙	羅惇衍	許庚身	朱筠	尤侗	陳奐	方維甸	錢澧	朱珪
若瞻	若膺	若采	若汀	席儒	勇毅	勇愨	拂塵	恪靖	恪靖	恪勤	恪順	恪敏	拜經	冠雲	紉庵	畏廬	畏堂	述庵

朱軾	段玉裁	金人瑞	薛衡芳	彭家珍	馮子材	楊岳斌	唐才常	胡寶瑤	鄂輝	懷塔布	孫可望	方觀承	臧庸	沈彤	錢維城	林紓	王杰	王昶
振軒	振甲	容齋	容若	容甫	容可	莊生	剛節	剛主	剛父	豈凡	致一	烈			香巖	香巖	香濤	香樹

十筆

張樹聲	于成龍	岳鍾琪	納蘭性德	汪中	莊有恭	呂留良	王錫鵬	李塔	陸心源	金之俊	朱用純	代善			葉桂	張之洞	張之洞	錢陳羣
-----	-----	-----	------	----	-----	-----	-----	----	-----	-----	-----	----	--	--	----	-----	-----	-----

海帆 卓秉恬 涇南
海壽 翁景瀚 朗思
素存 張玉書 朗齋
展如 趙舒翹 恕谷
師竹 陳奕 荆峴
師茗 汪由敦 珠軒
益吾 王先謙 訥庵
益甫 趙之謙 峴莊
退谷 汪士鉉 躬庵
退谷 孫承澤 瓶庵居士
退省 蕭主人 彭玉麟 息園
祖似 伊秉綬 奮斯
祖庚 翁同書 陳陽
祖貽 康有為 泰舒
純甫 容閔 恭甫
桐門 章煦 恭勤
書昌 周永年 恭勤
耘松 趙翼 恭慎
夏重 查慎行 恭毅

張照 恭簡
沈翀 皋聞
張曜 梅餘
李璩 荔裳
湯斌 時齋
額勒登保
汪昂
劉坤一 通
彭士望 密
翁同龢 莊
齊召南 莊駉
彭鵬 莊簡
閻冕熙 敏
胡寶瑑 敏壯
陳壽琪 敏果
栗毓美 敏達
裘行簡 偉人
許庚身 黃山
李侍堯 曼士

十一筆

常青 章之
張惠言 章侯
查慎行 得天
宋琬 荷之
楊遇春 培之
葉民 葉民
基平 葉民
紹衣 葉民
紹武 葉民
紹祖 葉民
崑臣 葉民
崑林 葉民
徐有壬 葉民
濟爾哈朗 葉民
奕劻 葉民
奕山 葉民
阿爾泰 葉民
梁化鳳 葉民
魏象樞 葉民
李衛 葉民
王杰 葉民
王錫 葉民
王錫 葉民
裘日修 葉民
啓泰 葉民

高其倬 陳洪綬
張照 戴衢亨
馬文植 戴衢亨
冒襄 馬文植
王太岳 冒襄
全祖望 王太岳
黃丕烈 全祖望
初彭齡 黃丕烈
葉名琛 初彭齡
魏裔介 葉名琛
倪文蔚 魏裔介
劉塘 倪文蔚
杭世駿 劉塘
祁澣藻 杭世駿
俞正燮 祁澣藻
朱筠 俞正燮
孫奇逢 朱筠

勛茲 桴亭 問亭 寄圃 寄禪 倦圃 雪木 雪琴 雪棠 雪巖 雲門 清恪 清卿 清弼 清端 清端 清獻 清獻

湯金釗 陸世儀 方觀成 孫玉庭 釋敬安 曹溶 李柏 彭玉麟 鄭國鳩 胡光墉 樊增祥 張伯行 吳大澂 錫夏 都興阿 陳夔 于成龍 陸隴其 趙廷臣 梅庵 梅村 梅崖 寶旭 魚門 望寬 望山 望溪 鹿牀 飛黃 訥堂 華野 惟廣 姬傳 眷誠 健餘 庸盒 庶蕃 乾齋

鐵保 吳偉業 朱士瑒 王錫闡 程晉芳 吳熊光 尹繼善 方苞 戴熙 鄭芝龍 釋際醒 郭琇 翁景瀚 姚鼐 詹天佑 尹會一 薛福成 曾煥 陳元龍 習齋 崦藍 喟 琰 愚山 胎上 琢公 植之 闕中 景文 景孟 景南 景苑 景庭 祝生 掌仍 階平

十一筆

顏元 方大猷 金人瑞 鄧石如 施閏章 王士禎 施琅 方東樹 梁章鉅 嚴可均 胡承珙 王友亮 顧祖禹 馮桂芬 胡林翼 彭元瑞 梁國治 惺生 雁汀 衆仲 殿臣 欽光 敦甫 晚邨 揆村老人 藍林 智治 絮非 善長 朝宗 明叟 攝約 琴南 順恪 會侯

胡渭 王慶雲 孔廣森 張國樑 錢澄之 湯金釗 林則徐 呂留良 趙之謙 梁章鉅 孫士毅 魯九皋 徐元夢 侯方域 莫友芝 孔廣森 林紆 吳六奇 毛際可

單溪 閩亭 雅倫 稚璜 智亭 滋圃 滋圃 揚孫 惠敏 雲汀 雲梧 雲崖 雲臺 越縵老人 鈞卿 瑶峯 健康 滌庵 湘涵

翁方綱 德保 董誥 丁寶楨 塔齊布 關天培 莊有恭 蔣廷錫 曾紀澤 陶樹 丁取忠 阿桂 阮元 李慈銘 徐有壬 梁國治 徐乾學 夏震武 彭兆蓀 湘綺 無山 無異 無競居士 惺南 惺園 筠園 尊侯 渾然 紫翁 紫翊 紫詮 椒生 幾道 琴德 裕泰

十二筆

王闓運 彭鵬 王宏撰 張之洞 錢儀吉 顏檢 王杰 朱士玠 施琅 顏元 鄭珍 王祖畬 王韜 羅惇衍 嚴復 王昶 裕齋 萊友 敬之 敬弦 敬庵 敬修 敬平 載福 路玉 溍生 復生 復初 復初 復翁 滄州 稚威

魏禧 王筠 裘行簡 史貽直 張伯行 周天爵 熊賜履 胡培聲 楊岳斌 曾國藩 張璐 許乃普 譚嗣同 顧棟高 顧祖禹 黃丕烈 陳鵬年 洪亮吉 胡天游 葛如 虞廷 頑伯 愛伯 遠天 遠生 毓秀 瑞明 藥房 煦初 勤果 勤恪 勤恪 勤恪 勤肅 勤襄 勤襄 道成 摺珊 爽秋

吳六奇 宋翔鳳 鄧石如 李慈銘 釋通理 彭士望 楊深秀 邊寶泉 翁同書 毛昶熙 張曜 齊蘇勒 李瀚章 陶模 方維甸 吳棠 陸世儀 余聯沅 袁昶

照信 筱珊 筱葦 筱軒 筱雲 義烈 廉卿 運清 經崖 經笙 煥會 環極 靖達 靖節 葆琛 葆巖 楚楨 補山 聖嶼

李侍堯 聖徵 繆荃孫 退穀 李瀚章 嗣璉 吳長慶 嗣寶 徐用儀 逸齋 班弟 詠齋 張裕釗 喬廬 張鵬翻 辟疆 許乃普 殿麟 沈桂芬 汪輝祖 錢象樞 絳 張樹聲 曉 裕謙 寧人 莊述祖 樹山 方維甸 漱山 劉寶楠 歲三 孫士毅 齊子 金人瑞 輔子

十四筆

吳錫麒 臺山 方觀成 嘉父 查慎行 嘉言 應擡謙 嘉祥 郭世隆 粹方 朱士彥 實父 傅山 實甫 冒襄 實齋 吳定 潤之 鳳石 慎伯 慎修 顧炎武 蒼忱 王韜 鼎甫 顧炎武 碩甫 全祖望 碩甫 王祖畬 夔東 王祖畬 夔華 毛奇齡 夔隱 金榜 寤崖

羅有高 壽星 樊增祥 壽卿 喻昌 端恪 張國樑 端恪 夏瑞芳 端敏 易順鼎 端敏 祁寯藻 端毅 章學誠 端臨 胡林翼 鳳苞 陸潤庠 尊客 包世臣 粹亭 江永 與桐 呂宮 爾純 朱一新 容舫 陳奐 槐堂 釋際醒 漫堂 馮煦 廣廷 王士雄 廣陵 劉熙載 廣廈

裕祿 劉松山 譚廷襄 魁齡 袁甲三 馬新貽 龔鼎孳 劉台拱 毛晉 李慈銘 馮子材 邵晉涵 劉統勳 趙光 潘世恩 宋犖 阿桂 陳元龍 康有為

簡齋 瓊臺 羅山 龐村 寶成 寶意 夔律 繡庭 藥亭 鏞堂 葵堂 樸園

二十筆至三十一筆
十二筆

袁枚 齊召南 羅澤南 德保 嚴虞惇 商盤 王鳴韶 嵇瑣 梁佩蘭 臧庸 李調元 周亮工

蘭先 蘭甫 蘭泉 蘭陔 蘭皋 蘭孫 蘭雪 繼莊 蕭翁 鐵崖 鐵橋 雙峯 覺斯 儷生 夔石 鶴皋 驪軒 儼齋 鑄萬

沈煦 陳澧 王昶 常大淳 郝懿行 李鴻藻 吳嵩梁 劉獻廷 王鵬運 史貽直 嚴可均 年羹堯 王鐸 曹振鏞 王文韶 雷以誠 孔廣森 王鴻緒 唐甄

懿齋 鑑伯 鑑湖女俠 纓蕪 靈胎 靈臯 驚寔 續濤 靈巖山人 觀齋 顛門 孫嘉燾 吳大奇 秋瑾 畢沅 徐大椿 方苞 蒲安臣 江聲 畢沅 祁備藻 駱秉章

附錄五 清代名人異名謚法檢查表